


Nuevo Testamento en  
mixteco



New Testament in Mixtec, Atatláhuca (MX:mib:Mixtec,  
Atatláhuca)

**Nuevo Testamento en mixteco**  
**New Testament in Mixtec, Atatláhuca (MX:mib:Mixtec, Atatláhuca)**  
 copyright © 1973 Wycliffe Bible Translators, Inc.

Language: Mixtec, Atatláhuca

Translation by: Wycliffe Bible Translators, Inc.

Mixteco, Atatláhuca [mib], Mexico

### **Copyright Information**

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament**

in Mixtec, Atatláhuca

© 1973, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 21 Feb 2024 from source files dated 29 Jan 2022  
 9665e546-39d0-5bd5-8b10-38916a94951f

## Contents

SAN MATEO . . . . .	1
SAN MARCOS . . . . .	38
SAN LUCAS . . . . .	61
SAN JUAN . . . . .	99
HECHOS . . . . .	127
ROMANOS . . . . .	163
1 CORINTIOS . . . . .	178
2 CORINTIOS . . . . .	192
GÁLATAS . . . . .	202
EFESIOS . . . . .	208
FILIPENSES . . . . .	213
COLOSENSES . . . . .	217
1 TESALONICENSES . . . . .	221
2 TESALONICENSES . . . . .	224
1 TIMOTEO . . . . .	226
2 TIMOTEO . . . . .	230
TITO . . . . .	233
FILEMÓN . . . . .	235
HEBREOS . . . . .	236
SANTIAGO . . . . .	247
1 PEDRO . . . . .	251
2 PEDRO . . . . .	255
1 JUAN . . . . .	258
2 JUAN . . . . .	262
3 JUAN . . . . .	263
JUDAS . . . . .	264
APOCALIPSIS . . . . .	266

## JNUHUN VAHA NI TEE SAN MATEO

*Lista ñayuu yucūn jeē ní quiji Jesucristo  
(Lc. 3.23-38)*

<sup>1</sup> Yāha cūu lista ñayuu yucūn jeē ní quiji Jesucristo. Te máá yá ní quiji nuū yucūn rey David, te David ní quiji nuū yucūn Abraham.

<sup>2</sup> Abraham ní cuu de tátá Isaac, te Isaac ní cuu de tátá Jacob, te Jacob ní cuu de tátá Judá jiin táca ñani i. <sup>3</sup> Te Judá ní cuu de tátá Fares jiin Zara, te náná ndindúú i ní cuu Tamar. Te Fares ní cuu de tátá Esrom, te Esrom ní cuu de tátá Aram. <sup>4</sup> Te Aram ní cuu de tátá Aminadab, te Aminadab ní cuu de tátá Naasón, te Naasón ní cuu de tátá Salmón. <sup>5</sup> Te Salmón ní cuu de tátá Booz, te náná i ní cuu Rahab. Te Booz ní cuu de tátá Obed, te náná i ní cuu Rut. Te Obed ní cuu de tátá Isai. <sup>6</sup> Te Isai ní cuu de tátá David, tēe ní cuu rey. Te rey David ní cuu de tátá Salomón, te náná i, xīhna gā ní cuu ña ñasihí Urias.

<sup>7</sup> Te Salomón ní cuu de tátá Roboam, te Roboam ní cuu de tátá Abías, te Abías ní cuu de tátá Asa. <sup>8</sup> Te Asa ní cuu de tátá Josafat, te Josafat ní cuu de tátá Joram, te Joram ní cuu de tátá Uzías. <sup>9</sup> Te Uzías ní cuu de tátá Jotam, te Jotam ní cuu de tátá Acáz, te Acáz ní cuu de tátá Ezequías. <sup>10</sup> Te Ezequías ní cuu de tátá Manasés, te Manasés ní cuu de tátá Amón, te Amón ní cuu de tátá Josías. <sup>11</sup> Te Josías ní cuu de tátá Jeconías jiin táca ñani i, máá tiempo jeē cuángoo ñayuu Israel preso nde ñuu Babilonia.

<sup>12</sup> Te náa cáyūcú i yūcuán, te Jeconías ní cuu de tátá Salatiel. Te Salatiel ní cuu de tátá Zorobabel. <sup>13</sup> Te Zorobabel ní cuu de tátá Abiud, te Abiud ní cuu de tátá Eliaquim, te Eliaquim ní cuu de tátá Azor. <sup>14</sup> Te Azor ní cuu de tátá Sadoc, te Sadoc ní cuu de tátá Aquim, te Aquim ní cuu de tátá Eliud. <sup>15</sup> Te Eliud ní cuu de tátá Eleazar, te Eleazar ní cuu de tátá Matán, te Matán ní cuu de tátá Jacob. <sup>16</sup> Te Jacob ní cuu de tátá José, tēe ní cuu yá María. Te María ní cuu ña náná Jesús, Yāa naní Cristo.

<sup>17</sup> Te nde Abraham te nde David ní iyo uxí cuūn yucūn. Te nde David te nde náa cuángoo ñayuu Israel preso ñuu Babilonia ní iyo inga uxí cuūn yucūn. Te nde ná ní jengoo i preso te nde ní cacu Cristo, suni ní iyo inga uxí cuūn yucūn.

*Jeē ní cacu Jesucristo  
(Lc. 2.1-7)*

<sup>18</sup> Te jeē ní cacu Jesucristo, súcuan ní cuu: Náná yá María, je ní cundaá jeē quijnáhan ña jiin José. Te nde ná tu quijnáhan ña jiin de,

te ní jecūhun séhe ña ní sáha Espíritu Santo. <sup>19</sup> Te José, tēe quijnáhan ña jiin, chí tēe ndaá cūu de. Te tu ní cúní de cuáha de jnūhun canu ña, chí sa cúní de jeē na jécuiñí sáhi jeē ma quijnáhan de jiin ña. <sup>20</sup> Te níni súcuan nácani ní de, te jiin jéni ní quée-ní ñin ndajéhe máá Jítoho yó Yāa Dios nuū de, te ní cahān yá jiin de:

José, séhe yucūn David, ma yūhu ró cueca ró ñasihí ró María, chí séhe jeē scácu ña, vēji i nde nuū máá Espíritu Santo. <sup>21</sup> Te scácu ña ñin séhe yá. Te snaní ró i Jesús, chí máá i cūu Yāa jnama ñayuu nuū cuéchi i, áchí ndajéhe.

<sup>22</sup> Súcuan ní cuu táca jniñu yáha, návaha squícu jnūhun Jítoho yó Yāa Dios jeē ní cahān tēe ní nacani jnūhun ya nde jenahán. Te suhva ní cahān de:

<sup>23</sup> Coo ñin sūchí síhí, te nihūn séhe i, te scácu i ñin séhe yá,

te conaní sūchí un Emanuel.

Achí tutu. Te síhví yáha cúní cahān: Yāa Dios ndeé yá jiin yó.

<sup>24</sup> Te ní natahū ní José, te ní sáha de nájnūhun ní cahān ndajéhe Jítoho yó jiin de. Te ní jeca de María ní cuu ña ñasihí de. <sup>25</sup> Te tu ní quixí de jiin ña, chí nde ní scácu ña séhe yá nuū ña. Te ní snaní de i Jesús.

*Jeē ní quijicoo tēe mago nuū yá*

### 2

<sup>1</sup> Te ná ní cacu Jesús ini ñuu Belén ndañúú Judea, te tiempo un ndácu rey Herodes jniñu. Yūcuán na te jecu tēe ndíchí jeē cascuáha siquí quámi, ní quijicoo de nde jicá, ichi nuū cáne niándii, te ní jinúcco de ñuu Jerusalén. <sup>2</sup> Te ní cacajnúhún de ñayuu:

¿Nde nuū íne sūchí jeē ní cacu jeē coo rey ñayuu hebreo? Chí ichi núú cáne niándii ní cajito ná ñin quámi cáhnu jeē cūu seña jeē ní cacu i. Te vējicoo ná chíñúhún ná i, áchí de.

<sup>3</sup> Te rey Herodes, ná ní jini de jnūhun yáha, te ní cunéé ní de, nde jiin táca ñayuu ñuu Jerusalén. <sup>4</sup> Te ní nastútu de táca sítú cácujeñnu jiin tēe cásteén tutu ley Yāa Dios nuū ñayuu. Te ní cajnúhún de tēe un ndé nuū cacu Cristo achí tutu. <sup>5</sup> Te ní cacachí nuū de:

Ini ñuu Belén ndañúú Judea. Chí suhva cáhán nuū tútu ní tee tēe ní nacani jnūhun ya nde jenahán:

<sup>6</sup> Te róho ñayuu ñuu Belén ndañúú Judá, cújeñnu ga ñuu ró vēsú táca gá jeē cújeñnu ini Judá.

Chí suu ini ñuu ró quenda ñin Yāa ndacu jniñu,

te coto ya ñayuu máá rí Israel, achí Yāa Dios. Achí tutu.

<sup>7</sup> Yūcuán na te Herodes ní cana sáhi de táca tēe ndíchí un jeē naní mago. Te ní cajnúhún yúcún de ndé quíví ní cane quámi ún. <sup>8</sup> Te ní tají de tēe un quíngoo de ñuu Belén. Te ní cahān de:

Cuángoo ní te cajñuhun yúćún ní ndé nuū íne sūchi lúli un. Te núu ní nanihín ní i, te quijicoo ní castúhun ní nuū ná, návāha suni máá ná quichiñúhún ná i, áchi rey.

<sup>9</sup> Te jeé ní cajini de jñuhun ní cahān rey, te cuangoo de. Te máá quámi cáhu jeé ní cajito de ichi núu cáne niāndii, yósnuu núu de cuahān nde ní jinū nuū íne sūchi lúli un, te yūcuan ní jecuiñi. <sup>10</sup> Te ná ní cajito de jeé ní jecuiñi quāmi ún, te yōhyo ní cacusií ní de. <sup>11</sup> Te ní jinūcoo de ní quēvicoo de ini vehe, te ní cajito de nuū sūchi lúli un jín náná i María. Te ní cajecuiñi yití de nuū i, te ní cachiñúhún de i. Te ní canune de yejnú de, te ní casocō de oro jín súje cūtú jín súje uvuā nuū i. <sup>12</sup> Yūcuán na te ní scóto jēni de, ní cachi nuū de jeé ma nuhún de nuū Herodes. Te inga ichi cuanuhun de ñuu de.

*Jeé ní jinu José cuangoo de nación Egipto*

<sup>13</sup> Te náa cuánuhun táca téé mago, te ní scóto jēni José jeé ñn ndajéhé máá Jitoho yō Yaā Dios ní cahān ya jín de:

Ndocuiñi te cunu ró quíngoo ró jín sūchi lúli jín náná i nde nación Egipto. Te yūcuán coyūcu ró nde castúhun rí nuū rō. Chi Herodes je yajni nanducú de sūchi lúli jínā jeé cáhni de i. Achí yā.

<sup>14</sup> Te ní natahū ní José. Te cuangoo de jín sūchi lúli jín náná i, te ñuu ní cajica de cuangoo de nación Egipto. <sup>15</sup> Te ní coyūcú de yūcuan ndé ní jihī Herodes. Te súcuan ní cuu návāha squícu jñuhun Jitoho yō Yaā Dios jeé ní cahān téé ní nacani jñuhun ya nde jenahán: Nde nación Egipto ní cana ri Sēhe ri vēji i, áchi Yaā Dios, achí tutu.

*Jeé ní ndacu Herodes jñiñu jeé na cúu tāca sūchi yá lúli*

<sup>16</sup> Yūcuán na te Herodes ní jini de jeé súcuan ní castáhú téé mago un de, te yōhyo ní quiti ní de. Te ní tají de soldado cuangoo, te ní cajehni táca sūchi yá lúli jéé uú cuiyā jín jéé yiquín gá jeé cáyūcú ini ñuu Belén jín táca ñuu yajni. Chi je ní cajñuhun yúćún de táca téé mago un nasaa tiempo ní cuu jeé ní cacu Jesús. <sup>17</sup> Te súcuan ní squícu jñuhun ní cahān Jeremías, téé ní nacani jñuhun Yaā Dios nde jenahán, chí ní cahān de:

<sup>18</sup> Ini región Ramá ní jini sōho ri jeé cándahyū te cándahyū cohó. Chí ñahan cácuu yucūn Raquel, cándahyū ña jehē sēhe ña, te tu cácu ni ña ndusi ní ña, chí ní cajihī i. Achí tutu.

<sup>19</sup> Yūcuán na te ní jihī Herodes. Te ní scóto jēni José jeé ñn ndajéhé Jitoho yō Yaā Dios ní cahān yā jín de nuū nde de nación Egipto. <sup>20</sup> Te ní cahān yā jín de:

Ndocuiñi te nuhun rō ñuu rō Israel jín sūchi lúli jín náná i. Chí je ní cajihī téé cánducú cahni sūchi lúli jínā nuū. Achí ndajéhé.

<sup>21</sup> Yūcuán na te ní ndocuiñi de, te cuanuhun de nación Israel jín sūchi lúli jín náná i. <sup>22</sup> Te ní nihín de jñuhun jeé Arquelao ní nucuiñi de nuū tatá de Herodes, te máá de ndácu jñiñu región Judea. Te ní yūhú de nuhun de yūcuán. Te ní scóto jēni de jeé na quíhín de región Galilea, te cuangoo de. <sup>23</sup> Te ní jinū de yūcuán, te ní coyūcú de ñuu naní Nazaret. Súcuan ní cuu návāha squícu jñuhun ní cacahān téé ní canacani jñuhun Yaā Dios nde jenahán. Chí ní cacachi de jeé cahān ñayuu jeé téé ñuu Nazaret cúu Jesús.

*Jñuhun Juan téé scuándute*

(Mr. 1.1-8; Lc. 3.1-9, 15-17; Jn. 1.19-28)

### 3

<sup>1</sup> Te ní yāha tiempo, te ní jinū Juan téé scuándute nde nuū ñuhun téhé ndañúu Judea, nácani de jñuhun suhva:

<sup>2</sup> Nacani ní rō jijnáhan ró jéé stóo ró cuéchi ró, chí je ní cuyajni Yaā ndeé andiví jéé ndacu ya jñiñu nuū rō. Achí de.

<sup>3</sup> Te Isaías, téé ní nacani jñuhun Yaā Dios nde jenahán, suhva ní tee de jñuhun Juan nuū tútu:

Coo ñn téé cana jee nde nuū ñuhun téhé: Sátúhva ró máá ró jijnáhan ró, chí quee maá Jitoho yō.

Te sáha ró jñiñu ndaa, chí vēji ya, achí de. Achí Isaías.

<sup>4</sup> Te sahma ñuhun Juan cúu ixí quiti nání camello, te núhni ñn cinturón ññ chíji de. Te jeé técu de cúu tica ndicuéhyí jín ndúxi yocó. <sup>5</sup> Te ñayuu ñuu Jerusalén jín táca ñayuu región Judea jín ñayuu yúcu yajni yuyúte Jordán, ní quijicoo i nuū de. <sup>6</sup> Te ní canacani ndaa i cuéchi i nuū Yaā Dios, te ní scuándute de i ini yūte Jordán.

<sup>7</sup> Te ná ní jito de jeé vējicoo cuehē téé grupo fariseo jín téé grupo saduceo nuū scuándute de, te ní cahān de jín:

Va sēhe coō cácuu ró, chí xeēn rō nájñuhun coō. ¿A cájeni ní rō jeé cuu cunu ró cácu ró núu castigo xeēn jeé quiji? <sup>8</sup> Núu súcuan te sáha ró jñiñu váha, te súcuan stéén ró jeé ní canacani ndije ní rō jeé stóo ró cuéchi ró. <sup>9</sup> Te ma cáni ní rō cahān ró jeé cuu cácu ró síquī jeé cácuu ró yúćún Abraham. Chí cáhán rí jín ró jeé cuu sáha Yaā Dios jeé táca yūu yáha nduu sēhe Abraham jeé candíje váha, te núu cúní yā. <sup>10</sup> Te cácuu ró nájñuhun nundehé jeé tu jéhe ndehē váha. Te vijna je íyó túhva Yaā Dios jeé cáhva ya castigo xeēn, nájñuhun je íyó túhva ñn cāa jeé cahnde nde yoho yujnu. Núu súcuan te sáha ya jín ró nájñuhun jín táca yujnu jeé tu cúun ndehē váha, jeé tahndé te cayú nuū ñuhún. <sup>11</sup> Te ruhú chí jín ndute scuándute ri rohó, te yūcuan cúu jeé steén ró jeé ní canacani ní rō jeé stóo ró cuéchi ró. Te Yaā jeé quiji, chí nájñuhun scuándute ya rohó chí jeé cáhva ya Espiritu

Santo condee ini anuá rō, te poder yā cúu nájñuhun ñuhún. Te Yaā quiji chi cújéhu ndasí yá. Chi tú na vé jéhu cuiti cúu ri nuú yā, ni jeé cuajñiñu ri nuú yā vésú ñin jniñu lúli gá nájñuhun jeé quénehen ri ndijén yā. <sup>12</sup> Te sáha ya nájñuhun sáha tēe scánda trigo, chi sásñin ya ñayuu váha jíin ñayuu cunéé, nájñuhun cúndoo trigo jeé quéndá sñin paja. Te nastútú yá trigo yā ndívi ini yacā yā. Te paja chi jnaa yā nuú ñuhún jeé ma ndahvá cuiti. Achí Juan.

*Jeé ní jendute Jesús*

(Mr. 1.9-11; Lc. 3.21-22)

<sup>13</sup> Yúcuán na te ni quenda Jesús región Galilea, te ni quee yā yúte Jordán nuú íne Juan, náváha scuándute de ya. <sup>14</sup> Te tu ni cúni Juan scuándute de ya, chi ni cahán de jíin yá: Sa suhva cánuú jeé scuándute máá ní sáñá, ¿te ndese cúu jeé sa nuú ná vēji ní? áchí de.

<sup>15</sup> Te ni cahán Jesús jíin de:

Tuú chi sáha ró, chi súcuan cánuú squícu yó táca jniñu ndácu Yaā Dios, achí yá.

Yúcuán na te ni scuándute de ya. <sup>16</sup> Te ná ni cuu ni jendute Jesús, te ni quenda ya nuú ndúte. Te ni nune-ní andiví, te ni jito ya jeé cúun Espíritu Yaā Dios vēji, te cáa nájñuhun ñin paloma, te ni quee xiní yā. <sup>17</sup> Te ichi ándiví ni cahán ñin jñuhun:

Yáha cúu Sēhe ri jeé maní ndasí rí jíin, te yōhyo cúsní ni rí jíin, áchí.

*Jeé ní jito ndee jexeén Jesús*

(Mr. 1.12-13; Lc. 4.1-13)

## 4

<sup>1</sup> Yúcuán na te ni jinú Jesús nde nuú ñuhun téhé ní sáha Espíritu Santo. Te yúcuán coto ndee jexeén yā, chi cúni jeé sáha ya cuéchi.

<sup>2</sup> Te ni iyo ndite ni yā uú xico nduu uú xico ñuu, sáá te jíi yá sóco. <sup>3</sup> Te ni quee maá jexeén jeé coto ndee un yá, te ni cahán jíin yá:

Núu máá ró cúu Sēhe Yaā Dios, te cahán rō jeé yuú yúcu yáha na ndúu staā caji rō, achí.

<sup>4</sup> Te ni cahán yā jíin:

Tuú chi yósó núu tútu ii: Nasūu máni máá jíin stáá cátecu ñayuu, chi suni jíin táca jñuhun cahán Yaā Dios, achí yá.

<sup>5</sup> Yúcuán na te cuahán jexeén un jíin yá nde ñuu ii Jerusalén. Te ni jeni ya xiní torre templo. <sup>6</sup> Te ni cahán jíin yá:

Te núu Sēhe Yaā Dios cúu ró, te síngava ró máá ró nde nuú ñuhun, chi jnama ya rohó. Chi yósó núu tútu:

Tejníñu ya ndajéhé yā quijicoo coto rohó.

Te canundee yā rohó jíinahan ya, náváha ma cáchihí ró jéhé rō nuú yuú.

Achí tutu. Achí jexeén.

<sup>7</sup> Te ni cahán Jesús:

Tuú chi suni yósó núu tútu jeé ma coto ndee ñayuu Jitoho i Yaā Dios, núu jnama ya i chí tuú, achí yá.

<sup>8</sup> Te jexeén un ní jeca tucu ya cuahán jíin yá nde xiní ñin yucu súcún ndasí. Te ni steén táca nación ní cáhnu ñayívi núu yā, te yōhyo luu cáa ndihí. <sup>9</sup> Te ni cahán jíin yá:

Táca ñuu yáha cuáha ri nuú rō, te núu cuiñi yítí ró chiñuhún rō ruhú, achí.

<sup>10</sup> Yúcuán na te ni cahán Jesús nuú jexeén:

Satanás, cujiyo quihín rō, chi yósó núu tútu jeé chiñuhún ñayuu maá Jitoho i Yaā Dios, te nuú maá-ni ya cuajñiñu i. Achí yá.

<sup>11</sup> Yúcuán na te ni cujiyo-ni jexeén un cuahán. Te ni quecoo ndajéhé Yaā Dios ni cajejñiñu nuú yā.

*Jeé ní quejéé Jesús nácani ya jñuhun región Galilea*

(Mr. 1.14-15; Lc. 4.14-15)

<sup>12</sup> Te ná ni nihín Jesús jñuhun jeé íne Juan vecáa, te cuanuhun yá región Galilea. <sup>13</sup> Te tu ní cóndee yā ñuu Nazaret, chi ní jehén yā ni condee yā ñuu Capernaum. Te ñuu un íne yumar, máá región Zabolón jíin Neftalí. <sup>14</sup> Te súcuan ní squícu jñuhun ni tee Isaías, tēe ni nacani jñuhun Yaā Dios nde jenahán:

<sup>15</sup> Región Zabolón jíin Neftalí, ichi jeé yíhi yumar, lado yúte Jordán nuú cáne niándii,

jíin región Galilea nuú cáyúcú ñayuu táca nación tu jíin jñuhun ya.

<sup>16</sup> Ñayuu ún chí nájñuhun cáyúcú i nuú néé, te coto i nájñuhun ñin luz cáhnu.

Te ñayuu je yajni naa, nihín i jñuhun váha ndasí,

suu jñuhun jeé jnama ya anuá i.

Achí Isaías.

<sup>17</sup> Te nde quiví yúcuán ní quejéé Jesús nácani ya jñuhun, te ni cahán yá suhva:

Nacani ní rō jíinahan ró jéé stóo ró cuéchi ró, chí je ni cuyajni Yaā ndeé andiví jéé ndacu ya jniñu nuú rō, achí yá.

*Jeé ní cana ya cuñ tēe jñú chácá*

(Mr. 1.16-20; Lc. 5.1-11)

<sup>18</sup> Te jica Jesús yumar Galilea cuahán yā. Te ni jito ya nuú uú jñahan ñani. Te ñin de cúu Simón jeé suni nání Pedro, te inga de cúu Andrés. Te tēe cájniñi chácá cácuu de, te cásinga de ñunu de ini mar. <sup>19</sup> Te ni cahán yā jíin de:

Condiquín ruhú na quihín yō, te nasáha ri rohó tēe nihín cuehé ñayuu candije ruhú, nájñuhun cánihín rō chácá, achí yá.

<sup>20</sup> Yúcuán na te ni castóo-ni de ñunu de, te ni candiquín de ya.

<sup>21</sup> Te ní jica ya jecu gā, te ní jito ya nuú inga uú jñahan ñani. Te cácuu de Jacobo jíin Juan, sēhe Zebedeo. Te cáyúcú de ini barco jíin tátá de Zebedeo, cánachijnñi de ñunu de. Te suni ní cana ya de jeé cóndiquín de ya. <sup>22</sup> Te ní castóo-ni de tátá de jíin barco, te ní candiquín de ya cuango de.

*Jeē ni stéén yā nuū cuehē ñayuu  
(Lc. 6.17-19)*

<sup>23</sup> Te ni jica cuu Jesús ní región Galilea, ni steén yā jñuhun ini táca vehe ñi jeē cúu sinagoga. Te ni nacani ya jñuhun váha ndese ndácu Yaā Dios jñiñu. Te ni nasávaha ya ñayuu cácuñu táca-ni cuehyí. <sup>24</sup> Te ni jitē núu jñuhun ya cuahān ní región Siria. Te nuū yā ni caquindeca i táca ñayuu cácuñu, ñayuu cándoho tñni nuū cuehyí, jñiñ jéē jetú, jñiñ jéē ñuhun tachí ini, jñiñ jéē jíhí yñí, jñiñ jéē ni jíin. Te ni nasávaha ya i jíināhan i. <sup>25</sup> Te cuehē ñayuu región Galilea jñiñ Decápolis, jñiñ ñayuu ñuu Jerusalén jñiñ región Judea, jñiñ táca ñuu ichi núu cáne niāndii yūte Jordán, ni cacondiquin i ya.

*Jeē ní nacani ya jñuhun nde nuū yúcu*

## 5

<sup>1</sup> Te ni jito Jesús núu ñayuu cuehē. Te ni caa ya yucu cuahān yā, te ni cucōo ya. Te tēe cácuáha jñiñ yā, ni jinūcoo de nuū yā yūcuán. <sup>2</sup> Te ni quejéé yā ni steén yā táca jñuhun yáha nuū de:

*Jñuhun yóhoyo ndetū  
(Lc. 6.20-23)*

<sup>3</sup> Yóhoyo ndetū ñayuu jeē cánacuni i jeē tu íyó váha ánuá i siquí cuéchi i, chí je ni quívicoo i ndaha Yaā andiví jéē ndácu ya jñiñu nuū i.

<sup>4</sup> Yóhoyo ndetū ñayuu cácuñuhýá ní, chí ndusñ ní i sáha Yaā Dios.

<sup>5</sup> Yóhoyo ndetū ñayuu cáhíyo vítá suchí ini, chí ni jejnūhun ya jeē cutahú i ñayiví.

<sup>6</sup> Yóhoyo ndetū ñayuu jeē nájñuhun jeē cájil i sōco cájichí i, súcuan jnāá i sáha i jñiñu ndaā, chí máá yá chindéé ñáhán yá i jeē cuu sáha i.

<sup>7</sup> Yóhoyo ndetū ñayuu cákundáhu ní jnāhan, chí suní cundáhu ní Yaā Dios i.

<sup>8</sup> Yóhoyo ndetū ñayuu cáhíyo ndoo ini anuá, chí coto i nuū Yaā Dios.

<sup>9</sup> Yóhoyo ndetū ñayuu cánasamaní jnāhan, chí cahān Yaā Dios jeē sēhe ya cácuu i.

<sup>10</sup> Yóhoyo ndetū ñayuu jeē cájito xeēn inga ñayuu i siquí jeē casáha i jñiñu ndaā, chí je ni quívicoo i ndaha Yaā andiví jéē ndácu ya jñiñu nuū i.

<sup>11</sup> Yóhoyo ndetū máá ró jíināhan ró núu cácahān neé i nuū ró jeē síquí ruhū, te coto xeēn i róhó, te stáú yáhu i róhó, vēsú tú cuéchi ró. <sup>12</sup> Na cúsní ní ró jíināhan ró núu súcuan, te sa víhyá gā cusñ ní ró, chí cáhnu ndasí coo tahū ró nde andiví. Chí suní súcuan ní cajito xeēn i táca tée ní canacani jñuhun Yaā Dios jeē ní quijicoo xihna gā vēsú rohó.

*Jñuhun yátá siquí ñiñ jñiñ síquí luz  
(Mr. 9.50; Lc. 14.34-35)*

<sup>13</sup> Máá ró jíināhan ró cájeñiñu ró ini ñayiví nájñuhun jéjñiñu ñiñ nuū cúñu návaha tú tehyú. Te núu ñiñ ún na náá jeē uhvuá, ¿te

ndese nduu uhvuá tucu? Tuá cuajñiñu cuiti gā, chí sa cate ñayuu te cueñú i siquí.

<sup>14</sup> Máá ró cácuu nájñuhun luz jeē steén ini anuá ñayuu ñayiví. Te cácuu ró nájñuhun ñiñ ñuu íne xiní yúcu, jeē ma cúu quisáhi. <sup>15</sup> Te ní tu nástñin ñayuu ñiñ lámpara te chune i chíji cajón, chí sa suhva jéni i nuū sucún, návaha cundijin nuū táca jéē cáyúcu ini vehe. <sup>16</sup> Te suni súcuan na steén ró luz máá ró nuū táca ñayuu, te suu cúu jeē cúni i jñiñu váha casáha ró, te cahān i jeē yóhoyo váha Yaā cúu Tátá ró jeē ndeé yá andiví.

*Jeē ni stéén yā siquí ley Yaā Dios*

<sup>17</sup> Ma cáni ní ró jíināhan ró jéē vēji rí snáá rí ley jeē ní jéhe Yaā Dios nuū Moisés, jñiñ jéē snáá rí táca jñuhun ní cacahān tēe ní canacani jñuhun ya jenahán. Tú vēji rí jeē snáá rí, chí sa suhva jeē steén cají rí jñuhun ndíso. <sup>18</sup> Chí jendaá cahán rí jñiñ ró jeē núu níni íyó andiví jñiñ ñayiví, te ma náa cuiti ní ñiñ punto ní ñiñ letra nuū tútu ley yā, chí nde na squicu táca ndíhi jñuhun jeē cahán. <sup>19</sup> Núu súcuan te núu ñiñ ñayuu tu squicu i ñiñ jñuhun yáha jéē ndácu ley yá, vēsú ñiñ jñuhun lullí gā cúu, te núu steén i jeē suni súcuan sáha sava ga ñayuu, núu súcuan te cuu i ñayuu núu ga ichi andiví nuū ndácu Yaā Dios jñiñu. Te núu ñiñ ñayuu squicu i te steén i jeē squicu ñayuu, yūcuán na te cujéhnu i ichi andiví nuū ndácu Yaā Dios jñiñu. <sup>20</sup> Chí cáhán rí jñiñ ró jeē núu tú coo ndaā gā jñiñu casáha ró vēsú jñiñu casáha tēe cástéén tutu ley yá jñiñ tēe grupo fariseo, te ma quívicoo cuiti ró ndaha Yaā andiví jéē ndacu ya jñiñu nuū ró.

*Jeē ni stéén yā jeē ma quití ní yó  
(Lc. 12.57-59)*

<sup>21</sup> Je ní cajini ró jñuhun ní cacahān jñiñ ñayuu jenahán, jeē ma cáhni i ndíyi, te na-ni ñayuu núu cahni i ndíyi, te cundaā cuéchi i nuū táca tóhó, achí. <sup>22</sup> Te ruhū chí cáhán rí jñiñ ró, vēsú núu máá jéē quití ní ñiñ ñayuu jíto i jnāhan i, suni cundaā siquí cuéchi i ún. Te núu ñiñ ñayuu cahān neé i nuū jnāhan i, núu súcuan te cundaā cuéchi i un núu justicia cujéhnu ga. Te núu ñiñ ñayuu cahān i nuū jnāhan i: Róhó jéē canéé íi, achi i, núu súcuan te quíví i nuū ñuhún infierno te núu ma nácani ní i.

<sup>23</sup> Jeé yúcuán te núu ní jinū ró nuū altar jñiñ jéē socó ró nuū Yaā Dios, te núu ní nucūhun ní ró jeē ní sáha ró cuéchi siquí jnāhan ró, <sup>24</sup> núu súcuan te squéndo ró jéē socó ró ún xiin altar, te xihna gā quihñ ró ndumaní ró jñiñ jnāhan ró. Yūcuán na te nandicó ró socó ró.

<sup>25</sup> Te núu ñiñ ñayuu quihñ i jñiñ ró nuū tohó jeē cacān i cuéchi siquí ró, núu súcuan te níni cuahān ró jñiñ i ichí te sándaá máá ró jíin i, návaha ma squíví i róhó núu juez. Chí juez siáha de róhó núu policía, te chune de róhó vecāa. <sup>26</sup> Te jendaá cahán rí jñiñ ró jeē ma

quénda cuiṭi rō yūcuán, chi nde chunaa rō ndihi cuiṭi xūhun jéé cájicān de.

*Jeē ni stéén yā jeē ma cósiquí ndéé jnāhan*  
<sup>27</sup> 'Ni cajini rō jnūhun ni cacahān jēnahān jeē ma cósiquí ndéé jnāhan ñayuu. <sup>28</sup> Te ruhū chi cáhān rī jīn rō jeē núu iin tēe ndéhe de nuū iin ñahan jeē ndiyo ni de ña, yūcuán na te je ni casíquí ndéé de ñahan űa iin anuá de.

<sup>29</sup> 'Núu súcuan te núu tinūu lado váha rō sáha jeē quívi rō cuéchi, váha ga quenehen rō te scāne rō, návāha tuá sáha rō cuéchi. Chi váha gā jeē náa iin tinūu rō vésú jeē cóo ndihi yiqui cúñu rō te quihīn rō infierno. <sup>30</sup> Te núu ndaha váha rō sáha jeē quívi rō cuéchi, váha ga cahnde rō te scāne rō, návāha tuá sáha rō cuéchi. Chi váha ga jeē náa iin ndaha rō vésú jeē cóo ndihi yiqui cúñu rō te quihīn rō infierno.

*Jeē ni stéén yā jeē ma ndusūn jnāhan*  
 (Mt. 19.9; Mr. 10.11-12; Lc. 16.18)

<sup>31</sup> Te suni ni cacahān nde jēnahān: Núu ndé iin cúní stóo ñasihí, te na cuáha acta nuū ña jeē ndusūn jīn ña. <sup>32</sup> Te ruhū chi sa cáhān rī jīn rō jeē núu iin tēe stóo de ñasihí de, te núu nasūu jéé tǵni ni ña, núu súcuan te sáha de jeē casíquí ndéé ña de, chi condee ña jīn inga tēe. Te núu iin tēe condeca de ñahan ni ndusūn, suni casíquí ndéé de ña.

*Jeē ni stéén yā siquí jnūhun jéjnūhun téyí*  
<sup>33</sup> Te suni ni cajini rō jnūhun jeē ni cáhān jīn ñayuu nde jēnahān: Núu ni jejnūhun téyí rō jeē squícu rō, jito jínúu Yāā Dios, núu súcuan te cánuu squícu rō jéé ni cáhān teyí rō un, áchí. <sup>34</sup> Te ruhū chi cáhān rī jīn rō jīnāhan rō jeē ni iin siquí jñiñu ma cahān teyí rō nde jīn síhvi Yāā Dios, ni ma cahān teyí rō jeē jito jínúu yā. Te núu jéjnūhun téyí rō te tú váha jeē ndácunehen rō andiví ni ñayiví. Chi andiví cúu nuū iin mesa nuū ndácu Yāā Dios jñiñu. <sup>35</sup> Te ñayiví cúu nájñūhun teyū nuū iin jehē yā. Te ni ma ndácunehen rō ñuu Jerusalén, chi suu cúu ñuu maá Yāā cúu Rey cujéhu. <sup>36</sup> Ni ma cahān rō jeē na cōndee cuéchi siquí rō núu tu squícu rō. Ma cahān rō súcuan, chi ma cúu cuiṭi sáha rō jéé ni iin ixi xíní rō nducujín chi ndujnúu. <sup>37</sup> Chi suhva-ni cahān rō: Cúu, achí rō. Tuú, achí rō. Chi núu chisóó gá rō jnūhun cahān rō, te nuū jexeén vėji.

*Jeē ni stéén yā jeē ma cuáha yó jéé ndútahū ñayuu*  
 (Lc. 6.29-30)

<sup>38</sup> 'Ni cajini rō jnūhun jeē ni cáhān jīn ñayuu jēnahān: Núu iin tēe ndahva de tinūu jnāhan de, suni súcuan na ndáhva tinūu de. Te núu iin tēe stáva de jnūhun jnāhan de, suni súcuan na stáva jnūhun de, áchí. <sup>39</sup> Te ruhū chi sa cáhān rī jīn rō: Ma nácuáha rō jéé ndútahū tēe sáha ndeváha jīn rō. Chi sa núu ndé tēe cani de yiqui núu lado váha rō,

te váha ga suni cuáha rō inga lado cani de, vésú jeē nácuáha rō jéé ndútahū de. <sup>40</sup> Te núu ndé tēe stáu yáhu de rōhó te quénde de camisa rō, suni cuáha rō jnūhun jeē na quihín de jīn ndé ticāchi rō. <sup>41</sup> Te núu ndé tēe scáca de rōhó jéé condiso rō ndajniñu de iin kilómetro, te caca rō úu kilómetro jīn de. <sup>42</sup> Te na-ni ñayuu núu jicán i ndajniñu rō, te cuáha rō núu i. Te ñayuu jicán núu ndajniñu nuū rō, ma sasáhan rō cuáha rō núu i.

*Jnūhun jeē cundáhú ni yó ñayuu cájito uhū yohó*

(Lc. 6.27-28, 32-36)

<sup>43</sup> Te suni ni cajini rō jnūhun jeē ni cáhān nde jēnahān: Cundáhú ni rō ñayuu cáhīyo maní jīn rō, te coto uhū rō ñayuu cájito uhū rohó, áchí. <sup>44</sup> Te ruhū chi sa cáhān rī jīn rō: Cundáhú ni rō ñayuu cájito uhū rohó. Te cacān rō jeē váha coo ñayuu cácahān ndeváha siquí rō. Te sáha váha rō jīn ñayuu cáquiti ni nuū rō. Te cacān tahú rō jehé ñayuu cácahān neé núu rō te cájito xeēn i rōhó. <sup>45</sup> Te súcuan stéén rō jeé cácuu rō séhe maá Tátá rō. Yāā ndeé andiví, chi maá yá jéhe niāndii cundijin nuū ñayuu cuneeé jīn ñayuu váha. Te jéhe ya saū nuū ñayuu casáha jñiñu ndaā jīn nuū ñayuu casáha jñiñu neé. <sup>46</sup> Chi núu iyó maní rō jīn maá-ni ñayuu jeē maní jīn rō, te tú na tahū nihīn rō nuū yā. Chi nde tēe cástutú xūhun renta jeē castáhú, suni súcuan casáha de. <sup>47</sup> Te núu máni jnāhan rō cáhān yñiñuhūn rō jīn, ¿te na vé jeē váha ga sáha rō núu súcuan? Chi nde ñayuu tu cácañdije Yāā Dios, suni súcuan casáha i. <sup>48</sup> Núu súcuan te ndaā na cóo ndihi jeé sáha rō, nájñūhun iyó ndáa ndihi jeé sáha Tátá rō, Yāā ndeé andiví.

*Jeē ni stéén yā ndese sáha yó jñiñu váha*

## 6

<sup>1</sup> Te jeé sáha rō táca jñiñu váha nuū Yāā Dios, coto rō jéé ma sáha rō maá siquí jeé cūni ñayuu te cuajñuhūn i rōhó. Chi núu súcuan sáha rō, te tú na tahū rō cuáha maá Tátá rō, Yāā ndeé andiví. <sup>2</sup> Jeé yúcuu te jeé sáha rō caridad, te ma sáha rō jéé cūni táca ñayuu, nájñūhun casáha tēe stáhú-ni, cáhīn de nuū cúchitú ñayuu ini táca vehe i sin-agoga jīn nuū yáhu. Chi súcuan casáha de návāha cuajñuhūn ñayuu de jeé váha casáha de. Jendaá cahān rī jīn rō jeé tahú de cúu jeé jejnūhūn ñayuu de. <sup>3</sup> Te rōhó jīnāhan rō, núu casáha rō caridad, te sáha yuhu rō, návāha nde amigo váha rō tú cuni jeé sáha rō. <sup>4</sup> Súcuan na sáha yuhu rō caridad. Te maá Tátá rō jeé jito ya jeé sáha yuhu rō, iin quívi te cuáha ya tahú cuu rō.

*Jeē ni stéén yā ndese cacān tahú yó*  
 (Lc. 11.2-4)

<sup>5</sup> Te jeé cájicān tahú rō, te ma sáha rō nájñūhun casáha tēe stáhú-ni. Chi cánujnahān ni de cuiñi de cacān tahú de nuū iyó chitú



ñayuu ini tãcã vehe iï sinagoga jiïn tãca yiqui yãhu, nãvãha cuni ñayuu te cuajnúhún i de. Jendaá cahán rĩ jiïn ró jeê maá yúcuan-ni cúu tahũ jeê nihín de, suu jeê jejnúhún ñayuu de. <sup>6</sup> Te róhó jijnáhan ró, núu cájicãh tahũ ró, te ndivi ró ini vehe ró te casi ró yehyí. Te cacãh tahũ ró nuũ maá Tátá ró. Yãã ndeé yuhu jiïn ró. Yúcuan na te maá Tátá ró jeê jito ya jeê súcuan sãha yuhu ró, sãha ya jeê jicãh ró.

<sup>7</sup> Te jeê cájicãh tahũ ró, te ma cahán saá-ni ró jnúhun jeê tu cájecũhun ni ró, nãjnũhun casãha ñayuu tu cájini jnúhun Yãã Dios. Chi cájeni ni i jeê núu cuehẽ jnúhun súcuan cahãh i, te saá te cuni sôho ya, te tuú. <sup>8</sup> Núu súcuan te ma sãha ró nãjnũhun casãha maá i. Chi maá Tátá ró, je jini yã na vé cájini ñúhún ró nde ná tu cacãh ró nuũ yã. <sup>9</sup> Núu súcuan te suhva cacãh tahũ ró:

Tátá maá ná jijnáhan ná jẽẽ ndeé ní andiví, níni na cóo yñúhún ná nuũ ní, chi Yãã iï cúu ní.

<sup>10</sup> Te ñúhun ni na jẽẽ yachĩ quiví ndacu ní jniñu ní ñáyiví yãha.

Te na cóo tãcã jniñu núnjahan ni ní, nãjnũhun iyó ini andiví, súcuan na cóo ini ñáyiví.

<sup>11</sup> Staã jeê cátecu na tãca quiví, cuãha ní núu ná vijna.

<sup>12</sup> Te cone cahnu ni ni núu tãca cuéchi casãha ná núu ní,

nãjnũhun cáhine cáhnu ni na núu ñáyuu casãha cuéchi nuũ ná.

<sup>13</sup> Te ma cuãha ni jnúhun jeê coto ndee jexeén saña,

chi sa suhva jnama ní saña núu tãca jẽẽ neé. Chi maá ní cúu Yãã ndácu jniñu, te jnã ní poder,

te yôhoyo luu cújẽhnu ní ní cáni. Súcuan na cóo. Amén.

Achi ró jijnáhan ró.

<sup>14</sup> Chi núu cone cáhnu ni ró nuũ ñáyuu casãha cuéchi nuũ ró, te suni súcuan cone cáhnu ni maá Tátá ró andiví nuũ cuéchi ró.

<sup>15</sup> Te núu ma cóne cáhnu ni ró nuũ ñáyuu casãha cuéchi nuũ ró, te suni súcuan ma cóne cáhnu ni maá Tátá ró nuũ cuéchi ró jijnáhan ró.

*Jeê ni stéén yã siquĩ jnúhun condite ni*

<sup>16</sup> Te núu condite ni ró jeê chiñúhún ró Yãã Dios, te ma sãha ró nãjnũhun casãha tẽe stáhú-ni. Chi casãha de jeê coto xii de, te súcuan stéén de nuũ ñayuu jeê iyó ndite ni de, nãvãha cuajnúhún i de. Jendaá cahán rĩ jiïn ró jeê maá yúcuan-ni cúu tahũ jeê nihín de, suu jeê jejnúhún ñayuu de. <sup>17</sup> Te maá ró jijnáhan ró, núu iyó ndite ni ró, te sa chuhun vãha ró xini ró te nandahá núu ró, <sup>18</sup> nãvãha ma cúni ñayuu jeê iyó ndite ni ró. Chi maá-ni Tátá ró jeê ndeé yuhu yã jiïn ró, cuni yã, te iïn quiví te cuãha ya tahũ cuu ró.

*Ndese coo cúcã yó nde andiví*  
(Lc. 12.33-34)

<sup>19</sup> Ma cóndihví ni ró caya ró ndajniñu cúcã ini ñayiví yãha, chi quiví tiquixín, te cáne xehyu, te tiví. Te suni quivícoo ñacuñhá te sãcuñhá. <sup>20</sup> Chi sa suhva sãha ró tãca jniñu vãha nãvãha cayã tahũ ró nde andiví. Chi yúcuan má quiví tiquixín ni ma cáne xehyu jeê tiví. Ni ma cúu quiví ñacuñhá sãcuñhá. <sup>21</sup> Chi nde nuũ nihín ró tahũ vãha ró, yúcuan cúu nuũ cóndihví ni ró siquĩ.

*Tinũu cúu lámpara yiqui cúñu*  
(Lc. 11.34-36)

<sup>22</sup> Tinũu ró cúu nãjnũhun lámpara nuũ yiqui cúñu ró. Núu súcuan te núu tinũu ró iyó ndijin, te ní-ni yiqui cúñu ró cóndijin. <sup>23</sup> Te núu tinũu ró tu iyó ndijin, te ní-ni yiqui cúñu ró iyó nee. Te suni súcuan cúu ánuá ró, chi núu máni jeê jeni neé ni ró, te nacã jeê nee gã iyó ini anuá ró núu súcuan.

*Jeê ma cóndihví ni yó siquĩ xúhun*  
(Lc. 16.13)

<sup>24</sup> Ni iïn mozo ma cúu cuajniñu de nuũ uũ patrón. Chi quiví ni de nuũ iïn te coo maní de jiïn inga, chí squicu vãha de nuũ iïn te sãjẽẽ ni de nuũ inga. Te suni súcuan ma cúu cuajniñu ró núu Yãã Dios te núu máni siquĩ xúhun ndihví ni ró.

*Yãã Dios ndito ya yohó*  
(Lc. 12.22-31)

<sup>25</sup> Núu súcuan te cáhan rĩ jiïn ró jijnáhan ró: Ma nácani ndasí ni ró siquĩ jeê cótecu ró, núu ndese caji ró coho ró, ni siquĩ sahna, núu ndese cuhun ró. Chi Yãã Dios ni sãha ya jeê técu ró jiïn yiqui cúñu ró, te nagã ni cuu jeê ma cuãha ya jeê cáji ró jiïn jẽẽ cuhun ró. <sup>26</sup> Condẽhe ró ndese cátecu saa, chi tu cátaji ti, ni tu cánatútú tí jẽẽ chuvéha ti, ni tú yacã tí. Te vésú súcuan te maá Tátá ró andiví scãji yã tí. Te cánuú ndasí gã ró jijnáhan ró vésú tãcã saa ún. <sup>27</sup> Te ndé iïn ró, á cuu scuẽhnu ró maá ró sava metro gã, vésú na nácani ndasí ni ró?

<sup>28</sup> ¿Te najehẽ cáncani ndasí ni ró jeê ma nihín ró sahna? Condẽhe jijnáhan ró ndese jẽe ita tãca yúcũ. Chi tu sãjniñu, ni tu táu. <sup>29</sup> Te cáhan rĩ jiïn ró jeê ni rey Salomón, quiví ní ñúhun de sahna vãha ndasí, tu ní ñúhun de sahna lúu súcuan nãjnũhun ita ún. <sup>30</sup> Te núu súcuan jẽhe Yãã Dios sahna lúu ita un jẽẽ jẽe vijna te sajnẽ cayũ nuũ ñúhún, te nagã ni cuu róhó jijnáhan ró jẽẽ ma sãha ya jeê nihín ró sahna. ¿Te naun tu cácandije níhin ró jẽẽ ndito ya rohó? <sup>31</sup> Núu súcuan te ma nácani ndasí ni ró siquĩ jeê cáji ró, jeê coho ró, jeê cuhun ró. <sup>32</sup> Chi tãca ñáyuu ñayiví jẽẽ tu cácandije cúu jeê máni siquĩ jeê yãha cándihví ni i. Te maá ró jijnáhan ró, chí iyó Tátá ró andiví, te jini yã jeê cájini ñúhún ró tãca jẽẽ yãha. <sup>33</sup> Te sa suhva cánuú gã jẽẽ

cóndihvī ni rō siquī jniñu jeē ndácu Yaā Dios nañ rō, jín siquī jeē sáha rō jniñu ndaā jeē núnjahan ni yā. Yūcuán na te sáha ya jeē nihín rō táca jéé yáha. <sup>34</sup>Núu súcuan te ma nácani ni rō siquī jeē cóo sajnē, chi vijna cúu vijna te sajnē cúu sajnē. Chi cani ni rō siquī jnundóho jeē iyó ná ñn ná ñn-ni quiví.

*Jeē ma cahán yō siquī cuéchi jnahan yō*  
(*Lc. 6.37-38, 41-42*)

## 7

<sup>1</sup>Ma cahán rō siquī ñayuu ndese sáha i, návaha suni ma cahán Yaā Dios cuéchi siquī maá rō jeē casáha rō súcuan. <sup>2</sup>Chi nájnūhun cácahān rō siquī cuéchi ñayuu, suni súcuan cahán yā siquī cuéchi rō. Te cūhva jeē cándihvī ni rō siquī i, suni cūhva yúcuan sáha ya jín rō. <sup>3</sup>Chi cuéchi jnahan rō cúu nájnūhun jeē ñe ñn yāca lúli tinū i. <sup>4</sup>Te naun cácahān rō jín jnahan rō: Na táva rī yāca ñe tinū rō, te tu cácani ni rō jeē ñe ñn nduhu tinū maá rō? <sup>5</sup>Tē stáhú-ni cácuu rō núu súcuan. Xihna gā tinū maá rō tava rō nduhu, te yūcuán na te cuu condēhe váha rō jéé táva rō yāca tinū jnahan rō.

<sup>6</sup>Ma sáha fuerza rō ñayuu cunéé quívicoo i nuū jnūhun ñi yā núu tu cúní i. Chi ndonda i siquī rō nájnūhun ina jeē cáyihí tí rohó. Te ma nácani rō jnūhun ya nuū ñayuu jeē tu cúní cuiti cuajnúhún. Chi cándaā i nájnūhun quini jeē jeñú tí siquī perla jeē ndeé yahu ga.

*Cacān yō nuū yā te nihín yō*  
(*Lc. 11.9-13; 6.31*)

<sup>7</sup>Cacān rō nuū Yaā Dios, te cuāha ya nuū rō. Te nducú rō táca jéé váha iyó nuū yā, te nihín rō sáha ya. Te cacān tahú rō nde nihín rō, nájnūhun sáha ñayuu cahán yehyí nde nune quiví i. <sup>8</sup>Chi táca ñayuu jicán, cuāha ya nuū i. Te ñayuu nducú, suni nihín i. Te ñayuu cahán, nune ya ichi nihín i jeē cuní i.

<sup>9</sup>Te ndé ñn rōhó núu sēhe rō jicán i staā nuū rō, te á cuāha rō ñn yuū nuū i? <sup>10</sup>Te nuū jicán i ñn chácá, te á cuāha rō ñn coó nuū i? Tú cuiti súcuan. <sup>11</sup>Núu súcuan te maá rō jijnáhan rō, vēsū ñayuu iyó cuéchi cácuu rō, te cájini rō cuāha rō jéé váha nuū sēhe rō. Te nagá ni cuu maá Tátá rō andiví jéé ma cuāha ya jeē váha nuū ñayuu jicán nuū yā.

<sup>12</sup>Te nájnūhun cúní rō jeē sáha váha ñayuu jín rō, suni súcuan na sáha váha rō jín i. Chi tutu ley Moisés súcuan ndácu jniñu, jín táca tutu tēe ni canacani jnūhun Yaā Dios.

*Siquí jeē quiví yó yéhyí túú*  
(*Lc. 13.24*)

<sup>13</sup>Condihvī ni rō quívicoo rō ndaha Yaā Dios. Chi cúu nájnūhun ñn yéhyí túú. Chi yéhyí jín ichi jeē cuahán nuū jnahnú ndetū

ñayuu, jité te cáhnu, te cuehē i quívicoo yūcuán. <sup>14</sup>Te yéhyí jín ichi jeē cuahán nuū nihín tahú i cotecu i, chi tuū yehyí te cuñí ichi, te jecu-ni i cánihín i.

*Jín jniñu cásaña ñayuu te nácani yō ndese*  
*ñayuu cácuu i*

(*Lc. 6.43-44*)

<sup>15</sup>Te ma cándije cuiti rō tēe stáhú jéé cácahān de jeē jnūhun Yaā Dios cácani de. Chi nájnūhun lanchi, quiti tú xeēn, súcuan cásaña de vējicoo de nuū rō. Te ñni anuá de chi cácuu de nájnūhun yihí, quiti xéén. <sup>16</sup>Jín jniñu cásaña de te nacuni rō de ndese tēe cácuu de. Chi cúu nájnūhun jeē tu scóyo rō ndehē uva xiní ñu, ni tu scóyo rō higo xiní ñu yóqin. <sup>17</sup>Te táca yujnu váha chi jéhe ndehē váha, te yujnu neé chi cúun ndehē neé. <sup>18</sup>Ñn yujnu váha ma cúun ndehē neé, te ñi ñn yujnu neé ma cuāha ndehē váha. <sup>19</sup>Te táca yujnu jeē tu jéhe ndehē váha, chi tahndé te cayú nuū ñuhún. <sup>20</sup>Te suni súcuan cácuu tēe ún, chi jín jniñu cásaña de te nácani rō ndese tēe cácuu de.

*Nasúú ndihi ñayuu quívicoo andiví*  
(*Lc. 13.25-27*)

<sup>21</sup>Nasúú ndihi ñayuu jeē cahán i Jitoho i ruhú cúu jeē quívicoo nuū ndácu Tátá rī jniñu nde andiví. Chi quívicoo maá nene ñayuu jeē squícu jniñu cúní Tátá rī andiví. <sup>22</sup>Te quiví jeē sándaā rī jniñu ñayuu, te cuehē i cahán jín rí: Jitoho na jijnáhan ná, ni canacani ná jnūhun jín síhví ní, te ni caque-nehen ná táchí jín síhví ní, te ni casáha ná cuehē jniñu jéhnu jín síhví ní jeē náā ni ñayuu sáha. Achi i. <sup>23</sup>Yūcuán na te cahán rī jín ñayuu ún: Tu jíní cuiti rī rohó. Cuijyo quingoo rō, chi ñayuu casáha jniñu neé cácuu rō, achi rí.

*Siquí uú vehe*  
(*Lc. 6.47-49; Mr. 1.22*)

<sup>24</sup>Núu súcuan te táca ñayuu jeē cájini sōho jnūhun cáhán rī te squícu i, cácuu i nájnūhun ñn tēe ni nacani váha ñi, te ñi jeni de vehe de siquí cáva. <sup>25</sup>Te ñi cuun saū, te ñi ndaa yūte, te ñi quee tachí xeén, te ñi cachundahá vehe ún. Te tu ñi cótúú, chi siquí cáva ndeé. <sup>26</sup>Te táca ñayuu jeē cájini sōho jnūhun cáhán rī te tu squícu i, cácuu i nájnūhun ñn tēe cánéé jeē ñi jeni de vehe de nuū ñiti. <sup>27</sup>Te ñi cuun saū, te ñi quiji ndute ñuhún cuehē, te ñi quee tachí xeén, te ñi cachundahá vehe ún. Te ñi cótúú-ni, te ñi naa ñi-ni. Achi yá jín i jijnáhan i.

<sup>28</sup>Te ná ni jinu ni cahán Jesús táca jnūhun yáha, te ñayuu cuehē un ní canaa ñi i ni cajini i jnūhun ñi steén yā. <sup>29</sup>Chi ñi steén váha ya nuū i, chi maá yá cúu jeē ndáso jniñu siquí ndihi. Te tēe cástéén tutu ley Yaā Dios, tu súcuan cástéén de.

*Jeē ní nasávāha ya in tēe ndóho cuehyí stehyú*

(Mr. 1.40-45; Lc. 5.12-16)

## 8

<sup>1</sup> Te ni nanuu Jesús yucu ún, te cuehē ñayuu cándiquin i ya. <sup>2</sup> Te in tēe ndóho cuehyí stehyú, ni quee de nuú yá. Te ni jecuiñi yiti de nuú yá, te ni cahān de jín yá:

Jini na jeē cuu sáha ni jeē nduvāha ná, te núu cúní ni, áchí de.

<sup>3</sup> Te Jesús ni soó yá ndaha ya siquí de, te ni cahān yá:

Cúni rí. Te na nduvāha ró, áchí yá.

Te ná ni cahān yá súcuan, te ni nduvāha-ni tēe ndóho cuehyí stehyú un. <sup>4</sup> Yūcuán na te ni cahān Jesús jín de:

Ma cáchi cuiñi ró nuú ní in. Chi quis-teén ró maá ró nuú sutú, te condahá ró jeē socó ró nuú Yaā Dios, nájñuhun ni ndacu Moisés jniñu jenahān, návāha cuni ñayuu jeē ní nduvāha ró. Achí yá.

*Jeē ní nasávāha ya mozo capitán*

(Lc. 7.1-10)

<sup>5</sup> Te ni quívi Jesús ñuu Capernaum. Te in tēe nación Roma jeē cúu capitán, ni quee de nuú yá, te ni cahān ndahú de jín yá:

<sup>6</sup> Mozo na cáti i vehe ná, chi ni jin i te ndóho xeñ i, áchí de.

<sup>7</sup> Te ni cahān Jesús:

Quihín rí nasávāha ri i núu súcuan, áchí yá.

<sup>8</sup> Te ni cahān capitán jín yá:

Tu cújehnu ná jeē quihín ni quívi ní vehe ná. Chi máá jeē cahān-ni ní, te na nduvāha-ni mozo na. <sup>9</sup> Chi máá ná suni ndiso jniñu ná ní casáha tēe cújehnu ga. Te cújehnu ná núu táca soldado na. Te núu cáhán na jín in de jeē na quihín de, te cuahān de. Te núu cáhán na jín inga de jeē na quíji de, te quíji de. Te núu ndácu ná in jniñu nuú mozo na, te sáha i. Achí de.

<sup>10</sup> Te jeē ní jini Jesús jñuhun yáha, te ni naa ni yá. Te ni cahān yá jín ñayuu cándiquin yá ún:

Jendaá cahān rí jín ró jeē ní nación yō Israel tu ní nihín rí ni in ñayuu candíje nihín súcuan, nájñuhun cándíje tēe yáha, vésú tēe nación tu jini jñuhun Yaā Dios cúu de. <sup>11</sup> Te cáhán rí jín ró jeē quíjicoo cuehē ñayuu ichi núu cáne niāndii jín ichi núu queé niāndii. Te cucōo i caji i staā jín Abraham jín Isaac jín Jacob nuú ndácu Yaā Dios jniñu nde andívi. <sup>12</sup> Te sava ñayuu nación Israel jeē maá i quívicoo núu, te sa quenehen ya i quihín i nuú nēe, chi tu ní cándíje i. Te yūcuan ndáhyū i te nacayihí yuhu i jeē ndoho xeñ i. Achí yá.

<sup>13</sup> Yūcuán na te ni cahān yá jín tēe cúu capitán:

Cuánuhun vehe ró, chi sáha ri nájñuhun cándíje ró jeē sáha ri.

Te mozo de un ní nduvāha-ni i máa hora un.

*Jeē ní nasávāha ya naná chíso Pedro*

(Mr. 1.29-31; Lc. 4.38-39)

<sup>14</sup> Te ni jehēn Jesús vehe Pedro. Te ni jito ya naná chíso de jeē catú ña yhi quíji ña. <sup>15</sup> Te ni jniñi ya ndaha ña, te ni quenda-ni quíji ún ña. Te ni ndocuñi ña, te ni sáha ña jeē ní cayeji de jín yá.

*Jeē ní nasávāha ya cuehē ñayuu*

(Mr. 1.32-34; Lc. 4.40-41)

<sup>16</sup> Te jeē ní cuaa ni quecoo ñayuu jín cuehē ñayuu jeē ñuhun tachí ini i. Te ni quenehen ya tachí un cuángoo jín jñuhun cáhán-ni ya. Te suni ni nasávāha ya táca ñáyuu cácuñu.

<sup>17</sup> Te súcuan ni cuu návāha cundaā jñuhun ni cahān Isaías, tēe ni nacani jñuhun Yaā Dios jenahān: Máa yá ni tejiyo ndinuú cuehyí cándoho yó, áchí Isaías.

*Siquí ñayuu jeē cácuni i condiquin i ya*

(Lc. 9.57-62)

<sup>18</sup> Te ni jito Jesús jeē ní ndicó ndúu cuehē ñayuu yá. Te ni cahān yá jín tēe cáscuáha jín yá jeē na yáha de jín yá inga lado mar. <sup>19</sup> Te in tēe stéén tutu ley Yaā Dios, ni quee de nuú yá, te ni cahān de:

Maestro, condiquin na nihín quihín yō ndé-ni cúu-ni nuú quihín ni, áchí de.

<sup>20</sup> Te ni cahān Jesús jín de:

Táca ñúcui, iyó yáú cava cáñuhun ti. Te suni saa, iyó táca tī. Te ruhú, Yaā ní nduu tēe, tuú nuú cusú rí, achí yá.

<sup>21</sup> Te inga tēe ni cahān de jín yá, te tēe scuáha jín yá cúu de:

Condetu ní ndé na quíchindúji ná tátá na xihna ga. Yūcuán na te condiquin na nihín, áchí de.

<sup>22</sup> Te ni cahān Jesús jín de:

Condiquin ruhú na quihín yō. Te stóo táca ndáyi na chindúji jñahan ndíyi, chi ndíyi cácuu ñayuu tu cácandíje. Achí yá.

*Jeē ní jecuiñi tachí nihin jín mar ni sáha ya*

(Mr. 4.35-41; Lc. 8.22-25)

<sup>23</sup> Yūcuán na te ni quívi Jesús ini barco, te tēe cáscuáha jín yá ni quívicoo de cuahān de jín yá. <sup>24</sup> Te nuú mar ni jecuiñi in tachí nihin, te ni stóna ndute mar, ni quívi ini barco un. Te Jesús chi quíxí yá. <sup>25</sup> Te tēe cáscuáha jín yá ni castóna de ya, te ni cacahān de:

Jnama ní yóhó, chi je queé yó chíji ndute, áchí de.

<sup>26</sup> Te ni cahān yá jín de:

¿Naun cáyuhú ndasí ró? Te tu cácandíje nihin ró jeē cácu ró sáha rí, achí yá.

Yūcuán na te ni ndocuñi yá, te ni cahān yá nuú tachí nihin un jín nuú mar. Te ni cuu nayúú íi-ni. <sup>27</sup> Te ni canaa ni de jijnáhan de, te ni cacahān de:

¿Ndé ñn ga cúu tēe yáha, jéé ndé tachī níhin jín mar cájetáhú jéé cahán de? áchí de.

*Tēe Gadara jeé cándoho tachī  
(Mr. 5.1-20; Lc. 8.26-39)*

<sup>28</sup> Te ni jinū yā inga lado mar, máá región ñayuu Gadara. Te uū tēe ni quendacoo de nde nuū yíndūji ndīyí, ni quiñahan de ya. Te cáñuhun tachī ini de, te siquī jeé yóhoyo xeēn tachī ún, te ni ñn ñayuu tu cúu yáha i ichi yúcuau. <sup>29</sup> Te ni cacana cóhó de ni casáha tachī:

¿Naun vēji ní nuū ná, Jesús Sēhe Yaā Dios? ¿A vēji ní yáha jeé stóho ní sáña ndé ná tu quee maá quiví? áchí.

<sup>30</sup> Te nde jicá jecu cáñin cuehē quinī cájitu tí. <sup>31</sup> Te tachī jeé cáñuhun ini tēe un ni cacahān ndahú jín yá:

Núu quenehen ní sáña, te cuāha ni jñúhun na quívicoo ná ini quinī cáñin yúcuán, áchí.

<sup>32</sup> Te ni cahān yā jín:

Cuángoo núu súcuau.

Te ni quendacoo tachī ún ini tēe ún, te ni quívicoo ini quinī. Te quinī un ní cajinu tí ni caningava tí ñn yucáva, te ni ndaquēhi tí ndute mar, ni cajihí tí.

<sup>33</sup> Te tēe cándito tí ni cajinu de cuangoo de jeé ní cayūhú de. Te ni najinūcoo de ñuu. Te ni cacastuhún de táca jñíñu yúcuau, jín ndese ni cuu jeé ní quendacoo tachī ini ndindúú tēe ún. <sup>34</sup> Yúcuán na te ndivii ñayuu ñuu un, ní quendacoo i cuacondēhé i Jesús. Te ná ní jinūcoo i nuū ñe ya, te ni cacahān ndahú i jín yá jeé na quénda yá región yúcuau quíñin yā.

*Jeé ní nasávaha ya ñn tēe ndóho cuehyí ni jín*

*(Mr. 2.1-12; Lc. 5.17-26)*

## 9

<sup>1</sup> Yúcuán na te ni ndīvi Jesús ini barco. Te ni nayáha ya cuahān yā inga lado mar, te ni najinū yā ñuu maá yá. <sup>2</sup> Te ni caquindeca ñayuu ñn tēe ndóho cuehyí ni jín, cátu de nuū ñn camilla. Te ni jini Jesús jeé cácañdije i jeé cúu nasávaha ya tēe ní jín ún. Te ni cahān yā jín de:

Na ndúndeyí ní rō séhē, chí je ñe cáhnu ní rí nuū táca cuéchi rō, áchí yá.

<sup>3</sup> Yúcuán na te jecu tēe cástéén tutu ley Yaā Dios, ni cajeni ní de siquī yā: Jeé cahān tēe yáha súcuau, chí cáhán de jñúhun ndevāha jeé quití ní Yaā Dios. <sup>4</sup> Te ni jini Jesús jeé súcuau cájeni ní de, te ni cahān yā jín de:

¿Naun cájeni ní rō jeé cahān ndevāha rí? <sup>5</sup> Jeé uū jñúhun yáha, ¿ndé ñn yí gá cáa? ¿A jeé cahān rí jín tēe cūhú: Je ñe cáhnu ní rí nuū táca cuéchi rō? ¿Chí yí gá jeé cahān rí: Ndocuñí te caca rō, chí je ní nduvāha rō, áchí rí? <sup>6</sup> Te vijna te na stéén rí jeé maá rí, Yaā ní nduu tēe, ndíso jñíñu rí ini ñayiví yáha jeé cóne cáhnu ní rí nuū cuéchi.

Yúcuán na te ni cahān yā jín tēe ní jín ún: Ndocuñí te naquihín rō camilla rō te quinhun rō vehe rō, áchí yá jín de.

<sup>7</sup> Yúcuán na te ni ndocuñí-ni tēe ún, te cuanhun de vehe de. <sup>8</sup> Te ná ni cajito ñayuu un jéé súcuau ní sáha ya, te ní cayūhú i. Te ní cacahān i jeé yóhoyo vāha Yaā cúu Yaā Dios jeé súcuau ní jēhe ya poder nuū ñn tēe jeé cúu nasávaha de ñayuu, áchí i cájito i Jesús.

*Jeé ní cana ya Mateo*

*(Mr. 2.13-17; Lc. 5.27-32)*

<sup>9</sup> Te ni quenda Jesús yúcuau cuahān yā. Te ni jito ya nuū ñn tēe nání Mateo, néne de nuū cututú xúhun renta. Te ni cahān yā jín de:

Conduquín ruhú na quíñin yō.

Te ni ndocuñí de, te cuahān de jín yá.

<sup>10</sup> Yúcuán na te ni jehēn yā ni yeji yā staā vehe de. Te cuehē tēe cástutú xúhun renta jín inga tēe casáha cuēchi, suni cáyūcú de cáyeji de staā jín Jesús jín tēe cáscuāha jín yá. <sup>11</sup> Te tēe grupo fariseo, ní cajito de, te ni cacahān de jín tēe cáscuāha jín yá:

¿Naun vēji maestro rō jín tēe cástutú xúhun renta jín inga tēe casáha cuēchi? áchí de.

<sup>12</sup> Te ni jini Jesús, te ni cahān yatá yá jín de:

Ñayuu cáhīyo vāha, tu jini ññhún i tēe tájná, chí ñayuu cácuhú cúu jeé jini ññhún.

<sup>13</sup> Cuahān jñnāhan rō núu súcuau, te nacani ní rō na vé cúu jeé cahān jñuhun yáha jéé yosó núu tútu í: Cúni rí jeé na cundáhú ní rō jñnāhan rō, nasūu jéé socó rō quití nuū rí, áchí Yaā Dios nde jenahán. Te ruhú nasūu jéé vēji rí cana rí ñayuu tú cuēchi, jeé cúu i nájñuhun ñayuu cáhīyo vāha, chí sa suhva vēji rí cana rí ñayuu iyó cuēchi, jeé na nacani ní i te stóo i cuēchi i. Áchí yá.

*Jeé ní cacajñuhún de ya siquī jeé cóndite ní*

*(Mr. 2.18-22; Lc. 5.33-39)*

<sup>14</sup> Yúcuán na te tēe cáscuāha jín Juan tēe scuándute, ní quecoo de nuū Jesús. Te ni cacahān de jín yá:

Sáña jín tēe grupo fariseo, tíjini jínu cáhīyo ndite ní na núu Yaā Dios. Te tēe cáscuāha jín máá ní, ¿naun tu casáha de súcuau?

<sup>15</sup> Te ni cahān Jesús jín de:

¿A cuu condite ní de níni jéé iyó rí jín de? ¿A cuu cucuñhí yá ní ñayuu cáñin vico nándāha, te núu níni néne tēe nándāha? Te quee quiví jeé cújiyo tēe nándāha, te quiví ún chí condite ní i.

<sup>16</sup> Te ni cahān yā uū jñuhun yatá siquī jeé tu quiñnāhan jñuhun jeé jéé steén yā jín táca jñuhun jenahán. Áchí yá:

Ní ñn tu náchuhun ñn pedazo sahma jéé núu ñn sahma túhú. Chí núu súcuau te ndīyí pedazo jeé un, te tahndé gā jeé tuhú un, te nducáhnu ga nuū catáhdé un. <sup>17</sup> Te suni tu cáchuhun vino jeé ini ññ túhú. Chí núu súcuau te ndatá ññ ún, te naa vino jín ññ. Chí cánuú

jéé chühun i vino jeé ini ñi jéé, te súcuan te quéndoo vaha ndindúú. Achí yá.

*Jñuhun sêhe síhí Jairo jín ñahan ní quehé yusáhma ya*

(Mr. 5.21-43; Lc. 8.40-56)

<sup>18</sup> Te níni cáhán Jesús táca jñuhun yáha, te ñi tēe cújéhu nuú ñayuu hebreo, ni quee de nuú yá. Te ni jecuiñi yiti de nuú yá, te ni cahān de:

Sêhe síhí ná sá ní jihí i. Te núu na quihín yó soó ní ndaha ní síqu i, te natecu i. Achí de.

<sup>19</sup> Te ni ndocuiñi Jesús, te cuahān yá jín de, te suni cuangoo tēe cáscuáha jín yá. <sup>20</sup> Te mēhñu ñayuu cuangoo jín yá ni quee ñi ñahan, te je ni cuu uxí uú cuiyá ndóho ña cuehyí niñi. Te ni quee ña ichi yátá yá, te ni quehé ña yusáhma ya. <sup>21</sup> Chi ní jeni ní ña: Vésú maá sahma ya na ñihín rí quehé rí, te nduváha rí, jeni ní ña. <sup>22</sup> Te ni ndió cóto Jesús, te ni jito ya nuú ña, te ni cahān yá:

Na ndúndeyí ní rō, sêhē. Ni candije ró jéé cuu nasávāha ri rohó, te jeé yúcuan ní nduváha ró, achí yá.

Te ni nduváha ña maá hora un.

<sup>23</sup> Te ná ní jinū Jesús vehe tēe cújéhu ún, te ni jito ya nuú tēe cácuu músico jeé quíchindūji de i, jín núu ñayuu cuehē, cásvaa i. <sup>24</sup> Te ni cahān yá jín i:

Cujitoy jínáhan ró, chí sūchi síhí yáha, tu ní jihí i chí quixí-ni i, achí yá.

Te ni cajecū catá i jeé ní cahān yá. <sup>25</sup> Te ni quenehen ya ñayuu cuehē ún, te ni quívi ya ini vehe. Te ni jñi ya ndaha sūchi síhí ní jihí ún, te ni ndocuiñi-ni i. <sup>26</sup> Te ná región yúcuan ní jitē núu jñuhun jñiñu jéhu ní sáha ya ún.

*Jeé ní nasávāha ya uú tēe cuáá*

<sup>27</sup> Te ni quenda Jesús yúcuan cuáhān yá. Te uú tēe cuáá cuangoo de yatá yá, cácana jee de: Máá ní jeé cúu ní Sêhe yucún David, cundáhú ní ní sáña víi, achí de.

<sup>28</sup> Te ná ní jinū yá vehe, te ni jinūcoo tēe cuáá un núu yá. Te ni cahān yá jín de:

¿A cávandije ró jéé cúu nanune ri tinūu ró? achí yá.

Te ni cacahān de:

Cávandije ná, achí de.

<sup>29</sup> Yūcuán na te ni tee ya ndaha ya tinūu de, te ni cahān yá:

Na sáha ri nájnūhun cávandije ró, achí yá.

<sup>30</sup> Te ni cananune-ni tinūu de. Te Jesús ní cahān ñihin ya jín de:

Ma cáchi cuiti rō nuú ní ñi, achí yá.

<sup>31</sup> Te maá de chí ní quendacoo de, te ni cajete-ni de jñuhun ná región yúcuan jéé súcuan ní sáha ya jín de.

*Jeé ní nasávāha ya ñi tēe ñihín*

<sup>32</sup> Te nuú ní quendacoo tēe un cuangoo de, te ni queeco ñayuu jín ñi tēe ñihín, jeé ñuhun tachí ini de. <sup>33</sup> Te ni quenehen ya tachí un

cuáhān. Te tēe ñihín un ní nacahān de. Te ni canaa ní ñayuu ní cajito i, te ni cacahān i:

Ná tu cuni cuiti yō ní ñi jñiñu súcuan ini ñuu Israel, achí i.

<sup>34</sup> Te tēe grupo fariseo chí ní cacahān de:

Tēe yáha chí quenehen de tachí jín fuerza maá jexeén jeé cújéhu nuú tachí, achí de.

*Jeé cundáhú ní yá ñayuu cuehē*

<sup>35</sup> Te ní jica cuu Jesús táca ñuu jín rancho, te ni steén yá jñuhun ini táca vehe ñi sinagoga. Te ni nacani ya jñuhun vaha ndese ndácu Yáa Dios jñiñu. Te ni nasávāha ya ñayuu cácuñu na-ni cuehyí cándoho i. <sup>36</sup> Te cundáhú ní yá jito ya nuú ñayuu cuehē ún. Chí cándoho i te cácuñuhá ní i, chí cácuu i nájnūhun lanchi jeé tú jitoho tī, chí tu ndíquín i Yáa cúu Jitoho i. <sup>37</sup> Yūcuán na te ni cahān yá jín tēe cáscuáha jín yá:

Ñayuu yáha cácuu i nájnūhun trigo jeé tahndé, te ndaa jeé cuehē cúu, te tēe cahnde chí jecu-ni de cúu. <sup>38</sup> Núu súcuan te cacān táhí rō nuú maá Jitoho rō Yáa Dios jeé na tají yá cuehē tēe na quíngoo de cahnde de trigo, cúu jeé nácani de jñuhun ya nuú ñayuu. Achí yá.

*Jeé ní nacāji ya uxí uú tēe apóstol*

(Mr. 3.13-19; Lc. 6.12-16)

## 10

<sup>1</sup> Yūcuán na te ni cana ya uxí uú tēe jeé scuáha de jín yá. Te ni jêhe ya poder nuú de jeé quenehen de tachí ini ñayuu, jín jéé nasávāha de ñayuu cácuñu táca ndinuú cuehyí.

<sup>2</sup> Te yáha cúu síhví ndihúxí uú tēe apóstol un: Tēe ñi cúu Simón jeé suni nání Pedro, jín ñani de Andrés. Te uú gā de cácuu sêhe Zebedeo, te nání de Jacobo jín Juan. <sup>3</sup> Yūcuán na te Felipe, Bartolomé, Tomás, Mateo tēe ní stútú xúhun renta, Jacobo sêhe Alfeo, jín Lebeo jeé suni nání Tadeo, <sup>4</sup> jín Simón tēe grupo cananista, jín Judas Iscariote, tēe jeé ní nastúu de ya.

*Jeé ní tají yá ndihúxí uú de quinacani de jñuhun*

(Mr. 6.7-13; Lc. 9.1-6)

<sup>5</sup> Te ní tají Jesús ndihúxí uú tēe yáha jeé quíngoo de. Te ni ndacu ya jñiñu nuú de ndese sáha de:

Ma quíngoo ró núu ñayuu jeé násū ñayuu hebreo cácuu i, ní ma quívicoo ró táca ñuu ñayuu Samaria. <sup>6</sup> Chí nuú maá-ni ñayuu nación yō Israel quíngoo ró, chí cácuu i nájnūhun lanchi jeé ní sana. <sup>7</sup> Te jeé quíngoo ró te suhva nacani ró jñuhun: Je ni cuyajni Yáa ndeé andiví jeé ndacu ya jñiñu nuú rō, achí rō. <sup>8</sup> Te nasávāha ró ñayuu cándoho cuehyí stehyú jín ñayuu cándoho táca gá cuehyí, te nastécu rō ndiyi te quenehen ró tachí ini ñayuu. Te súcuan-ni ní jêhe ri poder

nuū rō jeē sāha ró, te suni súcuan-ni sāha ró jíin i.

<sup>9</sup> Te ma cóndiso ró xúhun oro, ni xúhun plata, ni centavo cuechí. <sup>10</sup> Ni ma cóndiso ró ñunu stáá caji rō ichi, ni inga camisa, ni ndijeh, ni vara. Chi siquí jniñu jeē nácani ró jñuhun nuū ñayuu, te cánuú coto i róhó.

<sup>11</sup> Te na-ni ñuu chí rancho núu ni jinūcoo ró, te yūcuán nducú ró ñn ñayuu vāha, te coyūcu ró vehe i nde quingoo tucu ró. <sup>12</sup> Te jeē quívi ró vehe ñayuu ún, te cahān rō jeē na quií jñuhun ndeyí; jñuhun sií ni nuū i. <sup>13</sup> Te núu ñayuu vāha cácuu i, te jñuhun ndeyí ní cahān ró quendóo siquí i. Te núu nasū ñayuu vāha cácuu i, te jñuhun ndeyí ní cahān ró ma quendóo siquí i. <sup>14</sup> Te núu iyó ñayuu jeē tu cájetáhú i róhó, ni tu cúni i cuni nahín i jñuhun cahān rō, yūcuán na te quendacoo ró vehe un chí ñuu ún, te scóyo ró tícachā jehē rō, te súcuan stéén rō jeē iyó cuechi i jeē tu ní cájetáhú i. <sup>15</sup> Jendaá cahān rī jíin ró jeē quívi juicio te xeēn gá coo castigo siquí ñuu casáha súcuan vēsú siquí ñuu Sodoma jíin ñuu Gomorra nuū ní casáha ndasí ñayuu cuēchi.

*Jeē coto xeēn ñayuu de jíjnāhan de*

<sup>16</sup> Cuni sóho ró, chí tájí rī róhó quingoo ró nájnūhun lanchi mēhñu yihí. Núu súcuan te coo listo ró nájnūhun coó, te coo vítá ní ró nájnūhun paloma. <sup>17</sup> Te condito ró máá ró nuū ñayuu, chí quee quívi jeē quindeca i róhó núu tohó, te caní i róhó ini táca vehe íi sinagoga. <sup>18</sup> Te suni nde nuū táca gobernador jíin rey quindeca i róhó jeē siquí ruhū. Te súcuan te nune ichi jeē nacani ndaá ró jñuhun rī nuū de jíin núu ñayuu táca nación jeē tu jíni jñuhun Yaā Dios. <sup>19</sup> Te núu ni jendeca i róhó núu táca tée ún, ma nácani ndasí ní ró ndese cahān rō. Chí máá hora un te máá yá steén nuū rō ndese cahān rō. <sup>20</sup> Chí nasū máá ró cúu jeē cahān, chí Espiritu máá Tátá rō cúu jeē cahān jíin yuhu ró.

<sup>21</sup> Te sava ñayuu tu cácanđje, nastúu i ñani i jeē na cúu. Te tátá nastúu séhe. Te séhe ndonda siquí tátá jíin náná jeē na cúu. <sup>22</sup> Te ndihí ñayuu quií ni i nuū rō jeē siquí ruhū. Te ñayuu jeē cuíñi nihin nde jeē jínu jñūndóho, ñayuu ún chí cácu ánuá i. <sup>23</sup> Te núu cájito xeēn i róhó ñn ñuu, te cunu ró quiñin rō inga ñuu. Chí jendaá cahān rī jíin ró jeē ma ndécava ró caca cuu rō ndihí nación yó Israel te ndiji-ni máá rí, Yaā ní nduu tēe.

<sup>24</sup> ñin tēe scuáha, tu cújehnu de nuū maestro de. Ni tēe cúu mozo, tu cújehnu de nuū patrón de. <sup>25</sup> Tēe scuáha chí nájnūhun ndóho maestro de suni súcuan ndoho nahín máá de, te tēe cúu mozo suni ndoho de nájnūhun ndóho patrón de. Núu súcuan te núu ruhū cácahān i jeē Satanás cúu rī, te nagā ni cuu jeē ma cahān i jeē róhó cácuu Satanás.

*Jeē ní cachi yā ndé ñn cúu jeē yūhu yó (Lc. 12.2-9)*

<sup>26</sup> Núu súcuan te ma yūhu ró coto ró ñayuu. Chí táca jñuhun cácahān sáhi i ma quendóo sáhi cuií, chí ndihí natūu ndijin, te cuni ñayuu. <sup>27</sup> Jñuhun ní cahān rī jíin ró jeē tu ní jíni ñayuu, na nácastūhun cájí ró nuū i. Te jñuhun ní nacani sáhi rī nuū rō, na nácani jeē ró yátā táca vehe. <sup>28</sup> Te ma yūhu ró coto ró ñayuu cahni yiquí cúñu rō, chí ma cúu cahni i ánuá rō. Chí sa suhva yūhu ró jeē ma stívi ró núu Yaā Dios, chí cuu snáhnú ndetū yā róhó jeē quívi ánuá rō jíin yiquí cúñu rō infierno.

<sup>29</sup> Te táca saa chí tú yahu ndeé tí, chí nde uú tí jeē ñn centavo lulí. Te ni ñn tí tu nánga nuū ñuhun te núu tu jéhe Tátá rō jñuhun, chí ndíto ya tí. <sup>30</sup> Te nagā ni cuu róhó jíjnāhan ró, chí nde ndihí xixí ró je ni cahu ya. <sup>31</sup> Núu súcuan te ma yūhu ró jíjnāhan ró, chí cánuú ndasí gá rō nuū yā vēsú cuehē táca saa.

*Ñayuu jejnūhún Jesucristo nuū inga ñayuu (Lc. 12.8-9)*

<sup>32</sup> Te táca ñayuu jeē cuajñuhún ruhū nuū inga ñayuu, suni súcuan cuajñuhún rī i nuū Tátá rī, Yaā ndeé andiví. <sup>33</sup> Te táca ñayuu jeē ma cuajñuhún ruhū nuū inga ñayuu, suni súcuan ma cuajñuhún rī i nuū Tátá rī, Yaā ndeé andiví.

*Jeē siquí Jesús te cusñn ini ñayuu (Lc. 12.51-53; 14.26-27)*

<sup>34</sup> Ma cáni ni ró jíjnāhan ró jeē véji rī jeē cóyūcu máni ñayuu ñayiví. Tú véji rī jeē cóyūcu máni ñayuu, chí sa suhva cuajñāhan i jeē siquí ruhū. <sup>35</sup> Chí jeē siquí ruhū te cusñn ini séhe yí jíin tátá, te séhe síhí jíin náná, te séhe jēnu jíin náná chíso. <sup>36</sup> Chí táca ñayuu candíje ruhū, chí jñāhan vehe i cúu jeē quií ni nuū i.

<sup>37</sup> Te núu ndé ñn ñayuu maní gā i jíin tátá i chí jíin náná i vēsú jíin ruhū, nasūu ñayuu vāha cúu i jeē cóndiquín i ruhū. Te núu ndé ñn ñayuu maní gā i jíin séhe yí i chí jíin séhe síhí i vēsú jíin ruhū, te suni nasūu ñayuu vāha cúu i jeē cóndiquín i ruhū. <sup>38</sup> Te na-ni ñayuu núu tu jéhe i jñuhun ndoho i jñūndóho vēsú nde cuu i jeē siquí jeē cóndiquín i ruhū, nasūu ñayuu vāha cúu i jeē cóndiquín i ruhū. <sup>39</sup> Te núu ndé ñayuu cúni i cácu i nuū jñūndóho quií nuū i jeē siquí ruhū, núu súcuan te jñahnú ndetū i ní cáni. Te núu ndé ñn ñayuu vēsú na cúu i jeē siquí ruhū, te cotecu i ní cáni.

*Jeē iyó táhū yó nuū Yaā Dios (Mr. 9.41)*

<sup>40</sup> Te ñayuu cuatáhú róhó jíjnāhan ró, núu súcuan te ruhū cájetáhú i. Te ñayuu cájetáhú ruhū, cájetáhú i Yaā ní tají ruhū véji rī. <sup>41</sup> Núu na-ni ñayuu cuatáhú i ñn tēe nácani jñuhun Yaā Dios, siquí jeē jíca de jniñu Yaā Dios, núu súcuan te inuú-ni coo tahū de nuū Yaā Dios jíin tēe nácani jñuhun Yaā Dios. Te núu na-ni ñayuu cuatáhú i ñn tēe ndaá, siquí jeē tēe ndaá cúu de, núu súcuan te inuú-ni coo tahū

de nuū Yaā Dios jīn tēe ndaa. <sup>42</sup> Te nū ndé ñayuu cuāha i vēsū ñn ñajin ndute mījin coho ñn sūchi yāha, siquī jeē cūu i sūchi cándje ruhū, ndaa ndije cūu jeē nihīn i tahū i. Achí yá.

*Jeē ní taji Juan uū tēe nuū yā  
(Lc. 7.18-35)*

## 11

<sup>1</sup> Te ná ni jīnu ni ndacu Jesús jniñu nuū ndihúxi uū tēe cáscuáha jīn yá, te ni quenda ya yūcuan cuāhān yā jeē steén yā te nacani ya jñūhun tāca ñuu región yūcuán.

<sup>2</sup> Te ñe Juan vecāa. Te ni nihīn de jñūhun tāca jniñu sāha Cristo. Te ni taji de uū tēe cáscuáha jīn de, <sup>3</sup> cuacajñūhūn de ya:

¿A máa ní cūu Cristo jeē achí tutu jeē quiji, chí condetu yó inga tēe quiji? áchí de.

<sup>4</sup> Te ni cahān yā jīn de:

Cuāgoo te castūhun ró nuū Juan tāca jniñu cájito ró jīn jñūhun cájini ró. <sup>5</sup> Te cachi ró nuū de jeē ñayuu cuaá cánanune tinūú i, te ñayuu yacuá cánacaca i, te ñayuu ndóho cuehyī stehyú cánduvāha i, te ñayuu sohó cánanune sōho i, te ñayuu jīhí nátecu i sāha ri. Te suni nácani ri jñūhun nuū ñayuu ndahú jēe jnama Yaā Dios i. <sup>6</sup> Te yōhyo ndetu tēe jeē ma nácani yátá ni de jeē ruhū cūu Cristo. Súcan cachi ró nuū Juan. Achí yá jīn de.

<sup>7</sup> Te náa cuanuhun ndindúú tēe ún, te ni quejéé Jesús cahān yā jñūhun Juan jīn ñayuu:

¿Na vé ni jécondēhe ró jijnáhan ró nde nuū ñūhun téhé? ¿A ñn tēe jéni ñn jéni uū ni, nájnūhun ite jeē cánda sāha tachí? <sup>8</sup> Te nū tuú, ¿te na vé ni jécondēhe ró nū súcan? ¿A ñn tēe cúní cujēhnu jeē ñūhun sahma lúu? Tuú chí cájini ró jeē tēe cáñuhun sahma lúu, máni ini vehe rey cáyucú de. <sup>9</sup> ¿Te na vé ni jécondēhe ró nū súcan? ¿A ñn tēe nácani jñūhun Yaā Dios? Cahān ri jīn ró jeē suu ni jécondēhe ró, te cújēhnu ga Juan yāha vēsú tāca gá tēe ni canacani jñūhun Yaā Dios. <sup>10</sup> Chí jñūhun Juan cūu jeē ni cahān Yaā Dios jeē yosó nūú tútu i: Taji rí tēe nacani jñūhun ri cosnūú de ichi nūú Cristo,

návāha coo tūhva ñayuu jeē jinú yā. Achí Yaā Dios, achí tutu. <sup>11</sup> Te jendaá cahān rí jīn ró jeē ini ñayiví yāha cújēhnu ga Juan tēe scuándute vēsú tāca gá tēe jeē ni iyo ini ñayiví. Te vēsú súcan te tāca tēe nūu ga ini ñuu nuū ndacu Yaā andiví jniñu, cújēhnu ga de vēsú Juan.

<sup>12</sup> Te ndé quiví ní quee Juan tēe scuándute, te nde vijna, chí cánducú ndéyí ñayuu quívicoo i ndaha Yaā andiví jēe ndacu ya jniñu nuū i. Te nde ñayuu xeēn cánducú ndéyí i siquī. <sup>13</sup> Chí nde ná tu quiji Juan, te ni iyo máa ley Moisés, te suni ní iyo tāca tēe ni canacani jñūhun Yaā Dios. Te ni cacastūhūn

de ndese coo jeē ndacu Yaā Dios jniñu. <sup>14</sup> Te ni cacahān de jeē ndiji Elías. Te nūu cácani ró cuatáhú ró jñūhun, te jīn ró jeē maá Juan cūu tēe jeē ní cachi tutu jeē quiji, chí cūu de nájnūhun Elías. <sup>15</sup> Tāca rōhó jēe jīni sōho, na chūsóhó ró.

<sup>16</sup> Yāhá cachi rí ñn jñūhun yátá návāha na cūni ró ndese cūu ñayuu tiempo vijna. Cūu i nájnūhun sūchi lúli cáhīn nuū yāhu cácasiquí i. Te cácana ndee i xiní jñāhan i: <sup>17</sup> Ni cativí rí scuilí, te tu ní cájita jéhé ró. Te ni cajita ri yaa jeē cuihyá jíta, te tu ní cándahyū ró, achí i. Te nájnūhun cándāa sūchi lúli un jēe tu ní nūjnahan ni i ni ñn, súcan cándāa ró. <sup>18</sup> Chí ni quiji Juan te cuehē jīnu ni iyo ndite ni de, te ní yéji de ni tu ní jīhi de. Te tu ní cánujnahan ni ró, chí ni cacahān ró jeē ñūhun tachí ini de. <sup>19</sup> Yūcuán na te ni quee maá rí, Yaā ní nduu tēe, te yéji rí jīhi ri, te tu cánujnahan ni ró, te chísoó jñūhun ró cacahān ró jeē máni máa jēe yéji rí jīhi ri vino. Te quijnāhan ri jīn tēe cástútu xūhun renta jīn tāca gá tēe cásaaha cuēchi, áchí ró. Te nūu cúndichí ñn tēe jīn jñūhun Yaā Dios, te jīn jniñu sāha de te natūtu jeē tēe ndichí cūu de. Achí yá.

*Jeē ní cuxeēn yā nuū sava ñuu ñhni ni  
(Lc. 10.13-15)*

<sup>20</sup> Yūcuán na te ni quejéé yá cuxeēn yā nuū tāca ñuu nuū ni sāha ya cuehē jniñu jéhnu, chí tu ní cánacani ni i jeē stóo i cuēchi i. Te ni cahān yā:

<sup>21</sup> Nacā jeē xeēn ndoho ró, ñayuu ñuu Corazín. Te nacā jeē xeēn ndoho ró, ñayuu ñuu Betsaida. Chí nūu ini ñuu Tiro jīn ñuu Sidón ni sāha ri jniñu jéhnu jeē ni sāha ri ini ñuu maá ró, te yachí nacani ni ñayuu ñuu un jēe stóo i cuēchi i nūú. Te sāha i seña jeē steén jeē nácani ni i siquī cuēchi i, chí cūhun i sahma jnūú te chuhun i yaā xiní i nūú. <sup>22</sup> Nūu súcan te cahān rí jīn ró jeē quiví coo juicio te xeēn gā coo castigo siquī ró jijnāhan ró vēsú jeē ni iyo siquī ñuu Tiro jīn ñuu Sidón. <sup>23</sup> Te rōhó ñayuu ñuu Capernaum, ¿á cájini ni ró jeē cújēhnu ró nájnūhun ñn jeē cáa cuahān ichi ándiví? Tuú chí sa nanuu ró ndé lugar nuū cáyūcu ánuá ndiyí. Chí nūu ini ñuu Sodoma ni sāha ri jniñu jéhnu jeē ni sāha ri nuū maá ró, te coo ñuu yūcuan ndé vijna nūú. <sup>24</sup> Nūu súcan te cahān rí jīn ró jeē quiví coo juicio te xeēn gā coo castigo siquī ró vēsú jeē ni iyo siquī ñayuu ñuu Sodoma. Achí yá.

*Nehen nuū rí ndetātu ró, achí yá  
(Lc. 10.21-22)*

<sup>25</sup> Te suni quiví un ní cahān Jesús:

Na cútahū na nūu ni Tātā, Jitoho andiví jīn ñayiví. Chí ni jesí ní táca jñūhun ndichí ní, jeē ma cūni ñayuu ndichí jīn ñayuu túhva cuenta ñayiví yāha. Te ni steén ni nūú ñayuu cácuu nájnūhun sūchi lúli. <sup>26</sup> Chí súcan ni nujnahan ni ní Tātā, achí yá.

<sup>27</sup> Te ni cahān gā yá:

Ndivii ni jēhe Tátá rī nuū rī. Te tu cājini ñayuu ndé ñn cúu ruhū. Sēhe Yaā Dios, chí máá-ni Tátá rī cúu jeē jini yā ruhū. Ni tu cājini ñayuu ndese Yaā cúu máá Tátá, chí máá-ni Sēhe cúu jeē jini. Te iyó ñayuu jeē cuni máá Sēhe stéén yā nuū i ndese Yaā cúu Tátá yā, te máá i suni cuni i. <sup>28</sup> Tāca ró jēē ni cuíta ró jín táca jniñu jín ley jeē yí sáha jín ró, nehen quivicoo ró ndaha ri, te ndetātu ró sáha ri. <sup>29</sup> Quiví ró núu jniñu ndácu máá rí, te scuáha ró coo ró nájñuhun íyó máá rí. Chí vitá ni rī te suchí ni rī. Te súcuan te ndetātu ró jín ánuá ró sáha ri. <sup>30</sup> Chí tú yí jeē cuandetū ró nuū rī, ni tú yí jéé squicu ró jniñu ndácu ri. Achí yá.

*Jeē ní cataxín de yoco trigo quiví ndetātu*  
(Mr. 2.23-28; Lc. 6.1-5)

## 12

<sup>1</sup> Te ñn quiví ndetātu ní yáha Jesús cuahān yā nuū cáa trigo. Te tēe cáscuáha jín yá, cājil de sóco. Te ni quejéé de cátaxín de yoco trigo cáyeji de. <sup>2</sup> Te ni cajito tēe grupo fariseo, te ni cacahān de jín yá:

Condéhé, chí tēe cáscuáha jín ró casáha de jniñu jeē tu iyó váha sáha yó quiví ndetātu, achí ley Moisés.

<sup>3</sup> Te ni cahān máá yá jín de:

¿A tu ní cácahu ró tutu ndese ni sáha David, ñn quiví jeē ni jí de sóco jín tēe cáhīn jín de? <sup>4</sup> Te ni quiví de ini vehe Yaā Dios. Te ni yeji de pan íi jeē yosó ndijin nuū Yaā Dios. Te tú na ley jeē cáji de, ni tēe cáhīn jín de, chí máá-ni sutú cuu caji. Te vésú súcuan te tú na cuéchi ní iyo siquí de. <sup>5</sup> ¿Te á tu ní cácahu ró tutu ley Moisés, ndese cásájniñu sutú ini templo, vésú quiví ndetātu cúu? Te tú na cuéchi iyó siquí de, vésú quiví ndetātu cásájniñu de jniñu jeē cácuu de sutú. <sup>6</sup> Te cáhān rī jín ró jeē máá rí jeē iyó yáha, cújéñu ga rí vésú templo. <sup>7</sup> Te tu cájecūhun ni ró jijnáhan ró jñuhun yáha jeē yosó núu tútu íi jeē ní cáhān Yaā Dios: Jeē cuni gā rí cúu jeē cundáhú ni ró jnāhan ró, vésú jeē socó ró quiti nuū rī, achí yá. Te núu jeē ní cajecūhun ni ró jñuhun yáha, te ma cahān ró súcuan siquí tēe jeē tú na cuéchi núu. <sup>8</sup> Chí ruhū, Yaā ní nduu tēe, máá rí cúu jeē ndácu jniñu siquí ndese sáha ñayuu quiví ndetātu, achí yá.

*Jeē ní nduvāha tēe ni ichí ndaha*  
(Mr. 3.1-6; Lc. 6.6-11)

<sup>9</sup> Yūcuán na te cuahān Jesús, te ni quiví ya ini vehe íi sinagoga. <sup>10</sup> Te yūcuán íne ñn tēe ni ichí ñn ndaha de. Te cácu ni tēe grupo fariseo jeē nihīn de cuéchi siquí yā, te ni cacajnūhún de ya:

¿A iyó ley jeē cuu nasávāha yó ñayuu cuhú quiví ndetātu? achí de.

<sup>11</sup> Te ni cahān yá jín de:

¿Nde ñn róhó, núu névāha ró ñn lanchi, te núu nínga tí ini ñn yaū quiví ndetātu, te á tu jéhén ró natava ró tí, chí naún? <sup>12</sup> ¿Te á tu cánuú ndasí gá ñn tēe vésú ñn lanchi? Núu súcuan te vetú-ni sáha yó jniñu váha quiví ndetātu, achí yá.

<sup>13</sup> Yūcuán na te ni cahān yá jín tēe ni ichí ndaha ún:

Scaá ndaha ró.

Te ni scaá de, te ni nduvāha-ni nájñuhun íyó inga. <sup>14</sup> Yūcuán na te ni quendacoo tēe grupo fariseo, te ni candajnūhún de siquí Jesús, ndese cahni de ya.

*Jñuhun Jesús jeē ní cáhān Isaías nde jehanáñ*

<sup>15</sup> Te ni jini Jesús jeē súcuan cájeni ni de, te ni quenda ya yūcuán cuahān yā. Te cuehē ñayuu cándiquín i ya. Te ni nasávāha ya ndihí ñayuu cuhú. <sup>16</sup> Te ni ndacu ya jniñu nuū i jeē ma stéén i ya. <sup>17</sup> Te súcuan ni cuu návāha squicu jñuhun ni cahān Yaā Dios siquí Jesús, te ni nacani Isaías jñuhun ya un ndé jehanáñ: <sup>18</sup> Yáha cúu mozo rí jeē ní nacáji rí, te mani rí jín yá, te cúsiñ ní rí jín yá. Te cuáha rí Espírítu rí coo jín yá.

Te máá yá sándaá jniñu ñayuu táca nación.

<sup>19</sup> Ma tejnáhan ya, ni ma cána jee ya,

te ni ma cahān jee ya ichi jeē cuni ñayuu.

<sup>20</sup> Ma sáha xeēn yá jín ñayuu ni cunihin jñundóho siquí,

ni ma snáá yá ñayuu jeē máá lulí-ni cácañdije. Chí cujéñu ya siquí ndihí, te ndaá ndacu ya jniñu.

<sup>21</sup> Te ñayuu táca nación cocuhun ni i jeē jnāma ya i.

Achí Yaā Dios, achí Isaías nde jehanáñ.

*Jeē ní cacahān de jeē jeniñu ya fuerza Satanás*

(Mr. 3.19-30; Lc. 11.14-23; 12.10)

<sup>22</sup> Yūcuán na te ni caquindeca i nuū yá ñn tēe cuáá ñíhán, chí ñuhun tachí ini de. Te ni nasávāha ya de. Te ni ndundijin tinū de te ni nacahān de. <sup>23</sup> Te ndihí ñayuu cuehē un ní canaa ni i cájito i, te ni cacahān i:

¿A tēe yáha cúu jeē ní cáhān Yaā Dios jeē cacu nuū yucūn David? achí i.

<sup>24</sup> Te tēe grupo fariseo, ni cajini de jeē súcuan cacahān i. Te ni cacahān de:

Tēe yáha ma cúu quenehen de tachí núu jeē tu sáha de jín fuerza Satanás jeē cujéñu nuū tachí, achí de.

<sup>25</sup> Te Jesús ni jini yá jeē súcuan cájeni ni de, te ni cahān yá jín de:

Táca nación jeē casásñn máá te cájejnáhan máá, núu súcuan te snáá jeē iyó yáha máá. Te núu ñn ñuu chí ñn vehe cásásñn máá te cájejnáhan máá, te ma cúu ga coyūcu cáhnu. <sup>26</sup> Te suni súcuan Satanás núu quénehen jnāhan tachí, núu súcuan te sásñn máá. ¿Te ndese cuiñí nihin Satanás jeē ndácu jniñu núu súcuan? <sup>27</sup> Chí cacahān ró jeē jín fuerza



Satanás quénehen ri tachī. Te núu súcuan cúu núu, te ñayuu cascuáha jíin máá ró jíinánhan ró, ¿na jíin fuerza cáquenehen máá í tachī, cájeni ni ró? Núu súcuan te máá í jíinánhan í cachi jeē ní castívi ndasí suhva ró ni cacahán ró jeē cáquenehen ri tachī jíin fuerza Satanás. <sup>28</sup> Te tuú chi sa jíin Espíritu Yaā Dios cúu jeē quénehen ri tachī. Núu súcuan te je ndéé Yaā Dios mēñu ró jeē ndácu ya jniñu.

<sup>29</sup> ¿Chi ndese cuu quívi ñn tēe ini vehe tēe ndacuí jeē quenehen de ndajniñu de? Chi cánuú jeē xíhna gā cuhni de tēe ndacuí ún, te yúcuán na te cuu quenehen de ndajniñu ún. Te suni súcuan cúu jeē jíhni rī Satanás te quénehen ri tachī.

<sup>30</sup> Te ñayuu tu iyó mání jíin rí, núu súcuan te jíto uhū í ruhū. Te ñayuu tu nástútú jíin rí, núu súcuan te sa jéte núu í ñayuu vejicoo nuū rī.

<sup>31</sup> Jeē yúcuan cáhán rī jíin ró: Iyó modo coo jñuhun cáhnu ni nuū táca cuéchi cásaña ñayuu, jíin núu táca jñuhun néé cácahán í. Te núu cahán ndevāha í siquī Espíritu Santo, te ma cóne cáhnu ni Yaā Dios nuū í. <sup>32</sup> Te núu na-ni ñayuu cahán í siquī ruhū, Yaā ní nduu tēe, cuu cone cáhnu ni Yaā Dios nuū í. Te núu na-ni ñayuu cahán ndevāha í siquī Espíritu Santo, ma cóne cáhnu ni Yaā Dios nuū í, ni jeē iyó í ñayāvi yáha, ni ñá tiempo quíji.

*Jñuhun yujnu váha jíin yujnu néé  
(Lc. 6.43-45)*

<sup>33</sup> Núu yujnu váha, te váha ndehē, te núu yujnu néé, te cánéé ndehē. Chi jíin ndehē te jini yó ndese yujnu cúu. Te suni súcuan ñayuu. <sup>34</sup> Va sēhe coō cácuu ró, chí xeēn rō nájñuhun coō. ¿Ndese cuu cahán rō jñuhun váha, chí ñayuu cásaña néé cácuu ró? Chi jniñu jeē jéni ni anuá ñayuu, máni yúcuan cáhán í. <sup>35</sup> Tēe váha cáhán de jñuhun váha, chí iyó ndáa anuá de. Te tēe sáha néé cáhán de jñuhun néé, chí cánéé ánuá de. <sup>36</sup> Te cáhán rī jíin ró jeē táca na-ni jñuhun cácahán ñayuu, nacuaña í cuenta jñuhun un quívi coo juicio. <sup>37</sup> Chí jíin jñuhun ni cahán rō sándaā yā siquī ró, núu jeē quéndōo ndaa rō chí jéé cóndee cuéchi siquī rō. Achí yá.

*Jeē ní cajicān ñayuu tu cácañdije ñn jniñu jéhnu*

*(Mr. 8.12; Lc. 11.29-32)*

<sup>38</sup> Yúcuán na te jecu tēe grupo fariseo jíin tēe cástéén tutu ley Yaā Dios, ni cacahán de jíin yá:

Maestro, cáculni na jéé sáha ní ñn jniñu jéhnu jeē steén núu máá ní cúu Yaā ní tají Yaā Dios, achí de.

<sup>39</sup> Te ni cahán yā jíin de:

Ñayuu yáha jeē casáha jniñu néé, tu cájetáhu cuiti í Yaā Dios. Te cájicān í ñn jniñu jéhnu jeē steén núu Yaā ní tají Yaā Dios cúu rī. Te tuá na inga jniñu jéhnu steén rī nuū í, chí máá-ni jniñu jéhnu nájñuhun ni cuu jíin

Jonás, tēe ni nacani jñuhun Yaā Dios. <sup>40</sup> Chi nájñuhun ni ine Jonás chíji chācá cáhnu unī nduú unī ñuú, suni súcuan ruhū, Yaā ní nduu tēe, cuu rī te cone rī chíji ñuhun unī nduú unī ñuú, te sáa te natecu rī. <sup>41</sup> Te táca ñayuu ñuu Nínive nuū ní nacani Jonás jñuhun, natecu í jíin ñayuu tiempo yáha, quívi juicio jeē sándaā yā cuéchi, te cahán í cuéchi siquī ñayuu yáha. Chi máá í ni canacani ni í ni castóo í cuéchi í quívi ní nacani Jonás jñuhun nuū í. Te vijna chí cújéhnu ga ruhū Yaā íne yáhá vesú Jonás, te tu cácañdije ró ruhū. <sup>42</sup> Te reina jeē ní cújéhnu nación ichi sur, natecu ña jíin ñayuu tiempo yáha, quívi juicio jeē sándaā yā cuéchi, te cahán ña cuéchi siquī í. Chí nde jíca téyí ní quíji ña ni jini nahín ña jñuhun ndíchí ní cahán rey Salomón. Te vijna chí cújéhnu ga ruhū, Yaā íne yáhá vesú Salomón, te tu cácañdije ró ruhū.

*Tachí jeē nastútú jñahan ndévi ini ñayuu  
(Lc. 11.24-26)*

<sup>43</sup> Núu ni quenda ñn tachí ini ñn tēe tu cándije, te jíca cuu nuū ñuhun tēhé, nducú núu ndétátú, te tu nihín, yúcuán na te jéni ní maá: <sup>44</sup> Na quíñuhun rī vehe nuū ní quenda rī. Te núu ni ndee tuu, te jíto jeē tēe tu cándije ún, cúu de nájñuhun ñn vehe iyú te ni ndundoo. <sup>45</sup> Yúcuán na te jéquiñ uxá gā tachí neé gá vesú maá. Te quívicoo ini tēe un jéé cóyūcu yúcuan. Núu súcuan te xeēn gā ndoho tēe un jéé sándihí vesú jeē xíhna ñuhún. Te suni súcuan ndoho ñayuu tiempo yáha jeē casáha néé. Achí yá.

*Náná yā jíin ñani yā  
(Mr. 3.31-35; Lc. 8.19-21)*

<sup>46</sup> Te níni súcuan cáhán yā jíin ñayuu ún, te ni quee naná yā jíin táca ñani yā, íin ña nuū quéhe, te cúní ña cahán ña jíin yá. <sup>47</sup> Te ni cachi ñn tēe nuū yā:

Náná ní jíin táca ñani ní cáhíin nuū quéhe, te cáculni cahán jíin ní, achí de.

<sup>48</sup> Te ni cahán yā jíin tēe ni cahán súcuan jíin yá:

¿Ndé ñn cúu náná rī, te ndé ñn cácuu ñani rī? Achí yá.

<sup>49</sup> Te ní steén ndaha yá nde nuū cáyūcu tēe cáscuáha jíin yá. Te ni cahán yā:

Suni náná rī jíin ñani rī cácuu táca jéé yáha.

<sup>50</sup> Chí táca ñayuu casquícú jniñu cúní maá Tátá rī, Yaā ndeé andívi, suu cácuu ñani rī, cuáha rī, náná rī. Achí yá.

*Jñuhun yátá siquí tēe jéte trigo  
(Mr. 4.1-9; Lc. 8.4-8)*

## 13

<sup>1</sup> Te quívi un ní quenda Jesús vehe cuahán yá, te ni jinū yá ní cucōo ya yumar. <sup>2</sup> Te ni cutútú cuéhē ndasí ñayuu nuū yá. Te ni quívi ya ini ñn barco, ni cucōo ya. Te táca ñayuu un cáyūcú í yumar. <sup>3</sup> Te jíin jñuhun yátá ní

cahān yā cuehē jñuhun nuū i, te súcuan ni cahān yā:

fin tēe cate trigo, ni quenda de jeē cáte de.  
 4 Te ná ni quejéé de jéte de, te jecu trigo ni jité yuhíchi. Te ni quecoo saa, ni cayejí tī.  
 5 Te jecu gā trigo ni jité nuū ñuhun yuū, nuū tú cuehē ñuhun. Te yachī-ni ni cane, chí tu cóquin ñuhun. 6 Te nuū ní cane niāndii, te ni ichī-ni, te ni casun, chí tu ní nhín nuū quihín yoho. 7 Te jecu gā trigo ni jité nuū náne iñu. Te ni jehnu iñu ún, te ni jesi nuū.  
 8 Te jecu ni jité nuū ñuhun váha, te ni jēhe cuehē nunī. Sava ni jēhe ciento jeē ñn ñn, te sava ni jēhe unī xico, te sava ga ni jēhe ocō uxī. 9 Tāca rōhó jēé jini sōho, na chūsóhó rō. Achí yá.

*Najehē cahān yā mání jñuhun yátá*  
 (Mr. 4.10-12; Lc. 8.9-10)

10 Yūcuán na te tēe cáscuáha jíin yá un ní quecoo de nde nuū yā, te ni cacajñuhun de ya:

¿Najehē cúu jeē mání jñuhun yátá cáhán ni jíin ñayuu? achí de.

11 Te ni cahān yā jíin de:

Róhó jíināhan rō chí sáha ya jeē cájecūhun ni rō jñuhun ni yisāhi yáha, ndese quívicoo ñayuu ndaha Yaā andiví jeē ndacu ya jñiñu nuū i. Te ñayuu yáha jēé tu cácdánje, chí ma jécūhun ni i. 12 Chí ñayuu je jécūhun ni, chí stéén gā yā nuū i, te víhyá gā cuni i. Te ñayuu tu cándje, sa suhva naa jecu jeé je jíin i ún. 13 Jeé yūcuan cahān rī jñuhun yátá jíin i. Chí vēsú cájito i, te quendōo i nájñuhun jeé tú na vé ni cájito i. Te vēsú cájini sōho i, te ma jécūhun ni i, te quendōo i nájñuhun jeé tú na vé ni cájini i. 14 Ñayuu yáha chí síquī cacajni i jñuhun ni cahān Yaā Dios jeé ní nacani Isaías, tēe ni nacani jñuhun nde jenahán:

Vēsú cuni nahín rō, te ma jécūhun ni rō, te vēsú coto rō, te ma nácuni rō.

15 Chí ñayuu yáha yōhyo ni ndunihni ní i, te yōhyo uhū chusóhó i,

te nájñuhun cájesi i tinū i,

návāha coo nájñuhun jeé tu cájito i,

ni tu cájini nahín i,

te ni ma jécūhun ni i,

ni ma násāma ini i quívicoo i nuū rī jeé nasávāha ri anuá i nuū cuéchi i.

Achí Yaā Dios, achí tuu.  
 16 Te máá rō jíināhan rō, yōhyo ndetū rō, chí cájito rō jíin tñū rō, te cájini nahín rō jíin sóho rō. 17 Chí jendaá cahān rī jíin rō jeé cuehē tēe ni canacani jñuhun Yaā Dios jíin cuehē tēe ndaá, ni cacuni de coto de jeé cájito máá rō, te tu ní cájito de. Te suni ni cacuni de cuni sōho de jeé cájini sōho máá rō, te tu ní cájini de. Achí yá.

*Jeé ní castūhun cájī yá jñuhun yátá tēe jéte trigo*

(Mr. 4.13-20; Lc. 8.11-15)

18 Nūu súcuan te cuni nahín jíināhan rō na vé cuni cahān jñuhun yátá tēe jéte trigo: Trigo un cúu jñuhun Yaā Dios. 19 Te ñayuu cájini sōho jñuhun ndese ndácu Yaā andiví jñiñu, núu tu cájecūhun ni i te cácuu i nájñuhun trigo jeé ní jité yuhíchi. Yūcuán na te quíji jexeén te quénde-ni jñuhun ini anuá i. 20 Te trigo jeé ní jité nuū ñuhun yuū cúu nájñuhun ñayuu cájini sōho jñuhun, te yachī-ni cájetáhú i te cácusī ni i jíin. 21 Te tu cúcutú jñuhun ún ini anuá i, te jecu-ni quiví cájetáhú i. Te núu ni quejéé jñundóho, chí jíto xeén ñayuu i síquī jñuhun ún, te quejéé nácani yátá ni i. 22 Te jeé ní jité nuū náne iñu cúu ñayuu cájini nahín jñuhun, te cándihvī ni i síquī jeé iyó ini ñayvī yáha, te cuní i cucucá i, te stáhú un i cujñēñu i jíin. Te ndihí jeé yáha jési nuū jñuhun ya, te tu tje i jíin jñuhun ya. 23 Te trigo jeé ní jité nuū ñuhun váha cúu nájñuhun ñayuu cájini nahín jñuhun, te cájecūhun ni i, te cáhije i jíin jñuhun ya. Te sava i cúu nájñuhun nunī jeé jēhe ciento jeé ñn ñn, te sava ga i jēhe unī xico, te sava ga i jēhe ocō uxī. Achí yá.

*Jñuhun yátá síquī ite lasú*

24 Te ni cahān yā inga jñuhun yátá jíin de:

Jeé ndácu Yaā andiví jñiñu cúu nájñuhun ñn tēe jeé ní jete de trigo váha nuū ñuhun de. 25 Te iyó ñn tēe jíto uhū de tēe chíí trigo. Te náa cáquixī tēe chíí trigo jíin táca jíināhan de, te ni jehēn ni jete ndiquin lasú nuū trigo de, te cuahān. 26 Te nuū ní cane trigo ún, te ni cane yoco i, te suni súcuan ni jehnu ite lasú un. 27 Yūcuán na te ni jengoo mozo ni cacahān i jíin patrón i: ¿A násūu trigo váha ní jéte ní núu ñuhun ní? ¿Te ndese cúu jeé ní canecoo ite lasú nuū? 28 Te ni cahān de jíin i: ñn tēe jíto uhū nuhū ní sáha jeé yáha. Te ni cacahān mozo un jíin de: ¿Nūu súcuan te á cuní ni jēé na quíngoo ná te jñuhun ná? achí i. 29 Te ni cahān de: Tuú, chí núu jñuhun rō lasú un te sanaa te jñuhun rō ndé jíin trigo. 30 Váha ga na cuéhnu máá ndé quiví tahndé. Te quiví un cáhān rī jíin tēe cahnde jeé xihna gā ite lasú cahnde de, te chucú tútú de návāha gā ite lasú yó. Yūcuán na te trigo chí cahnde de ndiví ini yacá rī, achí de. Achí yá.

*Jñuhun yátá síquī ndiquin mostaza*

(Mr. 4.30-32; Lc. 13.18-19)

31 Te suni ni cahān yā inga jñuhun yátá jéé stéén yā ndese ndúcuehē ñayuu ndácu Yaā andiví jñiñu nuū:

Ndúcuehē i nájñuhun jéhnu ñn ndiquin mostaza jeé ní jequin ñn tēe nuū ñuhun de. 32 Te jendaá jeé ñn ndiquin lúli gá cúu vēsú táca gá ndiquin. Te núu ni jehnu, te cúu cáhnu ga vēsú táca gá yucú, chí ndúu nájñuhun ñn yujnu. Te quíjicoo saa, te cásáha ti tacá tī chíji ndaha ún. Achí yá.

*Jñuhun yátá síquī levadura  
(Lc. 13.20-21)*

<sup>33</sup> Te inga jñuhun yátá ní cahān yā jīn de: Jeē ndácu Yaā andiví jñiñu nuū ñáyuu cúu nájñuhun levadura jeē ní quihin iin ñahan. Te ni saca ña jīn úni kilo harina, nde ni ndaa ndihi ñujen ni sáha. Achí yá.

*Jeē máni jñuhun yátá cáhán yā jīn i  
(Mr. 4.33-34)*

<sup>34</sup> Tāca jñuhun yáha ní cahān Jesús jīn ñáyuu cuehē ún. Te tāca jeē ní stéén yā, máni jñuhun yátá ní cahān yā jīn i. <sup>35</sup> Súcuán ni sáha ya návāha squicu jñuhun ni cahān tēe ni nacani jñuhun Yaā Dios nde jenahán: Cahān rī tāca jñuhun yátá jīn ñáyuu, te cachi rī tāca jñuhun yísahí ndé quiví ní jecōo ñayiví. Achí tutu, achí yá.

*Jeē ní castuhun cájī yá jñuhun ite lasú*

<sup>36</sup> Yūcuán na te ni nacuatáhú Jesús nuū ñáyuu. Te ni ndiví ya ini vehe. Te tēe cáscuáha un ní jinūcoo de nuū yā, te ni cacahān de jīn yá: Nacani cájī ní jñuhun yátá ite lasú nuū ná, achí de.

<sup>37</sup> Te ni cahān yā jīn de:

Jeē jéte trigo váha un cúu máá rí, Yaā ní nduu tēe. <sup>38</sup> Te ñuhun un cúu ñayiví. Te trigo váha un cúu ñayuu cáyihí ndaha Yaā Dios jeē ndácu ya jñiñu nuū i. Te ite lasú un cúu ñayuu cáyihí ndaha jexeén. <sup>39</sup> Te tēe jito uhū jeē ní jete lasú un cúu máá jéxeén. Te quiví tahndé cúu quiví jīnu ñayiví. Te tēe cahnde un cácuu ndajéhé Yaā Dios. <sup>40</sup> Te nájñuhun tahndé ite lasú te cayú nuū ñuhún, súcuán coo quiví jīnu ñayiví. <sup>41</sup> Chi máá rí, Yaā ní nduu tēe, taji rī ndajéhé rī quingoo. Te nastútú yá tāca ñáyuu casquíví jñahan nuū cuechi, jīn ñáyuu casáha jñiñu néé, quenehen ya i mēhñu ñáyuu ndácu rī jñiñu nuū. <sup>42</sup> Te jnaa ya i cayú i nuū ñuhún. Te yūcuán ndáhyū i te nacayihí yuhu i jeē ndoho xeén i. <sup>43</sup> Yūcuán na te ñayuu squicu nuū yā chi ndindé i nájñuhun niándii, te coyúcú i nuū ndácu máá Tátá i jñiñu. Tāca róhó jéé jīni sóho, na chúsóhó ró.

*Jñuhun yátá síquī yejnū xūhún jeē yísahí*

<sup>44</sup> Te jeē ndácu Yaā andiví jñiñu nuū ñáyuu, suni cúu nájñuhun iin yejnū xūhún jeē yísahí chjji iin ñuhun. Te ni nanihñ iin tēe, te ni nacasi tucu de síquī. Te jeē cúsiñ ni de jīn, te ni jehēn de ni xicó ndihi de jeē névāha de, te ni jeeen de ñuhun ún.

*Jñuhun yátá síquī perla jeē ndeé yahu*

<sup>45</sup> Te jeē ndácu Yaā andiví jñiñu nuū ñáyuu, suni cúu nájñuhun iin tēe jéen xico, te ndúcú de perla váha. <sup>46</sup> Te ni jini de iin perla jeē yáhu ndasí, te ni jehēn de ni xicó ndihi de jeē névāha de, te ni jeeen de perla un.

*Jñuhun yátá síquī ñunu jñú chācá*

<sup>47</sup> Te jeē ndácu Yaā andiví jñiñu nuū ñáyuu, suni cúu nájñuhun iin ñunu jeē cásingava de ini mar, te quívicoo ndinuū chācá. <sup>48</sup> Te núu ni chitú ñunu ún, te cánatava de yundúte. Te cácucoo de cánacāji de chācá. Te chācá váha cájnaa de ini jica, te chācá tú váha cáscáne de. <sup>49</sup> Te suni súcuán coo quiví jīnu ñayiví. Chi quijicoo ndajéhé yā, te sásin ya ñayuu casáha jñiñu néé mēhñu ñáyuu casáha jñiñu váha. <sup>50</sup> Te ñayuu cunéé chí jnaa ya i cayú i nuū ñuhún. Te yūcuán ndáhyū i te nacayihí yuhu i jeē ndoho xeén i. Achí yá.

*Jñuhun yátá síquī ndajñiñu ndeé yahu*

<sup>51</sup> Te ni cajñuhun yá de jijnáhan de: ¿A ní cajecūhun ni rō tāca jñuhun yáha, chí tuú? achí yá.

Te ni cacahān de jīn yá:

Ni cajecūhun ni ná, achí de.

<sup>52</sup> Te ni cahān yā jīn de:

Iyó váha núu súcuán. Te iin tēe stéén tutu ley Yaā Dios, núu je ni cutūhva de ndese ndácu Yaā andiví jñiñu, te cuu stéén de tāca jñuhun síquī ún. Chi cúu de nájñuhun iin tēe chí vehe. Te ini yejnū de táva de ndajñiñu ndeé yahu, sava jeē jeē jīn sava jeē je ni cunahán iyó. Achí yá.

*Jeē cuánuhun yā ñuu Nazaret*

*(Mr. 6.1-6; Lc. 4.16-30)*

<sup>53</sup> Te ná ni ndihi ni cahān Jesús tāca jñuhun yátá yáha, te ni quenda ya yūcuán cuahān yā. <sup>54</sup> Te ni najinū yā ñuu yā Nazaret. Te ni steén yā jñuhun ini vehe iin sinagoga yūcuán. Te ni canaa ni ñayuu cájni nahín i, te ni cacahān i:

¿Nde nuū ní cutūhva tēe yáha tāca jñuhun ndichí? ¿Te ndese cúu sáha de tācá jñiñu jéhnu yāhá? <sup>55</sup> Chi sēhe carpintero cúu tēe yáha, te náná de cúu María, te ñani de cácuu Jacobo, José, Simón, jīn Judas. <sup>56</sup> Te suni cáyūcu cuáha de jīn yó yāhá. ¿Te ndese jīni de tāca jñuhun yáha núu súcuán? Achí ñayuu.

<sup>57</sup> Te súcuán ni cacujéé ni i nuū Jesús. Te ni cahān yā jīn i:

Tāca tēe nácani jñuhun Yaā Dios, iyó yifñuhún ñayuu jīn de, te máni ñayuu ñuu máá de jīn ñáyuu vehe máá de cúu jeē tu iyó yifñuhún jīn de. Achí yá.

<sup>58</sup> Te tu ní sáha ya cuehē jñiñu jéhnu yūcuán, chí tu cácanjje i ya.

*Jeē ní jihí Juan tēe scuándute*

*(Mr. 6.14-29; Lc. 9.7-9)*

## 14

<sup>1</sup> Te tiempo yūcuán te Herodes, tēe ndácu jñiñu región Galilea, ni jini jñuhun de jñuhun Jesús. <sup>2</sup> Te ni cahān de jīn ñáyuu cáhñi jīn de:

Tēe yūcuán cúu Juan tēe ni scuándute, te ni natecu de. Jeē yūcuán iyó poder de sáha de jñiñu jéhnu. Achí de.

<sup>3</sup> Chi Herodes, je ni ndacu de jniñu jeë na quívi Juan vecãa, jíin jeë na cónuhni de jíin cadena. Súcuani ní sáha de jeë siquí Herodías, ñasihí ñani de Felipe. <sup>4</sup> Chi Juan ni cahãn de nuũ Herodes:

Tu iyó ley condeca ró ña, áchí de.

<sup>5</sup> Te jeë yúcuani ní cuni Herodes cahni de Juan. Te yúhú de jeë quití ní ñayuu, chí ndíhi i jéni ndije ni i jeë ñin tée nãcãni jñuhun Yaã Dios cúu Juan. <sup>6</sup> Te ñin quívi ní sáha Herodes ñin vico quívi ní cacu de. Te sêhe síhí Herodías ni quívi i ni jita jéhé i nuũ ñayuu ní cana de ún. Te ni cusí ni Herodes ní sáha i. <sup>7</sup> Te ni jejnũhun téyí de jeë cuãha de núu na vé cacãni i nuũ de. <sup>8</sup> Te ni jehẽni i ni cajnúhũn i nãná i na vé cacãni i. Te ni ndívi i nuũ Herodes, te ni cahãn i:

Cuãha ní xĩni Juan tée scuãndute, cone nuũ ñin cohõ, áchí i.

<sup>9</sup> Yúcuãni na te rey Herodes ni cucuíhyã ni de. Te siquí jeë ní jejnũhun téyí de, jíin jeë ní cajini sóho tée cayéji staã jíin de, jeë yúcuani ní ndacu de jniñu jeë na cuãha nuũ i. <sup>10</sup> Te ni taji de soldado jeë na quicahnde xĩni Juan ini vecãa. <sup>11</sup> Te ni quee soldado un jíin xĩni Juan, ñe nuũ ñin cohõ, te ni jêhe nuũ súchi síhí un. Te máá i ni jendeca i nuũ naná i.

<sup>12</sup> Yúcuãni na te ni jengoo tée cáscuãha jíin Juan, te ni candonehen de yiqui cúnu Juan, te ni cachindũji de. Yúcuãni na te ni jengoo de ni castatũhũn de nuũ Jesús.

*Jeë ní scãji yã uhũn mil tée*  
(Mr. 6.30-44; Lc. 9.10-17; Jn. 6.1-14)

<sup>13</sup> Te ná ní jini Jesús jñuhun, te ni cujiyo ya yúcuani cuãhãni yã jíin barco, jeë cóne sãni ya ñin lugar nuũ tú ñayuu. Te ni cajini ñayuu jeë cuãhãni yã. Te táca ñuu ni quendacoo i cájica jéhé i, cuajnahãni i ya. <sup>14</sup> Te nuũ ní quenda Jesús ini barco, te ni jito ya ñayuu cuehẽ ún. Te ni cundáhú ní yã i, te ni nasávãha ya táca ñayuu cácuhũ jeë véjicoo i jíin. <sup>15</sup> Te nuũ ní ini, te tée cáscuãha jíin yã, ní quecoo de nuũ yã, te ni cacahãni de:

Je ni ini, te yáhã chí tú na ñayuu yúcu. Núu súcuani te taji ní ñayuu na quíngoo i táca ñuu, te cuãni i jeë cáji i.

<sup>16</sup> Te ni cahãni Jesús jíin de:

Tu jíni ñũhũn quíngoo i, chí cuãha máá ró jeë cáji i, áchí yã.

<sup>17</sup> Te ni cacahãni de jíin yã:

Tú na vé cánevãha ná yãha, chí uhũni staã jíin úu-ni chãcã, áchí de.

<sup>18</sup> Te ni cahãni yã jíin de:

Cuãha na quíji, áchí yã.

<sup>19</sup> Te ni cahãni yã jíin ñayuu un jéë na cúcõo i nuũ íte. Te ni quihni ya ndíhũhũn staã jíin úu chãcã un. Te ni ndacoto ya ichi ándiví, te ni nacuatáhú yã. Te ni tahú cuéché yã staã ún, te ni jêhe ya nuũ tée cáscuãha jíin yã. Te máá de ni casaja de nuũ ñayuu cuehẽ ún. <sup>20</sup> Te ndívi i ní cayéji, te ni candutú chíji i.

Te ni canastutú de pedazo jeë ní quendõo, te ni chítú úxi uũ jica. <sup>21</sup> Te tée ní cayéji un cúu nãjñuhun uhũn mil, te sãni ga cúu ñahan jíin súchi lúlí.

*Jeë ní jica jéhé yã nuũ mar*  
(Mr. 6.45-52; Jn. 6.16-21)

<sup>22</sup> Yúcuãni na te ni cahãni Jesús jíin tée cáscuãha jíin yã jeë na quívicoo de barco, te cosnúu de quíngoo de nde inga lado mar, níni jéë nãtãji yã ñayuu un quíngoo i. <sup>23</sup> Te nuũ ní cuu ní nacuatáhú yã nuũ i, te máñũhũn-ni ya ní caa ya yucu, cuacacãni tahú yã. Te ní cuaa, te ñe máñũhũn yã yúcuãni. <sup>24</sup> Te barco un, je ní cuu sava nuũ mar cuahãni. Te ndute mar un nãtundahã ñihin barco, chí véji tachí ichi núu de. <sup>25</sup> Te jeë yínee gã ní quee Jesús nuũ de, jica jéhé yã nuũ mar. <sup>26</sup> Te tée cáscuãha ún, ní cajito de ya jeë jica ya nuũ mar. Te ni candondava de, te ní cacana cohõ de jeë cáyũhú de.

Jíhnã cúu, áchí de.

<sup>27</sup> Te ni cahãni Jesús jíin de:

Ndeyí coo ní ró, te ma yũhu ró, chí máá rí cúu, áchí yã.

<sup>28</sup> Yúcuãni na te ni cahãni Pedro jíin yã:

Núu máá ní cúu, te cahãni ní jíin ná jéë na cáca jéhé ná nuũ mar te jeë na núu ní, áchí de.

<sup>29</sup> Te ni cahãni yã:

Nehen núu súcuani, áchí yã.

Te ni quenda Pedro ini barco, te ni jica de nuũ ndute cuahãni de nuũ Jesús. <sup>30</sup> Te nuũ ní jini de jeë ñihin yíhi tachí, te ni yũhú de. Te ní quejé de quee de chíji ndute. Te ní cana cohõ de:

Jnama ní sãni, áchí de.

<sup>31</sup> Te Jesús ní jniñ-ni ya ndaha de. Te ni cahãni yã jíin de:

Tée tu cándije ñihin cúu ró. ¿Naun ni nayũhu ró? Achí yã.

<sup>32</sup> Te ní quívi ya ini barco un jíin de, te ní jecuíñ-ni tachí. <sup>33</sup> Yúcuãni na te tée cáhiini ini barco un, ní cajecuíñ yití de nuũ yã. Te ní cacahãni de:

Jendaã ndije jeë Sêhe Yaã Dios cúu ní, áchí de.

*Jeë ní nasávãha ya ñayuu cácuhũ región Genesaret*

(Mr. 6.53-56)

<sup>34</sup> Te ní quenda jíyo ya jíin de nuũ mar un, ní jinũ yã región Genesaret. <sup>35</sup> Te ñayuu yúcuani ní canacuni i ya. Te ní cascãca i jñuhun táca ndañũ yúcuani jéë ní jinũ yã. Te ñayuu ní caquindeca i ñayuu cácuhũ nuũ yã. <sup>36</sup> Te ní cacahãni ndahú i jíin yã jeë na quéhé i vesú yusáhma ya. Te táca ñayuu jeë ní caquehé sahma ya, ní canduvãha i.

*Siquí ndese cújnehẽn ñayuu*  
(Mr. 7.1-23)

## 15

<sup>1</sup> Yūcuán na te jecu tēe grupo fariseo jín tēe cástéén tutu ley Yaā Dios, ni quendacoo de űuu Jerusalén, te ni quecoo de nuū yā. Te ni cacahān de jín yā:

<sup>2</sup> Tēe cáscuáha jín ró, žnaun cástívi de costumbre jeē ní cajequin űayuu jenahán? Chi tu ní cáscuácu de costumbre jeē nándahá de nuū yā te caji de staā. Achí de.

<sup>3</sup> Te Jesús ní cajnúhun yā de:

Te máá ró jijnáhan ró, žsuni naun cástívi ró jniñu ní ndacu Yaā Dios nuū rō? Chi sa costumbre máá ró cūu jeē casquícu ró. <sup>4</sup> Chi ní cahān Yaā Dios: Coo yñúhún ró jín tátá ró jín náná ró. Te núu ndé ĩn cahān siquī tátá chí siquī naná, na cūu nahín, áchí Yaā Dios. <sup>5</sup> Te máá ró chí cácahān ró jeē cuu cahān ĩn tēe jín tátá de jín náná de: Ma cūu chindéé űáhán ná níhín cuáha na jéé caji ní jeé cūhun ní, chí ndíhi jeē névaha ná, je ní socó na núu Yaā Dios. <sup>6</sup> Te tēe cahān súcuan, tuá cánuú chindéé űáhán de tátá de náná de, áchí ró jijnáhan ró. Te súcuan cástívi ró jniñu ní ndacu Yaā Dios, jeē siquī costumbre ní cajequin máá ró. <sup>7</sup> Tēe stáhú-ni cácuu ró. Ndaá ní nacani Isaías jñuhun siquī ró nde jenahán, yósó núu tútu ĩi jeē ní cahān Yaā Dios:

<sup>8</sup> űayuu yáha chí máá yuhu-ni í cājetáhú í ruhū,

te nasūu ndé jín ini jín ánuá í.

<sup>9</sup> Te cáchiñúhún sáá-ni í ruhū, chí jñuhun cástéén í cūu jniñu ní candacu tēe, te nasūu jeē ní ndacu máá rí cūu.

Achí Yaā Dios. Achí yā.

<sup>10</sup> Te ní cana ya űayuu cuehē ún, te ní cahān yā jín í:

Cuni sōho vāha jijnáhan ró, te chuhun ní rō: <sup>11</sup> Nasūu jéé quíví ini yuhu űayuu cujnéhén í sáha. Chí jñuhun jeē quénda yuhu í, yūcuan cūu jeē cujnéhén í sáha, áchí yā.

<sup>12</sup> Yūcuán na te tēe cáscuáha jín yā, ní quecoo de nuū yā, te ní cacahān de:

¿A jíní ní jéé ní caquití ní tēe fariseo jeē ní cajini sōho de jñuhun ní cahān ní? áchí de.

<sup>13</sup> Te ní cahān maá yā:

Cácuu de nájnühun yujnu jeē tu ní náchuhun Tátá rí. Yaā ndéé andíví, te ĩn quíví te jñuhun ya quihín. <sup>14</sup> Na quíngoo máá de. Chí cácuu de nájnühun tēe cuáá cástéén ichi nuū inga tēe cuáá. Chí núu ĩn tēe cuáá stéén de ichi nuū inga tēe cuáá, te ndándúú de ninga de xehvá. Achí yā.

<sup>15</sup> Te ní cahān Pedro jín yā:

Castūhun caji ní jñuhun yátá yáha nuū na jijnáhan ná, áchí de.

<sup>16</sup> Te ní cahān Jesús:

¿Te á suni máá ró ná tu jecūhun ní rō chí naún? <sup>17</sup> ¿A tu cájecūhun ní rō jeē táca jéé yéji űayuu, chí quíví chíji í, te quénda-ni cuahān? <sup>18</sup> Te jñuhun jeē quénda yuhu űayuu, chí nde ini anuá í véji, te yūcuan cūu jeē cujnéhén í

sáha. <sup>19</sup> Chí nde ini anuá űayuu quénda jeē jéni néé ní, jeē jéhni ndíyi, jeē casiquí ndéé jnánhan, jeē jíca jnéni, jeē sacuíhná, jeē cahān jñuhun stáhú, jeē cahān yā siquī jnánhan. <sup>20</sup> Táca jéé yáha cūu jeē cujnéhén űayuu sáha. Te núu tu siquícu í costumbre jeē nándahá í te caji í staā, tu cúnéhén í sáha. Achí yā.

*űahan inga nación jeē ní candíje níhin  
(Mr. 7.24-30)*

<sup>21</sup> Te ní quenda Jesús yūcuan cuahān yā región Tiro jín Sidón. <sup>22</sup> Te ĩn űahan űuu Canaán, néne űa región Tiro jín Sidón, te ní quee űa nuū Jesús. Te ní cana jeé ña:

Tátá, Séhe yucūn David, cundáhú ní ní sáña víí. Chí séhe síhí ná, űúhun tachí ini í, te yōhyo xeēn ndóho í, áchí űa jín yā.

<sup>23</sup> Te tu ní cahān cuiti yā jeē ní cahān űa. Yūcuán na te ní quecoo tēe cáscuáha jín yā, te ní cacahān de:

Cahān ní jín űa na quihín űa, chí cána jee űa véji űa yatá yó, achí de.

<sup>24</sup> Te ní cahān yā jín űa:

Nuū maá-ni űayuu nación Israel ní tají Yaā Dios sáña véji ná, chí cácuu í nájnühun lanchi, quiti ní sana.

<sup>25</sup> Te űahan ún chí ní quee űa, te ní jecuíñí yítí űa nuū yā, te ní cahān űa:

Tátá, chindéé űáhán ní sáña víí, achí űa.

<sup>26</sup> Te ní cahān yatá yā jín űa:

Tu iyó vāha jeē quénde yō staā séhe, te cuáha yó núu ína, achí yā.

<sup>27</sup> Te ní cahān űa:

Jendaá cahān ní Tátá, te chindéé űáhán ní sáña vésuú cūu ná nájnühun ina. Chí suni máá tí cánihín nahín tí pedazo staā cuechí jéé cóyo chíji mesa jitoho tí cáyeji tí, achí űa jín yā.

<sup>28</sup> Yūcuán na te ní cahān Jesús:

Yōhyo vāha jeē cándíje níhin ní súcuan, náná. Te na sáha ná jéé cuni ní, áchí yā.

Te máá hora un ní nduvāha-ni séhe síhí űa.

*Jeē ní nasávaha ya cuehē űayuu cácuū*

<sup>29</sup> Te ní quenda Jesús cuahān yā yūcuán, te ní yáha ya yumar Galilea. Te ní caa ya ĩn yucu, te yūcuan ní cucōo ya. <sup>30</sup> Te cuehē űayuu ní quecoo í nuū yā, te cándeca í táca jéé cájica chácuá, jeē cuaá, jeē űihín, jeē cacúhndú, jín cuehē gā űayuu cácuū. Te ní cajequin í nuū jehé Jesús. Te ní nasávaha ya í jijnáhan í. <sup>31</sup> Te ní canaa ní űayuu un cájito í jeē nácahān űayuu űihín, ndúvaha űayuu cuhndú, náccaca vāha űayuu chacuá, nánune tinū űayuu cuaá. Te ní cacahān í jeé yóhyo vāha Yaā cūu Yaā Dios űuu í Israel.

*Jeē ní scáji yā cuūn mil tēe  
(Mr. 8.1-10)*

<sup>32</sup> Yūcuán na te ní cana Jesús tēe cáscuáha jín yā, te ní cahān yā jín de:

Cúndáhú ní rí űayuu cuehē yáhá, chí je ní cuu uní quíví cáyucú í jín rí, te tuá na vé caji

i. Te tu cúní rí natají rí i nuhun ndite i, chí núu súcuan te sava ichi te cuíta lí i. Achí yá.

<sup>33</sup> Te ni cacahān tēe cáscuáha jíin yá:

¿Te ndé nuū nihín yō stāā caji ñayuu cuehē yahá? Chí yāhá tú na ñayuu yúcu, achí de.

<sup>34</sup> Te ni cajnúhun yá de:

¿Nasaa stāā cánevāha ró?

Te ni cacahān de:

Uxā-ní, jíin jecu chācá lúli, áchí de.

<sup>35</sup> Yūcuán na te ni cahān yā jíin ñayuu cuehē un jéé na cúcoo i. <sup>36</sup> Te ni quihin ya ndihúxá stāā jíin chāca ún, te ni nacuatáhu yá nuū Yāa Dios. Te ni tahú cuéché yá, te ni jéhe ya nuū tēe cáscuáha jíin yá, te máá de ni casaja nuū ñayuu. <sup>37</sup> Te ndihi i ni cayeji, te ni candutú chíji i. Yūcuán na te ni canastútú de pedazo jeé ní quendōo, te ni chítú úxā jíca. <sup>38</sup> Te tēe ni cayeji ún, nde cuūn mil de cúu, te sáin ga cúu ñahan jíin súchi lúli. <sup>39</sup> Yūcuán na te ni nacuatáhu yá nuū ñayuu ún, te cuanungoo i. Te ni ndívi ya ini barco, te cuahān yā región Magdala.

*Jeé cájicān de ñn jniñu jéhu nuū yā  
(Mr. 8.11-13; Lc. 12.54-56)*

## 16

<sup>1</sup> Te ni quecoo tēe grupo fariseo jíin tēe grupo saduceo nuū yā. Chí cácumí de coto ndee de ya, te ni cajicān de jeé na sáha ya ñn jniñu jéhu jeé coo ñn seña ichi ándiví. <sup>2</sup> Te máá yá ni cahān yā jíin de:

Núu ni ini, te cácahān rō: Nandii, chí ni nasácuéhé i andiví, áchí ró. <sup>3</sup> Te jenéhen chí cácahān rō: Vijna te cuun saū, chí ni nasácuéhé i andiví, áchí ró. Tēe stáhu-ni cácuu ró. Chí cájecūhun ni rō ndese stéén seña andiví, te tu cájecūhun ni rō ndese stéén táca jniñu jéhu sáha ri tiempo yáha. <sup>4</sup> Ñayuu yáha jeé casáha jniñu néé, tu cájetáhu cuiti i Yāa Dios. Te cájicān i jeé sáha ri ñn jniñu jéhu jeé coo ñn seña andiví. Te tuá na inga jniñu jéhu stéén rí nuū i, chí máá-ni jniñu jéhu nájnūhun ni cuu jíin Jonás, tēe ni nacani jnūhun Yāa Dios nde jenahán. Achí yá.

Te ni stóo ya de jíjnāhan de, te cuahān yā.

*Jnūhun levadura tēe fariseo  
(Mr. 8.14-21)*

<sup>5</sup> Te tēe cáscuáha jíin yá ni canaa ni de condiso de stāā náa cuangoo de jíin barco inga lado mar. <sup>6</sup> Te ni cahān Jesús jíin de:

Coto má candíje ró levadura tēe grupo fariseo jíin tēe grupo saduceo, achí yá.

<sup>7</sup> Te tēe cáscuáha un ní cacahān máá de:

Va siquí jeé tú na stāā ndiso yó, jeé yúcuán cahān yā súcuan, áchí de.

<sup>8</sup> Te ni jini Jesús, te ni cahān yā:

¿Najehē cácahān rō jeé ní cahān rí súcuan siquí jeé tú na stāā cándiso ró? Tēe tu cándíje nihín cácuu ró. <sup>9</sup> ¿A ná tu jecūhun ni rō jeé tu ní cahān rí súcuan siquí jeé tu ndíso ró stāā?

¿A tu cáncūhun ni rō jeé ní tahú cuéché rí uhūn stāā ni cayeji uhūn mil tēe, te nasaa jíca ni canastútú ró jeé ní quendōo? <sup>10</sup> ¿Te á tu cáncūhun ni rō jeé ní tahú cuéché rí uxā stāā ni cayeji cuūn mil tēe, te nasaa jíca ni canastútú tucu ró? <sup>11</sup> ¿Te najehē tu cájecūhun ni rō jeé násūu síquí stāā ni cahān rí jíin ró jeé ní cahān rí jeé coto má candíje ró levadura tēe fariseo jíin tēe saduceo? Achí yá jíin de.

<sup>12</sup> Yūcuán na te ni cajecūhun ni de jeé tu ní cahān yā jeé coto de jeé ma cáji de pan jeé yñi levadura, chí sa suhva ní cahān yatá yá jeé ma cándíje de jnūhun stáhu cástéén tēe fariseo jíin tēe saduceo.

*Jeé ní cahān Pedro jeé Jesús cúu Cristo  
(Mr. 8.27-30; Lc. 9.18-21)*

<sup>13</sup> Te nuū ní jíin Jesús región Cesarea Filipo jíin tēe cáscuáha jíin yá, te ni cajnúhun yá de:

Ruhú, Yāa ní nduu tēe, ¿ndé ñn cúu ri cácahān ñayuu?

<sup>14</sup> Te ni cacahān de:

Sava i cácahān jeé cúu ní Juan tēe ni scuándute. Te sava ga i cácahān jeé cúu ní Elías, tēe ni nacani jnūhun Yāa Dios nde jenahán. Te sava ga i cácahān jeé Jeremías chí inga tēe ni nacani jnūhun Yāa Dios cúu ní. Achí de.

<sup>15</sup> Te ni cahān yā jíin de:

Te máá ró, ¿ndé ñn cúu ri cácahān rō? achí yá.

<sup>16</sup> Te ni cahān Simón Pedro:

Máá ní cuu Cristo, Yāa ní tají Yāa Dios. Te cúu ní Sēhe Yāa Dios, Yāa técu níí cáni, áchí de.

<sup>17</sup> Te ni cahān Jesús:

Yōhyo ndetū rō, Simón sēhe Jonás, chí nasūú ñn ñayuu ni steén jnūhun yáha nuū rō, chí sa suhva máá Tátá rí, Yāa ndeé andiví, ní steén yā nuū rō. <sup>18</sup> Te ruhú suni cahān rí jíin ró jeé máá ró cúu Pedro, jeé cuní cahān: yuū. Te jnūhun ndaā jeé ní cahān rō jeé máá rí cúu Cristo, suu cúu nájnūhun ñn yuū cáhnu. Te siquí yuū cáhnu yáha sáha rí jeé quítuu vehe, te vehe un cúu ñayuu cácañíje ruhú. Te tu ndé vé cundeyí cuiti siquí i, ní jnūhun xeén jeé cájihí i, tuá na vé cúu sáha jíin ánuá i. <sup>19</sup> Te máá ró condiso jniñu ró sáha ró jéé quívicoo ñayuu ndaha Yāa andiví jeé ndacu ya jniñu nuū i. Te táca jéé cási ró jeé ma sáha ñayuu ini ñayívi yáha, suni casi jeé cáyúcú nde andiví. Te táca jéé cuáha ró jnūhun sáha i ini ñayívi yáha, suni jeé cáyúcú nde andiví cuáha jnūhun. Achí yá.

<sup>20</sup> Yūcuán na te ni ndacu ya jniñu nuū tēe cáscuáha jíin yá, jeé ma cáchi de nuū ní ñn ñayuu jeé cúu ya Cristo.

*Jeé ní castáhún Jesús jeé cúu yā  
(Mr. 8.31-9.1; Lc. 9.22-27)*

<sup>21</sup> Te nde saá ní quejéé Jesús cástühun cáji yá nuū tée cáscuáha jíin yá jeē jíni ñúhún quihín yá ñuu Jerusalén. Te táca tée jéhnú jíin sútú cácujuhnu jíin tée cástéén tutu ley, stóho ndasí de ya. Te cahni de ya, te nuū uní quiví te natecu yá, achí yá. <sup>22</sup> Yūcuán na te Pedro, ni cana máñúhún de ya, te ni quejéé de cáhán de nuū yá:

¿Naun cáhán ni súcuan? Chi tu cúní Yaa Dios jeē cuu súcuan. Tu jíni ñúhún cuiti ndoho ní jnúndóho yáha, achí de.

<sup>23</sup> Te ni ndió cóto ya nuū Pedro, te ni cahán yá jíin de:

Cujiyo quihín rō, chí cáhán rō ná cáhán Satanás. Chí tēe ndúcú stíví ruhū cúu rō. Te tu jíni ní rō nájnūhun jéni ní Yaa Dios, chí sa suhva jéni ní rō nájnūhun cájeni ní ñayuu. Achí yá.

<sup>24</sup> Yūcuán na te ni cahán yá jíin tée cáscuáha jíin yá:

Na-ni ñayuu núu cúní i condiquín i ruhū, na cási i jeē cuní maá i, te na cóndiquín i ruhū te cuáha i jnūhun ndoho i jnúndóho jeē siquí rí, vésú na cúu i. <sup>25</sup> Chí núu ndé ñayuu cuní i cácu i nuū jnúndóho quiji nuū i jeē siquí ruhū, núu súcuan te jnahnū ndetū i níf cáni. Te núu ndé ñayuu, vésú na cúu i jeē siquí ruhū, te cotecu i níf cáni. <sup>26</sup> ¿Chí ndé cuajnínu vésú na cúndeyí ñayuu nihin i níf ñáyiví, te núu quiví i nuū jnahnū ndetū i? Chí tú na jíin cuiti chunaa ñayuu jeē cácu ánuá i. <sup>27</sup> Chí ruhū, Yaa ní nduu tēe, ndiji ri jíin táca ndajéhé rí, te yóhoyo luu cujéhnú ri nájnūhun cújéhnú Tátá rí. Yūcuán na te cuáha ri tahú nuū ñin ñin ñayuu núu ndese jniñu ní casáha i. <sup>28</sup> Te jendaá cahán rí jíin rō jeē sava tēe cáhīn yáha, ma cúu de chí nde cuní de jeē maá rí, Yaa ní nduu tēe, ndácu ri jniñu jíin poder í.

*Jeē tucu ni nduu ya  
(Mr. 9.2-13; Lc. 9.28-36)*

## 17

<sup>1</sup> Yūcuán na te nuū iñú quiví te Jesús ní jeca ya Pedro jíin Jacobo jíin Juan ñani Jacobo, cuahán sán ya jíin de ñin yacu súcún. <sup>2</sup> Te yūcuán, tucu ni nduu ya nuū de. Chí ni ndindēe núu yá nájnūhun niándii. Te sahma ya ni nducuíjín quiví ndasí, nájnūhun nduva luz. <sup>3</sup> Te ni cajito-ni de jeē Moisés jíin Elías, tēe ni cahīyo jenahán, cándajñūhún de jíin yá. <sup>4</sup> Te ni cahán Pedro jíin yá:

Nacā jeē váha jeē cáhīn ná yáha. Te núu cúní ní te na sáha ná úní vehe ramada, ñin cuu maá ní, ñnga cuu Moisés, te ñnga cuu Elías, achí de.

<sup>5</sup> Te níni cáhán gā de, te ni quiji vicō nūhun jéé yaa ndasí, ni jesi-ni nuū de. Te nuū vicō un ní cahán ñin jnūhun:

Yáha cúu Sēhe ri jeē maní ndasí rí jíin, te cúsi ní rí jíin. Na cúni nahín rō jnūhun cáhán yá. Achí.

<sup>6</sup> Te jeē súcuan ni cajini sōho tēe cáscuáha ún, te ni cajecava ndeyí de, chí yóhoyo ní cayūhú de. <sup>7</sup> Yūcuán na te ni quee Jesús, te ni soó yá ndaha ya siquí de. Te ni cahán yá:

Ndocuñí, te ma yūhu rō jijnáhan rō, achí yá.

<sup>8</sup> Te ni candacoto de, te tuá tēe un ní cájito de, chí maá ñin na Jesús.

<sup>9</sup> Te ni cananuu de jíin yá yucu ún. Te ni ndacu ya jniñu nuū de:

Ma cáchi rō nuū ní ñin jeē súcuan ni cajito rō, chí nde na nátecu maá rí, Yaa ní nduu tēe, achí yá.

<sup>10</sup> Yūcuán na te tēe cáscuáha jíin yá, ni cacajñūhún de ya:

Núu súcuan te tēe cástéén tutu ley Yaa Dios, ¿najehé cácahán de jeē cánuú ndiji Elías xīhna gā, te saá te quiji Yaa cúu Cristo? achí de.

<sup>11</sup> Te ni cahán Jesús jíin de:

Jendaá cúu jeē xīhna gā quiji ñin tēe cuu nájnūhun Elías, te sátúhva de ndihi, achí tutu.

<sup>12</sup> Te cáhán rí jíin rō jeé jé ní quiji tēe ní cuu nájnūhun Elías, te ní ní jíni ñayuu jeé suu de cúu. Te ní casáha ndeváha ñayuu jíin de ndihi jeé ní cacuu ní maá i. Te suni súcuan stóho i ruhū, Yaa ní nduu tēe. Achí yá.

<sup>13</sup> Yūcuán na te tēe cáscuáha un, ní cajecūhun ní de jeé cahán yá jeé Juan tēe scuándute, ní cuu de nájnūhun Elías.

*Jeē ní nasávaha ya ñin sūchi jíhí yihí  
(Mr. 9.14-29; Lc. 9.37-43)*

<sup>14</sup> Te ni najinū yá jíin de nuū ñayuu cuehé ún. Te ni quee ñin tēe, ní jecuíñí yití de nuū yá, te ni cahán de:

<sup>15</sup> Cundáhú ní ní séhe yíí ná, chí yóhoyo xeēn ndóho i cuehyí jíhí yihí. Te je ní cuu cuehé jínu cótúú i nuū ñúhún jíin núu ndúte. <sup>16</sup> Te ní quindeca ná i nuū tēe cáscuáha jíin ní, te tu ní cúu sávaha de i, achí de.

<sup>17</sup> Te ni cahán Jesús:

Ñayuu yóhoyo nihni ní cácuu rō chí tu cácadíje rō jéé cuu nduváha i. ¿Nasaa ga quiví condee rí jíin ró? ¿Te nasaa ga quiví cuandeyí ní rí jíin ró? Cuáquihin sūchí un na quiji i, achí yá.

<sup>18</sup> Te ni cahán yá nuū tachí, te ni quenda-ni ini sūchí un. Te ni nduváha-ni i maá hora un.

<sup>19</sup> Yūcuán na te tēe cáscuáha un, ní cacajñūhun sán de ya:

¿Najehé tu ní cúu quenehen ná tachí un jijnáhan ná? achí de.

<sup>20</sup> Te ni cahán yá:

Siquí jeé tu cácadíje nihin rō jéé cuu sáha rō. Chí jendaá cahán rí jíin rō, jeé núu candíje rō vésú ñin tñhí-ni, cúhva nájnūhun ñin ndiquin mostaza, te cuu sáha rō táca-ni jniñu yíí. Chí cuu cahán rō jeé na cújiyo yucu yáha

quihîn inga lado, te cujiyo-ni. Te tâcá-ni jniñu chí cuu sáha ró, te núu candíje nihin ró jéé cúu. <sup>21</sup> Te ìin tachî súcuan chí ma quénda cuiñi quihîn, te núu tu cacân tahú ró te coo ndite ni ró. Achí yá.

*Jeē ni cāhān tucu ya jeē cūyā*  
(Mr. 9.30-32; Lc. 9.43-45)

<sup>22</sup> Te jica cuu Jesús jiiñ de jijnáhan de región Galilea, te ni cāhān yā jiiñ de:

Máá rí, Yaā ní nduu tēe, nastúu i ruhū nuū tâca tēe xeēn. <sup>23</sup> Te cahni de ruhū, te nuū uní quiví te natecu rí, achí yá.

Te ni canducuihyá ndasí ni de jeē ni cāhān yā jñuhun yáha.

*Siquí xūhun cuajniñu ini templo*

<sup>24</sup> Te ni jiiñ yā ñuu Capernaum jiiñ tēe cáscuáha jiiñ yá. Te tēe cástútú xūhun templo ni quecoo de, te ni cacajñuhún de Pedro:

Te maestro máá ró jijnáhan ró, ¿á tú cuāha de xūhún cuajniñu ini templo, chí naún? áchí de.

<sup>25</sup> Te ni cāhān Pedro:

Cuu, áchí de.

Te ná ni quiví de ini vehe, te xihna gā Jesús ni cāhān yā jiiñ de:

¿Ndese jéni ni ró, Simón? Tāca tēe cácuu rey ini ñayiví yáha, ¿ndé núu cájicān de xūhun renta jiiñ xūhun cuajniñu ñuu? ¿A núu séhe de chí núu ñayuu sñn vehe? áchí yá.

<sup>26</sup> Te ni cāhān Pedro:

Nuū ñayuu sñn vehe, áchí de.

Te ni cāhān Jesús:

Núu súcuan te tú na inga cujéhnu nuū séhe rey jeē cacán xūhún un núu i.

Súcuan ni cāhān yā jeē cujéhnu ya cúu ya Séhe Yaā Dios. Te ni cāhān yā:

<sup>27</sup> Te na chúnaa yō, návāha tu squítí ni yō de. Núu súcuan te cuáhán ndé yumar, te scāne ró gancho jeē jñi chácá, te tava ró chácá jéé jñi xihna gā. Te ndica ró yuhu ti, te yūcuan nihin ró ñn xūhun jéé cānda chunaa ró jeē cájicān de. Te quindēca ró núu de jeē cúu ruhū jiiñ rōhó. Achí yá.

*Ndé ñayuu cúu jeē cujéhnu ga*  
(Mr. 9.33-37; Lc. 9.46-48)

## 18

<sup>1</sup> Te suni quiví un ní quecoo tēe cáscuáha un núu yā, te ni cacajñuhún de ya:

¿Ndé ñn cujéhnu ga nuū ñayuu jeē ndácu Yaā andiví jniñu nuū? achí de.

<sup>2</sup> Te ni cana ya ñn sūchi lúli, te ni jeni ya i mēhñu de. <sup>3</sup> Te ni cāhān yā:

Jendaá cāhān rí jiiñ ró, núu tú nandió cóo ni ró te caní ní ró nájñuhun ñn sūchi lúli, ma quiví cuiñi ró ndaha Yaā andiví jéé ndacu ya jniñu nuū ró. <sup>4</sup> Núu súcuan te ñayuu jeē jéni ní i jeē tu cujéhnu i, nájñuhun jéni ní sūchi lúli yáha, suu i cujéhnu ga nuū ñayuu jeē ndácu Yaā andiví jniñu nuū. <sup>5</sup> Te na-ni ñayuu núu

jeē siquí ruhū jetáhú i ñn sūchi lúli nájñuhun sūchi yáha, te ruhū jetáhú i. Achí yá.

*Xeēn coo siquí ñayuu quiví nuū cuéchi*  
(Mr. 9.42-48; Lc. 17.1-2)

<sup>6</sup> Te núu ñn sūchi lúli yáha cándije i ruhū, te núu quiví i cuéchi sáha na-ni ñayuu, te vāha ga núu ní conuhní ñn yōso cáhnu sucūn ñayuu ún, te quēe i chíji ndute mar nuū. <sup>7</sup> Nacá xeēn cúu jiiñ ñayuu ñayiví, chí máni iyó jéé nducú squiví ñayuu nuū cuéchi. Te máni súcuan coo ini ñayiví. Te nacá xeēn ndoho ñayuu jeē squiví jñáhan nuū cuéchi.

<sup>8</sup> Núu súcuan te núu ndaha ró chí jéhe ró sáha jeē quiví ró cuéchi, vāha ga cahnde ró te scāne ró na quihîn, návāha tuá sáha ró cuéchi. Chí vāha ga jeē coo chácua ró chí coo tícúhndu ró te quiví ró te quiví ró núu cotecu ró ní cáni, vēsú jeē cóndee ndindúú ndaha ró jéhe ró te quiví ró núu ñuhún jeē cayú ní cáni. <sup>9</sup> Te núu tinūu ró sáha jeē quiví ró cuéchi, vāha ga tava ró te scāne ró na quihîn, návāha tuá sáha ró cuéchi. Chí vāha ga jeē coo ñn-ni tinūu ró te quiví ró núu cotecu ró ní cáni, vēsú jeē cóndee ndindúú tinūu ró te quiví ró núu ñuhún infierno.

*Jñuhun yátá siquí lanchi jeē ní sana*  
(Lc. 15.3-7)

<sup>10</sup> Coto ma sájéé ni ró nuū ní ñn sūchi lúli yáha. Chí cāhān rí jiiñ ró jeē tâcá ndajéhe andiví jéé ndito ya i, níni cáhñn ya nuū máá Tátá rí andiví. <sup>11</sup> Chí ruhū, Yaā ní nduu tēe, vēji rí jeē jñama rí ñayuu jeē ní sana i nuū Yaā Dios.

<sup>12</sup> ¿Te ndese cájéni ní ró? Núu ñn tēe ndéca de ñn ciento lanchi, te núu sana ñn ti, ¿á tu stóo de cuñ xico xahún cuññ gā tí yucu, te ndicó de quinanducú de quiti ní sana ún?

<sup>13</sup> Te núu ní nanihñ de ti, te ndaā jeē yóhoyo ga cúsi ní de jiiñ quiti ún vēsú jiiñ cúñ xico xahún cuññ gā quiti jeé tu ní sana. <sup>14</sup> Te suni súcuan máá Tátá ró, Yaā ndeé andiví, tu cúni yá jeē jñahnú ndetū ní ñn sūchi lúli yáha.

*Siquí jeē cóne cáhnu ni yō nuū jñáhan yō*  
(Lc. 17.3)

<sup>15</sup> Te núu jñáhan ró ní sáha de cuéchi siquí ró, núu súcuan te castúhnu ró nuū mañuhún-ni de jeē ní sáha de cuéchi siquí ró. Te núu ní jetáhú de jñuhun ni cāhān ró jiiñ de, núu súcuan te je ni ndumaní de jiiñ ró ní sáha ró. <sup>16</sup> Te núu tu ní jetáhú de jñuhun cāhān ró, te quicāna ró ñn chí úu gā ñayuu quihîn ró jiiñ núu de, cuu i testigo jiiñ ró, te cundaá cuéchi de te ndumaní de jiiñ ró. <sup>17</sup> Te núu tu ní jetáhú tucu de jñuhun cácahān tēe ún, yūcuán na te castúhnu ró nuū ñayuu cácañdije. Te núu tu ní jetáhú tucu de jñuhun cāhān ñayuu cácañdije ún, te siáá ró de na cóo de nájñuhun ñn tēe tu cándije nuū Yaā Dios chí tēe stútú xūhun renta.



<sup>18</sup> Jendaá cahán rī jín ró jéē tāca jéē cási rō jeē ma sāha ñayuu iní ñayiví yáha, suni casi jeē cáyucú nde andiví. Te tāca jéē cuáha ró jnūhun sāha i iní ñayiví yáha, suni jeē cáyucú nde andiví cuáha jnūhun.

<sup>19</sup> Te suni cahán rī jín ró, núu uū jnāhan ró iní ñayiví yáha, inuu cani ni rō siquī in jeē cacán tahu rō, núu súcuan te máá Tátá rī andiví cuáha ya jeē cājicān rō. <sup>20</sup> Chi núu ndé mí ndútútú úh chí úní ñayuu jeē cáchiñuhún i ruhū, te yúcuan ine rī jín i, áchí yá.

<sup>21</sup> Yūcuán na te ni quee Pedro nuū yā, te ni cajñuhún de ya:

¿Nasaa jínu cone cáhnu ni na núu jnāhan ná jeē sāha de cuēchi siquī ná? ¿A ndé uxā jínu chí naún? áchí de.

<sup>22</sup> Te ni cahān Jesús:

Tu cahán rī jín ró jeē máá uxā jínu, chi nde uxā jínu jeē uní xico uxí.

*Jnūhun yátá siquī mozo jeē tu ní ine cáhnu ni*

<sup>23</sup> Núu súcuan te Yaā ndéē andiví, suhva cúu jeē ine cáhnu ni yā nuū ñayuu ndácu ya jniñu nuū: Cúu nájñuhun in rey jeē cuní de sándaá de jín mozo de jeē cátaū nuū de.

<sup>24</sup> Te ni quejeé de sándaá de jín i. Te ni caquindeca i in mozo jeē táu tjini millón peso nuū de. <sup>25</sup> Te tú na vé névāha mozo un chunaa nuū de. Te ni ndacu de jniñu jeē na cūyāhu mozo un jín ñasihí jín séhe jín táca ndajniñu, te nucúnaa xūhun táu. <sup>26</sup> Yūcuán na te ni jecuiñí yití mozo un, te ni cahān ndahú de jín patrón de ún: Condetu ní, te na chúnna ndihí ná xūhun ní, áchí de. <sup>27</sup> Te máá patrón ni cundáhú ni de mozo de. Te ni ine cáhnu ni de jeē táu mozo de ún, te ni siaá de jeē ma chúnna gā. <sup>28</sup> Te ni quenda mozo un cuáhān de, te ni najnāhan-ni de jín in jnāhan mozo de jeē táu jecu peso nuū de. Te ni jnií de tēe ún, te ni jecitu de sucún, te ni cahān de: Chunaa jeē táu rō nuū rī, achí de. <sup>29</sup> Te jnāhan mozo de un ní jecuiñí yití núu de, te ni cahān ndahú jín de: Condetu te na chúnna ndihí rī xūhun ró, achí. <sup>30</sup> Te máá de tu ní cúní de, chí ni chune de tēe un vecāa nde quiví nachunaa jeē táu nuū de. <sup>31</sup> Te táca jnāhan mozo de ní cajito jeē súcuan ní sāha de, te ni cajnahuhú ndasí ni de. Te cuango de nuū patrón de, te ni cacachí de ndihí ndese ní cuu. <sup>32</sup> Yūcuán na te patrón un ní nacana de mozo un, te ni cahān de jín: Mozo ndevāha cúu ró. Chí ni ine cáhnu ni rī ndihí jeē táu rō nuū rī, chí ni cahān ndahú ró jín rī. <sup>33</sup> Te nájñuhun ni cundáhú ni rī rohó, suni súcuan ni jini ñuhún cundáhú ni rō jnāhan mozo rō nuū, áchí de. <sup>34</sup> Te ni quití ndasí ni patrón, te ni ndacu de jniñu jeē na quiví vecāa nde nachunaa ndihí jeē táu nuū de.

<sup>35</sup> Te ni jinu ni cahān yā, te áchí yá:

Nájñuhun ni sāha rey un jín mozo de, suni súcuan sāha máá Tátá rī andiví jín táca rōhó núu tu cone cáhnu ni rō nuū jnāhan ró nde jín iní jín ánuá rō, núu na-ni cuēchi sāha i nuū rō. Achí yá jín de jijnāhan de.

*Siquī jeē ma stóo jnāhan tēe jín ñahan (Mr. 10.1-12; Lc. 16.18)*

## 19

<sup>1</sup> Te nuū ní ndihí ni cahān Jesús tāca jnūhun yáha, te ni quenda ya Galilea cuahān yā. Te ni jinū yā región Judea, inga lado yūte Jordán, ichi núu cáne niāndii. <sup>2</sup> Te cuehē ñayuu ni candiquin i ya, te yúcuan ní nasávāha ya ñayuu cácuñu.

<sup>3</sup> Yūcuán na te ni quecoo jecu tēe grupo fariseo nuū yā, chí cācuni de coto ndee de ya núu ndese cahān yā. Te ni cacajñuhún de ya:

¿A iyó ley jeē cuu ndusín in tēe jín ñasihí de núu na-ni siquī cúu, chí naún? áchí de.

<sup>4</sup> Te ni cahān yā:

¿A tu ní cácahu ró tutu i ndese ni sāha Yaā Dios ñayuu nde xīhna ñuhún? Chí tēe jín ñahan ni sāha ya, achí. <sup>5</sup> Te suni ni cahān Yaā Dios: Jeē yúcuan cúu jeē stóo tēe tátá de náná de, te quijnāhan de jín ñasihí de, te in na cuu ndindúu de, áchí Yaā Dios, achí tutu. <sup>6</sup> Núu súcuan te tuá cúu uū jnāhan de, chí in na cúu. Jeē yúcuan tu iyó váha jeē stóo jnāhan, chí jeē ni squijnāhan Yaā Dios cúu, achí yá.

<sup>7</sup> Te ni cacajñuhún de ya:

Núu súcuan ¿te naun ni ndacu Moisés jniñu jenahán jeē núu stóo in tēe ñasihí de, te na cívāha acta jeē ndusín de jín ña? áchí de.

<sup>8</sup> Te ni cahān yā jín de:

Siquī jeē níhni ni rō jijnāhan ró, jeē yúcuan ní jēhe Moisés jnūhun jeē stóo ró ñasihí ró. Te nde xīhna ñuhún chí nasūu súcuan ní cuu. <sup>9</sup> Te ruhū chí cahán rī jín ró, núu in tēe stóo de ñasihí de, te núu nasūu jeē tjini ní ña, te quijnāhan de jín inga ñahan, núu súcuan te cásiquí ndéē de ña. Te núu in tēe condeca de ñahan ní ndusín, suni cásiquí ndéē de ña, áchí yá.

<sup>10</sup> Yūcuán na te ni cacahān tēe cácuáha jín yá:

Te núu ma cúu stóo tēe ñasihí de, núu súcuan te vāha ga ma cóndeca de ñahan, achí de.

<sup>11</sup> Te ni cahān yā jín de:

Jnūhun ni cahān rō yāhá, tu níhni jniñu nuū ndihí tēe, chí máá nene tēe jeē ni sāha Yaā Dios jeē níhni jniñu nuū. <sup>12</sup> Chí iyó tjini siquī jeē jesi jeē ma cóndeca tēe ñahan. Chí sava tēe ni cacacu de jeē ma cúu condeca de ñahan. Te sava ga tēe ni sāha ñayuu jeē ma cúu condeca de ñahan. Te sava ga tēe ni cajeni ni máá de jeē ma cóndeca de ñahan siquī jeē ndihví ni de jín jniñu jeē ndácu Yaā andiví nuū de. Tēe jeē cúu cuatáhú jnūhun

jeē ma cóndeca de ñahan, na cuatáhú de núu súcuan. Achí yá.

*Jeē ni jicán tahu Jesús jehē sūchi lúli  
(Mr. 10.13-16; Lc. 18.15-17)*

<sup>13</sup> Yūcuán na te ni quecoo ñayuu jíin sūchi lúli, jeē na sóo yá ndaha ya xiní i te cacán tahu yá jehē i. Te tēe cáscuáha jíin yá, ni cacahān de nuū ñayuu vējicoo jíin i. <sup>14</sup> Te ni cahān Jesús:

Cuāha jñuhun na quíjicoo sūchi lúli jíin nuū rí, te ma cási rō jeē quíjicoo i. Chi ñayuu jeē ndiío cóo ni i caní ni i nájñuhun sūchi yáha, suu i quívi ndaha Yaā andívi jeē ndacu ya jñiñu nuū i, achí yá.

<sup>15</sup> Te ni sóo yá ndaha ya xiní i jíjnahan i. Te ni quenda ya yūcuan cuahān yá.

*Jñuhun tēe cúca  
(Mr. 10.17-31; Lc. 18.18-30)*

<sup>16</sup> Te ñn tēe suchí ní quee de nuū Jesús, te ni cajñuhún de ya:

Tēe vāha cúu ní Maestro. Te cachi ní, ¿na jñiñu vāha sáha ná te nihín tahu na cotecu na ní cání andívi? achí de.

<sup>17</sup> Te ni cahān yá jíin de:

¿Naun cahán rō jeē tēe vāha cúu rí? Tú ni ñn tēe vāha iyó, chí máa ñn-ni Yaā Dios. Te núu cúní rō cotecu rō ní cání, te squícu rō jñiñu ní ndacu ya. Achí yá.

<sup>18</sup> Te ni cahān de:

¿Nde-ni jñiñu cúu núu súcuan?

Te ni cahān yá:

Ma cáhni rō ndíyi. Ma cósiquí ndéē ñáhan rō. Ma sacuíhná rō. Ma sajnúhún rō. <sup>19</sup> Cuatáhú rō nuū tatá rō nuū naná rō. Te cundáhú ni rō jñahan rō nájñuhun cundáhú ni rō maá rō, achí yá.

<sup>20</sup> Te ni cahān tēe suchí un:

Tācá jñiñu yáha je ni squícu ná ndé ná lúli ná. ¿Te na vé cúmani gā sáha ná núu súcuan?

<sup>21</sup> Te ni cahān Jesús:

Núu cúní rō squícu ndihí rō, cuahán te xíco rō ndihí jeē névāha rō, te cuāha rō núu ñayuu ndahú. Te nde andívi cuāha ya jeē ndetū ndasí coo rō. Yūcuán na te quíji rō condiquín rō ruhū quihín yō, achí yá.

<sup>22</sup> Te tēe suchí un, ná ni jíni sōho de jñuhun yáha, te ni cuculhyá ni de te cuahān de, chí cúca ndasí de.

<sup>23</sup> Yūcuán na te ni cahān Jesús jíin tēe cáscuáha jíin yá:

Jendaá cahán rí jíin rō, tēe cúca chí yōhyo yí quívicoo de ndaha Yaā andívi jeē ndacu ya jñiñu nuū de. <sup>24</sup> Te cahán tucu rí jíin rō jeē yachí gā yáha ñn camello yaū yutícuí, vēsú jeē quívi ñn ñayuu cucá ndaha Yaā Dios jeē ndacu ya jñiñu nuū i, achí yá.

<sup>25</sup> Te tēe cáscuáha jíin yá, yōhyo ni canaa ni de jeē ní cajini de jñuhun yáha, te ni cacajñuhun jñahan de:

¿Nde ñayuu cúu jeē cácu núu súcuan?

<sup>26</sup> Te ni ndacoto Jesús nuū de, te ni cahān yá:

Ñayuu chí ma cúu squívi i máa i ndaha Yaā Dios, te máa yá chí ndihí-ni cuu sáha ya, achí yá.

<sup>27</sup> Yūcuán na te ni cahān Pedro:

Sāña jíjnahan ná ní castóo ná ndihí jeē cánevāha ná, te cándiquín na nihín. ¿Te na vé nihín na núu súcuan? achí de.

<sup>28</sup> Te ni cahān Jesús jíin de:

Ruhū, Yaā ní nduu tēe, jendaá cahán rí jíin rō jíjnahan rō jeē ñn quívi conene rí mesa ndacu rí jñiñu, te yōhyo luu cújéhu rí ini ñayívi jeē. Te quívi ún te máa rō jeē ní cacondiquín rō ruhū, suni coyūcu rō nuū uxí uū mesa ndacu rō jñiñu. Te sándaā rō jñiñu ndihúxi uū yucūn ñayuu Israel. <sup>29</sup> Te tāca ñayuu jeē ní stóo vehe, chí ñani, chí cuāha, chí tátá, chí náná, chí ñasihí, chí séhe, chí ñuhun, siquí jeē cóndiquín i ruhū, te nanihín i ñn ciento gā jeē súcuan. Te suni nihín tahu i cotecu i ní cání. <sup>30</sup> Te cuehē ñayuu jeē vijna cácuu i nuū, nduu i sandihí. Te ñayuu jeē vijna cácuu i sandihí, nduu i nuū. Achí yá.

*Jñuhun yátá síquí tēe cásájñiñu*

## 20

<sup>1</sup> Te suhva cúu jeē ndacu Yaā andívi jñiñu nuū ñayuu: Cúu nájñuhun ñn tēe chí ñuhun. Te ñn nehen ni quenda de, ndúcú de tijni mozo jeē taxín ndéhé uva de. <sup>2</sup> Te ni sándaā de jíin mozo un jeē chúnaa de ñn denario jeē quívi. Te ni tají de tēe un cuángoo jeē taxín uva de. <sup>3</sup> Yūcuán na te ni quenda tucu de nájñuhun cahíin. Te ni jito de nuū sava ga tēe cáyūcu sáa-ni de nuū yáhu. <sup>4</sup> Te ni cahān de jíin: Róho jíjnahan rō, cuángoo taxín rō uva rí, te chunaa vāha rí yāhu rō, achí de. Te tēe un cuángoo de. <sup>5</sup> Te ni quenda tucu de jeē cácuu cahuxí uū jíin jeē cácuu cahuní, te suni súcuan ni nihín tucu de mozo. <sup>6</sup> Te jeē cácuu cahuhún ni quenda tucu de. Te ni nihín tucu de jecu gā tēe cáyūcu sáa-ni nuū yáhu. Te ni cahān de jíin: ¿Najehē cáhíin sáa-ni rō yáha ní ndiáca? achí de. <sup>7</sup> Te ni cacahān tēe ún: Síquí jeē tú ni ñn ní cána sāña jeē sájñiñu ná. Te ni cahān de jíin tēe ún: Núu súcuan te suni máa rō quingoo rō taxín rō ndehé uva rí, chí chunaa vāha rí yāhu rō, achí de. <sup>8</sup> Te nuū ní ini, te tēe chí ñuhun ni cahān de jíin tēe cújéhu nuū mozo de: Cana xiní tēe cásájñiñu te chunaa rō yáhu de, te xihna gā tēe ni quívicoo sandihí, te sáa te tēe ni quívicoo xihna ñuhún, achí de. <sup>9</sup> Te ni quecoo tēe jeē ni quívicoo cahuhún. Te ñn denario ni caquihín ñn ñn de. <sup>10</sup> Yūcuán na te ni quecoo tēe jeē ni quívicoo xihna ñuhún. Te cájeni ni de jeē cuehē gā quiyāhu de. Te ñn-ni denario ni caquihín ñn ñn de. <sup>11</sup> Te nuū ní caquihín de, te ni caquejé de cacahān sóo de síquí tēe chí ñuhun, achí de:

<sup>12</sup> Máá ná jijnáhan ná, ndiáca ni casájniñu ná, te ni candoho ná jée jihní. Te tée yáha jée ni quívicoo sandíhí, chí máá ñin hora-ni ni casájniñu de. Te inuú-ni ni chiyáhu ní sáña jín de, áchí de. <sup>13</sup> Te tée chí ñuhun ni cahān jín ñin de: Amigo, nasūu jée tú vāha sáha ri jín ró. ¿A tu ní sándaá yō jée ñin denario quiyáhu ró, chí nañ? <sup>14</sup> Núu súcuan te quihin yáhu ró te quinhun rō. Chí cúní rí jée tée ni quívicoo sandíhí yáha, inuú quiyáhu de jín máá ró. <sup>15</sup> ¿Te á tu cuu sáha ri ndese cúní rí jín xúhun máá rí? ¿Te chí cúcuésún ni rō jée ní chiyáhu vāha ri de jijnáhan de siquí jée vāha ni rí? áchí de. <sup>16</sup> Te nájnūhun ni sáha tée chí ñuhun, suni súcuan sáha Yāā Dios. Chí ñayuu cácuu sandíhí, nduu i nuū. Te ñayuu cácuu nuū, nduu i sandíhí. Chí cuehē ñayuu cána ya jee candíje i ya. Te jecu-ni i cándíje, te nácāji ya máá i jee ndúu i sēhe ya. Achí yá.

*Jeē ni cáhān tucu Jesús jee cúu yā*

*(Mr. 10.32-34; Lc. 18.31-34)*

<sup>17</sup> Yūcuán na te ná ni quihin Jesús ichi cuahān yā ñuu Jerusalén, te ni cana sín ya ndihúxí uū tée cáscuáha jín yá. Te ni cahān yā jín de:

<sup>18</sup> Cuni sōho ró, chí je cuángoo yó ñuu Jerusalén vijna, te yūcuán nastúu ñayuu ruhū, Yāā ní nduu tēe, nuū sutú cácujeñnu jín núu tēe cástéén tutu ley. Te ndonda de siquí rí jee cúu rí. <sup>19</sup> Te squívi de ruhū nuū tēe nación Roma jee cáyūcú Jerusalén cándacu jniñu. Te táca tēe un sácatā de nuū rí. Te caní de ruhū, te sáá te cahni de ruhū jicá cruz. Te nuū uní quívi te natecu rí. Achí yá.

*Jeē ni jicān naná Jacobo jín Juan ñin favor nuū yā*

*(Mr. 10.35-45)*

<sup>20</sup> Yūcuán na te ni quee ñasihí Zebedeo nuū yā jín sēhe ña Jacobo jín Juan. Te ni jecuiñí yití ña nuū yā, jicān ña ñin favor nuū yā. <sup>21</sup> Te ni cajñūhun yā ña:

¿Na vé cuní rō?

Te ni cahān ña:

Cuāha ní jñūhun jee quívi ndácu ní jniñu te conēne ndindúú sēhe ná yáha xiin ní, ñin i lado vāha ní, te inga i lado jecó ní, achí ña.

<sup>22</sup> Yūcuán na te ni cahān Jesús jín Jacobo jín Juan:

Tu cájini rō na vé cúu jee cájicān rō. ¿A cuu ndoho rō jñúndóho nájnūhun jee quíji siquí rí? ¿Te á canda rō ndoho xeēn rō nájnūhun ndoho rí? Achí yá.

Te ni cacahān de:

Cuu sáha ná.

<sup>23</sup> Te ni cahān yā jín de:

Jendaá jee ndoho ró jñúndóho nájnūhun jee quíji siquí rí, te ndoho xeēn rō nájnūhun ndoho rí. Te jee cōnēne ró lado vāha ri jín lado jecó rí, nasūu ruhū cúu jee cuāha

jñūhun. Chí je íyó túhva cuu táca tēe jee ní nacāji Tátá rí, te tēe un ñihñ. Achí yá.

<sup>24</sup> Te uxí gā tēe cáscuáha jín yá ní cajini de jñūhun yáha. Te ni caquítí ni de nuū uū ñani ún. <sup>25</sup> Te Jesús ni cana ya de, te ni cahān yā jín de:

Cájini rō ndese cása ha tēe cácujeñnu nuū ñayuu táca nación. Chí cándacu ñihñ de jniñu nuū i, te máá de cáchí ndese coo. <sup>26</sup> Te máá ró jijnáhan ró, chí ma sáha ró súcuan. Chí núu ndé ñin ró cúní cujeñnu, sa suhva cuajniñu ró núu jñáhan ró. <sup>27</sup> Te núu ndé ñin ró cúní cuu nuū, sa suhva sáha ró máá ró mozo nuū jñáhan ró. <sup>28</sup> Chí suni súcuan sáha ruhū, Yāā ní nduu tēe, chí nastu jee véji ri jee cuajniñu ñayuu nuū rí, chí sa suhva véji ri jee cuajniñu rí nuū ñayuu. Te cuāha rí máá rí cuu rí návaha jnama ri cuehē ñayuu, achí yá.

*Jeē ní nasávāha ya uū tēe cuáá*

*(Mr. 10.46-52; Lc. 18.35-43)*

<sup>29</sup> Yūcuán na te ni quenda ya jín de ñuu Jericó. Te cuehē ndasi ñayuu ni candiquín i ya. <sup>30</sup> Te yuhíchi un cáyūcu úú tēe cuáá. Te ni cajini de jñūhun jee yáha Jesús cuahān yā, te ni cacana jee de:

Máá ní jee cúu ní Séhe yucūn David, cundáhú ni ní sáña, áchí de.

<sup>31</sup> Te ñayuu un ní cacahān i nuū de jee na cási de yuhu de. Te víhyá gā ni cacana jee de: Máá ní jee cúu ní Séhe yucūn David, cundáhú ni ní sáña ví, achí de.

<sup>32</sup> Te ni jecuiñí Jesús, te ni cana ya ndindúú tēe cuáá un, te ni cajñūhun yá de:

¿Na vé sáha ri jín ró cácuñi rō?

<sup>33</sup> Te ni cacahān de jín yá:

Jeē na ndúndijin tinūu ná cácuñi ná, achí de.

<sup>34</sup> Te ni cundáhú ní yā de. Te ni tee ya ndaha ya tinūú de. Te ni candundijin-ni tinūú de. Te ni candiquín de ya cuango de jín yá.

*Jeē ní quívi Jesús ñuu Jerusalén*

*(Mr. 11.1-11; Lc. 19.28-40; Jn. 12.12-19)*

## 21

<sup>1</sup> Te nuū cuácuyajni ya ñuu Jerusalén, te ni jinū yā jín tēe cáscuáha jín yá ñuu Betfagé, jee ñe jehē yucu Olivos. Te ní tají yā uū tēe cáscuáha jín yá jee quíngoo de. <sup>2</sup> Te áchí yā jín de:

Cuāhān ñuu lulí ñe ichi núú. Te yūcuan ñihñ rō ñin burra, núhí tī jín ñin burro lulí. Te ndají rō tī, quijicoo ró jín tī nuū rí.

<sup>3</sup> Te núu ndé ñin cahān jín ró, te cachí rō nuū: Máá Jítoho yō jini ñúhñ yá tī, achi rō. Yūcuán na te siáá-ni i tī, quíji ró jín tī, achí yá.

<sup>4</sup> Te súcuan ni cuu táca jniñu yáha návaha squícu jñūhun ni cahān tēe ni nacani jñūhun Yāā Dios nde jenahān, yósó núu tútu:

<sup>5</sup> Cachi rō nuū ñáyyuu ñuu Jerusalén jeē nani ñuu Sión:

Yahá condēhe ró jeē véji Rey rō.

Tu sájéhnua ya maá yá, chi maá burra-ni yósó yá,

jíin burrito, sēhe quití ndíso.

Achí tutu.

<sup>6</sup> Yūcuán na te tēe cáscuáha un cuángoo de, te ni casáha de nájñūhun ni ndacu Jesús jniñu nuū de. <sup>7</sup> Te ndēca de burra jíin sēhe ti, ni ndecoo de nuū yá. Te ni casoó de sahna de siquī tī, te ni jecosó yā tī. <sup>8</sup> Te cáhīin cuehē ñayuu, te ni cascáá i sahna i ini ichi. Te sava ga i ni cajehnde ndaha níúú, te ni cachucun i ini ichi. <sup>9</sup> Te ñayuu cuangoo ichi núú jíin ñayuu cuangoo ichi yátá, cácana jee i:

Yōhō cújéhnua Yaā cúu Sēhe yucūn rey David. Yōhō vāha Yaā cúu Yaā jeē véji jíin jniñu maá Jítoho yō Yaā Dios. Te yōhō cújéhnua maá Yaā Dios. Achí i.

<sup>10</sup> Te nuū ni quívi ya ñuu Jerusalén, te ndíhi ñayuu ñuu un ní cacuvaá i, te cuehē i cájnūhun jnāhan:

¿Ndé tēe cúu tēe yáha? achí i.

<sup>11</sup> Te ni cacahān ñayuu vējicoo jíin yá:

Yāha cúu Jesús jeē nācani jñūhun Yaā Dios, jeē véji nde ñuu Nazaret ndañūú Galilea. Achí i.

*Jeē ní quenehen ya ñayuu ini templo*

(Mr. 11.15-19; Lc. 19.45-48; Jn. 2.13-22)

<sup>12</sup> Yūcuán na te ni quívi Jesús ini templo cáhnu Yaā Dios. Te ni quenehen ya táca ñayuu cájeen quití te cánaxico núú ñayuu jeē socó i. Te ni scotúú ndeyi ya táca mesa tēe cástáyi xūhūn, jíin silla tēe cáxícó paloma.

<sup>13</sup> Te achí yá jíin i:

Yósó núú tútu íi jeē cahān Yaā Dios: Vehe ri chi vehe nuū cájcān tahú cúu, achí Yaā Dios. Te maá ró jijnāhan rō, chí nájñūhun yaū cava ñacuñhá ni canasáha ró. Achí yá.

<sup>14</sup> Yūcuán na te sava ñayuu cuaá jíin ñayuu chacua ní quecoo i nuū yá ini templo un. Te ni nasávāha ya i. <sup>15</sup> Te sutū cácujeñnu jíin tēe cástéén tutu ley Yaā Dios, ni cajito de táca jniñu jéhnua sáha ya, te ni cajini de jeē cácana jee sūchi lúli ini templo: Yōhō cújéhnua Yaā cúu Sēhe yucūn rey David, achí i. Te ni caquití ni de. <sup>16</sup> Te ni cacahān de jíin yá:

¿A tu jíini ró jéē súcuan cácahān sūchi yáha? achí de.

Te ni cahān Jesús jíin de:

Jíni ri. ¿Te á ná tu cahu ró jéē yosó núú tútu íi jeē suhva cáhān ñin tēe jíin Yaā Dios?

Sáha ní jéē táca sūchi lúli jíin sūchi cájexin, vāha ndasí cáhān i jeē Yaā cújéhnua cúu Cristo. Achí.

<sup>17</sup> Te ni stóo ya de. Te ni quenda ya ñuu Jerusalén, cuahān yā nde ñuu Betania. Te yūcuan ní ndóo ya jecuáá ún.

*Jeē ní cáhān yá nuū yúñnu higo*

(Mr. 11.12-14, 20-26)

<sup>18</sup> Te jenēhen inga quívi cuanuhun yā ñuu Jerusalén, te jíi yá sóco. <sup>19</sup> Te ni jito ya ñin nundēhe higo, ñin yuhíchi. Te ni jehēn yā jehē. Te tú na ndehē ni nihín yá, chí maá ndaha-ni ñin. Te ni cahān yá jíin:

Vijna te ma cúun cuiti gā ndehē xiní rō, achí yá.

Te ni ichi-ni yujnu higo ún. <sup>20</sup> Te tēe cáscuáha jíin yá, ni canaa ni de cájito de. Te ni cacajnūhun de ya:

¿Nde se ní sáha ní jéē yachí-ni ni ichi yujnu higo? achí de.

<sup>21</sup> Te ni cahān yá jíin de:

Jendaá cahān rí jíin ró, núu candíje ró te tú cani siquí ni rō, te cuu sáha ró jniñu jéhnua nájñūhun ni sáha ri jíin yujnu higo. Te nde jniñu jéhnua ga cuu sáha ró, chí nde cuu cahān ró jeē cújiyo yucu yáha, quihín nuū mar, te sáha nájñūhun cahān rō. <sup>22</sup> Te táca jéē cacán tahú rō jijnāhan rō, te núu candíje ró jéē nihín rō, te nihín rō. Achí yá.

*Siquí jeē ndíso jniñu Jesús*

(Mr. 11.27-33; Lc. 20.1-8)

<sup>23</sup> Te ni quívi tucu ya ini templo cáhnu. Te níni stéén yá jñūhun, te sutū cácujeñnu jíin táca tēe jéhnua jeē cándacu jniñu nuū ñayuu hebreo, ni quecoo de nuū yá. Te ni cacajnūhūn de ya:

¿Ndé ní nihín jniñu ró jéē sáha ró jniñu yáha? ¿Te ndé ñin ní tee jniñu siquí ró jeē sáha ró súcuan? Achí de.

<sup>24</sup> Te ni cahān Jesús:

Suni ruhú, cajñūhun rí rohó ñin jñūhun jijnāhan rō, te núu cuu stío cuñí rō, yūcuán na te cachi rí nuū rō ndé ní nihín jniñu ri jeē sáha ri jniñu yáha. <sup>25</sup> ¿Ndé ñin ní tee jniñu siquí Juan jeē ní scuándute de? ¿A Yaā Dios chí táca tēe? achí yá jíin de.

Yūcuán na te ni candajnūhun maá de:

Núu cahān yō jeē Yaā Dios ní tee ya jniñu un siquí Juan, te cahān de jíin yó: Núu súcuan ¿te najehē tu ní cácandíje ró de? <sup>26</sup> Te núu cahān yō jeē ñayuu ní catee jniñu un siquí de, te cáyūhu yō ñayuu, chí ndívi i cácandíje i jee tēe ní nacani jñūhun Yaā Dios ní cuu ndíje Juan. Achí de cácahān maá de.

<sup>27</sup> Te ni cacahān de jíin Jesús:

Tu cájini rí, achí de.

Yūcuán na te ni cahān yá jíin de:

Ní ruhú, suni ma cachi rí nuū rō ndé ñin ní tee jniñu siquí rí sáha ri jniñu yáha, achí yá.

*Jñūhun yátá siquí uú sēhe yíi*

<sup>28</sup> Te ni cahān gā yá jíin de:

Cuni nahín rō jñūhun yátá yáha: ñin tēe ní iyo uú sēhe yíi de. Te ni cahān de jíin ñin i: Séhē, quihín rō taxín ró ndehē uva rí vijna, achí de. <sup>29</sup> Te ni cahān i: Ma quihín na, achí i. Te ni cunúu, te ni nacani ní i, te cuahān i nuú jniñu ún. <sup>30</sup> Te tēe un ní jehēn de nuú

ínga sêhe de, te suni súcuan ni cahân de jíin i. Te ni cahân i: Cuu núu súcuan, te quihîn na, áchí i. Te tu ní jêhén i. <sup>31</sup> ¿Te ndese cájeni ni rō? Jeē ndindúú i, ¿ndé ñn i ni squicu jniñu cúní tatá i? áchí yá.

Cuni ni cacahân de:

Súchi jeē ni cáhân de jíin xíhna gā, achí de.

Te ni cahân Jesús jíin de:

Súcuan cúu, te jendaá cahán rī jíin rō jeē tée cástútú xúhun renta jíin ñahan cájica jnéni, yachí cánacani ni i jeē stóo i cuéchi i te quívicoo i ndaha Yaā Dios jeē ndacu ya jniñu nuū i, te máá rō jíjnánhan rō chi ma quívi rō. <sup>32</sup> Chi ní quiji Juan, ni steén de ndese condiquín rō jñuhun ndaa, te tu ní cácadíje rō jñuhun ní cahân de. Te sa suhva tée cástútú xúhun renta jíin ñahan cájica jnéni, ni cacandíje i jñuhun ní cahân de. Te máá rō, vesú ní cajito rō jéé ní cacandíje i, te tu ní cánacani cuiti ni rō jeē candíje rō. Achí yá.

*Jñuhun yátá síquī tēe néé cásjáñiñu nuū uva*

(Mr. 12.1-12; Lc. 20.9-19)

<sup>33</sup> Cuni sôho inga jñuhun yátá jíjnánhan rō: Ni iyo ñn tēe chíí ñuhun. Te ni nachuhun de cuehē ndehē uva. Te ni jesi de corral, te ni sáha de ñn nuū cúhun ndehē un táxIn. Te ni jeni de ñn vehe súcún návaha cuu coto de níí cáhnu.

Te ni stóo de nuū sava tēe sájniñu nuū, te cuu sava de ndehē jíin. Te ni tee de ichi cuahân jíicá de. <sup>34</sup> Te máá tiempo ndutútú uva, te ni tají de jecu mozo cuanuquihin sava uva nuū tēe cásjáñiñu ún. <sup>35</sup> Te tēe un ní cajnií de mozo un. Te ñn i ni cacani de, te inga i ni cajehni de, te inga i ni cajêhe de yuú xini. <sup>36</sup> Te tēe chíí uva ni tají tucu de jecu gā mozo cuango, cuehē gā vesú jeē xíhna ñuhún. Te suni súcuan ni casáha tēe un jíin ndihi mozo un.

<sup>37</sup> Te jeē sándihí na te ni tají de sêhe de cuahân. Te jeni ni de: Tēe ún chi cuatáhú de jíjnánhan de nuū sêhe rī. <sup>38</sup> Te tēe cásjáñiñu ún, núu ní cajito de nuū sêhe tēe chíí uva, te ni cacahân maá: Tēe chíí táhú cúu jeē yáha. Na cáhni yō de, te ndóo tahú de cuu yó, áchí. <sup>39</sup> Te ni cajnií de i, te ni caquenehen de i inga lado, te ni cajehni de i. Achí yá.

<sup>40</sup> Yūcuán na te ni cajñuhun yá de:

Núu súcuan te núu na quíji tēe chíí uva un, ¿te ndese sáha de jíin tēe cásjáñiñu ún? áchí yá.

<sup>41</sup> Te ni cacahân de jíin yá:

Ma cundáhú cuiti ni de táca tēe casáha jniñu néé un, chi cahni de. Te cuáha de ñuhun cáá uva un núu inga sava tēe sájniñu nuū, cuu sava de ndehē jíin. Te quívi ndutútú ndehē, te tēe ún nacuaña de sava ndehē nuū tēe chíí uva. Achí de.

<sup>42</sup> Te ni cahân Jesús jíin de:

¿Te á ná tu cahu rō jñuhun yáha jeē yosó núu tútu ií, jeē ruhú cúu nájñuhun ñn yuú? Chí áchí tutu:

Yuú jeē ní casquéhichí tēe cájeni vehe,

yuú yáha nduu jeē quítuu vehe.

Máá Jítho yō Yaā Dios ní sáha ya súcuan,

te cánaa ní yō jíto yó jniñu yáha.

Achí tutu. <sup>43</sup> Núu súcuan te cáhán rī jíin rō jeē cujiyo-ni jeē ndácu Yaā Dios jniñu nuū rō jíjnánhan rō, te nacuaña ya jniñu un núu inga ñayuu jeē squicu yáha i jniñu ndácu ya nájñuhun cúní yá. <sup>44</sup> Te ñayuu tu cácadíje, ndoho i nájñuhun ndóho ñayuu jeē cotúú síquī yuú te jnánhú i. Te quívi sándaá Yaā Dios cuéchi, te ñayuu tu cácadíje, ndoho i nájñuhun ndóho ñayuu jeē nínga yuú síquī i te cundihi i sáha. Achí yá.

<sup>45</sup> Te sutú cácujeñnu jíin tēe grupo fariseo ni cajini sôho de táca jñuhun yátá ní cahân yá. Te ni cajecúhun ni de jeē síquī maá de cúu jñuhun yátá ní cahân ya síquī tēe cásjáñiñu nuū uva jíin tēe cájeni vehe. <sup>46</sup> Te ni canducú de modo jnií de ya. Te cáyuhú de jeē quiti ni ñayuu, chí cájeni ni i jeē tēe nácani jñuhun Yaā Dios cúu ya.

*Jñuhun yátá síquī vico nándāha*

## 22

<sup>1</sup> Yūcuán na te ni cahân tucu Jesús inga jñuhun yátá jíin de jíjnánhan de:

<sup>2</sup> Súcuan cúu jeē ndácu Yaā andívi jniñu nuū ñayuu: Cúu nájñuhun ñn rey jeé sáha de ñn vico jeē nándāha sêhe yí de. <sup>3</sup> Te ní tají de táca mozo de cuacana ñayuu jeē ní cáhân de jíin jéé quijicoo. Te ñayuu ún tu ní cácani i quijicoo i. <sup>4</sup> Te ní tají tucu de jecu gā mozo quingoo, te áchí de jíin: Cahân jíin ñayuu ní cana rī un jéé iyó túhva ndeyu. Chi je ni jehni rī síquī rī jíin táca gá quiti ní nduu, te ndihi je iyó túhva. Nehen jíjnánhan rō vico nándāha. Achí rō jíin i. Achí de. <sup>5</sup> Te ñayuu ní cana de ún tu ní casáha i cuenta. Chí ñn i cuahân nuū ítu i, te inga i cuahân nuū jniñu sáha i. <sup>6</sup> Te sava ga i ni cajnií i táca mozo rey, te ni casacatá i nuú, te ni cajehni i. <sup>7</sup> Yūcuán na te yóhoyo ni quiti ní rey. Te ni tají de soldado de ní jengoo, ni cajehni de ñayuu ní cajehni ndíyi ún, te ni cajehmu de ñuu i. <sup>8</sup> Yūcuán na te ni cahân de jíin sava ga mozo de: Ndihi je iyó túhva jeé cóo vico nándāha. Te ñayuu ní cana rī ún, tu iyó yáha jeé quijicoo i chí nasúu ñayuu váha cácu i. <sup>9</sup> Núu súcuan te cuahân jíjnánhan rō táca núu náquijnánhan calle. Te cana rō núu nasaa ñayuu nihín rō, na quijicoo i vico nándāha. Achí de. <sup>10</sup> Te ni quendacoo mozo un cuángoo táca ichi. Te ni castútú de ndihi ñayuu ní canihín de, cúu ñayuu cunéé, cúu ñayuu váha. Te súcuan te ni chítú ñayuu ini vehe nuú iyó vico nándāha.

<sup>11</sup> Te ni quívi rey ini vehe jeé cahán de jíin ñayuu ní cutútú. Te ni jito de nuú ñn tēe jeé

tu ñuhun sahma jeē ni jēhe de cuhun ñayuu quijicoo vico nándaha. <sup>12</sup> Te ni cahān de jín tēe ún: Amigo, ¿ndese ni quiví ró yáha jēē tu ñuhun ró sahma vico nándaha? áchí de. Te máá tēe ún tu ní cahān cuiti de. <sup>13</sup> Yūcuán na te ni cahān rey jín tēe cájeni cohō: Jni de te cuhni ró ndaha de jehē de, te quenehen ró de na quihín de nuū quéhe nuū néē. Te yūcuán ndáhyū de te nacayihí yuhu de jeē ndóho xeēn de. Achí rey. <sup>14</sup> Chi cána Yaā Dios cuehē ñayuu jeē na cándije i. Te jecu-ni i candije, te máá i nácáji ya jeē ndúu i sēhe ya. Achí Jesús.

*Siquí xūhun renta*

(Mr. 12.13-17; Lc. 20.20-26)

<sup>15</sup> Yūcuán na te cuango tēe grupo fariseo. Te ni candajnūhún de núu ndese sáha de návaha cahān yā ñn jñuhun jeē ñihín de cuēchi siquí yā. <sup>16</sup> Te ni catajé de jecu tēe cácuaha jín máá de jín tēe grupo Herodes cuango de. Te ni cacahān de jín yá:

Maestro, cájini na jēē tēe cahān ndaā cúu ní, te stéén ndaā ní ndese squícu ñayuu nuū Yaā Dios. Te tu yúhú ní jeē cahān ni ñn ñayuu siquí ní, chi tu sáha ní cuenta ndese cúu ñn ñn i, chi inuú-ni sáha ní jín i. <sup>17</sup> Núu súcuán te cahān ní ndese jéni ní ní: ¿A iyó váha jeē chúnua yō renta nuū rey nación Roma jeē jni nación yō, chí tuú? áchí de.

<sup>18</sup> Te ni jini Jesús jeē cájito ndee de ya. Te ni cahān yā jín de:

Tēe stáhú-ni cácuu ró. ¿Najehē cájito ndee ró ruhū? <sup>19</sup> Stéén xūhun jēē jéconaā renta na cóto ri, achí yá.

Te ni castéén de ñn denario nuū yā. <sup>20</sup> Te ni jito ya, te ni cajñuhun yá de:

¿Ndé ñn nuū cúu jeē ndeé nuū xūhun yáha, te ndé síhví cúu jeē ndeé yáhá?

<sup>21</sup> Te ni cacahān de jín yá:

Nuū jín síhví rey un cúu, áchí de.

Yūcuán na te ni cahān yā jín de:

Núu súcuán te nacuāha ró núu rey un jéē yíhi cuenta nuū de, te nacuāha ró núu Yaā Dios táca jēē yíhi cuenta nuū máá yá, achí yá.

<sup>22</sup> Te nuū ní cajini de jeē ndichí ní cahān yā jñuhun yáha, te ni canaa ni de, te ni castóo de ya, te cuango de.

*Jeē ní cacajnūhún de siquí jeē nátecu ndíyi*  
(Mr. 12.18-27; Lc. 20.27-40)

<sup>23</sup> Te suni quiví un ní quecoo jecu tēe grupo saduceo nuū yā. Te tēe un cacahān jeē tu nátecu cuiti ndíyi. Te ni cacahān de jín yá siquí ñn jñuhun, achí de:

<sup>24</sup> Maestro, Moisés ni cahān de jeē núu ñn tēe cuu de, te ndóo ñasihí de, te núu tú sēhe de ní iyó jín ña, núu súcuán te cánuú jeē ñani de naquihín ñasihí de, te sēhe de jeē cácu jín ña nucuñí nuū ndíyi ñani de. Achí Moisés.

<sup>25</sup> Te ñuu na ní iyó uxā ñani. Te tēe núu ní quijnáhan de jín ñahan. Te ni jihí de. Te jeē tú sēhe de ní iyó, te ni ndóo ñasihí de nuū ñani

de. <sup>26</sup> Te tēe ún suni ní jihí de, te tú na sēhe de ní iyó tucu. Te suni súcuán tēe uní, nde jín ndihúxá de. <sup>27</sup> Te nuū ní ndíhi de ni cajihí, te suni ní jihí ñahan ún. <sup>28</sup> Núu súcuán te quiví nátecu ndíyi, ¿ndé ñn de cuu ña ñasihí de? Chi ndihúxá de ní condeca de ña. Achí de jín yá.

<sup>29</sup> Yūcuán na te ni cahān yā jín de:

Yōhyo cástiví ró jñuhun siquí jeē tu cájecūhun ní ró jeē cahān tutu ñi, ni tu cájini ró jeē iyó poder Yaā Dios jeē nastecu yā ndíyi. <sup>30</sup> Chi quiví nátecu ndíyi, te tuá na jñuhun quijnáhan tēe jín ñahan coo. Chi coo i nájñuhun ndajehé Yaā Dios andiví. <sup>31</sup> Te siquí jeē nátecu ndíyi, ¿á tu ní cácahu ró tutu jñuhun jeē cahān Yaā Dios jín ró? <sup>32</sup> Máá ri cúu Yaā Dios Abraham jín Isaac jín Jacob, achí Yaā Dios. Chi vésu je ni cajihí de, te cátecu de nuū iyó máá yá, chí cúu ya Yaā sáha jeē técu ñayuu ní cáni. Achí yá jín de.

<sup>33</sup> Te ñayuu un ní canaa ni i cájini nahín i jñuhun stéén ya.

*Jniñu cánuú ndasí gá jeē ní ndacu Yaā Dios*

(Mr. 12.28-34)

<sup>34</sup> Yūcuán na te tēe grupo fariseo ni cajini de jeē ní cajesi tēe saduceo yuhu de ní sáha ya. Te ni candutútu de nuū yá. <sup>35</sup> Te ñn de jeē cúu tēe stéén tutu ley Yaā Dios, ni cajñuhún de ya, chí coto ndee de ya uní de:

<sup>36</sup> Maestro, ¿ndé ñn cúu jñuhun ndácu jniñu cánuú ndasí gá nuū tútu ley? achí de.

<sup>37</sup> Te ni cahān Jesús jín de:

Coo maní ndasí ró jín máá Jitoho ró Yaā Dios, nde jnāá ndasí ró sáha ró ndíhi jeē cúsiñ ní yá, nde jín iní jín ánuá ró, jín ní jēe níjnūni ró, achí tutu. <sup>38</sup> Yáha cúu jniñu ndácu ya jeē cujéñu ga te cánuú ndasí gá. <sup>39</sup> Te jniñu uū jeē ní ndacu ya, suni súcuán cáhán: Cundáhú ní ró jñahan ró nájñuhun cundáhú ní ró máá ró. <sup>40</sup> Te chíjini ndindúu jñuhun yáha ní quenda ndíhi ley jeē ní tee Moisés, jín ndíhi jeē ní castéén tēe ni canacani jñuhun Yaā Dios, achí yá.

*Siquí jeē cúu Cristo sēhe yucūn David*

(Mr. 12.35-37; Lc. 20.41-44)

<sup>41</sup> Te ními cáyūcu tútu gá tēe fariseo un, te Jesús ni cajñuhun yá de:

<sup>42</sup> ¿Ndese cájeni ní ró siquí Cristo? ¿Sēhe ndé yúcūn cúu ya?

Te ni cacahān de:

Sēhe yucūn David, achí de.

<sup>43</sup> Te ni cahān yā jín de:

Núu súcuán ¿te ndese cúu jeē David ní cahān de Jitoho de ya, ní sáha Espiritu Santo nde jenhán? Chi ní cahān de:

<sup>44</sup> Máá Jitoho yō Yaā Dios ni cahān yā jín Jitoho rí, Yaā quiji:

Cucōo ró lado váha ri nuū cujéñu ró, te na sáha ri jeē quende ró poder táca jéē cájito uhū rohó.

Achí Yaā Dios. Achí David. <sup>45</sup> Te núu sēhe yucūn David cúu Cristo, ¿te ndese cúu jeē ni cáhān de jeē Jítoho de cúu ya? áchí yá.

<sup>46</sup> Te ni ĩn de tu ní cúu stió cuñí cuiti de jñuhun nuū yā. Te nde quiví ún tuá ni ĩn de ní chúndeyí ni de cajñuhún de ya.

*Jeē ni cáhān yā jeē iyó cuēchi de jijnáhan de (Mr. 12.38-40; Lc. 11.37-54; 20.45-47)*

## 23

<sup>1</sup> Yūcuán na te ni cahān Jesús jiín ñayuu jiín tée cáscuáha jiín ya:

<sup>2</sup> Tēe cástéén tutu ley Yaā Dios jiín tée grupo fariseo, cájeni ni de jeē ndiso jñíñu de jeē steén de ley jeē ni jéhe ya nuū Moisés.

<sup>3</sup> Núu súcuan te cuatáhú ró te squícu ró táca jéē cándacu de nuū ró. Te ma sáha ró nájnūhun cásaá máa de. Chi cácahān-ni de, te tu cásquícu de. <sup>4</sup> Chi suni cástéén de táca ley ni catava maá de jeē yí sáha, te cátee de siquí ñayuu, te tu cácunde yí i squícu i. Te máa de jijnáhan de, chi ni ĩn xiní ndáha de tu cáscánda de jeē squícu de. <sup>5</sup> Te máni siquí jee na cuájnūhún ñayuu de cúu ndíhi jeē casáha de. Chi cánujnahan ni de cuhni de cuēhe jñuhun tutu ĩ jneē de jiín ndaha de. Te suni cáscáni ga de yuhvá yusáhma de jeē steén jeē cácujeñhu na de vēsú inga ñayuu. <sup>6</sup> Te cánujnahan ni de cucōo de nuū silla yíñuhún gá nuū cáyeji ñayuu vico, jiín silla yíñuhún gá ĩni vehe ĩ sinagoga. <sup>7</sup> Te suni cánujnahan ni de jeē cahán yíñuhún ñayuu jiín de nuū calle, jiín jéē cahán i maestro jiín de.

<sup>8</sup> Te máa ró jijnáhan ró, ma cuáha ró jñuhun jeē cahán ñayuu maestro jiín ró. Chi ĩnuú cácuu ndíhi ró jéē cácuu ró hermano, te iyó ĩn-ni Maestro ró jeē cúu ruhú, Cristo. <sup>9</sup> Te ma chíñuhún ró ni ĩn tēe ñayví yáha jeē cahán ró padre jiín de. Chi iyó ĩn-ni Tátá ró jijnáhan ró, Yaā ndeé andiví. <sup>10</sup> Te suni ma cuáha ró jñuhun jeē cahán i jítoho jiín ró. Chi iyó ĩn-ni Jítoho ró, te suu cúu ruhú, Cristo. <sup>11</sup> Te tēe méñhu ró jijnáhan ró jeē jejníñu nuū jnánhan, suu de cúu jeē cujeñhu ga. <sup>12</sup> Chi tēe jeē sajeñhu de máa de, sa ndululí de. Te tēe jeē sálulí de máa de, sa ndujéñhu de.

<sup>13</sup> Nacā xeēn ndoho róhó tée cástéén tutu ley jiín róhó tée fariseo, chi tēe stáhú-ni cácuu ró. Chi cájesi ró jeē quiví ñayuu ndaha Yaā andiví jéē ndacu ya jñíñu nuū i. Chi tu quívicoo máa ró, ni tu cájēhe ro jñuhun quívicoo ñayuu nducú quiví.

<sup>14</sup> Nacā xeēn ndoho róhó tée cástéén tutu ley jiín róhó tée fariseo, chi tēe stáhú-ni cácuu ró. Chi cáquende ró vehe ñahan ní caquendōo ndáhú. Yūcuán na te cájicān tahú nahán ró náváha caní ni ñayuu jeē tú na cuēchi ró. Jeē yúcuan xeēn gá ndoho ró castigo.

<sup>15</sup> Nacā xeēn ndoho róhó tée cástéén tutu ley jiín róhó tée fariseo, chí tēe stáhú-ni

cácuu ró. Chi ní ñuhun íchi jiín ní mar cájica cuu ró cánducú ró ĩn ñayuu scandíje ró sáhān maá ró. Te núu ni candíje i, te cásaá ró jéē vihyá gá cúu cuēchi i jeē quihín i infierno vēsú maá ró.

<sup>16</sup> Nacā xeēn ndoho ró, chi cácuu ró nájnūhun tée cuáá jéē steén ichi nuū ñayuu. Chi cácahān ró: Núu ndé téē jéjnūhun téyí de, te núu cahán de jeē Yaā Dios jeē ndeé ĩni templo na cuáha ya castigo núu ma squícu de, yūcuán na te tu cánuú squícu de. Te núu cahán de jeē Yaā Dios jeē chíí oro jeē iyó ĩni templo, na cuáha ya castigo núu ma squícu de, yūcuán na te cánuú squícu nahín de, cácahān ró. <sup>17</sup> Tēe cánéé téē cuáá cácuu ró jéē castíví ró jñuhun cácahān ró. ¿Ndeé ĩn cúu jeē cujeñhu ga, á oro un chí Yaā Dios jeē ndeé ĩni templo jeē sáhíi oro un? <sup>18</sup> Te suni cácahān ró: Núu ndé téē jéjnūhun téyí de, te núu cahán de jeē Yaā Dios jeē chíí altar na cuáha ya castigo núu ma squícu de, yūcuán na te tu cánuú squícu de. Te núu cahán de jeē Yaā Dios jeē chíí ndajñíñu jeē cásocō nuū altar, na cuáha ya castigo núu ma squícu de, yūcuán na te cánuú squícu nahín de, cácahān ró. <sup>19</sup> Tēe cánéé téē cuáá cácuu ró jéē castíví ró jñuhun cácahān ró. ¿Ndeé ĩn cúu jeē cujeñhu ga, á ndajñíñu yúcu nuū altar, chí Yaā Dios jeē sáhíi yá ndajñíñu ún? <sup>20</sup> Núu súcuan te tēe jéjnūhun téyí, te núu ndácunehen de Yaā Dios jeē chíí altar, núu súcuan te nde jiín ndajñíñu yúcu nuū altar ndácunehen de. <sup>21</sup> Te tēe jeē jéjnūhun téyí, te núu ndácunehen de templo, núu súcuan te nde jiín Yaā Dios jeē ndeé ĩni templo ndácunehen de. <sup>22</sup> Te tēe jéjnūhun téyí, te núu ndácunehen de andiví, núu súcuan te suni ndácunehen de mesa Yaā Dios te nde jiín máa Yaā Dios jeē ndeé núu mesa un.

<sup>23</sup> Nacā xeēn ndoho róhó téē cástéén tutu ley jiín róhó téē fariseo, chi tēe stáhú-ni cácuu ró. Chi cásaá ró úxí úxí nuhni tamínú jiín yucú anís jiín yucú comino, te cásocō ró ĩn ĩn siquí táca úxí un núu Yaā Dios. Te cástóo ró jñuhun cánuú ndasí gá nuū ley, suu jeē cáca ndaá ró, jiín jéē cundáhú ni ró jnánhan ró, jiín jéē candíje ró. Táca jéē yáha cánuú sáha ró nútí, te suni ma stóo ró jéē socó ró táca yúcu ún. <sup>24</sup> Cácuu ró nájnūhun tēe cuáá jéē steén ichi nuū ñayuu. Chi cásquícu ró ĩn jeē lulí gá un, te cástóo ró jéē cánuú gá. Te suu cúu nájnūhun jeē cátava ró chūcūn ndíhi jeē ñuhun nuū ndúxi, te cácocó ró ĩn quiti cáhnu jeē naní camello.

<sup>25</sup> Nacā xeēn ndoho róhó téē cástéén tutu ley jiín róhó téē fariseo, chí tēe stáhú-ni cácuu ró. Chi nájnūhun jeē cáncate ró yátā vaso jiín yátā cohó. Te ichi ĩni ró chí ñuhun máni máa jñuhun cuihná jiín jñuhun ndíyo ni. <sup>26</sup> Tēe cuáá cácuu ró, fariseo. Xíhna gá sáha ró jéē coo ndoo ĩni anuá ró, te yūcuán na te suni

coo ndoo tāca jēē casáha ró jēē cájito ñayuu nuū.

<sup>27</sup> Nacá xeēn ndoho róhó tēe cástéén tutu ley jín róhó tēe fariseo, chí tēe stáhú-ni cácuu ró. Chí cándaa ró nájñuhun vehe ndiyi nuū panteón jēē cáyaa. Chí ichi yátá jito luo, te ichi ini ñuhun chítú yiqui ndiyi jín táca jēē tehyú. <sup>28</sup> Te súcuan cácuu máá ró, chí ichi yátá ró casáha ró jēē tēe ndaa cácuu ró nuū ñayuu. Te ichi ini ró ñuhun chítú jñuhun stáhú-ni jín jñuhun néé.

<sup>29</sup> Nacá xeēn ndoho róhó tēe cástéén tutu ley jín róhó tēe fariseo, chí tēe stáhú-ni cácuu ró. Chí casáha ró vehe siquí nuū yíndüji ndiyi jii ró, tēe ni canacani jñuhun Yaā Dios nde jenahán. Te casáha luo ró vehe siquí nuū yíndüji táca tēe ni iyo ndaa. <sup>30</sup> Te cácahán ró: Núu jēē suni yúcu yó tiempo jēē ní cotecu ndiyi jii yó, te ma squívi nduo yó jín de jēē cáhni yó tēe ni canacani jñuhun Yaā Dios, achí ró. <sup>31</sup> Te súcuan cácahán ndaa ró jēē máá ró cácuu yucūn ñayuu ni cajehni tēe ni canacani jñuhun ya. <sup>32</sup> Núu súcuan te táca cuéchi jēē ní casquejéé ndiyi jii ró, máni un casáha ga máá ró.

<sup>33</sup> Va sēhe coō cácuu ró, chí xeēn ró nájñuhun coō. ¿Ndesa cácu ró jēē ma jnahnú ndetū ró quingoo ró infierno? <sup>34</sup> Núu súcuan te táj rí táca tēe nacani jñuhun Yaā Dios nuū ró, jín táca tēe ndíchí jēē castéén jñuhun ya. Te sava de cahni ró, te sava de cata caa ró jicā cruz. Te sava ga de cani ró de ini táca vehe ii sinagoga, te scúnu ró de quingoo de táca núu. <sup>35</sup> Te súcuan te condee cuéchi siquí máá ró jēē ní cajehni jii ró táca tēe ndaa, xihna gā nde Abel tēe ndaa, te nde Zacarías sēhe Berequias, tēe ni cajehni de ini templo sava mehñu cuarto ii jín altar. <sup>36</sup> Jendaá cahán rí jín ró jēē táca cuéchi yáha condee siquí ñáyuu iyó vijna.

*Jēē cuculhyá ni yá jito ya ñuu Jerusalén  
(Lc. 13.34-35)*

<sup>37</sup> Róhó ñuu Jerusalén, jéhni ró tēe cánacani jñuhun Yaā Dios, te jéhe ro yúu xiní tēe táj Yaā Dios vejicoo nuū ró. Te cuehē jínu ni cuni rí nastútú rí sēhe ró, nájñuhun ndují jēē nastútú tí sēhe ti chíji ndijēn tī, te tu ní cúní ró. <sup>38</sup> Núu súcuan te vijna te stóo uun na rí rohó jín sēhe ró. <sup>39</sup> Chí cáhán rí jín ró jēē ndé vijna te ma cóto cuiti gā ró nuū rí, chí nde quiji quiví jēē cahán sēhe ró: Yōhō váha Yaā cúu Yaā véndiji jín jniñu máá Jítoho yó Yaā Dios, achí i. Achí yá.

*Jēē ní cachi yá jēē nāa templo  
(Mr. 13.1-2; Lc. 21.5-6)*

## 24

<sup>1</sup> Te ni quenda Jesús ini templo cáhnu cuahán yá. Te ni quecoo tēe cáscuáha jín yá, te ni cacahán de jín yá siquí táca vehe jēē

ndejnahan jēē cúu máá templo un. <sup>2</sup> Te ni cahán yá jín de:

Táca jēē cájito ró yáha, jendaá cahán rí jín ró jēē quiji quiví jēē ma cóso jnahan ga ni ñn yuū, chí ndihi jnanū. Achí yá.

*Na seña coo nuū cuácuyajni ndihi ñayiví  
(Mr. 13.3-23; Lc. 21.7-24; 17.22-24)*

<sup>3</sup> Te ni jehēn yá jín tēe cáscuáha jín yá nde yucu Olivos, te ni cucóo ya yūcuán. Te ni quecoo de nuū yá, te ni cacajñuhun sñn de ya:

Castūhun ní ndé quiví coo táca jēē ní cachi ní jēē coo. ¿Te na seña coo núu ni cuyajni quiví ndiji ní jín jēē jínu ñayiví? áchí de.

<sup>4</sup> Te ni cahán Jesús:

Coto ró jēē ma stahú ni ñn de róhó. <sup>5</sup> Chí quijicoo cuehē tēe jēē stahú jín sñví rí. Máá rí cúu Cristo, achí de. Te súcuan stáhú de cuehē ñayuu. <sup>6</sup> Te ñihñ ró jñuhun jēē táca lado iyó guerra, chí je yajni coo guerra. Te ma yūhu ró, chí cánuú coo súcuan. Te ni ná tu jínū quiví ndihi ñayiví. <sup>7</sup> Chí ndonda nación siquí inga nación, te ndonda ñuu siquí inga ñuu jēē cuajñahan. Te coo jnamá jín cuéhyi xeēn. Te cháha chúcuan jñaa. <sup>8</sup> Te táca jēē yáha cácuu jñúndóho quejéé xihna ñuhún gá.

<sup>9</sup> Yūcuán na te nastúu i róhó jñahan ró jēē stóho i róhó te cahni i róhó. Te ndihi ñayuu quiti ni i nuū ró jēē siquí ruhú. <sup>10</sup> Te quiví ún chí cuehē ñayuu candíje caca yátá i, te quiti ni i nuū jñahan i, te nastúu jñahan i. <sup>11</sup> Te canecoo cuehē tēe stáhú, te cahán de jēē jñuhun Yaā Dios cánacani de, te stáhú de cuehē ñayuu. <sup>12</sup> Te nducuehē jniñu néé, te jēē yúcuán cuehē i ma cóo maní gā i. <sup>13</sup> Te ñayuu cuiñi ñihñ jín jñuhun rí nde quiví jínu, ñayuu ún chí cácu. <sup>14</sup> Te jñuhun yáha siquí ndese ndácu Yaā Dios jniñu, cuité núu ní cáhnu ñayiví, náváha cuni ñayuu táca nación. Yūcuán na te jínū ñayiví.

<sup>15</sup> Te Daniel, tēe ni nacani jñuhun Yaā Dios, ni tee de jñuhun ñn tēe néé jēē quiji. Te róhó jēē cácahu tutu ún, na jécūhun ní ró. Chí ñn quiví te cuni ró jēē sáha ndevná de jēē stívi de táca ndajniñu ii ini templo, te cuiñi de ini lugar ii. <sup>16</sup> Te núu cuni ró jēē súcuan cúu, te ñayuu cáyūcú región Judea, na cúnu i caa i yucu quingoo i. <sup>17</sup> Te ñayuu cáyūcu núu quéhe, ma ndívi i ini vehe jēē quénehen i ndajniñu i, chí cánuú cunu yachí i náváha cácu i. <sup>18</sup> Te ñayuu cáhñn nuū itu, ma ndíji i vehe jēē quihñ i sahma i. <sup>19</sup> Te quiví ún nacá jēē ndahú ñahan cáñuhun sēhe jín ñahan cándeca yiquín, chí ma cúnihñ ña cunu yachí ña. <sup>20</sup> Te cacán tahú ró jēē ma quiji jñúndóho un jēē cunu ró máá tiempo cúun yuhvá ni quiví ndétátú. <sup>21</sup> Chí jēē quejéé un te coo cuehē jñúndóho xeēn, jēē ná tu coo súcuan nde quiví ní jecóo ñayiví te nde vijna. Te jēē ndíhi jñúndóho ún te ni ma cóo ga jēē súcuan. <sup>22</sup> Te núu tú nastiyi Yaā Dios tiempo



jnúndóho ún, te ni ìn ñayuu ma cácu cuiti i. Te jeē siqū ñáyuu cácadje jeē ní nacáji ya, jeē yúcuán nastíyi ya tiempo un.

<sup>23</sup> Núu súcuán te núu ìn ñayuu cahān jín rō: Yáhá condēhe rō ìne Cristo, chí: Yúcuán condēhe rō ìne ya, achi i, te ma candije rō jēe cahān i. <sup>24</sup> Chi canecoo tēe cástáhú jēe achi de jeē Cristo cúu de, chí achi de jeē tēe nácani jnúhun Yāa Dios cúu de. Te sáha de jniñu jēhnu jeē naa ni ñayuu coto i, návāha stáhú de nde maá ñáyuu ní nacáji ya, te núu na cúu. <sup>25</sup> Je ni castúhun rí nuū rō vijna nde ná tu coo. <sup>26</sup> Núu súcuán te núu cahān ñayuu jín rō: Cuácondēhe rō, chí nde nuū ñúhun tēhé ìne ya, achi i, te ma quihín rō condēhe rō. Chí núu cahān i: Nehen condēhe rō, chí ìni vehe yāha ìne ya, achi i, te ma candije rō jijnáhan rō. <sup>27</sup> Chí nájñúhun jeē ndíndēe sáha taja te cúndijin nde ichi núu cáne niāndii jín ndé ichi núu quee niāndii, suni súcuán coo quiví ndiji ruhū, Yāa ní nduu tēe, chí ndihi ñayuu coto. <sup>28</sup> Te nájñúhun jeē cutútú tēji ndé-ni cúu nuū catú quiti ní jíhi, suni súcuán coo táca jēe ní cahān rí ndé-ni cúu-ni nuū cáhiyo ñayuu.

*Ndese coo quiví ndiji Yāa ní nduu tēe*  
(Mr. 13.24-37; Lc. 21.25-33; 17.26-30, 34-36)

<sup>29</sup> Yúcuán na te núu ni ndihi táca jnúndóho quiví ún, te cojnúú niāndii, te yoó ma ndíi gā. Te ningoo quimí andiví. Te táca jēe ìn andiví chí quisí i. <sup>30</sup> Yúcuán na te coto ñayuu nuū maá rí, Yāa ní nduu tēe, ndiji ri ichi andiví. Te ndahyū ñayuu táca nación ní cáhnu ñayiví. Te coto i nuū ruhū, Yāa ní nduu tēe, ndiji ri jín vicó andiví, te condiso ri cuehē poder, te yóhoyo luu cujēhnu rí. <sup>31</sup> Te tají rí ndajéhé rí quingoo, te tiví ñihin ya trompeta. Te quinasútú yá ñayuu ní nacáji rí ndicúún lado ñayiví, nde ìn lado ñayiví jín ndé inga lado.

<sup>32</sup> Vijna te scuáha rō ndese sáha nundēhe higo: Núu je ní nane numa, te ní najee ndaha, te cájini rō jeē jé ní cuyajni tiempo jihní. <sup>33</sup> Te suni súcuán núu ní cajini rō jeē ní quejéé cúu táca jniñu jeē ní cahān rí, yúcuán na te na jécúhun ní rō jeē ní cuyajni quiví ndiji ri, te yachí coo. <sup>34</sup> Jendaá cahān rí jín rō jeē ma cúu ndihi ñayuu jee cóto jnúndóho ún, chí nde squicu ndihi jniñu ún. <sup>35</sup> Andiví jín ñayiví chí naa, te táca jnúhun cahān rí chí ma náa, chí ndihi squicu.

<sup>36</sup> Te quiví jín hora jeē ndiji ri, tú ni ìn ñayuu jini, ní máá ndajéhé cáhiyo andiví, ní máá rí, Sehe Yāa Dios. Chí máá ìn ní Tátá rí Yāa Dios cúu jeē jini.

<sup>37</sup> Chí nájñúhun ní cuu quiví ní ìyo Noé, suni súcuán coo quiví ndiji ruhū, Yāa ní nduu tēe. <sup>38</sup> Chí quiví ún, nde ná tu cuun saū xeén, te cáyeji i cájini i, cánandáha i, te cájehe i sehe síhi i jeē nándáha, nde ní jinú quiví

jeē ní quiví Noé ìni barco cáhnu jeē naní arca. <sup>39</sup> Te tu ní cácadje ñayuu jeē cuun saū xeén, te ní cuun, te ní ndaa ndute ní cajihí ndihi i. Te suni súcuán coo núu na ndiji ruhū, Yāa ní nduu tēe. <sup>40</sup> Te quiví ún cone uū tēe sájniñu nuū ítu. Te ìn de naquihin rí, te inga de ndōo. <sup>41</sup> Te coo uū ñahan jeē ndíco cáhnu, te ìn ña naquihin rí, te inga ña ndōo. Súcuán cuu jeē sava ñayuu naquihin rí te sava i quendōo, chí tu ní cácadje i.

<sup>42</sup> Núu súcuán te ndito na cóo ní rō, chí tu cájini rō na quiví ndiji jitoho rō. <sup>43</sup> Te na chúhun ní rō jeē cahān jnúhun yátá yáha: Tēe chí vehe, núu jeē jini de na hora quiji ñacuñhá, te condito de, te ma cuáha de jnúhun sácuiñhá ndajniñu vehe de núu. <sup>44</sup> Te rōhó jijnáhan rō, suni súcuán coo tūhva rō, chí máá hora jeē tú na vé cájini ní rō, te ndiji ruhū, Yāa ní nduu tēe.

*Jnúhun yátá siqū mozo*  
(Lc. 12.41-48)

<sup>45</sup> Núu súcuán te coo rō nájñúhun ìn mozo jeē ndito xiní te squicu váha. Te máá patrón ní jeni de mozo un jēe cóto i ñayuu vehe de, návāha scáji i máá hora. <sup>46</sup> Te yóhoyo ndetū mozo un jēe núu ní ndee patrón, te cuni de jeē súcuán squicu váha i. <sup>47</sup> Jendaá cahān rí jín rō jeē cani de mozo un jēe cóto i ndihi ndajniñu de. <sup>48</sup> Te núu mozo sáha neé cúu i, te jeni ní i jeē ma ndiji yachí patrón i, <sup>49</sup> te quejéé i cani i jnáhan mozo i, te caji i coho i jín tēe cánajini, <sup>50</sup> núu súcuán te ndee-ni patrón quiví jeē tu ndéti i jín hora jeē tú na vé jeni ní i. <sup>51</sup> Te stóho xeén de i, te squiví de i nuū cáhiñ tēe stáhú-ni. Te yúcuán ndahyū i te nacayihí yehu i jeē ndoho xeén i. Achí ya.

*Jnúhun yátá siqū uxí sūchi síhi*

## 25

<sup>1</sup> Te suhva cúu jeē ndácu Yāa andiví jniñu nuū ñáyuu: Cúu nájñúhun ìn vico nándáha. Te ní ìyo uxí sūchi síhi jeē ní caquihin i linterna cándaha i, te ní quendacoo i cuajnahān i ìn tēe nándáha. <sup>2</sup> Te uhñ i chí tu ndito xiní i, te uhñ i chí ndito xiní i. <sup>3</sup> Te sūchi tú ndito xiní, cándaha i linterna i, te tu cándaha i petróleo jeē náchuhun i. <sup>4</sup> Te sūchi ndito xiní, chí cándaha i botella petróleo jín linterna i. <sup>5</sup> Te níni cúcuéé quiji tēe nándáha ún, te ní quee máhná, te ní caquixí ndihi i. <sup>6</sup> Te nuū ní cuu sava ñuú, te ní cajini i jeē cácana jee: Je vēji tēe nándáha. Cuángoo quijnahan rō de jijnáhan rō, achí. <sup>7</sup> Yúcuán na te táca sūchi síhi un ní candonda i, te ní casátūhva i linterna i. <sup>8</sup> Te sūchi tú ndito xiní, ní cacahān i jín sūchi ndito xiní: Cuáha jecu petróleo nuū rí jijnáhan rō, chí cuandahvá linterna rí, achí i. <sup>9</sup> Te ní cacahān sūchí ndito xiní: Ma cúu, chí ma cánda jeē cúu máá rí jín máá rō. Váha ga quingoo rō núu cýyáhu, te cuaan rō jēe cúu máá rō. Achí i. <sup>10</sup> Te níni cuángoo i cuaan i, te

ni quee-ni tēe nandāha. Te sūchi cáhiyo tūhva un, ní quívicoo i jín de vico nándāha de. Te ni ndihyū yehyí. <sup>11</sup>Te ni cunúu, te ni quecoo uhūn gā sūchi sñhí un. Te ni cacahān i jín tēe nándāha: Nune ní yehyí na quívicoo ná, áchí i. <sup>12</sup>Te ni cahān maá de: ¿Nde nuū véjicoo ró? Chi tu jíní rī rohó, áchí de. Achí yá.

<sup>13</sup>Yūcuán na te ni cahān yā:

Núu súcuán te ndito coo ni rō, chi tu cájini ró na quiví na hora ndiji ruhū, Yāá ní nduu tēe. Achí yá.

*Jñuhun yátá síquī tēe ní jēhe núu xūhun núu táca mozo*

<sup>14</sup>Te suhva cúu jeē ndácu Yāá andiví jñiñu nuū ñáyu: Cúu nájñuhun ñn tēe jeē quihñ jicá de inga ñuu. Te nde ná tu quihñ de te ni cana de mozo de jñnāhan, te ní jēhe núu de xūhún de nuū i, jeē na sájñiñu i jín návāha nducuehē.

<sup>15</sup>Te nuū ñn i ni jēhe de uhūn mil xūhun cáa. Te nuū inga i ni jēhe de uū mil. Te nuū inga i ni jēhe de ñn mil. Súcuán ni jēhe de, chí jíní de nasaa canda ñn ñn i sájñiñu i jín. Yūcuán na te ni quihñ de ichi cuahān jicá de. <sup>16</sup>Te mozo jeē ní quihñ uhūn mil xūhún, ni sájñiñu de jín. Te ni nihñ de uhūn gā mil síquī. <sup>17</sup>Te mozo jeē ní quihñ uū mil xūhún, suni ni nihñ de uū gā mil síquī. <sup>18</sup>Te mozo jeē ní quihñ ñn mil xūhún, ni jehēn de ni jete de yaū, te ni chisáhi de xūhún patrón de.

<sup>19</sup>Te ni yāha cuehē tiempo, te ni ndee patrón mozo un jñnāhan. Te ni nandacān de cuenta nuū i. <sup>20</sup>Te ni quee mozo jeē ní quihñ uhūn mil xūhún un, te ni nacuāha de xūhún un núu patrón de jín uhūn gā mil jeē ni nihñ de síquī. Te ni cahān de: Ni jēhe ní uhūn mil nuū ná, te yāha íyó uhūn gā mil jeē ni nihñ na síquī. Achí de. <sup>21</sup>Te ni cahān patrón jín de: Íyó váha núu súcuán. Yōhvo váha mozo cúu ró jēé squicu váha ró. Chi váha ni squicu ró ñn jñiñu lúli-ni, te vijna te cuāha ri jñiñu jéhu ndacu ró. Te quiví ró núu cusñ ní rō jíní rī. Achí de. <sup>22</sup>Yūcuán na te ni quee mozo jeē ní quihñ uū mil xūhún un. Te ni cahān de: Ni jēhe ní uū mil nuū ná, te yāha íyó uū gā mil jeē ni nihñ na síquī. Achí de. <sup>23</sup>Te ni cahān patrón jín de: Íyó váha núu súcuán. Yōhvo váha mozo cúu ró jēé squicu váha ró. Chi váha ni squicu ró ñn jñiñu lúli-ni, te vijna te cuāha ri jñiñu jéhu ndacu ró. Te quiví ró núu cusñ ní rō jíní rī. Achí de. <sup>24</sup>Te ni quee mozo jeē ní quihñ ñn mil xūhún un, te ni cahān de jín patrón: Je jíní na nihñ jēé tēe xeñ cúu ní. Chi cuehē gā cuní ni vésú jeē cúu sáha mozo ni, te cuehē gā nándacān ní vésú jeē ní jēhe ní. <sup>25</sup>Te jeē yūcuán ní yūhu ná, te ni jehēn na ní chisáhi ná xūhun ní chíji ñuhun. Te yāhá na nácuaāha na xūhun ní. Achí de. <sup>26</sup>Te ni cahān patrón jín de: Mozo cuxí cúu ró te máni jñiñu neé sáha ró. Chi jéni ní rō jeē cuehē gā cuní rī vésú jeē cuu sáha

mozo rī, te cuehē gā nándacān rī vésú jeē ní jēhe rī. <sup>27</sup>Núu jeē ní chūne ró xūhun rī nuū banco nuú, te jeē ní ndee rī te naquihñ ri xūhun rī nde jín sēhe xūhun núu. Achí de jín i. <sup>28</sup>Te ni cahān de jín táca gā mozo de: Núu súcuán te quende rō mil xūhun jñiñ nuū i, te cuāha ro núu mozo névāha uxí mil. <sup>29</sup>Chi ñayuu jeē névāha, sa quiji ga nuū i, te coneváha cuehē i. Te ñayuu jeē tu névāha, sa cujiyo-ni vésú jecu jeē névāha i. <sup>30</sup>Te mozo yāha jéé tu sájñiñu váha, quenehen ró i na quihñ i nuū quéhe nuū neé. Te yūcuán ndáhyū i te nacayihí yuhu i jeē ndoho xeñ i. Achí patrón un.

*Siquí jeē cóo juicio táca nación*

<sup>31</sup>Te ni cahān gā yá:

Ín quiví te ndiji maá Yāá ní nduu tēe, te cuu ya Rey nuū ñáyu. Te táca ndajehé yā cuiñí ní xiin ya. Te cucōo ya mesa nuū ndácu ya jñiñu, te yōhvo luu cujéhu ya. <sup>32</sup>Te ndututú ñayuu táca nación nuū yá. Te sásñn ya i jñnāhan i, nájñuhun cúsn lanchi jín ndixuhú sáha tēe ndito ti. <sup>33</sup>Te ñayuu váha jeé cúu nájñuhun lanchi, chucú yá i lado váha ya. Te ñayuu neé jeé cúu nájñuhun ndixuhú, chucú yá i lado jecó yá. <sup>34</sup>Yūcuán na te cahān Rey jín ñayuu cáhiin lado váha ya: Nacá ndetú rō jeé ní sáha Tátá rī jín rī. Nehen quivicoo ró núu ndácu ró jñiñu. Chi nde quiví ní jecō ñayiví te je ni sátuhva ya nuū ndacu ró jñiñu. <sup>35</sup>Chi ní jñ rī sóco, te ni cajēhe ro jéé ní yeji rī. Ni jichí rī ndute, te ni cajēhe ro jéé ní jñi rī. Ni quiji ri nde ñuu jicá, te ni cajēhe núu ró vehe ni ndōo ri. <sup>36</sup>Ni cumaní sahma rī, te ni cajēhe ró. Ni cocuhú rī, te ni jecondēhe ró ruhú. Ni ine ri vecāa, te suni ni jecondēhe ró ruhú. Súcuán cahān yá jín ñáyu cáhiin lado váha ya. <sup>37</sup>Yūcuán na te cahān ñayuu váha un jín yá: ¿Na quiví ní cajito ná nihñ jéé jñ ní sóco, te ni cajēhe na jéé ní yeji ní, chí jéé jichí ní ndute, te ni cajēhe ná ní jñi ní? <sup>38</sup>¿Te na quiví ní cajito ná jéé ní quiji ní ndé ñuu jicá, te ni cajēhe núu ná vehe ni ndōo ní, chí jéé cumaní sahma ní, te ni cajēhe ná? <sup>39</sup>¿Te na quiví ní cajito ná jéé huhú ní, chí jéé ine ní vecāa, te ni jecondēhe ná nihñ? achí i. <sup>40</sup>Yūcuán na te cahān Rey jín i: Jendaá cahān rī jín rō jéé ná ní casáha ró súcuán jín ñn táca hermano rī jeé cácadíje, vésú ñayuu núu ga cúu i, te nuū maá rī ní casáha ró.

<sup>41</sup>Yūcuán na te suni cahān Rey jín ñayuu cáhiin lado jecó yá: ñayuu jñahnú ndetú cácuo ró. Cuijiyo quingoo ró núu ñuhún jeé cayú ní cáni, nuū íyó tūhva cone jexéén jín táca táchi jeé cájejñiñu nuū. <sup>42</sup>Chi ní jñ rī sóco, te tu ní cajēhe ro jéé cáji rī. Ni jichí rī ndute, te tu ní cajēhe ro jéé coho ri. <sup>43</sup>Ni quiji ri nde ñuu jicá, te tu ní cajēhe núu ró vehe ndōo ri. Ni cumaní sahma ri, te tu ní cajēhe ró. Ni cocuhú rī, ni ine ri vecāa, te tu

ni jécondéhe ró ruhū. Súcuan cahān yā jīn ñayuu cáhīn lado jecó yá. <sup>44</sup> Yūcuán na te cahān ñayuu un jīn yá: ¿Na quivī ní cajito na nihín jée jíi ní sóco, chí jée jíhí ní ndute, chí jée ní quiji ní ndé ñuu jicá, chí jée cúmani sahma ní, chí jée cuhú ní, chí jée íne ní vecā, te tu ní cájēhe na jée cúmani nuū ní? Achí i. <sup>45</sup> Yūcuán na te cahān yā jīn i: Jendaá cahán rī jīn ró, jeē tu ní casáha ró súcuan jīn ní ñn táca hermano rī jeē cácandje, vésú ñayuu núu ga cúu i. Núu súcuan te suni nuū maá rī cúu jeē tu ní casáha ró, achí yā. <sup>46</sup> Yūcuán na te quingoo ñayuu un nuū ndóho i ní cáni. Te ñayuu váha un quávicoo i nuū cótecu i ní cáni. Achí Jesús.

*Jeē ní casquínhan de jñuhun jeē jñii de Jesús*

(Mr. 14.1-2; Lc. 22.1-2; Jn. 11.45-53)

## 26

<sup>1</sup> Te nuū ní ndihí ní cahān Jesús táca jñuhun yáha, te ní cahān yā jīn tée cáscuáha jīn yá:

<sup>2</sup> Je cájini ró jeē uū na quivī te coo vico pascua. Te ruhū, Yaá ní nduu téē, nastúu i ruhū jeē cúu rī jicá cruz, achí yá.

<sup>3</sup> Yūcuán na te sutú cáscujéhu, jīn téē cástéén tutu ley, jīn táca téē jéhu jeē cándacu jñiñu nuū ñayuu hebreo, ní candutútú de ini patio vehe palacio maá sutú cujéhu ga jeē naní Caifás. <sup>4</sup> Te ní candajñuhun de ndese jñii de Jesús jīn jñuhun stáhú, te cahni de ya. <sup>5</sup> Te ní cacahān de:

Ma jñii yó de maá quivī vico, chí ndonda ñayuu siquī yó, achí de.

*Jñuhun ñahan jeē ní chuhun perfume xini yā*

(Mr. 14.3-9; Jn. 12.1-8)

<sup>6</sup> Te íne Jesús ñuu Betania vehe Simón, téē ní ndoho cuehyī stehyú. <sup>7</sup> Te ní quee ñn ñahan nuū yá, ndáhá ña ñn frasco yuū luu jeē ñuhun aceite perfume jeē yóhyo yahu ndéé. Te ní chuhun ña xini yá níni jée yéji yá staa. <sup>8</sup> Te ní cajito téē cáscuáha jīn yá, te ní caquiti ní de, te ní cacahān de:

¿Najehē cúu jeē náa saá-ni perfume jññā?

<sup>9</sup> Chí cuu xicó yahu yó núu, te cuāha yo xuhun núu ñayuu ndahú. Achí de.

<sup>10</sup> Te ní jini Jesús jñuhun cácahān de. Te ní cahān yā jīn de:

¿Naun casáha ró jée nácani uhū ní ñahan yáha? Chí ñn jñiñu váha cúu jeē ní sáha ña jīn rí. <sup>11</sup> Chí níni coyucú ñayuu ndahú jīn ró, te ruhū chí tuá condee rī jīn ró. <sup>12</sup> Chí jeē ní chuhun ña perfume yáha ruhū, suu cúu jeē ní sátuhva ña ruhū nde quivī quíndūji rí. <sup>13</sup> Jendaá cahán rī jīn ró jeē ní cáhnu ñayivī ndé-ni cúu nuū cuité jñuhun yáha jée jñáma rī ñayuu, suni nacani i jñuhun jeē ní sáha ñahan yáha, náváha cocuhun ní ñayuu ña, achí yá.

*Jeē ní nastúu Judas yā*

(Mr. 14.10-11; Lc. 22.3-6)

<sup>14</sup> Yūcuán na te ñn jeē ndihúxí uū téē cáscuáha ún, nání de Judas Iscariote, ní jehēn de nuū sutú cáscujéhu. <sup>15</sup> Te ní cahān de jīn:

¿Nasaa cuāha ní núu ná, te na nastúu ná de nuū ní? áhí de.

Te ní cajēhe ocó uxī xuhun plata nuū de.

<sup>16</sup> Yūcuán na te nde quivī un ní quejée de ndúcú de modo ndese nastúu de ya nuū sutú jijnáhan.

*Jeē ní jequín yā Cena yā*

(Mr. 14.12-25; Lc. 22.7-23; Jn. 13.21-30; 1 Co. 11.23-26)

<sup>17</sup> Te maá quivī jeē quejée vico jeē cáyeji ñayuu pan jeē tú na levadura yíhi, te ní quijicoo téē cáscuáha un núu Jesús. Te ní cacahān de jīn yá:

¿Ndé nuū cuní ní jée quísatuhva ná cuxíni ní vico pascua? áhí de.

<sup>18</sup> Te ní cahān yā:

Cuángoo nde ñuu, vehe téē jeē jé ní cacahān yó, te cahān ró jīn de: Achí maá Maestro jeē ní cuyajni quivī cuu yá. Te vijna te caji yā vico pascua ini vehe ní jīn téē cáscuáha jīn yá, achí ró. Achí yá.

<sup>19</sup> Te téē cáscuáha jīn yá, ní casáha de nájñuhun ní ndacu Jesús jñiñu nuū de, te ní casátuhva de jeē cuxíni ya vico pascua.

<sup>20</sup> Te jeē cuácuaa, te ní quee yā, te ní cucóo ya mesa jīn ndihúxí uū téē cáscuáha jīn yá.

<sup>21</sup> Te níni yéji yā jīn de te ní cahān yā:

Jendaá cahán rī jīn ró jeē ñn róhó nastúu ruhū vijna, achí yá.

<sup>22</sup> Te ní cacucuíhyá ndasí ní de. Te ná ñn ná ñn de ní cacajñuhun de ya:

¿A sáña cúu? áhí de.

<sup>23</sup> Te ní cahān yā:

Ñn róhó jée cáyeji cáhnu jīn rí ñn cohó, suu ró nastúu ruhū. <sup>24</sup> Te ruhū, Yaá ní nduu téē, jendaá cúu jeē quihín rī cuu rí, nájñuhun yósó jñuhun rí nuū tútu ñ. Te nacā xeēn ndoho téē nastúu ruhū. Váha ga núu tu ní cácu téē un núu, achí yá.

<sup>25</sup> Yūcuán na te ní cahān Judas, téē nastúu ya:

¿A sáña cúu, Maestro? achí de.

Te ní cahān yā jīn de:

Suu ró cúu, achí yá.

<sup>26</sup> Te níni jée cáyeji de jīn yá, te ní quihin ya pan, te ní nacuatáhú yá, te ní tahú cuéché yá, te ní jēhe ya nuū téē cáscuáha jīn yá. Te ní cahān yā:

Caji ró jijnáhan ró, chí yáha cúu yiqui cúñu rí, achí yá.

<sup>27</sup> Yūcuán na te ní quihin ya ñn copa ndūxi uva, te ní nacuatáhú yá, te ní jēhe ya nuū de. Te ní cahān yā:

Coho jijnáhan ró. <sup>28</sup> Chí yáha cúu níñí rí jeē cuáha rí jeē cúu contrato jeé, te cati jeē ndundoo cuéchi cuehē ñayuu, te coo jñuhun

cáhnú ni nuú cuéchi i. <sup>29</sup> Te cáhán rí jín rí jeé ndé vijna te ma cóho ga rí ndúxi ndehé uva yáhá, chí nde quiji quiví ndacu Tátá rí jniñu ní ñayiví, te saá te coho tucu rí jín rí jijnáhan ró. Achí yá.

*Jeé ní cachi yá jeé yúhu Pedro cahán de jeé jini de ya*

(Mr. 14.26-31; Lc. 22.31-34; Jn. 13.36-38)

<sup>30</sup> Te ni jita ya ñin yaa í jín de jijnáhan de. Te ni quenda ya cuahán yá jín de nde yucu Olivos. <sup>31</sup> Yúcuán na te ni cahán yá:

Ndivii ró nayúhu ró jeé siquí ruhú jecuaá vijna. Chí suhva je yósó jnúhun rí nuú tútu í, ni cahán Yaá Dios: Cuáha rí jnúhun jeé cáhni ñayuu té ndito lanchi, te lanchi un cuité núu tí jeé yúhu tí, achí. <sup>32</sup> Te jeé nátecu rí, te xihna ruhú cosnúu rí quihín rí región Galilea, te saá te najinúcoo ró, achí yá.

<sup>33</sup> Yúcuán na te ni cahán Pedro:

Vésú ndihi de na náyúhú de, te máá ná chí ma náyúhú cuití ná, achí de jín yá.

<sup>34</sup> Te ni cahán yá jín de:

Jendaá cahán rí jín ró jeé jecuaá vijna, nde ná tu cana líhli, te yúhu ró jeé jniñayuu rohó, te uní jinu cahán ró jeé tu jini ró ruhú, achí yá.

<sup>35</sup> Te ni cahán Pedro jín yá:

Vésú núu cuu na jín ní, te ma cahán cuití na jeé tu jini na nihín, achí de.

Te suni súcuán ni cacahán ndihi té cásucuáha jín yá.

*Jeé ní jicán tahú yá nuú huerto Getsemaní*  
(Mr. 14.32-42; Lc. 22.39-46)

<sup>36</sup> Yúcuán na te ni jín Jesús jín té cásucuáha jín yá ñin lugar nuú naní Getsemaní. Te ni cahán yá jín de:

Yáhá-ni cucóo ró, te na quihín rí yúcuán cacán tahú rí, achí yá.

<sup>37</sup> Te ni jeca ya Pedro jín ndindúú séhe Zebedeo cuahán yá jín de. Te ni quejéé yá cucuíhyá ndasí ní yá te cúxí ní yá jeé quíji jnúndóho siquí yá. <sup>38</sup> Yúcuán na te ni cahán yá jín de:

Yóhó cucuíhyá ní rí, te ndúcu sáha jeé cúu rí. Yáhá condetu ró te condito ró jín rí.

<sup>39</sup> Te ni jica ya jecu ga, te ni jecuíñyítí yá ni jequin ya nuú yá nuú ñúhun, te ni jicán tahú yá suhva nuú Yaá Dios:

Tátá maá ná, núu cuu te tejiyo ní jnúndóho yáha jéé ma quíji siquí ná. Te nasúu jéé cuni maá ná, chí jeé cuni maá ní na cóo, achí yá.

<sup>40</sup> Yúcuán na te ni ndee yá nuú ndinúni té cásucuáha jín yá, te ni jito ya jeé cáquixí de. Te ni cahán yá jín Pedro:

¿A tu ní cánda ró condito ró jín rí vésú ñin hora? <sup>41</sup> Coó ndito ní ró te cacán tahú ró jeé chindéé ñáhan yá rohó jéé ma sáha ró cuéchi jeé coto ndee jeneé róhó. Chí cuní ndije ánuá ró squícu váha ró, te yíqui cúñu ró chí tu fuerza, achí yá.

<sup>42</sup> Te ni jehén tucu ya vuelta uú, te suhva ni jicán tahú yá:

Tátá maá ná, te núu ma cúu cujiyo jnúndóho yáha jeé ma ndóho ná, te na cóo jeé cuni maá ní núu súcuán, achí yá.

<sup>43</sup> Te ni ndee tucu ya nuú de, te ni jito ya jeé cáquixí tucu de, chí yóhó cájii de máhná. <sup>44</sup> Te ní stóo ya de, te cuahán tucu ya cuacacán tahú yá vuelta uní. Te suni jnúhun yúcuán ní cahán yá. <sup>45</sup> Yúcuán na te ni ndee tucu ya nuú de jijnáhan de, te ni cahán yá jín de:

Vijna te cusú ró te ndetátu ró. Te je ni quee hora, te ruhú, Yaá ní nduu téé, natúu rí te jniñ téé cáhóyo cuéchi ruhú. <sup>46</sup> Ndocuíñí jijnáhan ró, chí je véji téé nastúu ruhú, te quihín yó jín de, achí yá.

*Jeé ní cajni de Jesús*

(Mr. 14.43-50; Lc. 22.47-53; Jn. 18.2-11)

<sup>47</sup> Te sá cáhán gá yá súcuán, te ni quee-ni Judas, ñin jnáhan jeé uxí uú téé cásucuáha jín yá. Te véjicoo cuehé téé jín de, cándaha de espada jín yujnu. Chí sutú cáqujéhu jín táca téé jéhu cándacu jniñu nuú ñayuu hebreo, ni catají téé ún. <sup>48</sup> Te Judas, téé nastúu ya ún, je ni jéhe de ñin seña nuú téé un jijnáhan, chí ni achí de:

Téé jeé téchúhu rí un cúu. Te jniñ ró jijnáhan ró, achí de.

<sup>49</sup> Te ni quee-ni de nuú Jesús, te ni cahán de:

Ta ni cuaa, Maestro, achí de.

Te ni techúhú de ya. <sup>50</sup> Te ni cahán Jesús jín de:

Amigo, ¿na jniñu véji ró? achí yá.

Yúcuán na te ni jinúcoo táca gá téé ún, te ni cajni de Jesús.

<sup>51</sup> Te ñin téé jeé cáhín jín Jesús, ni tava de espada de, te ni jehnde de sóho ñin mozo maá sutú cujéhu ga. <sup>52</sup> Yúcuán na te ni cahán Jesús jín de:

Nachuváha espada ró, chí táca jéé cájejnáhan jín espada, suni jín espada cuu. <sup>53</sup> ¿Te á tu cájini ró jeé cuu cacán tahú rí nuú Tátá rí, te vijna ñúhún tají yá vihyá gá uxí uú mil ndajéhé andiví jeé jnama ruhú? <sup>54</sup> Te núu súcuán, ¿te ndese cuu squícu jnúhun cáhán tutu í jeé cánuu ndoho rí súcuán? achí yá.

<sup>55</sup> Yúcuán na te ni cahán yá jín ñayuu cuehé ún:

¿Te va téé cuihná cúu rí jeé véjicoo ró jín espada jín yujnu jeé jniñ ró ruhú jeé súcuán. Táca quiví ní cucóo rí jín ró jijnáhan ró ñin templo cáhnu, ni steén rí jnúhun, te tu ní cájni ró ruhú. <sup>56</sup> Te súcuán cásáha ró náváha na squícu jeé cáhán tutu í jeé ní cateé téé ni canacani jnúhun Yaá Dios, achí yá.

Yúcuán na te ndihi téé cásucuáha jín yá, ni castóo de ya, ni cajinu de cuango de.

*Jeē ní indichi Jesús nuū junta tēe cácujeñnu ga*  
(Mr. 14.53-65; Lc. 22.54-55, 63-71; Jn. 18.12-14, 19-24)

<sup>57</sup> Te tēe ni cajñi Jesús, cuangoo de jíin yá nuū Caifás, tēe cúu sutū cujéñnu ga. Te yūcuan cáñiin tūtú tēe cástéén tutu ley jíin táca tēe jéñnu cándacu jñiñu. <sup>58</sup> Te Pedro chí jíca-ni ndíquín de ya, te ni jinū de patio sutū cujéñnu ga. Te ni quívi de ini patio, te ni cucóo de jíin táca policía, návaha coto de ndese coo siquí yá.

<sup>59</sup> Te sutū cácujeñnu jíin táca tēe jéñnu jíin ndihi tēe cásaña junta cujéñnu ga, ni canducú de tēe cahān jñūhun yáá siquí Jesús, chí cahni de ya cácuni de. <sup>60</sup> Te vēsū ni quecoo cuehē ñayuu cácahān yaá, te tu ní cáñihñ de cuēchi siquí yá jeē cáñni de ya. Te jeē sándihí te ni quecoo uū testigo jeē cahān yaá siquí yá. <sup>61</sup> Te áchi:

Tēe yáha ní cahān de jeē cuu canu de templo Yaā Dios, te nuū uní-ni quívi te nucondichí sáha de, áchí.

<sup>62</sup> Yūcuán na te ni ndocuiñi maá sutū cujéñnu ga, te ni cahān de jíin yá:

¿Naun tu cáhān cuiñi rō? ¿A íyó ndáā jeē cácahān tēe yáha siquí rō? Áchí de.

<sup>63</sup> Te Jesús tu ní cáhān cuiñi yá. Te ni cahān maá sutū cujéñnu ga:

Ndácu ri jñiñu nuū rō jeē cahān ndaā rō cuni nahñn maá Yaā Dios, Yaā técu. Cachi cají te núu máá ró cúu Cristo, Sēhe Yaā Dios, achí de jíin yá.

<sup>64</sup> Te ni cahān yā:

Suu ri cúu, nájñūhun cáhān rō. Te na cástūhun rí nuū rō jijnáhan ró jéē táca quívi jeē quiñi te coto ró ruhū, Yaā ní nduu tēe, condee rí lado váha Yaā iyó poder. Te coto ró jéē ndíji ri ichi ándivi jíin vicó. Achí yá.

<sup>65</sup> Yūcuán na te sutū cujéñnu ga ni jehnde de sahna de jeē quití ndasí ni de, te ni cahān de:

Tēe yáha chí cáhān de jñūhun ndevāha jeē quití ni Yaā Dios, chí sáha de máá de Sēhe Yaā Dios. ¿Nde jíni ñūhún gá yō testigo núu súcuan? Chí je ni cajini rō jñūhun ndevāha cáhān de. <sup>66</sup> ¿Te ndese cájeni ni rō? Achí de.

Te ni cacahān tēe cuehē ún:

Cuēchi cúu jeē cahān de súcuan, te jíni ñūhún cuu de, áchí.

<sup>67</sup> Yūcuán na te ni catesihí de nuū yá, te ni cacani de ya. Te sava ga de ni cacatu de nuū yá. <sup>68</sup> Te ni cacahān de:

Te núu Cristo cúu ró, te cachi rō ndé ñn cúu jeē ní caní rōhó, áchí de.

*Jeē ní cachi Pedro jeē tu jíni de ya*  
(Mr. 14.66-72; Lc. 22.56-62; Jn. 18.15-18, 25-27)

<sup>69</sup> Te níni jéē súcuan cúu, te Pedro néne de nuū quēhe ini patio. Te ni quee ñn ñahan jéññiñu vehe ún, te ni cahān ña jíin de:

Róhó chí suni ni jica ró jíin Jesús tēe Galilea, achí ña.

<sup>70</sup> Te máá de tu ní cáchi de, chí ni cahān de ni cajini ndihi ñayuu:

Tu jíni rí na jñūhun cáhān rō, achí de.

<sup>71</sup> Te ní quenda de yéhyí núu quēhe, te ni jito inga ñahan nuū de. Te ni cahān ña jíin ñayuu cáñiin yūcuán:

Tēe yáha chí suni ni jica de jíin Jesús, tēe ñuu Nazaret, achí ña.

<sup>72</sup> Te inga jínu tu ní cáchi tucu de, chí sa ni cahān teyí de:

Tu jíni rí tēe ún, áchí de.

<sup>73</sup> Te ní cunúu jecu gā, te ñayuu cáñiin yūcuan ní quecoo i nuū Pedro, te ni cacahān i:

Jendaá ndije jeē suni jñáhan tēe un cúu ró, chí ndijin cahān rō jeē tēe Galilea cúu ró, áchí i.

<sup>74</sup> Yūcuán na te ní quejé de cáhān teyí de jeē na cóndee cuēchi siquí de núu tu cáhān ndaā de:

Tu jíni cuiñi rí tēe ún, áchí de.

Te ni cana-ni líhli. <sup>75</sup> Te ni nucūhun ni de jñūhun ni cahān Jesús jíin de: Nde ná tu cana líhli, te yūhu ró te cahān rō uní jínu jeē tu jíni ró ruhū. Te ní quenda de cuahān de, te yōhyo ni ndahyū de jeē ní cachi de jeē tu jíni de ya.

*Jeē cuángoo de jíin yá nuū Pilato*  
(Mr. 15.1; Lc. 23.1-2; Jn. 18.28-32)

## 27

<sup>1</sup> Yūcuán na te ní cundijin. Te táca sutū cácujeñnu jíin táca tēe jéñnu jeē cándacu jñiñu nuū ñayuu hebreo, ni casquijnáhan de jñūhun ndese sáha de jeē cuu Jesús. <sup>2</sup> Te ní cajihni de ya, te cuangoo de jíin yá nuū Poncio Pilato, tēe cúu gobernador.

*Jeē ni jíni Judas*

<sup>3</sup> Yūcuán na te Judas, tēe ní nastúu ya un, ní jito de jeē ní cunihñ siquí yá jeē cúu yá. Te ní jnahuhū ni de, te ní nacuāha de ocó uxí xūhun plata jeē ní ñihñ de nuū sutū cácujeñnu jíin núu táca tēe jéñnu. <sup>4</sup> Te ni cahān de jíin:

Cuēchi ní sáha ná jéē ní nastúu ná ñn tēe cuu de, te tú na cuēchi de.

Te máá sutū un ní cacahān de:

¿Vé jítu ní ruhū? Cuēchi máá ró cúu. Achí de.

<sup>5</sup> Te ní scāne Judas xūhún un ini templo. Te ní quenda de cuahān de, te ní scuēhne de máá de.

<sup>6</sup> Te sutū cácujeñnu ní canastútú de xūhún un, te ní cacahān de:

Ma cúu chuhun yó xūhún yáha ini yejnū nuū cáscō ñayuu, chí xūhun jéē ní jéconā jeē cúu ñn tēe cúu, áchí de.

<sup>7</sup> Yūcuán na te ní casándaā de jeē xūhun yūcuan cuaan de ñuhun jeē naní Lugar

Ñuhun Quíxin, návāha yūcuán quindūji ñayuu ñuu jicā. <sup>8</sup> Jeē yūcuan cūu jeē ndé vijnā nání ñuhun ún Lugar Ñuhun Niñí. <sup>9</sup> Te súcuan ni squícu jñuhun ni cahān Jeremías, tēe ni nacani jñuhun Yaā Dios nde jenahān: Ni caquihin de ndihóco uxí xūhun plata, te súcuan-ni cūu ñin yāhu jeē ní casáha ñayuu Israel cuenta jeē ndeé yā nuū i. <sup>10</sup> Te jíin xūhun un ní cajeen de ñuhun quíxin, nájñuhun ní ndacu maá Jítho yō Yaā Dios jniñu nuū rí. Achí Jeremías.

*Jeē ní indichi Jesús nuū Pilato*

(Mr. 15.2-5; Lc. 23.3-5; Jn. 18.33-38)

<sup>11</sup> Te nuū ní jinūcoo de jíin Jesús nuū gobernador, tēe cūu Pilato, te ní cajñuhún de ya: ¿A maá ró cūu Rey ñayuu hebreo? achí de. Te ni cahān Jesús:

Suu rí cūu, nájñuhun cáhān rō.

<sup>12</sup> Te sutū cácujeñhu jíin tēe jéñhu cándacu jniñu, ní cacahān de cuēchi siquí yā. Te tú na vé ní cáhān cuiti yā. <sup>13</sup> Yūcuán na te ní cahān Pilato jíin yā:

¿A tu jíini ró jēe cácahān de cuēhē cuēchi siquí rō? achí de.

<sup>14</sup> Te tu ní cáhān cuiti yā ní ñin jñuhun jíin de. Te nahān ní naa ní gobernador jeē tú na vé ní cáhān yā jíin de.

*Jeē ní cundaā jeē cūu yā*

(Mr. 15.6-20; Lc. 23.13-25; Jn. 18.38-19.16)

<sup>15</sup> Te íyó costumbre gobernador jeē quiví víco un siaá de ñin tēe ñe vecāa, núu na-ni tēe cácuni ñayuu. <sup>16</sup> Te suu quiví un íyó ñin tēe ñe vecāa, nání de Barrabás, te je ní jité núu jñuhun jeē ní sáha de cuēchi xeēn. <sup>17</sup> Te nuū ní candutútú ñayuu, te ní cahān Pilato jíin i:

¿Nde tēe cácuni rō jeē siaá rí vijnā: á Barrabás, chí Jesús jeē cūu Cristo, Yaā ní taji Yaā Dios? achí de.

<sup>18</sup> Súcuan ní cahān de chí cúní de siaá de Jesús. Chí je ní jecūhun ní de jeē ní cacucueésun ní táca sutū un cájito de ya, te jeē yūcuan ní quijicoo jíin yā nuū de.

<sup>19</sup> Te níni jēe néne Pilato silla nuū sándaā de jniñu, te ñasihí de ní taji ña jñuhun nuū de: Ma quiví nduu ró jíin ñayuu siquí tēe ndaā jíñā, chí yōhyo ní siūhu jéni ruhū cuni jeē siquí de, achí ña.

<sup>20</sup> Te sutū cácujeñhu jíin táca tēe jéñhu, ní cascáhān de ñayuu jeē na cácan i jeē siaá de Barrabás, te na cūu Jesús. <sup>21</sup> Yūcuán na te ní cajñuhún tucu gobernador:

Jeē uú de, ¿nde ñin de cácuni rō jeē siaá rí? achí de.

Te ní cacahān i:

Siaá ní Barrabás, achí i.

<sup>22</sup> Te ní cajñuhún Pilato:

Núu súcuan te ¿ndese cácuni rō jeē sáha rí jíin Jesús, tēe cūu Cristo? achí de.

Te ní cacahān ndihi i:

Cata caa ní de jicā cruz, na cūu de, achí i.

<sup>23</sup> Yūcuán na te ní cahān Pilato:

¿Na cuēchi ní sáha de núu súcuan? achí de.

Te ñayuu un ní cacana jee ndasí i:

Cata caa ní de jicā cruz, na cūu de, achí i.

<sup>24</sup> Te ní jini Pilato jeē tu cūndeyí de jíin ñáyuu, chí sa vihyá gā cácuvaā i. Te ní ndacu de jniñu jeē na quíj ndute, te ní nandahá de nuū ñayuu cuēhē ún. Te ní cahān de:

Jeē nándahá rí yāha cūu seña jeē tú na cuēchi condee siquí rí jeē cūu tēe vāha yāhá. Chí siquí maá ró jíināhan ró na cóndee. Achí de.

<sup>25</sup> Te ní cacahān ndihi ñayuu:

Suu siquí maá ná jíin siquí séhe ná na cóndee cuēchi jeē cūu de, achí i.

<sup>26</sup> Yūcuán na te ní siaá de Barrabás. Te ní ndacu de jniñu jeē na cáni táca soldado un Jesús, jíin jēe cáta caa de ya jicā cruz.

<sup>27</sup> Yūcuán na te soldado un cuango de jíin Jesús ñin palacio. Te ní cacana de ndihi jñāhan de ní candutútú núu yā. <sup>28</sup> Te ní caquenehen de sahma ya, te ní cachuhun de ya ñin sahma cuēhē jeē cūu sahma rey. <sup>29</sup> Te ní casáha de ñin corona ñnu, ní cachuhun de xiní yā. Te ní cachihí de ndaha váha ya ñin yujnu jeē nájñuhun bastón. Te ní casacatā de nuū yā, chí ní cajecuiñí yití de, casáha de jeē chíñtúhún de ya.

Nacā jeē váha rey cūu Rey ñayuu hebreo, achí de.

<sup>30</sup> Te ní catesihí de nuū yā. Te ní caquihin de yujnu jeē ní cachihí de ndaha ya, te ní cacani de xiní yā. <sup>31</sup> Te nuū ní cuu ní casacatā de nuū yā, te ní catava de sahma cuēhē un, te ní canachuhun de ya sahma maá yā. Te cuango de jíin yā jeē cata caa de ya jicā cruz.

*Jeē ní cacata caa de ya jicā cruz*

(Mr. 15.21-32; Lc. 23.26-43; Jn. 19.17-27)

<sup>32</sup> Te nuū ní quendacoo soldado un jíin yā, te ní canajñāhan de jíin ñin tēe ñuu Cirene, naní de Simón. Te ní catejñíhu de tēe un jēe cóndiso de cruz yā.

<sup>33</sup> Te ní jinūcoo de ñin lugar nuū naní Gólgota, jeē cuni cahān Lugar Yiquí Xíní. <sup>34</sup> Te ní cajehe de vino jeē ní sáca núu jíin ñin jeē uvuá jeē cóho ya. Te nuū ní jito ndee ya, te tu ní cúní yā coho ya.

<sup>35</sup> Te nuū ní cuu ní cacata caa de ya jicā cruz, te ní casáha de sorteo jeē siquí ndese nihín ñin ñin de sahma ya. Te súcuan ní squícu jñuhun ní tee tēe ní nacani jñuhun Yaā Dios jenahān: Ní casáha de sorteo siquí ndese nihín ñin ñin de sahma rí, achí yā, achí tutu.

<sup>36</sup> Yūcuán na te ní cacucōo de yūcuan jēe cóto de nde cuu yā. <sup>37</sup> Te ní catee de ñin jñuhun xiní cruz yā jeē cahān na siquí ní jíñi yā: Yāha cūu Jesús, Rey ñayuu hebreo, achí.

<sup>38</sup> Te suni ní cacata caa de uū tēe cuihná núu uū gā cruz, ñin de lado váha ya, te inga de lado jecó yā. <sup>39</sup> Te ñayuu cáyāha yūcuan cáscuicó i xiní i, te cácahān neé i:

40 Róhó chí cáhán rō jeē cánu rō templo cáhnu, te nuū uní quiví te nacani rō. Núu súcuan te jnama ró máá ró vijna. Te núu Sēhe Yaā Dios cúu ró, te nuu ró jicā cruz viī, achí i.

41 Te sutū cácujeñhu, jíin tēe cástéén tutu ley, jíin tēe grupo fariseo, jíin tēe jéñhu jíinánhan de, suni súcuan ní cacahān catá de, te áchí de cácahān maá de:

42 Núu inga ñayuu ní jnama de, ¿te naun tu cúu jnama de máá de vijna? Núu Rey ñayuu Israel cúu de, te na núu de jicā cruz, návāha candíje yó de. 43 Ní candíje de Yaā Dios, te na jnama ya de vijna te núu cundáhú ní yā de, chí ní cahān de jeē cúu de Sēhe ya. Achí de jíinánhan de.

44 Te tēe cuihná jeē cándita caa xiin ya, suni súcuan ní cacahān neé de.

### *Jeē ní jíihí Jesús*

*(Mr. 15.33-41; Lc. 23.44-49; Jn. 19.28-30)*

45 Te nuū ní cuu cahuxí uū, te ní cunee níi cáhnu nde cahuní. 46 Te nájnūhun cahuní, te ní cana jee Jesús:

Elí, Elí, ¿lama sabactani? achí yá. Te jñūhun un cúní cahān: Yaā Dios maá ná, Yaā Dios maá ná, ¿naun ní stóo ní sáña?

47 Te sava ñayuu cáhīin yūcuan ní cajini i jñūhun ún, te ní cacahān i:

Tēe yāha cána de xiní Elías, tēe ní nacani jñūhun Yaā Dios jenahán, achí i.

48 Te ní jinu-ni iin tēe, ní jequihin de iin cachí, te ní chundaji de nuū vinagre iyá. Te ní tee de xiní iin yujnu, te ní tee de yuhu ya jeē coho ya. 49 Te sava ga de ní cacahān:

Condetu ró, na cóndēhe yó núu quiji Elías jnama de chí tuú, achí de.

50 Te Jesús ní cana jee ya inga jínu, te ní jíihí-ni ya. 51 Te sahna ndita caa jeē ndihyú cuarto íi ini templo cáhnu, ní ndatá-ni sava sava nde xiní te nde nuū jehé. Te ní jnāa, te ní catahū sava toto. 52 Te ní cananune yaū nuū yíndūji ndīyi. Te cuehē ndīyi jeē ní cacandíje i Yaā Dios, ní canatecu i. 53 Te nuū ní natecu Jesús, te ní quendacoo i nuū yíndūji i. Te ní ndivícoo i ini ñuu íi Jerusalén, te cuehē ñayuu ní cajito nuū i.

54 Te ná ní jíihí Jesús, te tēe cúu capitán jíin tēe cáhīin jíin de jeē cándito de nde cuu yā, ní cajini de jeē ní jnāa, jíin táca gá jñiñu ní cuu. Te yóhoyo ní cayūhú de, te ní cacahān de:

Jendaá ndije jeē Séhe Yaā Dios cúu tēe yāha, achí de.

55 Te yūcuan cáhīin cuehē ñahan, cándēhe jíicá ña. Te suu ñahan un ní candiquín ña Jesús nde Galilea, vējicoo ña cájejniñu ña nuū yā. 56 Te uní ñahan un cácuo María ñuu Magdala, jíin María naná Jacobo jíin José, jíin naná ndíndúú séhe Zebedeo.

### *Jeē ní quíndūji Jesús*

*(Mr. 15.42-47; Lc. 23.50-56; Jn. 19.38-42)*

57 Te nuū ní ini quiví ún, te ní quee iin tēe cúcá, nání de José, te tēe ñuu Arimatea cúu de. Te suni tēe ní scuáha jíin Jesús cúu de.

58 Tēe un ní jehēn de nuū Pilato, te ní jicān de yiqui cúñu Jesús. Te ní ndacu Pilato jñiñu jeē na cuáha nuū de. 59 Te José ní quihin de yiqui cúñu yā, te ní chusúcún de iin sahma cuitá iyó ndoo. 60 Te névāha de iin yaū jeē ní caan jeē jíicá iin cava, nuū ná tu quíndūji ndīyi. Te yūcuan ní chíndūji de ya. Te ní jesi de iin yaū cáhnu yuhu yá un, te cuahān de. 61 Te María ñuu Magdala, jíin inga María, cáyūcú ña ichi núu nuū yíndūji ya.

### *Jeē ní cacondito soldado nuū yíndūji ya*

62 Te ní cuu táca jñiñu yāha máá quiví jeē casátūhva ñayuu jeē quiji quiví ndétátú. Yūcuán na te ní cundijin maá quiví ndétátú. Te sutū cácujeñhu jíin tēe grupo fariseo ní jengoo de nuū Pilato. 63 Te ní cacahān de:

Cánucūhun ní na jēe nde na tēcu tēe stáhú néé un te ní cahān de jeē nátecu de nuū uní quiví. 64 Núu súcuan te ndacu ní jñiñu na cóto vāha táca soldado yuhu yá un nde núu ní yāha uní quiví. Chí núu tuú te sanaa te quijicoo tēe ní cascuáha jíin de, te tava cuihná de ndīyi ún jecuáa, quingoo de jíin. Yūcuán na te cachi de nuū ñayuu jeē ní natecu tēe ún. Te cáhú gá cuu jñūhun stáhú yūcuan vēsú jee xíhna ñūhún. Achí de.

65 Te ní cahān Pilato:

Yāha cáhīyo soldado. Cuángoo jíin de, te sácutú vāha ró yuhu yá un, te coto vāha ró, núu ndese vāha ga cuu sáha ró. Achí de.

66 Te cuangoo de, te ní casácutú de yaū jeē ndihyú yuhu yá un yíndūji ya, te ní castiín níhin de. Te ní castóo de táca soldado un cándito.

### *Jeē ní natecu Jesús*

*(Mr. 16.1-8; Lc. 24.1-12; Jn. 20.1-10)*

## 28

1 Te ní yāha quiví ndétátú un, te ní cundi-jin quiví domingo. Te María ñuu Magdala jíin inga María un, ní jecondéhé ña nuū ní yíndūji Jesús. 2 Yūcuán na te iin sanaa-ni te ní jnāa níhin ndasí. Chí iin ndajéhé máá Jítoho yó Yaā Dios ní cuun ya ichi ándiví, ní quee ya nuū ní yíndūji Jesús. Te ní stáa ya yaū ndihyú yuhu yá un, te ní cucóo ya siqui. 3 Te ndíndēe nuū yā nájnūhun taja, te sahma ñūhun ya yaa quiyi nájnūhun yuhvā volcán. 4 Te soldado cándito yūcuan ní quisi i de jeē cáyūhú de cájito de ya. Te ní cacuu ndīyi de. 5 Te ní cahān ndajéhé jíin ndíndúú ñahan ún:

Ma yūhu ró, chí jíiní rí jeē vécondēhe ró Jesús, Yaā ní jíihí jíicá cruz. 6 Tuá yā yāhá, chí je ní natecu yā, nájnūhun ní cahān yā. Nehen condēhe ró nuū ní cachíndūji de ya. 7 Te yachí quingoo ró, te cachi ró nuū tēe cáscuáha jíin yá jeē ní natecu yā. Te xíhna gā maá yá jíinú Galilea, te sáa te najinūcoo de.

Te yūcuán coto de nuū yā. Achi rō na cūni de. Je ni castūhun rí nuū rō, achí ndajéhé.

<sup>8</sup> Te ni quendacoo ña nuū ní yindūji ya, te yachí cuangoo ña. Te cáyūhú ña, te suni yōhyo cácusī ni ña. Te ni cajinu ña cuacastūhún ña nuū tée cáscuáha jíin yá. <sup>9</sup> Te níni cuángoo ña, te ni quee-ni Jesús nuū ña, te ni cahān yā jíin ña. Te ni quecoo ña nde nuū yā, te ni canundee ña jehē yā, te ni cachiñúhún ña ya. <sup>10</sup> Te ni cahān yā jíin ña:

Ma yūhu ró jijnáhan ró. Cuángoo te castūhun ró nuū tācá hermano rī, téē ni cascuáha jíin rí, jeē na núngoo de nde Galilea, te yūcuán coto de nuū rī. Achí yá.

*Jnūhun ní cacahān soldado*

<sup>11</sup> Te níni cuángoo ña, te sava soldado jeē ní condito ún, cuánungoo de nde ñuu. Te ni cacastūhún de nuū sutū cácujeñhu tācá jniñu jeē ní cuu. <sup>12</sup> Te sutū cácujeñhu ni candutútú de nuū táca téē jéñhu cándacu jniñu, te ni casquijnáhan de jnūhun. Yūcuán na te ni cajéhe de cuehē xūhun núu soldado jijnáhan.

<sup>13</sup> Te ni cacahān de jíin:

Cahān rō jijnáhan ró jēē téē cáscuáha jíin de ni quijicoo jecuáa, te ni catava cuñha ndíyi un níni cáquixí rō, achi rō. <sup>14</sup> Te núu na cūni gobernador jnūhun yáha, te máá rí quiscahān rī de, návāha tú nihīn rō castigo jijnáhan ró. Achí de.

<sup>15</sup> Te soldado un ní caquihin de xūhún un, te ni cacachi de nájñūhun ni cacahān jíin de. Te nde vijna chí súcuan cácahān ñayuu hebreo nájñūhun ni cacahān soldado un.

*Jeē ní tejníñu ya de nacani de jnūhun*

(Mr. 16.14-18; Lc. 24.36-49; Jn. 20.19-23)

<sup>16</sup> Te ndihúxi ñin téē ni cascuáha un cuánungoo de nde Galilea, nde yucu nuū ní cachi Jesús jeē quíngoo de. <sup>17</sup> Te nuū ní cajito de nuū yā, te ni cachiñúhún de ya. Te sava de tu cácañdije vāha de jeē máá yá cúu. <sup>18</sup> Te ni quee ya nde nuū de, ni cahān yā jíin de:

Je ni jēhe Tátá rī ndihí poder nuū rī jeē ndácu rí jniñu andiví jíin ñáyiví. <sup>19</sup> Núu súcuan te cuángoo nuū ñáyuu tācá nación, te stéén rō jnūhun rí nuū i návāha na cándije i. Te scuándute ró i jeē ní cacandije i máá Tátá jíin Séhe jíin Espíritu Santo. <sup>20</sup> Te stéén rō nuū i jeē na cuátáhu i tācá jniñu ní ndacu rí nuū rō. Te cocuhun ni rō jeē máá rí íne rí jíin ró ní cáni nde quiví jíinu ñayiví. Achí yá. Te ni cuu. Amén.



## JNUHUN VAHA NI TEE SAN MARCOS

*Jñuhun Juan tēe scuándute*

(Mt. 3.1-12; Lc. 3.1-9, 15-17; Jn. 1.19-28)

<sup>1</sup> Yāha quejéé jñuhun vāha máá Jesucristo Sēhe Yāā Dios, jeē ní quiji ya jeē jnama ya yohó.

<sup>2</sup> Isaías, tēe ni nacani jñuhun Yāā Dios nde jenahán, súcuan ni tee de jñuhun Juan nuū tútu:

Tají rí tēe nacani jñuhun ri cosnúú de ichi núú rō,

návāha coo túhva ñayuu jeē jinú rō, achí Yāā Dios jín Cristo.

<sup>3</sup> Te tēe ún cana je de nde nuū ñuhun téhé: Sátuhva ró máá ró jijnáhan ró, chi quee máá Jítoho yō.

Te sáha ró jñiñu ndaā, chi vēji ya, achi de.

Achí Isaías. <sup>4</sup> Te Juan ni jinú de nde nuū ñuhun téhé, scuándute de ñayuu. Te cáhán de jín i jeē na nácani ni i jeē stóo i cuēchi i te cuandute i, návāha cone cáhnu ni Yāā Dios nuū cuēchi i. <sup>5</sup> Te táca ñayuu región Judea jín ñayuu ñuu Jerusalén, ni quiijicoo i nuū de. Te ni canacani ndaā i cuēchi i nuū Yāā Dios, te ni scuándute de i ini yūte Jordán.

<sup>6</sup> Te sahma ñuhun Juan cúu ixi camello, te núhni ñn cinturón ññ chíji de. Te jeē técu de cúu táca ndicuéhyí jín ndúxi yocó. <sup>7</sup> Te suhva ni nacani de jñuhun:

Quiji máá Yāā cujéhnu ndasí. Chi tú na vé jéhnu cuiú cúu ri nuū yā, ni jeē cuajñiñu ri nuū yā vēsú ñn jñiñu lúli gá nájñuhun jeē cuíta ndeyí ri ndají ri correa ndijēn yā. <sup>8</sup> Te ruhū chí jín ndute scuándute ri rohó jijnáhan ró, te Yāā ún chí nájñuhun jeē scuándute ya rohó cúu jeē cuáha ya Espíritu Santo condee ini anuá rō, achí Juan.

*Jeē ní jendute Jesús*

(Mt. 3.13-17; Lc. 3.21-22)

<sup>9</sup> Te ni cuu jecu quiví, te Jesús ni quenda ya ñuu Nazaret ndañú Galilea, te Juan ni scuándute de ya ini yūte Jordán. <sup>10</sup> Te ná ni quenda ya nuū ndúte, te ni jito ya jeē ní nune-ni andiví, te ni cuun Espíritu Santo ni quee xiní yā, te cáa nájñuhun ñn paloma. <sup>11</sup> Te ichi ándiví ní cahān ñn jñuhun:

Máá ró cúu Sēhe ri jeē maní ndasí rí jín, te yōhyo cúsi ní rí jín ró, achí.

*Jeē ní jito ndee jexeén Jesús*

(Mt. 4.1-11; Lc. 4.1-13)

<sup>12</sup> Yūcuán na te ná ni jinú Jesús nde nuū ñuhun téhé ní sáha Espíritu Santo. <sup>13</sup> Te uū xico quiví ní condee yā nuū ñuhun téhé un núú ñn quiú yúcu. Te ni jito ndee Satanás yā, chí cúní jeē sáha ya cuēchi. Te nuū ní cujiyo

Satanás cuahān, te ni quecoo ndajéhé Yāā Dios, ni cajejñiñu nuū yā.

*Jeē ní quejéé Jesús nácani ya jñuhun*

(Mt. 4.12-17; Lc. 4.14-15)

<sup>14</sup> Yūcuán na te ná ni cachune de Juan vecāa, te ni jinú Jesús región Galilea, nácani ya jñuhun vāha ndese ndácu Yāā Dios jñiñu. <sup>15</sup> Te ni cahān yā:

Je ni jinú quiví, te je ni cuyajni jeē ndácu Yāā Dios jñiñu nuū rō. Nacani ní rō jeē stóo ró cuēchi ró jijnáhan ró, te candije ró jñuhun jeē jnama ya rohó. Achí yā.

*Jeē ní cana ya cuñn tēe jñi chācá*

(Mt. 4.18-22; Lc. 5.1-11)

<sup>16</sup> Te jíca Jesús yumar Galilea cuahān yā. Te ni jito ya nuū Simón jín ñani de Andrés. Te tēe cájni chācá cácuu de, te cásinga de ñunu de ini mar. <sup>17</sup> Te ni cahān yā jín de:

Condiquín ruhū na quíhín yō, te nasáha ri rohó tée nihín cuēhē ñayuu candije ruhū, nájñuhun cánihín rō chācá, áchí yā.

<sup>18</sup> Yūcuán na te ni castóo-ni de ñunu de, te ni candiquín de ya.

<sup>19</sup> Te ni jica ya jecu gā, te ni jito ya nuū Jacobo jín ñani de Juan, sēhe Zebedeo, suni cáyúcu de ini barco de, cánachijní de ñunu de. <sup>20</sup> Te suni ni cana ya de jeē cóndiquín de ya. Te ni castóo-ni de tátá de Zebedeo ini barco un jín mozo de, te ni candiquín de ya cuango de.

*Jeē ní quenehen ya tachí ini ñn tēe*

(Lc. 4.31-37)

<sup>21</sup> Te ni jinú yā jín de ñuu Capernaum. Te quiví ndétātu ní quiví ya ini vehe ñi sinagoga, te ni steén yā jñuhun. <sup>22</sup> Te ni cana ni ñayuu ni cajini i jñuhun steén yā. Chi ni steén vāha ya nuū i, chí máá yá cúu jeē ndíso jñiñu siquí ndihí. Te tēe cástéén tutu ley Yāā Dios, tu súcuan cástéén de. <sup>23</sup> Te ini vehe ñi sinagoga ñuu un ñe ñn tēe jeē ñuhun tachí ini. Te ni cana cóhó de:

<sup>24</sup> ¿Naun vēji ní núú na jijnáhan ná, Jesús ñuu Nazaret? ¿A vēji ní jéé snáá ní sáña, chí naún? Je jín na ndé ñn cúu ní, chí Sēhe ñi Yāā Dios cúu ní. Achí de.

<sup>25</sup> Te Jesús ni cahān xeén yā jín táchí ún:

Casi yuhu ró te quenda ró ini de, achí yā.

<sup>26</sup> Te tachí ún xeén ní jehni yíhí téé ún. Te ni cana cóhó, te ni quenda ini de cuahān. <sup>27</sup> Te ndihí ñayuu ní cayúhú i, te cácajnñuhun jnánhan i:

¿Na vé cúu jeē yáha? ¿A ñn jñuhun jéé cúu jeē yáha? Chí tēe yáha cujéhnu de jeē ndácu de jñiñu nde nuū tachí te quéndacoo, áchí i.

<sup>28</sup> Te yachí ni jíté nūu jñuhun Jesús cuahān ní cáhnu región Galilea.

*Jeē ní nasávāha ya naná chíso Simón Pedro*

(Mt. 8.14-15; Lc. 4.38-39)

<sup>29</sup> Te ni quenda ya jíin de jíjnáhan de ini vehe íi sinagoga. Te Jesús ni jehên yâ jíin Jacobo jíin Juan nde vehe Simón jíin Andrés. <sup>30</sup> Te náná chíso Simón, catú ña yíhi quíji ña. Te ni cacastühun de nuu yâ jeê cühú ña. <sup>31</sup> Yücuán na te ni quindehe ya nuu catú ña, te ni jñi ya ndaha ña, te ni ndonehen ya ña. Te ni quenda-ni quíji ún ña, te ni sáha ña jeê ní cayejí de jíin yâ.

*Jeê ní nasávâha ya cuehê ñayuu*  
(Mt. 8.16-17; Lc. 4.40-41)

<sup>32</sup> Te ni queê niándii te ni cuaa. Te ni quecoo ñayuu jíin táca ñayuu cácuñú jíin jéê ñúhun tachí ini. <sup>33</sup> Te táca ñayuu ñuu un ní cacutútú i yehýí un. <sup>34</sup> Te ní nasávâha ya cuehê ñayuu cácuñú tjini nuu cuehyí, te ni quenehen ya cuehê tachí un cuángoo. Te tachí chí je cájini un yâ, te tu ní jéhe ya jñuhun jeê cástühun ndé ñin cúu ya.

*Jeê ní nacani ya jñuhun región Galilea*  
(Lc. 4.42-44)

<sup>35</sup> Te nehen ndasí ní ndonda ya, nde yínee gâ. Te ni quenda ya cuahân sún ya yatâ ñúu nuu tú ñayuu, te yücuan ní jicân tahú yâ. <sup>36</sup> Te Simón jíin téê cáhiin jíin de, ni jenanducú de ya. <sup>37</sup> Te ní cananihin de ya, te ní cacahân de jíin yâ:

Táca ñayuu cánanducú i nihín, áchí de.

<sup>38</sup> Te máá yâ ní cahân yâ:

Sa suhva na quíhin yô táca gâ ñuu íne yajni, návâha suni nacani ri jñuhun nuu i, chí jeê yücuan ní quee rí. Achí yâ.

<sup>39</sup> Te súcuan te ní jica cuu ya ní región Galilea, ní nacani ya jñuhun ini vehe íi sinagoga táca ñuu, te ní quenehen ya tachí ini ñayuu.

*Jeê ní nasávâha ya ñin téê ndóho cuehyí stehyú*

(Mt. 8.1-4; Lc. 5.12-16)

<sup>40</sup> Te ñin téê ndóho cuehyí stehyú, ní quee de ní jecuiñí yití de nuu yâ, te ní cahân de jíin yâ:

Jíni na jeê cuu sáha ní jéê nduvâha ná, te núu cúní ní, áchí de.

<sup>41</sup> Te Jesús ní cundáhu ní yâ de, te ní soó yâ ndaha ya síquí de, te ní cahân yâ:

Cúní rí. Te na nduvâha ró, áchí yâ.

<sup>42</sup> Te ná ní cahân yâ súcuan, te ní nduvâha-ni téê ndóho cuehyí stehyú un. <sup>43</sup> Yücuán na te nátají yâ de quinhun de, te ní cahân ñihin ya jíin de:

<sup>44</sup> Ma cáchi cuiti rō nuu ní ñin. Chí quisteén rō maá ró nuu sutú, te condahá ró jeê socó rō nuu Yáa Dios síquí jeê ndúndoo ró núu yâ, nájnühun ní ndacu Moisés jñiñu jenahán. Te súcuan te cuni ñayuu jeê ní nduvâha ró. Achí yâ.

<sup>45</sup> Te ní quenda de cuahân de, te ní quejéé de nácani de jñuhun nuu ndíhi ñayuu ndese ní nduvâha de. Te síquí yücuan tuá ní cúu

quíví Jesús táca ñuu, chí cúchitú ndasí ñayuu nuu yâ. Te ní jica ya yatâ táca ñuu nuu tú cúchitú ñayuu. Te táca lado ní quijicoo ñayuu nuu yâ.

*Jeê ní nasávâha ya ñin téê ndóho cuehyí ní jíin*  
(Mt. 9.1-8; Lc. 5.17-26)

## 2

<sup>1</sup> Te ní cuu jecu quíví, te ní quíví tucu Jesús ñuu Capernaum. Te ní cajini ñayuu jeê néne ya vehe. <sup>2</sup> Te ní cacutútú-ni cuehê ñayuu, te ní chitú vehe jeê ndé yehýí tuá núne. Te ní nacani ya jñuhun Yáa Dios nuu i. <sup>3</sup> Yücuán na te ní quecoo cuñin téê nuu yâ, cándiso de ñin téê ndóho cuehyí ní jíin. <sup>4</sup> Te tu ní cúu quívicoo de nuu yâ síquí jeê chitú ñayuu. Te ní cacoo de síquí véhe, te ní canune de ndaa nuu íin ya, te yaú un ní cascúun de téê cühú, cátu de nuu ñin camilla. <sup>5</sup> Te ní jini Jesús jeê cácañdíe de jeê cúu nasávâha ya téê cühú un. Te ní cahân yâ jíin téê cühú un:

Séhê, je íne cáhnu ní rí nuu táca cuéchi ró, áchí yâ.

<sup>6</sup> Te yücuan cáyúcú jecu téê cástéén tutu ley Yáa Dios, te téê un ní cajeni ní de síquí yâ: <sup>7</sup> ¿Naun cáhân téê yáha súcuan? Cáhân de jñuhun ndevâha jeê quítí ní Yáa Dios, chí nasúu Yáa Dios cúu de jeê cóne cáhnu ní de nuu cuéchi. <sup>8</sup> Te ní jini Jesús jeê súcuan cájini ní de, te ní cahân yâ jíin de:

¿Naun cájini ní rō jeê cahân ndevâha rí? <sup>9</sup> Jeê uú jñuhun yáha, ¿ndé ñin yí gá cáa? ¿A jéê cahân rí jíin téê cühú: Je íne cáhnu ní rí nuu táca cuéchi ró? ¿Chí yí gá jeê cahân rí: Ndocuiñí te naquihin ró camilla ró, te cacá ró, achí rí? <sup>10</sup> Te vijna te na stéén rí jeê maá rí, Yáa ní nduu téê, ndíso jñiñu rí ini ñayívi yáha jéê cóne cáhnu ní rí nuu cuéchi.

Yücuan na te ní cahân yâ jíin téê ní jíin ún:

<sup>11</sup> Cáhân rí jíin ró, ndocuiñí te naquihin ró camilla ró, te quinhun ró vehe ró, áchí yâ jíin de.

<sup>12</sup> Yücuán na te ní ndocuiñí-ni téê ún, te ní naquihin de camilla de, te ní quenda de cuahân de, jíto jínúu ndíhi ñayuu. Te ndívi i ní canaa ní i cájito i, te ní cacahân i jeê yóhyo vâha Yáa cúu Yáa Dios. Te áchí i:

Ná tu coto cuítí yô ní ñin jñiñu súcuan, áchí i.

*Jeê ní cana ya Leví*

(Mt. 9.9-13; Lc. 5.27-32)

<sup>13</sup> Te ní quenda tucu ya cuahân yâ nde yumar. Te táca ñayuu ní jñucóo i nuu yâ, te ní stéén yâ jñuhun nuu i. <sup>14</sup> Yücuán na te ní yáha ya cuahân yâ, te ní jito ya nuu Leví séhe Alfeo, néne de nuu cutútú xuhun renta. Te ní cahân yâ jíin de:

Conduquín ruhú na quíhin yô.

Te ní ndocuiñí de, te cuahân de jíin yâ.

<sup>15</sup> Yücuán na te ni jehēn yā ni yeji yā staā vehe de. Te cuehē tēe cástútú xúhun renta jíin inga tēe cásaáa cuēchi, suni cáyūcú de cáyeji de staā jíin Jesús jíin tēe cáscuáa jíin yá, chí iyó cuēhē de jeē cándiquin de ya. <sup>16</sup> Te tēe cástēen tutu ley Yaā Dios jíin tēe grupo fariseo, ni cajito de jeē yeji yā staā jíin ndihi táca tēe ún. Te ni cacahān de jíin tēe cáscuáa jíin yá:

¿Naun yeji maestro rō jíin tēe cástútú xúhun renta jíin inga tēe cásaáa cuēchi? áchi de.

<sup>17</sup> Te ni jini Jesús, te ni cahān yā jíin de:

Ñayuu cáhiyo váha, tu jini nūhún i tēe tájána, chí ñayuu cácuñū cūu jeē jini nūhún. Te ruhū nasūu jēe véji ri cana ri ñayuu tú cuēchi, jeē cūu i nájñūhun ñayuu cáhiyo váha. Chí sa suhva véji ri cana ri ñayuu cáhiyo cuēchi, jeē na nácani ni i te stóo i cuēchi i. Áchi yá.

*Jeē ní cacajñūhun de ya siquī jeē cóndite ní (Mt. 9.14-17; Lc. 5.33-39)*

<sup>18</sup> Te ni cuu ñin quivī jeē cáhiyo ndite ni tēe cáscuáa jíin Juan, jíin tēe cáscuáa jíin grupo fariseo. Te ni quecoo jecu tēe, ni cacahān de jíin Jesús:

Tēe cáscuáa jíin Juan jíin jēe cáscuáa jíin grupo fariseo, tijni jínu cáhiyo ndite ni de. Te tēe cáscuáa jíin máá ní, ¿naun tu cásaáa de sūcuan?

<sup>19</sup> Te ni cahān Jesús jíin de:

¿A cuu condite ni de níni jēe iyó rí jíin de? ¿A cuu condite ni ñayuu cáhiin vico nándāha, te núu níni néne tēe nándāha? Chí núu néne tēe nándāha, te ma cūu condite ni i. <sup>20</sup> Te quee quivī jeē cújiyo tēe nándāha, te quivī ún chí condite ni i.

<sup>21</sup> Te ni cahān yā uū jñūhun yátá siquī jeē tu quíjnāhan jñūhun jeē jēe steēn yā jíin táca jñūhun jenahán. Áchi yá:

Ni ñin tu náchuhun ñin pedazo sahma jēe núu ñin sahma túhú. Chí núu sūcuan te ndiyi pedazo jeē un, te tahndé gā jeē túhú un, te nducáñu ga nuū catáñde un. <sup>22</sup> Te suni tu cáchuhun vino jeē ini ñií túhú. Chí núu sūcuan te vino jeē un ndatá ñií ún, te naa vino jíin ñií. Jeē yúcuán cánuú jēe chúhun i vino jeē ini ñií jēe.

*Jeē ní cataxín de yoco trigo quivī ndétátú (Mt. 12.1-8; Lc. 6.1-5)*

<sup>23</sup> Te ñin quivī ndétātu ní yāha Jesús cuahān yā mēhñú nuū cáa trigo. Te tēe cáscuáa jíin yá, cájica de cuahān de, te ni quejé de cátaxín de yoco trigo cáyeji de. <sup>24</sup> Yücuán na te tēe grupo fariseo ni cacahān de jíin yá:

Condéhé. ¿Najehé casáha tēe cáscuáa jíin ró sūcuan? Chí áchi ley Moisés jeē ma cūu sáha yó ni ñin jniñu quivī ndétátú. Áchi de.

<sup>25</sup> Te ni cahān máá yá jíin de:

¿A tu ní cácahu cuiti rō tutu ndese ni sáha David, ñin quivī ní cumanī jeē cáji de, te ni jíi de sóco jíin tēe cáhiin jíin de? <sup>26</sup> Te ni quivī

de ini vehe Yaā Dios. Te Abiatar ni cuu sutú cujéñu ga. Te ni yeji de pan ñi jeē yosó ndijin nuū Yaā Dios. Te tú na ley jeē cáji ni ñin tēe, chí máá-ni sutú cuu caji. Te suni ni jēhe de ni cayeji tēe cáhiin jíin de. Te tú na cuēchi ní iyo siquī de. Áchi yá.

<sup>27</sup> Te suni ni cahān yā jíin de jíjnāhan de:

Tu ní jéconaa ñayuu jeē ndóho i nuū quivī ndétátú, chí ni jéconaa quivī un jēe ndétátú i. <sup>28</sup> Núu sūcuan te ruhū, Yaā ní nduu tēe, máá rí cūu jeē ndácu jniñu siquī ndese sáha ñayuu quivī ndétátú, áchi yá.

*Jeē ní nduváha tēe ni ichi ndaha (Mt. 12.9-14; Lc. 6.6-11)*

### 3

<sup>1</sup> Te ni quivī tucu Jesús ini vehe ñi sinagoga. Te yūcuan ñe ñin tēe ni ichi ñin ndaha de.

<sup>2</sup> Te tēe grupo fariseo cájito yuhu de ya núu nasávāha ya tēe un quivī ndétátú, návāha nihin de cuēchi siquī yá. <sup>3</sup> Yücuán na te ni cahān yā jíin tēe ni ichi ndaha ún:

Ndocuñi te condichi rō mēhñu yáha, áchi yá.

<sup>4</sup> Te ni cajñūhun yá de jíjnāhan de:

¿Ndese cáhán ley siquī quivī ndétátú? ¿A jēe sáha váha yó, chí sáha néé yó? ¿A jēe nasávāha yó ñayuu je yajni cuu, chí sáha yó jēe cūu i? áchi yá.

Te máá de tú na vé ni cacahān de. <sup>5</sup> Te ni quivī ni yá ni jito ya nuū de jíjnāhan de, te ni cuculhyá ni yá jeē nihni ni de. Te ni cahān yā jíin tēe ni ichi ndaha:

Scáa ndaha rō.

Te ni scaá de, te ni nduváha-ni ndaha de. <sup>6</sup> Yücuán na te ni quendacoo tēe grupo fariseo, te ni casquíjnāhan de jñūhun jíin tēe grupo Herodes siquī yá, ndese cahni de ya.

*Jeē ní quecoo cuehē ñayuu nuū yá yumar*

<sup>7</sup> Te Jesús cuahān yá nde yumar jíin tēe cáscuáa jíin yá. Te cuehē ñayuu región Galilea ni candiquin i ya. <sup>8</sup> Te suni ñayuu región Judea, jíin ñayuu ñuu Jerusalén, jíin ñayuu Idumea, jíin ñayuu ichi núu cáne niándii yūte Jordán, jíin ñayuu región Tiro jíin Sidón, cuehē ndasí ñayuu ni cajini jñūhun i jniñu jéñu ni sáha ya, te ni quecoo i nuū yá.

<sup>9</sup> Te ni cahān yá jíin tēe cáscuáa jíin yá jeē na cóo túhva ñin barco quivī ya, návāha ma chítú nihin ñayuu cuehē ún xiin ya. <sup>10</sup> Chí cuehē ñayuu je ni nasávāha ya, te jeē yúcuán vējicoo cuehē gā ñayuu cándoho táca núu cuehyí, te chítú nihin i xiin ya jeē quehé i ya cácuni i. <sup>11</sup> Te ñayuu cáñuhun tachī ini, núu ni cajito nuū yá, te cájecuñi yití núu yá, te cácana cóho:

Máá ní cūu Sēhe Yaā Dios, áchi.

<sup>12</sup> Te ni ndacu nihin ya nuū tachī un jēe ma cáhán gā jeē cūu ya Sēhe Yaā Dios.

*Jeē ní nacāji ya uxī uū tēe apóstol (Mt. 10.1-4; Lc. 6.12-16)*

<sup>13</sup> Yūcuán na te ni caa ya cuahān yā ñn yucu. Te ni cana ya tāca tēe jeē cuni maá yá caca jíin yá, te ni quecoo de nuū yā. <sup>14</sup> Te ni jeni ya uxī uū de jeē cuñi de jíin yá, te tají yá de quingoo de nacani de jñuhun. <sup>15</sup> Te ni sáha ya jeē cóndiso jñífu de nasávaha de ñayuu cuhú te quenehen de tachí ini ñayuu. <sup>16</sup> Te yáha cúu ndihúxi uū tēe jeē ní nacáji ya: Simón jeē ní nasnání yá de Pedro. <sup>17</sup> Te Jacobo jíin ñani de Juan, sēhe Zebedeo. Te ni nasnání yá ndíndúu de Boanerges, jeē cuni cahān: Tēe yíhi fuerza nacani jñuhun, nájñuhun yíhi fuerza taja. <sup>18</sup> Te sava ga de nání de Andrés, Felipe, Bartolomé, Mateo, Tomás, Jacobo sēhe Alfeo, Tadeo, Simón tēe grupo cananista, <sup>19</sup> jíin Judas Iscariote, tēe jeē ní nastúu de ya.

*Jeē ní cacahān ñayuu jeē jejniñu ya fuerza Satanás*

(Mt. 12.22-32; Lc. 11.14-23; 12.10)

Yūcuán na te ni quívi ya ñn vehe jíin tēe cáscuáha jíin yá un. <sup>20</sup> Te ni ndutútu tucu cuehē ñayuu, te ni tuá ní cúu caji yā staá jíin de. <sup>21</sup> Te tāca jnánhan vehe ya ni cajini jñuhun jeē súcuan cúu. Te ni quecoo de venūquihin de ya. Chi cacahān de jeē ní sana xiní yá.

<sup>22</sup> Te suni tēe cástéen tutu ley Yaá Dios jeē ní quijicoo nde ñuu Jerusalén, ni cacahān de:

Tēe yáha ñuhun Satanás ini de, jeē cujéhu nuū tachí. Te jíin fuerza un quénehen de tachí, achí de.

<sup>23</sup> Te ni cana ya de jíjnánhan de, te ni cahān yā ñn jñuhun yátá jíin de:

¿Ndese cuu quenehen Satanás maá? <sup>24</sup> Chi núu ñn nación sásñn máa te cuajnáhan máa, nación un máa cúu ga coyūcu cáhnu. <sup>25</sup> Te núu ñayuu ñn vehe sásñn máa te cuajnáhan máa, ñayuu un máa cúu ga coyūcu cáhnu. <sup>26</sup> Te suni súcuan Satanás jíin jnánhan tachí, chi núu sásñn máa te cuajnáhan máa, núu súcuan te ma cóo ga, chi sa suhva naa.

<sup>27</sup> Te ni ñn tēe ma cúu quívi de ini vehe tēe ndacuí jeē quenehen de ndajniñu de. Chi cánuú jeē xíhna gá cuhni de tēe ndacuí ún. Te suni súcuan cúu jeē jíhni rí Satanás te quénehen rí tachí.

<sup>28</sup> Te jendaá cahān rí jíin ró jeē iyó modo coo jñuhun cáhnu ni nuū tāca cuéchi cásaaha ñayuu, te suni nuū tāca jñuhun néé cacahān i. <sup>29</sup> Te núu cahān ndeváha i síquí Espíritu Santo, te ma cóne cáhnu ni Yaá Dios nuū i, chi sa suhva condee cuéchi síquí i níf cáni, achí yá.

<sup>30</sup> Súcuan ni cahān yā, chi ni cacahān i jeē quénehen ya tachí jíin fuerza Satanás.

*Náná yā jíin ñani yā*

(Mt. 12.46-50; Lc. 8.19-21)

<sup>31</sup> Yūcuán na te ni quee naná yā jíin táca ñani yā. Te íin ña nuū quéhe, te ni tají ña jñuhun cuahān nuū yā jeē cána ña ya. <sup>32</sup> Te ñayuu cáyūcu níf xiin ya, ni cacahān i jíin yá:

Náná ni jíin táca ñani ni cáhñn nuū quéhe, te cácuni cahān jíin ní, achí i.

<sup>33</sup> Te ni cahān maá yá:

¿Ndé ñn cúu náná rí jíin ñani rí? achí yá.

<sup>34</sup> Yūcuán na te ni ndacoto ya nuū ñayuu cáyūcu xiin ya ún, te ni cahān yā:

Suni náná rí jíin ñani rí cácuu tāca ñayuu yáha. <sup>35</sup> Chi táca ñayuu casquicu jñífu cúní Yaá Dios, suu cácuu ñani rí, cuáha rí, náná rí, achí yá.

*Jñuhun yátá síquí tēe jéte trigo*  
(Mt. 13.1-9; Lc. 8.4-8)

#### 4

<sup>1</sup> Te yumar ni quejéé tucu Jesús steén yā jñuhun. Te ni cutútu cuehē ndasí ñayuu nuū yā, te jeē yúcuan ní quívi ya ni cucóo ya ini ñn barco nuū mar. Te tāca ñayuu un cáyūcú i yumar. <sup>2</sup> Te jíin jñuhun yátá ní steén yā cuehē jñuhun nuū i, te súcuan ni cahān yā:

<sup>3</sup> Cuni nahín jíjnánhan ró: ñn tēe cate trigo, ni quenda de jeē cáte de. <sup>4</sup> Te ná ni quejéé de jéte de, te jecu trigo ni jité yuhíchi. Te ni quecoo saa, ni cayeji tí. <sup>5</sup> Te jecu gā trigo ni jité nuū ñuhun yuú, nuú tū cuehē ñuhun. Te yachí-ni ní cane, chi tu cóquun ñuhun. <sup>6</sup> Te nuú ní cane niándii, te ni ichí-ni, te ni casun, chi tu ní níhñn nuū quihín yoho. <sup>7</sup> Te jecu gā trigo ni jité nuū náne íñu. Te ni jehnu íñu ún, te ni jesi nuú, te tu ní jéhe nuní. <sup>8</sup> Te jecu ni jité nuú ñuhun váha. Te ni cane, te ni jehnu, te ni jéhe cuehē nuní. Sava ni jéhe ocó uxí jeē ñn ñn nuní, te sava ga ní jéhe uní xico, te sava ga ní jéhe ciento. Achí yá.

<sup>9</sup> Yūcuán na te ni cahān yā jíin de:

Tāca róhó jéé jíni sóho, na chúsohó ró. Achí yá.

*Najehē cahān yā máni jñuhun yátá*  
(Mt. 13.10-17; Lc. 8.9-10)

<sup>10</sup> Yūcuán na te ni quendóo máa na yā, jíin ndihúxi uū tēe cáscuáha jíin yá, jíin jecu gā ñayuu cáhñn jíin de. Te ni cacajñuhun de ya na vé cuni cahān jñuhun yátá un. <sup>11</sup> Te ni cahān yā jíin de:

Róhó, chi sáha Yaá Dios jeē cájecūhun ni ró jñuhun ni yisáhi yáha, ndese quívicoo ñayuu ndaha ya ndacu ya jniñu nuū i. Te ñayuu jeē cáhñn sán síquí, chi máni jíin jñuhun yátá cahān rí tāca jñuhun jíin i. <sup>12</sup> Súcuan cahān rí návaha vésú cájito i, te quendóo i nájñuhun jeé tú na vé ní cájito i. Te vésú cájini sóho i, te ma jécūhun ni i, te ma násama ini i quívicoo i nuú rí, te ma cóo jñuhun cáhnu ni nuú cuéchi i, achí yá.

*Jeē ní castūhun cáji yá jñuhun yátá tēe jéte trigo*

(Mt. 13.18-23; Lc. 8.11-15)

<sup>13</sup> Te ni cahān gā yā jíin de jíjnánhan de:

Núu tu cájecūhun ni ró jñuhun yátá yáha, ¿te ndese jecūhun ni ró tāca gá jñuhun yátá núu súcuan? <sup>14</sup> Tēe jéte trigo cúu tēe scuíté

nú jnūhun Yaā Dios. <sup>15</sup> Te trigo jeē ni jítē yuhíchi cúu nájñūhun ánuá sava ñayuu. Chi cájini nahín i jñūhun ya, te ná ni cajini i, te quíji-ni Satanás te quénde-ni jñūhun ini anuá i. <sup>16</sup> Te trigo jeē ni jítē nuū ñūhun yuū, chi cúu nájñūhun ánuá sava ñayuu cájini nahín jñūhun, te yachí-ni cájetáhú i te cácusíi ni i jín. <sup>17</sup> Te tu cúcutú jñūhun ún ini anuá i, te jecu-ni quiví cájetáhú i. Te núu ni quejéé jnúndóho, chí jító xeēn ñayuu i síquí jñūhun ún, te quejéé nácani yátá ni i. <sup>18</sup> Te jeē ni jítē nuū náne íñu cúu nájñūhun jecu gā ñayuu. Chi vesú ni cajini sóho i, <sup>19</sup> te cándihví ni i síquí jeē iyó ini ñayivi yáha. Te cácuti i cucúcá i, te stáhú un i jeē cutóó ni i síquí táca ndajñíñu. Te ndihi jeē yáha cácujnéñu i jín, te jési nuū jñūhun ya, te tu íje i jín jñūhun ya. <sup>20</sup> Te trigo jeē ni jítē nuū ñūhun váha cúu nájñūhun ñayuu cájini nahín jñūhun, te cájetáhú i, te cáhije i jín jñūhun ya. Te sava i cúu nájñūhun nuní jeē jéhe ocó uxí jeē ñin ñin, te sava i jéhe uní xico, te sava ga i jéhe ciento. Achí yá.

*Jñūhun yátá síquí lámpara  
(Lc. 8.16-18)*

<sup>21</sup> Suni ni cahān yā jín de:

Núu nástñin ñayuu ñin lámpara, ¿a chúne i chíji ñin cajón chí chíji jító? Tuú, chí jéni i nuū sucún návāha cundijin. <sup>22</sup> Te suni súcuan, tu iyó ni ñin jñūhun sáhi jéé ma cúni ñayuu, chí ndihi táca jñūhun natúu ndijin te cuni ñayuu. <sup>23</sup> Táca róho jéé jini sóho, na chúsóhó ró, achí yá.

<sup>24</sup> Te suni ni cahān yā jín i:

Cuni sóho váha ró. Chi cūhva jeē chusóhó ró jñūhun Yaā Dios, suni cūhva un cuáha ya nuū ró, te víhyá gā cuáha ya nuū máá ró jeē chusóhó váha ró. <sup>25</sup> Chí ñayuu je jécūhun ni, stéén gā yā nuū i. Te ñayuu tu cándije, máá jecu jeē jini i ún, sa suhva naa. Achí yá.

*Jñūhun yátá síquí trigo jeē jéhu*

<sup>26</sup> Te ni cahān gā yā:

Súcuan cúu jeē ndácu Yaā Dios jniñu nuū ñayuu: Cúu nájñūhun trigo jeē ní jete ñin tē. <sup>27</sup> Yúcuán na te quíxi de te ndóna de, te súcuan jica quiví cuahēn. Te trigo un cáne te jéhu. Te máá de tu jín de ndese cúu jeē jéhu. <sup>28</sup> Chí máá ñūhun sáha jeē jéhu trigo, xihna gā yucú, sáá te cáne yoco, yúcuán na te íje máá núní. <sup>29</sup> Te núu ni cuan trigo un, te quejéé ñayuu cájehnde i, chí je ni jinū quiví tahndé. Achí yá.

*Jñūhun yátá síquí ndiquin mostaza  
(Mt. 13.31-32; Lc. 13.18-19)*

<sup>30</sup> Te suni ni cahān yā:

Na cahān rí ñin jñūhun yátá návāha cuni ró ndese ndúcuehē ñayuu jeē ndácu Yaā Dios jniñu nuū. <sup>31</sup> Ndúcuehē i nájñūhun jéhu ñin ndiquin mostaza jeē jéquin i nuū ñūhun. Te yúcuan cúu ñin ndiquin lúlí gā vesú táca

ndiquin jeē iyó. <sup>32</sup> Te ná ni jequin i, te cáne te jéhu ga vesú táca gá yucú, te cúnáhu ndaha. Te táca saa chí sáha tí tacā tí nuū cuándahú xiní ún. Achí yá.

*Jeē máni jñūhun yátá cáhān yā jín i  
(Mt. 13.34-35)*

<sup>33</sup> Te cuehē jñūhun yátá súcuan ni cahān yā jín ñáyuu, núu nasaa cánda i jecūhun ni i. <sup>34</sup> Te táca jéé ni stéén yā, máni máá jñūhun yátá ni cahān yā jín i. Te nuū tēe cáscuáha jín yá chí ni nacastūhun cáji yá jñūhun ún.

*Jeē ní jecuiñí tachí ñihin jín mar ni sáha ya  
(Mt. 8.23-27; Lc. 8.22-25)*

<sup>35</sup> Te jeē cuácuaa quiví ún, te ni cahān yā jín tēe cáscuáha jín yá:

Na yáha yó quíñin yó inga lado mar, achí yá.

<sup>36</sup> Te ni casquéndóo de ñayuu cuehē ún, te ni quívicoo de ini barco nuū je íne Jesús, cuangoo de jín yá. Te suni cuangoo jecu gā barco jín de jínáhan de. <sup>37</sup> Te ni jequñi ñin tachí ñihin, te ni stóna ndute mar, te ni quiví ini barco. Te je yajni chitú ndute ini barco. <sup>38</sup> Te Jesús cátu yá yátá de ini barco, quíxi yá te yíhi ñin sahma cástíhi xiní yá. Te ni castóna de ya, te ni cacahān de:

Maestro, ¿á tu sáha ní cuenta jeē quee yó chíji ndute te cuu yó? achí de.

<sup>39</sup> Te ni ndocuiñí yá, te ni cahān yā nuū tachí ñihin un jín nuū mar:

Jecuiñí te nayúu-ni coo ró, achí yá.

Te ni jecuiñí tachí, te ni cuu nayúu í-ni.

<sup>40</sup> Te ni cahān yā jín de jínáhan de:

¿Naun cáyūhú ndasi ró? ¿Naun tu cácan dije ró jéé cácu ró sáha rí?

<sup>41</sup> Te yóho ni cayúhú de, te ni cacahān de jín jnáhan de:

¿Ndé ñin ga cúu tēe yáha jéé nde tachí ñihin jín mar cájetáhú jéé cahān de? achí de.

*Tēe Gadara jeē ndóho tachí  
(Mt. 8.28-34; Lc. 8.26-39)*

## 5

<sup>1</sup> Te ni jinū Jesús jín de jínáhan de inga lado mar, región Gadara. <sup>2</sup> Te ná ni quenda ya ini barco un, te ñin tēe ñūhun tachí ini, ni quenda de nde nuū yándūji ndíyi, te ni quee de nuū yá. <sup>3</sup> Tēe un ndéé de nuū yándūji ndíyi. Te tu jéñinū jeē jínhi ñayuu de, ni jín cadena. <sup>4</sup> Chí cuehē jínu ni conuhní jehé de ndaha de jín cadena. Te táca jínu jéhn de, te sácuechi de. Te tú ni ñin cúndeyí jín de. <sup>5</sup> Te nduú ñuú jica de yucu jín nuū yándūji ndíyi, te cána cóhó de, te stújí de máá de jín yúu. <sup>6</sup> Te náa jicá gá vėjí Jesús, te ni jito de ya. Te jínu de ni quee de nuū yá, te ni jecuiñí yití de nuū yá. <sup>7</sup> Te ni cana cóhó de:

¿Naun vėjí ní nuū ná, Jesús Sēhe Yaā Dios, Yaā cujéhu téy? Cáhān ndahú ná jín ní, jini nahín Yaā Dios, ma stóho ní sáña, achí de.

<sup>8</sup> Súcuan ni cahān de, chí je ni cahān Jesús:

Táchĩ, quenda ini tēe yáha quíhĩn rō.

<sup>9</sup> Te ni cajñuhun yá de:

¿Na vé naní ró?

Te ni cahān de:

Legión naní ná, chi cuehē tachĩ ñuhun ini ná, áchĩ de.

<sup>10</sup> Te ni cahān ndahú ndasí de jíin yá jeé ma tájĩ yá tachĩ quendacoo región ún. <sup>11</sup> Te yajni yucu yúcuan cáhĩin cuehē quinĩ cájitu tí. <sup>12</sup> Te tachĩ jeé ñuhun ini tēe un ní cacahān ndahú jíin yá:

Núu tajĩ ní sañá, te cuāha ní jñuhun quívicoo ná ini quinĩ yūcuán, áchĩ.

<sup>13</sup> Te Jesús ni jēhe ya jñuhun. Te ni quendacoo tachĩ ún ini tēe ún, te ni quívicoo ini quinĩ, te iyó nájñuhun uū mil tí. Te quinĩ un ní cajinu tí ni ningoo tí ñin yucáva, ní quívicoo tí nuū mar. Te ni ndaquihĩ tí ndute, ní cajihĩ tí.

<sup>14</sup> Te tēe cándito tí, ní cajinu de cuangoo de jeé ní cayūhú de. Te ní jinūcoo de ní castūhún de nuū ñayuu ñuu un jíin ñayuu táca rancho. Te cuangoo ñayuu un cuácondēhé i na vé ní cuu. <sup>15</sup> Te ní jinūcoo i nuū íne Jesús, te ní cajito i nuū tēe ní ñuhun cuehē tachĩ ini. Te néne de, te ñuhun de sahma, te je ní nducájĩ xínĩ de. Te ní cayūhú ñayuu ún. <sup>16</sup> Te tēe ní cajito, ní canacani de jñuhun nuū ñayuu, ndese ní nduvāha tēe ní ñuhun tachĩ ini, jíin ndese ní candoho quinĩ ún. <sup>17</sup> Yūcuán na te ní caquejéé i cácahān ndahú i jíin yá jeé na cújiyo ya región yūcuan quíhĩn yá.

<sup>18</sup> Te ní ndivi ya ini barco. Te tēe ní ñuhun tachĩ ini un ní cahān ndahú de jíin yá jeé na cuāha ya jñuhun quíhĩn de jíin yá. <sup>19</sup> Te Jesús tu ní jēhe ya jñuhun, chí ní cahān yá jíin de:

Cuánuhun vehe ró nuū jñahan ró, te nacani ró jñuhun nuū i ndese yōhoyo jéhnu jniñu ní sáha máa Jítoho ró jíin ró, te ndese ní cundáhú ní yá rohó, áchĩ yá.

<sup>20</sup> Te ní quenda de cuahān de, te ní quejéé de nácani de jñuhun táca ñuu Decápolis ndese yōhoyo jéhnu jniñu ní sáha Jesús jíin de. Te ndivii ñayuu un ní canaa ní i cájini nahĩn i.

*Jñuhun sēhe síhĩ Jairo jíin ñahan ní quehē yusáhma ya*

(Mt. 9.18-26; Lc. 8.40-56)

<sup>21</sup> Te ní nayāha tucu Jesús cuanuhun yá inga lado mar jíin barco. Te ní quecoo cuehē ñayuu nuū yá, nuū íne ya yumar. <sup>22</sup> Te ní quee ñin tēe cújéhnu ini vehe ñi sinagoga, naní de Jairo. Te ná ní jito de nuū yá, te ní jecuiñĩ yití de nuū jehé yá. <sup>23</sup> Te ní cahān ndahú ndasí de jíin yá:

Sēhe síhĩ ná je yajni cuu i. Na quíhĩn yō vehe ná te soó ní ndaha ní síquĩ i návāha na ndúvāha i te cotecu i, áchĩ de.

<sup>24</sup> Yūcuán na te cuahān yá jíin de. Te cuehē ñayuu cándiquĩn i ya, te ní chitú ñihĩn i xiin ya cuangoo i. <sup>25</sup> Te mēhñu ñayuu un cuahān ñin ñahan cúhú, jeé ní cuu uxĩ uū cuiyá ndóho

ñā cuehyĩ niñĩ. <sup>26</sup> Te yōhoyo ní ndoho ñā, chí ní jexin ñā táca jéé névāha ñā jíin cuehē tēe tájñá, te tu ní jéjñĩnu jeé ndúvāha ñā, chí sa suhva vilyá gā sáha. <sup>27</sup> Te ñahan yáha ná ní nihĩn ñā jñuhun Jesús, te ní quee ñā ichi yátá yá mēhñu ñayuu cuehē ún, te ní quehē ñā yusáhma ya. <sup>28</sup> Chí ní jeni ní ñā: Vēsú maá sahma ya na nihĩn rĩ quehē rĩ, te nduvāha rĩ, jéni ní ñā. <sup>29</sup> Te ní jecuiñĩ-ni niñĩ ñā, te ní jini ñā jeé ní nduvāha ñā cuehyĩ ún. <sup>30</sup> Te Jesús ní jini yá jeé ní nduvāha ñin ñayuu jíin fuerza yá. Te ní ndió cóto ya nuū ñayuu cuehē, te ní cahān yá:

¿Ndé ñin ní quehē sahma rĩ? Achĩ yá.

<sup>31</sup> Te tēe cáscuāha jíin yá, ní cacahān de:

Jito ní jéé ñayuu cuehē yāha ní chitú ñihĩn i xiin ní te cáquihĩ i ñihĩn níf cáni ichi, te cájñuhun ní ndé ñin ní quehē sahma ní.

<sup>32</sup> Te máa yá jito ya cháha chúcuan, cúni yá jeé na cáchi ñayuu ní sáha. <sup>33</sup> Te ñahan un yúhú ñā te quisĩ i ñā, te je jíin ñā jeé ní nduvāha ñā. Te ní quee ñā, te ní jecuiñĩ yití ñā nuū yá, te ní cachi ñā ndihĩ ndese ní cuu jíin ñā. <sup>34</sup> Te ní cahān yá jíin ñā:

Séhē, ní candíje ró jéé cuu nasávāha rĩ rohó, te jeé yúcuan ní nduvāha ró. Cuahān te na ndúsñ ní rō, chí je ní nduvāha ró cuehyĩ ní ndoho ró, áchĩ yá.

<sup>35</sup> Te níni cáhān gā yá súcuan, te ní quecoo ñayuu cáyūcú vehe tēe cújéhnu ini vehe ñi sinagoga, te ní cacahān i jíin de:

Je ní jihĩ sēhe síhĩ ní. Te ma sajneñu ga ní Maestro, achĩ i.

<sup>36</sup> Te Jesús tu ní sáha ya cuenta jeé súcuan cácahān i, te ní cahān yá jíin tēe cújéhnu ini vehe ñi sinagoga:

Ma yūhu ró, chí candíje ró jéé nastécu rĩ i, áchĩ yá.

<sup>37</sup> Te tu ní jēhe ga yá jñuhun condiquĩn ñayuu yá, te máa-ni Pedro jíin Jacobo, jíin Juan ñani Jacobo. <sup>38</sup> Te ní jinū yá vehe tēe cújéhnu ini vehe ñi sinagoga, te ní jito ya ñayuu, cácuvaā i, te cándahyū i, te cácana cóhó i. <sup>39</sup> Te ní quívi ya, te ní cahān yá:

¿Najehē yōhoyo cásvāā ró te cándahyū ró? Súchi síhĩ yáha, tu ní jihĩ i, chí quixĩ-ni i, áchĩ yá.

<sup>40</sup> Te ní cajecū catá i jeé ní cahān yá. Te ní quenehen ndihĩ ya i cuahān i nuū quehé. Te ní cana ya máa-ni tátá jíin náná súchi síhĩ un, jíin tēe cáhĩin jíin yá, te ní quívi ya jíin de nuū catú súchi síhĩ ní jihĩ ún. <sup>41</sup> Te ní jñuñ ya ndaha i, te ní cahān yá jíin i:

Talita cumi, achĩ yá. Te jñuhun un cúni cahān: Síhĩ, cáhān rĩ jíin ró, ndocuiñĩ, achĩ yá.

<sup>42</sup> Te ní ndocuiñĩ-ni súchi síhĩ un, te ní nacaca i, chí je iyó i uxĩ uū cuiyá. Te yōhoyo ní canaa ní ñayuu cájito i. <sup>43</sup> Te ní ndacu ñihĩn ya jniñu nuū i jñánhan i jeé ma cáchi cuiti i nuū ní ñin. Te ní cahān yá jeé na cuāha ñā jeé cáji súchi síhĩ.

*Jeē cuánuhun yā ñuu Nazaret  
(Mt. 13.53-58; Lc. 4.16-30)*

## 6

<sup>1</sup> Te ni quenda Jesús yūcuán, te cuanuhun yā ñuu yā. Te tēe cáscuáha jíin yá cuangoo de jíin yá. <sup>2</sup> Te máa quíiví ndétātu ní steén yā jñuhun ini vehe ií sinagoga. Te cuehē ñayuu ni canaa ni i cájini nahín i, te ni cacahān i:

¿Ndé nuū ní cutúhva tēe yáha tāca jñuhun yáha? ¿Te ndese cúu jeē cahán de jñuhun ndíchí yáha jíin jéé sáha de jñiñu jéhnu yáha?

<sup>3</sup> Chí tēe yáha cúu carpintero, te sēhe María cúu de, te ñani Jacobo jíin José jíin Judas jíin Simón cúu de. Te suni cáyūcu cuáha de jíin yó yáhá. Achí i.

Te súcan ni cacujéé ni i nuū Jesús. <sup>4</sup> Te ni cahān yā jíin i:

Tāca tēe nácani jñuhun Yaā Dios, iyó yíñúhún ñayuu jíin de, chí máni ñayuu ñuu maá de, jíin jñáhan de, jíin ñáyuu vehe de cúu jeé tu iyó yíñúhún jíin de. Achí yá.

<sup>5</sup> Te tu ní cúu sáha ya cuehē jñiñu jéhnu yūcuán. Chí jecu-ni ñayuu cácuñu ní soó yá ndaha ya síquí i, te ni nasávaha ya i. <sup>6</sup> Te náa ni yá jito ya jeé tu cácanđje ñayuu jíinánhan i. Yūcuán na te ni jica cuu ya tācá ñuu yajni, ni steén yā jñuhun.

*Jeé ní tají yá ndihúxí uū de cuanacani de jñuhun*

*(Mt. 10.5-15; Lc. 9.1-6)*

<sup>7</sup> Te ni cana ya ndihúxí uū tēe cáscuáha jíin yá, te ni tají yá ndihuū ndihuū de quingoo de. Te ni sáha ya jeé cándiso jñiñu de quenehen de tachí ini ñayuu. <sup>8</sup> Te ni ndacu ya jeé tú na vé condiso de jeé cuajníñu de ichi, ni ñunu, ni staā, ni xúhún. Chí máa vara-ni condahá de. <sup>9</sup> Te quihí de ndijēn, te ma quihín de jíin úu sahama, achí yá. <sup>10</sup> Te suni ni cahān yā jíin de:

Na-ni vehe núu ni quívicoo ró, te yūcuán coyūcu ró ndé quenda tucu ró quihín rō inga ñuu. <sup>11</sup> Te núu ñin ñuu tu cájetáhú i róhó, ni tu cúní i cuni nahín i jñuhun cahān rō, na quéndacoo ró yūcuán, te scóyo ró tícachā jehē rō, te súcan steén rō jeé iyó cuéchi i jeé tu ní cájetáhú i. Jendaá cahán rí jíin rō jeé quíví coo juicio te xeén gā coo castigo síquí ñuu cásáha súcuan vēsú síquí ñuu Sodoma jíin ñuu Gomorra nuū ní casáha ndasí ñáyuu cuéchi.

<sup>12</sup> Te ni quendacoo de cuahān de, te ni canacani de jñuhun jeé na nácani ni ñayuu jeé stóo i cuéchi i. <sup>13</sup> Te suni ni caquenehen de cuehē tachí ini ñayuu. Te ni cachihí de aceite cuehē ñayuu cácuñu, te ni canduváha i.

*Jeé ní jíhí Juan tēe scuándute  
(Mt. 14.1-12; Lc. 9.7-9)*

<sup>14</sup> Te rey Herodes ni jíin jñuhun de jñuhun Jesús, chí ni jíitē núu jñuhun ya níí cáhnu. Te ni cahān de:

Tēe yūcuán cúu Juan tēe ni scuándute, te ni natecu de. Jeé yūcuán iyó poder de sáha de jñiñu jéhnu. Achí de.

<sup>15</sup> Te sava ga ñayuu ni cacahān i:

Tēe un cúu Elías jeé ní nacani jñuhun jehahán.

Te sava ga i ni cacahān:

Tuú chí ñin tēe nácani jñuhun Yaā Dios cúu de, nájñuhun tēe ni canacani jñuhun ya nde jehahán, achí i.

<sup>16</sup> Te ná ni jíin Herodes, te ni cahān de:

Tuú chí yūcuán cúu Juan jeé ní ndacu ri jñiñu ni tahndē xiní, te ni natecu de núu súcuan, achí de.

<sup>17</sup> Chí máa Herodes ni ndacu de jñiñu jeé na quíví Juan vecāa, jíin jéé na cónuhni de jíin cadena. Súcuan ni sáha de jeé síquí Herodías, ñasihí ñani de Felipe. Chí Herodes ni quihín de ña jeé cúu tucu ña ñasihí de. <sup>18</sup> Te Juan ni cahān de nuū Herodes:

Tu iyó ley jeé cóndeca ró ñasihí ñani rō, achí de.

<sup>19</sup> Te jeé yūcuán Herodías ni jito uhū ña Juan, te cúní ña jeé na cúu de, te tu ní níhín ña modo. <sup>20</sup> Chí Herodes yúhú de cahni de Juan, chí jíin de jeé tēe ndaā tēe ndoo cúu Juan. Te jeé yūcuán ní jesi de jeé nducú ña jeé cúu Juan. Te nájñahan ni de jíin nahín de jñuhun cahán Juan, vēsú tu jécuhun vāha ni de. <sup>21</sup> Te ni quee ñin quíví jeé ní cundeyí Herodías. Chí ní sáha Herodes ñin vico quíví ní cacu de, te ni jēhe de jeé ní cacuxini tēe cándiso jñiñu nuū de, jíin tēe cácuu capitán, jíin tēe cácuñu región Galilea. <sup>22</sup> Te ni quíví sēhe síhí máa Herodías, ni jita jéhé i nuū chítu un. Te ní cacuxí ni rey Herodes jíin tēe cácuñi jíin de. Te ni cahān de jíin súchi síhí un:

Cacān na vé cuní rō, te cuáha ri nuū rō, achí de.

<sup>23</sup> Te ni cahān teyí de jeé cuáha de núu na vé cuní i cacān i, vēsú nde sava región jeé yáhi ndaha de. <sup>24</sup> Te ni quenda i, ni jecajñuhún i náná i:

¿Na vé cacān na núu de? achí i.

Te ni cahān ña:

Xiní Juan tēe scuándute cacān rō nuū de, achí ña.

<sup>25</sup> Yūcuán na te ni ndívi-ni i nuū rey, te ni cahān i:

Cúní na jéé vijná ñuhún-ni cuáha ní xíní Juan tēe scuándute, cone nuū ñin cohó, achí i jíin de.

<sup>26</sup> Yūcuán na te ni cucuíhyá ndasí ni rey un jeé ní cundeyí Herodías jeé cúu Juan. Te síquí jeé ní jéjñuhun téyí de, jíin jéé ní cajini sōho tēe cáyeji staā jíin de, jeé yūcuán tu ní cúní de sásáhan de jeé ní jícān i. <sup>27</sup> Te ni tají-ni de ñin soldado jeé quiquihín de xiní Juan. <sup>28</sup> Te ni jehēn soldado un vecāa, te ni jehnde de xiní Juan. Te ni quee de jíin xíní

Juan, íne nuū ìn cohō. Te ni jēhe de nuū sūchi síhí un, te máá i ni jēhe i nuū naná i.

<sup>29</sup> Te tēe cáscuáha jíin Juan ni canihín de jñuhun, te ni jengoo de, ni candonehen de yiqui cúñu Juan, te ni cachindūji de.

*Jeē ní scáji yā uhūn mil tēe*

(Mt. 14.13-21; Lc. 9.10-17; Jn. 6.1-14)

<sup>30</sup> Yūcuán na te tēe cácuu apóstol jeē ní taji yá cuangoo nacani jñuhun, ni ndecoo de nuū Jesús. Te ni canacani de nuū yá táca jñiñu ni casáha de, jíin jñuhun ni castéén de.

<sup>31</sup> Te ni cahān yá jíin de:

Na quíngoo yó ìn lugar nuū tú ñayuu, te ndetātu yó jecu, achí ya.

Chí cuehē ñayuu cuahān i vēji i nuū yā, te ni tu ní nūne ya jeē cáji yā staā jíin de.

<sup>32</sup> Yūcuán na te ni quívi ya ìn barco jíin táca tēe apóstol un, te cuangoo sín ya jíin de ìn lugar nuū tú ñayuu. <sup>33</sup> Te cuehē ñayuu ní cajito i jeē cuahān ya jíin de, te ni canacuni i jeē máá yá cúu. Te nde táca ñuu ní quendacoo i, te yachi cuangoo i, te xihna gā i ni jinūcoo vēsú máá yá. <sup>34</sup> Te nuū ní quenda Jesús ini barco, te ni jito ya ñayuu cuehē ún. Te ni cundáhú ní yá i, chí cúu i nájnūhun lanchi jeē tú jitoho tī. Te ni steén yá cuehē jñuhun nuū i. <sup>35</sup> Te nuū ní ini, te tēe cáscuáha jíin yá, ni quecoo de nuū yā, te ni cacahān de:

Je ní ini, te yāhá chí tú na ñayuu yúcu.

<sup>36</sup> Nūu súcuán te taji ní ñayuu na quíngoo i táca rancho jíin ñuu yajni, te cuaan i staā caji i, chí tú na vé cándiso i caji i, achí de.

<sup>37</sup> Te ni cahān Jesús jíin de:

Cuāha máá ró jeē cáji i, achí yá.

Te ni cacahān de:

¿Te ndese cuu? Chí ni ma cúu vēsú núu quicuaan ná ndé uū ciento denario staā caji ñayuu, achí de.

<sup>38</sup> Te ni cahān yá jíin de:

¿Nasaa staā cánevāha ró? Cuacondēhe, achí yá.

Te nuū ní cajini de, te ni cacahān de:

Uhūn-ni staā jíin uū chācá íyó, achí de.

<sup>39</sup> Yūcuán na te ni cahān yá jíin ñayuu jeē na cúcoo sín i cuenta grupo nuū íte. <sup>40</sup> Te ní cacucōo sín ciento ciento i, jíin cincuenta cincuenta i. <sup>41</sup> Te ní quihín ya ndihúhún staā jíin uū chācá un, te ní ndacoto ya ichi ándiví, te ní nacuatáhú yá. Te ní tahú cuéché yá staā ún, te ni jēhe ya nuū tēe cáscuáha jíin yá, te máá de ní casaja de nuū ñayuu cuehē ún. Te suni ní jēhe ya ndindúú chācá, ní casaja de nuū i. <sup>42</sup> Te ndivii i ní cayejí, te ní candutú chíji i. <sup>43</sup> Yūcuán na te ní canastútú de pedazo staā jíin chāca jēé ní quendōo, te ní chitú úxí uū jíca. <sup>44</sup> Te tēe ní cayejí, chí uhūn mil de cúu.

*Jeē ní jica jéhé yá nuū mar*

(Mt. 14.22-27; Jn. 6.16-21)

<sup>45</sup> Yūcuán na te ní cahān-ni Jesús jíin tēe cáscuáha jíin yá jeē na quívicoo de barco,

te cosnūu de yāha de inga lado mar ñuu Betsaida. Te máá yá chí natajái yá ñayuu quinhun i, te sáá te suni quihín yā. <sup>46</sup> Te nuū ní cuu ní natajái yá i, te ni caa ya yucu cuacacān tahú yā. <sup>47</sup> Te jeē ní cuaa, te barco un je ní cuu sava nuū mar cuahān, te máñúhún-ni ya ní quendōo nuū ñuhun íchi. <sup>48</sup> Te ní jito ya jeē yóhoyo jñundóho cáscaca de barco, chí níhín vēji tachí ichi núu de. Te jeē yínee gā ní quee ya nuū de, jíca jéhé yá nuū mar. Te yāha ya nuū de quihín yā nuú. <sup>49</sup> Te ní cajito de jeē jíca ya nuū mar, te ní cajeni ní de jeē jihná cúu, te ní cacana cohó de. <sup>50</sup> Chí ndihi de ní cajito nuú yá, te ní cayuhú ndasí de. Te ní cahān-ni ya jíin de:

Ndeyí coo ní rō, te ma yūhu ró, chí máá rí cúu, achí yá.

<sup>51</sup> Te ní quívi ya ini barco un, te ní jecuñi-ni tachí. Te yóhoyo ní canaa ní de cájito de. <sup>52</sup> Chí cándāa néé gā jeē níjnūni de, chí ní jíin jñiñu jéhu jeē ní nducuehē staā, tu ní cájecūhun ní de jeē máá yá cúu Yāá ní taji Yāá Dios.

*Jeē ní nasāvāha ya ñayuu cácuñu región Genesaret*

(Mt. 14.34-36)

<sup>53</sup> Te ní quenda jíyo ya jíin de nuū mar ún, ní jinū yá región Genesaret. Te yundúte un ní cajihni de barco. <sup>54</sup> Te nuū ní quenda ya jíin de ini barco, te ñayuu yúcuán ní canacuni-ni i ya. <sup>55</sup> Te yachi ní jengoo i táca ndañúú yūcuán, te ní caquindeca i ñayuu cácuñu, cáyosó i nuū camilla, vējicoo ñayuu nuū ní jito i íne ya. <sup>56</sup> Te ndé-ni cúu-ni núu ní quívi ya, núu ñuu lulí, chí ñuu cáhnu, chí rancho, te cájequin i ñayuu cácuñu yuhíchi, te cacahān ndahú i jíin yá jeē na quéhé i vēsú yusáhma ya. Te táca ñayuu jeē ní caquehé sahna ya, ní canduvāha-ni i.

*Siquí ndese cújnéhén ñayuu*

(Mt. 15.1-20)

## 7

<sup>1</sup> Yūcuán na te tēe grupo fariseo jíin jecu tēe cástéén tutu ley Yāá Dios, ní quendacoo de ñuu Jerusalén, te ni quecoo de nuū Jesús.

<sup>2</sup> Te tēe un ní cajito de jeē sava tēe cáscuáha jíin Jesús, ní cayejí jnehén de staā, chí tu ní cáscuico de costumbre jeē nándahá de nuū Yāá Dios. Te ní cacahān siquí de. <sup>3</sup> Chí tēe fariseo jíin ndihi ñayuu hebree, névāha i costumbre jenahán jēé ma cáji i staā núu tu nándahá váha i xihna gā. <sup>4</sup> Te núu ní ndecoo i jeē ní jéngoo i nuū yāhu, te tu cáyeji i te núu tu nándahá i. Te íyó cuéhé gā costumbre jenahán jeē casquícu i, nájnūhun jeē ndúndoo taza, tindohó, cohó cáa, jíin jito. <sup>5</sup> Te tēe fariseo jíin tēe cástéén tutu ley Yāá Dios, ní cacajñuhún de ya:



Tēe cáscuáha jíin ró, ¿naun tu cáscuicu de costumbre ñayuu jenahán? Chi sa cáyeji jnehén de staā, achí de.

<sup>6</sup> Te ni cahān yā jíin de:

Ndaā ni nacani Isaías jñuhun siquī rō jijnáhan rō jēe tēe stáhú-ni cácuu ró. Chi súcuan ni tee de jñuhun ni cahān Yāā Dios nde jenahán:

Ñayuu yáha chi máá yuhu-ni i cájetáhú i ruhū,

te nasūu ndé jíin ini jíin ánuá i.  
<sup>7</sup> Te cáchiñúhún saá-ni i ruhū, chi jñuhun cástéén i cúu jñiñu ní candacu tēe, te nasūu jēe ní ndacu máá rí cúu.

Achí Yāā Dios. Achí Isaías. <sup>8</sup> Súcuan cácuu ró, chi ni casiáá rō jñiñu ní ndacu Yāā Dios nuū rō, te cáscuicu ró costumbre jeē ní cajequin ñayuu, jeē ndúndoo tindohō jíin taza. Te cuehē gā costumbre súcuan cáscuicu ró, achí yá.

<sup>9</sup> Te suni ni cahān yā:

Cásiáá rō jñiñu ní ndacu Yāā Dios, návāha squicu ró costumbre ni cajequin máá ró.

<sup>10</sup> Chi Moisés ni cahān de: Coó yíñúhún ró jíin tátá rō jíin náná rō. Te núu ndé iñ cahān siquī tátá chí siquī naná, na cúu nahín. Achí Moisés. <sup>11</sup> Te máá ró chi cácahān rō jeē cuu cahān iñ tēe jíin tátá de náná de: Ma cúu chindéé ñahán ná nihín cuáha na jēe cáji ni jēe cúhun ní, chi ndihi jeē névāha ná, chí Corbán cúu, achí ró. (Te jñuhun Corbán cuní cahān jeē ní sócō nuū Yāā Dios.) <sup>12</sup> Te cácahān rō jeē núu súcuan cahān iñ tēe, te tuá cánuu chindéé ñahán de tátá de náná de. <sup>13</sup> Te súcuan cástívi ró jñiñu ní ndacu Yāā Dios, jeē siquī costumbre ni cajequin ñayuu jenahán vēji. Te cuehē gā jñiñu súcuan cásaá ró, achí yá.

<sup>14</sup> Te ni cana tucu ya ñayuu cuehē ún, te ni cahān yā jíin i:

Cuní sōho vāha ró jijnáhan ró, te chuhun ni ró: <sup>15</sup> Tāca jēe iyó, te núu ni quívi yuhu ñayuu te tu cújnehén i sáha. Chi jeē quéndá ini anuá ñayuu, yúcuan cúu jeē cújnehén i sáha. <sup>16</sup> Tāca róhó jēe jíni sōho, na chúshóhó ró, achí yá.

<sup>17</sup> Te ni stóo ya ñayuu cuehē ún, te ni quívi ya ini vehe. Te tēe cáscuáha ún, ni cacajñuhún de ya siquī jñuhun yátá yáha jēe ni cáhān yā. <sup>18</sup> Te ni cahān yā jíin de:

¿A máá ró suni ná tu jecūhun ni rō, chí naún? ¿A tu cájini rō jeē tāca jēe quívi ini ñayuu, ma cúu cújnehén i sáha? <sup>19</sup> Chi tu quívi ini anuá i, chí chíji i quívi, te quéndá-ni cuahān, achí yá.

Súcuan ni steén yā jeē tāca jēe yéji ñayuu, tu cújnehén ánuá i sáha. <sup>20</sup> Te ni cahān gā yā:

Jeē quéndá ini anuá ñayuu, yúcuan cúu jeē cújnehén i sáha. <sup>21</sup> Chi nde ini anuá ñayuu quéndá jeē jéni néé ni, jeē casíquí ndéé jñáhan, jeē jica jnéni, jeē jémi ndíyi, <sup>22</sup> jeē sacuíhná, jeē ndíyo ni ndajniñu jñáhan, jeē sáha néé, jeē stahú jñáhan, jeē máni cuéchi

sáha, jeē cucuésún ni, jeē cahán yā síquí jñáhan, jeē sandúxi máá, jeē canéé xíní. <sup>23</sup> Tācá jñiñu néé yáha, máni ini anuá ñayuu quéndá, te cújnehén i sáha, achí yá.

*Ñahan inga nación jeē ní candíje nihin  
(Mt. 15.21-28)*

<sup>24</sup> Te ni quenda ya yúcuan cuáhān yā región Tiro jíin Sidón. Te ni quívi ya iñ vehe, te cúni yā jeē tú ni iñ ñayuu cuní jeē íne ya yúcuan. Te vesú súcuan, te tu ní cúu cone sáhi yá. <sup>25</sup> Te iñ ñahan iyó sēhe síhi ña jeē ñúhun tachí ini i, ni nihín-ni ña jñuhun jeē íne ya. Te ni quee ña, te ni jecuíñi yití ña nuū jehé yá. <sup>26</sup> Te ñahan ñuu jicá cúu ña, chí nde Sirofenicia cúu nación ña. Te ni cahān ndahú ña jíin yá jeē na quénehen ya tachí ini sēhe síhi ña. <sup>27</sup> Te ni cahān Jesús jíin ña:

Nasūu núu máá ní vēji ná, chí máni nuū ñayuu cácuu sēhe Israel. Chi tu iyó yáha jeē quéndé yō staā sēhe te cuāha yó núu ína, achí yá.

<sup>28</sup> Te ni cahān ña:

Jendaá cahán ni Tátá, te chindéé ñahán ní saña vesú cúu ná nájñuhun ina. Chi suni máá tí cáhiin tí chíji mesa, cánihin tí staā cuechí jēe cóyo yuhu sūchi lúlí cáyeji tí, achí ña.

<sup>29</sup> Yúcuan na te ni cahān yā jíin ña:

Vāha ni cahān ní. Cuáhān ní núu súcuan, chí je ni quenda tachí ún ini sēhe síhi ní, achí yá.

<sup>30</sup> Te ni najinú ña vehe ña, te ni jito ña jeē catú sēhe síhi ña nuū jito, te je ni quenda tachí ún ini i.

*Jeē ní nasávāha ya iñ tēe sóho cástéte*

<sup>31</sup> Te ni quenda tucu ya región Tiro, ni yáha ya Sidón jíin táca ñuu Decápolis, te ni jinū yā mar Galilea. <sup>32</sup> Te ni caquindeca i iñ tēe sóho cástéte nuū yá, te ni cacahān ndahú i jíin yá jeē na sóo yá ndaha ya siquí de. <sup>33</sup> Te ni quenehen sín ya de nuū ñayuu cuehē ún, te ni chune ya xíní ndáha ya sōho de, te ni tesíhi yá, te ni quehé yá yaá de. <sup>34</sup> Te ni ndacoto ya ichí ándiví, te ni jitú ni yá, te ni cahān yā:

Efata, achí yá, jeē cuní cahān: Nanune.

<sup>35</sup> Te ni nanune-ni sōho de, te ni nduvāha yáá de, te ni nacahān vāha de. <sup>36</sup> Te ni ndacu ya jñiñu nuū ñayuu un jēe ma cáchi i nuū ní iñ. Te vesú ni cahān nihin ya jíin i, te víhyá gā ni cajete i jñuhun. <sup>37</sup> Te yōhoyo ni canaa ni i cájito i, te ni cacahān i:

Vāha sáha ya táca jñiñu, chí nde tēe cásohó, cánacuni sōho de, te tēe cándāa ñíhín, cánacahān vāha de sáha ya, achí i.

*Jeē ní scáji yá cuñ mil ñayuu  
(Mt. 15.32-39)*

## 8

<sup>1</sup> Te tiempo un ní candutútú cuéhē ndasí ñáyuu, te tuá na vé caji i. Te ni cana Jesús tēe cáscuáha jíin yá, te ni cahān yá:

<sup>2</sup> Cúndáhú ní rī ñayuu yāhá, chí je ni cuu uní quivī cáyūcú i jíin rí, te tuá na vé caji i. <sup>3</sup> Te núu natajǐ rí i quinhun ndite i vehe i, te cuíta íi i sava ichi, chí iyó sava i jeē jíicá vejicoo i, áchí yá.

<sup>4</sup> Te tēe cáscuáha un ní cacahān de:

¿Te ndé nuū nihñ yō staā caji i jíināhan i? Chí yāhá tú na ñayuu yúcu, áchí de.

<sup>5</sup> Te ni cajñūhun yá de:

¿Nasaa staā cánevāha ró?

Te ni cacahān de:

Uxā-ni, áchí de.

<sup>6</sup> Yūcuán na te ni cahān yā jíin ñáyuu cuéhē un jeē na cúcoo i. Te ni quihñ ya ndihúxá staā ún, te ni nacuatáhú yá nuū Yāā Dios. Te ni tahú cuéché yá, te ni jēhe ya nuū tēe cáscuáha jíin yá. Te máa de ni casaja de nuū ñáyuu cuéhē ún. <sup>7</sup> Te suni cándiso de jecu chācá lúli. Te ni nacuatáhú yá siquī, te ni cahān yā jeē suni saja de jíināhan de. <sup>8</sup> Te ndihi i ni cayeji, te ni candutú chíji i. Yūcuán na te ni canastútú de pedazo jeē ní quendōo, te ni chítú úxā jíca. <sup>9</sup> Te tēe ni cayeji un, iyó nájñūhun cuñ mil de. Te ni nacuatáhú yá nuū ñáyuu ún, te cuanungoo i. <sup>10</sup> Yūcuán na te ni ndivi-ni ya ini barco jíin tēe cáscuáha jíin yá, te cuahān yā región Dalmanuta.

*Jeē ní cajicān de ññ jññū jēhnu nuū yā  
(Mt. 16.1-4; Lc. 12.54-56)*

<sup>11</sup> Yūcuán na te ni quecoo tēe grupo fariseo, te ni caquejé de stíchi de Jesús. Te cácumi de coto ndee de ya, te ni cajicān de jeē sáha ya ññ jññū jēhnu jeē coo ññ seña ichi ándivi. <sup>12</sup> Te ni jítú ni yá siquī jeē tu cáandije de jíināhan de, te ni cahān yá:

¿Naun cajicān ñayuu yāha ññ jññū jēhnu nuū rí? Jendaá cahān rí jeē ma stēen rí ni ññ jññū jēhnu nuū ñayuu yāhá.

<sup>13</sup> Te ni squendōo ya de jíināhan de, te ni ndivi tucu ya ini barco, te cuahān yā inga lado mar.

*Jññun levadura tēe fariseo  
(Mt. 16.5-12)*

<sup>14</sup> Te tēe cáscuáha jíin yá ni canaa ni de condiso de jeē caji de, chí ññ-ni pan cánevāha de ini barco. <sup>15</sup> Te ni ndacu ya jññū nuū de:

Coto má candije ró levadura tēe grupo fariseo jíin levadura Herodes, áchí yá.

<sup>16</sup> Te ni cacahān tēe cáscuáha un jíin táca jññāhan de:

Va siquī jeē tú na staā ndiso yó, jeē yúcuān cahān yā súcuān, áchí de.

<sup>17</sup> Te ni jññi Jesús, te ni cahān yá:

¿Najehē cándajññūhun ró jeē ní cahān rí súcuān siquī jeē tú na staā cándiso ró? ¿A ná tu cuni rō, á ná tu jecūhun ní rō jeē tu ní cahān rí súcuān siquī jeē tu cándiso ró stáá? ¿A

yóhyo un ní rō candije ró? <sup>18</sup> Iyó tññū ró ¿te á tu cájito ró? Iyó sóho ró ¿te á tu cájini ró? ¿Te á tu cáncūhun ní rō? <sup>19</sup> Chí ná ni tahú cuéché rí uhñ staā ni cayeji uhñ mil tēe, ¿te nasaa jíca ni chítú pedazo staā jeē ní canastútú ró? Achí yá.

Te ni cacahān de:

Uxī uū jíca, áchí de.

<sup>20</sup> Te suni súcuān ná ni tahú cuéché rí uxā staā ni cayeji cuñ mil tēe, ¿te nasaa jíca ni chítú pedazo staā jeē ní canastútú ró? Achí yá.

Te ni cacahān de:

Uxā jíca, áchí de.

<sup>21</sup> Te ni cahān yā jíin de:

Te nde vijna ¿á ná tu jecūhun ní rō jíināhan ró?

Súcuān ni cahān yatá yá jeē ma cándije de jññūhun stáhú cástēen tēe ún.

*Jeē ní nasāvāha ya tēe cuáá ññuu Betsaida*

<sup>22</sup> Yūcuán na te ni jíin yā jíin de ññuu Betsaida. Te ni caquindeca ñayuu ññ tēe cuáá núu yá, te ni cacahān ndahú i jíin yá jeē na tēe ya ndaha ya nuū de. <sup>23</sup> Yūcuán na te ni jññi ya ndaha tēe cuáá un, te ni quenehen ya de yatá ññú ún. Te ni tee ya tesñi yá tinū de, te ni tee ya ndaha ya siquī. Te ni cajññūhun yá de núu cuu coto de jecu. <sup>24</sup> Te ni ndacoto de, te ni cahān de:

Jito ná ñayuu jeē cájica i, te tu jito cáji ná, chí ná cáa yujnu cáa i, áchí de.

<sup>25</sup> Yūcuán na te ni tee tucu ya ndaha ya siquī tinū de. Te ni ndacoto vāha de, te ni nduvāha-ni tinū de, te ni jito cáji de ndihi-ni. <sup>26</sup> Te ni natajǐ yá de quinhun de vehe de, te áchí yá:

Ma quivī ró ññu, ni ma cáchi cuiti rō nuū ní ññ, áchí yá.

*Jeē ní cahān Pedro jeē Jesús cúu Cristo  
(Mt. 16.13-20; Lc. 9.18-21)*

<sup>27</sup> Yūcuán na te Jesús jíin tēe cáscuáha jíin yá, cuahān yā táca ndañúú Cesarea Filipino. Te ichi un ní cajññūhun yá de:

Ruhū, ¿ndé ññ cúu rí cácahān ñayuu?

<sup>28</sup> Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jññūhun Yāā Dios nde jenahān. Te sava ga i cácahān jeē inga tēe ni nacani jññūhun Yāā Dios cúu ní.

<sup>29</sup> Yūcuán na te ni cajññūhun yá de:

Te máá ró, ¿ndé ññ cúu rí cácahān ró?

Te ni cahān Pedro:

Máá ní cúu Cristo, Yāā ní tajǐ Yāā Dios, áchí de.

<sup>30</sup> Te ni ndacu ya jññū nuū de jíināhan de jeē ma cáchi de jññūhun yāha nuū ní ññ ñayuu.

*Jeē ní castūhñ Jesús jeē cúu yā  
(Mt. 16.21-28; Lc. 9.22-27)*

<sup>31</sup> Te ni quejé yá steen yá nuū de:

Máá rí, Yaa ní nduu tēe, cánuú ndoho xeēn rí. Te táca tēe jéhnú jín sūtú cácujeéhnú jín tēe cástéén tutu ley, squéhichí de ruhū, te cahni de ruhū. Te nuú uní quiví te natecu rí, achí yá.

<sup>32</sup> Te cájí ní cahān yā jñūhun yáha. Yūcuán na te Pedro, ní cana máñúhún de ya, te ní quejéé de cáhān de nuú yā jeē ma cuáha ya jñūhun coo súcuan. <sup>33</sup> Te máá yá ní ndió cóto ya ní jito ya nuú tēe cáscuáha jín yá. Te ní cahān yā nuú Pedro:

Cujiyo quihīn rō, chí cahān rō ná cahān Satanás. Chí tu jéni ní rō nájnūhun jéni ní Yaa Dios, chí sa suhva jéni ní rō nájnūhun cájeni ní ñayuu, achí yá.

<sup>34</sup> Te ní cana ya tēe cáscuáha jín yá jín ñayuu cuehē ún, te ní cahān yā:

Na-ní ñayuu núu cúní i condiquīn i ruhū, na cási i jeē cuní maá i, te na cóndiquīn i ruhū te cuáha i jñūhun ndoho i jñúndóho jeē siquí rí, vésú na cúu i. <sup>35</sup> Chí núu ndé ñayuu cuní i cácu i nuú jñúndóho quiji nuú i jeē siquí ruhū, núu súcuan te jnahnú ndetú i ní cáni. Te núu ndé ñayuu, vésú na cúu i jeē siquí ruhū jín siquí jeē scáca i jñūhun jeē jnáma rí ñayuu, núu súcuan te cotecu i ní cáni. <sup>36</sup> ¿Chí ndé cuajníñu vésú na cúndeyí ñayuu nihīn i ní ñayví, te núu quiví i nuú jnahnú ndetú i? <sup>37</sup> Chí tú na jín cuiti chunaa ñayuu jeē cácu ánuá i. <sup>38</sup> Te ñayuu yáha tu cácandíje cuiti i, te máni máá cuéchi cásaáha i. Te núu na-ní ñayuu cúcanu i nuú ñayuu yáha jeē siquí ruhū, Yaa ní nduu tēe, jín siquí jñūhun cahān rí, suni súcuan cucanu rí jeē siquí máá i, quiví ndíji rí jín táca ndajéhé ndoo rí. Te quiví ún chí yōhoyo luu cujéhnú rí nájnūhun cújéhnú Tátá rí. Achí yá.

## 9

<sup>1</sup> Te suni ní cahān yā jín de jínáhan de:

Jendaá cahān rí jín ró jeē sava tēe cáhīn yáhá, ma cúu de chí nde cuní de jeē ndácu Yaa Dios jñiñu jín poder yā, achí yá.

*Jeē tucu ní nduu ya*

(Mt. 17.1-13; Lc. 9.28-36)

<sup>2</sup> Yūcuán na te nuú iñú quiví te Jesús ní jeca ya Pedro jín Jacobo jín Juan, cuahān sīn ya jín de ñn yucu súcún. Te yūcuán, tucu ní nduu ya nuú de. <sup>3</sup> Te sahma ya ní ndindéé, te ní nducujín quiyí, nájnūhun yuhvá volcán. Te tú ní ñn ñayuu ñayví yáha cuu nacate jeē ndúquiyí ndasí súcuan. <sup>4</sup> Te ní cajito de jeē Elías jín Moisés cándajnūhún de jín yá. <sup>5</sup> Yūcuán na te ní cahān Pedro jín Jesús:

Maestro, nacá jeé váha jeē cáhīn na yáha. Te na sáha ná úní vehe ramada, ñn cuu máá ní, inga cuu Moisés, te inga cuu Elías, achí de.

<sup>6</sup> Chí yōhoyo ní cayūhu tēe cáscuáha ún, te Pedro tu ní sáha de cuenta na vé cúu jeé

cahān de. <sup>7</sup> Te ní quiji vicó ñūhun ní jesi-ní nuú de. Te nuú vicó un ní cahān ñn jñūhun:

Yáha cúu Sēhe rí jeē maní ndasí rí jín. Te na cúni nahín ró jñūhun cahān yā. Achí.

<sup>8</sup> Te ní candacoto-ní de, te tuá tēe un ní cájito de, chí máá ñn na Jesús.

<sup>9</sup> Te ní cananuu de jín yá yucu ún. Te ní ndacu nihin ya jñiñu nuú de jeē ma cáchi de nuú ní ñn jeē súcuan ní cajito de, chí nde na nátecu maá yá, Yaa ní nduu tēe, achí yá. <sup>10</sup> Jeé yūcuan ní cachuváha de táca jeé ní cuu ún, te cácajnūhun jñáhan de na jñūhun cúu jeé nátecu yá. <sup>11</sup> Te ní cacajnūhún de ya:

Te tēe cástéén tutu ley Yaa Dios, ¿ñajehé cácahān de jeé cánuú ndíji Elías xīhna gā, te sáá te quiji Yaa cúu Cristo? achí de.

<sup>12</sup> Te ní cahān yā:

Jendaá cúu jeé xīhna gā quiji ñn tēe cúu nájnūhun Elías, te sátūhva de ndíhi, achí tutu. ¿Te ndese cahān tuu tutu ñn siquí ruhū, Yaa ní nduu tēe? Cahān jeē ndoho xeēn rí, te sájéé ní i nuú rí. <sup>13</sup> Te cahān rí jín ró jeé ní quiji tēe ní cuu nájnūhun Elías, te ní casáha ndeváha ñayuu jín de táca jeé ní cacuu ní maá i, nájnūhun cahān jñūhun de nuú tútu, achí yá.

*Jeé ní nasávāha ya ñn sūchi ñūhun tachí ini*  
(Mt. 17.14-21; Lc. 9.37-43)

<sup>14</sup> Te ní najinú yā jín de nuú sava ga tēe cáscuáha jín yá, te ní cajito ya ñayuu cuehē ndasí, ní cajicó ndúu i de. Te suni cáhīn tēe cástéén tutu ley Yaa Dios, cátejnāhan jín de. <sup>15</sup> Te nuú ní cajito táca ñayuu un jéé véji ya, te ní canaa ní i. Te cájnu i cuangoo i nuú yā jeé cahān i jín yá. <sup>16</sup> Te ní cajñūhun yá i:

¿Na siquí cátejnāhan ró jín de jínáhan de? achí yá.

<sup>17</sup> Te ní cahān ñn tēe íne yūcuán:

Maestro, vendeca ná séhe ná núu ní, chí ñūhun ñn tachí ini i, te ní cuñhán i ní sáha. <sup>18</sup> Te ndé-ní cúu nuú íne i, te tachí un scótúu i, te jéni yíhí-ní i. Te jéé tíñu yuhu i, te squíhñi jñūhun i. Te cuacuxíí ndasí i sáha. Te ní cahān ndahú ná jín tēe cáscuáha jín ní jeé na quénehen de tachí ún, te tu ní cúu sáha de, achí de.

<sup>19</sup> Te ní cahān yā jín de jínáhan de:

Ñayuu tu cándíje cuiti cácuu ró. ¿Nasaa ga quiví condee rí jín ró? ¿Te nasaa ga quiví cuandeyí ní rí jín ró? Cuáquihin sūchi ún, na quíji i, achí yá.

<sup>20</sup> Te ní caquindeca de i nuú yá. Te nuú ní jito tachí un núu yá, te ní jéni yíhí-ní i. Te ní cotúu i, te cónehén cócání i, te jéé tíñu yuhu i. <sup>21</sup> Te Jesús ní cajñūhun yá tatá i:

¿Nasaa cuiyá ní cuu jeé sáha súcuan jín i?

Te ní cahān de:

Nde lulí i. <sup>22</sup> Te ní cuu cuehē jínu scótúu táchí ún i nuú ñūhún nuú ndúte, jeé cáhni i cúní. Te núu cuu sáha ní, te cundáhú ní ní

chindéé ñáhán ní sãña jéé ndúvãha sêhe ná, áchí de.

<sup>23</sup> Te ni cahãn Jesús jíin de:

Núu cuu candíje ró jéé sãha ri, chí ñayuu candíje te cuu táca jéé cuní i, áchí yá.

<sup>24</sup> Te máá tátá sũchi un ní cahãn jee de:

Cándíje ná, te chindéé ñáhán ní sãña jéé candíje ñihin ga ná, áchí de.

<sup>25</sup> Te ni jito Jesús jéé ní cutútú cuéhê ñayuu nuũ yá. Te ni cahãn yá nuũ tachí:

Tachí jeé sañhín sásóhó, ruhú ndácu ri jñiñu jeé na quénda ró ini sũchi yáha, te ma ndívi ga ró ini i, áchí yá.

<sup>26</sup> Yũcuán na te ni cana cóhó táchí ún, te ni jehni yíhi tucu i, te ni quenda cuahãn. Te sũchí un ní cuu i nájnũhun ndíyi. Te ni cacahãn cuéhê ñayuu jeé jé ní jíhí i. <sup>27</sup> Te Jesús ní jñi ya ndaha i, te ni ndonehen ya i, te ni nucuññ-ni i.

<sup>28</sup> Yũcuán na te ni quívi ya ini ñin vehe, te tée cáscuãha jíin yá, ní cacajñũhun sãn de ya:

¿Najehê tu ní cúu quenehen ná tachí un jíjnãhan ná? áchí de.

<sup>29</sup> Te ni cahãn yá:

Ñin tachí súcuan chí ma quénda cuiti te núu tú cacãn tahú ró te coo ndite ní ró, áchí yá.

*Jeé ní cahãn tucu ya jeé cúu yá*

(Mt. 17.22-23; Lc. 9.43-45)

<sup>30</sup> Te ni quenda ya yũcuan jíin de jíjnãhan de, te ni yãha ya ndañúu Galilea cuahãn yá. Te tu ní cuní yá jeé cuní ní ñin ñayuu. <sup>31</sup> Chí stéén yá nuũ tée cáscuãha jíin yá, te áchí yá:

Máá rí, Yaa ní nduu tée, nastúu i ruhú nuũ táca tée xeên. Te cahni de ruhú, te núu ní jíhí rí, te nuũ uní quívi te natecu rí, áchí yá.

<sup>32</sup> Te tu ní cájecũhun ní de jñũhun yáha, te cáyũhú de cajñũhun de ya siquí jñũhun ní cahãn yá.

*Nde ñáyuu cúu jeé cujúehu ga*

(Mt. 18.1-5; Lc. 9.46-48)

<sup>33</sup> Te ni jíin yá jíin de ñuu Capernaum, te nuũ ní quívi ya ini vehe, te ni cajñũhun yá de:

¿Na jñũhun ní candajñũhun ró ichi véji yó? áchí yá.

<sup>34</sup> Te tu ní cacahãn cuiti de, chí ichi un ní cacahãn de siquí núu ndé ñin de cujúehu ga.

<sup>35</sup> Yũcuán na te ni cucóo ya, te ni cana ya ndihúxí uũ de, te ni cahãn yá:

Núu ndé ñin ró cuní cujúehu ga, na cúu ró tée núu ga nuũ táca jñãhan ró, te cuajñiñu ró núu jñãhan ró.

<sup>36</sup> Yũcuán na te ni jñi ya ndaha ñin sũchi lúli, te ni jeni ya i mehñu de jíjnãhan de. Te ni nundee yá i, te ni cahãn yá jíin de:

<sup>37</sup> Na-ní ñayuu núu jeé siquí ruhú jetáhú i ñin sũchi lúli nájnũhun sũchi yáha, te ruhú jetáhú i. Te ñayuu jetáhú rúhú, nasúu máá ñin-ni ruhú, chí suni Yaa ní tají rúhú jetáhú i, áchí yá.

*Ñayuu tu cahãn siquí yá, ñin i jíin yá*

(Mt. 10.42; Lc. 9.49-50)

<sup>38</sup> Yũcuán na te ni cahãn Juan jíin yá:

Maestro, ni cajito ná ñin tée jeé jíin síhvi ní quenehen de tachí ini ñayuu. Te ni cajesi ná jéé sãha de, chí tu jíca de jíin yó, áchí de.

<sup>39</sup> Te ni cahãn Jesús jíin de:

Ma cási ró jeé sãha de. Chí ni ñin tée jeé jíin síhvi rí sãha de jñiñu jéhu, ma cúu nacahãn de siquí rí. <sup>40</sup> Chí tée tu cahãn siquí yó, ñin de jíin yó. <sup>41</sup> Te na-ní ñayuu núu jeé siquí ruhú cuãha i vésú ñin ñajin ndute coho ró, siquí jeé cácaandíje ró ruhú, ndaã ndíje cúu jeé ñihín i tahú i. Achí yá.

*Xeên coo siquí ñáyuu quívi nuũ cuéchi*

(Mt. 18.6-9; Lc. 17.1-2)

<sup>42</sup> Te núu ñin sũchi lúli yáha cándíje i ruhú, te núu quívi i cuéchi sãha na-ní ñayuu, te vãha ga núu ní conuhñi ñin yóso cáhnu sucũn ñayuu ún, te quée i chíji ndute mar nuũ.

<sup>43</sup> Te núu ndaha ró sãha jeé quívi ró cuéchi, vãha ga cahnde ró na quihín, návãha tuá sãha ró cuéchi. Chí vãha ga jeé cóndee ñin-ni ndaha ró te quívi ró núu cotecu ró níi cáni, vésú jeé cóndee ndindúú ndaha ró te quívi ró infierno, nuũ cayú ñuhũn jeé ma ndahvá cuiti.

<sup>44</sup> Te yũcuán chí tu cájihí tindacú, te tu ndáhvá cuiti ñuhũn. <sup>45</sup> Te núu jehê ró sãha jeé quívi ró cuéchi, suni vãha ga cahnde ró na quihín, návãha tuá sãha ró cuéchi. Chí vãha ga jeé cóo cúhndu ró te quívi ró núu cotecu ró níi cáni, vésú jeé cóndee ndindúú jehê ró te quívi ró infierno, nuũ cayú ñuhũn jeé ma ndahvá cuiti.

<sup>46</sup> Te yũcuán chí tu cájihí tindacú, te tu ndáhvá cuiti ñuhũn. <sup>47</sup> Te núu tinũu ró sãha jeé quívi ró cuéchi, vãha ga tava ró na quihín, návãha tuá sãha ró cuéchi. Chí vãha ga jeé quívi ró ñuu nuũ ndácu Yaa Dios jñiñu jíin ñin na tinũu ró, vésú jeé cóndee ndindúú tinũu ró te quívi ró infierno.

<sup>48</sup> Te yũcuán chí tu cájihí tindacú, te tu ndáhvá cuiti ñuhũn.

<sup>49</sup> Chí nájnũhun quénda vãha oro sãha ñuhũn, súcuan quénda vãha ñayuu sãha jñũndóho. Te táca cúñu jeé socó ñayuu nuũ yá, cúhuhvuã sãha ñi. <sup>50</sup> Vãha íyó ñi, te núu ñi ún na náa jeé uhvuá, zte ndese nduu uhvuá tucu sãha ró? Núu súcuan te cuu ró ñáyuu vãha, nájnũhun íyó vãha ñi. Te na cóyũcu vãha ró jíin jñãhan ró. Achí yá jíin de.

*Siquí jeé ma stóo jñãhan tée jíin ñãhan*  
(Mt. 19.1-12; Lc. 16.18)

## 10

<sup>1</sup> Te ni quenda ya ñuu Capernaum, te ni jíin yá región Judea, inga lado yũte Jordán, ichi nuũ cáne niãndii. Te yũcuan ní cutútú tucu ñayuu nuũ yá, te ni steén tucu ya jñũhun nuũ i, nájnũhun sãha ya. <sup>2</sup> Yũcuán na te jecu tée grupo fariseo ní quecoo de nuũ yá, chí cácani de coto ndee de ya núu ndese cahãn

yā. Te ni cacajñuhún de ya núu iyó ley jeé cuu ndusín in tēe jín ñasihí de. <sup>3</sup>Te ni cahān yā jín de:

¿Na jniñu ni ndacu Moisés nuū rō nde jehān?

<sup>4</sup>Te ni cacahān de:

Moisés ni jēhe de jñuhun jeé cuvāha in acta jeé ndusín de jín ña, te ndōo ña, áchí de.

<sup>5</sup>Te ni cahān Jesús jín de:

Siquí jeé nihni ni rō jijnāhan rō, jeé yúcuan ni ndacu de jniñu yāha núu rō. <sup>6</sup>Te nde xihna ñuhún, ná ni sāha Yaā Dios ndihí, chí tēe jín ñahan ni sāha ya. <sup>7</sup>Jeé yúcuan cúu jeé stóo tēe tátá de náná de, te quijnāhan de jín ñasihí de. <sup>8</sup>Te in na cuu ndindúu de, áchí Yaā Dios. Núu súcuan te tuá cúu uñ jnāhan de, chí in na cúu. <sup>9</sup>Jeé yúcuan tu iyó váha jeé stóo jnāhan, chí jeé ni squijnāhan Yaā Dios cúu, áchí yá.

<sup>10</sup>Te tēe cáscuáha ún nuū ni quívicoo de vehe, te ni cacajñuhún tucu de ya siquí jñuhun ún. <sup>11</sup>Te ni cahān yā jín de:

Núu ndé tēe stóo de ñasihí de te condeca de inga ñahan, núu súcuan te cásiquí ndé de ñasihí de. <sup>12</sup>Te núu in ñahan stóo ña yí ña te condeca ña inga tēe, suni cásiquí ndé ña de. Achí yá.

*Jeé ni jicān tahú Jesús jehē sūchi lúli*

*(Mt. 19.13-15; Lc. 18.15-17)*

<sup>13</sup>Yūcuán na te ni quecoo ñayuu jín sūchi lúli, jēe na sóo yá ndaha ya xinī i. Te tēe cáscuáha jín yá, ni cacahān de nuū ñayuu vējicoo jín i. <sup>14</sup>Te ni jito Jesús, te ni quitī ni yā, te ni cahān yā jín de:

Cuāha jñuhun na quíjicoo sūchi lúli jínā nuū rī, te ma cási rō jeé quíjicoo i. Chí ñayuu jeé ndió cóo ni i cani ni i nájñuhun sūchi yāha, suu i quívi ndaha Yaā andiví jeé ndacu ya jniñu nuū i. <sup>15</sup>Te jendaá cahān rī jín rō, núu in ñayuu tú cuatáhú i jeé ndacu Yaā Dios jniñu nuū i, nájñuhun jétáhú in sūchi lúli, ma quívi cuiti i ndaha ya, áchí yá.

<sup>16</sup>Te ni nundee ya i, te ni soó yá ndaha ya xinī i, te ni jicān tahú yā jehē i jijnāhan i.

*Jñuhun tēe cúca*

*(Mt. 19.16-30; Lc. 18.18-30)*

<sup>17</sup>Yūcuán na te ni quihin tucu ya ichi cuahān yā. Te jín in tēe ni quee de, te ni jecuiñi yíti de nuū yā, ni cajñuhún de ya:

Tēe váha cúu ní Maestro. Te cachi ní, ¿na jniñu váha sāha ná te nihin tahú na cotecu na ní cáni andiví? áchí de.

<sup>18</sup>Te ni cahān yā jín de:

¿Naun cáhān rō jeé tēe váha cúu ri? Tú ni in tēe váha iyó, chí máá in-ni Yaā Dios. <sup>19</sup>Je jín rō táca jniñu ní ndacu Yaā Dios: Ma cosíquí ndé jnāhan rō. Ma cáhni rō ndiyi. Ma sacuíhná rō. Ma sajnühún rō. Ma stahú rō jnāhan rō. Cuatáhú rō nuū tátá rō nuū naná rō. Achí yá.

<sup>20</sup>Te ni cahān tēe un jín yá:

Táca jniñu yāha je ni squícu ná ndé ná lúli ná, Maestro, achí de.

<sup>21</sup>Yūcuán na te ndáhú jito ya nuū de jeé cúsi ní yā jín de. Te ni cahān yā:

In na jniñu cúmaní sāha rō núu súcuan. Cuahān te xico rō ndihí jeé névāha rō, te cuāha rō núu ñayuu ndahú. Te nde andiví cuāha ya jeé váha ndasí núu rō. Yūcuán na te quiji rō condiquín rō ruhū, te cuāha rō jñuhun ndoho rō jnūdóho jeé siquí rī, achí yá.

<sup>22</sup>Te ná ni jini sōho de jñuhun yāha, te ni jnahuhú ni de, te cúcuíhyá ni de cuahān de, chí cúca ndasí de.

<sup>23</sup>Yūcuán na te Jesús ni ndacoto ya ní xiin ya, te ni cahān yā jín tēe cáscuáha jín yá:

Tēe cúca chí yōhyo yí quívicoo de ndaha Yaā Dios jeé ndacu ya jniñu nuū de, áchí yá.

<sup>24</sup>Te tēe cáscuáha jín yá, yōhyo ni canaa ni de jeé ní cajini de jñuhun ni cahān yā. Te ni cahān tucu ya jín de:

Séhē, ñayuu tēnuú xūhún, yōhyo yí quívicoo i ndaha Yaā Dios jeé ndacu ya jniñu nuū i. <sup>25</sup>Yachí gā yāha in camello yaū yutícu, vésú jeé quívi in ñayuu cucá ndaha Yaā Dios jeé ndacu ya jniñu nuū i, áchí yá.

<sup>26</sup>Te víhyá gā ni canaa ni de cájini de, te ni cacajñuhun jnāhan de:

¿Ndé ñayuu cúu jeé cácu núu súcuan?

<sup>27</sup>Te ni ndacoto ya nuū de, te ni cahān yā:

Ñayuu chí ma cúu squívi i máá i ndaha Yaā Dios, te máá yá chí cuu sāha ya, chí ndihí-ni jniñu cuu sāha ya, achí yá.

<sup>28</sup>Yūcuán na te ni cahān Pedro jín yá:

Saña jijnāhan ná, ní castóo ná ndihí jeé cánevāha ná, te cándiquín na nihín, áchí de.

<sup>29</sup>Te ni cahān Jesús:

Jendaá cahān rī jín rō jijnāhan rō, núu na-ni ñayuu stóo i vehe, chí ñani, chí cuáha, chí tátá, chí náná, chí ñasihí, chí séhe, chí ñuhun, jeé siquí ruhú jín siquí jeé scáca i jñuhun jeé jnáma rī ñayuu, <sup>30</sup>núu súcuan te nanihín i in ciento gā jeé súcuan vijna, cúu vehe, cúu ñani, cúu cuāha, cúu náná, cúu séhe, cúu ñuhun, te nde jín jé cóto xeēn ñayuu i. Te nde inga vida quiji te cotecu i ní cáni. <sup>31</sup>Te cuehē ñayuu jeé vijna cácujeñhu, nduu i ñayuu núu ga. Te ñayuu jeé núu ga vijna, chí ndujéhu i, achí yá.

*Jeé ni cahān tucu ya jeé cúu yá*

*(Mt. 20.17-19; Lc. 18.31-34)*

<sup>32</sup>Te cáñuhun de ichi jeé cáca cuahān ñuu Jerusalén. Te Jesús yósnúu yá nuū tēe cáscuáha ún. Te cánaa ni de ni cajini sōho de jñuhun ni cahān yā. Te cáyūhú de cuángoo de jín yá. Yūcuán na te ni cana sán tucu ya ndihúxi uñ tēe cáscuáha, te ni quejé yá cástühún tucu ya nuū de táca jé quiji siquí yá. <sup>33</sup>Achí yá:

Cuni sōho rō, chí je cuángoo yó ñuu Jerusalén vijna, te yūcuán nastúu ñayuu

ruhū, Yaā ní nduu tēe, nuū sutú cácujeñhu jíin núu tēe cástéén tutu ley. Te ndonda de siquī rī jeē cúu rī, te squívi de ruhū nuū tēe nación Roma jeē cáyucú Jerusalén cándacu jniñu. <sup>34</sup> Te tãca tēe un sãcatã de nuū rī, te cani de ruhū, te tesihí de nuū rī, te sãá te cahni de ruhū. Te nuū uní quívi te natecu rī, achí yã.

*Jeē ní jíicã Jacobo jíin Juan ñn favor nuū yã*

(Mt. 20.20-28)

<sup>35</sup> Yũcuãñ na te Jacobo jíin Juan, ndindúú sēhe Zebedeo, ni quecoo de nuū Jesús, te ni cacahãñ de:

Maestro, cáconi na jēe sãha ní ñn jeē cacãñ na núu ní, achí de.

<sup>36</sup> Te ni cahãñ yã jíin de:

¿Ndese cáconi rō jeē sãha ri jíin rō? achí yã.

<sup>37</sup> Te ni cacahãñ de:

Cuãha ní jnũhun jeē cõnēne ná xiin ní quívi ndujéñhu ní, ñn ná lado váha ní, te inga ná lado jecó ní, achí de.

<sup>38</sup> Yũcuãñ na te ni cahãñ Jesús jíin de:

Tu cájini rō na vé cúu jeē cájicãñ rō. ¿A cuu ndoho rō jnũndóho nájnũhun jeē quíji siquī rī? ¿Te á canda rō ndoho xeēñ rō nájnũhun ndoho rī? achí yã.

<sup>39</sup> Te ni cacahãñ de:

Cuu sãha ná.

Te ni cahãñ yã jíin de:

Jendaá jeē ndoho rō jnũndóho nájnũhun jeē quíji siquī rī, te ndoho xeēñ rō nájnũhun ndoho rī. <sup>40</sup> Te jeē cõnēne rō lado váha ri jíin lado jecó rī, nasũu ruhū cúu jeē cuãha jnũhun. Chi je iyó túhva tuu tãca tēe jeē ní nacãji Tátã rī, te tēe un nihĩn, achí yã.

<sup>41</sup> Te uxí gã tēe cáscuãha un, ní cajini de jnũhun yãha, te ni caquĩtí ni de nuū Jacobo jíin Juan. <sup>42</sup> Te Jesús ni cana ya de, te ni cahãñ yã jíin de:

Cájini rō ndese casãha tēe cácujeñhu nuū ñayuu tãcã nación. Chi cándacu nihĩn de jniñu nuū i, te máá de cáchí ndese coo. <sup>43</sup> Te máá rō jíinãhan rō, chi ma sãha rō súcuãñ. Chi núu ndé ñn rō cúni cújeñhu, sa suhva cuajniñu rō núu jnãhan rō. <sup>44</sup> Te núu ndé ñn rō cúni cuu nuū, sa suhva sãha rō máá rō mozo nuū tãca jnãhan rō. <sup>45</sup> Chi suni súcuãñ sãha ruhū, Yaā ní nduu tēe, chi nasũu jēe véji ri jeē cuajniñu ñayuu nuū rī, chi sa suhva véji ri jeē cuajniñu rī nuū ñayuu. Te cuãha ri máá rī cuu rī návãha jnama ri cuehē ñayuu, achí yã.

*Jeē ní nasávãha ya Bartimeo tēe cuáá*

(Mt. 20.29-34; Lc. 18.35-43)

<sup>46</sup> Yũcuãñ na te ni jinũ yã ñuu Jericó jíin tēe cáscuãha jíin yã. Te sãá te ní quenda ya yũcuãñ jíin de jíin ñayuu cuehē ndasí. Te Bartimeo tēe cuáá, sēhe Timeo, néne de yuhíchi, jíicãñ de caridad. <sup>47</sup> Te ni jini de jnũhun jeē Jesús ñuu Nazaret véji ya. Te ni quejé de cána jee de:

Jesús Sēhe yucũn David, cundáhú ni ní sãña, achí de.

<sup>48</sup> Te cuehē ñayuu ni cacahãñ i nuū de jeē na cási de yuhu de. Te máá de vihyá gã ni cana jee de:

Máá ní jeē cúu ní Sēhe yucũn David, cundáhú ni ní sãña víi, achí de.

<sup>49</sup> Yũcuãñ na te ni jecuiñi Jesús, te ni cahãñ yã:

Canã de na quíji de.

Te ni cacana i tēe cuáá un:

Ndeyí coo ni rō. Ndocuiñi, na quihĩn yō, chí cána ya rohó, achí i jíin de.

<sup>50</sup> Yũcuãñ na te ni scãne de ticãchí de, te yachí ni ndocuiñi de, te ni jinũ de nuū Jesús.

<sup>51</sup> Te ni cahãñ yã jíin de:

¿Na vé cuni rō jeē sãha ri jíin rō?

Te máá de ni cahãñ de:

Maestro, jeē na ndũndijin tinũu ná cuni na, achí de.

<sup>52</sup> Te ni cahãñ Jesús jíin de:

Cuãhãñ núu súcuãñ. Ni candíje rō jeē cuu nasávãha ri rohó, te jeē yũcuãñ ní nduvãha rō, achí yã.

Te ni ndũndijin-ni tinũu de, te ni ndiquĩn de Jesús cuahãñ de jíin yã ichi ún.

*Jeē ní quívi Jesús ñuu Jerusalén*

(Mt. 21.1-11; Lc. 19.28-40; Jn. 12.12-19)

## 11

<sup>1</sup> Te ni cuyajni ya ñuu Jerusalén, véji ya ñuu Betfagé jíin ñuu Betania, jeē íne jehé yucu Olivos. Te ni tají yã uū tēe cáscuãha jíin yã jeē quingoo de. <sup>2</sup> Te achí yã jíin de:

Cuãngoo ñuu luli íne ichi núu. Te núu ni quívi-ni rō yũcuãñ, te nihĩn rō ñn burro nũhni tí, jeē ní ñn tēe ná tu coso de tí. Te ndají rō tí, quijicoo rō jíin tí. <sup>3</sup> Te núu ndé ñn cajnũhũn naun cándají rō tí, te cachi rō: Máá Jítoho yō jíni ñũhũn yã tí, te yachí natajía yã tí ndiji tí, achí rō. Achí yã jíin de.

<sup>4</sup> Te cuangoo de, te ni canihĩn de burro un nũhni tí yehyí núu quēhe nuū náquijnãhan ichi. Te ní candají de tí. <sup>5</sup> Te sava ñayuu cáhĩn yũcuãñ ní cacahãñ jíin de:

¿Na vé cúu jeē casãha rō jeē cándají rō burro jinã? achí i.

<sup>6</sup> Yũcuãñ na te ni cacahãñ de nájnũhun ni cachi Jesús. Te ni casiaá i tí véjicoo de jíin tí. <sup>7</sup> Te ni ndecoo de jíin tí nuū Jesús, te ni caso de sahma de siquī tí, te ni jecosó yã tí. <sup>8</sup> Te cuehē ñayuu ni cascáá i sahma i ini ichi.

Te sava ga i ni cajehnde i ndaha ñũu, te ni cachucun i ini ichi ún.

<sup>9</sup> Te ñayuu cuangoo ichi núu jíin ñayuu cuangoo ichi yátã, cácana jee i:

Yõhoyó cújeñhu ya. Yõhoyó váha Yaā cúu Yaā jeē véji jíin jniñu máá Jítoho yō Yaā Dios. <sup>10</sup> Te yõhoyó luu coo, chí je yajni ndacu ya jniñu nájnũhun ni ndacu jíi yō rey David. Te yõhoyó cújeñhu máá Yaā Dios. Achí i.

<sup>11</sup> Te ni quiví Jesús ñuu Jerusalén, jín ini templo cáhnu. Te ni jito ya nuū tācá ndajñíñu yúcu ní yúcuán. Te ni quenda ya cuahān yā ñuu Betania jín ndihúxi uū de, chi je ni ini.

*Jeē ni cāhān yā nuū yújnu higo*  
(Mt. 21.18-19)

<sup>12</sup> Te inga quiví ún, nuū ní quenda ya ñuu Betania cuahān yā jín de, te jii yā sōco. <sup>13</sup> Te nde jicá ní jito ya ñn nundēhe higo jeē ñn ndaha. Te ni jecundēhe yā nú sanaa te nihin yā ndehē caji yā. Te tú na vé ni nihin yā, chí máá ndaha-ni ñn. Chí nasūu tiempo ndehē cúu. <sup>14</sup> Yūcuán na te ni cāhān yā nuū yujnu ún:

Tuá na ndehē cuun cuiti xiní rō jeē cáji ñayuu, achí yá.

Te tēe cāscuáha jín yá ni cajini de jeē súcuán ni cāhān yā.

*Jeē ní quenehen ya ñayuu ini templo*  
(Mt. 21.12-17; Lc. 19.45-48; Jn. 2.13-22)

<sup>15</sup> Te ni najinū yā jín de ñuu Jerusalén. Te ni quiví ya ini templo cáhnu, te ni quenehen ya ñayuu cájeen quiti te cānaxico nuū ñayuu jeē socó i. Te ni scotúu ndeyi ya tāca mesa tēe cástayí xuhún, jín silla tēe cāxicó paloma. <sup>16</sup> Te tu ní jéhe ya jñūhun jeē yāha ñayuu ini templo jín ndajñíñu ndiso i. <sup>17</sup> Te ni steén yā jñūhun nuū i, achí yá:

Yósó nuū tútu ii jeē cāhān Yā Dios: Vehe ri chí vehe nuū cájicān tahu ñayuu tācá nación cúu, achí yá. Te máá rō jijnáhan rō chí nájnūhun yaū cava ñacuñna ní canasáha rō, achí yá.

<sup>18</sup> Te tēe cástéén tutu ley Yā Dios jín sūtū cācujéhnu, ni cajini de jñūhun yāha, te ni quejéé de cānducú de modo ndese cahni de ya. Chí cáyūhú de jeē ndujéhnu ga maá yá vésú maá de, chí tāca ñayuu yōhgo cācusí ni i cájini i jñūhun steén yā. <sup>19</sup> Te jeē cuácuaa, te ni quenda ya ñuu Jerusalén cuahān yā.

*Jeē ni íchi nundēhe higo*  
(Mt. 21.20-22)

<sup>20</sup> Te jenéhen inga quiví ni nayāha ya jín de cuahān yā. Te ni cajito de jeē nundēhe higo un je ni íchi nde yoho. <sup>21</sup> Yūcuán na te ni nucūhun ni Pedro, te ni cāhān de jín yá:

Maestro, cundēhe ní nundēhe higo jeē ni cāhān ni nuū, te vijna je ni íchi caján, achí de.

<sup>22</sup> Te ni cāhān Jesús jín de:

Candíje rō jéē sáha Yā Dios jeē jicán rō. <sup>23</sup> Chí jendaá cāhān ri jín rō, núu ndé ñayuu cāhān i jeē cújiyo yucu yāha quihín nde nuū mar, te núu tú nacani siquí ní i, chí sa suhva candíje i jeē cóo nájnūhun ni cāhān i, yūcuán na te cundaá jeē ní jicán i. <sup>24</sup> Jeē yúcuán cāhān rī jín rō, tāca jéē cacán tahu rō, te núu candíje rō jéē nihin rō, te nihin rō. <sup>25</sup> Te jeē cájicān tahu rō, te cone cáhnu ni rō nuū ñayuu casáha cuéchi siquí rō, návāha máá

Tátá rō jeē ndeé yá andiví, suni cone cáhnu ni yā nuū cuéchi rō. <sup>26</sup> Chí nuū tú cone cáhnu ni rō nuū jnāhan rō, te suni máá Tátá rō jeē ndeé yá andiví, ma cóne cáhnu ni yā nuū cuéchi rō, achí yá.

*Siquí jeē ndiso jñíñu Jesús*  
(Mt. 21.23-27; Lc. 20.1-8)

<sup>27</sup> Yūcuán na te ni najinū tucu ya ñuu Jerusalén. Te jica cuu ya ini templo cáhnu. Te sutū cācujéhnu jín tēe cástéén tutu ley Yā Dios jín tēe jéhnu cāndacu jñíñu, ni quecco de nuū yā. <sup>28</sup> Te ni cacajnūhun de ya:

¿Nde ní nihin jñíñu rō jéē sáha rō jñíñu yáha? ¿Te ndé ñn ni tee jñíñu siquí rō jeē sáha rō súcuán? achí de.

<sup>29</sup> Te ni cāhān Jesús:

Suni ruhū, cajnūhun rī rohó ñn jñūhun jijnáhan rō. Te núu cuu stío cuñí rō, yūcuán na te cachi rī nuū rō ndé ní nihin jñíñu ri jeē sáha ri jñíñu yáha. <sup>30</sup> ¿Nde ñn ni tee jñíñu siquí Juan jeē ní scuándute de? ¿A Yā Dios chí táca tēe? Cachi nuū rī, achí yá.

<sup>31</sup> Yūcuán na te ni candajnūhun máá de:

Núu cāhān yō jeē Yā Dios ni tee ya jñíñu un siquí Juan, te cāhān de jín yó: Núu súcuán ¿te najehē tu ní cācandíje rō de? <sup>32</sup> Te núu cāhān yō jeē ñayuu ni catee jñíñu un siquí de, te quiti ní ñayuu nuū yō, achí de cācāhān máá de.

Chí cáyūhú de jeē quiti ní ñayuu, chí ndivii i cācandíje i jeē tēe ni nacani jñūhun Yā Dios ni cuu ndije Juan. <sup>33</sup> Jeē yúcuán ní cacahān de jín yá:

Tu cájini rī, achí de.

Yūcuán na te ni cāhān Jesús:

Ni ruhū, suni ma cachi rī nuū rō ndé ñn ni tee jñíñu siquí rī sáha ri jñíñu yáha, achí yá.

*Jñūhun yátá siquí tēe néé cásajñíñu nuū uva*

(Mt. 21.33-46; Lc. 20.9-19)

## 12

<sup>1</sup> Te ni quejéé yá cāhān yā jñūhun yátá jín de jijnáhan de:

Ñn tēe ni nachuhun de cuehē uva, te ni jesi de corral, te ni sáha de ñn nuū cūhun ndehē un táxin. Te ni sáha de ñn vehe súcún návāha cuu coto de ní cáhnu.

Te ni stóo de nuū sava tēe sájñíñu nuū, te cuu sava de ndehē jín. Te ni tee de íchi cuahān jicá de. <sup>2</sup> Te máá tiempo ndutútu uva, te ni tají de ñn mozo de cuanuquihin sava uva nuū tēe cásajñíñu ún. <sup>3</sup> Te tēe un ní cajñi de mozo un, te ni cacani de i, te ni canatajái de i cuanuhun i súcuán-ni. <sup>4</sup> Yūcuán na te tēe chí uva un ní tají tucu de inga mozo cuahān. Te tēe cásajñíñu un ní cajéhe de yūu xiní mozo un, te ní castúji de, te ni cacahān ndevāha de nuū. <sup>5</sup> Te tēe chí uva ni tají tucu de inga mozo cuahān. Te ni cajehni de i. Te

suní súcuan ni tají de cuehē gā mozo cuahān, te sava i ni cacani de, te sava i ni cajehni de.

<sup>6</sup> Te tēe chíí uva, íyó iin sēhe de jeē maní ndasí de jíin. Te jeē sándihí na ni tají de sēhe de un cuahān nuū tēe cásájniñu. Te jéni ni de: Tēe ún chí cuatáhú de jíjnánhan de nuū sēhe ri. <sup>7</sup> Te tēe cásájniñu un ní cacahān maá: Tēe chíí táhū cúu jeē yáha. Na cáhni yō de, te ndōo tahū de cuu máá yó, achí. <sup>8</sup> Te ni cajni de i, ni cajehni de i, te ni cascáne de i inga lado. Achí yá.

<sup>9</sup> Yūcuán na te ni cajnūhun yá de:

Núu súcuan ¿te ndese sáha tēe chíí uva un? Ndií de te cahni de tēe cásájniñu ún, te cuáha de ñuhun cáá uva un núu inga sava tēe sájniñu nuū.

<sup>10</sup> ¿Te á ná tu cahu ró jnūhun yáha jēe yosó núu tútu íi, jeé ruhū cúu nájñūhun iin yuū? Chí achí tutu:

Yuū jeē ní casquéhichí tēe cájeni vehe, yuū yáha nduu jeē quítuu vehe.

<sup>11</sup> Máá Jítoho yō Yaā Dios ní sáha ya súcuan, te cánaa ni yō jíto yō jniñu yáha. Achí tutu, achí yá.

<sup>12</sup> Yūcuán na te ni canducú de modo jni de ya. Chí ni cajecūhun ni de jeē siquī maá de cúu jñūhun yátá ní cahān yā siquī tēe cásájniñu nuū uva jíin tēe cájeni vehe. Te siquī jeē cáyūhú de jeē quítu ní ñayuu, te ni castóo de ya te cuango de.

*Siquī xūhun renta*

(Mt. 22.15-22; Lc. 20.20-26)

<sup>13</sup> Yūcuán na te ni catají de sava tēe grupo fariseo jíin tēe grupo Herodes cuango de nuū yā, ndúcú de ndese sáha de návāha cahān yā iin jñūhun jeē niñin de cuēchi siquī yá. <sup>14</sup> Te ni quecoo de, te ni cacahān de jíin yá:

Maestro, cájini na jēe tēe cáhán ndaā cúu ní, te tu yúhú ní jeē cahán ni iin ñayuu siquī ní. Chí tu sáha ní cuenta ndese cúu iin iin i, chí inuú-ni sáha ní jíin i. Te stéén ndaā ní ndese squícu ñayuu nuū Yaā Dios. ¿Te á íyó váha jeē chúnaa yō renta nuū rey nación Roma jeē jni nación yō, chí tuú? ¿A chúnaa yō, chí má chúnaa yō? Achí de jíin yá.

<sup>15</sup> Te máá yá jíni yá jeē stahú-ni de, te ni cahān yā jíin de:

¿Najehē cájito ndee rō ruhū? Cuāha iin xūhūn na cóto ri, achí yá.

<sup>16</sup> Te ni cajēhe de xūhūn. Te ni jito ya, te ni cajnūhun yá de:

¿Ndeé iin nuū cúu jeē ndeé nuū xūhūn yáha, te ndé síhví cúu jeē ndeé yáhá?

Te ni cacahān de jíin yá:

Nuū jíin síhví rey un cúu, achí de.

<sup>17</sup> Yūcuán na te ni cahān yā jíin de:

Núu súcuan te nacuāha ró núu rey un jēe yíhi cuenta nuū de, te nacuāha ró núu Yaā Dios táca jēe yíhi cuenta nuū máá yá, achí yá.

Te ni canaa ni de ni cajini de jeē ndichí ní cahān yā.

*Jeē ní cacajnūhún de siquī jeē nátecu ndíyi*  
(Mt. 22.23-33; Lc. 20.27-40)

<sup>18</sup> Yūcuán na te jecu tēe grupo saduceo ni quecoo de nuū yá. Te tēe un cácahān jeē tu nátecu cuiti ndíyi. Te ni cacahān de jíin yá siquī iin jñūhun, achí de:

<sup>19</sup> Maestro, Moisés ni tee de nuū tútu jeē cánevāha yō: Núu iin tēe cuu de, te ndōo ñasihí de, te núu tu ní íyo sēhe de jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuñí i nuū ndíyi ñani de, achí tutu. <sup>20</sup> Núu súcuan te ní íyo uxá ñani. Te tēe núu ní quijnáhan de jíin ñahan. Te ní jihí de, te tū sēhe de ní íyo. <sup>21</sup> Te tēe uū ní naquihin de ña, te suni ní jihí de, te tū sēhe de ní íyo. Te suni súcuan tēe uní. <sup>22</sup> Te ndihúxá de ní condeca de ña, te ní iin de tū sēhe de ní íyo. Te jeē sándihí te suni ní jihí ñahan ún. <sup>23</sup> Núu súcuan te núu na nátecu de jíjnánhan de quiví nátecu ndíyi, ¿te ndé iin de cuu ña ñasihí de? Chí ndihúxá de ní condeca de ña. Achí de jíin yá.

<sup>24</sup> Yūcuán na te ni cahān yā jíin de:

Yōhyo cástívi ró jñūhun siquī jeē tu cájecūhun ní rō jeē cahān tutu íi, ni tu cájini rō jeē íyó poder Yaā Dios jeē nastécu yá ndíyi. <sup>25</sup> Chí quiví nátecu ndíyi, te tuá na jñūhun quijnáhan tēe jíin ñahan coo. Chí coo i nájñūhun ndajéhe Yaā Dios andiví. <sup>26</sup> Te siquī jeē nátecu ndíyi, ¿á tu ní cácahu ró tutu ní tee Moisés, ndese ni cahān Yaā Dios jíin de méhñu yúcu jeē cayú yáñuhun? Máá rí cúu Yaā Dios Abraham jíin Isaac jíin Jacob, achí yá jíin Moisés. <sup>27</sup> Chí vēsú je ní cajihí de, te cátecu de nuū íyó máá yá, chí cúu ya Yaā sáha jeē técu ñayuu ní cáni. Yōhyo cástívi ró jñūhun núu súcuan. Achí yá jíin de.

*Jniñu cánuú ndasí gá jeē ní ndacu Yaā Dios*

(Mt. 22.34-40)

<sup>28</sup> Te ni quee iin tēe stéén tutu ley Yaā Dios, te ni jini de jeē castichí jnánhan tēe un jíin Jesús. Te ni jini de jēe váha ni nastiō cuñí yá jñūhun. Te ni cajnūhún de ya:

¿Ndeé iin cúu jñūhun ndácu jniñu cánuú ndasí gá nuū táca gá jniñu ní ndacu ya jehnahān? achí de.

<sup>29</sup> Te ni cahān Jesús jíin de:

Yáha cúu jniñu jeē cánuú ndasí gá nuū táca gá. Achí tutu: Ñayuu Israel, cuni nahín ró. Máá Jítoho yō Yaā Dios, maá iin-ni ya íyó.

<sup>30</sup> Núu súcuan te coo maní ndasí ró jíin máá Jítoho ró Yaā Dios, nde jnāá ndasí ró sáha ró ndihí jeē cúsi ni yá, nde jíin ini jíin ánuá ró, jíin ní jeē njñūni ró, jíin ní fuerza ró. Yaha cúu jniñu ndácu ya jeē cánuú ndasí gá. <sup>31</sup> Te jniñu uū jeē ní ndacu ya, suni súcuan cáhán: Cundáhú ní ró jnánhan ró nájñūhun cundáhú ní ró máá ró. Tuá inga jñūhun ndácu jniñu



cánuú gá iyó, chi suu máá jéé yáha-ni. Achí yá jín de.

<sup>32</sup> Yūcuán na te ni cahān tēe stéén tutu ley jín yá:

Váha ni cahān ní, Maestro. Chi ndaā chi iyó ñni-ni Yaā Dios, te tuá na inga yá iyó. <sup>33</sup> Te cánuú jéé coo maní ndasí yó jín yá nde jín ini jín ánuá yó, jín ní jéé ñijnūnī yó, jín ní fuerza yó, te cundáhú ni yó jnāhan yó ñajnūhun cundáhú ni yó máá yó. Te cánuú ndasí gá jéé yáha vēsú jéé cáhmu yó quiti jín táca gá jéé socó yó nuū yā. Achí de jín yá.

<sup>34</sup> Yūcuán na te ni jini Jesús jéé váha ni stío cuñí de, te ni cahān yá jín de:

Je yajni cuu quiví ró ndaha Yaā Dios jee ndacu ya jniñu nuū rō, achí yá.

Yūcuán na te ni ñni ga de, tuá ni chūndeyí ni de cajñuhún de ya.

*Siquí jéé cúu Cristo sēhe yucūn David*  
(Mt. 22.41-46; Lc. 20.41-44)

<sup>35</sup> Te stéén Jesús jñūhun ini templo, te ni cahān yá:

¿Ndese cúu jéé cácahān tēe cástéén tutu ley Yaā Dios jéé Cristo cúu sēhe yucūn David?

<sup>36</sup> Chi máá David suhva ni cahān de jñūhun ya ni sáha Espíritu Santo nde jenhán:

Máá Jítoho yó Yaā Dios ni cahān yá jín Jítoho rí, Yaā quiji:

Cucóo ró lado váha ri nuū cujéhnú ró, te na sáha ri jéé quende ró poder táca jéé cájito uhū rohó.

Achí Yaā Dios. Achí David. <sup>37</sup> Te núu sēhe yucūn David cúu Cristo, ¿te ndese cúu jéé ni cahān de jéé Jítoho de cúu ya? áchí yá.

Te ñayuu cuehē, cánujnahan ni i cájini nahún i táca jñūhun cáhán yá.

*Jéé ni cáhān yá jéé iyó cuéchi de jijnāhan de*  
(Mt. 23.1-36; Lc. 11.37-54; 20.45-47)

<sup>38</sup> Te stéén yá jñūhun, te ni cahān yá jín i:

Coto má candíje ró táca tēe cástéén tutu ley. Chi cácusí ni de cáñuhun de sahma cáni jéé stéén jéé cujéhnú de, cájica cuu de jín. Te cánujnahan ni de jéé cáhán yññuhún ñayuu jín de ini calle. <sup>39</sup> Te cánujnahan ni de cucóo de nuū silla yññuhún gá ini vehe ñi sinagoga, jín silla yññuhún gá nuū víco cáyeji ñayuu. <sup>40</sup> Te cáquende de vehe ñahan ní caquendóo ndáhú. Te nahán cájicān tahú de návaha cani ni ñayuu jéé tú na cuéchi de. Tēe yáha jijnāhan de chi xeēn gā ndoho de castigo. Achí yá.

*Jéé ni sócō ñahan viuda xūhún*  
(Lc. 21.1-4)

<sup>41</sup> Te ñni quiví néne Jesús ini templo ichi núú táca yéjnū nuū casocó i xūhún. Te jito ya ndese cáchuhun ñayuu xūhún ini yéjnū ún. Te cuehē ñayuu cucá ní cachuhun i cuehē xūhún. <sup>42</sup> Te ni quee ñni ñahan viuda jéé ndóho ndáhú. Te ni chuhun ña uū centavo lulí ini yéjnū ún. <sup>43</sup> Yūcuán na te ni cana ya tēe cáscuáha jín yá, te ni cahān yá jín de:

Jendaá cahán rí jín ró jéé cuehē gá cúu jéé ni sócō ñahan viuda ndahú yáha, vēsú jéé ní casocó táca ñayuu cucá. <sup>44</sup> Chi táca i ni casocó i jéé ni ndóo siquí xūhun cuéhē i. Te ñahan yáha, vēsú ndahú ndóho ña, te ni chuhun ndihí ña jéé cótecu ña. Achí yá jín de.

*Jéé ní cachi yá jéé náa templo*  
(Mt. 24.1-2; Lc. 21.5-6)

## 13

<sup>1</sup> Te ni quenda Jesús ini templo cáhnu, te ñni tēe scuáha jín yá ni cahān de:

Maestro, condēhe ní ná luu jito táca vehe yáha jéé cúu templo, jín táca yúu jéé ní cuváha, áchí de.

<sup>2</sup> Te ni cahān yá jín de:

Táca vehe nahnu yáha jéé cájito ró, chi ma cóso jnāhan ga ni ñni yuū, chi ndihí jnanū. Achí yá.

*Na seña coo nuū cuacuyajni ndihí ñayiví*  
(Mt. 24.3-28; Lc. 21.7-24; 17.22-24)

<sup>3</sup> Te ni jehēn yá jín de yucu Olivos jéé ñe ichi núú templo cáhnu. Te ni cucóo ya yūcuán. Te Pedro jín Jacobo jín Juan jín Andrés ni cacajñuhun sán de ya:

<sup>4</sup> Castūhun ní nuū ná, ¿ndé quiví coo táca jéé ní cachi ní jéé coo? ¿Te na seña coo núu cuacuyajni squícu táca jéé ni cahān ní? áchí de.

<sup>5</sup> Te ni cahān yá jín de:

Coto ró jéé ma stahú ni ñni de róhó. <sup>6</sup> Chi quijicoo cuehē tēe jéé stahú jín shví rí. Máá rí cúu Cristo, achí de. Te súcuan stáhú de cuehē ñayuu.

<sup>7</sup> Te ñihñ rō jñūhun jéé táca lado iyó guerra, chí je yajni coo guerra. Te ma yūhu ró, chí cánuú coo súcuan. Te ni ná tu jínū quiví ndihí ñayiví. <sup>8</sup> Chi ndonda nación siquí inga nación, te ndonda ñuu siquí inga ñuu jéé cuajñahan. Te cháha chúcuan jñāa, te coo jnamā, te ndonda ñayuu siquí jñāhan i. Te táca jéé yáha cácuu jñūndóho quejéé xíhna ñuhún gá.

<sup>9</sup> Te condito ró máá ró, chí nastúu i róhó núú táca tóhó, te ini táca vehe ñi sinagoga cani i róhó. Te quindecia i sava ró núú táca gobernador jín núú táca rey, te cahān i cuéchi siquí ró siquí jéé cáandíje ró rúhū. Te súcuan te cuu nacani ró jñūhun ri nuū de. <sup>10</sup> Te jini ñuhún jéé xíhna gá cuitē núu jñūhun nuū táca nación ndese jñāma ri i, te sáa te ndihí quiví. <sup>11</sup> Te núu ni cajñi de róhó cuángoo de jín ró nuú táca tóhó, te ma nácani ni ró xíhna gā ndese stío cuñí ró nuū de te cácu ró. Chí máá hora un te máá Yaā Dios cuáha ya jñūhun nuū ró ndese cahān ró, te jñūhun ún cahān ró. Chí nastúu máá ró cúu jéé cahān, chí Espíritu Santo cúu jéé cahān. <sup>12</sup> Te ñani jín ñani nastúu jñāhan jéé na cúu. Te tátá nastúu sēhe jéé cúu. Te sēhe ndonda siquí tatá jín náná jéé cahni. <sup>13</sup> Te táca ñayuu

quiti ni i nuū rō jeē siquí ruhū. Te ñayuu cuiñi nihin jín jnúhun rí nde quiví jínu, chí cácu i.

<sup>14</sup> Te Daniel, tē ni nacani jnúhun Yaā Dios, ni tee de jnúhun ñn tē neé jēe quíji. Te rōhó jēe cácahu tutu ún, na jécúhun ni rō. Chí ñn quiví te cuni rō jeē sáha ndeváha de jeē stívi de táca ndajniñu ñi ini templo, te cuiñi de nuū tú na ley cuiñi de. Te núu cuni rō jeē súcuan cúu, te ñayuu cáyūcú región Judea, na cúu i caa i yucu quingoo i. <sup>15</sup> Te ñayuu cáyūcu núu quehe, ma ndívi i ini vehe jeē quénehen i ndajniñu i, chí cánuú cunu yachí i náváha cácu i. <sup>16</sup> Te ñayuu cáhiin nuū ítu, ma ndíji i vehe jeē quihín i sahma i. <sup>17</sup> Te quiví ún nacá jeē ndahú ñahan cáñuhun sēhe jín ñahan cándeca yiquín, chí ma cúnihin ña cunu yachí ña. <sup>18</sup> Te cacān tahú rō jeē ma quíji jnúndóho un jēe cunu rō máa tiempo cúun yuhvá. <sup>19</sup> Chí jeē quejéé un te coo cuehē jnúndóho xeēn, jeē ná tu coo súcuan nde quiví ní sáha Yaā Dios ñayiví te nde vijna. Te jeē ndíhi jnúndóho ún te ni ma cóo ga jeē súcuan. <sup>20</sup> Te núu tú nastívi máa Jítoho yō Yaā Dios tiempo jnúndóho ún, te ni ñn ñayuu ma cácu cuiñi i. Te jeē siquí ñayuu cácañdije jeē ní nacáji ya, jeē yúcuán nastívi ya tiempo un.

<sup>21</sup> Núu súcuan te núu ñn ñayuu cahān jín rō: Yāhá condēhe rō ñe Cristo, chí: Yūcuán condēhe rō ñe ya, achí i, te ma candíje rō jēe cahān i. <sup>22</sup> Chí canecoo tēe cástáhú te cahān de jeē Cristo cúu de, chí cahān de jeē tēe nácani jnúhun Yaā Dios cúu de. Te sáha de jniñu jēhu jeē naa ni ñayuu coto i, náváha stáhú de nde máa ñayuu ní nacáji ya, te núu na cúu. <sup>23</sup> Te ndito na cóo ni rō, chí je ni castúhun rí nuū rō vijna nde ná tu coo.

*Ndese coo quiví ndiji Yaā ní nduu tēe*  
(Mt. 24.29-35, 42-44; Lc. 21.25-36)

<sup>24</sup> Te quiví ún, núu je ni ndíhi jnúndóho ún, te kujnúú níandii, te yoō ma ndíi gā. <sup>25</sup> Te ningoo quími ñn andiví. Te táca jēe ñn andiví chí quisi i. <sup>26</sup> Yūcuán na te coto ñayuu nuū maá rí, Yaā ní nduu tēe, ndíji rí jín vícō, te condiso rí cuehē poder, te yōhoyo luu cujéhu rí. <sup>27</sup> Yūcuán na te tají rí ndajéhe rí quinastútú yá ñayuu ní nacáji rí ndicúún lado ñayiví, nde nuū ndíhi ñayiví te nde nuū ndíhi andiví.

<sup>28</sup> Vijna te scuáha rō ndese sáha nundēhe higo: Núu je ni nane numa, te ni najee ndaha, te cájini rō jeē jé ni cuyajni tiempo jihni. <sup>29</sup> Te suni súcuan núu ni cajini rō jeē ní quejéé cúu táca jniñu jeē ní cahān rí, yūcuán na te na jécúhun ni rō jeē ní cuyajni quiví ndíji rí, te yachí coo. <sup>30</sup> Jendaá cahān rí jín rō jeē ma cúu ndíhi ñayuu jeē cóto jnúndóho ún, chí nde squícu ndíhi jniñu ún. <sup>31</sup> Andiví jín ñayiví chí naa, te táca jnúhun cahān rí chí ma náa, chí ndíhi squícu.

<sup>32</sup> Te quiví jín hora jeē ndíji rí, tú ni ñn ñayuu jini, ní máa ndajéhe cáhiyo andiví, ní

maá rí, Sēhe Yaā Dios. Chí máa ñn ni Tátá rí cúu jeé jini.

<sup>33</sup> Núu súcuan te na cócuhun ni rō táca jnúhun yáha, te ndito na cóo ni rō, te cacān tahú rō, chí tu cájini rō na quiví ndíji rí. <sup>34</sup> Chí coo nájñuhun ñn tēe jeē quihín jicá de, te nde ná tu quenda de vehe de, te ni ndacu de jniñu nuū táca mozo de ndese sáha ñn ñn de. Te ni ndacu de jniñu nuū tēe ndito yéhyí jēe na cóndito de. <sup>35</sup> Te suni súcuan rōhó jínñahan rō, ndito na cóo ni rō. Chí cúu rí nájñuhun jitohe vehe ún, te tu cájini rō na hora ndíji rí, á jēe cuácuua, chí ñuú, chí jēe cána líhli, chí jénéhen. <sup>36</sup> Chí ñn sanaa-ni te ndíji rí, te coto rō jēe ma nánihín rí rohó jēe tu ndito rō. <sup>37</sup> Te jnúhun cahān rí jín rō jínñahan rō, suni cahān rí jín ndívi ñayuu: Ndito na cóo ni rō jínñahan rō. Achí yá.

*Jeē ní casquínñahan de jnúhun jeē jni de Jesús*

(Mt. 26.1-5; Lc. 22.1-2; Jn. 11.45-53)

## 14

<sup>1</sup> Te cúmani uū gā quiví te quejéé vico pascua jeē cáyeji ñayuu hebreo pan jeé tú na levadura yáhi. Te sutú cácujeñhu jín tēe cástéén tutu ley, ni canducú de modo ndese jni de Jesús jín jnúhun stáhú, te cahni de ya.

<sup>2</sup> Te ni cacahān de:

Ma jni yó de máa quiví vico, chí ndonda ñayuu siquí yō, achí de.

*Jnúhun ñahan jeē ní chuhun perfume xini yá*

(Mt. 26.6-13; Jn. 12.1-8)

<sup>3</sup> Te ñe Jesús ñu Betania vehe Simón, tēe ni ndoho cuehyí stehyú. Te níni yéji yá staá, te ni quee ñn ñahan nuū yá, ndáha ña ñn frasco yuū luu jeē ññuhun aceite perfume, jeé maní ita nardo cúu, te yōhoyo yahu ndéé. Te ni tahú ña frasco un, te ni chuhun ña xini yá. <sup>4</sup> Te sava tēe cáhiin yūcuán ní caquiti ni de, te ni cacahān de:

¿Najehē cúu jeē náa saá-ni perfume jiñá?

<sup>5</sup> Chí cuu xicó yahu yó víhyá gā uní ciento denario, te cuáha yo núu ñayuu ndahú núu, achí de.

Te ni cacahān sóo de jín ña.

<sup>6</sup> Te ni cahān Jesús:

Ma stáhān rō ña. ¿Naun casáha rō jēe nácani uhū ni ña? Chí ñn jniñu váha cúu jeē ní sáha ña jín rí. <sup>7</sup> Chí níni coyūcu ñayuu ndahú jín rō, te núu cácu ni rō te cuu sáha váha rō jín i. Te ruhú chí tuá condee rí jín rí. <sup>8</sup> Chí ní sáha ña ndíhi jeē cuu sáha ña jeé maní ña jín rí. Chí nde ná tu quindúji rí te je ní sátúhva ña ruhú jeé ní chuhun ña perfume ruhú. <sup>9</sup> Jendaá cahān rí jín rō jeé ní cánu ñayiví ndé-ni cúu nuū cuité núu jnúhun jeé jnáma rí ñayuu, suni nacani i jnúhun jeé ní sáha ñahan yáha, náváha cocuhun ni ñayuu ña, achí yá.

*Jeē ní nastúu Judas yā*  
(Mt. 26.14-16; Lc. 22.3-6)

<sup>10</sup> Yūcuán na te Judas Iscariote, ñin jeē ndihúxí uū tēe cáscuáha un, ní jehēn de nuū sutú cácujeñhu, ní sándaá de jíin jeē nastúu de Jesús nuū jijnáhan. <sup>11</sup> Te nuū ní cajini sōho sutú un jeē cahán de, te ni cacusñ ni, te ni cajejnūhun jeē cuáha xūhun nuū de. Te nde quiví un ní nducú de modo ndese nastúu de ya.

*Jeē ní jequin yā Cena yā*

(Mt. 26.17-29; Lc. 22.7-23; Jn. 13.21-30; 1 Co. 11.23-26)

<sup>12</sup> Te ni quee máá quiví jeē quejéé vico pascua jeē cáyeji ñayuu pan jeē tú na levadura yíhi, te suni quiví un cájeñhi i londe nájñūhun ni ndacu Yaā Dios jñiñu jeē sáha i vico pascua un. Te tēe cáscuáha un ní cacajnūhún de ya:

¿Nde nuū cuní ní jeē quisátūhva ná cuxíni ní vico pascua? áchí de.

<sup>13</sup> Te ni tají yá uū tēe cáscuáha ún quingoo de, te áchí yá jíin de:

Cuángoo nde ñuu, te yūcuán najnáhan ró jíin ñin tēe ndíso quiví ndute. Te condiquín ró de quihín ró jíin de. <sup>14</sup> Te vehe jeē ndívi de, yūcuán cáhān ró jíin tēe chíí vehe: Achí máá Maestro: ¿Nde ñin cúu cuarto vehe ní cuáha núu ní nuū cuxíni ya vico pascua jíin tēe cáscuáha jíin yá? áchí ró. <sup>15</sup> Te máá de stéén de ñin cuarto cáhnu nde xiní véhe jeē je íyó túhva. Te yūcuán sátūhva ró jeē cuxíni yó, áchí yá jíin de.

<sup>16</sup> Te quingoo tēe cáscuáha ún, te ni jinūcoo de ñuu, te ni canihín de nájñūhun ni cahān yā jíin de. Te ni casátūhva de jeē cuxíni ya vico pascua.

<sup>17</sup> Te jeē cuácuua, te ni quee ya jíin ndihúxí uū de. <sup>18</sup> Te ni cacucōo de mesa cáyeji de staā, te ni cahān yā:

Jendaá cahān rī jíin ró jeē ñin róhó jeē yéji jíin rī, nastúu ro ruhū, áchí yá.

<sup>19</sup> Yūcuán na te ni cacucuíhyá ni de, te ná ñin ná ñin de ni cacajnūhún de ya:

¿A sáña cúu? áchí ñin de.

Te suni súcuán ñnga de:

¿A sáña cúu? áchí ñin ñin de.

<sup>20</sup> Te ni cahān yā jíin de:

Ñin jeē uxí uū ró jeē cáyeji cáhnu jíin rī ñin cohō, suu nastúu ruhū. <sup>21</sup> Te ruhū, Yaā ní nduu tēe, jendaá cúu jeē quihín rī cuu rī, nájñūhun yósó jñūhun rī nuū tútu ñi. Te nacā xeēn ndoho tēe nastúu ruhū. Vāha ga núu tu ní cácu tēe un núu, áchí yá.

<sup>22</sup> Te níni cáyeji de jíin yá, te ni quihin ya pan, te ni nacuatáhú yá, te ni tahú cuéché yá, te ni jēhe ya nuū tēe cáscuáha jíin yá. Te ni cahān yā:

Cají ró jijnáhan ró, chí yāha cúu yiqui cúñu rī, áchí yá.

<sup>23</sup> Yūcuán na te ni quihin ya ñin copa ndūxi uva, te ni nacuatáhú yá, te ni jēhe ya ni cajihí ndihí de. <sup>24</sup> Te ni cahān yā jíin de:

Yāha cúu ñiñ rī jeē cuáha rī jeē cúu contrato jeé, te cati jeē ndundo cuéchi cuehē ñayuu. <sup>25</sup> Te jendaá cahān rī jíin ró jeē ndé vijna te ma cóho ga rī ndūxi ndehē uva yāhá, chí nde quiji quiví ndacu Yaā Dios jñiñu ní ñayiví, te sáá te coho tucu rī jíin ró jijnáhan ró. Achí yá.

*Jeē ní cachí yā jeē yūhu Pedro cahān de jeē jíin de ya*

(Mt. 26.30-35; Lc. 22.31-34; Jn. 13.36-38)

<sup>26</sup> Te ni jita ya ñin yaa ñi jíin de jijnáhan de. Te ni quenda ya cuahān yā jíin de nde yucu Olivos. <sup>27</sup> Yūcuán na te ni cahān yā:

Ndivii ró nayūhu ró jeē siquí ruhū jecuáa vijna. Chí suhva je yósó jñūhun rī nuū tútu ñi, ní cahān Yaā Dios: Cuáha rī jñūhun jeē cáhni ñayuu tēe ndíto lanchi, te lanchi un cuíté núu tí jeē yūhu tí, áchí. <sup>28</sup> Te jeē nátecu rī, te xihna ruhū cosnúu rí quihín rī región Galilea, te sáá te najinūcoo ró, áchí yá.

<sup>29</sup> Yūcuán na te ni cahān Pedro:

Vesú ndihí de na náyuhú de, te máá ná chí ma náyuhú cuiti ná, áchí de jíin yá.

<sup>30</sup> Te ni cahān yā jíin de:

Jendaá cahān rī jíin ró jeē jecuáa vijna, nde ná tu cana líhli uū jínu, te yūhu ró jeē jñii ñayuu rohó, te uní jínu cahān ró jeē tu jíin ró ruhū, áchí yá.

<sup>31</sup> Te ni cahān teyí de jíin yá:

Vesú núu cuu na jíin ní, te ma cahān cuiti na jéē tu jíin na níhín, áchí de.

Te suni súcuán ní cacahān ndihí de.

*Jeē ní jicān tahú yā nuū huerto Getsemaní*  
(Mt. 26.36-46; Lc. 22.39-46)

<sup>32</sup> Yūcuán na te ni jinū Jesús jíin tēe cáscuáha jíin yá ñin lugar nuū naní Getsemaní. Te ni cahān yā jíin de:

Yāhá-ñi cucōo ró, te na quihín rī cacān tahú rī, áchí yá.

<sup>33</sup> Te ni jeca ya Pedro jíin Jacobo jíin Juan, cuahān yā jíin de. Te ni quejéé yá cucuíhyá ndasí ní yā te cúxi ní yā jeē quiji jñūdóho siquí yā. <sup>34</sup> Te ni cahān yā jíin de:

Yōhoyo cúcuíhyá ní rī, te ndúcú sáha jeē cúu rī. Yāhá condetu ró te condito ró, áchí yá.

<sup>35</sup> Te ni jica ya jecu gā, te ni jecuíñ yití yá ní jequin ya nuū yā nuū ññūhun. Te ni jicān tahú yā nuū Yaā Dios jeē núu cuu te ma ndóho ya jñūdóho jeē quejéé quiji siquí yā. <sup>36</sup> Te suhva ní cahān yā:

Tátá máá ná, ndihí-ñi jñiñu cuu sáha máá ní. Te tejiyo ní jñūdóho yāha jéé ma quiji siquí ná. Te nasūu jéé cuní máá ná, chí jeé cuní máá ní na cóo, áchí yá.

<sup>37</sup> Te ni ndee yā nuū ndinúni tēe cáscuáha jíin yá, te ní jito ya jeē cáquixí de. Te ni cahān yā jíin Pedro:

Simón, ¿á quíxi rō? ¿A tu ní cánda ró condito ró jín rí vēsú ñn hora? <sup>38</sup> Coo ndito ni rō te cacān tahú rō jeē chindéé ñáhán yá rohó jeē ma sáha ró cuēchi jeē coto ndee jeneé rōhó. Chi cúní ndije ánuá rō squícu vāha ró, te yiqui cúñu rō chi tu fuerza, achí yá.

<sup>39</sup> Te ni jehēn tucu ya, ni jicān tahú yā, te suni jñūhun yūcuán ní cahān yā. <sup>40</sup> Te ni ndee ya nuū de, te ni jito ya jeē cáquixi tucu de, chí yōhyo cájii de máhna. Te tuá ní cánihīn de jñūhun stío cuñi de nuū yā. <sup>41</sup> Te ni ndee yá jeē vuelta unī, te ni cahān yá jín de:

Vijna te cusú rō te ndetātu rō. Te tuú chi je ni cuu, chí je ni quee hora, te ruhū, Yāá ní nduu tēe, natūu rí te jñii tēe cáhīyo cuēchi ruhū. <sup>42</sup> Ndociuñi jijnáhan ró, chí je vēji tēe nastúu ruhū, te quihīn yō jín de. Achí yá.

*Jeē ní cajni de Jesús*

(Mt. 26.47-56; Lc. 22.47-53; Jn. 18.2-11)

<sup>43</sup> Te sá cáhán gā yā súcuán, te ni quee-ni Judas, ñn jñáhan jeē uxí uū tēe cáscuáha jín yá. Te vējicoo cuehē tēe jín de, cándaha de espada jín yujnu. Chi sutū cácujeñhu jín tēe cástéén tutu ley jín tēe jéñhu cándacu jñiñu, ní catajii de tēe ún. <sup>44</sup> Te Judas, tēe nastúu ya ún, je ní jēhe de ñn seña nuū tēe un jijnáhan, chí ní cachi de:

Tēe jeē téchūhu rí un cúu. Te jñii ró jijnáhan ró quihīn rō jín, te ma siaá cuiti rō, achí de.

<sup>45</sup> Te ní quee de nde nuū Jesús, te ní cahān de jín yá:

Maestro, Maestro, achí de.

Te ní techúhú de ya. <sup>46</sup> Te táca gá tēe un ní cajni de ya, te cuango de jín yá.

<sup>47</sup> Te ñn tēe ñe jín yá ní tava de espada de, te ní jehnde de sóho ñn mozo maá sūtū cujeñhu ga. <sup>48</sup> Te ní cahān Jesús jín ñáyyu cuehē ún:

¿Te va tēe cuíhna cúu rí jeē vējicoo ró jín espada jín yujnu jñii ró rúhū jeē súcuán?

<sup>49</sup> Táca quiví ní ñe rí jín ró jijnáhan ró ñi templo cáhnu, ní steén rí jñūhun, te tu ní cájii ró rúhū. Te súcuán cáháha ró návaha na squícu jeē cahán tutu ñi, achí yá.

<sup>50</sup> Yūcuán na te ndihi tēe cáscuáha jín yá, ní castóo de ya, ní cajinu de cuango de.

*Tēe suchí jeē ní jinu*

<sup>51</sup> Te ñn tēe suchí, ndíquín de ya cuahān de jín yá. Te ndí de maá ñn sahma cuitá. Te ní cajni tēe ún de. <sup>52</sup> Te maá sahma cuitá un ní canihīn. Te ní jinu maá ñi-ni de cuahān de.

*Jeē ní indichi Jesús nuū junta tēe cácujeñhu ga*

(Mt. 26.57-68; Lc. 22.54-55, 63-71; Jn. 18.12-14, 19-24)

<sup>53</sup> Yūcuán na te ní jinūcoo de jín Jesús nuū sutū cujeñhu ga. Te táca sūtū cácujeñhu jín tēe jéñhu cándacu jñiñu jín tēe cástéén tutu ley, ní candutútú de. <sup>54</sup> Te Pedro chí jicá-ni

ndíquín de ya, te ní jinū de nde ñi patio sutū cujeñhu ga. Te ní cucóo de jín táca policia, násaā de ñūhūn.

<sup>55</sup> Te sutū cácujeñhu jín ndihi tēe cáháha junta cujeñhu ga, ní canducu de cuēchi siquí Jesús, chí cahni de ya cácuñi de. Te tu ní cánihīn de. <sup>56</sup> Chí cuehē de ní cacahān yaá siquí yā, te tu ní quíjnáhan jñūhun ní cacahān de. <sup>57</sup> Yūcuán na te ní candociuñi sava de, te ní catee de cuēchi siquí yā, achí de:

<sup>58</sup> Máá ná ní cajni ná cáhán de jeē canu de templo yáha jéē ní cuvāha ní casáha tēe, te nuū uní quiví te nacani de ñga jeē násūu jín ndaha tēe cuvāha, achí de. Achí jijnáhan.

<sup>59</sup> Te ní jñūhun yáha tu ní quíjnáhan tucu jeē cacahān de siquí yā.

<sup>60</sup> Yūcuán na te sutū cujeñhu ga ní ndociuñi de nuū ñáyyu cuehē ún, te ní cajnūhún de Jesús:

¿Naun tu cáhán cuiti rō? ¿A iyó ndáá jeē cácahān tēe yáha siquí rō? achí de.

<sup>61</sup> Te maá yá tu ní cáhán cuiti yā, chí tú na vé ní stío cuñi yā. Te sutū cujeñhu ga ní cajnūhún tucu de ya:

¿A maá ró cúu Cristo, Sēhe Yāá vāha jeē cujeñhu? achí de jín yá.

<sup>62</sup> Te ní cahān yā:

Suu rí cúu. Te coto ró jéē ruhū, Yāá ní nduu tēe, condee rí lado vāha Yāá iyó poder, te ndiji rí ichi ándiví jín vicó, achí yá.

<sup>63</sup> Yūcuán na te sutū cujeñhu ga ní jehnde de sahma de jeē quití ndasí ní de, te ní cahān de:

¿Ndé jini ñūhún gá yō testigo núu súcuán?

<sup>64</sup> Chí je ní cajni ró jéē cahān de jñūhun ndevāha jeē quití ní Yāá Dios, chí sáha de maá de Sēhe Yāá Dios. ¿Te ndese cájeni ní rō? Achí de.

Te ndihi de ní cacahān jeē na cúu yā.

<sup>65</sup> Te sava de ní catesihí de nuū yā, te ní cajesi de sahma nuū yā, te ní cacani de ya. Te cácahān de jín yá:

Cachi ndé ñn cúu jeē ní cani róhó, achí de.

Te táca tēe policia ní cacani de nuū yā.

*Jeē ní cachi Pedro jeē tu jini de ya*

(Mt. 26.69-75; Lc. 22.56-62; Jn. 18.15-18, 25-29)

<sup>66</sup> Te ñe Pedro ñi patio ichi chíji nuū cáhīn de jín Jesús. Te ní quee ñn ñahan jéjñiñu vehe sutū cujeñhu ga ún. <sup>67</sup> Te ní jito ña nuū de jeē néne de násaā de yuñūhún. Te ní jito vāha ña nuū de, te ní cahān ña:

Róhó chí suni ní jica ró jín Jesús, tēe ñuu Nazaret, achí ña.

<sup>68</sup> Te maá de tu ní cáchi de, chí ní cahān de:

Tu jini rí de, ní tu jini rí na jñūhun cáhán ró, achí de.

Te ní quenda de yéhyí núu quēhe. Te ní cana-ni líhli. <sup>69</sup> Te ñahan jéjñiñu un ní jito tucu ña nuū de, te ní quejéé ña cáhán ña jín ñáyyu cáhīn yūcuán:

Tēe yáha suni jnáhan tāca tēe un cúu, áchí ña.

<sup>70</sup> Te máá de tu ní cáchi tucu de. Te ni cunúu jecu gā, te ñayuu cáhiin yūcuan ní cacahān tucu i jín Pedro:

Jendaá ndije jeé suni jnáhan de cúu ró, chí tēe Galilea cúu ró, te inuú-ni cáhán rō jín de jínáhan de. Achí i.

<sup>71</sup> Yūcuan na te ni quejéé de cáhán teyí de jeé na cóndee cuēchi siquí de núu tu cáhán ndaá de:

Tu jíní rī tēe un jéé cacahān rō jnūhun de, áchí de.

<sup>72</sup> Yūcuan na te ni cana-ni líhli vuelta uū. Te ni nucūhun ni de jnūhun ni cahān Jesús jín de: Nde ná tu cana líhli uū jínu, te yūhu ró te cahān rō unī jínu jeé tu jíní rō ruhū. Te ni nacani ni de siquí jnūhun ún, te ni ndahyū de.

*Jeé ní indichi Jesús nuū Pilato*

(Mt. 27.1-2, 11-14; Lc. 23.1-5;

Jn. 18.28-38)

## 15

<sup>1</sup> Te jeé ní cundijin, te sutū cácujeñhu ni candutútú de jín tēe jéñhu cándacu jñiñu, jín tēe cástéén tutu ley, jín ndihi tēe casáha junta cujéñhu ga, te ni casquijnáhan de jnūhun. Te ni cajihni de Jesús, te cuango de jín yá nuū Pilato, tēe cúu gobernador. <sup>2</sup> Te Pilato ni cajñuhún de ya:

¿A máá ró cúu Rey ñayuu hebreo? achí de. Te ni cahān yā:

Suu rī cúu, nájñuhun cáhán rō.

<sup>3</sup> Te sutū cácujeñhu un ní cacahān de cuēhē cuēchi siquí yā. <sup>4</sup> Te Pilato ni cajñuhún tucu de ya:

¿Naun tu cáhán cuiti rō? ¿A tu jíní ró jéé cuēhē cuēchi cacahān de siquí rō? achí de.

<sup>5</sup> Te tu ní cáhán cuiti yā ni ññ jnūhun jín de. Te nahán ní naa ni Pilato ndéhé de nuū yā.

*Jeé ní cundaá jeé cúu yā*

(Mt. 27.15-31; Lc. 23.13-25; Jn. 18.38-19.16)

<sup>6</sup> Te íyó costumbre Pilato jeé quiví víco un siaá de ññ tēe ñne vecāa, núu na-ni tēe cácuñi ñayuu. <sup>7</sup> Te íyó ññ tēe nání Barrabás, ñne de vecāa jín táca jnáhan de siquí jeé ní candona de siquí tohō te ni cajéñni de ndryi. <sup>8</sup> Te ni quecoo ñayuu cuēhē, te ni cacahān i jín Pilato jeé na sáha de nájñuhun íyó costumbre de. <sup>9</sup> Te ni cahān Pilato jín i:

¿A tu cácuñi rō jeé siaá rī tēe cúu Rey rohó ñayuu hebreo? achí de.

<sup>10</sup> Súcuñi ni cahān de, chí cúní de siaá de Jesús. Chí je ni jecūhun ni de jeé ní cacucuésún ni táca sūtú un cájito de ya, te jeé yūcuan ní quijicoo jín yá nuū de. <sup>11</sup> Te sutū cácujeñhu un ní cascáhán de ñayuu cuēhē un jéé váha ga na cácan i jeé siaá Pilato Barrabás. <sup>12</sup> Yūcuan na te ni cajñuhún tucu Pilato:

Núu súcuñi ¿te ndese cácuñi rō jeé sáha rī jín tēe jeé cacahān rō jeé cúu de Rey rohó ñayuu hebreo? achí de jín i.

<sup>13</sup> Te ni cacana jee i:

Cata caa ní de jicā cruz, na cúu de, áchí i.

<sup>14</sup> Te ni cahān Pilato:

¿Na cuēchi ni sáha de núu súcuñi?

Te ñayuu un ní cacana jee tucu i:

Cata caa ní de jicā cruz, na cúu de, áchí i.

<sup>15</sup> Te Pilato cuní de jeé na cúsiñi ní ñayuu jín de, te ni siaá de Barrabás. Yūcuan na te ni ndacu de jñiñu jeé na cáni táca soldado Jesús, jín jéé cata caa de ya jicā cruz.

<sup>16</sup> Yūcuan na te soldado un cuango de jín yá ini patio palacio, jeé sácatā de nuū yā. Te ni canastútú de ndihi jnáhan de. <sup>17</sup> Te ni cachuhun de ya ññ sahma cuēhē ndihí jéé cúu sahma rey. Te ni casáha de ññ corona ññ, ni cachuhun de xiní yā. <sup>18</sup> Yūcuan na te ni cacana de:

Nacā jeé váha rey cúu Rey ñayuu hebreo, achí de.

<sup>19</sup> Te ni cacani de yujnu xiní yā, te ni catesihí de nuū yā, te ni cajecuñi yití de nuū yā, casáha de jeé chíñuhún de ya. <sup>20</sup> Te nuū ní cuu ni casácatā de nuū yā, te ni catava de sahma cuēhē ndihí un, te ni canachuhun de ya sahma máá yā. Te ni caquenehen de ya jeé cata caa de ya jicā cruz.

*Jeé ní cacata caa de ya jicā cruz*

(Mt. 27.32-44; Lc. 23.26-43; Jn. 19.17-27)

<sup>21</sup> Te ññ tēe nání Simón ññu Cirene, tēe cúu tátá Alejandro jín Rufo, vendijí de jeé ní jéhēn de rancho. Te ni yáha de yūcuan, te ni catejññu soldado un de jeé cóndiso de cruz yā.

<sup>22</sup> Te cuango de jín yá ññ lugar nuū nání Gólgota, jeé cuní cahān Lugar Yiquí Xíní. <sup>23</sup> Te ni cajéhe de vino jeé ní sáca núu jín súje uvuā jeé cóho ya, te tu ní jíhi ya. <sup>24</sup> Te ni cacata caa de ya jicā cruz. Te ni casáha de sorteo jeé siquí ndese nihñ ññ ññ de sahma ya.

<sup>25</sup> Te cahān ni cacata caa de ya. <sup>26</sup> Te jnūhun ni catee de xiní cruz cahān na siquí ní jíhi yā: Yáha cúu Rey ñayuu hebreo, achí. <sup>27</sup> Te suni ní cacata caa de uū tēe cuíñá núu uū gā cruz, ññ de lado váha ya, te inga de lado jecó yā. <sup>28</sup> Te ní squícu jnūhun cáhán tutu ññ: Ni casquijnáhan de ya jín tēe casáha neé, achí.

<sup>29</sup> Te ñayuu cáyáha yūcuan cácuíco i xiní i, te cacahān neé i:

Jājañ. Róhó chí cáhán rō jeé cánu rō templo cáñu, te nuū uní quiví te nucondichí sáha ró. <sup>30</sup> Núu súcuñi te jnama ró máá ró, te nuu ró jicā cruz víi, achí i.

<sup>31</sup> Te suni súcuñi ni cacahān catá sutú cácujeñhu jín tēe cástéén tutu ley, te achí de cacahān máá de:

Núu inga ñayuu ni jnama de, ¿te naun tu cúu jnama de máa de vijna? <sup>32</sup> Núu na cúni yō jeē Cristo, Rey ñayuu Israel, nuu de jicā cruz vijna, yūcuán na te candíje yó, áchí de jínáhan de.

Te tēe cándita caa jíin yá, suni súcuan ni cacahān neé de.

*Jeē ni jīhī Jesús*

(Mt. 27.45-56; Lc. 23.44-49; Jn. 19.28-30)

<sup>33</sup> Te nuū ní cuu cahuxī uū, te ni cunee niñ cáhnu nde cahuni. <sup>34</sup> Te nuū ní cuu cahuni, te ni cana jee Jesús:

Eloi, Eloi, ¿lama sabactani? achí yá. Te jñūhun un cúni cahān: Yāā Dios maá ná, Yāā Dios maá ná, ¿naun ni stóo ní sáña?

<sup>35</sup> Te sava ñayuu cáhīn yūcuan, ní cajini i jñūhun ún, te ni cacahān i:

Cuni nahín, chí cána de xinī Elías, tēe ni nacani jñūhun Yāā Dios jenahán, achí i.

<sup>36</sup> Te ni jinu ñin tēe, ni jechundaji de cachī nuū vinagre iyá. Te ni tee de xinī ñin yujnu, te ni tee de yuhu ya jeē cóho ya. Te ni cahān de:

Na cóndēhe yó núu quiji Elías nasnúu de, áchí de.

<sup>37</sup> Te máa Jesús ni cana jee ya, te ni jīhī-ni ya. <sup>38</sup> Yūcuán na te sahma ndita caa jeē ndihyú cuarto ñi ini templo cáhnu, ni ndatā sava sava nde xinī te nde nuū jehé. <sup>39</sup> Te tēe ñuu Roma jeē cúu capitán, índichi de nuū yá, te ni jini de jeē ní cana jee ya te ni jīhī yá. Te ni cahān de:

Jendaá ndije jeē Séhe Yāā Dios cúu tēe yáha, áchí de.

<sup>40</sup> Te suni cáhīn sava ñahan, cándēhe jíca ña. Te uní ña cácuu María ñuu Magdala, jíin María naná José jíin Jacobo suchí, jíin ñahan naní Salomé. <sup>41</sup> Te ñahan yáha ní candiquín ña ya, ni cajejniñu ña nuū yá nde náa jíca ya Galilea. Te suni cáhīn cuehē gā ñahan jeē ní jéngoo jíin yá ñuu Jerusalén.

*Jeē ní quindūji Jesús*

(Mt. 27.57-61; Lc. 23.50-56; Jn. 19.38-42)

<sup>42</sup> Te ni ini quiví ún. Te quiví sātūhva cúu, chí sajnē cúu quiví ndétátú. <sup>43</sup> Te ni quee José, tēe ñuu Arimatea. Te cúu de ñin tēe cújéhnú nuū junta cújéhnú ga. Te suni ñūhun ní de jeē quiji quiví jeē ndacu Yāā Dios jniñu. Te tu yúhú de chí ni quiví de nuū Pilato, ní jicān de yiqui cúñu Jesús. <sup>44</sup> Te Pilato chí náa ní de jeē yachí ní jīhī yá. Te ni cana de capitán, te ni cajñūhún de tēe un núu je ní jīhī yá. <sup>45</sup> Yūcuán na te ni cucáhnú ní de jeē ní cahān capitán jíin de, te ni jēhe de jñūhun jeē quihin José yiqui cúñu yá. <sup>46</sup> Te José ní jeen de ñin sahma cuitá váha. Te ni snúu de yiqui cúñu yá, te ni chusúcún de sahma ún. Te ní chindūji de ya ini ñin yaú jeē quindūji ndiyí, jeē ní caan jíca ñin cava. Te ní jesi de ñin yaú yuhu yaú un. <sup>47</sup> Te María ñuu

Magdala, jíin María naná José, ní cajito ña nuū ní cachindūji de ya.

*Jeē ní natecu Jesús*

(Mt. 28.1-10; Lc. 24.1-12; Jn. 20.1-10)

**16**

<sup>1</sup> Te ni ini quiví ndétátú, te María ñuu Magdala, jíin María naná Jacobo, jíin Salomé, ní cajeen ña táca perfume jeē quíchuhun ña yiqui cúñu yá. <sup>2</sup> Te jenēhen quiví domingo, jeē ní cane niāndii, te ni jinūcoo ña nuū ní yindūji ya. <sup>3</sup> Te cácahān ña:

¿Nde níñin yō tēe tejijo yaú ndihyú yuhu yaú? áchí ña.

<sup>4</sup> Te ní candacoto ña, te ní cajito ña jeē jé ní cujiyo yaú cáhnu un cuahān. <sup>5</sup> Te ní quivícoo ña ini yaú ndiyí. Te ní cajito ña ñin ndajehé Yāā Dios jeē cáa nájnūhun tēe suchí, néne ya ichi lado váha, ñūhun ya ñin sahma cuijín cáni. Te ní cayūhú ña. <sup>6</sup> Te ní cahān yá jíin ña:

Ma yūhu ró jijnáhan ró. Chí vecondēhe ró Jesús ñuu Nazaret, Yāā ní jīhī jíca cruz. Tuá yá yáha, chí je ní natecu yá. Yáha condéhé ró nuū ní cachindūji de ya. <sup>7</sup> Cuánungoo te cachi rō nuū tēe cáscuáha jíin yá, jíin nuū Pedro, jeē xīhna gā maá yá jinū Galilea, te sáa te najinūcoo de. Te yūcuán coto de nuū yá, nájnūhun ni cahān yá jíin de nde saá, áchí yá jíin ña.

<sup>8</sup> Yūcuán na te ñahan un ní quendacoo ña nuū ní yindūji ya, te cájinu ña cuangoo ña. Chí quisi i ña jeé cáyūhú ña. Te tu ní cácahi cuiti ña nuū ní ñin, chí cáyūhú ña.

*Jeē ní nane Jesús nuū María ñuu Magdala*  
(Jn. 20. 11-18)

<sup>9</sup> Te Jesús ní natecu yá jenēhen quiví domingo. Te xīhna gā ní nane ndijin yá nuū María ñuu Magdala, ñahan jeē ní quenehen ya uxá tachí ini. <sup>10</sup> Te cuahān ña cuacastūhún ña nuū táca tēe ní cajica jíin yá jeē ní nane ya nuū ña. Te cácuaihyá ní de te cándahyú de. <sup>11</sup> Te nuū ní cajini de jñūhun jeē ní jito ña nuū yá jeē técu yá, te tu ní cácañdije de jñūhun cáhan ña.

*Jeē ní nane ya nuū uū tēe cáscuáha jíin yá*  
(Lc. 24.13-35)

<sup>12</sup> Yūcuán na te ní quendacoo uū jñáhan tēe ún, cájica de cuahān de ichi rancho, te sñn modo ní nane ndijin yá nuū de. <sup>13</sup> Te ní canandicó de, ní cacastūhún de nuū táca gá jñáhan de. Te ní tu ní cácañdije tucu jñáhan de jeé cácahān ndindūji de.

*Jeē ní tejniñu ya de nacani de jñūhun*

(Mt. 28.16-20; Lc. 24.36-49; Jn. 20.19-23)

<sup>14</sup> Te cúcuéé gá te ní nane ndijin yá nuū ndihúxí ñin de jeé cáyūcú de mesa cáyeji de staá. Te ní cahān yá nuū de, chí níñni ní de jeé tu cácañdije de jeé cácahān jñáhan de un,

jéē ní natecu yā ni cajito de ya. <sup>15</sup>Te ni cahān yā jiín de:

Cuángoo jíjnáhan ró níí ñayīví, te nacani ró jnūhun ri nuū tāca ñáyuu ndese jnáma ri i. <sup>16</sup>Te ñayuu candíje te cuandute i, chí cācu i. Te ñayuu tú candíje, chí jnahnū ndetū i. <sup>17</sup>Te ñayuu candíje, sáha i tācá jniñu jéhnū yáha jeē steén jeē iyó rí jiín i: Jiín síhví rí quenehen i tachī ini ñayuu. Te cahān i tijni yuhu jéé. <sup>18</sup>Te núu ni jnií sanaa i coō, chí núu ni jihi i veneno, te ma sáha daño jiín i. Te suni soó i ndaha i siquī ñáyuu cácuñū, te nduváha. Achí yá jiín de.

*Jeē ní ndaa ya cuanuhun yā andiví  
(Lc. 24.50-53)*

<sup>19</sup>Yūcuán na te nuū ní ndihi ni cahān maá Jítóho yō jiín de jíjnáhan de, te ni ndaa ya cuanuhun yā andiví, te ni cucōo ya lado váha Yaā Dios nuū cujéhnū ya. <sup>20</sup>Te máá de ni quendacoo de, ni canacani de jnūhun ya tāca lado ndese jnáma ya ñayuu. Te máá Jítóho yō ni chindéé ñáhán yá de. Te ni jēhe ya fuerza jeē sáha de tācá jniñu jéhnū jeē steén jeē iyó ndáá jnūhun cánacani de. Te ni cuu. Amén.

## JNUHUN VAHA NI TEE SAN LUCAS

<sup>1</sup> Cuehē tēe ni cajicu de ni catee yúcun de historia Jesú, táca jniñu jeē ni sáha ya ni cajito yó. <sup>2</sup> Te ni catee de táca jnúhun jeē ní cacastúhun ñáyu nuū yó, jeē ní cajito i jniñu yúcuan nde ná ni quejéé, te ni canacani i jnúhun ya. <sup>3</sup> Te máá ná, suni ni nanducú yúcun ná táca jnúhun ya, nde nuū ní quejéé. Te ni jeni ni na jéé suni iyó váha jeē tēe cájí ná táca jnúhun váha nuū ní, amigo Teófilo. <sup>4</sup> Te súcuan te cuni ni jéé iyó ndáá táca jnúhun jeē ní cacastúhún i nuū ní.

*Jeē ní cachi ndajéhé jeē cacu Juan tēe scuándute*

<sup>5</sup> Tiempo jeē ní cuu Herodes rey región Judea, te ni iyo ñn sutú ñayuu hebreo, naní de Zacarías, te grupo Abías cúu de. Te ñasihí de nání ña Elisabet, te suni sēhe yucún maá sutú Aarón cúu ña. <sup>6</sup> Te ndindúú de cahíyo ndaá de nuū Yaā Dios, te ndaá váha cásquicu de jniñu ndácu ley maá Jítoho yó Yaā Dios, cájito táca ñayuu. <sup>7</sup> Te tú sēhe de iyó, chí ñahan númá cúu Elisabet, te jeé jéhu ndindúú de.

<sup>8</sup> Te ñn quiví te jéjníñu Zacarías nuū jniñu jeē cúu de sutú nuū Yaā Dios, chí ní quee quiví jeē ndívi grupo de. <sup>9</sup> Te ni casáha de sorteo, nájnúhun iyó costumbre sutú. Te ni sáha tocar Zacarías jeē quiví de ini cuarto ñi templo Jítoho yó Yaā Dios, te cahmu de sūje cútú. <sup>10</sup> Te hora jeē cayú sūje cútú, te táca ñayuu cuehē cáhín i fuera, cájicán tahú i. <sup>11</sup> Te ni cane ñn ndajéhé maá Jítoho yó nuū de, ñn ya lado váha altar nuū jéhu de sūje cútú. <sup>12</sup> Te ni cunéé ni Zacarías ni jito de nuū yá, te yóho ni yuhú de. <sup>13</sup> Te ni cahān ndajéhé un jíin de:

Zacarías, ma yūhu ró, chí je ní chíhi Yaā Dios cuenta jeē ní jícan tahú ró. Te ñasihí ró Elisabet, scácu ña ñn sēhe yíi, te snání ró i Juan. <sup>14</sup> Te yóho cusíi ní ró. Te cuehē ñayuu cusíi ní jeē cácu i. <sup>15</sup> Chí cujéhu sēhe ró sáha máá Yaā Dios. Te ma cóho i vino ní ndixi cuíi. Te cunuú máá Espíritu Santo jíin i, nde ná tu cacu i. <sup>16</sup> Te sáha i jeē cuehē ñayuu nación ró Israel ndívicoo i nuū Jítoho i Yaā Dios. <sup>17</sup> Te xíhna gā Juan quiji nacani jnúhun Jítoho yó Jesú, te sáa te quiji ya. Te sáha i nájnúhun ní sáha Elías, tēe ní nacani jnúhun Yaā Dios jenahán, te coneváha i poder jeē nácani i jnúhun, nájnúhun ní coneváha Elías. Te sáha i jeē táca tátá ndumaní de jíin sēhe de. Te suni sáha i jeē ñayuu ñihni ní cuatáhú i nuū Yaā Dios, nduu i ñayuu ndaá. Súcuan sátúhva i ñayuu náváha candíje i máá Jítoho yó jeē quíji ya. Achí ndajéhé.

<sup>18</sup> Te Zacarías ní cajnúhún de ya:

¿Ndese cucáhu ní na núu jendaá cúu? Chí tēe jéhu cúu ná, te suni jéhu ñasihí ná, achí de.

<sup>19</sup> Te ní cahān ndajéhé un jíin de:

Máá rí cúu Gabriel, te íne rí nuū Yaā Dios, jejníñu rí nuū yá. Te ní tají yá ruhū vēji rí cahān rí jíin ró, te nácani rí jnúhun váha yáha núu ró. <sup>20</sup> Te jeē tu ní candíje ró jnúhun ní cahān rí, te cuñhín ró, te ma cúu cahān ró, chí nde na cácu sēhe ró. Te squicu nahín jnúhun cáhán rí yáha, na quee quiví, achí ndajéhé.

<sup>21</sup> Te ñayuu cáhín ichi fuera, cándetu i Zacarías, te cájeni ní i na vé ní cuu jeē cucuéé de ini cuarto ñi templo. <sup>22</sup> Te nuū ní quenda de, te tuá ní cúu cahān de jíin i. Te ní cajecúhun ní i jeē ini templo ní jito ndijin de ñn jeē ní stéén yá nuū de. Te máá seña na ní sáha de nuū i, chí ní cuñhín de.

<sup>23</sup> Te nuū ní jínu quiví ní jejníñu de ini templo, te cuanuhun de vehe de. <sup>24</sup> Te ní cuu jecu quiví, te ñasihí de Elisabet ní jecúhun sēhe ña. Te ní iyo ña vehe ña uhún yó jeé tuá nde ní jéhén ña. Te jéni ní ña: <sup>25</sup> Súcuan ní sáha máá Jítoho yó jíin rí, te ní tejiyo ya jnúhun jeē cúcanu rí nuū ñayuu jeē tú sēhe rí, jéni ní ña.

*Jeē ní cachi ndajéhé jeē cacu Jesús*

<sup>26</sup> Te nuū iñú yoó, te ní tají Yaā Dios ndajéhé yá Gabriel, ní jehén yá ñn ñuu naní Nazaret, ndañúú Galilea. <sup>27</sup> Te ní jehén yá nuū ñn sūchi shí nání María. Te je ní cundaá jeē quijnáhan ña jíin ñn tēe nání José, te sēhe yucún rey David cúu de. <sup>28</sup> Te ní quiví ndajéhé un núu ndeé ña, te ní cahān yá:

Tandii, nacá ndetú cúu ró. Chí máá Jítoho yó Yaā Dios iyó yá jíin ró, te ní sáha ya jeē yóho ndetú gā cúu ró núu táca gā ñahan, achí yá.

<sup>29</sup> Te nuū ní jito ña nuū yá, te ní cunéé ní ña jeē súcuan cáhán yá, te jéni ní ña naun cáhán yá súcuan jíin ña. <sup>30</sup> Te ní cahān gā ndajéhé un jíin ña:

Ma yūhu ró María, chí ní sáha Yaā Dios jeē váha jíin ró. <sup>31</sup> Te jecúhun sēhe ró te scácu ró ñn sēhe yíi, te snání ró i Jesús. <sup>32</sup> Te cujéhu i, te conani i Sēhe Yaā cujéhu téyí. Te máá yá jeē cúu ya Jítoho yó Yaā Dios, sáha ya jeé cuu i rey, nájnúhun jíi i David ní cuu de rey. <sup>33</sup> Te ní cáni ndacu i jniñu nuū ñayuu nación Israel. Te ma ndíhi cuíti jeē ndácu i jniñu. Achí ndajéhé.

<sup>34</sup> Yúcuan na te ní cajnúhún María:

¿Ndese coo jeē ní cahān ní? Chí ná tu coo yíi ná, achí ña.

<sup>35</sup> Te ní cahān ndajéhé un:

Máá Espíritu Santo quiji squíi ró, te poder máá Yaā cujéhu téyí sáha ñn jniñu jéhu jíin ró. Te jeē yúcuan máá sūchi íi jeé cácu, quíhi cuenta i nuū Yaā Dios, te cahān ñayuu jeé Sēhe Yaā Dios cúu i. <sup>36</sup> Te suni cástúhun rí



nuū rō jeē jnāhan rō Elisabet, suni scācu ña ñn sēhe vēsú je jēhnu ña. Te vijna iyó ññū yoō jeē tuá cácahān ñayuu jeē cúu ña ñahan nūmá. <sup>37</sup> Chi ndihī-ni cuu sáha Yaā Dios, te tu iyó ni ññ jeē ma cúu sáha ya, achí ndajéhé un.

<sup>38</sup> Yūcuán na te ni cahān María:

Cuu núu súcuan, chi sáha ná táca jniñū ndácu Jitoho yō Yaā Dios, te na cóo jín ná nájñuhun ni cachí ní, áchí ña.

Te máá ndajéhé un cuahān-ni ya.

*Jeē ni jécondēhé María Elisabet*

<sup>39</sup> Te ni cuu jecu quivī, te yachí cuahān María, ni caa ña yucu cuahān ña ññ ñuu región Judea. <sup>40</sup> Te ni jinū ña vehe Zacarías, te ni cahān ña jín Elisabet. <sup>41</sup> Te nuū ní jini Elisabet jeē cahān María jín ña, te sūchi ññuhun chíji ña ni canda-ni i. Te ni cunuú Espiritu Santo ini anuá ña. <sup>42</sup> Te ni cahān jee ña:

Ni sáha Yaā Dios jeē yóhoyo ndetū gā cúu rō núū táca gā ñahan, jín jēē yóhoyo ndetū sēhe rō. <sup>43</sup> ¿Te ndese cúu jeē ní quee naná máá Jitoho rī nuū rī? Chi tu cújēhnu cuiti rī. <sup>44</sup> Chi jeē ní jini-ni ri jñuhun ni cahān rō jín rī, te sūchi ññuhun chíji ri ni canda i jeē cúsi ní i. <sup>45</sup> Te nacā ndetū rō jeē ní candíje rō, chi squícu nahín táca jñuhun ni cahān máá Jitoho yō jín rō. Achí Elisabet.

<sup>46</sup> Yūcuán na te ni cahān María:

Cáhán rī jeē cújēhnu ndasí máá Jitoho yō Yaā Dios,

<sup>47</sup> te cúsi ní rī jín Yaā Dios, Yaā jnáma ruhū.

<sup>48</sup> Chi ní sáha ya cuenta ruhū, vēsú tu cújēhnu rī.

Te na squícu rī jniñū ndácu ya.

Te nde vijna te táca ñayuu jeē nácacu, cahān i jeē yóhoyo ndetū rī.

<sup>49</sup> Chi Yaā jñí ndihī poder, ni sáha ya jniñū jēhnu jín rī.

Te Yaā ññ ndoo cúu ya.

<sup>50</sup> Te ní cáni cundáhú ni yā táca ñayuu ndíso iyo nuū yā.

<sup>51</sup> Ni sáha ya jniñū jēhnu jín poder yā,

chí ni scúnu ya ñayuu casándúxi máá,

<sup>52</sup> te ñayuu cácujeñhu, ni quende ya jeē cújēhnu i.

Te ñayuu ndahú chí ni sajēhnu ya i,

<sup>53</sup> te ñayuu cáji sōco ni jēhe ya jeē cáji váha i.

Te ñayuu cucá ní natajī yá i súcuan-ni.

<sup>54</sup> Te ni chindéé ñahān yá yohó, ñayuu nación Israel, jeē cácuu yó mozo yā, te tu náa ni yā jeē cundáhú ni yā yohó.

<sup>55</sup> Chi súcuan ni jejnūhun ya nuū táca jíi yō, nuū Abraham jín táca yúcūn de jeē cóo ní cáni.

Achí María.

<sup>56</sup> Te ni condee ña jín Elisabet nájñuhun uní yoō. Yūcuán na te cuanuhun ña vehe ña.

*Jeē ní cacu Juan tēē scuándute*

<sup>57</sup> Te ni jinū quivī jeē scácu Elisabet sēhe ña, te ni scácu ña ññ sēhe yí. <sup>58</sup> Te táca ñayuu

ndee yajni jín ña jín táca jnāhan ña, ni cajini i jeē yóhoyo ni cundáhú ni Yaā Dios ña, te ni jengoo i ni cacahān i jñuhun sñí ni jín ña.

<sup>59</sup> Yūcuán na te nuū uná quivī jeē ní cacu i, te ni jengoo ñayuu ni sáha i circuncidar sūchi yíquín un. (Te yūcuán cúu ññ jñññ nuū yiqui cúñu táca sūchi yí hebreo jeē steén jeē cácuu i ñayuu Yaā Dios.) Te snáni i sūchi un sáhvi tátá i Zacarías nuú. <sup>60</sup> Te ni cahān naná i:

Ma cúu, chí Juan conaní i, áchí ña.

<sup>61</sup> Te ni cacahān i jín ña:

¿Te naun? Chi tú ni ññ jnāhan rō nání súcuan, áchí i.

<sup>62</sup> Yūcuán na te jín seña ni cacajñuhun i tátá sūchi un ndese cúní de jeē cónaní i. <sup>63</sup> Te máá de ni jicān ññ tutu, te ni tee de: Juan conaní i. Te táca ñayuu un ní canaa ni i cájito i. <sup>64</sup> Te ni nduváha Zacarías jeē ní cuñññ de, te ni quejéé de cáhán de jeē yóhoyo váha Yaā cúu Yaā Dios. <sup>65</sup> Te táca ñayuu ndee yajni jín de, yóhoyo ni canaa ni i. Te ní yucu región Judea ni jité núu táca jñuhun yáha jeē súcuan ni cuu. <sup>66</sup> Te táca ñayuu jeē ní cajini jñuhun, ni quejéé i cánacani ni i, te cacajñuhun jnāhan i:

¿Ndese coo na cuéhnu sūchi yáha? áchí i.

Chi máá Jitoho yō yóhoyo ni sáha ya jeē váha jín i.

*Jñuhun luu jeē ní nacani Zacarías*

<sup>67</sup> Te tátá i Zacarías ni cunuú Espiritu Santo jín de, te ni nacani de jñuhun ni steén Yaā Dios nuú de:

<sup>68</sup> Yóhoyo váha Yaā cúu máá Jitoho yō, Yaā Dios yohó ñayuu Israel,

chí ni quiji ya nuū yō jeē cácuu yó ñayuu yā, te ni jnama ya yohó.

<sup>69</sup> Te ni jeni ya ññ Yaā iyó poder jeē jnáma ya yohó,

te Yaā ún cacu yucūn mozo yā rey David.

<sup>70</sup> Chi súcuan ni jejnūhun ya, ni cacahān táca téé ndoo ánuá jeē ní canacani de jñuhun ya jenahán.

<sup>71</sup> Chi ní cacahān de jeē jnáma ya yohó núu jeē cájito uhū yohó, jín núu jeē cáquiti ní nuū yō.

<sup>72</sup> Chi ní cundáhú ni yā táca jíi yō jijnāhan,

te tu ní náa ni yā contrato ññ ya.

<sup>73</sup> Chi suu un ní jejnūhun téyí yá nuū jíi yō Abraham,

<sup>74</sup> suu jeē jnáma ya yohó núu ñayuu cájito uhū yohó,

návaha cuajññu yó núu yā, te ma yūhu yó i.

<sup>75</sup> Te coo ndaa coo ndoo ánuá yō, cuajññu yó núu yā táca quivī jeē cótecu yō.

<sup>76</sup> Te róhó sūchi lúli, cuu rō téé nacani jñuhun Yaā cújēhnu téyí.

Chi cosnúu rō ichi núu máá Jitoho yō, návaha sātūhva rō ñayuu, te sáa te quiji ya.

<sup>77</sup> Te castūhun rō nuū ñayuu máá yá jeē jnáma ya i,

jín jēé cóne cáhnu ni yā nuū táca cuéchi i.

<sup>78</sup> Chi Yaā Dios maá yó, vāha ni yā te cundáhú ni yā yohó.

Jeē yúcuan tají yá maá Yaā jeē sáha jeē cundijin ini anuá yó, quiji ya nde andiví,

<sup>79</sup> návāha jecūhun ni yohó jéē cáyūcu nájñūhun nuū nēē nuū jé yajni cuu yó.

Te chuhun ya yohó ichi nuū cóo ndeyí coo sī ni yó.

Achí Zacarías.

<sup>80</sup> Te sūchi lúli un ní jehnu i te ni ije i jín jñūhun ya. Te ni condee i nde nuū ñūhun téhé ndé quiví ní quenda ndijin i nuū ñāyuu Israel.

*Jeē ní cacu Jesús  
(Mt. 1.18-25)*

## 2

<sup>1</sup> Te ni cuu jecu quiví, te Augusto, tēe cúu rey, ni ndacu de jñíñu jeē coo censo jeē nūcosó síhví ndiví ñāyuu ní cáhnu nuū ndácu de jñíñu. <sup>2</sup> Yāha cúu censo xihna ñūhún jéē ní casáha de ná ni cuu Cirenio gobernador nación Siria. <sup>3</sup> Te ndiví ñāyuu cuanungoo i ná ñuu ná ñuu maá i jeē nácuāha i síhví i. <sup>4</sup> Te suni José ní quenda de ñuu Nazaret, ndañúu Galilea. Te cuanuhun de región Judea, te ni najinū de ñuu Belén, jeē cúu ñuu nuū ní cacu rey David jenahán. Chi sēhe yucún David cúu de. <sup>5</sup> Te ni jehēn de návāha nacūaha de síhví de jín María, chi je yajni quijnáhan ña jín de. Te ñūhun sēhe ña ní sáha Espíritu Santo. <sup>6</sup> Te níni cáhīn de yūcuán te ni jínū quiví jeē cácu sēhe ña. <sup>7</sup> Te ní scácu ña sēhe yí núú ña, te ni chusúcún ña i sahma cuitá, te ni jequin ña i ini ñi nundoo núú yéji quiti, chi tuá núne mesón condee ña.

*Jeē ní canecoo ndajéhé yā nuū pastor*

<sup>8</sup> Te yajni ñuu Belén cáhīn tēe cácuu pastor, te cándito de lanchi de ní ñiñu jecuáá nde yucu ún. <sup>9</sup> Te ñiñu sanaa-ni te ni cane ñiñu ndajéhé maá Jítoho yó nuū de, te nduva maá Jítoho yó ní ndíndēe ní nuū cáhīn de. Te yóhō ni cayúhū de. <sup>10</sup> Te ni cahān ndajéhé un jín de:

Ma yūhu ró jijnáhan ró, chi vēji ri castūhun rí jñūhun vāha nuū rō, te sáha jeē cúsi ndasí ní táca ñāyuu: <sup>11</sup> Chi vijna nde ini ñuu David ní cacu ñiñu Yaā jnama róhó, te maá Jítoho yó Cristo cúu ya. <sup>12</sup> Te sūcuan nacuní rō sūchi yíquín un, chi ñūsúcún i sahma cuitá te catú i ini ñiñu nundoo núú yéji quiti. Achí yá.

<sup>13</sup> Te ñiñu sanaa-ni te ni canecoo cuehē gā ndajéhé andiví, cáhīn ya jín ndajéhé un, te cácahān yā jeē yóhō vāha Yaā cúu Yaā Dios. Te áchí yá:

<sup>14</sup> Yóhō luu cújēhnu Yaā Dios nde nuū sucún. Te na ndúvāha ní táca ñāyuu ñayiví, sáha ya jeē cúsi ní yā jín i.

Achí táca ndajéhé.

<sup>15</sup> Yūcuán na te cuanungoo ndajéhé un andiví. Te tēe cácuu pastor ní cacahān de jijnáhan de:

Na quihín yó nde ñuu Belén, te cuni yó na vé ní cacu jeē ní castūhun maá Jítoho yó nuū yó, áchí de.

<sup>16</sup> Te yachí cuangoo de, te ni nanihīn de María jín José jín sūchi yíquín un, catú i ini nundoo núú yéji quiti. <sup>17</sup> Te nuū ní cajini de nuū i, te ni canacani de jñūhun jeē ní cachi ndajéhé yā nuū de siquí sūchi yíquín un. <sup>18</sup> Te ni canaa ní táca ñāyuu cájini nahín i jñūhun cácahān tēe cácuu pastor. <sup>19</sup> Te María, ní quendoo táca jñūhun yāha nuū jeē níjñūni ña, te nácani ní ña siquí. <sup>20</sup> Te tēe cácuu pastor cuanungoo de, te ni cacahān de jeē yóhō vāha Yaā cúu Yaā Dios siquí táca jéē ní cajini sóho de jín jéē ní cajitu de, chí ní squícu nahín nájñūhun ní cahān ndajéhé yā jín de.

*Jeē ní castéén de i nuū Yaā Dios ini templo*

<sup>21</sup> Te ni cuu unā quiví jeē ní cacu ya, te ni casáha de circuncidar sūchi yíquín un. Te ní casnání de i Jesús, chí síhví yúcuan ní cachi ndajéhé yā nuū María nde ná tu jecūhun i.

<sup>22</sup> Te ní jñu quiví jeē casquícu ña costumbre jeē ndúndoo ña nuū Yaā Dios jijnáhan ña, nájñūhun cáhān ley jeē ní jéhe ya nuū Moisés. Te ní jengoo de jín i ñuu Jerusalén jeē nácuāha de i nuū maá Jítoho yó Yaā Dios. <sup>23</sup> Súcuan ní casáha de, chí yósó núú tútu ley yā: Táca sūchi yí núú jéē cácuu, quihí cuenta i nuū Jítoho yó Yaā Dios, achí tutu. <sup>24</sup> Te suni cuasocó de nájñūhun cáhān ley maá Jítoho yó: Socó rō uū livi chí uū paloma, achí tutu.

<sup>25</sup> Te ní iyó ñiñu tēe nání Simeón, ndéé de ñuu Jerusalén tiempo un. Te tēe ndaá, tēe chíñūhún vāha nuū Yaā Dios cúu de. Te ñūhun ní de jeē quée maá Yaā jnama ñāyuu nación de Israel. Te maá Espíritu Santo iyó yá jín de. <sup>26</sup> Te je ni castūhun yá nuū de jeē ma cúu cuiti de chí nde coto de nuū Cristo jeē tají maá Jítoho yó Yaā Dios. <sup>27</sup> Te ní steén yā nuū de jeē quihín de templo quiví ún. Te suni tátá naná sūchi yíquín Jesús, ní quívicoo de ini templo jín i, jeē nácuāha de i nuū Yaā Dios nájñūhun cáhān ley Moisés. <sup>28</sup> Te Simeón ní ñunundee de i, te ni cahān de jeē yóhō vāha Yaā cúu Yaā Dios, te áchí de:

<sup>29</sup> Tátá Yaā Dios, vijna te cuu cuāha ní jñūhun jeē cuu ná, chí je ní cusí ní ná.

Chi je ní squícu ní jñūhun ní jejnūhun ní núú sáña jéé cúu ná mozo ní.

<sup>30</sup> Chi ní jito jínúu na núú Yaā jnama sáña jijnáhan ná.

<sup>31</sup> Chi ní jeni ní yá jeē jnama ya táca ñāyuu ñayiví.

<sup>32</sup> Te maá yá sáha jeē cundijin ini anuá ñāyuu táca nación,

návāha jecūhun ní i siquí ní.

Te sáha ya jeē cújēhnu ñāyuu maá ní Israel.

Achí Simeón.

<sup>33</sup> Te José jíin náná i cánaa ni de cájini nahín de jñuhun ni cahán Simeón siquí i. <sup>34</sup> Te ni jícan tahú Simeón jehē de jíjnahan de, te ni cahán de jíin náná i María:

Súchi yáha vēji i jeē candíje cuehē ñayuu nación yō Israel, te cácu i jíjnahan i. Te sava i ma candíje i, te jnahnū ndetū i. Chi cúu i Yaā ní tají Yaā Dios, te sa squéhichí ni cuehē ñayuu i. <sup>35</sup> Te súcuan te quenda ndijin ndese cájeni ni táca ñáyuu. Te máá ró chi jnahuhū ndasí ni rō coto ró jéē ndóho i. Achí Simeón.

<sup>36</sup> Te suni íne ñin ñahan nácani jñuhun Yaā Dios, naní ña Ana. Te sēhe Fanuel, yucūn Aser cúu ña. Te je jéhu ndasí ña. Te nde ná lulí ña te ni condee ña jíin yí ña uxā cuiyā. <sup>37</sup> Yūcuán na te ni quendōo ndáhú ña, te ni cuu cuūn xico cuūn cuiyā ña. Te tu cújiyo ña ini vehe íi, chí jéjniñu ña nuū Jítóho yō Yaā Dios nduū ñuū, te ndite ni ña te jícan tahú ña. <sup>38</sup> Te suni hora un ní quee ña, te ni nacuatáhú ña nuū Yaā Dios. Te ni cahán ña jñuhun súchi yíquán un jíin táca ñáyuu Jerusalén jeē cáñuhun ni i jeē queé Yaā jnama i.

#### *Jeē cuánungoo de ñuu Nazaret*

<sup>39</sup> Te ni jínu ni casquícu de táca jniñu ndácu ley maá Jítóho yō Yaā Dios, te cuanungoo de ñuu de Nazaret, ndañúú Galilea. <sup>40</sup> Te súchi lulí un ní jehnu i, te ni ije i, te ni cundíchi gá i. Te ni sáha Yaā Dios jeē váha ndasí jíin i.

#### *Jeē íne súchi lulí Jesús ini templo*

<sup>41</sup> Te ndijnahan cuiyā jéngoo tátá i náná i ñuu Jerusalén, jeē cúu vico pascua. <sup>42</sup> Te nuū ní cuu uxí uū cuiyā i, te cuangoo tucu de Jerusalén, nájñuhun sáha sáha de quiví vico ún. <sup>43</sup> Te ni yáha vico, te cuanungoo de. Te súchi lulí Jesús, ni quendōo i Jerusalén, te tu ní cájini José jíin náná i. <sup>44</sup> Te cájeni ni de jeē cuahán i mēhñu ñáyuu cájica íchi ún. Te ní cajica de ñin quiví, te sáá te ní cananducú de i mēhñu táca jnahan de jíin ñáyuu cájini jnahan de jíin. <sup>45</sup> Te tu ní cánanihñ de i. Te ni canandicó de cuangoo de Jerusalén, cuananducú de i.

<sup>46</sup> Te nuū uní quiví te ni cananihñ de i ini templo, néne i mēhñu téé cástéén tutu ley Yaā Dios, te jíni nahín i jeē cácahan de te cájnñuhun i de siquí jñuhun ún. <sup>47</sup> Te táca ñáyuu cájini jñuhun cáhán i, cánaa ni cájito jeē váha cájí xíní i te váha nástió cuñí i jñuhun. <sup>48</sup> Te nuū ní cajito tátá i náná i nuū i, te ni cana ni de. Te ni cahán naná i jíin i:

Séhē, ¿naun ni sáha ró súcuan jíin rí? Chi ruhū jíin tátá rō, yōhyo ni canacani ni rí cananducú rí rohó, achí ña.

<sup>49</sup> Yūcuán na te ni cahán i:

¿Naun cananducú ní saña? ¿A tu cájini ní jéé cánuú cocu ná jíin jniñu Tátá na Yaā Dios? Achí i.

<sup>50</sup> Te tu ní cájecūhun ni tátá i náná i jñuhun ni cahán i.

<sup>51</sup> Yūcuán na te cuanuhun i jíin de jíjnahan de ñuu Nazaret, te ni jendije i nuū de. Te náná i, ni quendōo táca jñuhun yáha nuū jeē níjnñu ña. <sup>52</sup> Te Jesús ni jehnu ga i, te ni cundíchi gá i, te cúsu ni Yaā Dios jíin i, te suni súcuan táca ñáyuu.

#### *Jñuhun Juan tēe scuándute*

(Mt. 3.1-12; Mr. 1.1-8; Jn. 1.19-28)

### 3

<sup>1</sup> Te ni cuu xahūn cuiyā jeē ndácu Tiberio jniñu ní nación. Te Poncio Pilato cúu de gobernador Judea, te Herodes cúu de gobernador Galilea, te ñani de Felipe cúu de gobernador Iturea jíin Traconite, te Lisantias cúu de gobernador Abilinia. <sup>2</sup> Te sutú cujéhu ga cácuu Anás jíin Caifás. Te ni quee jñuhun Yaā Dios nuū Juan sēhe Zacarías, jeē íne de nuū ñuhun téhé. <sup>3</sup> Te ni jica nuu de táca ñuu jeē iyó yajni yūte Jordán. Te cáhán de jíin ñáyuu jeē ña nácani ni i jeē stóo i cuéchi i te cuandute i, návaha cone cáhnu ni Yaā Dios nuū cuéchi i. <sup>4</sup> Te súcuan ni squícu jñuhun Juan jeē yosó nuū tútu ni tee Isaias, tēe ni nacani jñuhun Yaā Dios nde jenahán:

Coo ñin tēe cana jee nde nuū ñuhun téhé: Sátūhva ró máá ró jíjnahan ró, chí quee maá Jítóho yō.

Te sáha ró jniñu ndaá, chí vēji ya.

<sup>5</sup> Te táca xéhvā na ndúndaá, te táca yucu jíin loma na ndúnduhvā, te na ndúyóho íchi yácuá, te na ndúlií ichi ndáyí.

Te ndihi un cúu jeē ndúvaha ndundaá anuá ñayuu nuū yā.

<sup>6</sup> Te ndihi i cuni i jeē jnáma Yaā Dios i. Súcuan cahán Juan, achí tutu.

<sup>7</sup> Te ni quendacoo cuehē ñayuu, cuahán i nuū de jeē scuándute de i. Te ni cahán de nuū i:

Va sēhe coō cácuu ró, chí xeēn rō nájñuhun coō. ¿A cájeni ni rō jeē cuu cunu ró cácu ró núu castigo xeēn jeē quíji? <sup>8</sup> Núu súcuan te sáha ró jniñu váha, te súcuan stéén ró jeē ní nacani ndije ni rō jeē stóo ró cuéchi ró. Te ma cáni ni rō cahán ró jeē cuu cácu ró síquí jeē cácuu ró yucūn Abraham. Chí cáhán rí jíin ró jeē cuu sáha Yaā Dios jeē táca yúú yáha nduu sēhe Abraham jeē candíje váha, te núu cúni yā. <sup>9</sup> Te cácuu ró nájñuhun nundéhé jeē tu jéhe ndehé váha. Te vijna je íyó túhva Yaā Dios jeē cuáha ya castigo xeēn, nájñuhun je íyó túhva ñin cāa jeē cahnde nde yoho yujnu. Núu súcuan te sáha ya jíin ró nájñuhun jíin táca yujnu jeē tu cúun ndehé váha, jeē tahndé te cayū nuū ñuhūn. Achí de.

<sup>10</sup> Te ñayuu un ní cacajñuhún i de:

¿Te ndese sáha ná núu súcuan? Achí i.

<sup>11</sup> Te ni cahán de:

Róhó jéé cánevāha uū sahma, na cuáha ró ìn nuū jeē tu névāha. Te róhó jéé cánevāha jeē yéji, suni súcuan na sāha ró, áchí de jíin i.

<sup>12</sup> Te suni jecu tēe cástútú xúhun renta, ni quecoo de jeē cuándute de. Te ni cacajnūhún de Juan:

Maestro, te máá ná, ¿ndese sāha ná jíjnāhan ná?

<sup>13</sup> Te ni cahān Juan jíin de:

Ma scaá ró cácan rō xūhún, chí máá cūhva-ni jeē ní ndacu jniñu nuū rō, achí de.

<sup>14</sup> Te suni ni cacajnūhún jecu soldado:

Te máá ná, ¿ndese sāha ná jíjnāhan ná? áchí de.

Te ni cahān Juan jíin de:

Ma quénde rō ndajniñu ni ìn jíin jnūhun siúhú ni jíin jnūhun stáú yáhu, te cusī ni rō jíin yáhu ró, áchí de.

<sup>15</sup> Te táca ñáyuu cándetu i jeē quíji Cristo, Yaā jeē tají Yaā Dios, te cájeni ni i jeē sanaa te suu cúu Juan. <sup>16</sup> Te ni cahān Juan jíin i jíjnāhan i:

Ruhú chí jíin ndute scuándute ri rohó. Te véji ìn Yaā jeē nájñuhun scuándute ya rohó cúu jeē cuáha ya Espírítu Santo condee ìni anuá rō, te poder yá cúu nájñuhun ñuhún. Te cújéhu ndasí yá, chí tú na vé jéhu cuiti cúu ri nuū yá, ni jeē cuajniñu ri nuū yá vésú ìn jniñu lúli gá nájñuhun jeē ndají rí vésú correa ndijēn yá. <sup>17</sup> Te sāha ya nájñuhun sāha tēe scánda trigo, chí sásín ya ñayuu vāha jíin ñayuu cunéé, nájñuhun cúndoo trigo jeē quénda sán paja. Te nastútú yá trigo yá ndiví ìni yacá yá. Te paja chí jnaa yá nuū ñuhún jeē ma ndahvá cuiti. Achí Juan.

<sup>18</sup> Te súcuan te jíin cuéhē gā jñuhun ni stihví ni de ñayuu un, ní nacani de jñuhun vāha Yaā Dios nuū i. <sup>19</sup> Te suni ni cahān xeēn de nuū Herodes, tēe cúu gobernador, chí tēe un ní nacueca de Herodías, ñasihí ñani de Felipe. Te cuéhē gā jniñu néé súcuan ni sāha Herodes. <sup>20</sup> Te sa víhyá gā ni sāha de jeē neé gá, chí ni chune de Juan vecāa.

*Jeē ní jendute Jesús*

(Mt. 3.13-17; Mr. 1.9-11)

<sup>21</sup> Te nde ná tu quívi Juan vecāa, ná ni ine de ni scuándute de táca ñáyuu, te suni ni scuándute de Jesús. Te jícan tahu yá, te ni nune-ni andiví. <sup>22</sup> Te ni cuun Espírítu Santo ni quee xiní yá, te cáa nájñuhun ìn paloma. Te íchi ándiví ní cahān ìn jñuhun:

Máá ró cúu Sēhe ri jeē mani ndasí rí jíin, te yōhyo cúsi ni rí jíin ró, achí.

*Lista ñayuu yucūn ní quíji Jesucristo*

(Mt. 1.1-17)

<sup>23</sup> Te ná ni quejéé Jesús steén yá jñuhun, te iyó yá nájñuhun ocó uxí cuiyā. Te cájeni ni ñayuu jeē sēhe José cúu ya. Te José ni cuu sēhe Elí, <sup>24</sup> te Elí ni cuu sēhe Matat, te Matat ni cuu sēhe Leví, te Leví ni cuu sēhe Melqui, te Melqui ni cuu sēhe Jana, te Jana ni cuu

sēhe José, <sup>25</sup> te José ni cuu sēhe Matatías, te Matatías ni cuu sēhe Amós, te Amós ni cuu sēhe Nahum, te Nahum ni cuu sēhe Esli, te Esli ni cuu sēhe Nagai, <sup>26</sup> te Nagai ni cuu sēhe Maat, te Maat ni cuu sēhe Matatías, te Matatías ni cuu sēhe Semei, te Semei ni cuu sēhe José te José ni cuu sēhe Judá, <sup>27</sup> te Judá ni cuu sēhe Joana, te Joana ni cuu sēhe Resa, te Resa ni cuu sēhe Zorobabel, te Zorobabel ni cuu sēhe Salatiel, te Salatiel ni cuu sēhe Neri, <sup>28</sup> te Neri ni cuu sēhe Melqui, te Melqui ni cuu sēhe Adi, te Adi ni cuu sēhe Cosam, te Cosam ni cuu sēhe Elmodam, te Elmodam ni cuu sēhe Er, <sup>29</sup> te Er ni cuu sēhe Josué, te Josué ni cuu sēhe Eliezer, te Eliezer ni cuu sēhe Jorim, te Jorim ni cuu sēhe Matat, <sup>30</sup> te Matat ni cuu sēhe Leví, te Leví ni cuu sēhe Simeón, te Simeón ni cuu sēhe Judá, te Judá ni cuu sēhe José, te José ni cuu sēhe Jonán, te Jonán ni cuu sēhe Eliaquim, <sup>31</sup> te Eliaquim ni cuu sēhe Melea, te Melea ni cuu sēhe Mainán, te Mainán ni cuu sēhe Matata, te Matata ni cuu sēhe Natán, <sup>32</sup> te Natán ni cuu sēhe David, te David ni cuu sēhe Isai, te Isai ni cuu sēhe Obed, te Obed ni cuu sēhe Booz, te Booz ni cuu sēhe Salmón, te Salmón ni cuu sēhe Naasón, <sup>33</sup> te Naasón ni cuu sēhe Aminadab, te Aminadab ni cuu sēhe Aram, te Aram ni cuu sēhe Esrom, te Esrom ni cuu sēhe Fares, te Fares ni cuu sēhe Judá, <sup>34</sup> te Judá ni cuu sēhe Jacob, te Jacob ni cuu sēhe Isaac, te Isaac ni cuu sēhe Abraham, te Abraham ni cuu sēhe Taré, te Taré ni cuu sēhe Nacor, <sup>35</sup> te Nacor ni cuu sēhe Serug, te Serug ni cuu sēhe Ragau, te Ragau ni cuu sēhe Peleg, te Peleg ni cuu sēhe Heber, te Heber ni cuu sēhe Sala, <sup>36</sup> te Sala ni cuu sēhe Cainán, te Cainán ni cuu sēhe Arfaxad, te Arfaxad ni cuu sēhe Sem, te Sem ni cuu sēhe Noé, te Noé ni cuu sēhe Lamec, <sup>37</sup> te Lamec ni cuu sēhe Matusalén, te Matusalén ni cuu sēhe Enoc, te Enoc ni cuu sēhe Jared, te Jared ni cuu sēhe Mahalaleel, te Mahalaleel ni cuu sēhe Cainán, <sup>38</sup> te Cainán ni cuu sēhe Enós, te Enós ni cuu sēhe Set, te Set ni cuu sēhe Adán, te Adán ni cuu sēhe Yaā Dios, chí ni sāha ya de.

*Jeē ní jito ndee jexeén Jesús*

(Mt. 4.1-11; Mr. 1.12-13)

#### 4

<sup>1</sup> Te Jesús ni cunuú Espírítu Santo ìni yá, te ni quenda ya yūte Jordán cuahān yá. Te ni jinū yá nde nuū ñuhun téhé ní sāha Espírítu Santo. <sup>2</sup> Te ni ine ya yūcuan úú xico quíví, te ni jito ndee jexeén yá, chí cúní jeē sāha ya cuéchi. Te táca quíví ún tu ní yéji cuiti yá, te ná ni yāha quíví ún, te jíi yá sóco. <sup>3</sup> Yūcuán na te ni cahān jexeén un jíin yá:

Núu máá ró cúu Sēhe Yaā Dios, te cahān rō jeē yuú yāha na ndúu staá caji rō, achí.

<sup>4</sup> Te ni cahān Jesús jíin:

Tuú chí yósó núú tútu íi: Nasūu máni máá jíin stáá cátecu ñayuu, chí suni jíin táca jnúhun cáhān Yaā Dios, achí yá.

<sup>5</sup> Yūcuán na te cuahān jexeén un jíin yá nde xiní ñn yucu súcun, te ñn núnú-ni ní steén nuú yá táca naciún ní cáhnu ñayví. <sup>6</sup> Te ni cahān jíin yá:

Nuú maá ró cuāha ri jeé cujehnu ró núú ndivii naciún yáha, chí yóhoy luu cáa. Chí máá rí jnái ndihi, te cuu cuāha ri nuú ndé ñn cúní rí. <sup>7</sup> Núú súcuan te núú cuiñi yíti ró chíñuhún ró ruhú, te cuāha ndihi ri nuú rō. Achí jexeén.

<sup>8</sup> Te ni cahān Jesús jíin:

Satanás, cujiyo quihín rō, chí yósó núú tútu jeé chíñuhún ñayuu maá Jítoho i Yaā Dios, te nuú maá-ni ya cuajniñu i. Achí yá.

<sup>9</sup> Yūcuán na te cuahān jexeén un jíin yá nde ñuu Jerusalén. Te ni jeni ya xiní torre templo. Te ni cahān jíin yá:

Te núú Séhe Yaā Dios cúu ró, te síngava ró máá ró nde nuú ñuhun, chí jnama ya rohó.

<sup>10</sup> Chí yósó núú tútu:

Tejniñu ya ndajéhé yá quijicoo coto rohó.

<sup>11</sup> Te cunundee yá rohó jíināhan ya, návāha ma cáchihí ró jéhé rō nuú yuú.

Achí tutu. Achí jexeén.

<sup>12</sup> Te ni cahān Jesús:

Tuú chí suni yósó núú tútu jeé ma cóto ndee ñayuu Jítoho i Yaā Dios, núu jnama ya i chí tuú, achí yá.

<sup>13</sup> Te tuá ni níhín jexeén modo coto ndee Jesús quiví ún, te ni cujiyo cuahān jecu-ni tiempo.

*Jeé ní quejéé Jesús nácani ya jnúhun región Galilea*

(Mt. 4.12-17; Mr. 1.14-15)

<sup>14</sup> Te ni cunuú fuerza Espiritu Santo ini Jesús, te cuanuhun yá Galilea. Te ní región yajni yūcuan ní jíitē núu jnúhun ya. <sup>15</sup> Te ni steén yá jnúhun ini táca vehe íi sinagoga, te ndihi ñayuu ni cajejnúhun i ya.

*Jeé cuánuhun yá ñuu Nazaret*

(Mt. 13.53-58; Mr. 6.1-6)

<sup>16</sup> Te ni najinū yá ñuu Nazaret nuú ní jehnu ya. Te quiví ndétátú ní quiví ya ini vehe íi sinagoga, nájñuhun sáha sáha ya. Te ni ndocuñi yá jeé cahu ya tutu íi. <sup>17</sup> Te ni cajéhe de tutu ní tee Isaías, téē ní nacani jnúhun Yaā Dios nde jenahán. Te ni nune ya tutu ún, te ni nanihín yá nuú yosó jnúhun ní cahu ya:

<sup>18</sup> Espiritu maá Jítoho yō Yaā Dios iyó yá jíin rí,

chí ni tejniñu ya ruhú jeé nácani ri jnúhun váha nuú ñayuu ndahú.

Te ni tají yá ruhú vēji ri jíin jnúhun jeé ndúvāha ní ñayuu cácuclhyá ní.

Te castúhun rí nuú ñayuu cáyihí ndaha jexeén jeé coo libre íi.

Te sáha ri jeé ndúndijin ini anuá ñayuu tu cájecúhun ní,

te jnama ri ñayuu jeé cándoho i sáha jnáhan íi.

<sup>19</sup> Te nacani ri jnúhun jeé ní quee tiempo jeé sáha jítoho yō Yaā Dios jeé váha ñayuu.

Achí tutu ní cahu ya.

<sup>20</sup> Te ni nacasi yá tutu ún, te ni nacuāha ya nuú téē jéjñiñu ini sinagoga, te ni nucóo ya jeé steén yá jnúhun nuú ñayuu cáhín ini sinagoga. Te táca íi cájito váha i nuú yá. <sup>21</sup> Te ní quejéé yá cahān yá jíin íi:

Vijna te ní squícu jnúhun cáhān tutu íi yáha ní cajini sóho ró, achí yá.

<sup>22</sup> Te ndivii íi ní cacahān jeé váha téē cúu ya, te cánaa ní íi jeé ní cajini íi táca jnúhun luu ní cahān yá. Te ní cacajnúhun jnáhan íi:

¿A násūu séhe José cúu téē yáha?

<sup>23</sup> Te ni cahān yá jíin íi:

Jíní váha ri jeé cájeni ní rō cahān rō jnúhun yátá yáha jíin rí: Téē tájna, sátájna ró maá ró núu súcuan. Te jnúhun yáha cúní cahān jeé nájñuhun ní nasávāha ri cuehē ñayuu cácuclhyá ini ñuu Capernaum ní canihín rō jnúhun, suni súcuan na sáha ri ñuu yō yāhá návāha candije ró cájeni ní rō. Achí yá jíin íi.

<sup>24</sup> Te ní cahān gā yá:

Jendaá cahán rí jíin ró, ní ñn téē nácani jnúhun Yaā Dios, tu cájetáhú ñayuu ñuu maá de nuú de. <sup>25</sup> Te suni jendaá cahán rí jíin ró jeé ní íyo cuehē ñahan ní ndóo ndáhú ini naciún yō Israel, tiempo ní cotecu Elías, téē ní nacani jnúhun Yaā Dios. Te tiempo un tu ní cúun cuiñi saū uní cuiyā yosáva, te ní íyo ñn jnamā xeén ní cáhnu naciún. <sup>26</sup> Te tu ní tájī Yaā Dios Elías quihín de nuú ní ñn ñahan viuda naciún yō Israel, chí nuú máá ñn-ni ñahan viuda jeé ndeé ñuu Sarepta ndañúú Sidón, ní jehén de ní jito de jeé ní yejī ña.

<sup>27</sup> Te ní naciún yō Israel suni ní íyo cuehē téē ní candoho cuehyí stehyú, tiempo jeé ní cotecu Eliseo, téē ní nacani jnúhun Yaā Dios. Te ní ñn de tu ní cándije jeé ndúvāha de sáha Eliseo, chí sa suhva máñuhún-ni Naamán, téē naciún Siria ní nduvāha. Achí yá.

<sup>28</sup> Yūcuán na te táca ñayuu cáhín ini sinagoga, yóhoy ní caquiti ní íi jnúhun ní cahān yá. <sup>29</sup> Te ní candocuñi íi, te ní caquenehen íi ya yatá ñúú ún, cuahān íi jíin yá xiní yūcu íne ñuu ún, chí cácuñi íi chundahá íi ya ñinga ya cava ún. <sup>30</sup> Te tu ní cúu sáha íi, chí ní yáha-ni ya mehñú íi cuahān yá.

*Jeé ní quenehen ya tachí ini ñn téē*

(Mr. 1.21-28)

<sup>31</sup> Yūcuán na te cuahān Jesús ñuu Capernaum región Galilea. Te quiví ndétātu ní steén yá jnúhun nuú ñayuu. <sup>32</sup> Te ní canaa ní íi cájini íi jnúhun stéén yá. Chí ní steén váha ya nuú íi, chí jíiní váha máá yá.

<sup>33</sup> Te ini vehe sinagoga un íne ñn téē jeé ñuhun tachí xeén ini de. Te téē un ní cana cóhó de:

<sup>34</sup> Cuijiyo ní. ¿Naun vēji ní núu na jínáhan ná, Jesús ñuu Nazaret? ¿A vēji ní jée snáá ní sáña, chí naún? Je jíni na ndé ñn cúu ní, chí Sēhe ñi Yaā Dios cúu ní. Achí de.

<sup>35</sup> Te Jesús ni cahān xeēn yā nuū tachī ún: Casi yuhu ró te quenda ró iní tēe yāha, áchí yá.

Te ni cotúú-ni tēe un núu táca ñáyyuu, ni sáha tachī ún. Te ni quenda iní de cuahān, te tú na vé ni sáha ga jíin de. <sup>36</sup> Te ndihi ñayuu un ní cayühú i, te ni cacahān i jíin jnāhan i:

¿Na jñūhun cúu yāha jée ní cuu súcuan? Chí cūjéhu tēe yāha jée ndácu ñihin de jniñu nuū tachí, te quéndacoo-ni, áchí i.

<sup>37</sup> Te jñūhun ya ni jitē núu cuahān ní cáhnu región yūcuán.

*Jeē ní nasávāha ya naná chíso Simón Pedro*

(Mt. 8.14-15; Mr. 1.29-31)

<sup>38</sup> Yūcuán na te ni quenda Jesús iní vehe ñi sinagoga, te cuahān yā te ni jinū yā vehe Simón. Te naná chíso Simón, yñhi xeēn quíji ña, te ni cacahān ndahú de jíin yá jehē ña. <sup>39</sup> Te ní jita ndeyi ya nuū ña, te ni cahān yā jee na ndíco quíji ún. Te ni nduvāha-ni ña. Te ni ndocuñi-ni ña, te ni sáha ña jee ní yeji yá jíin de.

*Jeē ní nasávāha ya cuehē ñayuu*

(Mt. 8.16-17; Mr. 1.32-34)

<sup>40</sup> Te jee ní quee niāndii, te táca ñáyyuu jee iyó jnāhan i cácuñu ndinuū cuehyi, ni caquindeca i jnāhan i un núu yā. Te ni soó yá ndaha ya siquí ñn ñn i, te súcuan ni nasávāha ya i. <sup>41</sup> Te suni cuehē ñayuu ni quendacoo tachī iní i, te cácana cóhó táchí ún:

Maá ní cúu Sēhe Yaā Dios, achí.

Te ni cahān xeēn yā nuū, te tu ní jéhe ya jñūhun jee cahán gá súcuan, chí cájini jee maá yá cúu Cristo, Yaā ní tají Yaā Dios.

*Jeē ní nacani ya jñūhun región Galilea*

(Mr. 1.35-39)

<sup>42</sup> Te nuū ní cundijin, te ni quenda ya cuahān sán ya yatá ñúu nuū tú ñayuu. Te táca ñáyyuu cánanducú i ya, te ni jinūcoo i nuū íne ya. Te cástétu i ya jee tú cuijiyo ya nuū i. <sup>43</sup> Te ni cahān yā jíin i:

Suni cánuú jee nacani ri jñūhun vāha nuū táca gá ñuu siquí ndese ndácu Yaā Dios jniñu, chí jee yúcuani ní tají yá ruhū vēji ri. Achí yá.

<sup>44</sup> Te ní jica cuu ya ní región Galilea, nacani ya jñūhun iní táca vehe ñi sinagoga.

*Jeē ní canihin de cuehē chácá ní sáha ya*

(Mt. 4.18-22; Mr. 1.16-20)

## 5

<sup>1</sup> Te ñn quiví te íne Jesús yumar Genesaret. Te ni quecoo cuehē ñayuu, te ni chitú ñihin i nuū yā, chí cácuni i cuni nahín i jñūhun Yaā Dios. <sup>2</sup> Te ní jito ya jee yúcu uú barco yajni yumar. Te tēe cájni chácá, je ní quendacoo

de ini barco, te cánacate de ñunu de. <sup>3</sup> Te ní quiví ya iní ñn barco jee cúu barco Simón. Te ni cahān yā jíin de jee na scáca yátá de quihín jecu gā nuū ndúte. Te ni cucóo ya, te nde ini barco un ní steén yá jñūhun nuū ñayuu cuehē jee yúcu i yundúte un. <sup>4</sup> Te nuū ní jínu ní steén yā, te ni cahān yā jíin Simón:

Scáca ró barco na quihín yō nde nuū iyó cúnú ndute, te sínga ró ñunu ró jñi ró chácá, áchí yá.

<sup>5</sup> Te ni cahān Simón:

Maestro, ní niñu ní casínga ná ñunu jee jñi ná tí, te tu ní ñihín cuñi ná ní ñn tí. Te jee cahán maá ní súcuan, te na sínga tucu ná ñunu, áchí de.

<sup>6</sup> Te ní casínga de, te ní quivícoo cuehē ndasí chácá, nde nducú táhndé ñunu de. <sup>7</sup> Te ni cacaja ndahá de nuū jnāhan de cáhñin iní inga barco, na quijicoo chindéé ñájñáhan jíin de. Te ni quecoo de, te ni cascútú ndí de tí ndindúú barco, te nde je yajni quee barco. <sup>8</sup> Te ní jito Simón Pedro jee súcuan ni cuu. Te ní jecuiñi yití de nuū Jesús, te ni cahān de:

Cuijiyo ní núu ná, chí tēe iyó cuéchi cúu ná, áchí de.

<sup>9</sup> Chí maá de jíin táca tēe cáhñin jíin de, ní cayühú de jee ní canihin de cuehē chácá un ní sáha ya. <sup>10</sup> Te suni ní cayühú Jacobo jíin Juan, ndindúú sēhe Zebedeo, chí tēe chindéé ñájñáhan jíin Simón cácuu de. Te ni cahān Jesús jíin Simón:

Ma yūhu ró, chí nde vijna te sáha ri jee ñihin ró cuehē ñayuu candije ruhú, nájñūhun ní ñihín ró cuehē chácá. Achí yá.

<sup>11</sup> Yūcuán na te nuū ní jinūcoo de jíin barco nuū ñūhun íchi, te ní castóo de ndihi nda-ñiñu de, te ní candiquín de ya cuango de.

*Jeē ní nasávāha ya ñn tēe ndóho cuehyi stehyú*

(Mt. 8.1-4; Mr. 1.40-45)

<sup>12</sup> Yūcuán na te íne Jesús iní ñn ñuu, te ni quee ñn tēe ndóho cuehyi stehyú. Te ní jito de nuū Jesús, te ní jecuiñi yití de ní jecuín de nuū de nde nuū ñūhun, te ni cahān ndahú de jíin yá:

Jíni na jee cuu sáha ní jee nduvāha ná, te núu cúní ní, áchí de.

<sup>13</sup> Yūcuán na te ní soó yá ndaha ya siquí de, te ni cahān ya:

Cúní rí. Te na ndúvāha ró, áchí yá.

Te ná ní cahān yā súcuan, te ní nduvāha-ni tēe ndóho cuehyi stehyú un. <sup>14</sup> Te ní ndacu ya jniñu nuū de jee ma cáchi cuñi de nuū ní ñn. Te áchí yá:

Quisteén ró maá ró nuū sutú, te condahá ró jee socó ró nuū Yaā Dios siquí jee ndúndoo ró núu yā, nájñūhun ní ndacu Moisés jniñu jenahán. Te súcuan te cuni ñayuu jee ní nduvāha ró. Achí yá.

<sup>15</sup> Te víhyá gā ní jitē núu jñūhun ya cuahān. Te ní cataca cuehē ñayuu jee cúní nahín i

jn̄uhun stéén yā, jín jeē nasávāha ya i nuū tāca cuéhyī cándoho i. <sup>16</sup> Te máá yá cuahān s̄ín ya nuū tú ñayuu, te ni jicān tahú yā.

*Jeē ní nasávāha ya ñn tēe ndóho cuehyī ní j̄in*

(Mt. 9.1-8; Mr. 2.1-12)

<sup>17</sup> Te ñn quiv̄i te stéén yā jn̄uhun, te jecu tēe grupo fariseo jín tēe cástéén tutu ley Yaā Dios, cáyūcú de yūcuán. Te tēe un ní quecoo de nuū yā jeē véjicoo de tāca ndañūū Galilea, jín ndañūū Judea, jín ñuu Jerusalén. Te poder maá Yaā Dios iyó jín yā jeē nasávāha ya ñayuu cácuñū. <sup>18</sup> Yūcuán na te ni quecoo jecu tēe, cándiso de ñn tēe ndóho cuehyī ni j̄in, cátu de nuū ñn camilla. Te cánducú de squiv̄i de tēe ún ini vehe, te caquin de nuū íne ya. <sup>19</sup> Te tu ní cániñn de modo quiv̄icoo de jín tēe un, chí cáyūcú chitú ñayuu. Te ni cacoo de siqūi véhe, te ni canune de teja. Te ni cascúun de tēe cúhu un jín camilla de nde nuū íne Jesús mēñū ñayuu. <sup>20</sup> Te ni jini Jesús jeē cáandije de jeē cúu nasávāha ya tēe cúhu un. Te ni cahān yā jín tēe cúhu un:

Róhó, je íne cáhnu ni r̄i nuū tāca cuéchi ró, áchí yā.

<sup>21</sup> Yūcuán na te tēe cástéén tutu ley Yaā Dios jín tēe grupo fariseo, ni quejéé de cájeni ni de siqūi yā: ¿Ndé ñn cúu tēe yáha jéé cahān de jn̄uhun ndevāha jee quiti ní Yaā Dios? Chí nasūu Yāā Dios cúu de jeē cóne cáhnu ni de nuū cuéchi.

<sup>22</sup> Te ni jini Jesús jeē súcuan cájeni ni de, te ni cahān yā jín de:

¿Naun cájeni ni rō jeē cahān ndevāha ri? <sup>23</sup> Jeē uú jn̄uhun yáha, ¿ndé ñn yí gá cáa? ¿A jéé cahān r̄i jín tēe cúhu: Je íne cáhnu ni r̄i nuū tāca cuéchi ró? ¿Chí yí gá jéé cahān r̄i: Ndocuiñ̄i te caca ró, chí je ni nduvāha ró, achí ri? <sup>24</sup> Te vijna te na stéén ri jeē maá rí, Yaā ní nduu tēe, ndiso jniñ̄u ri ini ñayiv̄i yáha jéé cóne cáhnu ni r̄i nuū cuéchi.

Yūcuán na te ni cahān yā jín tēe ni j̄in ún: Cáhān r̄i jín ró, ndocuiñ̄i te naquihin ró camilla rō, te quinhun rō vehe ró, áchí yā jín de.

<sup>25</sup> Te ni ndocuiñ̄i-ni tēe ún, jito jínúñ ñayuu. Te ni naquihin de camilla nuū ni cátu de, te cuanhun de vehe de. Te nácuatáhú de nuū Yaā Dios. <sup>26</sup> Te yōhyo ni canaa ni tāca ñayuu cájito i, te ni cacahān i jeē yóhyo vāha Yaā cúu Yaā Dios. Te suni yōhyo cáyūñ i, te cacahān i:

Vijna te ni cajito yó jniñū jéñnu téyí, áchí i.

*Jeē ní cana ya Leví*

(Mt. 9.9-13; Mr. 2.13-17)

<sup>27</sup> Yūcuán na te ni quenda ya cuahān yā, te ni jito ya nuū ñn tēe stútú xúhun renta, naní de Leví, néne de nuū cutútú xúhun renta. Te ni cahān yā jín de:

Condiquin ruhū na quihín yó.

<sup>28</sup> Te ni ndocuiñ̄i de, te ni stóo de ndiñi ndajniñū de, te cuahān de jín yā.

<sup>29</sup> Yūcuán na te ni sáha Leví ñn vico cáhnu vehe de, jeē cúñ̄i ni de jín Jesús. Te cuehē tēe cástútú xúhun renta jín sava ga tēe, cáyūcú de mesa cáyeji de staā jín yā. <sup>30</sup> Te tēe grupo fariseo jín tēe cástéén tutu ley Yaā Dios, ni quejéé de cacahān de siqūi tēe cáscuāha jín yā, te ni cacajñūñ de:

¿Najehē cáyeji rō cájhi ró jín tēe cástútú xúhun renta jín tēe casáha cuéchi? áchí de.

<sup>31</sup> Te ni cahān Jesús:

Ñayuu cáh̄yo vāha, tu jini ñúhún i tēe tájná, chí ñayuu cácuñū cúu jeē jini ñúhún. <sup>32</sup> Te ruhū nasūu jéé véji r̄i cana r̄i ñayuu tú cuéchi, jeé cúu i nájnūhun ñayuu cáh̄yo vāha. Chí sa suhva véji r̄i cana r̄i ñayuu cáh̄yo cuéchi, jeé na nácani ni i te stóo i cuéchi i. Achí yā.

*Jeē ní cacajñūñ de ya siqūi jeē cóndite ní*  
(Mt. 9.14-17; Mr. 2.18-22)

<sup>33</sup> Yūcuán na te ni cacahān de jín yā:

Tēe cáscuāha jín Juan, jín tēe cáscuāha jín grupo fariseo, cuehē jinu cáh̄yo ndite ni de te cájicān tahú de. Te tēe cáscuāha jín máá ní, ¿naun tu casáha de súcuan? Chí cáyeji de cájhi de.

<sup>34</sup> Te ni cahān yā jín de:

¿A cuu condite ni de nini jéé iyó r̄i jín de? ¿A cuu sáha ró jéé condite ni ñayuu cáh̄in vico nándāha, te núu nini néne tēe nándāha? <sup>35</sup> Te quee quiv̄i jeē cújiyo tēe ni nandāha, te quiv̄i ún chí condite ni i. Achí yā.

<sup>36</sup> Te suni ni cahān yā uú jn̄uhun yátá siqūi jeē tu quijnáhan jn̄uhun jeé jéé steén yā jín táca jn̄uhun jenahān. Achí yā:

Ni ñn ñayuu tu jéñde i ñn pedazo sahma jéé i, te nachuhun i nuū ñn sahma túhú i. Chí núu súcuan te stívi i sahma jéé i, te suni tu quijnáhan jeé jeé un jín jéé tuhú. <sup>37</sup> Te tú ni ñn chúhun vino jeé ini ññ tuhú. Chí núu súcuan, te vino jeé un ndatá ññ, te naa vino jín ññ. <sup>38</sup> Chí canúu jéé chuhun vino jeé ini ññ jéé, te súcuan te quéndōo vāha ndindúu. <sup>39</sup> Te ñayuu cájhi vino áva, tu cúní i coho i jeé jeé, chí jeé áva cúu jeé vāha ga, achí i. Achí yā.

*Jeē ní cataxín de yoco trigo quiv̄i ndétātu*  
(Mt. 12.1-8; Mr. 2.23-28)

## 6

<sup>1</sup> Te ñn quiv̄i ndétātu ní yáha Jesús cuahān yā mēñū nuū cáa trigo. Te tēe cáscuāha jín yā ni cataxín de yoco trigo, te ni caquin de ini ndaha de, te ni cayeji de. <sup>2</sup> Te sava tēe grupo fariseo ni cacajñūñ de:

¿Najehē casáha ró jniñū jeé tu iyó vāha sáha ró quiv̄i ndétātu?

<sup>3</sup> Te ni cahān Jesús jín de:

¿A tu ní cácahu cuiti rō tutu ndese ni sáha David, ñn quiv̄i jeé ni j̄i de sóco jín tēe cáh̄in jín de? <sup>4</sup> Te ni quiv̄i de ini vehe Yaā Dios, te ni quihin de pan ñi jeé yosó ndijin nuū Yaā

Dios. Te ni yeji de, te suni ni jēhe de ni cayeji tēe cáhñin jín de. Te tú na ley jeé cáji ni ñin tēe, chi máá-ni sutú cuu caji. Te vēsú sūcuan te tú na cuēchi ní iyo siquī de. Achí yá.

<sup>5</sup> Te ni cahān gā yā jín de:

Ruhū, Yāā ní nduu tēe, máá rí cúu jeé ndácu jniñu siquī ndese sáha ñayuu quivī ndétátú, áchí yá.

*Jeé ní nduvāha tēe ni ichī ndaha*

(Mt. 12.9-14; Mr. 3.1-6)

<sup>6</sup> Te inga quivī ndétátú, suni ni quivī ya ñni vehe ñi sinagoga, te ni steén yā jñuhun. Te yūcuan ñe ñin tēe ni ichī ndaha váha de. <sup>7</sup> Te tēe cástéén tutu ley jín tēe grupo fariseo, cájito yuhu de ya núu nasávāha ya tēe un quivī ndétátú, návāha ñihñ de cuēchi siquī yā. <sup>8</sup> Te máá yá je jín yā ndese cájeni ni de. Te ni cahān yā jín tēe ni ichī ndaha ún:

Ndocuñi, te condichi rō mēhñu yáha, áchí yá.

Te ni ndocuñi de, te ni jecondichi de mēhñu. <sup>9</sup> Yūcuán na te ni cahān yā jín de jñánhan de:

Na cájnñuhun rí rohó ñin jñuhun: ¿Ndesé cáhán ley siquī quivī ndétátú? ¿A jeé sáha váha yó, chí sáha neé yó? ¿A jeé nasávāha yó ñayuu je yajni cuu, chí sáha yó jeé cúu i? Achí yá.

<sup>10</sup> Te ndéhé yá nuú de jeé cáyūcú de ní xiin ya. Te ni cahān yā jín tēe cúhu un:

Scaá ndaha rō.

Te ni scaá de, te ni nduvāha-ni ndaha de.

<sup>11</sup> Te yōhyo ni caquiti ni táca tēe un, te ni quejé de cándajnñuhñ de siquī Jesús, ndese cahni de ya.

*Jeé ní nacāji ya uxī uú tēe apóstol*

(Mt. 10.1-4; Mr. 3.13-19)

<sup>12</sup> Te ni cuu jecu quivī, te ni quenda ya cuacacān tahú yā nde yucu. Te ní niñu ni jicān tahú yā nuú Yāā Dios. <sup>13</sup> Te nuú ní cundijin, te ni cana ya táca tēe cáscuáha jín yá. Te ni nacāji ya uxī uú de, te ni cahān yā jeé cuu de apóstol, condiso jniñu de nacan de jñuhun ya. <sup>14</sup> Te yāha cúu síhvi de jñánhan de: Simón jeé ní nasnání yá de Pedro, jín ñani de Andrés, te suni Jacobo jín Juan, Felipe jín Bartolomé, <sup>15</sup> Mateo, Tomás, Jacobo sēhe Alfeo, Simón tēe grupo cananista, <sup>16</sup> Judas ñani Jacobo, jín Judas Iscariote, tēe jeé ní nastúu de ya.

*Jeé ní stéén yā nuú ñayuu cuehé*

(Mt. 4.23-25)

<sup>17</sup> Te ni nanuu ya yucu jín táca tēe un jeé cascuáha jín yá, te ni jecuñi yā ñin nduhvá jín de. Te cuehé ñayuu ní región Judea jín ñuu Jerusalén, jín ñayuu yumar ñuu Tiro jín ñuu Sidón, ni quecoo i jeé cúni nahín i jñuhun stéén yá, jín jeé nduvāha i cuehvi cándoho i. <sup>18</sup> Te ñayuu jeé ñuhun tachí ñni i, suni ni canduvāha i ní sáha ya. <sup>19</sup> Te ndivii ñayuu

cáculi i quehé i ya, chi sūcuan nduvāha i sáha ya jín poder yā.

*Jñuhun ñayuu yōhyo ndetú jín ñayuu jeé xeēn ndoho*

(Mt. 5.1-12)

<sup>20</sup> Te ni ndacoto ya nuú tēe cáscuáha jín yá un, te ni cahān yā:

Yōhyo ndetú rohó jeé cándoho ndáhú, chi quivī rō ñuu nuú ndácu Yāā Dios jniñu.

<sup>21</sup> Yōhyo ndetú rohó jeé cájii sōco vijna, chi quiji quivī jeé ndutú chíji rō.

Yōhyo ndetú rohó jeé cándahyū rō vijna, chí quiji quivī jeé cuecú rō.

<sup>22</sup> Yōhyo ndetú rō te núu cáquiti ní ñayuu nuú rō jeé siquī ruhū, Yāā ní nduu tēe, te cáscuéhichi i rohó, te cácahān neé i nuú rō, te cácahān i jeé ñayuu casáha jniñu neé cácuu rō. <sup>23</sup> Te na cóo sñ ní rō quivī sáha i sūcuan, te víhyá gā na cúsi ní rō, chí cáhnu téyí coo tahū rō nde andivi. Chí suni sūcuan ni casáha uhú táca jín i jín tēe ni canacani jñuhun Yāā Dios nde jenahán.

<sup>24</sup> Te nacā jeé xeēn ndoho rohó ñayuu cucá, chí vijna-ni cúu jeé cáhivo sñ ní rō.

<sup>25</sup> Nacā jeé xeēn ndoho rohó ñayuu jeé vijna cáhivo vetú chíji rō, chí quiji quivī jeé cuu rō sōco.

Nacā jeé xeēn ndoho rohó ñayuu jeé vijna cájecú rō, chí quiji quivī jeé ndocuñyá ní rō te ndahyū rō.

<sup>26</sup> Nacā jeé xeēn ndoho táca rō núu cácejnñuhñ ñayuu rohó, chí suni sūcuan ni cajejnñuhñ jín i táca tēe ni canacani jñuhun stáhú ndé jenahán.

*Jñuhun jeé cundáhú ní yō ñayuu cájito uhú yohó*

(Mt. 5.38-48; 7.12)

<sup>27</sup> Te cáhán rí jín rohó jeé cájini sōho: Cundáhú ní rō ñayuu cájito uhú rohó. Te sáha váha rō jín ñayuu cáquiti ní nuú rō. <sup>28</sup> Te cacān rō jeé váha coo ñayuu cácahān ndevāha síquī rō. Te cacān tahú rō jehé ñayuu cácahān neé núu rō. <sup>29</sup> Te núu ndé tēe cani de ñin lado yiqui núu rō, te váha ga suni cuāha rō inga lado cani de, vēsú jeé nacuāha rō jeé ndútahú de. Te núu ndé tēe cúni de quende de ticāchi rō, suni cuāha rō jñuhun jeé na quihñ de jín ndé camisa rō. <sup>30</sup> Te na-ni ñayuu jicān nuú rō, te cuāha rō núu i. Te ñayuu quihñ ndajniñu rō, ma nándacān rō. <sup>31</sup> Te nájnñuhun cáculi rō jeé sáha váha ñayuu jín rō, suni sūcuan na sáha váha rō jín i.

<sup>32</sup> Chí núu íyó máni rō jín máá-ni ñayuu jeé maní jín rō, ¿te na vé jeé váha ga sáha rō núu sūcuan? Chí nde tēe casáha cuēchi, suni maní de jín tēe maní jín máá de. <sup>33</sup> Te núu sáha váha rō jín máá-ni ñayuu jeé casáha váha jín rō, ¿te na vé jeé váha ga sáha rō núu sūcuan? Chí nde tēe casáha cuēchi, suni sūcuan casáha de. <sup>34</sup> Te núu cuāha núu rō núu máá-ni ñayuu jeé ñuhun ní rō nacuāha



i nuū rō, ¿te na vé jeē váha ga sáha ró núu súcuan? Chi nde tēe cásáha cuēchi, suni jēhe núu de nuū tāca gá tēe cásáha cuēchi, návāha nanihin tucu de. <sup>35</sup> Núu súcuan te cundáhú ni rō ñayuu cájito uhū rohó, te sáha váha ró jíin i, te cuáha núu ró núu i. Te ma cuáha ró máa síquī jeē cani ni rō jeē suni nacuáha i nuū rō. Te súcuan te cáhnu coo tahū rō, te stéén rō jeē cácuu ró séhe Yaā cujēhnu téyí. Chi máa yá váha ni yā jíin ñayuu tu nácuatáhú núu yā jíin ñayuu casáha neé. <sup>36</sup> Núu súcuan te cundáhú ni rō ñayuu, nájñuhun máa Tátá rō cundáhú ni yá i.

*Ma cahán yō síquī cuēchi jnāhan yō*  
(Mt. 7.1-5)

<sup>37</sup> Ma cahán rō síquī cuēchi ñayuu ndese sáha i, návāha suni má cahán Yaā Dios cuēchi síquī rō jeē casáha ró súcuan. Ma cahán xeén rō síquī i jeē tú váha sáha i, návāha suni ma cahán Yaā Dios súcuan síquī rō. Cone cáhnu ni rō nuū i, te suni cone cáhnu ni yá nuū rō. <sup>38</sup> Cuáha ró núu ñayuu, te suni súcuan cuáha Yaā Dios nuū rō. Chi váha ndasí cuáha ya nuū rō, nájñuhun jeē chícuáha váha ya, quisi ya, sáníhin ya, te nde scáa ya cuáha ya nuū rō. Chi cūhva jeē cájēhe ró núu ñayuu, suni cūhva un cuáha ya nuū rō. Achí yá.

<sup>39</sup> Te ni cahán yā ñin jñuhun yátá jíin i:

Tēe cástéén jñuhun tú ndaā, cácuu de nájñuhun tēe cuáá. Te ñin tēe cuáá, ¿á cuu stéén de ichi nuū inga tēe cuáá? ¿A tú ningava ndindúú de ini xehvá? <sup>40</sup> ñin tēe scuáha, tu cújēhnu de nuū maestro de. Te tēe scuáha ún, núu je ni cutūhva váha de, te jinú de coo de nájñuhun maestro de.

<sup>41</sup> Te cuēchi jnāhan ró cúu nájñuhun jeē íne ñin yāca lúli tinúú i. ¿Te naun cásáha ró cuenta jeē súcuan, te tu cásáha ró cuenta cuēchi máá ró jeē cúu nájñuhun jeē íne ñin nduhu tinúu máá ró? <sup>42</sup> ¿Te naun cácahān rō jíin jnāhan ró: Condetu, na táva rī yāca íne tinúu ró, te tu cánacani ni rō jeē íne ñin nduhu tinúu máá ró? Tēe stáhú-ni cácuu ró núu súcuan. Xihna gā tinúu máá ró tava rō nduhu, te yūcuán na te cuu condēhe váha ró jēé táva rō yāca tinúu jnāhan ró.

*Jíin jniñu cásáha ñayuu te nácuu yō ndese ñayuu cácuu i*

(Mt. 7.17-20; 12.34-35)

<sup>43</sup> Tu íyó yujnu váha jeē jēhe ndehē neé, te ni tu íyó yujnu neé jēé jēhe ndehē váha. <sup>44</sup> Chi jíin ndehē jeē jēhe ñin ñin yujnu, te jíni yō núu yujnu váha cúu. Chi tu scóyo yó ndehē higo xiní ñnu, ni tu scóyo yó ndehē uva xiní yucú zarza. <sup>45</sup> Te suni súcuan tēe váha, cáhān de jñuhun váha, chi váha ánuá de. Te tēe sáha neé cáhān de jñuhun neé, chi cánéé ánuá de. Chi modo ndese íyó ánuá ñayuu, máni jeē yúcuu cúu jeē cácahān i.

*Siquī uú vehe*  
(Mt. 7.24-27)

<sup>46</sup> ¿Najehē cácahān yíñuhún ró jíin rí: Jitohó ná, áchí ró, te tu cásquicu ró jniñu ndácu rí? <sup>47</sup> Táca ñayuu véji nuū rí te jíni sōho jñuhun cáhān rí te squícu, na stéén rí nuū rō ndese cúu i. <sup>48</sup> Cúu i nájñuhun ñin tēe jeē ní jeni de vehe de, te ni jete cúnú de nde ni níhin de toto, te ni jeni de síquī. Te nuū ní ndaa yūte, te ni chundahá vehe ún, te tu ní cánda cuíti sáha, chí síquī toto íin. <sup>49</sup> Te táca ñayuu jíni sōho jñuhun cáhān rí, te tu squícu i, cúu i nájñuhun ñin tēe ni jeni de vehe de nuū ñuhun, te tu yítuu jehé. Te nuū ní ndaa yūte, te ni chundahá vehe ún, te ni cotúú-ni, te ni naa íi-ni. Achí yá jíin i jíjnāhan i.

*Jeē ní nasávāha ya mozo capitán*  
(Mt. 8.5-13)

**7**

<sup>1</sup> Te nuū ní jínu ni cahán yā ní cajini nahín ñayuu ún, te cuahān yā ñuu Capernaum. <sup>2</sup> Te ñin tēe nación Roma jeē cúu capitán, íyó ñin mozo de jeē maní ndasí de jíin. Te mozo un cūhú i te je yajni cuu i. <sup>3</sup> Te ni jini capitán jñuhun Jesús. Te ni tají de jecu tēe jēhnu cándacu jniñu nuū ñayuu hebreo, cuangoo de nuū yá jeē cahán ndahú de jíin yá jeē na quíji ya sávāha ya mozo de. <sup>4</sup> Te ni jinúcoo tēe un núu Jesús, te ni cacahān ndahú ndasí de jíin yá:

Chindéé ñahán ní tēe cúu capitán, chí tēe váha cúu de. <sup>5</sup> Chí maní de jíin nación yó, te máa de ni ndacu jniñu ni cuvāha ñin vehe sinagoga cuu yó. Achí de.

<sup>6</sup> Yūcuán na te cuahān Jesús jíin de jíjnāhan de. Te nuū ní cuyajni ya vehe capitán, te ni tají de jecu amigo de cuajnahān yā. Te ni cacahān de jíin yá:

Achí capitán jeē tu cúní de sájneñu de níhin, chí tu cújēhnu de jeē quihín ní quíví ní vehe de. <sup>7</sup> Jeē yúcuu tu ní sájēhnu de máa de jeē quíji de nuū ní, áchí de. Te máa jēé cahán-ni ní, te na ndúvāha-ni mozo de, áchí de. <sup>8</sup> Chí máa de suni ndíso jniñu de ní casáha tēe cácujeñnu de. Te cújēhnu de nuū táca soldado de, áchí de. Te núu cáhān de jíin ñin tēe jeē na quihín de, te cuahān de. Te núu cáhān de jíin inga tēe jeē na quíji de, te quíji de. Te núu ndácu de ñin jniñu nuū mozo de, te sáha i, áchí de. Achí táca tēe un jíin yá.

<sup>9</sup> Te jeē ní jini Jesús jñuhun yáha, te ni naa ni yá. Te ni ndió cóto ya ní cahán yā jíin ñayuu cuehē cándiquín yatá yá:

Jendaá cahán rí jíin ró jeē ní nación yó Israel tu ní níhin rí ní ñin ñayuu candíje níhin súcuan, nájñuhun cándíje tēe ún, vésú tēe nación tu jíni jñuhun Yaā Dios cúu de. Achí yá.

<sup>10</sup> Te tēe ni tají capitán nuū yā, ni nanūcoo de vehe, te ni cajito de jeē jé ni nduvāha mozo un.

*Jeē ni nastécu yā sēhe yū ñahan viuda*

<sup>11</sup> Yūcuán na te cuahān yā ñin ñuu nani Nain. Te tēe cáscuaha jín yá, jín ñayuu cuehē, suni cuango i jín yá. <sup>12</sup> Te ná ni cuyajni ya yuñú ñin, te yūcuan ní quenda-coo ñayuu jeē quíchindūji i ñin tēe suchí jéē ni jhí. Te máñuhún-ni i nuū naná i, te ñahan viuda cúu ña. Te cuehē ñayuu ñuu un véjicoo jín ña. <sup>13</sup> Te ná ni jito máá Jítoho yō nuū ña, te ni cundáhú ni yā ña, te ni cahān yā jín ña: Ma ndahyú ni, achí yá.

<sup>14</sup> Yūcuán na te ni jinú yā nde nuū ndíyí ñin, te ni jñí ya yejnú, te ni cajecuiñí tēe cándiso ñin. Te ni cahān yā jín suchí ní jhí:

Cáhán rí jín ró, ndocuiñí, achí yá.

<sup>15</sup> Yūcuán na te ni nucōo suchí ní jhí ñin, te ni quejéé i nácahān i. Te ni nacuāha ya i nuū naná i. <sup>16</sup> Te ndivii ñayuu ni cayūhú i jeē ní cajito i, te ni cacahān i jeē yóhyo vāha Yāá cúu Yāá Dios. Te cácahān i:

Mēhñu yó ni quee ñin tēe cújéhu nacani jñuhun Yāá Dios.

Te suni cácahān i:

Máá Yāá Dios ni quejéé yá chindéé ñahán yá ñayuu yā. Achí i.

<sup>17</sup> Te ni jítē núu jñuhun ya ní cáhnu región Judea jín táca región yajni yūcuán.

*Jeē ní tají Juan uū tēe nuū yā*  
(Mt. 11.2-19)

<sup>18</sup> Te ñe Juan vecāa, te tēe cáscuaha jín de ni cacastūhun núu de jeē súcuan ní cuu táca jñiñu yāha. <sup>19</sup> Te ni cana Juan uū tēe ñin, te ni tají de cuango nuū Jesús, návāha cajñuhún de ya núu máá yá cúu ndije Cristo jeē ní cachi Yāá Dios jeē tají yá, chí núu nasuu yá cúu te condetu de inga. <sup>20</sup> Te ni jinūcoo tēe un núu yā, te ni cacahān de:

Juan tēe scuándute ní tají de sãña véjicoo ná cajñuhun ná ñihín núu máá ní cúu Cristo jeē achí tutu jeē quíji, chí condetu yó inga tēe quíji. Achí de.

<sup>21</sup> Te máá hora un ní nasávāha ya cuehē ñayuu cácuñu, jín ñayuu cándoho cuehyí xeēn, jín ñayuu ñuhun tachí ñin. Te suni cuehē ñayuu cuáá ní ndundijin tinúu i ní sáha ya. <sup>22</sup> Te ni cahān yā jín de:

Cuango te castūhun ró nuū Juan táca jñiñu ní cajito ró jín jñuhun ní cajini ró. Te cachi ró nuū de jeē ñayuu cuáá cánanune tinúu i, te ñayuu yacuá cánacaca i, te ñayuu ndóho cuehyí stehyú cánduvāha i, te ñayuu sohó cánanune sōho i, te ñayuu jhí nátecu i sáha ri. Te suni nacani ri jñuhun nuū ñayuu ndahú jéē jnama Yāá Dios i. <sup>23</sup> Te yóhyo ndetū tēe jeē ma nacani yátá ní de jeē ruhú cúu Cristo. Súcuan cachi ró nuū Juan. Achí yá jín de.

<sup>24</sup> Te ná cuanuhun ndíndúú tēe ñin, te ni quejéé Jesús cahān yā jñuhun Juan jín ñayuu:

¿Na vé ní jécondēhe ró jijnáhan ró ndé nuū ñuhun tēhé? ¿A ñin tēe jéni ñin jéni uū ní, nájnūhun ite jeē cánda sáha tachí? <sup>25</sup> Te núu tuú, ¿te na vé ní jécondēhe ró núu súcuan? ¿A ñin tēe cúni cújéhu jeē ñuhun sahma lúu? Tuú chí cájini ró jeē tēe cáñuhun sahma lúu te cánducú táca jéē cúñi ní, máni ñin vehe rey cáyucú de. <sup>26</sup> ¿Te na vé ní jécondēhe ró núu súcuan? ¿A ñin tēe nacani jñuhun Yāá Dios? Cáhán rí jín ró jeē suu ní jécondēhe ró. Te cújéhu ga Juan yáha vésú táca gá tēe ní canacani jñuhun Yāá Dios. <sup>27</sup> Chí jñuhun Juan cúu jeē ní cahān Yāá Dios jeē yosó núu tútu ñin:

Tají rí tēe nacani jñuhun ri cosnúu de ichi núu Cristo,

návāha coo túhva ñayuu jeē jinú yā.

Achí Yāá Dios, achí tutu. <sup>28</sup> Te cáhán rí jín ró jeē ñin ñayví yáha cújéhu ga Juan tēe scuándute vésú táca gá tēe jeē ní ñin ñayví. Te vésú súcuan te táca tēe núu ga ñin ñuu nuū ndácu Yāá Dios jñiñu, cújéhu ga de vésú Juan. Achí yá.

<sup>29</sup> Te táca ñayuu jín táca tēe cástútu xūhun renta, ní cajini i jñuhun cáhán yā, te ní cajetáhú i jeē Yāá ndaá cúu Yāá Dios, chí je ní cajendute i nuū Juan. <sup>30</sup> Te tēe grupo fariseo jín tēe cástéén tutu ley, ní casquéhichí de jñuhun jeē cúni Yāá Dios sáha ya jeē vāha de, chí tu ní cájendute de nuū Juan. <sup>31</sup> Te ní cahān gá máá Jítoho yó:

Yáhá cachi rí ñin jñuhun yátá návāha na cúni ró ndese cúu ñayuu tiempo vijna. <sup>32</sup> Cúu i nájnūhun suchí lúli cáñin nuū yáhu cácasíquí i. Te cácana ndee i xiní jñáhan i: Ní cativi rí scuili, te tu ní cájita jéhé ró. Te ní cajita ri yaa jeē cuihyá jíta, te tu ní cándahyú ró, achí i. Te nájnūhun cándāa suchí lúli un jéé tu ní nújñahan ní i ní ñin, suni súcuan cándāa ró. <sup>33</sup> Chí ní quíji Juan tēe scuándute, te cuehē jínu ní ñin ndite ní de, tu ní yéji de staá ní tu ní jhí de vino. Te tu ní cánujñahan ní ró, chí ní cacahān ró jeē ñuhun tachí ñin de. <sup>34</sup> Yūcuán na te ní quee máá rí, Yāá ní nduu tēe, te yéji rí jhí ri, te tu cánujñahan ní ró, te chí sóo jñuhun ró cacahān ró jeē máni máá jéé yéji rí jhí ri vino. Te quíñahan ri jín tēe cástútu xūhun renta jín táca gá tēe cása ha cuéchi, achí ró. <sup>35</sup> Te núu cúndichí ñin tēe jín jñuhun Yāá Dios, te jín jñiñu sáha de te cájini táca gá tēe ndichí jeē ndichí de. Achí yá.

*Jeē ñe Jesús vehe Simón tēe fariseo*

<sup>36</sup> Te ñin tēe fariseo ní cana de Jesús jeē cáji yá staá jín de. Te ní jinú ya vehe de, te ní cucōo ya mesa jeē cáji yá staá. <sup>37</sup> Yūcuán na te ñin ñahan sáha cuéchi, ndéé ña ñuu yūcuan, te ní jini ña jeē ní jinú Jesús vehe tēe fariseo un, yéji yá staá. Te ní quee ña jín ñin frasco

yuū luu jeē ñuhun chitú aceite perfume.  
<sup>38</sup> Te ín yítí ña nuū jehé yā, te ndáhyú ña. Te ni quejéé ña stáji ña jehé yā jíin ndute tñnúú ña, te ni nasíchi ña jíin íxi xíní ña. Te ni techúhú ña jehé yā, te ni chuhun íxi perfume un. <sup>39</sup> Te tēe fariseo un jeē ní cana de ya, ni jito de jeē súcuan ni sáha ña, te ni jeni ni de: Núu tēe nácani jñuhun Yaā Dios cúu tēe yáha, te cuni de ndese ñahan cúu ñahan yáha jeē quehé ña de, chí ñahan sáha cuēchi cúu ña, jéni ni de. <sup>40</sup> Yūcuán na te ni cahān Jesús jíin de:

Simón, cúní rí cahān rí jíin ró ñin jñuhun.

Te ni cahān maá de:

Cahān ní, Maestro.

<sup>41</sup> Te ni cahān Jesús:

Íin tēe jéhe núu xūhún, ni íyo uū tēe táu nuū de. Íin de ni cotaū uhūn ciento denario, te inga de ni cotaū uū xico uxí denario. <sup>42</sup> Te tú na vé cánevāha tēe un jéé náchunaa de. Te tēe jéhe núu xūhun ní íne cáhnu ní de nuū ndíndúú tēe ún. Núu súcuan te cachi rō: Jeē ndíndúú tēe ún, ¿ndé ñin de coo maní gā jíin de? Achí yá.

<sup>43</sup> Te ni cahān Simón:

Jéni ni na jéé tēe ni cotaū cuehē gā, achí de.

Te ni cahān yā jíin de:

Ndaā cahān rō, achí yá.

<sup>44</sup> Te jito ya nuū ñahan ún, te ni cahān gā yā jíin Simón:

¿A jito ró na vé sáha ñahan yáha? Jeē ní quee rí vehe ró, te tu ní jéhe ró ndute jeē ndúndoo jehé rí nájñuhun íyo costumbre. Te ñahan yáha ní stáji ña jehé rí jíin ndute tñnúú ña, te ní nasíchi ña jíin íxi xíní ña. <sup>45</sup> Te tu ní téchūhu ró ruhū nájñuhun íyo costumbre. Te ñahan yáha, nde jeē ní quívi ri vehe ró, tu jécuiñí ña jeē téchūhú ña jehé rí. <sup>46</sup> Te tu ní chūhun ró aceite xíní rí nájñuhun íyo costumbre. Te ñahan yáha ní chuhun ña aceite perfume jehé rí. <sup>47</sup> Núu súcuan te cahān rí jíin ró jeē ní stéén ña jeē yóhoo maní ña jíin rí síquí jeē íne cáhnu ní rí nuū táca cuéchi ña, vésú cuehē cúu. Te núu cone cáhnu ní rí nuū ñin ñayuu íyo jecu-ni cuéchi, te jecu-ni stéén i jeé maní i jíin rí, achí yá.

<sup>48</sup> Te ni cahān yā jíin ña:

Je íne cáhnu ní rí nuū táca cuéchi ró, achí yá.

<sup>49</sup> Yūcuán na te ñayuu cáyeji staā jíin yá, ni quejéé i cácahān maá i:

¿Nde ñin ga cúu tēe yáha jéé cahān jeé íne cáhnu ní nuū cuéchi? achí i.

<sup>50</sup> Te Jesús ní cahān gā yā jíin ñahan ún:

Ní candíje ró rúhú, te jeé yúcuán ní jnama ri rohó. Cuahán te na ndúsíi ní rō. Achí yá.

*Jñuhun ñahan ní cajejñíñu nuū yā*

## 8

<sup>1</sup> Yūcuán na te ni cuu jecu quívi, te ni jica cuu Jesús táca ñuu náhnu jíin ñuu lulí. Te

nácani ya jñuhun vāha te cástūhun yá ndese ndácu Yaā Dios jñíñu. Te ndihúxí uū tēe cácuu apóstol, cájica de jíin yá. <sup>2</sup> Te suni íyó jecu ñahan cájica jíin yá, jeē ní quenehen ya tachí ini sava ña, te ni nasávāha ya sava ña jeē cándoo cuehyí. Te ñin ña cúu María ñuu Magdala, te ini ñahan un ní quenehen ya uxā tachí. <sup>3</sup> Te inga ña cúu Juana, ñasíhi Chuza, tēe ndíso jñíñu ini vehe Herodes. Te inga ña cúu Susana, jíin cuehē gā ñahan jeē cáchindéé ñahán ña, jéhe ña táca jeé jíni ñuhún yá jíin de jíin ñahan de.

*Jñuhun yátá síquí tēe jéte trigo*

(Mt. 13.1-9; Mr. 4.1-9)

<sup>4</sup> Te cuehē ñayuu táca ñuu yūcuán ní jinūcoo i nuū Jesús. Te ni cacutútu cuehē ndasí ñáyuu, te ni cahān yā ñin jñuhun yátá jíin i:

<sup>5</sup> Íin tēe cate trigo, ni quenda de jeé cate de. Te ná ni quejéé de jéte de, te jecu trigo ní jité yuhíchi. Te ni cajejñí ñayuu síquí, te ni cayejí saa. <sup>6</sup> Te jecu gā ní jité nuū ñuhun yuū. Te ni cane, te ni ichí-ni, chí tú cuehē cajin. <sup>7</sup> Te jecu gā ní jité nuū náne íñu. Te ínuú-ni ní canecoo íñu jíin, te ní jesi nuū. <sup>8</sup> Te jecu ní jité nuū ñuhun váha. Te nuū ní jehnu, te ní jéhe cuehē nuní, chí jeé ñin ñin ní jéhe nde ciento. Achí yá.

Yūcuán na te ni cahān jee ya:

Tāca rōhó jéé jíni sōho, na chúsóhó ró, achí yá.

*Najehé cahān yā máni jñuhun yátá*

(Mt. 13.10-17; Mr. 10-12)

<sup>9</sup> Te tēe cáscuáha jíin yá ní cacajñuhún de ya na vé cuní cahān jñuhun yátá yáha. <sup>10</sup> Te ni cahān yā:

Róhó jíin ñahan ró, chí sáha Yaā Dios jeé cájecūhun ní rō jñuhun ní yisáhi yáha, ndese quívicoo ñayuu ndaha Yaā Dios jeé ndacu ya jñíñu nuū i. Te máni jíin jñuhun yátá cáhán rí jíin sava ga i, návāha vésú cájito i, te quéndoo i nájñuhun jeé tú na vé ní cájito i. Te vésú cájini sōho i, te ma jécūhun ní i.

*Jeé ní castūhun cájí yá jñuhun yátá tēe jéte trigo*

(Mt. 13.18-23; Mr. 4.13-20)

<sup>11</sup> Jñuhun yátá yáha cúní cahān: Trigo un cúu jñuhun Yaā Dios. <sup>12</sup> Te trigo jeé ní jité yuhíchi cúu nájñuhun ñayuu cájini sōho jñuhun, te quíji-ni jexeén te quénde-ni jñuhun ini anuá i, návāha ma candíje i te ma jnáma ri i. <sup>13</sup> Te trigo jeé ní jité nuū ñuhun yuū cúu nájñuhun ñayuu cájini jñuhun, te cájetáhú i te cácusíi ní i jíin. Te tu cúcutú jñuhun ún ini anuá i. Te jecu-ni quívi cácañíje i, te núu ní quejéé jñúndóho, te cájica yátá i. <sup>14</sup> Te trigo jeé ní jité nuū náne íñu cúu nájñuhun ñayuu cájini jñuhun, te cuangoo i te cácuñéñu i jíin jñíñu i jíin jéé cuní i cucúcá i te coo síi ní i. Te tu íje i jíin jñuhun ya. <sup>15</sup> Te trigo jeé ní jité nuū ñuhun

váha cúu nájñuhun ñayuu cájini nahín jñuhun ya, te cájni váha i, chí iyó váha iyó ndáá anuá i. Te cáhije i jíin jñuhun ya, chí cáchandje váha i.

*Jñuhun yátá siquí lámpara*  
(Mr. 4.21-25)

<sup>16</sup> Núu nástñin ñayuu ñin lámpara, te tu jési i ni ñin siquí, ni tu jéni i chíji jito. Chí sa suhva jéni i nuú sucún, náváha cundijin nuú ñáyuu quívicoo vehe. <sup>17</sup> Te suni súcuan tu iyó ni ñin jñuhun sáhi jéé ma cúni ñayuu, chí ndihi táca jñuhun cácahán i nane ndijin te cuni ñayuu.

<sup>18</sup> Núu súcuan te na cúni sóho váha ró, chí ñayuu je jécúhun ni, stéén ga ya nuú i. Te ñayuu tu cándije, máá jecu jeé jéni ni i jeé jiní i, sa suhva naa. Achí ya.

*Náná yá jíin ñani yá*  
(Mt. 12.46-50; Mr. 3.31-35)

<sup>19</sup> Yúcuán na te ni quee naná yá jíin táca ñani yá nuú íne ya. Te tu ní cúu quívicoo ña nuú yá siquí jeé chítú ñayuu. <sup>20</sup> Te ñin ñayuu ni castúhun núu yá:

Náná ní jíin táca ñani ni cáhñin nuú quéhe, te cácuni cahán jíin ní, áchí i.

<sup>21</sup> Te ni cahán maá yá:

Suni náná rí jíin ñani rí cácuu ñayuu cájini sóho jñuhun Yáá Dios te cáscuácu i, áchí yá jíin i.

*Jeé ní jecuiñi tachí ñihin jíin mar ni sáha ya*  
(Mt. 8.23-27; Mr. 4.35-41)

<sup>22</sup> Te ñin quívi ní quívi ya ñin barco jíin téé cáscuáha jíin yá, te ni cahán yá jíin de:

Na yáha yó quíhin yó inga lado mar.

Te ni cascáca de barco cuangoog de. <sup>23</sup> Te níni cáscáca de barco, te ni quíxi yá. Te ni jequíhi ñin tachí ñihin nuú mar, te je yajni chítú ndute ini barco, te ndúcú quéé barco.

<sup>24</sup> Te ni castóna de ya, te ni cacahán de:

Maestro, Maestro, vijná te quee yó chíji ndute te naa yó, achí de.

Te ni ndociuñi-ñi ya, te ni cahán yá nuú tachí ñihin jíin núu mar. Te ni cajecuiñi-ñi, te ni cuu nayúú í-ñi. <sup>25</sup> Te ni cahán yá jíin téé cáscuáha jíin yá:

¿Naun tu cáchandje ró?

Te máá de yóhoyo ní cayúhu de, te cánaa ni de, te cácahán de jíin jñahan de:

¿Ndé ñin ga cúu téé yáha jéé nde nuú tachí ñihin jíin núu ndúte ndácu de jñiñu te cájetáhu jéé cahán de? Achí de.

*Téé Gadara jeé ndóho tachí*  
(Mt. 8.28-34; Mr. 5.1-20)

<sup>26</sup> Yúcuán na te ni cane ya jíin de región Galilea, te cuahán yá región Gadara jeé íne inga lado mar Galilea. <sup>27</sup> Te nuú ní nanuu ya nuú ñuhun íchi, te ñin téé ñuu un ní quee de nuú yá. Te je ni cuu cuehē cuiyá ñuhun cuehē tachí ini de. Te tu ñuhun cuiti de sahna, ni tu ndéé de vehe, chí sa suhva nuú cáyindúji ndiyi ndeé de. <sup>28</sup> Te ná ni jito de

nuú Jesús, te ni jecuiñi yití de nuú yá, te ni cana cóhó de:

¿Naun véji ní núu ná, Jesús Sēhe Yáá cujéhu téyí? Cáhán ndahú ná jíin ní jeé ma stóho ní sáña, áchí de.

<sup>29</sup> Súcuan ni cahán de, chí je ni ndacu ya jñiñu nuú tachí un jéé na quéndacoo ini de. Te ni cuu cuehē jínu sáha xeñ tachí jíin de. Te cájhni ñayuu ndaha de jehé de jíin cadena, náváha tú na vé sáha de. Te ndihi-ni jéhnde de, te jínu de jéhén de nde nuú ñuhun téhé sáha tachí ún. <sup>30</sup> Te Jesús ni cajñuhun yá de:

¿Na vé nani ró?

Te ni cahán de:

Legión nani ná.

Súcuan ni cahán de jeé nani de, chí ñuhun cuehē tachí ini de. <sup>31</sup> Te ni cacahán ndahú tachí un jíin yá jeé ma tají yá quíhin ini túhñchi cúnu. <sup>32</sup> Te yucu yúcuan cáhñin cuehē quíni cájitu ti. Te tachí jeé cáñuhun ini téé un ní cacahán ndahú jíin yá jeé na cuáha ya jñuhun quívicoo ini quíni ún. Te ni jéhe ya jñuhun. <sup>33</sup> Te ni quéndacoo tachí ún ini téé ún, te ni quívicoo ini quíni. Te quíni un ní cajinu ti ní ñingoo ti ñin yucáva, ní quívicoo ti nuú mar, te ni ndaquíhi ti ndute, ní cajihí ti.

<sup>34</sup> Te téé cándito ti ní cajito de jeé súcuan ni cuu, te ni cayúhu de. Te ni cajinu de cuacastúhñ de nuú ñayuu ñuu un jíin ñayuu táca rancho. <sup>35</sup> Te cuangoog ñayuu un cuácondéhe i na vé ni cuu. Te ni jinúcoo i nuú íne Jesús. Te ní cajito i nuú téé ní quéndacoo tachí ini, néne de nuú jehé Jesús, te ñuhun de sahna, te je ni nducájí xini de. Te ní cayúhu ñayuu ún. <sup>36</sup> Te téé ní cajito ni canacani de jñuhun nuú ñayuu, ndese ní nduváha téé ní ñuhun tachí ini.

<sup>37</sup> Yúcuán na te táca ñayuu ní región Gadara, ni caquejéé i cácahán ndahú i jíin yá jeé na cújiyo ya quíhin yá, chí yóhoyo cáyúhu i. Te ni ndívi ya ini barco jeé quínuhun yá. <sup>38</sup> Te téé jeé ní quéndacoo tachí ini, ní cahán ndahú de jíin yá jeé na cuáha ya jñuhun quíhin de jíin yá. Te Jesús ní cahán yá jeé na quéndoo de, te áchí yá:

<sup>39</sup> Cuánuhun vehe ró, te nacani ró jñuhun ndese yóhoyo jéhu jñiñu ní sáha Yáá Dios jíin ró, achí yá jíin de.

Te cuahán de, te ni nacani de jñuhun ní ñuu ún, ndese yóhoyo jéhu jñiñu ní sáha Jesús jíin de.

*Jñuhun sēhe síhi Jairo jíin ñahan ní quehé yusáhmayá*

(Mt. 9.18-26; Mr. 5.21-43)

<sup>40</sup> Te nuú ní najinú Jesús inga lado mar, te ñayuu un ní cacusiñi ní i jeé ní najinú yá, chí ndihi i cándetu i ya. <sup>41</sup> Te ní quee ñin téé cujéhu ini vehe íi sinagoga, nani de Jairo. Te ní jecuiñi yití de nuú jehé yá, te ní cahán ndahú de jíin yá jeé na quíhin yá jíin de vehe

de. <sup>42</sup> Chi iyó ñin sêhe síhí de jeē mañúhún-ni i nuú de, te iyó i nájñuhun uxí uú cuiyá. Te sũchí un je yajni cuu i. Te cuahãn yá jín de. Te cuehẽ ñayuu cándiquin i ya, te ni chitú nihin i xiin ya cuangoo i.

<sup>43</sup> Te mēhñu ñayuu un cuahãn ñin ñahan cühú jeē ní cuu uxí uú cuiyá ndóho ña cuehyi niñi. Te ni jexin ña táca jéé névaha ña jín téé tájna, te tu ní nduvaha ña sáha ni ñin de. <sup>44</sup> Te ni quee ña ichi yátá yá, te ni quehé ña yusáhma ya. Te ni jecuiñi-ni niñi ña.

<sup>45</sup> Yücuán na te ni cahãn Jesús:

¿Ndé ñin ni quehé sahma ri? achí yá.

Te ndivii i ni cacahãn jeē tu ní quehé i. Te Pedro jín téé cáhñin jín de, ni cacahãn de:

Maestro, jito ní jéé ñayuu cuehẽ yáha ní chitú nihin i xiin ní, te cáquiñi i nihin, te cájnñuhun ní ndé ñin ni quehé sahma ní.

<sup>46</sup> Te ni cahãn Jesús:

Tuú chi ñin ñayuu ni quehé sahma ri, chi ni jini ri jeē jín fuerza ri ni nduvaha ñin ñayuu, achí yá.

<sup>47</sup> Te ni jini ñahan un jéé tu ní cúu coo yuhu jeē ní sáha ña. Te quisi i ña ni quee ña, te ni jecuiñi yití ña nuú jehé yá. Te jito jínúú táca ñayuu, te ni cachi caji ña najehé ni quehé ña yusáhma ya, jín jéé ní nduvaha-ni ña. <sup>48</sup> Te ni cahãn yá jín ña:

Séhẽ, ni candije ró jéé cuu nasávaha ri rohó, te jeé yúcuan ní nduvaha ró. Cuahãn te na ndúsñi ní rō, achí yá.

<sup>49</sup> Te níni cáhãn gá yá súcuan, te ni quee ñin téé vëji vehe Jairo, téé cújehnu ini sinagoga, te ni cachi nuú de:

Je ni jihí sêhe síhí ní. Te ma sájnẽñu ga ní Maestro, achí de.

<sup>50</sup> Te ni jini Jesús jñuhun yáha, te ni cahãn yá jín Jairo:

Ma yũhu ró, chi candije-ni ró, te nastécu ri sêhe ró, achí yá.

<sup>51</sup> Te ni jínú yá vehe, te tu ní jéhe ya jñuhun quiví ñayuu jín yá, chi máa-ni Pedro jín Juan jín Jacobo jín tátá naná sũchi síhí un. <sup>52</sup> Te cácuuñihá ni ndihí ñayuu cáyucú ini vehe, te cándahyũ i jehé sũchí un. Te ni cahãn yá:

Ma ndahyũ ró jijnáhan ró. Tu ní jihí i, chi quixí-ni i, achí yá.

<sup>53</sup> Te ni cajecú catá i jeē ní cahãn yá, chi cájini i jeē ní jihí sũchi síhí un. <sup>54</sup> Yücuán na te ni jni ya ndaha i, te ni cahãn jee ya jín i:

Sihí, ndocuiñi, achí yá.

<sup>55</sup> Te ni natecu i, te ni ndocuiñi-ni i. Te ni ndacu ya jniñu jeē na cuáha ña jeé cáji i. <sup>56</sup> Te tátá i naná i yóhyo ni canaa ni de cájito de. Te ni ndacu nihin ya jniñu nuú de jeé ma cáchi de nuú ni ñin jeé súcuan ni cuu.

*Jeé ní tají yá ndihúxi uú de cuanacani de jñuhun*

(Mt. 10.5-15; Mr. 6.7-13)

## 9

<sup>1</sup> Te ni nastútú yá ndihúxi uú téé cáscuáha jín yá, te ni sáha ya jeé cóndiso jniñu de te coo poder de jeé quénehen de tachí ini ñayuu, jín jéé nasávaha de ñayuu cácuñu. <sup>2</sup> Te ni tají yá de quingoo de jeé nácani de jñuhun ndese ndácu Yaá Dios jniñu, jín jéé nasávaha de ñayuu cácuñu. <sup>3</sup> Te ni cahãn yá jín de:

Ma cóndiso ró jéé cuajniñu ró ichi, ni vara, ni ñunu, ni staá, ni xũhũn. Te quihñ rō jín ñin-ni camisa, te ma cóndiso ró inga. <sup>4</sup> Te na-ni vehe núu ni quivícoo ró, te yücuán coyücu ró nde quenda tucu ró quihñ rō inga ñuu. <sup>5</sup> Te núu ñin ñuu tu cájetáhú i rohó, na quéndacoo ró yúcuan, te scóyo ró tícachá jehé ró, te súcuan stéén ró jeé iyó cuéchi i jeé tu ní cájetáhú i. Achí yá.

<sup>6</sup> Te ni quendacoo de cuahãn de, ni cajica nuu de táca ñuu, ni canacani de jñuhun jnáma Yaá Dios ñayuu. Te táca lado ni canasávaha de ñayuu cácuñu.

*Jeé ni jihí Juan téé scuándute*  
(Mt. 14.1-12; Mr. 6.14-29)

<sup>7</sup> Te Herodes, téé cúu gobernador, ni jini jñuhun de táca jniñu sáha Jesús. Te ni cunéé ni de, chi cájeni ni sava ñayuu cácahãn i jeé Juan ni natecu de. <sup>8</sup> Te sava ga i cácahãn jeé ní nane Elías, téé ni nacani jñuhun Yaá Dios nde jenahãn. Te sava ga i cácahãn jeé inga téé ni nacani jñuhun ya nde jenahãn, ni natecu de. <sup>9</sup> Te ni cahãn Herodes:

Juan chi ni ndacu ri jniñu ni tahndé xiní. Núu súcuan ¿te ndé téé cúu téé yáha jeé jini jñuhun ri jeé sáha de jniñu jéhu? Achí de.

Te ni nducú Herodes modo coto de nuú Jesús.

*Jeé ni scáji yá uhũn mil téé*  
(Mt. 14.13-21; Mr. 6.30-44; Jn. 6.1-14)

<sup>10</sup> Te ni ndecoo téé cácuu apóstol jeé ní tají yá ni canacani jñuhun. Te ni cacachi de nuú yá táca jniñu ni casáha de. Te ni jeca ya de cuahãn sñin ya jín de ñin lugar nuú tú ñayuu, yajni ñuu Betsaida. <sup>11</sup> Te ni cajini ñayuu, te suni cuangoo i. Te ni jetáhú yá i, te ni nacani ya jñuhun ndese ndácu Yaá Dios jniñu, te ni nasávaha ya ñayuu cácuñu.

<sup>12</sup> Te nuú cuáhini, te ni quecoo ndihúxi uú téé cáscuáha jín yá, te ni cacahãn de jín yá:

Tají ní ñayuu cuehẽ yáha na quingoo i táca ñuu jín táca rancho yajni yáha, te nducú i nuú ndóo i te cuaan i jeé cáji i, chi tú na vé iyó yáha, achí de.

<sup>13</sup> Te ni cahãn yá jín de:

Cuáha máa ró jeé cáji i, achí yá.

Te ni cacahãn de:

Tú na vé cánevaha ná, chi uhũn-ni staá jín úu-ni chácá. Te vésú núu quicuaan ná staá caji ndihí ñayuu cuehẽ yáha, te ni ma cúu, achí de.

<sup>14</sup> Chi iyó nájñuhun uhũn mil téé. Te ni cahãn yá jín téé cáscuáha ún:

Cahān jīn ñāyuu na cúcōo sīn cincuenta cincuenta i, áchí yá.

<sup>15</sup> Te súcuan ní casáha de, te ní cacucōo ndihí ñāyuu. <sup>16</sup> Te ní quihín ya ndihúhún stāa jīn úu chācá un, te ní ndacoto ya ichí ándiví, te ní nacuatáhú yá. Te ní tahu cuéché yá stāa ún, te ní jēhe ya nuū tēe cáscuáha jīn yá, te ní casaja de nuū ñāyuu cuehē. <sup>17</sup> Te ndivii i ní cayejí, te ní candutú chíji i. Te ní canastútú de pedazo stāa jeé ní quendōo, te ní chitú úxi uū jīca.

*Jeé ní cahān Pedro jeé Jesús cúu Cristo*  
(Mt. 16.13-19; Mr. 8.27-29)

<sup>18</sup> Te ñin quiví ní cusūn Jesús, jícán tahu yá, te máa-ní tēe cáscuáha un cáhiin de jīn yá. Te ní cajnúhun yá de:

Ruhū, ¿ndé ñin cúu ri cácahān ñāyuu? achí yá.

<sup>19</sup> Te ní cacahān de:

Sava i cácahān jeé cúu ní Juan tēe ní scuándute. Te sava ga i cácahān jeé cúu ní Elías, tēe ní nacani jnúhun Yaā Dios nde jenahán. Te sava ga i cácahān jeé inga tēe ní nacani jnúhun ya ní natecu de.

<sup>20</sup> Yūcuán na te ní cajnúhun yá de:

Te máá ró, ¿ndé ñin cúu ri cácahān rō?

Te ní cahān Pedro:

Máá ní cúu Cristo, Yaā ní tají Yaā Dios, achí de.

*Jeé ní castúhún Jesús jeé cúu yá*  
(Mt. 16.20-28; Mr. 8.30-9.1)

<sup>21</sup> Yūcuán na te ní ndacu ñihin ya jniñu nuū de jeé ma cáchi de jnúhun yáha núu ní ñin ñāyuu. <sup>22</sup> Te ní cahān ya:

Máá rí, Yaā ní nduu tēe, cánuú ndoho xeēn rí. Te táca tēe jéhu jīn sūtú cácujeñhu jīn tēe cástéén tutu ley, squéhichí de ruhū. Te cahni de ruhū, te nuū uní quiví te natecu rí, achí yá.

<sup>23</sup> Yūcuán na te ní cahān yá jīn ndihí de:

Na-ní ñāyuu núu cúní i condiquín i ruhū, na cási i jeé cúní maá i, te na cóndiquín i ruhū táca quiví, te cuáha i jnúhun ndoho i jnúndóho jeé siquí rí, vésú na cúu i. <sup>24</sup> Chi núu ndé ñāyuu cuní i cácu i nuū jnúndóho quiji nuū i jeé siquí ruhū, núu súcuan te jnahnū ndetú i ní cáni. Te núu ndé ñāyuu, vésú na cúu i jeé siquí ruhū, te cotecu i ní cáni.

<sup>25</sup> ¿Chi ndé cuajniñu vésú na cūndeyí ñāyuu ñihín i ní ñāyiví, te núu squiví i máá i nuū jnahnū ndetú i ní cáni? <sup>26</sup> Chi núu na-ní ñāyuu cúcanu i jeé siquí ruhū, Yaā ní nduu tēe, jīn síquí jnúhun cáhán rí, suni súcuan cucanu rí jeé siquí máá i, quiví ndíji rí. Te quiví ún chi yóhoyo luu cujéñhu rí, nájnūhun cújéñhu Tátá rí, te suni cácujeñhu ndajéhé ndoo ya sáha ya. <sup>27</sup> Te jendaá cahán rí jīn ró jeé sava tēe cáhiin yáhá, ma cúu de chí nde cuní de jeé ndácu Yaā Dios jniñu jīn poder yá. Achí yá.

*Jeé tucu ní nduu ya*  
(Mt. 17.1-8; Mr. 9.2-8)

<sup>28</sup> Yūcuán na te nájnūhun nuū uná quiví jeé ní cáhān yá jnúhun yáha, te ní caa ya ñin yucu, cuacacān tahu yá. Te Pedro jīn Jacobo jīn Juan cuango de jīn yá. <sup>29</sup> Te níni jícán tahu yá, te tucu ní nduu nuū yá, te sahma ya ní nducujín quiyí, te ndíndé. <sup>30</sup> Yūcuán na te ní canecoo uū tēe, cándajnūhún de jīn yá. Te cúu de Moisés jīn Elías, tēe ní cahíyo jenahán. <sup>31</sup> Te luu ndíndé de cáhiin de, te ní cacahān de jīn yá siquí jeé ní cuyajni cuu yá ñuu Jerusalén. <sup>32</sup> Te Pedro jīn tēe cáyūcu jīn de, yóhoyo cájií de máhná, te vésú súcuan te tu ní cáquixí de. Te ní cajito de jeé lúu ndíndé yá jīn ndíndúu tēe cáhiin jīn yá. <sup>33</sup> Te nuū ní cacujiyi tēe un núu yá, te ní cahān Pedro jīn yá:

Maestro, nacā jeé váha jeé cáhiin ná yáha. Te na sáha ná uní vehe ramada, ñin cuu máá ní, inga cuu Moisés, te inga cuu Elías, achí de.

Te tu sáha de cuenta na vé cúu jeé cahán de. <sup>34</sup> Te níni cáhán de súcuan, te ní quee vicō nūhun ní jesí nuū de jínáhan de. Te ní cayūhú de jeé cáhiin de chíji vicō ún. <sup>35</sup> Te nuū vicō uní ní cahān ñin ndas:

Yáha cúu Sēhe rí jeé maní ndasí rí jīn. Te na cúni nahín ró jnúhun cáhán yá, achí.

<sup>36</sup> Te nuū ní jīnu ní cahān jnúhun ún, te máá ñin na Jesús ñin ya nuū de. Te máá de tu ní cácahān cuiti de, te táca quiví ún tu ní cácachi de nuū ní ñin jeé súcuan ní cajito de.

*Jeé ní nasávaha ya ñin sūchi ñúhun tachí ñin*  
(Mt. 17.14-21; Mr. 9.14-29)

<sup>37</sup> Te inga quiví un ní nanuu ya yucu jīn de. Te cuehé ñāyuu ní jejnahan i ya. <sup>38</sup> Te méñhu ñāyuu cuehé un ní cana jee ñin tēe:

Maestro, jícán tahu na núu ní jéé condēhe ní sēhe yí ná, chí máñúhún i nuū ná. <sup>39</sup> Te máni jeé sáha xeēn tachí jīn i, te cána cóhó i sáha, te jéni yíhí i, te jéé tiñu yahu i. Te yóhoyo stóho i, te yóhoyo uhú siaá i. <sup>40</sup> Te ní cahān ndahú ná jīn tēe cáscuáha jīn ní jeé na quénehen te tachí ún, te tu ní cúu sáha de, achí de.

<sup>41</sup> Te ní cahān yá jīn de jínáhan de:

Ñāyuu yóhoyo ñihni ní cácuu ró, chí tu cácandije ró jéé cuu nduváha i. ¿Nasaa ga quiví condee rí jīn ró jeé cuándeyí ní rí jīn ró? Cuáquihin sēhe ró na quíji i, achí yá.

<sup>42</sup> Te níni véji i nuū yá, te ní cotúu i ní sáha tachí, te ní jehni yíhí i. Te Jesús ní cahān xeēn yá nuū tachí un, te ní nasávaha ya sūchí un, te ní nacuáha ya i nuū tatá i. <sup>43</sup> Te ndivii ñāyuu nahán ní canaa ní i cájito i jeé yóhoyo jéhu jniñu sáha Yaā Dios.

*Jeé ní cahān tucu ya jeé cúu yá*  
(Mt. 17.22-23; Mr. 9.30-32)

Te níni cánaa ní i cájito i táca jniñu ní sáha Jesús, te ní cahān yá jīn tēe cáscuáha jīn yá:

<sup>44</sup> Chuhun vāha ni rō jnūhun cāhān rī yāhá, te ma nāa ni rō, chi ruhū. Yaa ní nduu tēe, nastúu i ruhū quīvi ri ndaha tāca tée xeēn, achí yá.

<sup>45</sup> Te tu ní cájecūhun ni de jnūhun cāhān yā, chi tu ní cúu cuiți jecūhun ni de. Te ni cayūhú de cajnūhún de ya siquī jnūhun ni cahān yā.

*Ndé ñáyyu cúu jeē cujéhu ga  
(Mt. 18.1-5; Mr. 9.33-37)*

<sup>46</sup> Yūcuán na te tēe cáscuáha jíin yá ni caquejéé de cácahān de siquī núu ndé in de cujéhu ga. <sup>47</sup> Te Jesús ni jíni yā jeē súcuān cájeni ni de. Te ni jnū ya ndaha in sūchi lúli, te ni jeni ya i xiin ya. <sup>48</sup> Te ni cahān yā jíin de:

Na-ni ñayuu núu jeē siquī ruhū jetáhú i sūchi lúli yáha, te ruhū jetáhú i. Te ñayuu jetáhú ruhū, suni jetáhú i Yaa ní taji ruhū vēji ri. Te ñayuu núu ga mēhū rō, máá i cujéhu ga, achí yá.

*Ñayuu tu cāhān siquī yā, in i jíin yá  
(Mr. 9.38-40)*

<sup>49</sup> Yūcuán na te ni cahān Juan: Maestro, ni cajito ná in tēe jeē jíin síhví ní quēnehen de tachí ini ñayuu. Te ni cajesi na jēé sáha de, chi tu jíca de jíin yó, achí de.

<sup>50</sup> Te ni cahān Jesús jíin de:

Ma cási rō jeē sáha de, chi tēe tu cāhān siquī yō, in de jíin yó, achí yá.

*Jeē ni cāhān yā nuū Jacobo jíin Juan*

<sup>51</sup> Te ni cuyajni quīvi jeē quīnūhun yā andiví, te ni tee téyí ni yā jeē quihín yā ñuu Jerusalén. <sup>52</sup> Te ni taji yá sava tēe yósntúu de jíin jnūhun jeē jinú yá. Te cuango de in ñuu Samaria návaha nducú de nuū ndóo ya. <sup>53</sup> Te ñayuu Samaria un tu ní cájēhe i vehe ndóo ya, chi ni cajini i jeē ndé Jerusalén quihín yā. <sup>54</sup> Te Jacobo jíin Juan, tēe cáscuáha jíin yá, ni cajini de jeē súcuān cúu, te ni cacahān de jíin yá:

¿A cúní ni jēé ndácu yó jniñu quiji ñuhūn nde andiví, nájñūhun ní sáha Elías, návaha naa ñayuu yáha? Achí de.

<sup>55</sup> Yūcuán na te ni ndió cóto Jesús nuū de, te ni cahān yā nuū de:

Tu cájini rō na nuū vēji jnūhun cácahān rō. <sup>56</sup> Chi ruhū, Yaa ní nduu tēe, tú vēji ri jeē snāa rí ñayuu, chí sa suhva jeē jnáma rí ñayuu, achí yá.

Yūcuán na te cuahān yā jíin de inga ñuu.

*Siquī ñáyyu jeē cáculi i condiquín i ya  
(Mt. 8.19-22)*

<sup>57</sup> Te níni jíca ya ichi jíin de, te ni cahān in tēe jíin yá:

Condiquín na níhín quihín yō ndé-ni cúu-ni nuū quihín ní, achí de.

<sup>58</sup> Te ni cahān Jesús jíin de:

Tāca núcuui, iyó yáú cava cáñuhun tí. Te suni saa, iyó táca tí. Te ruhū, Yaa ní nduu tēe, tú nuū cusú rí, achí yá.

<sup>59</sup> Te ni cahān yā jíin inga de: Condiquín ruhū na quihín yō.

Te máá tēe un ní cahān de:

Condetu ní ndé na quíchindūji ná tátá na xihna gā. Yūcuán na te condiquín na níhín, achí de.

<sup>60</sup> Te ni cahān Jesús jíin de:

Stóo tāca ndíyi na chindūji jnāhan ndíyi, chí ndíyi cácuu ñayuu tu cácanđje. Te róhó, cuáhān te nacani rō jnūhun ndese ndácu Yaa Dios jniñu, achí yá.

<sup>61</sup> Yūcuán na te suni ni cahān inga de:

Cúní na condiquín na níhín, te cuāha ní jnūhun jeē xihna gā quicahān na jíin ñayuu cáyucú vehe ná, achí de.

<sup>62</sup> Te ni cahān Jesús jíin de:

Núu na-ni tēe quejéé de condiquín de ruhū, te núu máni jeē nácani cuihyá ni de siquī tāca jēé ni stóo de, núu súcuān te cúu de nájñūhun in tēe jítu jíin yátá, te jícó cóto de ichi vehe de. Te ma cuajniñu de condiquín de ruhū siquī jniñu ndácu Yaa Dios, achí yá.

*Jeē ní taji yá unī xico uxí de*

## 10

<sup>1</sup> Te ná ni cuu táca jniñu yáha, te máá Jítoho yó ni nacāji ya unī xico uxí gā de. Te ni taji yá ndihuū ndihuū de jeē cósnúu de nuū yā, quingoo de táca ñuu jíin táca lugar nuū jé yajni quihín máá yá. <sup>2</sup> Te ni cahān yā jíin de:

Ñayuu yáha cácuu i nájñūhun trigo jeē tah-ndé, te ndaa jeē cuehē cúu, te tēe cahnde chí jecu-ni de cúu. Núu súcuān te cacān tahú rō nuū máá Jítoho rō Yaa Dios jeē na táji yá cuehē tēe na quingoo de cahnde de trigo, cúu jeē nacani de jnūhun ya nuū ñayuu. <sup>3</sup> Te cuango jñánahán rō, te na cástūhun jeē níu rō jeē táji rí rohó quingoo rō nájñūhun londe mēhū yáñ. <sup>4</sup> Te ma cóndiso rō ñunu, ni yijni xūhún, ni ndijēn. Te ichi ma cuehéé rō ndajñūhun rō jíin ni in. <sup>5</sup> Te na-ni vehe núu ni quīvi rō, te xihna gā cahān rō: Na quiji jnūhun ndeyí jnūhun sī ni nuū rohó, ñayuu vehe yáha, achí rō. <sup>6</sup> Te núu vehe yúcuān iyó ñayuu vāha, te jnūhun ndeyí ní cahān rō jinú siquī i. Te núu tuú, te jnūhun ndeyí ní cahān rō ma jinú siquī i. <sup>7</sup> Te suni vehe yúcuān coyūcu rō, te caji rō coho rō jēé cuāha ñayuu nuū rō. Chí siquī jniñu jeē nácani rō jnūhun nuū ñayuu, te cánuú coto i róhó. Ma quéndōo rō tijni vehe, chí in-ni vehe. <sup>8</sup> Te na-ni ñuu núu ni quívicoo rō, te núu cuatáhu i róhó, te caji rō táca jēé cuāha i nuū rō. <sup>9</sup> Te nasávāha rō ñayuu cácuñu ñuu yūcuán. Te cachi rō nuū i: Je ni cuyajni Yaa Dios jeē ndacu ya jniñu nuū rō, achí rō. <sup>10</sup> Te na-ni ñuu núu ni quívicoo rō, te núu tu ní cájetáhu i róhó, te quendacoo rō ini calle yūcuán, te cahān rō: <sup>11</sup> Nde ticachā ñuu rō yáha jēé ni jnū jēhé rí, na náscóyo ri jeē cúu seña jeē iyó cuéchi rō jēé tu ní cájetáhu rō. Te na cónahán rō jeē Yaa

Dios je ni cuyajni ya jeē ndacu ya jniñu nuū rō nuū. <sup>12</sup> Te cāhān rī jīn rō jeē quivī juicio te xeēn gā coo castigo siquī ñuu casāha sūcuan vēsū siquī ñuu Sodoma nuū ní casāha ndasī ñāyuu cuēchi.

*Jeē ní cuxeēn yā nuū sava ñuu nīhni ní (Mt. 11.20-24)*

<sup>13</sup> 'Nacā jeē xeēn ndoho rō, ñāyuu ñuu Corazín. Te nacā jeē xeēn ndoho rō, ñāyuu ñuu Betsaida. Chi núu ini ñuu Tiro jīn ñuu Sidón ní sáha rī jniñu jéhu jeē ní sáha rī ini ñuu maá rō, te yachi nacani ní ñāyuu ñuu un jéē stóo i cuēchi i núu. Te sáha i seña jeē steēn jeē nācani ní i siquī cuēchi i, chi kuhun i sahma jnúu te chuhun i yaā xinī i núu. <sup>14</sup> Núu sūcuan te quivī coo juicio te xeēn gā coo castigo siquī rō jijnáhan rō vēsū jeē ní iyo siquī ñuu Tiro jīn ñuu Sidón. <sup>15</sup> Te rōhó ñāyuu ñuu Capernaum, ¿á cájini ní rō jeē cujéhu rō nájñuhun ñn jeē cáa cuahān ichi ándiví? Tuú chi sa nanuu rō ndé lugar nuū cáyūcu ánuá ndiyi. Achí yá.

<sup>16</sup> Te ní cahān gā yā jīn tée jeē tají yá quingoo:

Ñāyuu chusóhó jnúhun cahān rō, nuū maá rī chusóhó i. Te ñāyuu squéhichí rohó, suni ruhū squéhichí i. Te ñāyuu squéhichí ruhū, suni squéhichí i Yaā ní tají ruhū vēji rī. Achí yá.

*Jeē ní ndecoo tēe ní tají yá*

<sup>17</sup> Te ní ndecoo unī xico uxī tēe un, cácusī ní de te cácahān de jīn Jesús:

Nde tachī cájetáhu núu ná jéē jīn síhví ní, chí quéndacoo ini ñāyuu, achí de.

<sup>18</sup> Te ní cahān yā jīn de:

Sūcuan cúu, chí ní jito rī jeē nájñuhun ñn taja ní ningava Satanás ichi ándiví, chí ní quende rī ndihí poder un. <sup>19</sup> Te vijna te je ní jēhe rī fuerza nuū rō jeē cueñū rō nájñuhun siquī táca cōo jīn tśuhma, te cundeyí rō siquī táca fuerza maá jéē jito uhū yohó, te tú na vé sáha ga jīn rō. <sup>20</sup> Te ma cúsiñ ní rō maá-ni jeē cájetáhu táchi nuū rō, chí sa cusīñ gā ní rō jeē yosó síhví rō nde ándiví. Achí yá.

*Jeē ní cusīñ ní Jesús*

*(Mt. 11.25-27; 13.16-17)*

<sup>21</sup> Te suni hora un ní cusīñ ní Jesús, ní sáha Espíritu Santo, te ní cahān yá:

Na cútahū ná nuū ní Tátá, Jítoho ándiví jīn ñāyiví. Chí ní jesí ní táca jnúhun ndíchí ní, jéē ma cúni ñāyuu ndíchí jīn ñāyuu túhva cuenta ñāyiví yáha. Te ní steēn ní nuū ñāyuu cácuo nájñuhun sūchi lúlí. Chí sūcuan ní nujnahan ní ní Tátá, achí yá.

<sup>22</sup> Te ní cahān gā yá:

Ndivii ní jēhe Tátá rī nuū rī. Te tu cájini ñāyuu ndé ñn cúu ruhū, Séhe Yaā Dios, chí maá-ni Tátá rī cúu jeē jini yá ruhū. Ní tu cájini ñāyuu ndese Yaā cúu maá Tátá, chí maá-ni Séhe cúu jeē jini. Te iyó ñāyuu jeē

cuní maá Séhe steēn yā nuū i ndese Yaā cúu Tátá yá, te maá i suni cuní i. Achí yá.

<sup>23</sup> Yūcuán ná te jito ya nuū tée cáscuáha ún, te ní cahān yā jīn maá-ni de:

Yóhyo ndetū ñāyuu cájito jniñu jéhu jeē cájito maá rō. <sup>24</sup> Chí cahān rī jīn rō jeē cuehē tēe ní canacani jñuhun Yaā Dios, jīn táca rey, ní cacuni de coto de jeē cájito maá rō, te tu ní cájito de. Te suni ní cacuni de cuní sōho de jeē cájini sōho maá rō, te tu ní cájini de. Achí yá.

*Jñuhun ñn tēe vāha ní nación Samaria*

<sup>25</sup> Yūcuán ná te ñn tēe steēn tutu ley Yaā Dios, ní ndocuñi de ní jecahān de jīn Jesús, chí cúni de coto ndee de ya. Te ní cajñuhún de:

Maestro, ¿na vé sáha ná te nihñn tahú ná cotecu ná ní cáni ándiví? Achí de.

<sup>26</sup> Te ní cahān yā jīn de:

¿Ndesé yósó núu tútu ley? ¿Ndesé cahān cáhu rō? Achí yá.

<sup>27</sup> Te maá tēe un ní cahān de jeē cahān nuū tútu:

Coo manī ndasí rō jīn maá Jítoho rō Yaā Dios, nde jnāā ndasí rō sáha rō ndihí jeē cúsiñ ní yá, nde jīn ini jīn ánuá rō, jīn ní fuerza rō, jīn ní jéē nijnūni rō. Te cundáhu ní rō jnāhan rō nájñuhun cundáhu ní rō maá rō, achí. Achí de.

<sup>28</sup> Te ní cahān yā jīn de:

Vāha ní cahān rō. Te núu cuu sáha rō sūcuan te nihñn tahú rō cotecu rō ní cáni, achí yá.

<sup>29</sup> Te maá tēe un cúni de jeē quéndōo ndaā de nuū yá jīn jñuhun ní cajñuhún de, te ní cahān de:

¿Te ndé ñāyuu cácuo jnāhan ná? Achí de.

<sup>30</sup> Te ní cahān Jesús:

Ñn tēe ní quenda de ñuu Jerusalén, ní cuun de cuahān de ñuu Jericó. Te ichi un ní canecoo ñacuñna núu de, te ní caquende ndihí ndajniñu de, te nde sahma ñuhun de. Te ní cacani ndevāha ún de jeē jé yajni cuu de núu. Te ní castóo ún de, te cuango. <sup>31</sup> Te ní cuu jeē ichi un yāha ñn sutū quihñ de, te ní jito de nuū tēe ún, te ní síyo-ni de cuahān de. <sup>32</sup> Te suni sūcuan ñn tēe grupo levita jeē cájiejniñu ini templo, vēji de ichi ún, te ní jito de nuū tēe ún, te ní yāha jicá-ni de cuahān de. <sup>33</sup> Te ñn tēe nación Samaria, suni vēji de ichi ún, te nuū ní jito de, te ní cundáhu ní de tēe ún. <sup>34</sup> Te ní queue de nde nuū catú tēe ún, te ní chuhun de aceite jīn vino nuū ní túji tēe ún, te ní jihni de sahma nuū. Te ní soó de tēe un siquī quití de, te cuahān de jīn tēe un ndé ñn mesón, te ní condito de. <sup>35</sup> Te inga quiví ún, hora jeē quihñ de, te ní tava de uñ xūhun cáa, ní jēhe de nuū tēe chíí mesón. Te ní cahān de: Coto ní tēe yáha, te núu caxin gā ní xūhun ní jīn de, te nuū nándicó ná te nachunaa ná nuū ní, achí de. <sup>36</sup> Núu sūcuan



¿te ndese jéni ni rō? Jeē ndinúni téé ún, ¿ndé ìn de ni chíhi cuenta jeē jnánhan de cúu tēe ni canecoo ñacuñha núu? Achí yá jíin téé stéén tui ley.

<sup>37</sup> Te ni cahān de:

Tēe jeē ní cundáhú ni tēe ni tujī, vēsú téé ñuu jíca cúu de.

Yūcuán na te ni cahān Jesús jíin de:

Cuáhán núu súcuan, te suni súcuan cundáhú ni rō táca ñáyyu, achí yá.

*Jeē ní ìne ya vehe Marta jíin María*

<sup>38</sup> Yūcuán na te ni quihñ tucu ya ichi cuahān yā, te ni jinū yā ìn ñuu lulí. Te ìn ñahan nání Marta, ni cana ña ya ni jehēn yā vehe ña. <sup>39</sup> Te Marta, íyó ìn cuhū ña nání María. Te María ni cucōo ña nuū jehé Jesús, jíni nahñ ña jñūhun cáhán yā. <sup>40</sup> Te Marta chí cúnéé máá ña jíin cuéhē jñiñu sáha ña. Te ni quee ña nuū yā, te ni cahān ña:

¿A tu sáha ní cuenta jeē cuhū na ní stóo máñúhún ña sáña núu jñiñu? Te cahān ni jíin ña na chindéé ñahán ña sáña, achí ña.

<sup>41</sup> Te ni cahān Jesús jíin ña:

Marta, yōhyo ndíhví ní rō jíin cuéhē jñiñu, te yōhyo stóho ró máá ró jíin. <sup>42</sup> Te íyó ìn-ni jñiñu cánuú. Te María chí ni nacāji ña jñiñu cánuú, suu jeē ndíhví ní ña síquī jñūhun Yāā Dios, te ma quēnehen yó ña nuū ún. Achí yá.

*Jeē ní stéén yā ndese cacān tahú yō  
(Mt. 6.9-15; 7.7-11)*

## 11

<sup>1</sup> Te ìn quiví ìne Jesús ìn lugar jíicán tahú yā. Te nuū ní ndíhi ní jíicán tahú yā, te ìn tēe scuáha jíin yá, ni cahān de:

Stéén ní núu ña ndese cacān tahú na jíjnánhan ná, nájñūhun ní steén Juan nuū tēe ní cascuáha jíin de, achí de.

<sup>2</sup> Te ni cahān yā jíin de:

Jeē cacān tahú rō, te suhva cahān rō:

Tátá maá ná jíjnánhan ná jéē ndeé ní andiví, níni na cóo yñúhún ná nuū ní, chí Yāā ìi cúu ní.

Te ñūhun ni na jéé yachí quiji quiví ndacu ní jñiñu ní ñáyiví yáha.

Te na cóo táca jñiñu nájñahan ní ní, nájñūhun íyó ìni andiví, súcuan na cóo ìni ñáyiví.

<sup>3</sup> Staā jeē cátecu na táca quiví, cuáha ní núu ná vijna.

<sup>4</sup> Te cone cáhnu ní ní núu táca cuéchi cása ha ná núu ní,

nájñūhun cáhine cáhnu ní na núu ñáyyu casáha cuéchi nuū ná.

Te ma cuáha ní jñūhun jeē coto ndee jexeén sáña,

chí sa suhva jnama ní sáña nuū táca jéé neé. Achí rō jíjnánhan ró. Achí yá.

<sup>5</sup> Te ni cahān gā yā:

Núu ndé ìn rōhó íyó ìn amigo rō, te núu quihñ rō vehe de sava ñuú te cahān rō jíin

de: Amigo, cuáha núu uní staā nuū rí. <sup>6</sup> Chí ìn amigo rí jeē jíca de viaje, ni quee de vehe rí, te tú na vé névāha rí jeē cuáha rí caji de. Achí rō. <sup>7</sup> Te núu cahān tēe ìne ìni vehe: Ma stáhān rō ruhū, chí ndíhyú yehyí rí, te je cáquixí sēhe rí jíin rí, te ma cúu ndonda rí jeē cuáha rí nuū rō, achí de. <sup>8</sup> Te cáhán rí jíin ró, vēsú ma ndóna de cuáha de nuū rō síquī jeē cúu de amigo rō, te jeē yóhyo stáhān rō de, jeē yúcuán ndonda de cuáha de ndíhi jeē jíni ñúhún ró. <sup>9</sup> Núu súcuan te cáhán rí jíin ró jíjnánhan ró jeē suni súcuan cacān tahú rō nuū Yāā Dios, te cuáha ya nuū rō. Te nducú ró táca jéé váha íyó núu yā, te nihñ rō sáha ya. Te cacān tahú rō nde nihñ rō, nájñūhun sáha ñáyyu cahān yehyí ndé nune quiví i. <sup>10</sup> Chí táca ñáyyu jíicán, cuáha ya nuū i. Te ñáyyu nducú, suni nihñ i. Te ñáyyu cahān, nune ya ichi nihñ i jeē cuní i.

<sup>11</sup> ¿Te ndé ìn ró cúu tátá, te núu sēhe ró jíicán i staā nuū rō, te á cuáha ró ìn yuū nuū í? Te núu jíicán i chācá, ¿te á cuáha ró ìn coō nuū í? <sup>12</sup> Chí núu jíicán i ìn ndiví, ¿te á cuáha ró ìn tisuhma nuū í? Tú cuítí súcuan. <sup>13</sup> Núu súcuan te máá ró jíjnánhan ró, vēsú ñáyyu íyó cuéchi cácuu ró, te cájini ró cuáha ró jéé váha nuū sēhe rō. Te nagá ní cuu máá Tátá rō andiví jéé ma cuáha ya Espíritu Santo nuū ñáyyu jíicán nuū ya. Achí yá.

*Jeē ní cacahān de jeē jejniñu ya fuerza Satanás*

*(Mt. 12.22-30; Mr. 3.19-27)*

<sup>14</sup> Te quēnehen ya ìn tachí ìni ìn tēe, jeē ní cuñhñ de ní sáha. Te nuū ní quenda tachí, te ní nacahān tēe ní cuñhñ un. Te ní canaa ní ñáyyu cájito i. <sup>15</sup> Te sava ñáyyu ún chí ní cacahān i:

Jíin fuerza Satanás jeē cujéhnu nuū tachí, quēnehen tēe yáha táca táchí ìni ñáyyu, achí i.

<sup>16</sup> Te sava ga i cúní i coto ndee i ya, te ní cajicán i jeē sáha ya jeē coo ìn seña ichi ándiví. <sup>17</sup> Te máá yá jíni yá jeē súcuan cájeni ní i, te ni cahān yā:

Táca nación jeē sasñín máá te cuajnáhan máá, núu súcuan te snáa jeē íyó váha máá. Te núu ñáyyu ìn vehe sasñín máá te cuajnáhan máá, núu súcuan te ma cóo ga coyūcu cáhnu.

<sup>18</sup> Te suni súcuan Satanás, núu sasñín máá jíin jnánhan tachí, ¿te ndese cuiñí nihñ jeē ndácu jñiñu núu súcuan? Chí cacahān ró jeē jíin fuerza Satanás quēnehen rí tachí ìni ñáyyu.

<sup>19</sup> Te núu súcuan cúu núu, te ñáyyu cascuáha jíin máá ró jíjnánhan ró, ¿na jíin fuerza cáquenehen máá i tachí, cájeni ní rō? Núu súcuan te máá i jíjnánhan i cachi jeē ní castíví ndasí ró ní cacahān ró jeē cáquenehen rí tachí jíin fuerza Satanás.

<sup>20</sup> Te tuú chí sa suhva jíin fuerza Yāā Dios cúu jeē quēnehen rí tachí. Núu súcuan te je ndéé Yāā Dios méhñu ró jéé ndácu ya jñiñu.

<sup>21</sup> Te núu ìn tēe ndacuì, ndíto de vehe de jíin nújii de, núu súcuan te tú ni ìn ndajniñu de ndoñuhún. <sup>22</sup> Te núu quiiji inga tēe ndacuì gā, te cundeyí jíin tēe ún, núu súcuan te quende nujii de jeē ndíto de vehe de, te sáha de ndese cúni maá de jíin ndajniñu jeē quénde de. Te nájnūhun tēe ndacuì gā ún, súcuan cúu maá rí nuū Satanás.

<sup>23</sup> Te ñayuu tu iyó mání jíin rí, núu súcuan te jíto uhú i ruhú. Te ñayuu tu nástútú jíin rí, núu súcuan te sa jéte núu i ñayuu vējicoo nuū rí.

*Tachī jeē nastútú jnāhan ndávi ini ñayuu*  
(Mt. 12.43-45)

<sup>24</sup> Núu ni quenda ìn tachī ini ìn tēe tu cándije, te jíca cuu nuū ñūhun téhé, ndúcu núu ndétátú, te tu níhín, yūcuán na te jéni ni maá: Na quínuhun rí vehe nuū ní quenda rí. <sup>25</sup> Te núu ni ndee tucu, te jíto jeē tēe tu cándije un cúu de nájnūhun ìn vehe jeē ní ndundo. <sup>26</sup> Yūcuán na te jéquiñin uxā gā tachī xeén gā vēsú maá. Te quívicoo ini tēe un jéē cōyūcu yūcuán. Núu súcuan te xeén gā ndoho tēe un jéē sándihí vēsú jeē xihna ñūhún. Achí yá.

*Yōho ndetū ñayuu cájini nahín jnūhun ya*

<sup>27</sup> Te níni cáhān yā jnūhun yāha, te ìn ñahan íne mēhñu ñayuu cuehē un, ní cahān jee ña jíin yá:

Yōho ndetū ñahan ní scácu níhín te ní scáxin ña níhín, áchí ña.

<sup>28</sup> Te ní cahān yā:

Sa suhva yōho ga ndetū ñayuu cájini nahín jnūhun Yāā Dios te cásquicu í, áchí yá.

*Jeē ní cajicān ñayuu tu cácandije ìn jniñu jēhnu*

(Mt. 12.38-42; Mr. 8.12)

<sup>29</sup> Te ní cataca cuehē gā ñayuu nuū Jesús, te ní quejéé yā cahān yā:

Ñayuu iyó vijna máni cásáha néé i. Te cájicān i ìn jniñu jēhnu jeē stéén núu Yāā ní tají Yāā Dios cúu rí. Te tú na inga jniñu jēhnu stéén rí nuū i, chí maá-ni jniñu jēhnu nájnūhun ní cuu jíin Jonás, tēe ní nacani jnūhun Yāā Dios nde jenhán. <sup>30</sup> Chí nájnūhun ní cajini ñayuu ñuu Nínive jeē ní cuu ìn jniñu jēhnu jíin Jonás, suni súcuan cuni ñayuu tiempo yáha jeē coo ìn jniñu jēhnu jíin ruhú, Yāā ní nduu tēe, jeē quíjnāhan jíin modo ní ndoho Jonás. <sup>31</sup> Te reina jeē ní cujēhnu nación ichi sur, natecu ña jíin ñayuu tiempo yáha, quiví juicio jeē sándaā yā cuēchi, te cahān ña cuēchi siquí i. Chí nde jíca téyí ní quiiji ña ní jini nahín ña jnūhun ndíchí ní cahān rey Salomón. Te vijna chí cújēhnu ga ruhú, Yāā íne yāhá vēsú Salomón, te tu cácandije ró ruhú. <sup>32</sup> Te táca ñayuu ñuu Nínive nuū ní nacani Jonás jnūhun, natecu i jíin ñayuu tiempo yáha, quiví juicio jeē sándaā yā cuēchi, te cahān i cuēchi siquí ñayuu yáha. Chí maá i ní canacani ní i ní castóo i cuēchi i

quiví ní nacani Jonás jnūhun nuū i. Te vijna chí cújēhnu ga ruhú, Yāā íne yāhá vēsú Jonás, te tu cácandije ró ruhú.

*Jnūhun yátá siquí lámpara*  
(Mt. 5.15; 6.22-23)

<sup>33</sup> Núu nástáin ñayuu ìn lámpara, tu chísháhi i, ní tu chúne i chíji ìn cajón. Chí sa suhva jéni i nuū sucún, náváha cundijin nuū ñayuu quívicoo vehe. <sup>34</sup> Te tinūu ró cúu nájnūhun lámpara nuū yiqui cúñu ró. Núu súcuan te núu tinūu ró iyó ndijin, te ní-ni yiqui cúñu ró cundijin. Te núu tinūu ró tu iyó ndijin, te ní-ni yiqui cúñu ró iyó nee. <sup>35</sup> Te suni súcuan cúu ánuá ró, te coto ró jéē ma cáni néé ní ró, náváha tú coo nee ini anuá ró. <sup>36</sup> Chí núu máni jniñu váha cásáha ró, te tú na jniñu néé cásáha ró, núu súcuan te luz yā cundijin váha ini anuá ró, nájnūhun ìn lámpara jeē sáha jeē cundijin váha. Achí yá.

*Jeē ní cáhān yā jeē iyó cuēchi de jíjnāhan de*  
(Mt. 23.1-36; Mr. 12.38-40; Lc. 20.45-47)

<sup>37</sup> Te nuū ní cuu ní cahān yā, te ìn tēe grupo fariseo ní cana de ya jeē caji yā staa vehe de. Te ní quiví ya, te ní cucōo ya mesa jeē caji yā staa. <sup>38</sup> Te tēe fariseo un náa ní de jíto de jeē tu squicu ya costumbre jeē nandahá yā te caji yā staa. <sup>39</sup> Te ní cahān maá Jítoho yō jíin de:

Róhó tēe fariseo jíjnāhan ró, chí nájnūhun jeē canacate ró yátá vaso jíin yátá cohó cúu jeē nandahá ró. Te ichi ini ró chí ñūhun máni maá jnūhun cuíñhá jíin jnūhun néé. <sup>40</sup> Tēe cánéé cácuu ró. ¿A tu cájini ró jeē Yāā ní sáha yiqui cúñu ró, suni ní sáha ya anuá ró? <sup>41</sup> Te jeē cájēhe ró caridad nuū ñayuu ndahú, na sáha ró siquí jeē cundahú ndije ní ró i. Te súcuan te coo ndaa anuá ró.

<sup>42</sup> Nacā xeén ndoho róhó tēe fariseo, chí cásquicu ró táca jniñu lúli, te tu cásquicu ró jniñu cánuú. Chí cásáha ró úxi úxi nuhni tamñu jíin ruda jíin táca yucú, te cásocó ró ìn ìn siquí táca úxi un núu Yāā Dios. Te tu cásáha cuiti ró jniñu ndaa, ní tu cáhíyo maní ró jíin Yāā Dios. Táca jéē yáha cánuú sáha ró núu, te suni ma stóo ró jéē socó ró táca yucú ún.

<sup>43</sup> Nacā xeén ndoho róhó tēe fariseo, chí máni cánujnahan ní ró cucōo ró núu silla yiñuhún gá ini vehe í sínagoga. Te cánujnahan ní ró jeē cahān yiñuhún ñayuu jíin ró nuū calle.

<sup>44</sup> Te nacā xeén ndoho róhó tēe cástéén tutu ley Yāā Dios, jíin róhó tēe fariseo, chí tēe stáhú-ni cácuu ró. Chí cándaa ró nájnūhun yaú ndiyí jeé tú ndijin, chí cásnáa ró anuá ñayuu, te tu jíni i jeē súcuan cásáha ró jíin i. Achí yá jíin de.

<sup>45</sup> Yūcuán na te ní cahān ìn tēe stéén tutu ley:

Maestro, jeē ni cāhān ni táca jnúhun yáha, suni nde siquī maá ná jijnáhan ná ní cahān ní, áchí de jín yá.

<sup>46</sup> Te ni cahān yā:

Suni nacā xeēn ndoho róhó tēe cástéén tutu ley. Chi suni cástéén rō táca ley ni catava maá rō jeē yí sáha, te tu cácuendeyí ñayuu squícu i. Te maá rō, chí ni ñin xini ndáha rō tu cáscānda rō jēe squícu rō.

<sup>47</sup> 'Nacā xeēn ndoho rō jijnáhan rō. Chi cásáha rō vehe siquī nuū yínduji ndryi jii rō, tēe ni canacani jnúhun Yaā Dios nde jehahān. Te suni táca jii rō ni cajehni de tēe ún. <sup>48</sup> Te jeē casáha rō súcuán cūu jeē cáquijnáhan rō jín de siquī jniñu ni casáha de. Chi maá de ni cajehni tēe ún, te maá rō cásáha rō vehe ndryi ún.

<sup>49</sup> 'Jeē yúcuán nde jehahān ní cahān Yaā Dios ñin jnúhun ndíchi: Tají rí táca tēe nacani jnúhun ri jín táca tēe apóstol quingoo de nuū i. Te sava de cahni i, te sava ga de coto xeēn i, áchí Yaā Dios. <sup>50</sup> Te súcuán te siquī ñayuu tiempo yáha na cóndee cuēchi jeē ní cajehni jii i tēe ni canacani jnúhun Yaā Dios, nde quiví ni jécōo ñayiví te nde vijna, <sup>51</sup> nde Abel xihna gā te nde Zacarías, tēe ni cajehni de ñi templo sava méhñu cuarto ñi jín altar. Núu súcuán te cāhān rí jín rō jeē siquī ñayuu tiempo yáha condee táca cuēchi ún.

<sup>52</sup> 'Nacā xeēn ndoho róhó jēe castéén tutu ley, chí cájesi rō ichi jeē jécūhun ni ñayuu jnúhun ya. Chi ni maá rō tu cácuani rō jecūhun ni rō, ni tu cájēhe rō jnúhun jeē jecūhun ni ñayuu cácuani. Achí yá.

<sup>53</sup> Te jeē ni cāhān yā jnúhun yáha, te tēe cástéén tutu ley Yaā Dios jín tēe fariseo, yóhoyó ni caquiti ni de nuū yá. Te ni caquejé de cástíchi de ya siquī cuehē gā jnúhun. <sup>54</sup> Chi yuhu-ni cáncudú de nuū sana te stívi yá jnúhun cahān yā, návāha niñin de cuēchi siquī yā.

*Siquī jnúhun stáhú cácahān tēe fariseo*

## 12

<sup>1</sup> Te níni súcuán cūu, te ni cacutútú cuehē mil ñayuu, chí nde cájeñu i siquī jehé jánhan i. Te xihna gā ni quejé yá cāhān yā jín tēe cáscuáha jín yá:

Coto má candíje rō levadura tēe grupo fariseo, chí suu cūu jnúhun stáhú cácahān de. Chi jíté núu nuū ñayuu, nájnúhun ndécava levadura nuū ñujen pan. <sup>2</sup> Chí jnúhun stáhú un má quéndōo sáhi cuiti, chí ndíhi natūu ndijin, te cuni ñayuu. <sup>3</sup> Núu súcuán te suni maá rō, táca jnúhun ni cacahān rō jeē tu ní jín ñayuu, ñin quiví te cuni vāha i. Te táca jnúhun ni cacahān sáhi rō jeē ndihyú yehyí, ñin quiví te cahān jee ñayuu yatā táca vehe.

*Jeē ní cachi yā ndé ñin cūu jeē yūhu yó (Mt. 10.28-31)*

<sup>4</sup> 'Cāhān rí jín rō jijnáhan rō, amigo: Ma yūhu rō coto rō ñayuu cahni yiqui cúñu rō, chí núu ni cajehni i róhó, te tuá na vé cūu sáha ga i. <sup>5</sup> Te na cáchi rí nuū rō ndé ñin yūhu rō coto rō: Jeē yūhu rō coto rō cūu Yaā Dios jeē núu sáha ya jeē cūu rō, te iyó poder yā chune ya rohó infierno. Suu maá yá cūu jeē yūhu rō jeē ma stívi rō nuū yá.

<sup>6</sup> 'Te táca saa chí tú yahu ndéé tī, chí nde uhñ tī jeē nuū centavo lulí. Te ni ñin ti tu náa ni Yaā Dios jeē tu ndito ya. <sup>7</sup> Te nagā ni cuu róhó jijnáhan rō, chí nde ndíhi xixini rō je ni cahu ya. Núu súcuán te ma yūhu rō jijnáhan rō, chí cánuu ndasí gā rō nuū yā vesú cuehē táca saa.

*Ñayuu jejnúhún Jesucristo nuū inga ñayuu (Mt. 10.32-33; 12.32; 10.19-20)*

<sup>8</sup> 'Te cāhān rí jín rō, táca ñayuu jeē cuajnúhún ruhū nuū inga ñayuu, suni súcuán ruhū, Yaa ní nduu tēe, cuajnúhún rí i nuū táca ndajéhe Yaā Dios. <sup>9</sup> Te táca ñayuu jeē ma cuajnúhún ruhū nuū inga ñayuu, suni súcuán ma cuajnúhún rí i nuū táca ndajéhe Yaā Dios.

<sup>10</sup> 'Te núu ndé ñayuu cahān i siquī ruhū, Yaa ní nduu tēe, cone cáhnu ni Yaā Dios nuū i. Te núu ndé ñayuu cahān ndevāha i siquī Espíritu Santo, ma cóne cáhnu ni Yaā Dios nuū i.

<sup>11</sup> 'Te núu cuandeca i róhó táca vehe ñi sinagoga nuū tēe cáscānda cuēchi, jín nuū tēe cácuu tohō, te ma nacani ndasí ni rō ndese stío cuñí rō jnúhun nuū de. <sup>12</sup> Chí maá hora un te Espíritu Santo steén yā nuū rō ndese cahān rō. Achí yá.

*Siquī jeē ma tēnuú yō ndajniñu cúca*

<sup>13</sup> Yúcuán na te ñin tēe ñne nuū ñayuu cuehē un ní cahān de jín Jesús:

Maestro, cahān ni jín ñani na jēe na táhú sáva de tahū na jín de, áchí de.

<sup>14</sup> Te ni cahān yā jín de:

¿Ndé ñin ni jeni ruhū jeē ndacu ri jniñu tahū sáva tahū rō? Achí yá.

<sup>15</sup> Te ni cahān gā yā:

Condito rō maá rō jijnáhan rō jēe ma ndíyo ni rō xūhun jín táca gā. Chí vesú cuehē ndasí ndajniñu névāha ñin tēe, te nasūu jēe yúcuán sáha jeē quéndōo ndetú de, áchí yá.

<sup>16</sup> Yúcuán na te ni cahān yā ñin jnúhun yatā jín i:

Ni Iyo ñin tēe cúca jeē névāha ñuhun jeē cūu vāha ndasí itu. <sup>17</sup> Te tēe cúca un ní nacani ni de: ¿Ndese sáha ri? Chí tuá ndé cūhun niñi ri. Achí de. <sup>18</sup> Te ni jeni ni de: Suhva na sáha ri. Na cánu rí táca yáca rí, te nasáha ri jeē náhnu ga. Te yúcuán chuvāha ndíhi ri niñi ri jín táca ndajniñu ri. <sup>19</sup> Yúcuán na te cahān rí jín ánuá rí: Vijna te cuehē teyí névāha yó jēe canda cuehē cuiyā. Na ndétātu yó te caji yó coho yó, te na cúsi ni yó, ni jeni ni de. <sup>20</sup> Te ni cahān Yaā Dios jín de: Tēe cánéé cūu rō. Chí jecuáa vijna cuu rō, te táca jēe ní chuvāha

ró, ¿ndé tée cuu? Achí Yaa Dios jíin de. <sup>21</sup> Te súcuán ndoho táca tée jeé sacúca de máa de, te tu ndúcu de jeé quendoo ndetū de sáha Yaa Dios. Achí yá.

*Yaa Dios ndito ya yohó*  
(Mt. 6.25-34)

<sup>22</sup> Te ni cahán yá jíin tée cáscuáha jíin yá:

Núu súcuán te cáhán rí jíin ró: Ma nácani ndasí ni rō siquí jeé cótecu rō, núu ndese caji rō, ni siquí sahma, núu ndese cuhun rō. <sup>23</sup> Chi Yaa Dios ni sáha ya jeé técu rō jíin yáiqui cúnu rō, te nagá ni cuu jeé máa cuáha ya jeé cáji rō jíin jée cūhun rō. <sup>24</sup> Condēhe rō ndese cátecu quiti cácuu nájnūhun cálu, chí tu cátaji tí, ni tu cánaštútú tí jeé chūváha tí, ni tú yacá tí. Te vēsū súcuán te máá Yaa Dios scáji yá tí. Te cánuú ndasí gá rō jijnáhan rō vēsū táca quiti ún. <sup>25</sup> ¿Te ndé iin rō, á cuu scuéhnū rō máá rō sava metro gā, vēsū na nácani ndasí ni rō? <sup>26</sup> Te núu ma cúu sáha rō vēsū iin jniñu lúli súcuán, ¿te najehē cáncani ndasí ni rō siquí jeé cáji rō jíin jée cuhun rō?

<sup>27</sup> 'Condēhe jijnáhan rō ndese jée ita táca yúcu. Chí tu sájniñu, ni tu táú. Te cáhán rí jíin ró jeé ni rey Salomón, quiví ní ñūhun de sahma váha ndasí, tu ní ñūhun de sahma lúu súcuán nájnūhun ita ún. <sup>28</sup> Te núu súcuán jéhe Yaa Dios sahma lúu ita un jée jée vijna te sajnē cayū nuū ñuhún, te nagá ni cuu róhó jijnáhan rō jée ma sáha ya jeé nihín rō sahma. ¿Te naun tu cácan dije nihin rō jée ndito ya rohó? <sup>29</sup> Núu súcuán te ma nácani cuihyá ni rō ndese caji rō ndese coho rō. <sup>30</sup> Chi táca ñayuu ñayiví jée tu cácan dije cúu jeé máni siquí jeé yáha cándihví ni i. Te máá rō jijnáhan rō, chí iyó Tátá rō andiví, te jini yá jeé cájini ñuhún rō táca jée yáha. <sup>31</sup> Te sa suhva cánuú gá jeé cóndihví ni rō siquí jniñu jeé ndácu Yaa Dios nuū rō. Yūcuán na te sáha ya jeé nihín rō táca jée yáha.

*Ndese coo cúca yó nde andiví*  
(Mt. 6.19-21)

<sup>32</sup> 'Ma yūhu rō jijnáhan rō chí cácuu rō nájnūhun lanchi rí. Chí vēsū jecu-ni cácuu rō, te máá Tátá rō cúsñ ni yá jeé quívicoo rō ñuu nuū ndácu ya jniñu. <sup>33</sup> Xico rō jeé cáneváha rō, te cuáha rō xūhun un núu ñayuu ndahú. Te súcuán caya rō tahú rō nde andiví núu ma cútúhú, nájnūhun jeé chūváha rō xūhun ini yijni. Chí nde andiví te ma náa jeé váha coneváha rō. Chí yūcuán má quívi ñacuñhá, ni ma cúu stívi tiquixin. <sup>34</sup> Chí nde nuū nihín rō tahú váha rō, yūcuán cúu nuū cóndihví ni rō siquí.

*Jeé na cóo tūhva yó jée ndé yá*

<sup>35</sup> 'Coo tūhva rō jijnáhan rō jée ndéé Jitoho rō, te coo rō nájnūhun mozo jeé nastán i lámpara i. <sup>36</sup> Chí iyó tūhva i te cándetu i jeé ndéé patrón i jeé cuahán de vico nándáha. Chí núu ni ndee de te cahán de, te nune-ni

i yéhyí jijnáhan i. <sup>37</sup> Te yōhyo ndetū mozo un núu ni ndee patrón i, te cuni de jeé cándito i. Jendaá cahán rí jíin ró jeé máa patrón sátūhva de máa de, te scúcoo de i mesa te cani de cohó i. <sup>38</sup> Te vēsū cucuée de ndee de nde sava ñuú, chí jée néé gā, te núu cuni de jeé súcuán cándito mozo de, te yōhyo ndetū i jijnáhan i núu súcuán. <sup>39</sup> Te na jécūhun ni rō jeé cahán jnūhun yátá yáha: Tēe chíí vehe, núu ni jini de na hora quiji ñacuñhá, te condito de, te ma cuáha de jnūhun jeé sacuiñhá vehe de núu. <sup>40</sup> Te suni súcuán coo tūhva rō jijnáhan rō, chí núu tuú, te máa hora jeé tú na vé cájeni ni rō, te ndee ruhū, Yaa ní nduu tēe. Achí yá jíin de.

*Jnūhun mozo váha jíin mozo tu squicu*  
(Mt. 24.45-51)

<sup>41</sup> Yūcuán na te Pedro ni cajnūhún de ya: ¿A jíin máa-ni ná jijnáhan ná cahán ni jnūhun yátá yáha, chí suni cáhán ni jíin ndihi ga ñayuu? achí de.

<sup>42</sup> Te ni cahán máa Jitoho yó: Cáhán rí jíin ndé-ni ñayuu cúu nájnūhun mozo jeé ndito xini te squicu váha. Te máa patrón sáha de jeé condiso jniñu i coto i ñayuu vehe de, náváha scáji i máa hora. <sup>43</sup> Te yōhyo ndetū mozo un jée núu ni ndee patrón, te cuni de jeé súcuán squicu váha i. <sup>44</sup> Jendaá cahán rí jíin ró jeé cani de mozo un jée cóto i ndihi ndajniñu de. <sup>45</sup> Te núu jéni ni i jée ma ndíji yachí patrón i, te quejéé i cani i tēe jíin ñahan cácuu jnahan mozo i, te caji i coho i te najini i, <sup>46</sup> núu súcuán te ndee-ni patrón quiví jeé tu ndetu i jíin hora jeé tú na vé jéni ni i. Te stóho xeén de i, te squiví de i ndoho i jíin ñayuu tu cásquicu.

<sup>47</sup> 'Te mozo jeé jini i ndese núnjahan ni patrón i, te núu tu sátūhva i ni tu squicu i jeé cuni de, ndoho xeén i jíin yujnu xí. <sup>48</sup> Te mozo jeé tu jini i ndese núnjahan ni patrón i, te núu sáha i jniñu jeé cani de i, núu súcuán te cūhva-ni cani de i. Chí ñayuu jeé steén cuehé yá nuú i, suni cuehé nandacán yá nuú i. Te ñayuu jeé cuehé gā jniñu téjniñu ya i, suni cuehé gā nandacán yá nuú i.

*Jeé siquí Jesús te cusñ ini ñayuu*  
(Mt. 10.34-36)

<sup>49</sup> 'Ni quee rí jeé nájnūhun jeé scuiquín rí ñuhún ini ñayiví, te suu cuu jeé cusñ ini ñayuu jeé siquí ruhū. Te cúní rí jeé yachí coo súcuán, náváha quívicoo ñayuu ndaha Yaa Dios. <sup>50</sup> Te iyó iin jnūndōho cánuú ndoho rí, te cúcuíhyá ndasí ni rí chí nde jinu ndoho rí, te ndusí ni rí. <sup>51</sup> ¿A cájeni ni rō jeé véji rí jeé cóyūcu máni ñayuu ñayiví? Cáhán rí jíin ró jeé tuú, chí sa suhva jée cusñ ini ñayuu jeé siquí ruhū. <sup>52</sup> Chí nde vijna te quejéé jée uhún ñayuu iin vehe, sásñin máá jijnáhan, uní siquí uú, te uú siquí uní. <sup>53</sup> Chí tátá cusñ ini jíin séhe yí, te séhe yí jíin tátá, te náná jíin séhe shí, te séhe shí jíin náná, te náná chíso jíin

sêhe jênu, te sêhe jênu jíin náná chîso. Achí yá.

*Jeê ni cáhân yá siquî seña andiví  
(Mt. 16.1-4; Mr. 8.11-13)*

<sup>54</sup> Te suni ni cahân yá jíin ñáyuú cuehê ún: Núu cájito ró jeê náne vicô ichi núú cáne niándii, te cácahân rō jeê cuun saū, te súcuan cúu. <sup>55</sup> Te núu quée tachí vëji ichi sur te cácahân rō jeê nandii, te súcuan cúu. <sup>56</sup> Têe stáhú-ni cácuu ró. Chi cájecūhun ni rō ndese stéén seña andiví jíin ini ñayiví, ¿te naun tu cájecūhun ni rō ndé ñin cúu ruhú jeê sáha ri táca jniñu jéhnú tiempo yáha?

*Jeê cóndihvî ni yō jeê ma cóndee cuēchi siquî yō  
(Mt. 5.25-26)*

<sup>57</sup> ¿Te najehê tu cáncani ni maá ró ndé ñin cúu jniñu ndaá sáha ró? <sup>58</sup> Te núu ñin ñayuu quihîni i jíin ró nuú tohó jeê cacán i cuēchi siquî rō, núu súcuan te níni cuáhân rō jíin i ichi te condihvî ni rō sándaá rō jíin i. Chi núu tuú, te squiví i róhó núu juez, te juez siáha de róhó núu policía, te policía chune de róhó vecáa. <sup>59</sup> Te jendaá cahán rî jíin ró jeê ma quénda cuiti ró yúcuán chi nde chunaa rō ndihî cuiti xūhun cájicán de. Te suni súcuan condihvî ni rō cahân ndahú ró jíin Yaá Dios, náváha ma ndácunehen ya cuēchi siquî rō. Achí yá jíin de.

*Jeê cánuú nacani ni yō jeê stóo yó cuēchi yó*

## 13

<sup>1</sup> Te ñin quivî yúcuán ní quecoo jecu tēe, ni canacani de jñūhun nuú yá ndese ni candoho jecu tēe Galilea. Chi ná cájehni de quiti jeê socó de, te ni quecoo mozo Pilato ni cajehni tēe ún. <sup>2</sup> Te ni cahân Jesús:

Tēe Galilea un, ¿á cájeni ni rō jeê súcuan ni candoho de siquî jeê xeên gá ni iyo cuēchi de vésú táca gá ñayuu Galilea? <sup>3</sup> Cáhân rî jíin ró jeê tuú. Te róhó jíinánan ró suni jnahnū ndetū ró núu tú nacani ni rō jeê stóo ró cuēchi ró. <sup>4</sup> Te xahūn uní tēe jeê ní cotúú torre Siloé siquî de, te ni cajihî de, ¿á cájeni ni rō jeê ní casáha de cuēchi xeên gá vésú táca gá ñayuu ñuu Jerusalén? <sup>5</sup> Cáhân rî jíin ró jeê tuú. Te maá ró jíinánan ró, suni jnahnū ndetū ró núu tú nacani ni rō jeê stóo ró cuēchi ró.

*Jñūhun yátá nundêhe higo*

<sup>6</sup> Yúcuán na te ni cahân yá jñūhun yátá yáha jéé steén yá ndese cácuu ñayuu tu squícu jñūhun Yaá Dios:

Cácuu i nájñūhun ñin nundêhe higo jeê ñin nuú ñūhun ñin tēe. Te ni jecóndehé de núu ñin ndehê xiní, te tú na vé ñin. <sup>7</sup> Te ni cahân de jíin mozo sájniñu nuú ñūhun de: Vijna te je iyó úní cuiyá jeê quiji ri nducú rí ndehê xiní yújnu higo yáha, te tú na vé cúun xiní. Núu súcuan te cahnde rō, chi maá jéé sajnêñu nuú

ñūhun, áchí de. <sup>8</sup> Te ni cahân mozo un jíin de: Stóo ní na cuñi ñin na cuiyá, te na nástáyá ná jéhê te chuhun ná jéhen. <sup>9</sup> Te na cóndêhe yó núu tú cuun ndehê inga cuiyá. Te núu tuú, te tahndê, achí mozo. Achí yá.

*Jeê ní nasávaha ya ñin ñahan quivî ndétátú*

<sup>10</sup> Te ñin quivî ndétátú te steén Jesús jñūhun ini vehe ñi sinagoga. <sup>11</sup> Te iyó ñin ñahan jeé ní cuu xahūn uní cuiyá huhú ña. Chi ñin tachí ni sáha jeê jíca tñí ña, te tuá cúu cuiti caca jnuu ña. <sup>12</sup> Te ni jito Jesús nuú ña, te ni cana ya ña, te ni cahân yá jíin ña:

Vijna te nduváha ní jéé huhú ni.

<sup>13</sup> Te ni soó yá ndaha ya siquî ña, te ni nucuiñî jnuu-ni ña, te ni nacuatáhú ña nuú Yaá Dios. <sup>14</sup> Te tēe cújéhnú ini vehe ñi sinagoga, ni quiti ni de nuú Jesús jeé ní nasávaha ya ñahan un quivî ndétátú. Te ni cahân de jíin ñayuu:

Íñu quivî iyó jéé sájniñu yó, te táca quivî ún quijicoo ró nduváha ró. Te quivî ndétátú chi ma cúu, áchí de.

<sup>15</sup> Yúcuán na te ni cahân maá Jítoho yó jíin de:

Tēe stáhú-ni cácuu ró. Quivî ndétátú ¿á tu cándají ró stiquî rō burro ró jéé quíscóho ró tí ndute? <sup>16</sup> Te ñahan yáha jéé cúu ña ñin sêhe yucūn Abraham, chi nájñūhun ni conuhî ña xahūn uní cuiyá ni sáha Satanás. ¿Te á tu iyó váha jeê nájñūhun nandají rí ña nuú cuehivî ndóho ña quivî ndétátú? Achí yá.

<sup>17</sup> Te jeê ni cáhân yá súcuan, te táca tēe cájito uhú de ya, ni cacucanu de. Te ndihî ñayuu ún chi ni cacusiñî ni i jito i táca jniñu jéhnú sáha ya.

*Jñūhun yátá siquî ndiquin mostaza  
(Mt. 13.31-32; Mr. 4.30-32)*

<sup>18</sup> Te ni cahân yá:

Na cáhân rî ñin jñūhun yátá náváha cuni rō ndese ndúcuehê ñayuu ndácu Yaá Dios jniñu nuú. <sup>19</sup> Ndúcuehê i nájñūhun jéhnú ñin ndiquin mostaza jeê jéquin ñin tēe nuú ñūhun de, te ndúu nájñūhun ñin yujnu. Te cúu cáhnu, te táca saa chí casáha tí tacá tí chíji ndaha ún. Achí yá.

*Jñūhun yátá siquî levadura  
(Mt. 13.33)*

<sup>20</sup> Te ni cahân tucu ya:

Súcuan cúu jeê ndúcuehê ñayuu jeê ndácu Yaá Dios jniñu nuú: <sup>21</sup> Cúu nájñūhun levadura jeé ní quihî ñin ñahan, te ni saca ña jíin úní kilo harina, te ni ndaa ndihî ñujen ni sáha. Achí yá.

*Siquî jeé quivî yó yéhyí túú  
(Mt. 7.13-14, 21-23)*

<sup>22</sup> Te jíca Jesús jeé cuahán yá ichi ñūú Jerusalén, te yáha ya táca ñuu náhnú jíin ñuu lulí, te steén yá jñūhun. <sup>23</sup> Te ñin ñayuu ni cajñūhún i ya:

¿A jecu-ni ñayuu jnama Yaā Dios, chí naún? Achí i.

Te ni cahān yā jín i:

<sup>24</sup> Condiñvī nī rō quivicoo rō ndaha Yaā Dios. Chí cúu nájñuhun ñn yéhyí tūū. Te cahān rī jín rō jeē ñn quivī te cuehē ñayuu nducú i, te ma cúu ga. <sup>25</sup> Te quivī ún te sáha rī nájñuhun ñn tēe chíí vehe jeē ndocuiñī de te nacasi de yéhyí. Te ichi yátá véhe cuiñī rō jínāhan rō, te scájān rō yéhyí, te cahān rō: Nune ní yéhyí na quivicoo ná. Te cahān de jín rō: ¿Ndé nuū véjicoo rō? Chí tu jínī rī rohó, achí de. <sup>26</sup> Yūcuán na te quejeé rō cahān rō jín de: Ni cayeji ná ni cajihi ná jín ní, te iní calle ñuu na ní steén ni jñuhun, achí rō. <sup>27</sup> Te cahān maá de: Cahān rī jín rō jeē tu jínī rī rohó ndé chí véjicoo rō. Cuijyo quingoo rō, chí ñayuu casáha jñiñu néé cácuu rō. Achí de. <sup>28</sup> Te quivicoo rō núū ndahyú rō, te nacayihí yuhu rō jéē ndoho xeēn rō. Te coto rō núū Abraham jín Isaac jín Jacob jín ndihí tēe ni canacani jñuhun Yaā Dios, cáyucú de ñuu nuū ndácu ya jñiñu. Te rohó, vésú cácuu rō yúcūn de, te quivicoo rō núū ndoho rō. <sup>29</sup> Te cuehē ñayuu, vésú tu cácuu i yucūn de, te quijicoo i ichi núū cáne niāndii jín ichi núū quée niāndii, ichi norte jín ichi sur. Te cucōo i mesa caji i staā ñuu nuū ndácu Yaā Dios jñiñu. <sup>30</sup> Te sava ñayuu jeē vijna cácuu i sandihí, ichi yúcuau nduu i nuū. Te sava ñayuu jeē vijna cácuu i nuū, ichi yúcuau nduu i sandihí. Achí yá.

*Jeē ní cuculhyá ní yā siquī ñayuu ñuu Jerusalem*

(Mt. 23.37-39)

<sup>31</sup> Te maá quivī un ní quecoo jecu tēe fariseo, te ni cacahān de jín yá:

Cuijyo ní quihñ ní inga lado, chí cúní Herodes cahni de níhñ, achí de.

<sup>32</sup> Te ni cahān yá:

Cuángoo te castūhun rō nuū tēe mañoso un jéē ná tu jinū quivī cuu rī, chí vijna jín sájnē quenehen rī tachī iní ñayuu, te nasávaha rī ñayuu cácuñū. Te isá te jínu jñiñu sáha rī, achí rō. <sup>33</sup> Chí cánuú jéē cáca rī quihñ rī vijna jín sájnē jín isá, te jinū rī Jerusalén. Chí tēe canacani jñuhun Yaā Dios, tu cájihí de inga lado, chí maá-ni iní ñuu Jerusalem cájehni i de. Achí yá.

<sup>34</sup> Rohó ñuu Jerusalem, jéhni rō tēe canacani jñuhun Yaā Dios, te jéhe rō yúu xiní tēe tájī Yaā Dios véjicoo nuu rō. Te cuehē jínu ni cuni rī nastútú rí sēhe rō, nájñuhun ndují jéē nastútú tí sēhe tí chíji ndijēn tí, te tu ní cúní rō. <sup>35</sup> Núu súcuau te vijna te stóo unu na rī rohó jín sēhe rō. Te cahān rī jín rō jéē ndé vijna te ma cóto cuiñi gā rō nuū rī, chí nde quiji quivī jeē cahān sēhe rō: Yohyo váha Yaā cúu Yaā véndiji jín jñiñu maá Jítoho yō Yaā Dios, achí i. Achí yá.

*Jeē ní nasávaha ya ñn tēe chúhí cuehyi cuiñi*

## 14

<sup>1</sup> Te ñn quivī ndétātu ní jehēn yā vehe ñn tēe fariseo cujéhu, ni jecaji yā staā jín de. Te táca gá tēe fariseo cájito yuhu de ya núu stívi yá. <sup>2</sup> Te yūcuau ñn tēe chúhí de cuehyi cuiñi, índichi de núu yá. <sup>3</sup> Te ni cajñuhun yá tēe cástéén tutu ley Yaā Dios jín táca tēe fariseo:

¿A iyó ley jeē nasávaha rī ñayuu cácuñū quivī ndétātu, chí tuú? Achí yá.

<sup>4</sup> Te maá de tu ní cácahān cuiñi de. Te ni jñi yá tēe chúhí un, te ni nasávaha ya de, te ni cahān yá jeē na núnun de vehe de. <sup>5</sup> Te ni cahān yá jín de jínāhan de:

¿Ndé ñn rohó núu burro rō chí stíquī rō ningava tí iní pozo, te á tu yachí natava rō tí vésú quivī ndétātu cuñi, chí naún? Achí yá.

<sup>6</sup> Te tu ní cúu stío cuiñi de ní ñn jñuhun nuū yá jeē súcuau ni cahān yá.

*Jñuhun siquī ñayuu jéngoo vico*

<sup>7</sup> Te ni jito Jesús jeē tēe ni cataca ún, cánacāji de silla yññuhún gá nuū mesa cucōo de. Te ni cahān yá jñuhun yáha jín de:

<sup>8</sup> Núu ñn tēe cana de jeē quihñ rō ñn vico nándaña, te ma cucōo rō lugar nuū yññuhún gá. Chí núu súcuau te sanaa te je ni cana de ñn tēe cujéhu ga vésú rohó. <sup>9</sup> Te quee tēe ni cana rohó, te cahān de jín rō: Ndonda, te na cucōo tēe yáha jñā. Yūcuán na te cucanu rō jeē quihñ rō cucōo rō ndé sandihí na. <sup>10</sup> Chí sa suhva núu ni cana ñn tēe rohó, te cucōo rō ndé lugar sandihí na. Te núu quee tēe ni cana rohó, te cahān de jín rō: Amigo, nehen cucōo rō ñn lugar nuū yññuhún gá, achí de. Yūcuán na te ñayuu cáyucu mesa jín rō coto i jeē sajhēnu de rohó. <sup>11</sup> Súcuau ni cahān rī jñuhun yáha návaha cuni rō jeē táca ñayuu jeē sajhēnu i maá i, nuu i sáha Yaā Dios. Te ñayuu jeē snúu i maá i, ndujéhu i sáha ya. Achí yá.

<sup>12</sup> Te suni ni cahān yá jín tēe ni cana ya yéji yá staā:

Núu sáha rō ñn vico cúsamá chí jéē cuxíni, te ma cána rō ñayuu cácuu amigo rō, jín ñani rō, jín jñahan rō, jín ñayuu cucá. Chí núu súcuau te suni maá i nacana i rohó, te súcuau nanihñ rō jeē ní jéhe rō. <sup>13</sup> Chí sa suhva núu sáha rō vico, te cana rō ñayuu ndahú, ñayuu cuhndú, ñayuu chacuá, jín ñayuu cuaa. <sup>14</sup> Te súcuau te quendōo ndetú rō, chí ma cúu nacuaña i nuu rō. Te nihñ rō tahú rō quivī nátecu ñayuu ndaa, achí yá.

*Jñuhun yátá siquī vico cuxíni*

<sup>15</sup> Te ñn tēe yéji staā jín yá, ni jini de jñuhun yáha, te ni cahān de jín yá:

Yóhyo ndetú ñayuu jeē cáji staā nde ñuu nuū ndácu Yaā Dios jñiñu, achí de.

<sup>16</sup> Yūcuán na te ni cahān Jesús ñn jñuhun yátá jéē steén yá jeē cána Yaā Dios ñayuu quivicoo i ñuu nuū ndácu ya jñiñu:

ñn tēe ni sáha de ñn vico cáhnu cuxíni, te ni taji de mozo ni cana cuehē ñayuu. <sup>17</sup> Te maá

quívī cuxíni, te ni tají de mozo de cuacana ñayuu jeé quíjicoo caji staá: Nehen ní jínánhan ní, chí je iyó túhva ndihi, áchí mozo. <sup>18</sup> Te ndihi i ni cacahān i jeé na cóne cáhnu ni de chí ma quíngoo i. Hn tēe ni cahān de: Sáá ní jeen rī ñin ñuhun te cánuú quícondēhe rí, te na cóne cáhnu ni de chí ma jeé rī. Achí de. <sup>19</sup> Te inga de ni cahān: Ni jeen rī uhūn yunta stiquí, te quihīn rī coto ndee rī tī, te na cóne cáhnu ni de nuūrī chí ma jeé rī, achí de. <sup>20</sup> Te inga de ni cahān de: Sáá ní quijnánhan rī, te jeé yúcuau ma cúu jeé rī, achí de. <sup>21</sup> Te cuanuhun mozo un, te ní castūhūn de nuūrī patrón de ndese ni cacahān ñayuu. Yūcuán na te ni quiṭī ní patrón, te ni cahān de jíin mozo de: Yachí quihīn rō táca calle náhnu jíin calle lulí, te cana rō ñayuu ndahú, ñayuu cuhndú, ñayuu chacuá, jíin ñayuu cuaá, na quíjicoo i vico, achí de. <sup>22</sup> Te ni jehēn mozo, te ni ndee de, te ni cahān de jíin patrón de: Je ni sáha ná jēé ni cahān ní, te cúmanī gā ñayuu te chítú vehe ní, achí de. <sup>23</sup> Te ni cahān tucu patrón: Quihīn tucu rō táca calle jíin ichi, te cana fuerza rō ñayuu na quíjicoo i, návaha chítú vehe rī. <sup>24</sup> Chí cahān rī jíin rō jeé ní ñin tēe ni cana rī xíhna ñúhūn, ma cuáha cuṭi rī jñuhun jeé cuxíni de vehe rī, achí de. Achí yá.

*Jñuhun jeé cánuú nacani vāha ni yō te condiquīn yō Cristo*

<sup>25</sup> Te cuehē ndasí ñayuu cándiquīn i Jesús cuangoo i jíin yá, te ni ndió cóto ya nuūrī i, te ni cahān yá jíin i:

<sup>26</sup> Núu na-ni ñayuu cuní condiquīn ruhū, te núu manī gā i jíin tátá i, náná i, ñasihí i, sēhe i, ñani i, cuáha i, vēsú jíin ruhū, ma cúu cuu i ñayuu scuáha jíin rí. Te núu ndáhvī gā ní i siquī jeé cóo vāha máá i vēsú jeé condiquīn i ruhū, te suni ma cúu tucu. <sup>27</sup> Te na-ni ñayuu núu tu jéhe i jñuhun ndoho i jñundóho vēsú nde cuu i jeé siquī jeé condiquīn i ruhū, te ma cúu cuu i ñayuu scuáha jíin rí. <sup>28</sup> Chí núu ndé ñin rō cúni rō sáha rō ñin vehe cáhnu, zá tu cánuú jéé xíhna gā cucóo rō te tava rō cuenta núu canda xūhun jéé sínu rō? <sup>29</sup> Chí núu tuú, te núu je ní jequīn rō cimientó, te tu canda xūhun rō sínu rō, yūcuán na te táca ñayuu sácata i coto i róhó. <sup>30</sup> Te cahān i: Tēe yáha ní quejéé de sáha de vehe, te tu ní canda de sínu de, achí i. <sup>31</sup> Te suni súcuau núu ñin rey quihīn de cuajnáhan de jíin inga rey jeé véjī siquī de, zá tu cánuú jéé xíhna gā cucóo de te nacani ní de núu canda uxí mil soldado jeé cuajnáhan de jíin inga rey jeé véjī siquī de jíin ócō mil soldado? <sup>32</sup> Chí núu tú canda de, te níni jíicá gá véjī inga rey, te tají de tēe cándiso jñífu, cajnúhūn de na vé cuní inga rey jeé cuáha de nuūrī, te jecuīñ-ni. <sup>33</sup> Te máá rō jijnánhan rō, suni súcuau cánuú jéé xíhna gā nacani ní rō cahnde ní rō stóo rō ndihi jeé névaha rō, chí núu tuú te ma cúu cuu rō ñayuu scuáha jíin rí.

*Jñuhun yátá síquī ññ*  
(Mt. 5.13; Mr. 9.50)

<sup>34</sup> Te ñayuu cácañdije cácuu i nájnūhun ññ. Vāha iyó ññ, te núu ññ ún na náá jeé uhvuá, zá ndese nduu uhvuá tucu? <sup>35</sup> Tuá cuajníñu cuṭi, ni jeé chūhun ñayuu nuūrī itu, ni jeé ndúu jēhen, chí máá cate ñ-ni i. Táca róhó jéé jíni sóho, na chúsóhó rō. Achí yá.

*Jñuhun yátá síquī lanchi ní sana*  
(Mt. 18.10-14)

## 15

<sup>1</sup> Te táca tēe cástútú xūhun renta jíin táca gá tēe casáha cuēchi, ni quecoo de nuūrī Jesús jeé cuní sóho de jñuhun cahán yá. <sup>2</sup> Te táca tēe grupo fariseo jíin tēe cástéén tutu ley Yáa Dios, ni cacahān de siquī yá:

Tēe yáha jétáhú de táca tēe casáha cuēchi te yéjī de jíin, achí de.

<sup>3</sup> Te ni cahān yá jñuhun yátá yáha jíin de:

<sup>4</sup> ¿Ndé ñin rō núu névaha rō ñin ciento lanchi, te núu scuíta rō ñin ti, te á tu stóo rō cúun xico xahūn cuñ gá tí yucu, te quinan-ducú rō quiṭi ní sana ún ndé nanihīn rō tí?

<sup>5</sup> Te núu ni nanihīn rō tí, te coso súcuu rō tí, te cusī ní rō. <sup>6</sup> Te núu ni ndee rō vehe rō, te nastútú rō táca amigo rō jíin ñayuu yúcu yajni jíin rō, te cahān rō jíin i: Na cusī ní yō, chí ní nanihīn rī lanchi rī jeé ní sana. Achí rō. <sup>7</sup> Te cahán rī jíin rō jeé suni súcuau cúu nde andiví. Chí cusī gā ní yá jíin ñin ñayuu iyó cuēchi núu nacani ní i jeé stóo i cuēchi i, vēsú jíin cúun xico xahūn cuñ ñayuu iyó ndáá jeé tuá jíni ñúhūn nacani ní i.

*Jñuhun yátá síquī ñahan ní scuíta xūhūn*

<sup>8</sup> Te núu ñin ñahan névaha ña uxí peso cáa, te núu scuíta ña ñin, zá tu nastáñ ña lámpara te nastá ña vehe, te nanducú yúcuu ña nde nanihīn ña? <sup>9</sup> Te núu ni nanihīn ña, te nastútú ña táca amiga ña jíin ñayuu yúcu yajni jíin ña, te cahān ña jíin i: Na cusī ní yō, chí ní nanihīn rī xūhun jéé ní scuíta rī. Achí ña. <sup>10</sup> Te cahán rī jíin rō jeé suni súcuau cusī ní táca ndajéhé Yáa Dios siquī ñin ñayuu iyó cuēchi núu nacani ní i jeé stóo i cuēchi i. Achí yá.

*Jñuhun yátá síquī sūchi ní jehēn jecó*

<sup>11</sup> Te ni cahān gá yá:

Ñin tēe ní iyo uū sēhe yí de. <sup>12</sup> Te tēe suchí gá ní cahān i jíin tátá i: Tátá, tahu sáva ní ndajníñu ní, te cuáha ní sava cuu tahu ná, achí i. Te ní tahu sáva de tahu ndindúú i. <sup>13</sup> Te ní cuu jecu-ni quívī, te tēe suchí gá un ní stutú ndihi i ndajníñu i. Te ní quenda i cuahān i ñin ñuu jíicá. Te yúcuau ní snáá i tahu i, chí ní jexīn cáhá i. <sup>14</sup> Te ná ní ndihi ní jexīn i, te ní quee ñin jnamá xeén ñin ñuu ún, te ní quejéé cúmanī jeé caji i. <sup>15</sup> Yūcuán na te cuanducú jñífu i nuūrī ñin tēe ñuu ún. Te ní tají de i cuahān i rancho de jeé cóto i quíñ de. <sup>16</sup> Te cúni i caji i vēsú soñ ndúchi jeé cáyejī

quinī ún, návāha ndutú chíji i. Te ni ñn ñayuu tú na vé jéhe nuū i. <sup>17</sup> Yūcuán na te ni quejéé i nácani ni i: Tāca mozo casájniñu vehe tátá rī, iyó cuéhē staa cáyeji i. Te ruhū chí jí rī sōco yāhá. <sup>18</sup> Na quínuhun rī nuū tátá rī, te cahān rī jíin de: Tátá, ni sáha ná cuéchi nuū Yaā Dios jíin nuū maá ní. <sup>19</sup> Vijna te nasūu gá tēe vāha cúu ná jéé cónani ná sēhe ní. Te cuāha ní jñuhun cuu ná nájñuhun ñn mozo ni, achi rī. <sup>20</sup> Yūcuán na te ni naquihin i ichi cuanuhun i vehe tátá i.

Te níni jíca gá vēji i, te ni jito tátá i nuū i, te ni cundáhú ni de i. Te jínu de cuajnahān de i, te ni nundee de sucūn i, te ni techuhú de i. <sup>21</sup> Yūcuán na te ni cahān i jíin de: Tátá, ni sáha ná cuéchi nuū Yaā Dios jíin nuū maá ní. Vijna te nasūu gá tēe vāha cúu ná jéé cónani ná sēhe ní. Achí i. <sup>22</sup> Te maá tátá i chí sa ni cahān de jíin táca mozo de: Cuáquihin sahma vāha ga te chuhun ró i. Te chuhun ró ñn xehyu ndaha i, te chíhi ró ndíjēn jehē i. <sup>23</sup> Te quiquihin ró becerro xéhen, te cahni ró tí na cáji yō, chí sáha yó vico. <sup>24</sup> Chí sēhe yí rí yāha, nájñuhun je ni jíhi i, te ni natecu i. Chí tu ní jíni rī ndé chí ní jéhēn i, te ni ndee i, achí de. Te ni caquejéé de cása de vico.

<sup>25</sup> Te sūchi jévāha, íne i nde rancho, te vëndiji i, te ni cuyajni i yatā véhe. Te ni jíni i jeé cúu yaa te cájita jéhé ñayuu. <sup>26</sup> Te ni cana i ñn mozo, te ni cajñuhún i na vé cúu jeé cúu. <sup>27</sup> Te ni cachi mozo un nuū i: Ni ndee ñani ró, te tátá ró ni jehni de becerro xéhen, chí ni ndee vāha i nuū de, achí mozo. <sup>28</sup> Yūcuán na te ni quiñi ní sūchi jévāha, te tu ní cúni i ndívi i. Te ni quenda tátá i, te ni cahān ndahú de jíin i jeé na ndívi i. <sup>29</sup> Te ni cahān i jíin tátá i: Níni sáha ná jñiñu ndácu ní, te tu cúniñi cuiñi ni na nuū ní. Te tu jéhe ní vésú ñn lítú nuū ná, jeé sáha ná vico caji na jíin táca amigo na. <sup>30</sup> Te ni ndee sēhe ní yāha jeé ni jéxín cáhá i xuhun ní jíin táca ñahan. Te ni jehni ní becerro xéhen caji i, achí i jíin tátá i. <sup>31</sup> Yūcuán na te ni cahān de jíin i: Séhē, róhó chí níni ndéé ró jíin rí, te ndíhi jeé névāha rí chí suni cuenta maá ró cúu. <sup>32</sup> Te vijna chí iyó vāha jeé sáha yó vico te cusí ni yō. Chí ñani ró yāhá, nájñuhun ní jíhi i, te ni natecu i. Chí tu ní jíni yō ndé chí ní jéhēn i, te ni ndee i, achí de. Achí yá.

*Jñuhun yatá siquī mozo jeé ni stáhú de patrón de*

## 16

<sup>1</sup> Te suni ni cahān Jesús jíin tēe cácuāha jíin yá:

Ñn tēe cúca ní Iyo ñn mozo de jeé ndiso jñiñu nuū táca gá mozo. Te ni cacahān jíin patrón un jéé mozo un snāá cáhá ndajñiñu de. <sup>2</sup> Te ni cana de mozo un, te ni cahān de jíin: ¿Na jñuhun cúu yāha jéé nihín rī siquī ró? Nacuāha cuenta jñiñu ndiso ró, chí ma

cóndiso jñiñu ga ró nuū mozo rī. Achí de. <sup>3</sup> Yūcuán na te jéni ní maá de: ¿Ndese sáha rí vijna? Chí patrón rī quenehen de jñiñu rí. Te tú ndacuī rí jeé cáte rí ñuhun, te jeé cacān rí caridad chí cucanu rī. <sup>4</sup> Núu sūcuan te jíni rí ñn jeé sáha rí, návāha ñayuu cájeen nuū patrón rī, cuāha i vehe condee rí núu na queé quivī jeé quenehen de jñiñu rí. <sup>5</sup> Te ni cana de ná ñn ná ñn tēe jeé cátaū nuū patrón de. Te ni cajñuhún de ñn: ¿Nasaa táu ró nuū patrón rí? <sup>6</sup> Te ni cahān tēe ún: ñn ciento barril aceite, achí de. Te ni cahān mozo un: Yāhá na cuāha rí lista ró, te cucōo yachī ró, te na sáha ró inga lista jeé un xico uxí na, achí de. <sup>7</sup> Yūcuán na te ni cajñuhún de inga tēe: Te róhó, ¿nasaa táu ró? Te tēe un ní cahān de: ñn ciento cajón trigo, achí de. Te ni cahān de jíin tēe ún: Yāhá na cuāha rí lista ró, te na sáha ró inga lista jeé cúun xico na, achí de. <sup>8</sup> Yūcuán na te patrón ni cahān de: Nacā jeé ndichí ní sáha tēe cúnéé un, achí de. Te cahān rí jíin ró jeé ñayuu ñayiví yāha, ndichí gá casáha i jeé quendōo vāha i nuū jñahan i, vésú ñayuu cácandije nuū Yaā Dios.

<sup>9</sup> Núu sūcuan te cahān rí jíin ró jeé ndichí gá na sáha ró vésú jeé ní sáha mozo ndichí un. Chí ini ñayiví yāha nuū yíhi cuéchi, na sáha ró jñiñu vāha jíin xuhun ró, cuāha ró núu ñayuu ndahú, návāha vésú núu ni ndíhi xuhun ró ñayiví yāha, te quiñicoo ró andiví núu coo vehe ró ní cáni.

<sup>10</sup> Tēe jeé squícu vāha jíin ñn jñiñu lúli-ni, suni squícu vāha de jíin jñiñu cáhnu. Te tēe jeé stahú jíin ñn jñiñu lúli-ni, suni stahú de jíin jñiñu cáhnu. <sup>11</sup> Núu sūcuan te núu tu squícu vāha ró jíin xuhun jeé iyó ñayiví yāha nuū yíhi cuéchi, te ma cuāha ya jeé vāha cuu ró ní cáni andiví. <sup>12</sup> Te núu tu squícu vāha ró jíin ndajñiñu jeé ni jéhe núu ya nuū ró ñayiví yāha, te ma cuāha ya tahū cuu ró ní cáni.

<sup>13</sup> Ni ñn mozo ma cúu cuajñiñu de nuū uñ patrón. Chí quiñi ní de nuū ñn te coo maní de jíin inga, chí squícu vāha de nuū ñn te sájéé ní de nuū inga. Te suni sūcuan ma cúu cuajñiñu ró núu Yaā Dios te núu máni siquī xuhun ndíhví ní ró, achí yá.

<sup>14</sup> Te tēe fariseo ní casacatā de nuū yā jeé ní cajini de táca jñuhun cáhán yā, chí tēe cutóo xuhun cácuu de. <sup>15</sup> Te ni cahān yā jíin de:

Maá ró casáha ró jéé tēe ndaā cácuu ró núu ñayuu. Te Yaā Dios chí jíni yā ndese cáa ini anuá ró. Chí jñiñu cájeni ní ñayuu jeé jñiñu jéhu cúu, te nuū Yaā Dios chí jñiñu néé cúu.

*Siquī ley Yaā Dios jíin siquī jeé ndácu ya jñiñu*

<sup>16</sup> Nde ná tu quiñi Juan tēe scuándute, te ní Iyo ley jeé ní jéhe Yaā Dios nuū Moisés, te suni ní castéén táca tēe cáncani jñuhun ya. Yūcuán na te ná ní quiñi Juan, te ní quejéé jíitē núu jñuhun vāha ndese ndácu Yaā Dios jñiñu.



Te tāca ñáyyuu nducú ndéyí i quívicoo i ndaha ya.

<sup>17</sup>Te yíí gá cúu jeē náá ñn letra nuū tútu ley yā vēsú jeē náá andiví jíin ñáyiví, chí squícu ndihí jñuhun cáhān.

*Siquí jeē ma stóo jnāhan tēe jíin ñahan*  
(Mt. 19.1-12; Mr. 10.1-12)

<sup>18</sup>Núu ñn tēe stóo de ñasihí de te quijnāhan de jíin inga ñahan, núu súcuan te cásiquí ndéē de ña. Te núu ñn tēe condeca de ñahan ní ndusñn, suni cásiquí ndéē de ña, áchí yā.

*Jñuhun tēe cúcá jíin Lázaro*

<sup>19</sup>Te ni cahān gā yā:

Ni Iyo ñn tēe cúcá, ní ñuhun de sahna lúu váha ndasí. Te ndiquiví ni Iyo váha ndasí jée ní yeji de. <sup>20</sup>Te suni ni Iyo ñn tēe ndáhú, nání de Lázaro, néne de yéhyí tēe cúcá un, te ní cáhnu de ñn ndíhyi. <sup>21</sup>Te máni cúni de jeē ndutú chíji de jíin stāa cuēchi jeē stívi tēe cúcá un. Te quécoco ina te cánayuu ti nuū ndíhyi de. <sup>22</sup>Te ni jihí tēe ndáhú un, te tācá ndajéhé Yāā Dios cuango yá jíin ánuá de nde andiví nuū néne Abraham. Te suni ni jihí tēe cúcá un, te ni quindúji de. <sup>23</sup>Te tēe cúcá un xeēn ndóho de ñe de lugar nuū cáyūcu ndíyí tu ní cándíje. Te ni ndacoto de, te nde jicá ní jito de nuū Abraham, te néne Lázaro jíin de. <sup>24</sup>Yūcuán na te ni cana cóho de: Tātā Abraham, cundáhú ni ni sáña, te tají ní Lázaro, na quíchundaji de xini ndáha de nuū ndúte, te quiji de stáji de yáá ná. Chí xeēn ndóho ná núu yáñuhūn yāhá. Achí de. <sup>25</sup>Te ni cahān Abraham jíin de: Séhē, nucuñun ni rō jeē ni níñn rō ndihí jeē váha ná ni cotecu rō, te Lázaro chí sa suhva jñundóho ni níñn de. Te vijna je ni ndusñ ni de yāhá, te róhó chí ndóho rō jíñā. <sup>26</sup>Te suni iyó ñn jeē cunú téyí, ñne méññu yó jíijnāhan yó. Te ñayuu cáññn yāhá, vēsú cácuni i yāha i jeē i nuū rō, te ma cúu. Te ni ma cúu yāha máá rō quijicoo rō yāha. Achí Abraham. <sup>27</sup>Yūcuán na te ni cahān tēe cúcá: Núu súcuan te cáhān ndahú ná jíin ní, Tātā Abraham, tají ní Lázaro na quíñn de vehe tātá na. <sup>28</sup>Chí iyó úhūn gā ñani ná, te na quíacachi de nuū i jeē ñe nacani ni i te stóo i cuēchi i, návāha ma quívicoo i nuū ndóho ná yāha, áchí de. <sup>29</sup>Te ni cahān Abraham jíin de: Je cánevāha i tutu jeē ní tee Moisés jíin táca tēe ni canacani jñuhun Yāā Dios. Suu yūcuán na chúhun ni i, áchí Abraham. <sup>30</sup>Te ni cahān tucu tēe cúcá: Vēsú súcuan, Tātā Abraham, te núu ñn ñayuu ni jihí quíñn nuū i, yūcuán na te nacani ni i jeē stóo i cuēchi i, áchí de. <sup>31</sup>Te ni cahān Abraham jíin de: Núu tu chúhun ni i jñuhun ni nacani Moisés jíin táca tēe ni canacani jñuhun Yāā Dios, suni ma candíje cuiti i núu natecu ñn ndíyí quíñn nuū i, áchí de.

*Xeēn coo siquí ñáyyuu squívi jnāhan nuū cuēchi*

(Mt. 18.6-7, 21-22; Mr. 9.42)

## 17

<sup>1</sup>Te ni cahān Jesús jíin tēe cáscuáha jíin yā: Máni iyó jée nducú squívi ñayuu nuū cuēchi. Te nacā xeēn ndoho ñayuu jeē squívi jnāhan nuū cuēchi. <sup>2</sup>Vāha ga núu ní conuhñ ñn yōso cáhnu sucūn i te quēe i chíji ndute mar, vēsú jeē squívi i ñn sūchi lúli yāha núu cuēchi. <sup>3</sup>Coto ma sáha rō súcuan jíijnāhan rō.

Te núu jnāhan rō sáha de cuēchi siquí rō, te cahān rō nuū de. Te núu nacani ní de, te cone cáhnu ní rō nuū de. <sup>4</sup>Te núu uxā jínu jeē ñn quívi sáha de cuēchi siquí rō, te núu uxā jínu nacani ní de te cahān de jíin rō jeē cone cáhnu ní rō chí ma sáha ga de, te cánuú cone cáhnu ní rō nuū de. Achí yā.

*Jeē yóhoyo cújéñnu jñuhun cándíje*

<sup>5</sup>Te tēe cácuu apóstol ni cacahān de jíin Jítóho yō:

Sáha ní jée ñihin ga candíje ná jée sáha Yāā Dios jeē cájicān na núu yā, achí de.

<sup>6</sup>Te ni cahān maá Jítóho yó jíin de:

Núu cáncandíje rō vēsú ñn tíhli-ni, nájnūhun ñn ndiquin mostaza jeē tíhli-ni cáa, te cuu cahān rō jeē nuyūñdu yāha na quēnda te nucondichí nde nuū mar, te coo nájnūhun cahān rō.

*Jeē cánuú squícu váha yó núu yā*

<sup>7</sup>Ndé ñn rō iyó mozo rō jeē jitu de chí ndíto de quiti ndéca rō, te núu ni najinū de vehe rō, te tu cáhān rō jíin de jeē cúcōo de caji de stāa. <sup>8</sup>Chí sa suhva cáhān rō: Sáha rō ndeyu cuxini ri, te cani rō cóhō rī. Te núu ni cuu ni yeji rī ni jihí ri, yūcuán na te caji maá rō coho rō, cácahān rō. <sup>9</sup>Te cácahān rō jeē tu cánuú nacuatáhú rō nuū mozo núu ní sáha de jñiñu ní ndacu rō, chí jeē cánuú sáha de cúu. <sup>10</sup>Te suni súcuan maá rō jíijnāhan rō, cácuu rō mozo Yāā Dios. Te núu ni casquícu rō táca jñiñu ní ndacu ya nuū rō, te cahān rō: Tu cánuú nacuatáhú yá nuū rī, chí ni sáha rī maá-ni jeē cánuú sáha ri, achí rō. Achí yā.

*Jeē ní nasávāha ya uxí tēe ndóho cuehyí stehyú*

<sup>11</sup>Te jica Jesús ichi cuahān yā ñuu Jerusalén, te ni yāha ya cuahān yā méññu región Samaria jíin Galilea. <sup>12</sup>Te ni jinū yā ñn ñuu, te uxí tēe ndóho cuehyí stehyú ni quendacoo de vejnahan de ya, te jicá ní cajecuññ de. <sup>13</sup>Te ni cacana jee de:

Jesús, Maestro, cundáhú ní ni sáña, áchí de jíijnāhan de.

<sup>14</sup>Te ni jito Jesús nuū de, te ni cahān yā jíin de:

Cuángoo te stéén rō maá rō nuū tāca sūtú jeē ní canduvāha rō, áchí yā.

Te níni cuángoo de te ni canduvāha-ni de. <sup>15</sup>Yūcuán na te ñn-ni de ni nandíó cóo de nuū

Jesús, te cahan jee de, nacuatáhu de nuū Yaā Dios jeē ní nduváha de. <sup>16</sup> Te ni jecuiñi yití de nuū yā, te ni jequin de nuū de nde nuū ñuhun, te ni nacuatáhu de nuū yā. Te tēe Samaria cūu de. <sup>17</sup> Te ni cahān Jesús:

¿A násuū ndihúxi de ni canduváha? Te ñn gā de, ¿naun tu ní canandicó de nacuatáhu de? <sup>18</sup> ¿A máñuhún-ni tēe ñuu jicá yáha cūu jeē ní nandicó de nacuatáhu de nuū Yaā Dios?

<sup>19</sup> Te ni cahān yā jín tēe ún:

Ndocuiñi quinhun rō. Chi ni candije rō jeē cuu nasávaha ri rohó, te jeē yúcuan ní nduváha rō, áchi yá.

*Ndese coo quiví jeē ndiji ya ndacu ya jniñu (Mt. 24.23-28, 36-41)*

<sup>20</sup> Te tēe fariseo ni cacajnūhún de Jesús ndé quiví quejeé jeē ndácu Yaā Dios jniñu ini ñayiví. Te ni cahān yā jín de:

Ma queē ndijin jeē ndácu Yaā Dios jniñu. <sup>21</sup> Ni ma cūu cahān ñayuu: Yáha ñe ya ndácu ya jniñu, chí: Yúcuan ñe ya, áchi i. Chi je ndácu Yaā Dios jniñu mehñu rō jijnáhan rō. Achí yá.

<sup>22</sup> Yúcuán na te ni cahān yā jín tēe cáscuáha jín yá:

Quee tiempo jeē yóhoyo cūu ni rō coto rō jeē ndiji ruhū, Yaā ní nduu tēe, te ma cóto rō jijnáhan rō. <sup>23</sup> Te cahān ñayuu jín rō: Yáha ñe ya, chí: Yúcuan ñe ya, áchi i. Te ma quingoo rō condēhe rō, ni ma cóndiquin rō i. <sup>24</sup> Chi nájnūhun sáha taja jeē ndíndéé ñn lado andiví te cundijin nde inga lado, suni súcuan cuu quiví ndiji ruhū, Yaā ní nduu tēe, chi ndihi ñayuu coto. <sup>25</sup> Te jini ñuhún jeē xihna gā ndoho xeén rí, te ñayuu iyó vijna, squéhichí i ruhū. <sup>26</sup> Chi nájnūhun ni cuu quiví ni iyo Noé, suni súcuan cuu quiví ndiji ruhū, Yaā ní nduu tēe. <sup>27</sup> Chi quiví un ní cayeji i, ni cajihí i, ni canandáha i, ni cajéhe i sehe síhí i jeē nándáha, nde ni jinū quiví jeē ní quiví Noé ini barco cáhnu jeē naní arca. Te ni cuun saū xeén, te ni ndaa ndute ni cajihí ndihi i. <sup>28</sup> Te suni súcuan ni cuu quiví ni iyo Lot. Ni cayeji i, ni cajihí i, ni cajeen i, ni caxicó i, ni cataji i itu, ni cajeni i vehe. <sup>29</sup> Te quiví jeē ní quenda Lot ini ñuu Sodoma cuahān de, te ni cuun ñuhún jín azufre ichi andiví, te ni snáa ndihi ñayuu. <sup>30</sup> Te suni súcuan coo quiví jeē ndiji ruhū, Yaā ní nduu tēe.

<sup>31</sup> Te quiví ún te ñayuu cáhñin yatá véhe, te ndajniñu i ñuhun ini vehe, cáhñin rí jín i jeē ma ndiví i naquihin i, chí cánuu cunu yachí i jeē cácu i. Te suni súcuan ñayuu casájniñu nuū itu, ma quinhun i vehe i jeē quihin i ndajniñu i. <sup>32</sup> Te nucūhun ni rō ndese ní ndoho ñasihí Lot jeē ní jihí ña. <sup>33</sup> Te núu ndé ñayuu cuní i cácu i nuū jnúndóho quiji nuū i jeē siquí ruhū, núu súcuan te jnahñu ndetú i ní cáni. Te núu ndé ñayuu, vésú na cūu i jeē siquí ruhū, te cotecu i ní cáni.

<sup>34</sup> Te cáhñin rí jín rō jeē quiví ndiji ri te quixí uū tēe ñn jito jecuaā, te ñn de naquihin rí, te inga de ndóo, chí tu ní cándije de. <sup>35</sup> Te coo uū ñahan jeē ndíco cáhnu, te ñn ña naquihin ri, te inga ña ndóo. <sup>36</sup> Te uū tēe sájniñu de nuū itu, te ñn de naquihin ri, te inga de ndóo. Achí yá.

<sup>37</sup> Te jeē ní cajini de jñuhun yáha, te ni cacajnūhún de ya:

¿Ndé mí coo súcuan nájnūhun ni cahān ní? Achí de.

Te ni cahān yā jín de:

Nájnūhun jeē cututú téji ndé-ni cūu nuū catú quiti ní jihí, suni súcuan coo táca jeē ní cáhñin rí ndé-ni cūu-ni nuū cáhño ñayuu.

*Jñuhun yatá siquí juez jín ñahan viuda*

## 18

<sup>1</sup> Te ni cahān yā ñn jñuhun yatá jín de jeē cánuu jeē niní cácan tahú de, te ma ndínuu ni de jín. <sup>2</sup> Te ni cahān yā:

Ni iyo ñn juez ini ñn ñuu. Te ni tu ndíso iyo de nuū Yaā Dios, ni tu yúhu de nuū ní ñn ñayuu. <sup>3</sup> Te suni ñuu un iyó ñn ñahan ní ndóo ndáhú. Te ñahan un jéhén-ni jéhén-ni ña nuū de, jícán ña jeē na sándaā de siquí ñn ñayuu jeē jito uhú i ña. <sup>4</sup> Te cuehé quiví tu ní cuní de sándaā de, te yúcuan na te ni jeni ni de: Vésú tu ndíso iyo ri nuū Yaā Dios, ni tu yúhu ri nuū ní ñn ñayuu, <sup>5</sup> te ñahan viuda yáha, yóhoyo stáhñ ña ruhū, te jeē yúcuan na sándaā ri siquí ñayuu jeē jito uhú i ña. Chi núu tuú, te quejeé rí jnaníni ní rí jeē quíji quíji ña. Achí de. Achí máá Jitoho yó.

<sup>6</sup> Te ni cahān gā yá:

Súcuan cuu jeē ní cahān juez, tēe tú ndaa. <sup>7</sup> Te Yaā Dios, nasúu súcuan cūu ya, chí sándaā yá siquí jniñu ñayuu ní nacáji ya jeē nduu ñuu cácan ndahú i jín yá. Chi jnama ya i nuū táca jeē cájito uhú i. ¿Te á cueé jnama ya i? <sup>8</sup> Cáhñin rí jín rō jeē yachí. Te quiví ndiji ruhū, Yaā ní nduu tēe, ¿á nihñ gā rí ñayuu cácan dije nihñ ini ñayiví? Achí yá.

*Jñuhun yatá siquí tēe fariseo jín tēe stútu xúhun renta*

<sup>9</sup> Te suni ni cahān yā jñuhun yatá yáha jín jecu ñayuu jeē cájeni ni i jeē ñayuu ndaa cácuu i, te cájeni ni i jeē sava ga ñayuu tu cáhño ndaa:

<sup>10</sup> ñn tēe fariseo cuahān de templo jeē cácan tahú de. Te ñn tēe stútu xúhun renta suni cuacacān tahú de templo. <sup>11</sup> Te tēe fariseo, índichi de, te súcuan ni jicān tahú de: Tátá Yaā Dios, na cútahú na núu ní, chí tu cūu ná nájnūhun cándaā sava ga tēe, tēe cuihná, tēe néé, tēe cásiquí ndéé jñahñ cácuu de. Ni tu cūu ná nájnūhun cáca tēe yúcuan jeē stutú xúhun renta jeē scáa ga de jícán de nuū ñayuu. <sup>12</sup> Te uū jínu jeē semana iyó ndite ní na núu ní, te jéhe ná nuū ní ñn ñn siquí táca úxi ndajniñu nihñ na, áchi de. <sup>13</sup> Te tēe stútu

xúhun renta, ni jecuíñi jicá de nuū templo, ni tu ní chúndeyi ní de jeē ndonehen de nuū de, chí sa suhva ni caní de yíqui jicá de jeē cucuíhyá ni de. Te ní cahān de: Tātā Yaā Dios, cundáhú ní ni sáña, chí tēe iyó cuéchi cúu ná, áchí de. <sup>14</sup> Te cahān rī jīn ró jeē tēe stútú xúhun renta, ni jetáhú Yaā Dios de, te cuanuhun de vehe de. Te tēe fariseo chí tu ní jetáhú yá de. Chí ñayuu jeē sajeñnu i máá i, sa ndululí i. Te ñayuu jeē sálulí i máá i, sa ndujéñnu i. Achí yá.

*Jeē ni jicān tahú Jesús jehē sūchi lúli*  
(Mt. 19.13-15; Mr. 10.13-16)

<sup>15</sup> Te ní quecoo ñayuu jīn sūchi lúli núu Jesús, jeē na sóo yá ndaha ya xiní i. Te tēe cáscuáha un ní cajini de jeē súcuan cúu, te ní cacahān de nuū ñayuu vējicoo jīn i. <sup>16</sup> Te máá Jesús ní cana ya de, te ní cahān yá:

Cuāha jñūhun na quíjicoo sūchi lúli jīñā nuū rī, te ma cási rō jeē quíjicoo i. Chí ñayuu jeē ndió cóo ní i caní ní i nájñūhun sūchi yáha, suu i quívi ndaha Yaā Dios jeē ndacu ya jñiñu nuū i. <sup>17</sup> Te jendaá cahān rī jīn ró, nuū ñin ñayuu tú cuatáhú i jeē ndácu Yaā Dios jñiñu nuū i, nájñūhun jetáhú ñin sūchi lúli, ma quívi cuiñi i ndaha ya, achí yá.

*Jñūhun tēe cucá*  
(Mt. 19.16-30; Mr. 10.17-31)

<sup>18</sup> Te ñin tēe cújéñnu ní cajñūhún de ya: Tēe vāha cúu ní Maestro. ¿Te na jñiñu vāha sáha ná te níñin tahú na cotecu na ní cāni andiví? Achí de.

<sup>19</sup> Te ní cahān Jesús jīn de: ¿Naun cahān rō jeē tēe vāha cúu rí? Tú ní ñin tēe vāha iyó, chí máá ñin-ní Yaā Dios. <sup>20</sup> Je jini rō táca jñiñu ní ndacu Yaā Dios: Ma cosiquí ndēe jñāhan rō. Ma cáhni rō ndiyi. Ma saculíhá rō. Ma sajnūhún rō. Cuatáhú rō nuū tatá rō nuū naná rō. Achí yá.

<sup>21</sup> Te ní cahān máa de: Tāca jñiñu yáha je ní squícu ná ndé ná lulí ná, achí de.

<sup>22</sup> Te Jesús ní jini ya jñūhun yáha, te ní cahān yá jīn de:

Ñin na jñiñu cúmaní sáha ró núu súcuan. Xicó ndihi jeē névāha ró, te cuāha ró núu ñayuu ndahú. Te nde andiví cuāha ya jeē vāha ndasí núu rō. Yūcuán na te quiji ró condiquín rō ruhū, achí yá.

<sup>23</sup> Te ná ní jini sōho de jñūhun yáha, te yōhoyó ní cucuíhyá ní de, chí cucá ndasí de. <sup>24</sup> Te jito Jesús jeē súcuan cucuíhyá ní de, te ní cahān yá:

Tēe cucá chí yōhoyó yí quívicoo de ndaha Yaā Dios jeē ndacu ya jñiñu nuū de. <sup>25</sup> Yachí gā yáha ñin camello yaú yutícuí vēsú jeē quívi ñin ñayuu cucá ndaha Yaā Dios jeē ndacu ya jñiñu nuū i, achí yá.

<sup>26</sup> Te tēe ní cajini jñūhun yáha, ní cacahān de:

¿Ndé ñayuu cúu jeē cácu núu súcuan? Achí de.

<sup>27</sup> Te ní cahān yá jīn de:

Ñayuu chí ma cúu squívi i máá i ndaha Yaā Dios, te máá yá chí cuu sáha ya, achí yá.

<sup>28</sup> Yūcuán na te ní cahān Pedro:

Sáña jijnāhan ná ní castóo ná ndihi jeē cánevāha ná, te cándiquín na níñin, achí de.

<sup>29</sup> Te máá yá ní cahān yá jīn de:

Jendaá cahān rī jīn ró jijnāhan ró, núu na-ní ñayuu stóo i vehe, chí tātá, chí ñani, chí ñasihí, chí séhe, jeē squívi jeē scáca i jñūhun jeē ndácu Yaā Dios jñiñu nuū ñayuu, <sup>30</sup> núu súcuan te naniñin cuehē gā i ñin ñayiví yáha, te tiempo quiji te cotecu i ní cāni, achí yá.

*Jeē ní cahān tucu ya jeē cúu yá*  
(Mt. 20.17-19; Mr. 10.32-34)

<sup>31</sup> Te ní cana sūn ya ndihúxí uū tēe cáscuáha jīn yá, te ní cahān yá jīn de:

Vijna je cuángoo yó ñuu Jerusalén. Te yūcuan squícu ndihi jñūhun ndese ndoho ruhū, Yaā ní nduu tēe, nájñūhun ní catee tēe ní canacani jñūhun Yaā Dios nde jenahán.

<sup>32</sup> Chí ñayuu nastúu i ruhū nuū tēe nacióon Roma jeē cáyucú Jerusalén cándacu jñiñu. Te tēe un sácatá de nuū rī, te cahān neé de nuū rī, te tesihí de nuū rī. <sup>33</sup> Te caní de ruhū, te sáa te cahni de ruhū. Te nuū uní quívi te natecu rī. Achí yá.

<sup>34</sup> Te máa de tu ní cájécūhun cuiñi ní de tāca jñūhun yáha. Chí jñūhun yí cúu, te tu ní cúu jecūhun ní de jeē cahān yá.

*Jeē ní nasávāha ya ñin tēe cuáá ñuu Jericó*  
(Mt. 20.29-34; Mr. 10.46-52)

<sup>35</sup> Te ní cuyajni ya cuahān yá ñuu Jericó. Te ñin tēe cuáá néne de yuhíchi, jicān de caridad.

<sup>36</sup> Te ní jini sōho de jeē yáha cuehē ñayuu cuangoo i, te ní cajñūhún de naun cuángoo i. <sup>37</sup> Te ní cacahān i jīn de jeē Jesús, tēe ñuu Nazaret, yáha ya cuahān yá. <sup>38</sup> Yūcuán na te ní cana jee de:

Jesús Séhe yucūn David, cundáhú ní ni sáña, achí de.

<sup>39</sup> Te ñayuu cuangoo ichi núu yá, ní cacahān i nuū de jeē na cási de yuhu de. Te máa de víhyá gā ní cana jee de:

Máa ní jeē cúu ní Séhe yucūn David, cundáhú ní ni sáña víi, achí de.

<sup>40</sup> Yūcuán na te ní jecuíñi Jesús, te ní cahān yá jeē na quíndeca i de. Te nuū ní cuyajni de nuū yá, te ní cajñūhun yá de:

<sup>41</sup> ¿Na vé cuní rō jeē sáha rí jīn ró? achí yá.

Te ní cahān de:

Jeē na ndúndijin tinūu ná cuní na, achí de.

<sup>42</sup> Te ní cahān Jesús jīn de:

Ndúndijin tinūu ró núu súcuan. Ní candíje ró jeē cuu nasávāha rí rohó, te jeē yūcuan ní nduvāha ró, achí yá.

<sup>43</sup> Te ní ndúndijin-ní tinūu de, te ní ndiquín de ya, te nácuatáhú de nuū Yaā Dios.

Te ndihí ñayuu jeē ní cajito i, suni ni cacahān i jeē yóhyo vāha Yaā cūu Yaā Dios.

*Jñuhun Zaqueo*

**19**

<sup>1</sup> Te ni quāvi Jesús ini ñuu Jericó, te ni yāha-ni ya cuahān yā. <sup>2</sup> Te yūcuan iyó ñin tēe cūcá nāni de Zaqueo, te cūjéhu de nuū tēe cástútú xūhun renta. <sup>3</sup> Te cūni de coto de návāha cuni de ndé ñin cūu Jesús. Te tu ní cūu, chi cuehē ñayuu cuangoo i jín yá, te ndiqui-ni cáa de. <sup>4</sup> Te jínu de ni cosnūu de. Te ni caa de xiní ñin nuyūhndú návāha coto de nuū yā, chi yūcuan yāha ya quihín yā. <sup>5</sup> Te ni jinū yā yūcuán, te ni ndacoto ndaa ya nuū de. Te ni cahān yā:

Zaqueo, yachí nuu ró, chí jíní ñuhún jéé ndóo ri vehe ró vijna, achí yá.

<sup>6</sup> Yūcuán na te ni cusí ni de, te yachí ni nanuu de, te ni jeca de ya cuahān de jín yá vehe de. <sup>7</sup> Te ni cajito ñayuu jeē súcuan ni cuu, te ni cacahān i siquí yā jeē cuahān yā ndóo ya vehe ñin tēe sáha cuēchi. <sup>8</sup> Yūcuán na te ni ndocuifí Zaqueo, te ni cahān de jín máá Jítoho yó:

Vijna te sava ndihí ndajniñu ná chi cuāha ná nuū ñayuu ndahú. Te núu ní scáa ga na ní jicān na xūhun nuū ñayuu, te nacuaāha ná úní gā siquí naquihín i, achí de.

<sup>9</sup> Te ni cahān Jesús:

Vijna te vehe yāha je ni cācu ñin tēe jeē ma jñahnú ndetú de, chí ni candije de nájñuhun ni candije jíi de Abraham. <sup>10</sup> Chi ruhū, Yaā ní nduu tēe, ni quiji ri nducú rí ñayuu jeē jñahnú ndetú, te jnama ri i, achí yá.

*Jñuhun yátá siquí uxí mozo jín xūhun*

<sup>11</sup> Te nuū ñayuu ní cajini táca jñuhun yāha, ní cahān gā Jesús ñin jñuhun yátá jéé steén yā ndese coo quiví ndiji ya. Chí je ni cuyajni ya ñuu Jerusalén, te cájeni ni i jeē vijna ñuhún quejéé jéé ndácu ya jñiñu sáha Yaā Dios. <sup>12</sup> Te ni cahān yā:

Ñin tēe cūjéhu cuahān jicá de inga nación, návāha nihín jñiñu de cuu de rey, te ndiji de ndacu de jñiñu. <sup>13</sup> Te nde ná tu quihín de, te ni cana de uxí mozo de, te nuū ñin ñin i ni jéhe de ñin xūhun jéé ndéé yahu ndasí. Te ni cahān de jín i: Sájniñu ró jéé na ndúcuehē xūhun yāha jñínáhar ró níni jéé quihín rí te ndee rí, achí de. <sup>14</sup> Te ñayuu nación de cáquiti ni i nuū de, te ni catajái i jecu tēe cándiso jñiñu cuangoo yatá de jeē cahān: Tu cánujnahan ni ñayuu nación na jéé cuāha ní jñiñu nuū tēe yāha jéé cuu de rey nuū i, achí. <sup>15</sup> Te vésú súcuan te ni nihín jñiñu de cuu de rey, te vendiji de nación de. Te nuū ní ndee de, te ni ndacu de jñiñu jeē na quíjicoo mozo jeé ní jéhe de xūhun núu, návāha na cūni de nasaa ní canihín ñin ñin i siquí. <sup>16</sup> Te ni quee ñin mozo un núu de, te ni cahān i: ñin xūhun jéé ní jéhe ní núu ná, ní nduu uxí, achí i.

<sup>17</sup> Te ni cahān maá rey: Vāha mozo cūu ró, te vāha ní sáha ró. Chí ní squícu vāha ró jín ñin jñiñu lúli-ni, te vijna te sáha ri jeē cūjéhu ró ndacu ró jñiñu nuū uxí ñuu jñí ri, achí de.

<sup>18</sup> Te ni quee inga mozo, te ni cahān i: ñin xūhun jéé ní jéhe ní núu ná, ní nduu uhún, achí i. <sup>19</sup> Te suni ni cahān de jín mozo un: Róhó, cūjéhu ró ndacu ró jñiñu nuū uhún ñuu jñí ri, achí de. <sup>20</sup> Te ni quee inga mozo, ni cahān i: Yāha nácuāha ná xūhun ní, chí ní chuvāha ná ini ñin pañuelo. <sup>21</sup> Chí ní yūhu ná nihín, chí tēe xeén cūu ní. Chí cuehē gā nándacān ní vésú jeé ní jéhe ní, te cuehē gā cūni ní vésú jeé cūu sáha mozo ní, achí de.

<sup>22</sup> Yūcuán na te ni cahān rey: Mozo neé cūu ró núu súcuan, te jín jñuhun ni cahān ró te sándaá rí jeé iyó cuéchi ró jéé tu ní sájniñu ró jín xūhun rí. Chí jéni ní ró jeé tēe xeén cūu ri, te cuehē gā nándacān rí vésú jeé ní jéhe rí, te cuehē gā cūni rí vésú jeé cūu sáha mozo rí. <sup>23</sup> Núu súcuan ¿te naun tu ní chūne ró xūhun rí vésú nuū banco? Te jeé ní ndee rí te naquihín ri xūhun rí nde jín séhe xūhun núu. Achí de. <sup>24</sup> Te ni cahān de jín ñayuu cáhlin yūcuán: Quende xūhun jñá nuū i, te cuāhó ró núu mozo jeé névāha uxí, achí de. <sup>25</sup> Te ñayuu un ní cacahān i jín de: Te ndese, chí je névāha de uxí, achí i. <sup>26</sup> Te ni cahān tucu rey: Cáhán rí jín ró jeé ñayuu je névāha, sa quiji ga nuū i, te cnevāha cuehē i. Te ñayuu jeé tu névāha, sa cujiyo-ni vésú jecu jeé névāha i. <sup>27</sup> Te tēe jeé cájito uhú ruhú, jeé tu ní cánujnahan ni de jeé cuu ri rey nuū de, cuáquihín de na quíjicoo de yáha. Te cahni ró de coto ri, achí de. Achí Jesús.

*Jeé ni quiví Jesús ñuu Jerusalén*

(Mt. 21.1-11; Mr. 11.1-11; Jn. 12.12-19)

<sup>28</sup> Te nuū ní ndihí ni cahān yā jñuhun yāha, te ni jica ga yā cuahān yā ñuu Jerusalén. <sup>29</sup> Te nuū ní cuyajni ya ñuu Betfagé jín ñuu Betania, yajni nuū íne yucu nání yucu Olivos, te ni tají yá uū tēe cáscuāha jín yá jeé quíngoo de. <sup>30</sup> Te achí yá jín de:

Cuáhán ñuu lúli íne ichi núu. Te núu ni quiví ró, te nihín ró ñin burro núhni tí, jeé ní ñin tēe ná tu coso de tí. Te ndají ró tí quiji ró jín tí. <sup>31</sup> Te núu ndé ñin cajñuhún naun cándají ró tí, te cahān ró jín: Máá Jítoho yó jíní ñuhún yá tí, achi ró. Achí yá.

<sup>32</sup> Te cuangoo tēe ni tají yá, te ni canihín de tí nájñuhun ni cahān yá jín de. <sup>33</sup> Te jeé cándají de tí, te ni cacahān jítoho tí jín de:

¿Naun cándají ró burro rí? achí.

<sup>34</sup> Te ni cacahān de:

Máá Jítoho yó jíní ñuhún yá tí.

<sup>35</sup> Te ni ndecoo de jín tí nuū Jesús. Te ni casoó de sahma de siquí tí, te ni casáha de jeé ní jecosó yā siquí tí. <sup>36</sup> Te ná-ni cuahān yā, sáá cáscáá ñayuu sahma i ini ichi. <sup>37</sup> Te nuū ní cuyajni ya nuū cūun ichi yucu Olivos, te ndihí ñayuu cándaje jeé cándiquín i ya, ní

caquejéé i cácuas ni i, te cácana jee i jeé yóhoyo váha Yaā cúu Yaā Dios siquī táca jniñu Jehnu ni sáha ya ni cajito i. <sup>38</sup> Te áchí i:

Yóhoyo váha Yaā cúu Rey jeé véji jíin jniñu máá Jítoho yó Yaā Dios. Te sáha ya jeé cóo maní yó jíin Yaā Dios andiví. Te yóhoyo cújéhu Yaā Dios, achí i jíjnáhan i.

<sup>39</sup> Yūcuán na te jecu tēe fariseo cáhlin mēhñu ñayuu cuehē ún, ní cacahān de jíin yá: Maestro, cahān ni núu ñayuu cándiquān nihin jée na cási i yuhu i, áchí de.

<sup>40</sup> Te ni cahān Jesús:

Cáhān rí jíin ró jeé núu ñayuu yáha na cási i yuhu i, te táca yúu chí cana jee, áchí yá.

<sup>41</sup> Te nuú ní cuyajini ya Jerusalén, te ní jito ya ñuu ún, te ní ndahyú yá siquī. <sup>42</sup> Te ní cahān yá:

Róhó ñayuu Jerusalén, yóhoyo ní cuu ní rí jeé na jécuhun ní ró jeé cuu ndumaní ró jíin Yaā Dios sáha rí. Te siquī jeé tu cácañdije ró, te vijna chí ma cúu ga jecuhun ní ró. <sup>43</sup> Chí quee quiví jeé coo jnūndóho, te ñayuu cájito uhú róhó, cuicó ndúu i ñuu ró, te casi cutú i jíin yúu, te táca lado ndonda i siquī ró. <sup>44</sup> Te ndihi vehe scótúu i, te cahni i róhó jíjnáhan ró. Te ma stóo i ní ñin vehe jeé cóso jnáhan ga yúu. Chí ní quiji rí nde nuú Yaā Dios jeé jnáma rí róhó, te tu ní cácañdije ró. Achí yá.

*Jeé ní quenehen ya ñayuu ini templo*

*(Mt. 21.12-17; Mr. 11.15-19; Jn. 2.13-22)*

<sup>45</sup> Te ní quiví ya ini templo cáhnu, te ní quejéé yá quenehen ya táca ñayuu cájeen quití te cánañco núu ñayuu jeé socō i. <sup>46</sup> Te ní cahān yá jíin i:

Yósó núu tútu ñi jeé cahān Yaā Dios: Vehe rí chí vehe nuú cájicān tahú cúu, áchí Yaā Dios. Te máá ró jíjnáhan ró, chí nájñuhun yaū cava ñacuñma ní canasáha ró, áchí yá.

<sup>47</sup> Te ndiquiví ní steén yá jñuhun ini templo. Te sutú cácujeñnu jíin tēe cástéén tutu ley Yaā Dios jíin tēe cácujeñnu nuú ñayuu ñuu ún, cánducú de modo ndese cahni de ya. <sup>48</sup> Te tu cánihin de modo sáha de, chí ndiví ñayuu yóhoyo cájetáhu i cájini nahin i jñuhun cahān yá.

*Siquī jeé ndiso jniñu Jesús*

*(Mt. 21.23-27; Mr. 11.27-33)*

## 20

<sup>1</sup> Te ñin quiví steén yá jñuhun nuú ñayuu ini templo, te nácani ya jñuhun jeé jnáma Yaā Dios ñayuu. Te ní quecoo sutú cácujeñnu jíin tēe cástéén tutu ley Yaā Dios jíin táca tēe jéhu cándacu jniñu. <sup>2</sup> Te ní cacahān de:

Castúhún, ¿ndé ní nihin jniñu ró jée sáha ró jniñu yáha? ¿Te ndé ñin ní tee jniñu siquī ró jeé sáha ró súcuán? Achí de.

<sup>3</sup> Te ní cahān Jesús jíin de:

Suni ruhū cajñuhun rí róhó ñin jñuhun jíjnáhan ró. Castúhún núu rí: <sup>4</sup> ¿Nde ñin ní tee

jniñu siquī Juan jeé ní scuándute de? ¿A Yaā Dios chí táca tēe? Achí yá.

<sup>5</sup> Yūcuán na te ní candajnūhun máá de:

¿Ndese cahān yó? Núu cahān yó jeé Yaā Dios ní tee ya jniñu un siquī Juan, te cahān de jíin yó: ¿Najehé tu ní cácañdije ró de núu súcuán? <sup>6</sup> Te núu cahān yó jeé ñayuu ní catee jniñu un siquī de, te ndiví ñayuu cahni i yóhó jíin yúu, chí cácañdije i jeé tēe ní nacani jñuhun Yaā Dios ní cuu ndije Juan, achí de cácañn máá de.

<sup>7</sup> Te ní cacahān de jeé tu cájini de ndé ñin ní tee jniñu siquī Juan jeé ní scuándute de. <sup>8</sup> Yūcuán na te ní cahān Jesús:

Ní ruhū, suni ma cáchi rí nuú ró ndé ñin ní tee jniñu siquī rí sáha rí jniñu yáha, áchí yá.

*Jñuhun yátá siquī tēe néé cásjniñu nuú uva*

*(Mt. 21.33-44; Mr. 12.1-11)*

<sup>9</sup> Te ní quejéé Jesús cahān yá jñuhun yátá yáha jíin ñayuu ún:

Ñin tēe ní nachuhun de cuehē uva nuú ñuhun de. Te ní stóo de nuú sava tēe sájniñu nuú, te cuu sava de ndehé jíin. Te ní tee de ichí jeé cuahān nahān de inga ñuu. <sup>10</sup> Te máá tiempo ndututú uva, te ní tají de ñin mozo cuahān nuú tēe cásjniñu ún, návāha naquihin de sava ndehé uva un. Te tēe un ní cacani de mozo, te ní canatají de i cuanuhun i súcuán-ni. <sup>11</sup> Te tēe chí uva ní tají tucu de inga mozo cuahān. Te tēe cásjniñu ún, suni ní cacahān ndevāha de nuú i, te ní cacani de i, te ní canatají de i cuanuhun i súcuán-ni. <sup>12</sup> Te tēe chí uva ní tají tucu de inga mozo cuahān. Te tēe cásjniñu ún, suni ní castújí de mozo un, te ní cascúnu de i.

<sup>13</sup> Yūcuán na te ní cahān tēe chí uva: ¿Ndese sáha rí? Na tají rí sēhe rí jeé maní rí jíin, chí sanaa te núu ní cajito de i te coo yíñuhún de nuú i. Achí de. <sup>14</sup> Te tēe cásjniñu ún, ná ní cajito de jeé véji i, te ní cacahān de: Tēe chí táhū cúu jeé véji ún. Na cáhni yó de, te ndóo tahū de cuu máá yó, achí. <sup>15</sup> Te ní caquenehen de i inga lado, te ní cajehni de i, áchí yá.

Te ní cajñuhun yá de:

Núu súcuán ¿te ndese sáha tēe chí uva jíin tēe cásjniñu ún? <sup>16</sup> Ndiji de te cahni de tēe un jíjnáhan, te cuāha de ñuhun cáá uva un núu inga sava tēe sájniñu nuú, achí yá.

Te jeé ní cajini ñayuu jñuhun yáha, te ní cacahān i:

Aí, núu ma cóo cuiti súcuán ví, achí i.

<sup>17</sup> Te ndéhé yá nuú i jíjnáhan i, te ní cahān yá:

Núu súcuán ¿te á cájecuhun ní ró jñuhun yáha jée yosó núu tútu ñi jeé cúu rí nájñuhun ñin yuú? Chí áchí tutu:

Yuú jeé ní casquéhichí tēe cájeni vehe, yuú yáha nduu jeé quítuu vehe.

Achí. <sup>18</sup> Te ñayuu tu cácanđje, ndoho i nájñuhun ndóho ñayuu jeē cotúú siquí yuú te jñáhnú i. Te quiví sándaā Yaā Dios cuēchi, te ñayuu tu cácanđje, ndoho i nájñuhun ndóho ñayuu jeē nánga yuú siquí i te cundihi i sáha. Achí yá.

*Siquí xúhun renta*

(Mt. 21.45-46; 22.15-22; Mr. 12.12-17)

<sup>19</sup> Yücuán na te sutú cácujeñhu jín tée cástéén tutu ley Yaā Dios, ni cacuni de jñá de ya maá hora un. Chi ni cajecúhun ni de jeē siquí maá de cúu jñuhun yátá ni cahán yá siquí tée cásjniñu nuú uva jín tée cájeni vehe. Te tu ni cúu, chi cáyühú de jeē quiti ni ñayuu. <sup>20</sup> Yücuán na te ni catajái de jecu tée cuacoto yuhu de ya, te tée un cásaña-ni de jeē tée ndaá cácuu de. Te cánducú de sáha de jeē cahán yá ñin jñuhun jeē nihín de cuēchi siquí yá, te quindeca de ya nuú tée cúu gobernador. <sup>21</sup> Te ni cacahán de:

Maestro, cájini na jéé cahán vāha ní, te stéén ndaa ní. Te tu sáha ní cuenta ndese cúu ñin ñin ñayuu, chi inuú-ni sáha ní jín i. Te stéén ndaa ní ndese squicu ñayuu nuú Yaā Dios. <sup>22</sup> Núu súcuan te cachi ní: ¿A iyó váha jeē chúnaa yó renta nuú rey nación Roma jeē jñá nación yó, chí tutú? áchí de.

<sup>23</sup> Te ni jini yá jeē cácu de stáhú de ya, te ni cahán yá jín de:

¿Najehé cájito ndee rō ruhú? <sup>24</sup> Stéén ñin xúhún na cóto ri. ¿Nde ñin nuú cúu jeē ndee nuú xúhun yáha, te ndé síhví cúu jeē ndee yáhá? áchí yá.

Te ni cacahán de jín yá:

Núu jín síhví rey un cúu, áchí de.

<sup>25</sup> Yücuán na te ni cahán yá jín de:

Núu súcuan te nacuāha ró núu rey un jéé yñi cuenta nuú de, te nacuāha ró núu Yaā Dios táca jéé yñi cuenta nuú maá yá, achí yá.

<sup>26</sup> Te táca tée ún tu ní cúu ñin de cuēchi siquí yá jín ni ñin jñuhun cahán yá, cájito jñúu ñayuu. Chi sa ni canaa ni de jeē ndichí ní stío cuñí yá jñuhun nuú de, te tuá na vé ni cacahán de.

*Jeē ni cacajñuhún de siquí jeē nátecu ndiyi*  
(Mt. 22.23-33; Mr. 12.18-27)

<sup>27</sup> Yücuán na te jecu tée grupo saduceo ni quecoo de nuú yá. Te tée un cacahán jeē tu nátecu cuiti ndiyi. Te ni cacahán de jín yá:

<sup>28</sup> Maestro, Moisés ni tee de nuú tútu jeē cánevāha yó: Núu ñin tée cuu de, te ndoo ñasihí de, te núu tu ní iyó sēhe de jín ña, núu súcuan te cánuú jeē ñani de naquihín ñasihí de, te sēhe de jeē cácu jín ña nucuiñí i nuú ndiyi ñani de, áchí tutu. <sup>29</sup> Núu súcuan te ni iyó uxá ñani. Te tée núu ní quijnáhan de jín ñahan. Te ni jihí de, te tú sēhe de ní iyó. <sup>30</sup> Te tée uú ni naquihín de ña, te suni ni jihí de, te tú na sēhe de ní iyó. <sup>31</sup> Te tée uní ni naquihín de ña. Te suni súcuan ndihúxá de ni condeca de ña, te ni cajihí ndihí de, te ni ñin de tú sēhe

de ní iyó. <sup>32</sup> Te jeē sándihí te suni ni jihí ñahan ún. <sup>33</sup> Núu súcuan te núu na nátecu de jijnáhan de quiví nátecu ndiyi, ¿te ndé ñin de cuu ña ñasihí de? Chi ndihúxá de ni condeca de ña. Achí de jijnáhan de.

<sup>34</sup> Yücuán na te ni cahán yá jín de:

Ñayiví yáha chi cáquijnáhan tée jín ñahan. <sup>35</sup> Te ñayuu váha jeē nátecu i quivicoo i andiví, ma quijnáhan ga i yücuán, chi tuá na jñuhun quijnáhan tée jín ñahan coo. <sup>36</sup> Ni ma cúu cuiti gá i, chi coo i nájñuhun ndajehé Yaā Dios. Te sēhe Yaā Dios cuu i, chi je ni canatecu i. <sup>37</sup> Te suni máá Moisés cáhan de jeē nátecu ndiyi, chi ni tee de nuú tútu ndese ni cahán yá jín de méñhu yücú jeē cayú yáñuhún. Chi ni cahán de jeē cúu ya Yaā Dios Abraham jín Isaac jín Jacob. <sup>38</sup> Te jeē ni cáhan de súcuan cúu jeē ní cachi de jeē cátecu táca ndiyi. Chi vésu je ni cajihí i, te cátecu i nuú iyó máá yá, chí cúu ya Yaā sáha jeē técu ñayuu ní cáni. Achí yá jín de.

<sup>39</sup> Te jecu tée cástéén tutu ley Yaā Dios ni cacahán de:

Vāha ni cahán ní Maestro.

<sup>40</sup> Te tuá ni cáchundeyí ni de cajñuhún de ya.

*Siquí jeē cúu Cristo sēhe yucún David*  
(Mt. 22.41-46; Mr. 12.35-37)

<sup>41</sup> Te ni cahán yá jín de jijnáhan de:

¿Nde se cúu jeē cácahán ñayuu jeē Cristo cúu sēhe yucún David? <sup>42</sup> Chi máá David suhva ni cahán de jñuhun ya nuú tútu Salmo:

Máá Jítoho yó Yaā Dios suhva ni cahán yá jín Jítoho rí, Yaā quiji:

Cucóo ró lado váha ri nuú cujehnu ró,

<sup>43</sup> te na sáha ri jeē quende rō poder táca jéé cájito uhú rohó.

Achí Yaā Dios. Achí David. <sup>44</sup> Te núu sēhe yucún David cúu Cristo, ¿te ndese cúu jeē ni cahán de jeē Jítoho de cúu ya? áchí yá.

*Jeē ni cahán yá jeē iyó cuēchi de jijnáhan de*  
(Mt. 23.1-36; Mr. 12.38-40; Lc. 11.37-54)

<sup>45</sup> Te ni cahán yá jín tée cáscuáha jín yá, te suni ni cajini sóho ndihí ñayuu:

<sup>46</sup> Coto má cándije ró táca tée cástéén tutu ley. Chi cácusí ni de cáñuhun de sahna cáni jeē steén jeē cujehnu de, cájica cuu de jín. Te cánujñahan ni de jeē cahán yñíñuhún ñayuu jín de nuú yáhu. Te cánujñahan ni de cucóo de nuú silla yñíñuhún gá ñi vehe ñi sinagoga, jín silla yñíñuhún gá nuú víco cáyeji ñayuu. <sup>47</sup> Te cáquende de vehe ñahan ní caquendóo ndáhú. Te nahán cájicán tahú de návāha caní ni ñayuu jeē tú na cuēchi de. Tée yáha jijnáhan de chí xēñ gá ndoho de castigo. Achí yá.

*Jeē ni sócō ñahan viuda xúhún*  
(Mr. 12.41-44)

## 21

<sup>1</sup> Te ná ni iyo ya ini templo, te jito ya nuū ñáyuu cucá jéé cáchuhun i cuehē xūhūn ini táca yéjñū nuū casocō i. <sup>2</sup> Te suni ni jito ya nuū ññahan viuda jeē ndóho ndáhú, te ni chuhun ña uū centavo lullí ini yejnū ún. <sup>3</sup> Te ni cahān yā:

Jendaá cahān rī jīn rō jeē cuehē gā cúu jeē ní sócō ññahan viuda ndahú yáha, vēsú jeē ní casocō táca gā ñayuu. <sup>4</sup> Chi táca i ni casocō i jeē ni ndóho siquī xūhun cuéhē i. Te ññahan yáha, vēsú ndahú ndóho ña, te ni chuhun ndīhi ña jeē cōtecu ña. Achí yá jīn de.

*Jeē ní cachi yā jeē nāa templo*

*(Mt. 24.1-2; Mr. 13.1-2)*

<sup>5</sup> Te sava de ni cacahān de jeē luu cáa templo cáhnu, chi ni cuvāha jīn táca yūu luu jīn táca jéé ní casocō ñayuu. Yūcuán na te ni cahān yā:

<sup>6</sup> Ndīhi jeē cájito rō yáha, quee quivī jeē ma cóso jñáhan ga ni ññayū, chi ndīhi jñanū, achí yā.

*Na seña coo nuū cuácuyajni ndīhi ñayiví*

*(Mt. 24.3-28; Mr. 13.3-23)*

<sup>7</sup> Te ni cacajñūhūn de ya:

Maestro, ¿ndé quivī coo táca jéé ní cachi ni jéé coo? ¿Te na seña coo nuū cuácuyajni siquī táca jéé ní cahān ní? achí de.

<sup>8</sup> Te ni cahān yā:

Coto rō jéé ma stahú i rōhó. Chi quijicoo cuehē tēe jeē stahú jīn síhvī rī, te cahān de: Máá rī cúu Cristo. Te suni cahān de: Je ni quee quivī ndīhi ñayiví, achí de. Te ma cóndiquīn rō de. <sup>9</sup> Te núu nihīn rō jñūhun jeē táca lado iyó guerra te cándonda ñayuu siquī tohó, te ma yūhu rō, chi cánuú jéé xīhna gā coo súcuán, te ni ma jinú yachí quivī ndīhi ñayiví. Achí yá.

<sup>10</sup> Te ni cahān gā yā:

Ndonda nación siquī inga nación, te ndonda ñuu siquī inga ñuu jeē cuajñáhan. <sup>11</sup> Te cháha chúcuán jñāa téyí, te coo jnamā jīn cuéhyi xeēn. Te coo seña jéhnu ichí ándiví jéé yūhū ndasí ñayuu coto i.

<sup>12</sup> Te nde ná tu coo táca jñiñu yáha, te coto xeēn i rōhó, te jñi i rōhó. Te quindecá i sava rō táca vehe ññ sinagoga jeē cahān i cuéchi siquī rō. Te chune i sava rō vecāa. Te quindecá i sava rō núu táca rey jīn núu táca gobernador, te cahān i cuéchi siquī rō jeē siquī jeē cáandje rō rúhū. <sup>13</sup> Te jeē súcuán coo, te cuité núu ga jñūhun rī, chi nacani ndaa rō núu de jññáhan de. <sup>14</sup> Núu súcuán te cundaā ni rō jeē ma nácani ni rō xīhna gā ndese stío cuíñí rō nuū de te cácu rō. <sup>15</sup> Chi ruhū cuāha rī jñūhun ndichí cahān rō, návāha ñayuu jeē cájito uhū rohó, ma cūndeyí i jīn rō ní ma cúu cahān i siquī rō. <sup>16</sup> Te nde tatá rō, naná rō, ñani rō, jñáhan rō, jīn amigo rō, nastúu i rōhó núu ñayuu xeēn. Te cahni i sava rō. <sup>17</sup> Te táca ñayuu chí quiti ní i nuū rō

jeē siquī ruhū. <sup>18</sup> Te ni ññixi xīnī rō jññáhan rō ma nāa, chí coto ya rohó. <sup>19</sup> Te núu cuiñí ññihñ rō jīn jñūhun rī, te cotecu rō ní cáni.

<sup>20</sup> Te núu ni cajito rō jéé ní cajicó ndūu soldado ñuu Jerusalén, te na jécūhun ni rō jeé jé yajni naa ñuu ún. <sup>21</sup> Yūcuán na te ñayuu cáyūcú región Judea, na cūnu i caa i yucu quingoo i. Te ñayuu cáyūcú Jerusalén, na quéndacoo i quingoo i. Te ñayuu cáhīn nde rancho, ma nándicó i ñuu ún. <sup>22</sup> Chi táca quivī un cuāha Yaā Dios castigo nuū ñayuu jeē siquī cuéchi i, návāha squīcu táca jñūhun jeē yosó núu tútu. <sup>23</sup> Te quivī ún nacá jeē ndahú ññahan cáñuhun sehe jīn ññahan cándeca yiquín, chí ma cūnihīn ña cūnu yachí ña. Chi yōhyo xeēn coo jñūndóho ini ñayiví, te quiji castigo xeēn siquī ñayuu yáha. <sup>24</sup> Te sava i cuu nuū guerra, te sava i quingoo preso nde táca inga nación. Te ñayuu táca gā nación ndacu ññihñ i jñiñu nuū ñayuu ñuu Jerusalén, nde jñnu tiempo jeē jéhe Yaā Dios jñūhun ndacu i jñiñu.

*Ndese coo quivī ndiji Yaā ní nduu tēe*

*(Mt. 24.29-35, 42-44; Mr. 13.24-37)*

<sup>25</sup> Yūcuán na te coo seña nuū níandii jīn núu yóo jīn núu quími. Te ini ñayiví te quiji jñūndóho xeēn siquī ñayuu táca nación. Te cunéé ni i, te yūhú i jeē ññihñ xeēn mar te ndóna xeēn ndute mar vēji nuū ñūhūn. <sup>26</sup> Te cuu sōo sava ñayuu jeē cáyūhú i cándetu i táca jñūndóho quiji siquī ñayiví. Te táca jéé ññ andiví chí quisi i. <sup>27</sup> Yūcuán na te coto ñayuu nuū maá rí, Yaā ní nduu tēe, ndiji rī jīn vícō, te condiso rī cuehē poder, te yōhyo luu cujéhu rī. <sup>28</sup> Te núu ni quejéé táca jñiñu yáha, te ndeyí coo ní rō, te cocunū rō andiví, chí je yajni jnama ya rohó. Achí yá jīn de jññáhan de.

<sup>29</sup> Te suni ni cahān ya jñūhun yátá yáha:

Condēhe jññáhan rō ndese sáha nundēhe higo jīn táca gā yujnu. <sup>30</sup> Núu cájito rō jéé ní quejéé náne numa yūjnu ún, te cájini rō jeé jé yajni coo tiempo jññi. <sup>31</sup> Te suni súcuán núu ni cajito rō jéé ní quejéé cūu táca jñiñu jeē ní cahān rī, yūcuán na te na jécūhun ni rō jeé ní cuyajni quivī ndacu Yaā Dios jñiñu ini ñayiví.

<sup>32</sup> Jendaá cahān rī jīn rō jeē ma cúu ndīhi ñayuu tiempo un, chí nde squīcu ndīhi jñiñu ún. <sup>33</sup> Andiví jīn ñayiví chí naa, te táca jñūhun cahān rī chí ma nāa, chí ndīhi squīcu.

<sup>34</sup> Te coto ma stívī rō maá rō jññáhan rō jéé sáha rō táca cuéchi, jīn jéé najini rō, jīn jéé cujnéñu rō jīn táca ndajniñu cotecu rō, návāha tú sanaa ni rō te quee quivī un siquī rō. <sup>35</sup> Chi nájnūhun jeē núu ññ trampa, súcuán quee jñūndóho siquī ñayuu cáyūcu ní cáhnu ñayiví. <sup>36</sup> Núu súcuán te ndito coo ní rō, te níni cácan tahú rō, návāha cuu cácu rō núu táca jñūndóho jeé quíji ún, te cuu cuiñí rō núu ruhū, Yaā ní nduu tēe. Achí yá.

<sup>37</sup> Te ndiquiví steén yá jnūhun ini templo, te ndijnahan jecuáá jéndōo ya nde yucu jeē naní Olivos. <sup>38</sup> Te tāca jénēhen quécōo ñayuu nuū yá ini templo jeē cūni sōho i jnūhun stéén yá.

*Jeē ní casquijnáhan de jnūhun jni de Jesús*  
(Mt. 26.1-5, 14-16; Mr. 14.1-2, 10-11;  
Jn. 11.45-53)

## 22

<sup>1</sup> Yūcuán na te ni cuyajni vico pascua jeē cáyeji ñayuu hebreo pan jeē tú na levadura yíhi. <sup>2</sup> Te sutú cácujeñnu jín tēe cástéén tutu ley, ni canducú yuhu de modo cahni de Jesús, chí cáyūhú de jeē quítí ni ñayuu.

<sup>3</sup> Te ni quiví Satanás ini anuá Judas jeē nastúu de ya. Te suni naní de Iscariote, te cúu de ñin jnāhan jeē ndihúxí uū tēe apóstol. <sup>4</sup> Te ni jehēn de ni candajnūhūn de jín tāca sūtú cácujeñnu jín tēe cándiso jniñu ini templo, núu ndese nastúu de ya nuū tēe un jijnāhan. <sup>5</sup> Te tēe un ní cacusī ni de, te ni cajejnūhūn de jeē cuáha de xūhun nuū Judas. <sup>6</sup> Te ni jetáhu Judas, te ni nducú de modo ndese nastúu yuhu de ya hora jeē tú na ñayuu iyó.

*Jeē ní jequin yá Cena yá*  
(Mt. 26.17-29; Mr. 14.12-25; Jn. 13.21-30;  
1 Co. 11.23-26)

<sup>7</sup> Te ni quee maá quiví vico jeē cáyeji ñayuu pan jeē tú na levadura yíhi, te suni quiví un cájeñni i londe najnūhun ni ndacu Yaā Dios jniñu jeē sáha i vico pascua un. <sup>8</sup> Te Jesús ni tají yá Pedro jín Juan quingoo de, te áchí yá jín de:

Cuangoo te sātūhva ró jēe cuxíni yó vico pascua, achí yá.

<sup>9</sup> Te ni cacajnūhūn de ya:

¿Ndé nuū cuní ni jēe quisātūhva ná? áchí de.

<sup>10</sup> Te ni cahān yá jín de:

Cuangoo ñuu yūcuán, te núu ni quivicoo ró te najnāhan ró jín ñin tēe ndiso quiví ndute. Te condiquin ró de quihin ró jín de nde vehe nuū ndiví de. <sup>11</sup> Te cahān ró jín tēe chí vehe ún: Achí máa Maestro: ¿Ndé ñin cúu cuarto vehe ní cuáha núu ní nuū cuxíni ya vico pascua jín tēe cácuáha jín yá, achí ró. <sup>12</sup> Yūcuán na te stéén de ñin cuarto cáhnu nde xiní vehe jeē je iyó túhva, te yūcuan sātūhva ró jēe cuxíni yó, achí yá.

<sup>13</sup> Te cuangoo de, te ni canihin de najnūhun ni cahān yá. Te ni casātūhva de jeē cuxíni ya vico pascua.

<sup>14</sup> Yūcuán na te ni jinū hora jeē cuxíni, te ni quee Jesús, te ni cucōo ya mesa jín tēe cácuu apóstol. <sup>15</sup> Te ni cahān yá jín de:

Yōhō ni cuu ni rī cuxíni rī jín ró jijnāhan ró vico pascua yáha, vijna nde ná tu cuu rī. <sup>16</sup> Chí cáhān rī jín ró jeē ma cáji cuiti gā rī vico pascua, chí nde quiji quiví ndacu Yaā

Dios jniñu ní ñayiví, te sáa te caji tucu ri, achí yá.

<sup>17</sup> Te ni quihin ya ñin copa ndūxi uva, te ni nacuatáhu yá, te ni cahān yá:

Quihin copa yáha, te coho ró jín jnāhan ró. <sup>18</sup> Chí cáhān rī jín ró jeē ndé vijna te ma cóho ga rī ndūxi uva, chí nde quiji quiví ndacu Yaā Dios jniñu ní ñayiví, te sáa te coho tucu ri. Achí yá.

<sup>19</sup> Te ni quihin ya pan, te ni nacuatáhu yá, te ni tahu cuéchi yá, te ni jēhe ya nuū de jijnāhan de. Te ni cahān yá:

Yáha cúu yiqui cúñu rī jeē socō rī jeē chunaa rī cuéchi ró jijnāhan ró. Te níni caji ró súcuan jeē cáñuhun ni ró ruhū jeē ni jihí rī jehē ró. Achí yá.

<sup>20</sup> Te suni súcuan ni sáha ya jín copa ndūxi uva, ná ni cuu ni cuxíni ya. Te ni cahān yá jín de:

Yáha cúu niñí rī jeē cuáha rī jeē cúu contrato jeē, te cati jeē ndundoo cuéchi ró jijnāhan ró.

<sup>21</sup> Te vijna chí tēe nastúu ruhū, néne de jín rí nuū mesa yáha. <sup>22</sup> Chí ruhū, Yaā ní nduu tēe, jendaá cúu jeē quihin rī cuu rī najnūhun je ni sándaá Yaā Dios jeē súcuan coo. Te nacā xeēn ndoho tēe jeē nastúu ruhū, achí yá.

<sup>23</sup> Yūcuán na te ni caquejeé de cacajnūhun jnāhan de ndé ñin de cúu jeē nastúu de ya.

*Jeē ní cacahān de siquí ndé ñin de cújeñnu ga*

<sup>24</sup> Yūcuán na te yōhō ni cacahān de siquí ndé ñin de cújeñnu ga nuū jnāhan de. <sup>25</sup> Te ni cahān Jesús jín de:

Rey táca nación chí cándacu nīhin de jniñu nuū ñayuu cájni de, te cacahān i jeē tēe cásáha vāha cúu jeē cácujeñnu nuū i. <sup>26</sup> Te róhó jijnāhan ró, ma cóo ró súcuan. Chí núu ndé ñin ró cújeñnu ga, te sa nasáha lulí ró maá ró. Te núu ndé ñin ró ndácu jniñu, te sa nasáha ró máa ró tēe jéjniñu nuū jnāhan. <sup>27</sup> ¿Te ndé ñin cúu jeē cújeñnu ga, á tēe yéji nuū mesa, chí tēe jéni cohō? ¿A násūu tēe jeē yéji nuū mesa cúu jeē cújeñnu ga? Te ruhū násūu súcuan cúu rī, chí ni nasáha rī maá rī najnūhun tēe jéjniñu nuū ró, chí véji rī sáha rī jeē nihín tahu ró.

<sup>28</sup> Te máa ró cácuu tēe jeē níni cáhiin jín rī tāca quiví jeē ndóho rī jnūndóho. <sup>29</sup> Núu súcuan te najnūhun ni sáha Tátá rī jeē ndácu rī jniñu, suni súcuan sáha rī jeē ndacu ró jniñu jijnāhan ró. <sup>30</sup> Te caji ró coho ró jín rī ini ñuu nuū ndacu rī jniñu. Te cucōo ró ñin ñin mesa jeē sándaá ró jniñu ndihúxí uū yucūn Israel. Achí yá.

*Jeē ní cachi yá jeē yūhu Pedro cahān de jeē jini de ya*

(Mt. 26.31-35; Mr. 14.27-31; Jn. 13.36-38)

<sup>31</sup> Te suni ni cahān maá Jítoho yō jín Simón Pedro:



Simón, cuni sôho ró, chi ni jicān Sa-tanás rohó jijnáhan ró jéé coto ndee rohó nájñuhun jeé sjiñ trigo, te stúu ndé ñin ró cácuu nájñuhun paja jeé nayũhu ró, te ndé ñin ró cácuu nájñuhun trigo jeé candije nihin ró. <sup>32</sup> Te ni jicān tahú rī jehē rō návaha ma náyũhu ró jeé ma cándije ga rō. Te jeé nácandije tucu ró, te sáha ró jéé ije tāca jnāhan ró jiiñ jñuhun rī. Achí yá.

<sup>33</sup> Te ni cahān de jiiñ yá:

Je iyó túhva ná quihñ na jiiñ ní vecāa te vēsú na cuu na jiiñ ní, achí de.

<sup>34</sup> Te ni cahān yá:

Pedro, cáhān rī jiiñ ró jeé nde ná tu cana líhli vijna, te yũhu ró jeé jñii ñayuu rohó, te unī jínu cahān rō jeé tu jíní rō ruhū, achí yá.

*Jeé ní cuyajni coto ya jñundóho*

<sup>35</sup> Yũcuán na te ni cajñuhun yá de jijnáhan de:

Ná ni tají rí rohó ní jengoo ró jéé tu ní cóndiso ró ñunu ni yijni xũhún ni ndijēn, ¿te á ní iyo ñin jeé ní cumanī nuū rō? Achí yá.

Te ni cacahān de:

Tú ni ñin ní cúmanī.

<sup>36</sup> Te ni cahān yá:

Nde vijna sa cáhān rī jeé cóndiso ró ñunu ró, te suni yijni xũhún. Te tēe jeé tu névaha espada jeé coto de máá de, na xíco de ticāchí de te na cuāan de. <sup>37</sup> Chi cáhān rī jiiñ ró jeé quee quivī ndoho yó jñundóho, chí cánuú squícu jñuhun yáha jéé cahān nuū tútu siquī rī: Sáha ñayuu jiiñ yá nájñuhun cásaħa i jiiñ tēe sáha cuēchi xeēn, achí tutu. Chi tāca jñuhun un jéé yosó cáhān siquī rī, chí squícu nahñ, achí yá.

<sup>38</sup> Yũcuán na te ni cacahān de:

Yáha iyó úu espada, achí de.

Te ni cahān yá jiiñ de:

Jiiñ jéé yáha-ni, achí yá.

*Jeé ni jicān tahú yá nuū huerto Getsemani*  
(Mt. 26.36-46; Mr. 14.32-42)

<sup>39</sup> Te ni quenda ya cuahān yá yucau Olivos nájñuhun sáha sáha yá. Te tēe cáscuħa jiiñ yá ní candiquin de ya cuango de jiiñ yá. <sup>40</sup> Te nuū ní jínū yá yũcuán, te ni cahān yá jiiñ de:

Cacān tahú rō jijnáhan ró jéé chindéé ñáħán yá rohó jéé ma sáħa ró cuēchi núu coto ndee jeneé rohó, achí yá.

<sup>41</sup> Te ni jica ya jecu, cũhva jeé jicá jínū yuū jeé squiñ. Te ni jecuñi yití yá, te suhva ni jicān tahú yá:

<sup>42</sup> Tātá, núu cúní ni te tejiyo ní jñundóho yáha jéé ma quíji siquī ná. Te nasūu jéé cuní maá ná, chí jeé cuní maá ní na cóo, achí yá.

<sup>43</sup> Te ni cane ñin ndajéħe andiví núu yá, te ni jēħe fuerza nuū yá. <sup>44</sup> Te cúcuħyá ndasí ni yá jeé quíji jñundóho siquī yá, te ni nducú ndeyí gá yá ni jicān tahú yá. Te ni cane jnañū yá, te too nuū ñuhun nájñuhun yúyú nahnu niñi.

<sup>45</sup> Te ná ni ndocuiñi yá jeé ni jicān tahú yá, te ni ndee yá nuū tēe cáscuħa jiiñ yá. Te ni jito ya jeé cáquixī de, chí tuá cáħiyo ndeyí ni de cacān tahú de jeé cácuħyá ndasí ni de.

<sup>46</sup> Te ni cahān yá jiiñ de:

¿Naun cáquixī rō? Ndonga te cacān tahú rō jeé chindéé ñáħán yá rohó jéé ma sáħa ró cuēchi jeé coto ndee jeneé rohó. Achí yá.

*Jeé ní cajñi de Jesús*

(Mt. 26.47-56; Mr. 14.43-50; Jn. 18.2-11)

<sup>47</sup> Te sá cáhān gā yá súcuan, te ni quecoo cuehē ñayuu. Te tēe nání Judas, ñin jnāhan jeé uxí uū tēe scuħa jiiñ yá, yósnúu de nuū ñayuu un vēji de. Te ni quee de nde nuū Jesús, te ni techũhú de ya, te súcuan ni nastúu de ya. <sup>48</sup> Te ni cahān Jesús jiiñ de:

Judas, ¿á jiiñ jéé téchũhu ró ruhū cúu jeé nastúu ró ruhū, Yaā ní nduu tēe? Achí yá.

<sup>49</sup> Te tēe cáħiñ jiiñ yá, ní cajito de jeé ní quejéé cúu, te ni cacajñuhñ de ya:

¿A ndonga ná jijnáhan ná síquī de jiiñ espada? achí de.

<sup>50</sup> Te ñin de ni stují de mozo sutú cujéħnu ga, chí ni jehnde de sôho lado váha. <sup>51</sup> Te ni cahān Jesús:

Siáá, na jecuñi, achí yá.

Te ni tee ya ndaha ya sôho mozo un, te ni nasávaha ya de. <sup>52</sup> Te ni cahān yá jiiñ sutú cácuħyá jiiñ tēe cándiso jñiñu ini templo jiiñ táca tēe jéħnu jeé ní quecoo de jeé jñá de ya:

¿Te va tēe cuiħná cúu rī jeé vējicoo ró jiiñ espada jiiñ yujnu jeé jñii ró ruhū jeé súcuan?

<sup>53</sup> Táca quiví ni ine rī jiiñ ró jijnáhan ró ini templo cáħnu, te tu ní cajñi ró ruhū. Te vijna te ní quee hora jeé jñii ró ruhū jiiñ jéé sáħa ró táca jñiñu jeé ndácu jeneé jéé ndee núu née. Achí yá.

*Jeé ní cachi Pedro jeé tu jini de ya*

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

<sup>54</sup> Te ni cajñi de ya cuango de ya jiiñ yá veħe sutú cujéħnu ga. Te Pedro chí jicá-ni ndiquin de ya. <sup>55</sup> Te táca policía ni cascáyú de ñuhñ ini patio, te ni condúu de yuñuhñ un cáyúcú de. Te suni ni cucōo Pedro jiiñ de. <sup>56</sup> Te ñin ñahan jéjñiñu ini veħe un, ní jito ña nuū de jeé néne de yuñuhñ. Te ni jito váha ña nuū de, te ni cahān ña:

Tēe yáha suni ní jica de jiiñ tēe ún, achí ña.

<sup>57</sup> Te máá de tu ní cáchi de, chí ni cahān de:

Tu jini rī tēe ún, achí de.

<sup>58</sup> Te ni cunúu jecu gā, te ni jito tucu inga ñayuu nuū Pedro, te ni cahān:

Róħó, suni jnāhan táca tēe un cúu ró, achí.

Te ni cahān Pedro:

Nasūu cúu rī, hombre, achí de.

<sup>59</sup> Te ni cu nájñuhun ñin hora gā, te ni cahān nihin inga de:

Jendaá ndije jeé tēe yáha ní jica de jiiñ tēe ún, chí suni tēe región Galilea cúu de, achí de.

<sup>60</sup> Te ni cahān Pedro:

Hombre, tu jíní rí na jñuhun cáhán rō.

Te sá súcuan cáhán gā de, te ni cana-ni líhli. <sup>61</sup> Yūcuán na te ni ndió coto máá Jítóho yō, te ni jito ya nuū Pedro. Te ni nucuhun ni de jñuhun ni cahān yā jín de: Nde ná tu cana líhli, te yūhu rō te cahān rō uní jínu jeē tu jíní rō ruhū. <sup>62</sup> Te ni quenda de cuahān de, te yōhyo ni ndahyū de jeē ní cachi de jeē tu jíní de ya.

*Jeē ní casacatā de nuū yā*

(Mt. 26.67-68; Mr. 14.65)

<sup>63</sup> Te tāca tēe cándito Jesús, ni casacatā de nuū yā, te ni cacani de ya. <sup>64</sup> Te ni cajesi de sahma nuū yā, te ni cacani de nuū yā, te ni cacahān de:

Cachi ndé ñn cúu jeē ní cani róhó, áchí de.

<sup>65</sup> Te cuehē gā jñuhun súcuan ni cacahān neé de jín yá.

*Jeē ní indichi Jesús nuū junta tēe cácujeñnu ga*

(Mt. 26.59-66; Mr. 14.55-64; Jn. 18.19-24)

<sup>66</sup> Te jeē ní cundiñin, te ni candutútú táca tēe jéñnu cándacu jñiñu nuū ñayuu hebreo, jín sūtú cácujeñnu, jín tēe cástéén tutu ley Yaā Dios. Te cuango de jín yá nuū junta tēe cácujeñnu ga, te yūcuan ní cacajñuhún de ya:

<sup>67</sup> Cachi, ¿á máá rō cúu Cristo jeē ní tají Yaā Dios? Achí de.

Te ni cahān yā jín de:

Vēsú na cáhán rí jeē suu ri cúu, te ni ma candíje cuítí rō. <sup>68</sup> Te suni núu cajñuhun máá rí rohó jñánhan rō, te suni ma stíó cuítí rō nuū rí, ni ma siaá rō ruhū. <sup>69</sup> Te ruhū, Yaā ní nduu tēe, táca quívi jeē quíji conene ri lado váha máá Yaā iyó poder, achí yá.

<sup>70</sup> Yūcuán na te ndihi de ni cacajñuhún de ya:

¿A máá rō cúu Sēhe Yaā Dios núu súcuan?

Te ni cahān yā jín de:

Suu ri cúu, nájnūhun cáhān rō, achí yá.

<sup>71</sup> Yūcuán na te ni cacahān de:

¿Na testigo gā jíní ñuhún yó núu súcuan? Chi ni cajini sōho yó jín yuhu máá de jeē cahān ndevāha de jeē cúu de Sēhe Yaā Dios. Achí de jínánhan de.

*Jeē ní indichi Jesús nuū Pilato*

(Mt. 27.1-2, 11-14; Mr. 15.1-5;

Jn. 18.28-38)

## 23

<sup>1</sup> Yūcuán na te ni candocuíñí ndihi de, te cuango de jín yá nuū Pilato. <sup>2</sup> Te yūcuan ní caquejé de cáhān de cuēchi siquí yā:

Ni canihñ na tēe yáha jéé stóna de ñayuu siquí tohō. Te cáhán de jeē tú váha jeē cuāha ná xuhun renta nuū rey nación Roma jeē ndácu jñiñu nuū nación na. Te suni cáhán de jeē máá de cúu Cristo, Rey jeē ní tají Yaā Dios. Achí de jínánhan de.

<sup>3</sup> Yūcuán na te Pilato ni cajñuhún de ya:

¿A máá rō cúu Rey ñayuu hebreo?

Te ni cahān yā:

Suu ri cúu, nájnūhun cáhán rō, achí yá.

<sup>4</sup> Te ni cahān Pilato jín sūtú cácujeñnu jín ñayuu cuehē ún:

Tú ni ñn jñuhun stívi cáhán tēe yáha jéé nihñ rí cuēchi siquí de, achí de.

<sup>5</sup> Te máá de víhyá gā ni cacahān de:

Tēe yáha stóna ndasí de ñayuu siquí tohō jín jñuhun stéén de nú Judea. Chi ní quejéé de stéén de nde Galilea, te vijna te nde yáha, achí de.

*Jeē ní indichi Jesús nuū Herodes*

<sup>6</sup> Te nuū ní jini sōho Pilato jeē Galilea cáhān, te ni cajñuhún de ñayuu núu tēe región Galilea cúu ya. <sup>7</sup> Te nuū ní cacahān ñayuu jeē cúu ya tēe Galilea, te ni ndacu de jñiñu jeē na quíngoo de jín yá nuū Herodes, tēe cúu gobernador Galilea. Chi quívi ún suni íne Herodes ñuu Jerusalén. <sup>8</sup> Te nuū ní jito de nuū Jesús, te yōhyo ni cusí ni de, chi je ni cuu cuehē tiempo jeē cuní de coto de nuū yā. Chi ni nihñ de jñuhun ya, te ñuhun ni de jeé sáha ya ñn jñiñu jéñnu coto de. <sup>9</sup> Te ni cajñuhún de ya cuehē jñuhun, te tu ní stíó cuítí yā ní ñn jñuhun nuū de. <sup>10</sup> Te suni cáhñn táca sūtú cácujeñnu jín tēe cástéén tutu ley, te nihñ ni cacahān de cuēchi siquí yā. <sup>11</sup> Yūcuán na te Herodes jín táca soldado de ni cacahān neé de jín yá, te ni casacatā de nuū yā, chi ni cachuhun de ya sahma váha luu jeē cúu sahma rey. Te Herodes ní ndacu de jñiñu jeē na quíndeca de ya nuū Pilato. <sup>12</sup> Te máá quívi un ní candumani jñánhan Pilato jín Herodes, chi ichi yátá ni caquítí jñánhan ni de.

*Jeē ní cundaā jeē cúu yā*

(Mt. 27.15-26; Mr. 15.6-15; Jn. 18.39-19.16)

<sup>13</sup> Yūcuán na te ni cana Pilato táca sūtú cácujeñnu jín táca tēe cándiso jñiñu jín táca gá ñayuu, ni candutútú. <sup>14</sup> Te ni cahān de:

Ni caquindeca rō tēe yáha núu rí, jeē cáhān rō jeē stóna de ñayuu siquí tohō. Te je ni stíchí rí de, ni cajito jínúñ rō. Te tu ní nihñ rí ni ñn cuēchi siquí de nájnūhun jeē cáhān rō. <sup>15</sup> Te ni Herodes, tu ní nihñ de, chi ní natají tucu de tēe yáha núu rí. Te tú cuítí ni ñn cuēchi ní sáha de jeē cúu de. <sup>16</sup> Núu súcuan te na cuáha ri castigo de, te siáá rí de quíñn de, achí Pilato.

<sup>17</sup> Te iyó costumbre jeē táca vico pascua siaá Pilato ñn preso jeé cuní ñayuu. <sup>18</sup> Te ñayuu cuehē ún, inuú-ni ni cacana jee i:

Na cúu tēe jíná, te siáá ní Barrabás, achí i.

<sup>19</sup> Te Barrabás íne de vecaá siquí jeē ní stóna de ñayuu siquí tohō ñn ñuu ún, te ni jehni de ndíyi. <sup>20</sup> Te Pilato cuní de siáá de Jesús, te ni cahān tucu de jín ñayuu. <sup>21</sup> Te máá i víhyá gā ni cacana jee i:

Cata caa ní de jicá cruz, na cúu de, achí i.

<sup>22</sup> Te ni cahān tucu de jín i vuelta uní:

¿Na cuēchi ni sáha de núu súcuan? Tu ní nihín cuiti rí ni ìn cuēchi siquĩ de jeē cúu de. Núu súcuan te na cuáha ri castigo de, te siáá rí de quihín de, áchí Pilato.

<sup>23</sup> Te víhyá gā ni cacana jee ñayuu un, ní cacahān nihín i jeē na cúu yā jicā cruz. Te máá i jíin táca sūtū cácujuhnu, ní cacana jee ndasí i. Te ni cacundeyí i ni cacahān i Pilato jeē na cúu yā. <sup>24</sup> Yūcuán na te ni ndacu Pilato jniñu jeē na cóo nájñuhun cácuñi i. <sup>25</sup> Te ni siaá de tēe jeē ní cajicān i, tēe jeē íne vecāa jeē ni stóna de ñayuu siquĩ tohó te ni jehni de ndíyí. Te ni jēhe de jñuhun jeē na cúu Jesús nájñuhun cácuñi i.

*Jeē ní cacata caa de ya jicā cruz*

*(Mt. 27.32-44; Mr. 15.21-32; Jn. 19.17-27)*

<sup>26</sup> Te cuangoo táca soldado jíin yá jeē cahni de ya jicā cruz. Te ni canihín de ìn tēe ñuu Cirene, nání de Simón, vendiji de jeē ní jēhēn de rancho. Te ni catejniñu de tēe un jéé cóndiso de cruz yā quihín de yatā yā.

<sup>27</sup> Te cuehē ndasí ñayuu ndíquín i yatā yā cuangoo i. Te suni cuehē ñahan cuangoo ña, te cándahyū cohó ña jeē cácuculhyá ni ña jehé yā. <sup>28</sup> Te ni ndió cóto Jesús nuū ña, te ni cahān yā:

Róhó ñahan Jerusalén jijnáhan ró, ma ndahyū ró jehé rí, chí sa suhva ndahyū ró jehé máá ró jíin jehé sēhe ró jíjnáhan i. <sup>29</sup> Chi quee quiví jeē coo jñúndóho xeēn siquĩ ró, te cahān ró: Yóhoyo ndetū táca ñahan nómá, jíin jéé tu ní scácu sēhe, jíin jéé tu ní cóndeca yiquín, chí tú sēhe ña jeē jnahuhú ni ña jee ndóho i, áchí ró jíjnáhan ró. <sup>30</sup> Quiví ún te quejéé ñayuu cahān i jíin táca yucu: Cotúú siquĩ rí jíjnáhan ri návaha cuu rí. Te suni jíin táca loma: Casi siquĩ rí jíjnáhan ri, áchí i. <sup>31</sup> Chí núu casáha xeēn i jíin rúhú jeē tú na cuēchi ri, te nagá ni cuu jeé ma cóo xeēn siquĩ ndihí ñayuu chí íyó cuēchi i. Achí yá.

<sup>32</sup> Te suni cuangoo de jíin úu tēe ni casáha cuēchi xeēn, jeē suni cuu de jíin yá. <sup>33</sup> Te ni jinúcoo de lugar nuū naní Yiqui Xíní, te yūcan ni cacata caa de ya jicā cruz. Te suni ní cacata caa de ndindúú tēe ni casáha cuēchi xeēn un núu uū gā cruz, ìn de lado váha ya, te ìnga de lado jecó yá. <sup>34</sup> Te níni jéé súcuan cúu, te ni cahān Jesús:

Tátá, cone cáhnu ní ni núu de jíjnáhan de, chí tu cájini de na vé casáha de, áchí yá.

Te soldado ní casáha de sorteo jeē siquĩ ndese nihín ìn ìn de sahma ya. <sup>35</sup> Te cáhñin ñayuu yūcuau, cájito i nuū yá. Te suni nde tēe cándiso jniñu, cácahān catá de cájito de ya:

Núu ìnga ñayuu ni jnama de, te na jnáma de máá de vijna, te núu ndaā jeē Cristo jeē ní nacáji Yaā Dios cúu de, áchí.

<sup>36</sup> Te táca soldado suni ní casácatá de nuū yá, chí ní quecoo de nde nuū yá, te ní cajēhe de vinagre iyá coho ya. <sup>37</sup> Te cácahān de jíin yá:

Núu máá ró cúu Rey ñayuu hebreo, te na jnáma ró máá ró, áchí de.

<sup>38</sup> Te suni ní íyo jñuhun jeē ndeé xiní cruz yā jeē cahān na siquĩ ní jíhí yá, te suhva yósó jíin yuhu griego jíin latín jíin hebreo: Yāha cúu Rey ñayuu hebreo, áchí.

<sup>39</sup> Te ìn jeē ndindúú tēe ni casáha cuēchi xeēn, jeē cándita caa, ni cahān neé de nuū yá:

Núu máá ró cúu Cristo, te na jnáma ró máá ró te suni jnama ró ndindúú rí, áchí de.

<sup>40</sup> Te ìnga de ni cahān de nuū jnáhan de:

¿A tu yúhú ró Yaā Dios naún? Chí inuú cándoho yó jíin Yaā yáha. <sup>41</sup> Te máá yó chí vetū-ni cándoho yó, chí yáha cánihín yó castigo siquĩ jniñu neé ní casáha yó. Te Yaā yáha chí tú ni ìn cuēchi ní sáha ya, áchí de.

<sup>42</sup> Te ni cahān de jíin yá:

Jesús, nucūhun ní ní sáña jéé quejéé ní ndacu ní jniñu, áchí de.

<sup>43</sup> Yūcuán na te ni cahān Jesús jíin de:

Jendaá cahān rí jíin ró jeē víjna te condee ró jíin rí nuū jardín andiví, áchí yá.

*Jeē ní jíhí Jesús*

*(Mt. 27.45-56; Mr. 15.33-41; Jn. 19.28-30)*

<sup>44</sup> Te nuū ní cuu nájñuhun cahuxí uū, te ní cunee ní cáhnu nde cahuní. <sup>45</sup> Te ní cu-jnúú níandii. Te sahma ndíta caa jeē ndihyú cuarto ì ìni templo cáhnu, ní ndatā-ní sava sava. <sup>46</sup> Yūcuán na te ni cana jee Jesús:

Tátá, naquihín ní ánuá na, áchí yá.

Te súcuan ni cahān yá, te ní jíhí-ni ya.

<sup>47</sup> Te tēe nación Roma jeē cúu capitán ni jito de jeē súcuan ni cuu, te ni cahān de jeē yóhoyo cújéhu Yaā Dios, te áchí de:

Jendaá ndije jeē tēe tú na cuēchi cúu tēe yáha, áchí de.

<sup>48</sup> Te ndávii ñayuu cáhñin yūcuau ní cajito i táca jéé ní cuu, te cácani i yiqui jicā i jeé cájnahuhú ni i, te ní nandió cóo i cuanungoo i. <sup>49</sup> Te táca ñayuu cájini jnáhan jíin yá, jíin táca ñahan Galilea jeē ní cajica ña jíin yá, cáhñin jicā ña cájito ña táca jéé ní cuu.

*Jeē ní quindúji Jesús*

*(Mt. 27.57-61; Mr. 15.42-47; Jn. 19.38-42)*

<sup>50</sup> Te ní íyo ìn tēe váha tēe ndaā, nání de José. Te tēe ñuu Arimatea ndañúú Judea cúu de. Te cúu de jnáhan táca tēe hebreo cácujuhnu ga jeé casáha junta. <sup>51</sup> Te ñuhun ní de jeé quiji quiví jeé ndacu Yaā Dios jniñu, te suni tu ní nújnahan ní de jeē ní casándaā junta un jéé cúu Jesús. <sup>52</sup> Te tēe un ní jehēn de nuū Pilato, ní jicān de yiqui cúu Jesús. <sup>53</sup> Te ní snúu de ya jicā cruz, te ní chuscúcn de ya ìn sahma cuitá. Te ní chindúji de ya ìni ìn yaū jeé ní caan jicā ìn cava, nuū ná tu quindúji ndíyí. <sup>54</sup> Te quiví un cúu quiví casátuhva ñayuu, chí jehíni un quejéé quiví ndétátú.

<sup>55</sup> Te ñahan ní quijicoo jíin yá nde Galilea, ní jengoo ña jíin José, te ní cajito váha ña yaū ún, jíin ndese ní cachindúji de ya. <sup>56</sup> Te

cuanungoo ña vehe ña, te ni casátuhva ña táca perfume jiin aceite yucū jeén asñ. Te ni candetátú ña quivī ndétátú, nájñuhun ndácu ley Yaā Dios jñiñu.

*Jeē ní natecu Jesús*

(Mt. 28.1-10; Mr. 16.1-8; Jn. 20.1-10)

## 24

<sup>1</sup> Te jenéhen ndasí quivī domingo, te ni jinūcoo tucu ñahan un núu ní yindūji Jesús, te cándahá ña táca perfume jiin aceite ni casátuhva ña. Te suni cuangoo sava ga ñahan jiin ña. <sup>2</sup> Te nuū ní jinūcoo ña, te ni cajito ña jeē ní cujiyo yuū ndihyú yuyáú ndiyi. <sup>3</sup> Te ni quivicoo ña yaū ún, te tuá yiqui cūñu Jitoho yō Jesús ni cajito ña. <sup>4</sup> Te ni cacunéé ni ña cájito ña jeē tuá ndiyi. Sáa te ni cajito ña uū ndajéhé Yaā Dios jeē cáa nájñuhun tēe, cáhiin ya xiin ña, te cáñuhun ya sahma ndindéé. <sup>5</sup> Te yōhyo ni cayūhū ña, te ni cajexin ña nuū ña nde nuū ñuhun. Te ni cacahān ndajéhé un jiin ña:

¿Naun sa nuū cáyindūji ndiyi cánanducú ró Yaā tēcu? <sup>6</sup> Tuá yā yehá, chi je ni natecu yā. Te nucūhun ni rō ndese ni cahān yā jiin ró ná íne ga yā región Galilea. <sup>7</sup> Chi ni cachi ya jeē maá yā, Yaā ní nduu tēe, cánuú natūu ya nuū táca tēe cáhiyo cuēchi, jeē jñi de ya cahni de ya jicā cruz, te nuū uní quivī te natecu yā. Achí ndajéhé un.

<sup>8</sup> Yūcuán na te ni canucūhun ni ña táca jñuhun ni cahān Jesús. <sup>9</sup> Te ni quendacoo ña nuū ní yindūji ya, te cuanungoo ña. Te ni canacani ña táca jñuhun yáha nuū ndihúxí iin apóstol jiin núu táca gá de. <sup>10</sup> Te ñahan ní canacani jñuhun yáha nuū tēe cácuu apóstol, cúu ña María ñuu Magdala, jiin Juana, jiin María naná Jacobo, jiin sava ga ña. <sup>11</sup> Te táca apóstol chí cájeni ni de jeē jñuhun cánéé cáñúú cácahān ña, te tu ní cácañdije de.

<sup>12</sup> Te vēsú sūcuan, te Pedro ní quenda de, te jinu de cuacondéhe de nuū ní yindūji ya. Te ni jito nihni de ini yaū, te ni jito de jeē sahma cuitá un cáyūcu máa na. Te cuanuhun de vehe de, te nahān náa ni de jeē ní jito de jeē tuá yā.

*Jeē ní ndajñuhun yá jiin úu de ichi cuáhán Emaús*

(Mr. 16.12-13)

<sup>13</sup> Te suu quivī un cuángoo uū jñáhan de iin ñuu naní Emaús, jeē jicá nájñuhun uxí iin kilómetro jiin ñuu Jerusalén. <sup>14</sup> Te cándajñuhún de siquī táca jñiñu jeē ní cuu ún. <sup>15</sup> Te níni cándajñuhún de te cácaññuhun jñáhan de, te máa Jesús ni cuyajni ya yatá de, te jica ya cuahān yā jiin de. <sup>16</sup> Te ni sáha jiin de jeē tu ní cáacuni de ya, vēsú cájito de nuū yā. <sup>17</sup> Te ni cajñuhun yá de:

¿Na jñuhun cándajñuhun ró cájica ró? ¿Te najehé cácuulhyá ní ró? Achí yá.

<sup>18</sup> Te iin de jeē naní Cleofas ni cahān de jiin yá:

Ndihí cuiti ñayuu cájini i táca jñiñu ní cuu ini ñuu Jerusalén táca quivī yáha. ¿Te á máñuhún-ni nihin cúu jeē ní quee ní ñuu un jeē tu jini ní na vé ni cuu? Achí de.

<sup>19</sup> Te ni cajñuhun yá de:

¿Te na vé ni cuu? Achí yá.

Te ni cacahān de jiin yá:

Jeē ní ndoho Jesús ñuu Nazaret, Yaā ní nacani jñuhun Yaā Dios. Te jiin poder Yaā Dios ni sáha ya táca jñiñu jéhu te ni nacani ya jñuhun, jito jínúu Yaā Dios jiin táca ñayuu. <sup>20</sup> Te sutú cácuñéhu jiin tēe cándiso jñiñu nuū ná, ni canastúu de ya nuū táca tēe Roma, te tēe un ní casándaá de jeē cúu yā jicā cruz. <sup>21</sup> Te máa ná ní cañuhun ni na jeē maá yá jnama ya nación na Israel nuū ñayuu Roma nuū. Te siquī táca jñiñu yáha, te ni cane inga jñuhun. Chí vijna je iyo ún quivī jeē ní cuu ún. <sup>22</sup> Te sava ñahan cájini jñáhan ná jiin, ni canacani ña iin jñuhun jeē yóhyo cánaa ni na sáha, chí cácahān ña jeē ní natecu yā. Chí jenéhen ndasi ní jengoo ña yaū ndiyi ún. <sup>23</sup> Te tuá ní cájito ña yiqui cūñu yā. Te ni ndecoo ña nuū na jñáhan ná, te cácahān ña jeē ní cajito ña jeē ní canecoo ndajéhé Yaā Dios nuū ña, te ni cacahān jeē ní natecu Jesús. <sup>24</sup> Te ni jengoo sava jñáhan ná ndé yaū ndiyi ún, te ni cajito de jeē sūcuan íyó, nájñuhun ni cacahān ñahan ún, te tu ní cájito cuiti de nuū yā.

<sup>25</sup> Yūcuán na te ni cahān maá yá jiin de:

Tēe tu cájecūhun cuiti ni cácuu ró. Yóhyo uhū cácañdije ró táca jñuhun Cristo ní cacahān tēe ni canacani jñuhun Yaā Dios nde jenahān. <sup>26</sup> ¿Te á tu sūcuan ní jini ñuhun ndoho Cristo táca jñúndóho yáha, te sáa te quinhun yá nuū lúu cuñéhu ya? Achí yá.

<sup>27</sup> Te ni nacani cáji yá táca jñuhun jeē yosó núu tútu ií jeē cahān siquī maá yá. Te ni quejéé yá jiin jñuhun ni tee Moisés, te ni cahān gā yā táca jñuhun jeē ní catee tēe ni canacani jñuhun ya nde jenahān.

<sup>28</sup> Te nuū ní jinūcoo de ñuu nuū cuángoo de ún, te Jesús ni sáha ya jeē cáca ga yā quihñ yā. <sup>29</sup> Te máa de ní castétu de ya, ni cacahān de jiin yá:

Ndōo ní vehe ná, chi je ni ini te je yajni cuaa, achí de.

Yūcuán na te ni quivī ya jeē quéndōo ya jiin de. <sup>30</sup> Te nuū ní cucōo ya mesa jeē cáji yá jiin de jijnáhan de, te ni quihñ ya staa, te ni jicān tahú yá, te ni tahú cuéchi yá, te ni jēhe ya nuū de. <sup>31</sup> Te jeē sáha ya sūcuan, te nájñuhun ni cananune tinúu de, te ni canacani de ya. Te ni ndoñuhún-ni ya nuū de cuahān yā. <sup>32</sup> Te ni cacahān maá de:

Jendaá jeē yóhyo ni cacusiñ ni yō ná ni nacani ya jñuhun nuū yō ichi ún te ni castūhun cáji yá jñuhun cahān tutu ií. Achí de.

<sup>33</sup> Yūcuán na te yachī ni canaquihin de ichi, ni canandico de cuanungoo de ñuu Jerusalén. Te ni canajnáhan de jíin ndihúxi ñin ga apóstol, cáyūcu tútu de jíin sava ga jnáhan de. <sup>34</sup> Te ni cacahān tēe cáyūcu tútu un:

Jendaá ndije jeē ní natecu maá Jítoho yō, te ni nane ndijin yā nuū Simón, achí de jíinánhan de.

<sup>35</sup> Yūcuán na te ndindúú tēe un ní canacani de jnūhun ndese ni najnáhan ya jíin de ichi, jíin ndese ni canacuni de ya ná ni tahu cuéchi yá staa.

*Jeē ní nane ya nuū tēe cáscuáha jíin yá  
(Mt. 28.16-20; Mr. 16.14-18; Jn. 20.19-23)*

<sup>36</sup> Te sá cacahān gā de tāca jnūhun yáha, te ni jecuñiñi-ni Jesús mehñu de jíinánhan de. Te ni cahān yā jíin de:

Ndeyí sñ coo ni rō jijnánhan ró, áchí yá.

<sup>37</sup> Te ni candacoto Iyo de, ni cayūhú ndasí de, chí ni cajeni ni de jeē ñin ánuá cúu ya.

<sup>38</sup> Te ni cahān yā jíin de:

¿Naun cáyūhu ró, te naun cájeni siquí ni rō súcuan? <sup>39</sup> Condéhé ndaha ri jíin jéhē rī, te cuni rō jeē maá rí cúu. Jñii ruhū te cuni rō, chí ñin ánuá tu névāha cūñu ni yiqui najnūhun cájito ró jēé névāha maá rí, achí yá.

<sup>40</sup> Te jeē ni cahān yā súcuan, te ni steén yā ndaha ya jehē yā nuū ni yñi ndūyu cāa. <sup>41</sup> Te yōhyo ni cacusiñ ni de, te cánaa ni de. Te vēsú súcuan te ná tu candíje vāha vāha de jeē maá yá cúu. Te ni cahān yā jíin de:

¿A cánevāha ró jecu jeē cáji rī yāhá? áchí yá.

<sup>42</sup> Yūcuán na te ni cajēhe de ñin pedazo chācá ní tau nuū yā, jíin ñin pedazo ñahmā ndūxi yocō. <sup>43</sup> Te ni quihin ya, te ni yeji yā nuū de jíinánhan de. <sup>44</sup> Te ni cahān yā jíin de:

Tāca jēé ní cuu jíin rí cúu jeē ni cahān rī ná ni ine ri jíin ró jíinánhan ró ndé saá, jeē cánuú squicu tāca jnūhun ri jeē yosó núu tútu ley Moisés, jíin núu tācá tutu tēe ni canacani jnūhun Yaā Dios, jíin núu tútu salmo, achí yá.

<sup>45</sup> Te ni nune ya jeē nijññi de, návāha cuu jecuhun ni de tāca jēé cahán tutu ñi. <sup>46</sup> Te ni cahān yā:

Súcuan cáhán nuū tútu jeē ruhū Cristo, cánuú cuu rī, te nuū uní quiví natecu rī. <sup>47</sup> Te cuitē núu jnūhun ri jeē cánuú nacani ni ñayuu jeē stóo i cuéchi i, te cone cáhnu ni Yaā Dios nuū i. Te ñuu Jerusalén quejéé cuitē núu jnūhun yáha, te quihin nuū ñayuu tācá nación. <sup>48</sup> Te maá ró cácuu tēe nacani jnūhun tācá jñiñu ní cajito ró. <sup>49</sup> Te tají rí Espiritu Santo quiji ya nuū rō jijnánhan ró, najnūhun ni jejnūhun Tátá rī. Te na quéndōo ró ñuu Jerusalén condetu ró ndé nihñi rō poder Espiritu Santo jeē quiji nde andiví. Achí yá.

*Jeē ní ndaa ya cuanuhun yā andiví  
(Mr. 16.19-20)*

<sup>50</sup> Yūcuán na te ni quenda ya ñuu Jerusalén, cuahān yā nde ñuu Betania jíin de jíinánhan de. Te ni ndonehen ya ndindúú ndaha ya, te ni jicān tahu yā jehē de. <sup>51</sup> Te níni jíicān tahu yā jehē de, te ni cujiyo-ni ya nuū de, ni ndaa ya cuanuhun yā andiví. <sup>52</sup> Te maá de ni cachiñuhún de ya. Te saá te cuanungoo de ñuu Jerusalén, te yōhyo cácusñi ni de. <sup>53</sup> Te níni cáhñin de ini templo cáhnu, cáacuatahú de nuū Yaā Dios. Te ni cuu. Amén.

## JNUHUN VAHA NI TEE SAN JUAN

*Yaā nani Jnúhun Yaā Dios ni nduu ya tēe*

<sup>1</sup> Nde xihna ñúhún ná ni jecōo ndihi jeē iyó, te je iyó Yaā nani Jnúhun Yaā Dios, chí stéén yá ndihi jnúhun ndese Yaā cúu Yaā Dios. Te Yaā nani Jnúhun un ndéé yá jín Yaā Dios, te Yaā Dios cúu ya. <sup>2</sup> Máá yá ndeé yá nde jeē xihna ñúhún jín Yaā Dios. <sup>3</sup> Te ní sáha Yaā Dios jeē jín máá yá ní jecōo ndihi táca jéé iyó. Te ma jecōo ní iin jeē iyó núu tu ní sáha máá yá. <sup>4</sup> Máá yá sáha jeē técu ndihi-ni, te máá yá cúu luz jeē steén ini anuá ñayuu, cúu jeē sáha ya jeē jécúhun ni i siquí Yaā Dios. <sup>5</sup> Te Yaā cúu luz ún ndíndee núu ñayuu tu cájica ndaā, jeē nájnúhun cáhíyo i nuú néé. Te ñayuu cáhíyo nuú néé tu cúu ndahva i luz yá.

<sup>6</sup> Te ní iyo iin tēe jeē ní tají Yaā Dios, nani de Juan. <sup>7</sup> Tēe un ní quiji de jeē nacani cájic de jnúhun máá Yaā cúu luz, návaha candije táca ñayuu jeē jín jnúhun cáhán de. <sup>8</sup> Nasúu máá Juan cúu luz ún, chí cúu de iin jeē ní nacani cájic jnúhun máá luz un. <sup>9</sup> Te máá Yaā cúu luz ndije jeē steén ini anuá táca ñayuu, nde saá ní quiji ya ini ñayiví.

<sup>10</sup> Te Yaā cúu Jnúhun Yaā Dios ní condee yá ini ñayiví, te vésú jeē jín máá yá ní sáha Yaā Dios ñayiví, te ñayuu ñayiví tu ní cácuni i cuatáhu i jeē máá yá cúu. <sup>11</sup> Ní quiji ya nuú ñayuu máá yá nación hebreo, te ñayuu ún tu ní cájetáhu i ya. <sup>12</sup> Te vésú súcuán te sava ñayuu chí ní cájetáhu i ya, te ní cacandije i jeē sáha ya jehē i. Te nuú máá i ní jēhe ya jnúhun jeē ndúu i sēhe Yaā Dios. <sup>13</sup> Te jeē ndúu i sēhe Yaā Dios, nasúu jín modo jeē cácacu ñayuu ini ñayiví, ní nasúu síquí jeē cácuni tēe, chí máá Yaā Dios sáha ya jeē ndúu i sēhe ya.

<sup>14</sup> Te máá Yaā cúu Jnúhun Yaā Dios ní nduu ya tēe, te ní condee yá jín yó. Te ní cajito yó jéé yóhoyo luu cújéhu ya, chí máñúhún-ni ya cúu Sēhe Tátá yá, Yaā cújéhu súcuán. Te máni máá jéé sáha ya jeē váha yóhó, te máni máá jnúhun ndaā cáhán yá. <sup>15</sup> Te Juan ní nacani de jnúhun ya, te ní cahán de:

Yaā yáha cúu jeē ní cahán rí náa áchí rí jeē Yaā quiji chí cújéhu ga yá vésú ruhú, chí je iyó yá nde ná tu cacu rí, áchí de.

<sup>16</sup> Te ndihi yó ní canihín yó cuehē ndasí jeē váha íyó núu yá, chí máni jeē váha sáha sáha ya jín yó. <sup>17</sup> Moisés ní steén de ley Yaā Dios nuú ñayuu jenahán, te Jesucristo chí sáha ya jeē váha yóhó te steén yá táca jnúhun ndaā Yaā Dios nuú yó. <sup>18</sup> Tú ní iin ñayuu ní jito cuiti nuú Yaā Dios. Te máñúhún-ni Sēhe ya jeē ndeé yá jín Tátá yá, suu ya ní steén nuú yó ndese Yaā cúu Yaā Dios.

*Jnúhun Jesús jeē ní cahán Juan tēe scuándute*

(Mt. 3.11-12; Mr. 1.7-8; Lc. 3.15-17)

<sup>19</sup> Te ñayuu hebreo ñuu Jerusalén, ní catajic i jecu sutú jín tēe grupo levita jeē cájicniñú ini templo, ní jengoo de nuú Juan, návaha cajnúhún de ndé iin cúu Juan te na jniñú ndíso de. <sup>20</sup> Te Juan cájic ní cachí de:

Nasúu rúhú cúu Cristo, achí de.

<sup>21</sup> Te ní cacajnúhún tucu de:

Núu súcuán ¿te ndé iin cúu ró? ¿A cúu ró Elías, tēe ní nacani jnúhun Yaā Dios nde jenahán, chí naún?

Te ní cahán Juan:

Nasúu de cúu rí.

Te ní cacajnúhún tucu de:

Núu súcuán ¿te á cúu ró tēe nacani jnúhun Yaā Dios jeē achí tutu i jeē quiji?

Tuú, áchí tucu Juan.

<sup>22</sup> Te ní cacahán tucu jín de:

¿Te ndé iin cúu ró núu súcuán? Cachí nuú rí jijnáhan rí, chí jini ñúhún castúhun rí nuú táca tēe ní catajic rúhú vējicoo rí. Cachí na jniñú ndíso ró ví.

<sup>23</sup> Te ní cahán Juan:

Máá rí cúu tēe jeē ní cahán Isaías, tēe ní nacani jnúhun Yaā Dios nde jenahán, jeē quiji rí cana jee rí nde nuú ñuhun téhé. Te cahán rí jín ñayuu jeē na sátúhva i máá i, chí quiji máá Jítoho yó. Achí Juan.

<sup>24</sup> Te tēe grupo fariseo cácuu jeē ní catajic tēe ní quijicoo ún. <sup>25</sup> Te ní cacajnúhún de Juan:

Núu súcuán ¿te naun scuándute ró te núu nasúu Cristo ní Elías ní máá tēe quiji nacani jnúhun Yaā Dios cúu ró?

<sup>26</sup> Te ní cahán Juan:

Ruhú chí jín ndute scuándute rí. Te méhú ró jijnáhan ró íne iin Yaā jeē tu cájini ró. <sup>27</sup> Te Yaā un cúu jeē ní cahán rí jeē quiji ya te cújéhu ga yá vésú ruhú. Chí tú na vé jéhu cuiti cúu rí nuú yá, ní jeē cuajniñú rí nuú yá vésú iin jniñú lúli gá nájnúhun jeē ndají rí correa ndijén yá. Achí de.

<sup>28</sup> Súcuán ní cuu jeē ní candajnúhún de jín Juan nde Betábara jeé íne ichi núu cáne niándii yúte Jordán, nuú scuándute Juan.

*Siquí jeē cúu ya Londe Yaā Dios*

<sup>29</sup> Te inga quiví un ní jito Juan nuú Jesús jeé véji ya nuú de. Te ní cahán de jín ñayuu:

Condēhe jijnáhan ró, chí yáha véji Yaā cúu Londe jeé ní tají Yaā Dios, te cuu yá jeé sándoo ya cuēchi ñayuu ñayiví. <sup>30</sup> Yaā yáha cúu jeé ní cahán rí jeé quiji iin Yaā cújéhu ndasí, chí je íyó yá nde ná tu cacu rí. <sup>31</sup> Te nde saá te tu ní jini rí jeé yáha cúu Yaā ní tají Yaā Dios. Te ní quiji rí jeé scuándute rí ñayuu ñuu yó Israel jín ndute, návaha steén rí nuú i jeé suu ya cúu, áchí Juan.

<sup>32</sup> Te suni ní cahán gá de jnúhun ya:

Ni jito ri Espíritu Santo, ni cuun ya ichi ándiví, cáa ya nájñuhun paloma, te ni quee ya xiní Jesús. <sup>33</sup> Te nde saá te ná tu cuni rí jeé Jesús cúu. Te máá Yaa Dios jeé ní taji yá ruhū jeé scuándute ri jín ndute, ni cahān yā jín rí: Núu ni jito rō jéé cúun Espíritu Santo te quendōo xiní ñn tēe, yūcuan cúu Yaa jeé cuáha Espíritu Santo condee ñni anuá ñayuu, achí Yaa Dios. <sup>34</sup> Te je ni jito ri ún, te nācani cáji rí jñuhun jeé maá yá cúu Sēhe Yaa Dios. Achí Juan.

*Uū tēe jeé ní cana ya xihna gā*

<sup>35</sup> Te inga quiví ún te Juan ñne tucu de yūcuan jín úu tēe cájica jín de. <sup>36</sup> Te ni jito de nuū Jesús jeé jica ya yūcuán. Te ni cahān de:

Condēhe jínáhan ró, chí yūcuan cúu Yaa cúu Londe jeé ní taji Yaa Dios.

<sup>37</sup> Te ndindúú tēe cájica jín Juan ni cajini sōho de jñuhun yáha, te ni candiquín de Jesús. <sup>38</sup> Te ni ndió cóto Jesús, te ni jito ya jeé candiquín de yata yā. Te ni cahān yā jín de:

¿Na vé cánanducú ró?

Te ni cacahān de jín yá:

Maestro, ¿ndé nuū ndéé ní?

<sup>39</sup> Te ni cahān yā jín de:

Quíngoo yó te cuni rō.

Te ni jengoo de, te ni cajito de nuū ndeé yá. Te ni caquendōo de jín yá quiví ún, chí nájñuhun cacuñ jehíni cúu.

<sup>40</sup> Te Andrés, ñani Simón Pedro, cúu ñn jeé ndindúú tēe un jéé ní cajini sōho jñuhun ni cahān Juan, te ni candiquín Jesús. <sup>41</sup> Te Andrés, yachí ni jenanducú de ñani de Simón, te ni cahān de jín:

Ni caquijnáhan ri jín Mesías, achí de. Te jñuhun un cúní cahān Cristo, Yaa ní taji Yaa Dios.

<sup>42</sup> Yūcuán na te cuanuhun de nuū Jesús jín Simón. Te nuū ní jito Jesús nuū Simón, te ni cahān yā:

Máá ró cúu Simón sēhe Jonás. Te nde vijna te conaní ró Cefas, achí yá. Te jñuhun un cúní cahān Pedro, jeé cuni cahān yuū.

*Jeé ní cana ya Felipe jín Natanael*

<sup>43</sup> Te inga quiví un cúní Jesús quihñ yā región Galilea. Te ni nihñ jnāhan ya jín Felipe, te ni cahān yā jín de:

Condiquín ruhū na quihñ yō.

<sup>44</sup> Te Felipe cúu tēe ñnu Betsaida, jeé cúu ñnu Andrés jín Pedro. <sup>45</sup> Te ni jenanducú de Natanael, te ni cahān de jín:

Ni canihñ jnāhan ri jín Yaa jeé yosó jñuhun ya nuū tútu ley jeé ní tee Moisés, jín núu tútu ni catee tēe ni canacani jñuhun Yaa Dios nde jenahán. Te Jesús sēhe José ñnu Nazaret cúu ya. Achí de.

<sup>46</sup> Te ni cahān Natanael jín de:

¿Te ndese cúu cujéñnu ñn tēe jeé ní cacu ñnu ndahú Nazaret?

Te ni cahān Felipe:

Quihñ yō de cuni rō, achí de.

<sup>47</sup> Te ní jito Jesús jeé véji Natanael, te ni cahān yā:

Yáha véji ñn tēe ndaá jeé cúu ndije yucūn Israel, chí tu stáhú cuiti de, achí yá.

<sup>48</sup> Te ni cahān Natanael jín yá:

¿Ndese jíní ní sáña?

Te ni cahān Jesús:

Je ni jito ri rohó ndé ná tu cana Felipe xiní rō, ná ñne ró jéhē nundéhe higo, achí yá.

<sup>49</sup> Yūcuán na te ni cahān Natanael jín yá: Maestro, máá ní cúu Sēhe Yaa Dios, máá ní cúu Rey ñnu yō Israel, achí de.

<sup>50</sup> Te ni cahān Jesús:

¿A máá jéé ní cahān rí jeé ní jito ri rohó ná ñne ró jéhē nundéhe higo, te jeé yūcuan cándije ró ruhū naún? Tuú chí coo jñiñu jéñnu ga coto ró vésú jeé yáha, achí yá jín de.

<sup>51</sup> Te ni cahān gā yā:

Jendaá cahān rí jín rō jijnáhan ró jéé nde vijna te coto ró jéé núne andiví, te táca ndajéhé Yaa Dios cánda cánuu nuū ruhū, Yaa ní nduu tēe, achí yá.

*Jeé ní jéhēn yā ñn vico nándāha ñnu Caná*

## 2

<sup>1</sup> Te ni yáha uní quiví, te ni íyo ñn vico nándāha ñnu Caná ndañū Galilea. Te yūcuan ñne náná Jesús. <sup>2</sup> Te suni ni cacana i Jesús jín tēe cáscuáha jín yá, ni jehēn yā vico un jín de. <sup>3</sup> Te ni ndoco vino. Te náná Jesús ni cahān ña jín yá:

Ni ndoco vino i, achí ña.

<sup>4</sup> Te ni cahān Jesús jín ña:

¿Naun cáhān ní súcuan jín ná náná? Chí ná tu quee quiví jeé sáha ná jñiñu jéñnu, achí yá.

<sup>5</sup> Te náná yā chí ni cahān ña jín ñayuu cájeni cohó:

Sáha ró jijnáhan ró táca jéé cahān yā jín ró. Achí ña.

<sup>6</sup> Te yūcuan íyo ññu tenéjā yuū jeé ññuhun ndute cájichi ñayuu hebreo jeé ndúndoo i nuū Yaa Dios. Te ñn ñn tenéjā un cánda cuhun cuñ xico chí ciento litro ndute. <sup>7</sup> Te ni cahān Jesús jín ñayuu cájeni cohó:

Scútú ndā rō táca tenéjā yáha.

Te ni cascútú ndā i. <sup>8</sup> Te ni cahān yā jín i:

Vijna te quēen ró jecu te quindeca ró coto ndee tēe ndíto vico, achí yá.

Te ni cajendeca i nuū de. <sup>9</sup> Te ni séyuhú de ndute jeé ní nduu vino, te tu jíní de ndé ní canihñ i. Chí máni mozo un cúu jeé cájini, chí máá i ni caquēen ndute ún. Yūcuán na te tēe ndíto vico ní cana de tēe nándāha. <sup>10</sup> Te ni cahān de jín:

Táca ñayuu chí xihna gā vino váha cájēhe i, te núu je ni cajihñ váha ñayuu cáhñ vico, yūcuán na te jēhe de vino ndahú na. Te máá ró tucu ni sáha ró, chí nde jeé sándihí te jēhe ró vino jeé yóhyo váha ga jhí, achí de.

<sup>11</sup> Jniñu yáha jéé ni sáha Jesús ini ñuu Caná ndañúú Galilea cúu jniñu jéhu xihna ñúhún jéé ni sáha ya jeé steén yá poder yá. Te súcuan ni steén yá jeé yóhoyo cújéhu ya. Te tēe cáscuáha jíin yá ni cacandíje de ya.

<sup>12</sup> Te ná ni yáha jniñu yáha, te cuahán yá ñuu Capernaum jíin náná yá jíin táca ñani yá jíin tēe cáscuáha jíin yá. Te ni coyūcu yá yūcuán jecu quiví.

*Jeé ní quenehen ya ñayuu ini templo*

(Mt. 21.12-13; Mr. 11.15-18; Lc. 19.45-46)

<sup>13</sup> Te jeé cuácuyajni vico pascua casáha jnánhan ñuu yá hebreo, te cuahán yá ñuu Jerusalén. <sup>14</sup> Te ini templo cáhnu ni jito ya ñayuu cáxicó stiquí jíin lanchi jíin paloma, jíin ñayuu castáyí xúhun, cáyūcú i nuú mesa i. <sup>15</sup> Te jeé súcuan ni jito ya, te ni sáha ya ñin cuarta ñi. Te ni scúnu ya táca i ini templo, nde jíin lanchi jíin stiquí. Te ni jete yá xúhun ñayuu castáyí. Te ni scotúú yá táca mesa i. <sup>16</sup> Te ni cahán yá jíin ñayuu cáxicó paloma:

Tava táca quiti yáha. Te ma sáha ró yáhu ini vehe Tátá rí. Achí yá.

<sup>17</sup> Yūcuán na te tēe cáscuáha jíin yá, ni canucūhun ni de jnūhun yósó nuú tútu i: Je yajni cuu na jéé yóhoyo ndáñví ni na síquí vehe ní, achí yá jíin Tátá yá, achí tutu.

<sup>18</sup> Te tēe ñuu yá hebreo ni cacajñúhún de ya:

¿Na jniñu jéhu sáha ró jéé steén ró poder ró, te cucáhnu ni rí jeé ndiso jniñu ró sáha ró súcuan? achí de jíin yá.

<sup>19</sup> Te ni cahán yatá Jesús:

Canu ró templo yáha, te nuú uní quiví te nuondichi sáha rí, achí yá.

<sup>20</sup> Yūcuán na te ni cacahán tēe hebreo un:

Uú xico iñu cuiyá te ni jínu ni cuváha templo yáha. Te róhó, ¿á nuú uní-ni quiví te nuondichi sáha ró naún? Achí de.

<sup>21</sup> Te templo jeé cahán Jesús cúu máa yiqui cúnu yá, chí cahni ñayuu yá te natecu yá nuú uní quiví. <sup>22</sup> Jeé yúcuán cúu jeé ná ni natecu yá jeé ni jíhí yá, te tēe cáscuáha jíin yá ni canucūhun ni de jeé ni cahán yá jnūhun yáha. Te ni cacandíje de jnūhun jeé yósó nuú tútu i, jíin jnūhun yáha jéé ni cahán Jesús.

*Jeé jíni Jesús ndese cáa ini anuá ñayuu*

<sup>23</sup> Te ná ine Jesús ñuu Jerusalén máa vico pascua, te cuehē ñayuu ni cacandíje i jeé cúu ya Cristo, chí ni cajito i táca jniñu jéhu sáha ya jeé steén yá poder yá. <sup>24</sup> Te máa Jesús chí tu ní jétáhú yá i, chí je jíni yá ndese cáa ini anuá i jíjnánhan i. <sup>25</sup> Te tu jíni ñúhún yá jeé cáchi ni ñin ñayuu nuú yá ndese íyó táca ñayuu, chí máa yá je jíni yá ndese cáa ini anuá i.

*Jeé ní candajñúhún Jesús jíin Nicodemo*

### 3

<sup>1</sup> Te ni íyo ñin tēe grupo fariseo, naní de Nicodemo, te cújéhu de nuú ñayuu ñuu de

hebreo. <sup>2</sup> Tēe yáha ní quiji de nuú Jesús ñin jecuáa, te ni cahán de jíin yá:

Maestro, je cájini na jéé maá Yaá Dios ni tají yá nihín jéé steén ni jnūhun ya nuú na jíjnánhan ná. Chí núu tu íyó Yaá Dios jíin ní, te ma cúu sáha ní ni ñin jniñu jéhu nájñúhun sáha máa ní jeé steén ni poder ní, achí de.

<sup>3</sup> Te ni cahán Jesús:

Jendaá cahán rí jíin ró jeé núu tu nacacu jeé ñin ñayuu, te ma cúu quiví i ndaha Yaá Dios jeé ndacu ya jniñu nuú i, achí yá jíin de.

<sup>4</sup> Te ni cahán Nicodemo jíin yá:

¿Te ndese cuu nacacu ñin tēe te núu je ni jéhu de? ¿A cuu nucūhun tucu de chíjé náná de te nacacu tucu de? achí de.

<sup>5</sup> Te ni cahán Jesús:

Jendaá cahán rí jíin ró jeé núu tú nacacu ñin ñayuu, te ma cúu quiví i ndaha Yaá Dios jeé ndacu ya jniñu nuú i. Te jeé nácacu i cúu jeé ndúndoo cuēchi i nájñúhun jíin ndute, te condee Espiritu Santo ini anuá i. <sup>6</sup> Jeé cácu sáha ñayuu, chí sēhe ñayuu cúu. Te jeé cácu sáha Espiritu yá, chí sēhe ya cúu. <sup>7</sup> Ma náa ní ró caní ní ró ndese cúu jnūhun ni cahán rí jíin ró jeé cánuú jéé nacacu jeé ró jíjnánhan ró. <sup>8</sup> Te tachí chí quēe cuahán ndé-ni cúu nuú cuní maá, te jíni sóho ró jéé cáyu, te tu jíni ró ndé nuú véji ní ndé nuú quihín. Te suni súcuan cúu táca ñayuu jeé nácacu sáha Espiritu, chí tu jíni ró ndese sáha ya jniñu ún, achí yá.

<sup>9</sup> Te ni cahán tucu Nicodemo:

¿Ndesé ga cúu núu súcuan?

<sup>10</sup> Te ni cahán Jesús:

Máa ró cúu ñin maestro jeé cújéhu nuú ñayuu ñuu yó Israel, te ¿á tu jécūhun ní ró jnūhun yáha naún? <sup>11</sup> Jendaá cahán rí jíin ró jeé jnūhun cájécūhun ní rí cúu jeé cácahán rí jíin ró. Te cáncani cájé rí jnūhun jniñu ní cajito rí. Te tu cacandíje ró jnūhun cácahán rí. <sup>12</sup> Chí ni cahán rí jnūhun ndese sáha Yaá Dios ini ñayví, te tu cacandíje ró. Núu súcuan ¿te ndese candíje ró núu cahán rí jnūhun táca ndese sáha ya nde andiví?

<sup>13</sup> Chí ni ñin tu ní cáa andiví jeé cúni ndese íyó yúcuán, chí máñúhún-ni ruhú, Yaá ní nduu tēe. Chí andiví ndéé rí, te ni cuun rí véji rí. <sup>14</sup> Te nájñúhun ní cata caa Moisés ñin coó cáa nuú ñin yujnu, ná ní cajica ñayuu nuú ñúhun téhé, suni súcuan máa rí, Yaá ní nduu tēe, cánuú jéé cóndita caa rí jicá cruz. <sup>15</sup> Te súcuan cánuú náváha táca ñayuu jeé candíje i jeé jnáma rí i, ma jnahnú ndetú i, chí sa suhva cotecu i ní cáni andiví.

*Yóhoyo ni cundáhú ní yá ñayuu ñayví*

<sup>16</sup> Chí Yaá Dios yóhoyo ni cundáhú ní yá ñayuu ñayví. Jeé yúcuán ní tají yá Sēhe ya ní quiji, vēsú mañúhún-ni ya íyó, náváha táca ñayuu jeé candíje i jeé jnáma ya i, ma jnahnú ndetú, chí sa suhva cotecu i ní cáni andiví. <sup>17</sup> Chí tu ní tají Yaá Dios Sēhe ya ini ñayví



jeé snahnú ndetú yá ñayuu, chi sa suhva jeé jnáma ya ñayuu.

<sup>18</sup> Ñayuu jeé candije i jeé jnáma ya i, ma jnahnú ndetú i. Te ñayuu tu cándije, je ni jnahnú ndetú i, chi tu ni cándije i máá Séhe Yaá Dios, te máá ñin-ñi ya iyó. <sup>19</sup> Máá Yaá jeé stíndéé ini anuá ñayuu, je ni quee ya ini ñayiví. Te cánujnahán gá ni ñayuu caca i nájnúhun nuú néé vesú nuú luz yá, chi jniñú cásáha i cúu jniñú néé. Jeé yúcuán cúu jeé jnahnú ndetú ñayuu tu cándije ún. <sup>20</sup> Chi táca ñayuu casáha jniñú néé, tu núnjnahán cuíti ni i luz yá. Te tu jéhe i jnúhun jeé stíndéé yá ini anuá i, chi tu cúni i jeé natúu jniñú néé cásáha i. <sup>21</sup> Te ñayuu jeé cájica jíin jniñú ndaa, jéhe i jnúhun jeé stíndéé yá ini anuá i, náváha natúu ndíjin jeé táca jniñú cásáha i cúu jniñú cúni Yaá Dios. Achí yá jíin de.

#### *Jeé ni cáhán tucu Juan jnúhun Jesús*

<sup>22</sup> Yúcuán na te Jesús jíin téé cáscuáha jíin yá, cuahán yá región Judea. Te ni condee yá yúcuán jecu tiempo jíin de, te cáscuándute de ñayuu. <sup>23</sup> Te suni scúándute Juan, íne de lugar jeé naní Enón yajni ñuu Salim, chi yúcuán iyó cuéhé ndute. Te ni quijicoo ñayuu nuú de, te ni scúándute de i. <sup>24</sup> Súcuán ni sáha Juan nde ná tu quívi de vecáa.

<sup>25</sup> Yúcuán na te sava téé cáscuáha jíin Juan yóhoyo ni cacahán de jíin sava jnáhan de hebreo siquí núu ndé ñin cúu modo váha ga jeé cúchi ñayuu ndundoo i nuú Yaá Dios. <sup>26</sup> Te ni queeco de nuú Juan, te ni cacahán de:

Maestro, téé ní ine jíin ní yúte Jordán ichi núu cáne niándii, jeé ní nacani ní jnúhun de nuú ná, vijna te scúándute máá de, te ndivii ñayuu cuangoó i nuú de.

<sup>27</sup> Te ni cahán Juan:

Ni ñin téé ma cúu sáha de jniñú Yaá Dios te núu ma tejniñú ya de. <sup>28</sup> Máá ró jijnáhan ró chí ni cajini sóho ró jeé ni cáhán cají rí jeé násúu máá rí cúu Cristo, chi cúu rí ñin jeé ní tají Yaá Dios jeé cósnúu nacani jnúhun jeé quíji ya. <sup>29</sup> Te núu cásáha vico quíjnáhan, te máá yíi cúu jeé ndéca ñasíhí. Te amigo yíi un íne jíin de, te jíni sóho jnúhun cáhán de. Te yóhoyo cúsi ní jíni sóho jnúhun cáhán yíi ún. Te suni súcuán ruhú, chí cúu rí nájnúhun amigo yíi, chí ní quee maá Cristo, te yóhoyo cúsi ní rí jíni sóho rí jnúhun cáhán yá. <sup>30</sup> Te jíni ñúhún jeé ndujéhu ga maá yá te ndululí gá maá rí, achí Juan.

#### *Jeé ní quíji ya nde nuú sucún*

<sup>31</sup> Te Yaá jeé véji nde andiví, cújéhu ya nuú ndíhi. Chi táca jeé ní cacu ini ñayiví yáha, séhe ñayiví cúu, te máni jnúhun ñayiví cáhán. Te Yaá jeé véji ichi andiví, chí cújéhu ya nuú ndíhi ñayuu. <sup>32</sup> Te nacani ya jnúhun jeé ní jito ya jíin jeé ní jíni sóho ya. Te ñayuu chí tu cándije i jnúhun cáhán yá. <sup>33</sup> Te núu ñin ñayuu candije i jnúhun cáhán yá, suu cúu jeé jejnúhún i jeé Yaá ndaa cúu Yaá Dios. <sup>34</sup> Chi

Yaá ní tají Yaá Dios véji, máni máá jnúhun Yaá Dios cahán yá. Chi Yaá Dios tu yícuáha jéhe ya Espíritu yá nuú Yaá ní tají yá. <sup>35</sup> Máá yá jeé cúu ya Tatá, yóhoyo maní yá jíin Séhe ya, te ndivii ni jéhe ya ndaha Séhe ya jeé ndacu ya jniñú nuú. <sup>36</sup> Nayuu jeé candije máá Séhe ya jeé jnáma ya i, cotecu i ní cáni andiví. Te ñayuu tu cúni candije Séhe ya, ma cótecu i ní cáni andiví, chí sa suhva cuáha Yaá Dios castigo jeé ndoho i ní cáni.

#### *Jeé ni cáhán Jesús jíin ñahan ñúu Samaria*

## 4

<sup>1</sup> Te téé grupo fariseo, ni canihín de jnúhun jeé iyó cuéhé gá téé cáscuáha jíin Jesús vesú jíin Juan, jíin jeé cuéhé gá ñayuu scúándute ya vesú Juan. <sup>2</sup> Te nasúu jeé scúándute máá yá, chí téé cáscuáha jíin yá cúu jeé cascuándute. <sup>3</sup> Te ná ni jíni Jesús jeé súcuán ni canihín de jnúhun, te ni quenda ya región Judea, te cuanuhun yá región Galilea.

<sup>4</sup> Te ichi jeé nuhún yá chí yáha región Samaria. <sup>5</sup> Te ni jinú yá ñin ñuu región Samaria jeé naní Sicar, yajni ñuhun jeé ní jéhe Jacob nuú séhe de José nde jenanán. <sup>6</sup> Te yúcuán íne pozo jeé naní pozo Jacob. Te ni cucóo Jesús xiin pozo un, chí ní cuíta yá jeé cuahán yá ichi. Te nájnúhun cahuxí uú cúu. <sup>7</sup> Te ní quee ñin ñahan Samaria, véji ña vequihín ña ndute. Te ní cahán Jesús jíin ña: Cuáha ní ndute coho ná, áchí yá.

<sup>8</sup> Te téé cáscuáha jíin yá, chí je cuangoó de nde ñuu, cuacuaan de jeé cáji de jíin yá. <sup>9</sup> Te ñahan Samaria un ní cahán ña jíin yá:

¿Ndesé cúu jeé jíicán ní ndute nuú ná coho ní? Chí téé hebreo cúu ní, te ñahan Samaria cúu ná, áchí ña.

Súcuán ni cahán ña, chí ñayuu hebreo tu cácahán i jíin ñayuu Samaria. <sup>10</sup> Te ni cahán Jesús:

Núu jeé jíini ní ndese cúni Yaá Dios sáha ya jeé váha níhín, jíin ndé ñin cúu sáña jeé jíicán na ndute nuú ní, yúcuán na te máá ní cacán ni núu ná, te cuáha ná ndute jeé cótecu ni ní cáni sáha, áchí yá.

<sup>11</sup> Te ni cahán ña jíin yá:

Tátá, yóhoyo cúu pozo yáha, te tú na vé ndahá ní jeé táva ní ndute. Núu súcuán ¿te ndé nuú níhín ni ndute jeé cótecu na sáha? <sup>12</sup> ¿Te á cújéhu ga maá ní vesú jíi yó Jacob, chí naún? Chí máá de ní stóo de pozo yáha nuú yó. Te yáha ní cajihí máá de ndute, jíin táca séhe de, jíin quiti ndéca de. Achí ña.

<sup>13</sup> Te ni cahán Jesús:

Táca ñayuu jeé jíhi ndute yáha, chí jíichí tucu i. <sup>14</sup> Te ñayuu coho ndute jeé cuáha na núu i, chí ma jíichí cuíti gá i. Chí ndute jeé cuáha ná un, cane ini i nájnúhun ndute jeé cáne ñuhún, te sáha jeé cotecu i ní cáni, áchí yá jíin ña.

<sup>15</sup> Te máá ña tu ní jécūhun ni ña, te ni cahān ña jín yá:

Tátá, cuāha ní ndute ún coho ná, návāha ma jichí cuiṭi gā ná, ni tuá jini ñūhun quiqui-hin ná ndute pozo yáha, áchí ña.

<sup>16</sup> Te ni cahān Jesús jín ña:

Cuácana ní yii ní te quiji ní jín de, áchí yá.

<sup>17</sup> Te ni cahān ña:

Tú yii ná iyó.

Te ni cahān Jesús:

Ndaā cahān ni jée tú yii ní iyó. <sup>18</sup> Chi je ni cuu uhūn yii ní, te tēe ndéca ní vijna chi nasūú yii ní cúu de. Yāha cúu jeē ní cáhān ndaā ní, áchí yá.

<sup>19</sup> Te jeē súcuan ni cahān yā, te ni cahān ña:

Tátá, ñn tēe nācani jñūhun Yāā Dios cúu ní, jéni ní ná. <sup>20</sup> Tāca jíí na ñāyuu Samaria, yucu yáha ní cachíñūhún i Yāā Dios. Te máá ní ñāyuu hebreo, cácahān ni jée ñuu Jerusalén cúu nuū cánuú chíñūhún yó yā, achí ña.

<sup>21</sup> Te ni cahān Jesús jín ña:

Nánā, candíje ní jñūhun cáhān na, chi quee quiví jeē ni nasūú yucu yáha ni nasūú ñuu Jerusalén cúu nuū chíñūhún ní máá Yāā cúu Tátá, chi ndihi-ni lugar te cuu chíñūhún ní yá. <sup>22</sup> Máá ní ñāyuu Samaria tu cájini ní ndé ñn cúu jeē cáchiñūhún ní. Te máá ná jijnáhan ná chi cájini na ndé ñn cúu jeē cáchiñūhún ná. Chi nde nuū máá ná jijnáhan ná ñāyuu hebreo cúu nuū véji Yāā jnama ñāyuu. <sup>23</sup> Te je ni quee quiví jeē ñāyuu cáchiñūhún ndāā, vijna te chíñūhún ndije i Yāā cúu Tátá nde jíin ini jíin ánuá i. Chi máá Tátá cúni yā jeē súcuan chíñūhún ñāyuu yā. <sup>24</sup> Yāā Dios cúu Espíritu, te ñāyuu jeē cuní i chíñūhún i ya, cánuú jée chíñūhún ndije i ya jíin ini jíin ánuá i, áchí yá.

<sup>25</sup> Te ni cahān ñahan ún:

Jíní na jée quiji Mesías jeē cúu Cristo, Yāā jeē tají Yāā Dios. Te núu ni quee máá yá, te stéén cají yá tāca jñūhun nuū yó.

<sup>26</sup> Te ni cahān Jesús:

Máá ná jeē cahān jíin ní, suu ná cúu Yāā ún.

<sup>27</sup> Te sá cáhān gā yā súcuan, te ni ndecoo-ni tēe cáscuāha jíin yá. Te ni canaa ni de cájito de jeē ndájñūhun yá jíin ñahan yúcuan. Te ni ñn de tu ní cájñūhún de ya núu na vé cájñūhun yá ña chí na vé ndájñūhun yá jíin ña. <sup>28</sup> Yūcuán na te ñahan un ní stóo ña quíyí ña, te cuahān ña nde ñuu. Te ni cahān ña jíin ñāyuu ún:

<sup>29</sup> Nehen na quíngoo yó te coto ró ñn tēe jeē ní cachi ndihi tāca jée ní sáha ri. Sanaa te máá yá cúu Cristo, jeē cándetu yó quiji, áchí ña.

<sup>30</sup> Yūcuán na te ni quendacoo i ñuu ún, te cuangoo i nuū íne Jesús. <sup>31</sup> Te nde ná tu jinūcoco i, te tēe cáscuāha jíin yá ni cacahān ndahú de jíin yá:

Maestro, cají ní stāā víí, achí de.

<sup>32</sup> Te ni cahān yá jíin de:

Iyó stāā cají rí jeē tu cájini rō ndese cúu.

<sup>33</sup> Yūcuán na te tēe cáscuāha jíin yá, ni cacajñūhun jñahan de:

¿A ní quindeca ñn ñāyuu jeē ní yeji yā, chí naún? áchí de.

<sup>34</sup> Te ni cahān Jesús:

Jeē ní cachi rí jeē iyó jée cáji rí cúu jeē cúsií ní rí sáha ri jniñu cúni Yāā ní tají ruhū véji rí, jíin jée sínu ri jniñu ún. <sup>35</sup> Te cácahān rō jeē cúmaní cuñn gā yoó te tahndé trigo. Te ruhū chí cáhān rí jíin ró: Condēhe jijnáhan ró, chí ñāyuu cuehē cácuu i nájñūhun trigo jeē jé ni cuaan jeē tahndé, chí je cáhiyo túhva i candíje i ruhū. <sup>36</sup> Te tēe scándíje ñāyuu cácuu de nájñūhun tēe cájehnde trigo, te niñn de yāhu de. Te jeē cánaštútú de ñāyuu cúu jeē cótecu i níí cáni andiví. Te tēe cáscuíté núu jñūhun ri, ñnuú-ni cusíí ni de jíin tēe cástéén gā jñūhun ri. <sup>37</sup> Chi ndaā cúu jñūhun jeē cahān: ñn tēe jéte, te inga tēe náštútú, áchí. <sup>38</sup> Te suu cúu jeē ní tají rí rohó jijnáhan ró jée scándíje ró ñāyuu jeē jé ní canihñ jñūhun ya ni casáha inga tēe. Chi inga tēe je ni canacani de jñūhun nuū ñāyuu, te máá ró chí nájñūhun cánaštútú ró i cúu jeē scándíje ró i.

<sup>39</sup> Te cuehē ñāyuu Samaria jeē cáyūcú ñuu ún, ni cacandíje i Jesús jée ní jini sóho i jñūhun ni cahān ñahan ún. Chi ni cahān ña: Ni cachi ya ndihi tāca jée ní sáha ri. <sup>40</sup> Te jeē yúcuan cúu jeē ñāyuu Samaria un ní jinūcoco i nuū yā, te ni cacahān ndahú i jíin yá jee na quéndōo ya ñuu i. Te ni ndōo ya yúcuan úú quiví. <sup>41</sup> Te cuehē gā i ni cacandíje i ya jíin jñūhun cáhān máá yá. <sup>42</sup> Te ni cacahān i jíin ñahan ún:

Tuá niní jée cahān máá ró te candíje ri yā, chí je ni cajini sóho ri jñūhun cáhān máá yá. Te cájini yó jeē máá yá cúu ndije Cristo, Yāā jnama ñāyuu ñāyiví. Achí i.

*Jeē ní nasávāha ya sēhe tēe ndíso jñūnu nuū rey*

<sup>43</sup> Te nuū ni yáha uū quiví ún, te Jesús ni quenda ya Samaria, te ni quihñ tucu ya ichi cuanuhun yā región Galilea. <sup>44</sup> Chi je ni cahān máá yá jeē tēe cáncani jñūhun Yāā Dios, tu cáhiyo yíñūhún ñāyuu ñuu de jíin de, te suni súcuan ní cuu jíin máá yá. <sup>45</sup> Te ná ní najinú yá Galilea, te ñāyuu un ní cajetahú i ya, chí suni máá i ní jengoo i vico pascua ñuu Jerusalén, te ni cajito i táca jniñu ní sáha ya quiví ni iyo vico ún.

<sup>46</sup> Yūcuán na te ni jehēn tucu ya ñuu Caná ndañú Galilea, nuú ní sáha ya jeē ndúte ní nduu vino. Te ini ñuu Capernaum ní iyo ñn tēe cújéhuu jeē ndíso jniñu nuū rey. Te cúhú sēhe de. <sup>47</sup> Tēe un ní jini jñūhun de jeē ní najinú Jesús región Galilea jeē ní jéhen yā región Judea. Te ni jecondéhe de ya, te ni cahān ndahú de jíin yá jeē na quihñ yá jíin de vehe de, te nasávāha ya sēhe de, chí je yajni cuu i. <sup>48</sup> Te ni cahān Jesús jíin de:

Núu tú coto ró jniñu jéhu jeē nāā ni rō sáha, te ma candíje cuiti rō jijnáhan ró, áchí yá.

<sup>49</sup> Te tēe ndíso jniñu nuū rey, ni cahān de: Cava vāha ni ní na quíhñ yō, chí núu cucuéeé ní te cuu sēhe ná, áchí de.

<sup>50</sup> Yūcuán na te ni cahān Jesús:

Cuánuhun vehe ró, chí cotecu sēhe ró.

Te tēe un ní candíje de jñuhun ni cahān Jesús, te cuanuhun-ni de. <sup>51</sup> Te níni jíca de cuanuhun de vehe de, te ni quijicoo mozo de ni caquijnahan i de, te ni cacahān i:

Je ni nduvāha sēhe ní, áchí i.

<sup>52</sup> Te ni cajñuhún de na hora ni quejéé nduvāha i. Te ni cacahān i jíin de:

Cahñin jeē ícu ni quenda quíji i.

<sup>53</sup> Yūcuán na te máá tátá i ni sáha de cuenta jeē hora un cúu jeē ni cáhñ Jesús jíin de jeē cótecu sēhe de. Te ni candíje de jíin ní vehe de jeē cúu ya Yaā ní taji Yaā Dios.

<sup>54</sup> Yāha cúu vuelta uū jeē ni sáha Jesús jniñu jéhu jeē ni stéén yā poder yā región Galilea, jeē ní najinū yā jeē ni jéhñ yā región Judea.

*Jeē ní nasávāha ya ñin tēe catú yuhu pila Betesda*

## 5

<sup>1</sup> Yūcuán na te cuahān tucu Jesús ñuu Jerusalén, chí íyó tucu vico cásáha jnánhan ñuu yā hebreo. <sup>2</sup> Te Jerusalén íyó ñin pila ndute yajni yéhyí jeē naní yéhyí lanchi. Te yuhu hebreo naní Betesda. Te nuū íne pila un íyó úhñ corredor. <sup>3</sup> Te ini táca corredor un cácaā cuehē ñayuu cácuñ, jeē cuaá, jeē chacuá, jeē ní jíin. Te cándetu i jeē canda ndute ún. <sup>4</sup> Chí íyó quívi jeē cúun ñin ndajéhé yā ini pila un, te scánda ya ndute. Te ñayuu quívi xíhna gā ini pila un ná scánda ya ndute, te nduvāha i na-ni cuehyi ndóho i. <sup>5</sup> Te yūcuán íyó ñin tēe jeē ní cuu ocó xahūn uní cuiyā huhú de. <sup>6</sup> Te ni jito Jesús jeē catú de, te ni jini yā jeē ní cuu cuehē cuiyā huhú de. Te ni cahān yā jíin de:

¿A cuní rō nduvāha ró? áchí yá.

<sup>7</sup> Te ni cahān tēe huhú un jíin yá:

Tu níhñ na ni ñin tēe squívi sáñá ini pila hora jeē canda ndute. Chí táca jínu jeē cuní na quívi ná, te quívi-ni inga ñayuu xíhna gā. Achí de.

<sup>8</sup> Te ni cahān Jesús:

Ndocuñi te naquihin ró camilla ró te caca ró, áchí yá.

<sup>9</sup> Te tēe un ní nduvāha-ni de. Te ni naquihin de camilla de, te ni quejéé de jíca de. Te quívi ndétātu cúu quívi ún. <sup>10</sup> Yūcuán na te jnánhan de tēe hebreo un ní cacahān jíin de:

Quívi ndétātu cúu vijna. Te áchí ley jeē ma cúu condiso ró camilla ró.

<sup>11</sup> Te ni cahān tēe ni nduvāha ún:

Tēe ní nasávāha ruhū, ni cahān de jíin rí jeē náquihin rí camilla rí te caca rí, áchí de.

<sup>12</sup> Yūcuán na te ni cacajñuhún un de:

¿Ndé tēe ni cahān jíin ró jeē náquihin ró camilla ró te caca ró?

<sup>13</sup> Te tēe ni nduvāha ún, tu jíni de ndé ñin cúu jeē ní nasávāha de. Chí cáhñ cuehe ñayuu yūcuán, te Jesús je cuahān yā. <sup>14</sup> Te cúcuéeé gā te ni najnánhan Jesús jíin de ini templo cáhñu. Te ni cahān yā:

Vijna chí je ni nduvāha ró. Ma sáha ga ró cuéchi, chí núu tuú, te quíji ñin jñundóho xeñ gā siquí ró, áchí yá.

<sup>15</sup> Yūcuán na te cuahān tēe ún, te ni castühún de nuū jnánhan de hebreo un jeé Jesús cúu jeē ní nasávāha ya de. <sup>16</sup> Te siquí jeē ní sáha Jesús jniñu yáha quívi ndétátú, jeé yūcuán cúu jeé tēe hebreo un cájito xeñ de ya, te cácuni de cahni de ya. <sup>17</sup> Te ni cahān Jesús jíin de:

Máá Tátá rí chí ní cáni te nde vijna sáha ya jniñu váha, te suni súcuán ruhū sáha rí jniñu váha.

<sup>18</sup> Te siquí jeē ni cáhñ yā súcuán, te tēe hebreo un víhyá gā cácuni de cahni de ya. Chí nasūu máá ñin-ni jeē tu squícu ya jeé cahán ley siquí quívi ndétátú, chí suni jeē ni cáhñ yā jeé Tátá yá cúu Yaā Dios, te súcuán sáha inuú yá máá yá jíin Yaā Dios.

*Siquí jeē ndíso jniñu Sēhe Yaā Dios*

<sup>19</sup> Te ni cahān Jesús:

Jendaá cahán rí jíin ró jijnáhan ró: Ruhū jeé cúu Sēhe Yaā Dios, tú na vé cúu sáha rí jeé máá rí, chí máni sáha rí jeé jíto rí sáha Tátá rí. Chí táca jeé sáha Tátá rí, suni sáha ruhū jeé cúu rí Sēhe ya. <sup>20</sup> Chí máá Tátá rí, maní yā jíin ruhū jeé cúu rí Sēhe ya, te stéén yā nuū rí ndihi jeé sáha ya. Te jéhu ga jniñu stéén yā vésú jeé ní cuu vijna, jeé naa ní ró coto ró jijnáhan ró. <sup>21</sup> Te najñuhun jeé nastécu máá Tátá rí ndíyi te cotecu tucu i, suni súcuán ruhū jeé cúu rí Sēhe ya, nástécu rí ndé-ni cúu jeé cuní máá rí. <sup>22</sup> Te máá Tátá rí, tu sándaā yā siquí ni ñin ñayuu, chí ni jēhe ya jñuhun jeé sándaā máá rí siquí táca ñayuu, chí Sēhe ya cúu rí. <sup>23</sup> Te súcuán te coo yíñuhún ndihi ñayuu nuū rí, najñuhun yíñuhún i nuū Tátá rí. Te ñayuu tu íyó yíñuhún nuū rí, núu súcuán te suni tu yíñuhún i nuū máá Tátá rí jeé ní taji yá ruhū véji rí.

<sup>24</sup> Jendaá cahán rí jíin ró: Núu ñin ñayuu chuhun ni i jñuhun cáhñ rí, te candíje i jeé Yaā ndaā cúu Yaā ní taji ruhū véji rí, ñayuu ún cotecu i ní cáni andívi, te ma jnahnú ndetú i. Chí ma cúu ga i najñuhun ndíyi, chí sa suhva cotecu i ní cáni. <sup>25</sup> Jendaá cahán rí jíin ró jeé quíji quívi, te vijna je ni quejéé, jeé táca ñayuu cácu najñuhun ndíyi, cuní nahín i jñuhun cáhñ ruhū, Sēhe Yaā Dios. Te ñayuu cuatáhú, chí cotecu i ní cáni. <sup>26</sup> Chí najñuhun íyó poder máá Tátá rí jeé sáha ya jeé técu ndihí-ni, suni súcuán ni jēhe ya poder nuū ruhū jeé sáha rí jeé cotecu ndihí-ni. <sup>27</sup> Te

suní ni sáha ya jeé ndíso jniñu ri sándaā rī siquī ñayuu, chí cúu ri Yaā ní nduu tēe. <sup>28</sup> Ma náā ni rō caní ni rō siquī jñuhun cáhán rī. Chí quee quivī jeé táca ndiyi cuní sōho i jñuhun cahán rī, <sup>29</sup> te quendacoo i nuū yíndūji i. Te ndiyi jeé ní casáha jniñu váha, natecu i jeé cótecu i ní cáni. Te ndiyi jeé ní casáha jniñu néé, natecu i te quívicoo i nuū jnahnú ndetú i.

*Ndé vé cúu jeé steén jeé ní tají Yaā Dios yā*

<sup>30</sup> Tú na vé cúu sáha ri jeé maá rí. Chí nájnūhun ndácu Yaā Dios jniñu nuū rī, súcuan sándaā rī jniñu. Te ndaa sándaā rī, chí tu sáha ri jeé cuní maá rí, chí sáha ri jeé cuní maá Tátá rī, Yaā ní tají rúhū vēji rī. <sup>31</sup> Núu ruhū cahán rī jeé cúu ri Sēhe Yaā Dios, te cachi ñayuu jeé tu jéjnīñu jñuhun cáhán rī. <sup>32</sup> Te iyó inga jeé cahán jeé cúu ri Sēhe ya. Te jini rī jeé jñuhun un jéé cahán yā, chí níhín jniñu. <sup>33</sup> Máá ró ní catajī ró tēe ní cacajñuhún de Juan. Te Juan chí ndaa ní cahán de jñuhun rī. <sup>34</sup> Te vēsú súcuan te nasūu rúhū cúu jeé jini ñuhún jeé steén in tēe jeé Sēhe Yaā Dios cúu rī. Chí máá ró cúu jeé jini ñuhún návaha candíje ró te cácu ró jijnáhan ró. Jeé yúcuan ní cahán rī jeé iyó ndaa jñuhun rī jeé ní nacani Juan. <sup>35</sup> Máá Juan ní cuu de nájnūhun in lámpara jeé cayú te cúndijin, cúu jeé ní nacani de jñuhun rī. Te máá ró, jecu-ni quivī ní canujnahan ní rō jeé ní steén de nuū ró. <sup>36</sup> Te iyó jéé steén caji gá jeé cujéhnū rī vēsú jeé ní cahán Juan. Suu jniñu sáha rī, jniñu jeé ní tejñíñu Tátá rī ruhū jeé sáha rī, jniñu un steén ndije jeé maá yá ní tají rúhū vēji rī. <sup>37</sup> Te Tátá rī jeé ní tají yá ruhū vēji rī, suní maá yá cahán nuū tútu i jeé cujéhnū rī, vēsú tu ní cájni sōho cuiti ró jeé cahán yā, ní tu ní cajito ró yá. <sup>38</sup> Te tu ní cáchuhun ní rō jñuhun un jéé ní cahán Tátá rī, chí tu cácandíje ró rúhū. Yaā ní tají yá vēji. <sup>39</sup> Cánanducú vii ró táca jñuhun cáhán tutu i, chí cájeni ní rō jeé yúcuan níhín rō jñuhun jeé cótecu ró ní cáni sáha. Te jñuhun siquī maá rí cúu jeé cahán tutu ún. <sup>40</sup> Te vēsú súcuan te tu cácuni ró cuatáhú ró ruhū quívicoo ró ndaha rí návaha cotecu ró ní cáni.

<sup>41</sup> Tu chíhi rí cuenta jñuhun jeé cácahán ñayuu jeé cujéhnū rī. <sup>42</sup> Chí je jini rī ndese cándaā ánuá ró jeé tu cáhiyo maní ró jini Yaā Dios. <sup>43</sup> Ruhū vēji rí jini jniñu cuní Tátá rī, te tu cájetáhú ró ruhū. Te núu inga tēe quee de jini jniñu cuní maá de, sa tēe un yáchí cuatáhú ró de. <sup>44</sup> ¿Ndece cuu candíje ró jijnáhan ró? Chí máni cácuni ró jeé cujéhnū ró sáha jnáhan ró, te tu cánducú ró jeé cujéhnū ró sáha Yaā Dios, jeé maá in-ni ya iyó. <sup>45</sup> Ma cáni ní rō jeé cáquin rī cuéchi siquī ró nuū Tátá rī. Chí iyó in jeé cáquin cuéchi siquī ró, suu Moisés, tēe jeé cáñuhun ní rō jeé quendōo ndaa ró jini ley jeé ní tee de. <sup>46</sup> Chí núu ní cácandíje ró jéé ní tee Moisés, te suní

candíje ró rúhū nuú, chí jñuhun maá rí ní tee de. <sup>47</sup> Te núu tu cácandíje ró jñuhun rí jeé ní tee de, ¿te ndese candíje ró jñuhun cáhán maá rí núu súcuan? Achí yá jini de.

*Jeé ní scáji yā uhún mil tēe*

(Mt. 14.13-21; Mr. 6.30-44; Lc. 9.10-17)

## 6

<sup>1</sup> Yúcuán na te cuahán Jesús inga lado mar Galilea, jeé cúu mar Tiberias. <sup>2</sup> Te yōhyo cuehé ñayuu ní candiquín i ya, chí ní cajito i táca jniñu jéhnū jeé steén yá poder yá jeé ní nasávaha ya ñayuu cácuñu. <sup>3</sup> Te ní caa ya in yucu, te ní cucōo ya yúcuan jini tēe cáscuáha jini yá. <sup>4</sup> Te ní cuyajni vícoo pascua jeé cáncucuhun ní jnáhan ñuu yá hebreo jeé ní cacācu i nuū ñayuu nación Egipto. <sup>5</sup> Te ní ndacoto ya, te ní jito ya jeé vējicoo cuehé ndasí ñayuu. Te ní cahán yá jini Felipe:

¿Nde nuú cuaan yó jéé caji ñayuu yáha jijnáhan i?

<sup>6</sup> Te súcuan ní cahán yá jeé jito ndee yá de núu ndese cahán de. Chí je jini maá yá ndese sáha ya. <sup>7</sup> Te ní cahán Felipe jini yá:

Te ní ma cánda uū ciento denario staa, ní vēsú jeé caji i jecu jecu jijnáhan i, áchí de.

<sup>8</sup> Yúcuán na te ní cahán Andrés, ñani Simón Pedro, inga tēe scuáha jini yá un:

<sup>9</sup> Yáha ine in sūchi yí jéé ndíso i uhún staa cebada jini úu chácá. ¿Te ndé canda cuiti ún, chí ñayuu cuehé ndasí cúu?

<sup>10</sup> Yúcuán na te ní cahán Jesús:

Cahán jini ñayuu na cucōo i, áchí yá.

Te yúcuan cáa cuehé ite, te ní cacucōo i, te nájnūhun uhún mil tēe cúu. <sup>11</sup> Te ní quihin Jesús staa ún, te ní nacuatáhú yá nuū Yaā Dios. Te ní jēhe ya nuū tēe cáscuáha jini yá, te máá de ní casaja de nuū ñayuu ní cacucōo ún. Te suní súcuan ní sáha ya jini chácá, te ní cayejí i nasaa cácuni maá i. <sup>12</sup> Te nuú ní candutú chíji i, te ní cahán yá jini tēe cáscuáha ún:

Nastútú ró táca pedazo jeé ní ndóo, návaha tu stívi cuiti yó.

<sup>13</sup> Te ní canastútú de, te ní chítú úxí uū jica pedazo jeé ní ndóo siquī ndihuhún staa cebada un jeé tuá ní ndíhi caji ñayuu. <sup>14</sup> Te ñayuu un ní cajito i jniñu jéhnū ní sáha Jesús jeé ní steén yá poder yá. Te ní cacahán i:

Jendaá ndije jeé tēe yáha cúu jeé cahán tutu jeé quíji iní ñayiví jéé nacani jñuhun Yaā Dios. Achí i.

<sup>15</sup> Te ní jini Jesús jeé cácuni i sáfuerza i ya jeé cuu ya rey i núu. Te ní cujiyo tucu máá in-ni ya, ní caa ya cuahán yá nuú sucún gá yucu.

*Jeé ní jica jéhe yá nuū mar*

(Mt. 14.22-27; Mr. 6.45-52)

<sup>16</sup> Te nuú cuácuaa, te tēe cáscuáha jini yá ní nanuu de cuango de nde mar. <sup>17</sup> Te ní ndívicoo de ini barco, te ní cascáca de

jeē quíngoo de nde inga lado mar nde ñuu Capernaum. Te je ni cunee, te ná tu ndee Jesús nuū de. <sup>18</sup> Yūcuán na te ni jequihí ñin tachí ñihin, te sáha jeē ndóna ndute mar un. <sup>19</sup> Te jeē ní cuu nájñuhun uhūn chí íñū kilómetro cájica de jíin barco, te ni cajito de jeē jíca Jesús nuū mar, te ni cuyajni ya vēji ya nuū barco. Te ni cayūhú de. <sup>20</sup> Te máá yá ni cahān yā jíin de:

Máá rí cúu. Ma yūhu ró jíjnāhan ró.

<sup>21</sup> Te ni cacusī ni de jeē na quiví ya ini barco. Te ni sáha ya jeē yachí-ni ni jíñūcoo-ni de ñuhun íchi núu cuángoo de ún.

*Jeē cānanducú ñayuu Jesús*

<sup>22</sup> Te inga quiví ún, te ñayuu jeē ní caque-ndoo inga lado mar, ni cajini i jeē tée cáscuáha jíin yá cuangoo de jíin máñuhún-ni barco ni ine yūcuán, jíin jéē tu ní quiví Jesús quihín yā jíin de jíjnāhan de. <sup>23</sup> Te sava ga barco jeē vējicoo ichi núu Tiberias, ni quecoo yajni lugar nuū ní cayejí i staā jeē ní nacuatáhu máá Jítóho yō jehe. <sup>24</sup> Te jeē ní cajito ñayuu un jéē tuá Jesús ine ya yūcuán, ní tée cáscuáha jíin yá, te ni quivícoo i táca barco un, te cuangoo i ñuu Capernaum cuananducú i ya.

*Jesús cúu staā jeē cótecu yō ní cání*

<sup>25</sup> Te nuū ní jíñūcoo i nde inga lado mar, te ni nanihín jnāhan i jíin Jesús. Te ni cacajñuhún i ya:

Maestro, ¿na hora ní quee ní yáha?

<sup>26</sup> Te ni cahān Jesús:

Jendaá cahán rí jíin ró jeē cānanducú ró ruhū siquī jeē ní cayejí ró nde ni candutú chíjí ró, te nasūu siquī jeē ní cajito ró táca jniñū jéhu jeē steén rí poder rí. <sup>27</sup> Ma cóndihví ní ró máá siquī jeē cají ró jeē yachí nataxín, chí sa suhva condihví ní ró siquī jeē nihín ró jeē cótecu ró ní cání sáha. Te máá rí, Yāá ní nduu tée, cuāha rí nájñuhun staā jeē cótecu ró ní cání sáha. Chí Tátá rí Yāá Dios ní jeni ya ruhū jeē sáha rí súcuan. Achí yá jíin i.

<sup>28</sup> Yūcuán na te ni cacajñuhún i ya:

¿Ndeee sáha ná návāha squícu ná jniñū cúní Yāá Dios?

<sup>29</sup> Te ni cahān Jesús:

Jniñū jeē cuní Yāá Dios cúu jeē candíje ró ruhū, Yāá ní tají yá vēji.

<sup>30</sup> Yūcuán na te ni cacahān i:

Núu súcuan ¿te na jniñū jéhu sáha ní coto ná jíjnāhan ná te candíje ná jéē ní tají yá nihín? ¿Na jniñū cúu jeē sáha ní? <sup>31</sup> Chí táca jíi yō jenhán ní cayejí de maná jeē ní cuun ichi ándiví ndé nuū ñuhun téhé, nájñuhun yósó núu tútu: Yāá Dios ní jéhe ya staā ní cuun ichi ándiví, ní cayejí i, áchí tutu. Achí i jíin yá.

<sup>32</sup> Te ni cahān Jesús:

Jendaá cahán rí jíin ró: Nasūú Moisés ní jéhe staā un núu de jíjnāhan de jeē ní cuun ichi ándiví, chí máá Tátá rí ni jéhe. Te máá

yá jéhe staā ándiví jéē cótecu ró ní cání sáha. <sup>33</sup> Chí staā jéhe Yāá Dios cúu máá Yāá ní quiji ichi ándiví, te sáha ya jeē ñayuu ñayiví cotecu i ní cání ándiví. Achí yá.

<sup>34</sup> Te ni cacahān i jíin yá:

Níní cuāha ní staā ún cají na núu súcuan.

<sup>35</sup> Te ni cahān Jesús:

Máá rí cúu máá staā jeē cótecu ró ní cání sáha. Ndé vé quiví ndaha rí, ma cúu cuiti gā sōco. Te ndé vé candíje ruhū, ma jíchí cuiti gā. <sup>36</sup> Te nájñuhun je ni cahān rí jíin ró, tu cáccandíje ró ruhū, vesú ní cajito ró núu rí. <sup>37</sup> Táca ñayuu jeē sáha Tátá rí jeē candíje i ruhū, máá i quivícoo ndaha rí. Te jétáhu rí táca jéē cuní quiví ndaha rí, chí ma squéhichí cuiti rí quihín. <sup>38</sup> Chí ni quiji rí ichi ándiví návāha sáha rí jniñū jeē cuní Yāá ní tají ruhū, te nasūu jéē sáha rí jeē cuní máá rí. <sup>39</sup> Te jniñū jeē cuní Tátá rí, Yāá ní tají ruhū, cúu jeē ma scuíta rí ní ñin ñayuu ní jéhe ya nuū rí, chí condito rí i te nastécu rí i quiví jínu ñayiví. <sup>40</sup> Te Yāá ní tají ruhū, cuní yá jeē táca ñayuu jeē nihín i jñuhun ruhū, Sēhe Yāá Dios, te candíje i ruhū, cotecu i ní cání ándiví. Chí nastécu rí i quiví jínu ñayiví. Achí yá.

<sup>41</sup> Yūcuán na te ni caquejéē jnāhan ñuu yā hebreo cácahan de siquī yá, chí ni cahān yā jeē máá yá cúu staā ní quiji ichi ándiví. <sup>42</sup> Te ni cacahān de:

¿A násūu téee yáha cúu Jesús, sēhe José? Te cájini yō tatá de náná de. ¿Te ndese cúu jeē cahān de jeē ní quiji de ichi ándiví núu súcuan?

<sup>43</sup> Te ni cahān Jesús jíin de:

Ma cahán ró siquī rí jíjnāhan ró. <sup>44</sup> Ní ñin ñayuu ma cúu quiví i ndaha rí núu ma sáha Tátá rí jeē cúu ní i quiví i, chí máá yá ní tají ruhū vēji rí. Te nastécu rí i quiví jínu ñayiví. <sup>45</sup> Te suhva yósó núu tútu ní catee téee ní canacani jñuhun Yāá Dios: Táca i chí steén Yāá Dios nuū i, áchí. Núu súcuan te táca ñayuu jíni sōho jñuhun cáhán Tátá rí, te jétáhu i jeē steén yá nuū i, ñayuu ún chí quivícoo i ndaha rí.

<sup>46</sup> Te tu ní jito ní ñin ñayuu nuū máá Tátá rí. Chí máñuhún-ni ruhū ní jito rí nuū yá, chí nde nuū máá yá vēji rí. <sup>47</sup> Jendaá cahán rí jíin ró jíjnāhan ró jéē ñayuu jeē candíje i jeē jnáma rí i, máá i cotecu i ní cání. <sup>48</sup> Máá rí cúu staā jeē cótecu ró ní cání sáha. <sup>49</sup> Táca jíi ró jenhán, ní cayejí de staā maná jeē ní cuun ichi ándiví ndé nuū ñuhun téhé, te tu ní sáha jeē cótecu de nuū cání ándiví. <sup>50</sup> Te staā jeē cahán rí jeē vēji ichi ándiví, chí na-ni ñayuu cají, te cotecu i ní cání ándiví. <sup>51</sup> Te suu máá rí cúu staā un jéē ní quiji ichi ándiví jéē sáha jeē cótecu ró ní cání. Te ñayuu jeē cájica staā yáha, cotecu i ní cání ándiví. Te staā jeē cuāha rí un cúu yiqui cúñu rí, te cuāha rí návāha ñayuu ñayiví cotecu i ní cání ándiví. Achí yá.

<sup>52</sup> Yūcuán na te jnāhan ñuu yā hebreo ni cacahān de jín táca jnāhan de:

¿Ndese cuu cuāha tēe yāha yiqui cúñu de caji yō? achí de.

<sup>53</sup> Te ni cahān Jesús jín de:

Jendaá cahān rī jín rō: Núu tú candíje rō jēe yiqui cúñu ruhū. Yāā ní nduu tēe, cúu nájñūhun staā, te niñi rī cúu nájñūhun ndute,

núu súcuan te ma cótecu rō ní cāni ándiví. <sup>54</sup> Chi ñayuu cácandíje jeē yiqui cúñu rī cúu nájñūhun staā te niñi rī cúu nájñūhun ndute,

máá i cotecu i ní cāni. Te nastécu rī i quiví jñu ñayiví. <sup>55</sup> Chi yiqui cúñu rī jín niñi rī cúu ndíje jeē sáha jeē cótecu i ní cāni. <sup>56</sup> Te ñayuu cácandíje jeē yiqui cúñu rī jín niñi rī

cúu nájñūhun staā jín ndute jeē cótecu i ní cāni sáha, máá i ní ní ndúú i jín rí, te ndúú rí jín i. <sup>57</sup> Máá Tátá rī, Yāā técu, ni tají yá ruhū vēji rí, te técu rī sáha máá yá. Te suni súcuan, ñayuu cácandíje jeē cúu rī nájñūhun

staā i ndute i, suni súcuan cotecu i ní cāni sáha rí. <sup>58</sup> Máá rí cúu staā ní quiji ichi ándiví. Te staā jeē cahān rī túu nájñūhun staā maná jeē ní cayejí táca jín rō jenhán, chi tu ní sáha jeē cótecu de ní cāni. Te staā jeē

cahān rī, chi ñayuu caji, cotecu i ní cāni sáha, achí yá. <sup>59</sup> Táca jñūhun yáha ní steén Jesús nuū ñayuu ní candutútú ini vehe i sinagoga ñuu Capernaum.

#### *Jñūhun cotecu yō ní cāni*

<sup>60</sup> Te cuehē ñayuu cascuáha jín yá, ni cajini sōho i jñūhun yáha jēe ní steén yā. Te ni cacahān máá i:

Yōhoyo yí jñūhun cáhān yā yāhá. ¿Ndese cuu cuatáhú yō?

<sup>61</sup> Te ni jini Jesús jeē cácahān i jeē yí cúu jñūhun yāhá, te ni cahān yā jín i:

¿A yí sáha jñūhun yáha jín rō jijnáhan rō? <sup>62</sup> ¿Te ndese sáha rō núu coto rō jēe ruhū, Yāā ní nduu tēe, ndaa rí nuhun rí nuū ni cóndee rí Xihna ñúhún? <sup>63</sup> Máá ánuá ñayuu cúu jeē sáha jeē técu i. Chi yiqui cúñu i tu jéjñūñu

cuítí súcuan. Te táca jñūhun ni cahān rī jín rō cúu jeē quéndōo vāha ánuá rō, te cotecu rō ní cāni sáha. <sup>64</sup> Te sava rō chí tu cácandíje rō. Achí yá.

Chi nde xihna ñúhún je jíní Jesús ndé-ni cúu ñayuu jeē ma cándíje, jín ndé iin de cuu jēe nastúu de ya. <sup>65</sup> Te ni cahān gā yā:

Jeē yúcuan ní cahān rī jín rō jēe ma cúu quiví ni iin ñayuu ndaha rí, te núu tu sáha Tátá rí jeē cúu ni i quiví i, achí yá.

<sup>66</sup> Te nde quiví ún te cuehē ñayuu cascuáha jín yá, ni castóo i ya, te tuá ní cájica i jín yá. <sup>67</sup> Yūcuán na te ni cahān yā jín máá ndihúxí uū tēe cáscuáha jín yá:

¿A suni cácuni máá rō quingoo rō, chí naún?

<sup>68</sup> Te ni cahān Simón Pedro:

¿Ndé núu gā quingoo ná? Chi máá ní cúu jeē nácani jñūhun jeē cótecu na ní cāni sáha.

<sup>69</sup> Te ni cacandíje ná te cájini na jēe máá ní cúu Cristo, Sēhe Yāā Dios, Yāā técu, achí de.

<sup>70</sup> Te ni cahān Jesús:

Te vesú ni nacáji rí ndihúxí uū rō, te íyó iin rō jeē ní quiví jexeén ini. Achí yá.

<sup>71</sup> Te súcuan ni cahān yā siquí Judas Iscariote, sēhe Simón. Chi máá de nastúu de ya, vesú iin jnāhan jeē uxí uū tēe cáscuáha jín yá cúu de.

#### *Jeē tu ní cácandíje ñani Jesús*

## 7

<sup>1</sup> Yūcuán na te jica cuu Jesús región Galilea. Chi tu cúni yā caca cuu ya región Judea, chí jnāhan ñuu yā hebreo jeē cáyūcu yúcuan, cácuni de cahni de ya. <sup>2</sup> Te cuacuyajni vico jeē casáha ñayuu yā hebreo vehe ramadá, cáyūcú i chíji. <sup>3</sup> Te ñani yā ni cacahān de jín yá:

¿Naun máá yáha-ni íne rō? ¿Naun tú quihín rō región Judea, návāha tēe yúcuan jēe cácandíje de rōhó, suni coto de ñniñu jéñu sáha rō. <sup>4</sup> Chi núu cúni iin tēe jeē cuítí núu jñūhun de, te tu sáha yuhu de jniñu. Te núu sáha nde rō táca jniñu jéñu, vāha ga na sáha rō jēe cúni ndiví ñayuu.

<sup>5</sup> Súcuan ni cacahān ñani yā jín yá, chí ni máá de tu cácandíje de ya. <sup>6</sup> Yūcuán na te ni cahān Jesús:

Ná tu quee máá quiví jeē quihín rí. Te máá rō jijnáhan rō chí na-ni quiví-ni te cuu quingoo rō. <sup>7</sup> Chi ma quití ni ñayuu ñayiví núu rō, te máá rí chí quití ni i jito i ruhū, chí cahān rí jeē jíní rí jeē máni jniñu née casáha i. <sup>8</sup> Cuángoo máá rō vico ún. Te máá rí chí ma quihín rí vijna, chí ná tu quee máá quiví cánuú quihín rí. Achí yá.

<sup>9</sup> Súcuan ni cahān yā jñūhun yáha jín de, te ni quéndōo ya Galilea.

#### *Jeē ni jéhēn Jesús vico vehe ramadá*

<sup>10</sup> Te nuū ni yáha ñani yā cuangoo de vico ún, te sáá te suni cuahān máá yá. Te tú cuahān ndíjin yā, chí tu ní steén yā máá yá.

<sup>11</sup> Te jnāhan ñuu yā hebreo cánanducú i ya nuū vico ún, te cácahān i:

¿Ndé núu íne tēe ún? achí i.

<sup>12</sup> Te yōhoyo ni cacahān ñayuu jeē siquí yā, chí sava i cácahān: Tēe vāha cúu de. Te sava ga i cácahān: Tuú chí stáhú de ñayuu.

<sup>13</sup> Te yuhu-ni ni cacahān i jñūhun ya, chí cáyūhú i jeē quití ni jnāhan i tēe hebreo.

<sup>14</sup> Te jeē ní cuu sava vico, te ni quee Jesús, ni quiví ya templo cáhnu, te ni quejéé yá steén yā jñūhun. <sup>15</sup> Te ni canaa ni jnāhan ñuu yā hebreo cájini sōho i, te ni cacahān i:

¿Ndese jíní tēe yáha cuehē jñūhun ndichí, chí tu ní jica de escuela? achí i.

<sup>16</sup> Yūcuán na te ni cahān Jesús:

Jñuhun steén rī chi nasūu jñuhun máa rī cúu, chí jñuhun jeé ni jéhe máa Yaā ní tají rúhū cúu. <sup>17</sup> Nūu ññayuu cuní i sáha i jñiñu cuní Yaā Dios, ñayuu ún chí jecuhun ni i nūu nde nuū Yaā Dios vēji jñuhun steén rī, chí jñuhun jeé jéni ni maá-ni rī cúu. <sup>18</sup> Tēe cáhán jñuhun jéni ni maá de, tēe un ndúcú de jeé na sájéhnu ñayuu de. Te nūu ññ tēe ndúcú de jeé sajéhnu de Yaā ní tají de, tēe un cúu tēe ndaā, te tú na jñuhun stáhú íyó jíin de.

<sup>19</sup> ¿A násūu jéé ni jéhe Moisés ley yā nuū rō jeé squícu ró? Te ni ññ ró tu cásquícu. Chí sa jeé cácuni rō cahni rō ruhū, ¿te najehē cúu? Achí yá.

<sup>20</sup> Te ni cacahān ñayuu cuehē ún:

Tachí ndóhó rō. ¿Ndé ññ cuní cahni rohó?

<sup>21</sup> Te ni cahān Jesús:

Ni nasávāha rī ññ tēe quivī ndétátú, te ndivii rō ni canaa ni rō ni cajito ró jéé quivī ndétátú ni sáha rī jñiñu ún. <sup>22</sup> Te Moisés ni jéhe de ley jeé cúu circuncidar nuū rō. Te cásáha rō circuncidar sūchi yí nūu uná quivī jeé ní cacu i, vésú quivī ndétátu cúu. (Te nasūu máa Moisés ní jéquin ley un, chí je ni iyo nuū táca jíi de.) <sup>23</sup> Nūu súcuān te nūu cásáha rō circuncidar vésú quivī ndétátu cúu, návāha squícu ró ley Moisés, ¿te najehē cáquiti ni rō jeé ní nasávāha ndihi rī ññ tēe quivī ndétátú? <sup>24</sup> Ma yachí cani ni rō jeé cuéchi cúu jeé sáha rī. Chí sa cani vāha ni rō siquī táca jñiñu vāha. Achí yá.

*Jeé ní cachi Jesús ndé nuū vēji ya*

<sup>25</sup> Yūcuán na te sava ñayuu ññu Jerusalén ni cacajñuhun jñáhan i:

¿A násūu tēe yáha cúu jeé cánanducú tēe cácujeñhu jeé cáhni de, chí naún? <sup>26</sup> Te yāha cáhán ndijin de nuū chitú, te tú na jñuhun cácahān jíin de. ¿A sanaa te ni cacundaā ni tēe cácujeñhu jeé tēe yáha cúu Cristo jeé achí tutu jeé quíji, chí naún? <sup>27</sup> Te tuú chí je cájini yō nuū vēji tēe yáha. Te jeé quíji Cristo, chí ni ññ yó má cuní ndé chí quíji ya. Achí i.

<sup>28</sup> Yūcuán na te ni cahān jee Jesús jeé steén yā jñuhun ini templo:

Cájini rō ruhū, te cájini rō ndé ññu vēji rī. Te vésú súcuān te máa Yaā ndaā cúu jeé ní tají rúhū vēji rī, te tú vēji rī jeé cuní máa rī. Te tu cájini rō ndese Yaā cúu ya. <sup>29</sup> Te máa rī chí jíni rī yā, chí nde nuū máa yā vēji rī, te máa yā ní tají rúhū, achí yá.

<sup>30</sup> Yūcuán na te ni canducú de jñi de ya. Te ni ññ de tu ní cúu jñi de ya, chí ná tu quee máa quivī jeé jñi de ya. <sup>31</sup> Te cuehē ñayuu chí ni cacandíje i ya, te ni cacahān i:

¿A násūu tēe yáha cúu Cristo, Yaā ndé tu yó jeé quíji? Chí cuehē ndasí jñiñu jéhnu sáha ya jeé steén yā poder yā. Achí i.

*Jeé ní catají de policía jeé jñi de Jesús*

<sup>32</sup> Te ni cajini tēe fariseo jeé súcuān cacahān ñayuu jñuhun ya. Te máa de jíin sūtú

cácujeñhu, ni catají de policía cándito templo jeé jñi de ya. <sup>33</sup> Te ni cahān Jesús:

Jecu na quivī condee rī jíin ró jijnáhan rō. Yūcuán na te nuhun rī nuū Yaā ní tají rúhū vēji rī. <sup>34</sup> Te nanducú ró ruhū, te ma nánihin rō ruhū. Chí ma cúu jinūcoo ró nūu cóndee rī. Achí yá.

<sup>35</sup> Yūcuán na te máa tēe un ní cacajñuhun jñáhan de:

¿Te ndé nuū quihín tēe yáha jeé ma nánihin yō de? ¿A quihín de nuū jñáhan yó hebreo jeé ní cajitē nūu cáyūcu ndé nación Grecia? ¿Te á stéén de jñuhun nuū ñayuu Grecia, chí naún?

<sup>36</sup> ¿Te na jñuhun cúu jeé ní cáhán de jíin yó jeé nanducú yó de te ma nánihin yō de, chí ma cúu jinūcoo yó nūu cóndee de? Achí tēe un jíijnáhan de.

*Siquī ndute jeé cótecu yō ní cáni sáha*

<sup>37</sup> Te quivī sándihí vico ún te cúu vico cáhnu ga. Te quivī un ní ndocuññ Jesús, te ni cahān jee ya:

Nūu ndé ñayuu jnáa ndasí i táca jéé vāha jeé sáha rī jehē i, nájñuhun jeé jichí i ndute, nūu súcuān te na quiví i ndaha rī te coho i ndute, cúu jeé nihín i jeé vāha ún. <sup>38</sup> Te ñayuu jeé candíje jeé jnáma rī i, chí ini anuá i condee Espírítu Santo, te cuu ya nájñuhun yūte cáne ñuhún jeé sáha ya jeé cótecu i ní cáni, nájñuhun cáhán tutu ññ. Achí yá.

<sup>39</sup> Te súcuān ni cahān yā jeé ñayuu candíje jeé jnáma ya i, nihín i Espírítu Santo. Chí ná tu quee Espírítu ún, chí ná tu ndaa Jesús quinhun yā nuū ndujéhnu ya.

*Jeé ní cacusññ ñayuu siquī yā*

<sup>40</sup> Te sava ñayuu cuehē ún, ná ni cajini sóho i jñuhun yáha, te ni cacahān i:

Jendaá jeé tēe yáha cúu jeé achí tutu jeé quíji de nacani de jñuhun Yaā Dios, achí i.

<sup>41</sup> Te sava ga i ni cacahān:

Tēe yáha cúu Cristo, Yaā ní tají Yaā Dios.

Te sava ga i chí ni cacahān i:

Tuú chí nasúu Galilea quíji Cristo. <sup>42</sup> Chí cáhán tutu ññ jeé ndé yucūn rey David cacu Cristo, te cacu ya ññu Belén, ññu nuū ní cacu máa David. Achí i.

<sup>43</sup> Te súcuān te ni cacusññ ñayuu jeé siquí yā. <sup>44</sup> Te sava i cácuni i jñi i ya, te ni ññ i tu ní jñi i ya.

*Jeé tu ní cácandíje tēe cácujeñhu*

<sup>45</sup> Yūcuán na te policía cándito templo tu ní cájini de Jesús, te cuanungoo de nuū táca tēe fariseo jíin nuū sutú cácujeñhu. Te tēe ún ni cacajñuhún de policía:

¿Najehē tu ní quécóo ró jíin de? áchí.

<sup>46</sup> Te ni cacahān policía un:

Tú cuiti ni ññ tēe cáhán vāha ndasí nájñuhun cáhán tēe yūcuān, áchí.

<sup>47</sup> Te ni cacahān tēe fariseo:

¿Te á suni nde máa ró jijnáhan ró ní stáhú de naún? <sup>48</sup> Ni ññ jñáhan ruhū tēe cácujeñhu

jín tée fariseo, tu cá candije ri jñuhun cáhán tée ún, ¿te naun cá candije máá ró? <sup>49</sup>Te ñayuu cuéhē yāhá jēé tu cájēcūhun ni i ley Moisés, chí jñahnū ndetū i jeé cá candije i tēe ún, áchí de jínáhan de.

<sup>50</sup>Te ni cahán Nicodemo, tēe ni jéhēn nuū yā ñn jecuáá, te suni ñn tēe fariseo cúu de:

<sup>51</sup>Cáhán ley yō jeé ma cúu tee yó cuéchi siquí ñn tēe, te núu tú xihna gā cuni sōho yó ndese cáhán de, návāha cucáhu ni yō na cuéchi ni sáha de. Achí de.

<sup>52</sup>Te ni cacahán jín de:

Te róho, ¿á suni nde Galilea vēji ró jeé cahán ró jehē tēe ún? Nanducú váha ró núu tútu ñi te cuni ró jeé nde Galilea tu quēnda cuíti ni ñn tēe nácani jñuhun Yāá Dios. Achí jín de. <sup>53</sup>Te cuanungoo de ná vehe ná vehe de.

*Jñuhun ñahan ní casiquí ndéē jñáhan*

## 8

<sup>1</sup>Te ni caa Jesús cuahán yā yucu Olivos. <sup>2</sup>Te jeé cácuandijín inga quiví, te ni ndee tucu ya templo. Te ndihi ñayuu ni quecoo i nuū yā. Te ni cucōo ya, te ni steén yā jñuhun nuū ñ. <sup>3</sup>Yūcuán na te tēe cástēén tutu ley Yāá Dios jín tēe grupo fariseo, ni quecoo de jín ñn ñahan jeé ní canihín de ña jeé casiquí ndéē ña. Te ni cajeni de ña mēhñū. <sup>4</sup>Te ni cacahán de jín yá:

Maestro, ni canihín ná ñahan yáha jeé casiquí ndéē ña. <sup>5</sup>Te ley Moisés ndácu jñíñu nuū yō jeé cuáha yó yūu xiní ñahan cásaáha súcuan návāha cuu ña. Te máá ní, ¿ndese cáhán ní?

<sup>6</sup>Te súcuan ni cacahán de jeé cájito ndee de ya núu cuatáhu yá jeé cahán ley un, chí núu tuú te caquin de cuéchi siquí yā. Te Jesús ni jita ndeyi ya, te ni tee ya nuū ññuhun jín xiní ndáha ya. <sup>7</sup>Te jeé cácajnūhun cácajnūhún de ya, te ni ndonehen ya máá yá, te ni cahán yā jín de:

Núu ndé ñn máá ró tú na cuéchi ró, te xihna gā máá ró cuáha yūu xiní ña núu súcuan, áchí yá.

<sup>8</sup>Te ni jita ndeyi tucu ya, te ni tee tucu ya nuū ññuhun. <sup>9</sup>Te nuū ní cajini de jeé súcuan ni cahán yā, te ni cájēcūhun ni de jeé suni cáhīyo cuéchi de. Te ná ñn ná ñn de ni quendacoo de cuahán de, xihna gā tēe jéhu ga te nde nuū ní ndihi na. Te ni ndōo máá ñn na Jesús jín ñahan índichi mēhñū un. <sup>10</sup>Te ni ndonehen tucu ya máá yá, te tuá ní ñn tēe un ní jito ya, chí máá na ñahan ún. Te ni cahán yā jín ña:

¿Ndé chi cuángoo tēe cájequin cuéchi siquí ró? ¿A tú ni ñn de ní ndóna cahán gā cuéchi siquí ró?

<sup>11</sup>Te ni cahán ña:

Tú ni ñn de, áchí ña.

Yūcuán na te ni cahán Jesús jín ña:

Ni ruhū, ma cahán rī cuéchi siquí ró. Cuáhán te ma sáha ga ró cuéchi, áchí yá.

*Jesús cúu máá luz jeé steén ini anuá ñayuu*

<sup>12</sup>Te inga jínu ni cahán Jesús jín ñayuu:

Máá rí cúu nájnūhun luz jeé steén ini anuá ñayuu ñayiví, jeé sáha jeé jécūhun ni i siquí Yāá Dios. Ñayuu candije ruhū chí ma cáca i nájnūhun nuū née, chí sa suhva coneváha i luz ini anuá i jeé sáha jeé cótecu i ní cáni.

<sup>13</sup>Yūcuán na te ni cacahán tēe fariseo jín yá:

Róho chí cáhán ró jñuhun jehē máá ró, te tu jéjnñu jñuhun cáhán ró.

<sup>14</sup>Te ni cahán Jesús jín de jínáhan de:

Vēsú cáhán rī jehē máá rí, te iyó ndáá jñuhun cáhán rī. Chí jini rī ndé nuū vēji rī jín ndé nuū quihín rī. Te róho tu cájini ró ndé nuū vēji rī ni ndé nuū quihín rī. <sup>15</sup>Máá ró chí cuenta ñayuu ñayiví cásaáha ró siquí jñuhun cáhán rī. Te ruhū chí tu sándaá mañúhún rí siquí ni ñn ñayuu. <sup>16</sup>Te núu sándaá rí siquí i, te ndáá sáha rí, chí tu sáha mañúhún rí, chí sándaá rí nde jini máá Tátá rí, Yāá ní tají ruhū vēji rí. <sup>17</sup>Te yósó núu tútu ley cánevāha ró jeé núu ñnuú cácahán uū testigo, te jini ññuhún cuatáhu ró jeé cácahán, chí iyó ndáá jñuhun ún. <sup>18</sup>Núu súcuan te ruhū cúu ñn jeé cahán ndáá rí jehē rí. Te inga jeé cahán ndáá jehē rí cúu máá Tátá rí, Yāá ní tají ruhū. Achí yá.

<sup>19</sup>Te ni cacahán de jín yá:

¿Ndé nuū ndeé Tátá ró?

Te ni cahán Jesús:

Tu cájini ró ruhū ni Tátá rí. Te núu jeé cájini ró ruhū, suni cuni ró Tátá rí nuú.

<sup>20</sup>Tāca jñuhun yáha ní cahán Jesús jeé steén yā ini templo nuú cáyucu yéjnū jeé cáscōo i xūhún. Te tú ni ñn de ní jññ de ya, chí ná tu quee máá quiví jeé jññ de ya.

*Jeé ni cahán yā jeé ma cúu jinūcōo de nuū cóndee yā*

<sup>21</sup>Te ni cahán tucu Jesús jín de:

Ruhū chí quihín rī, te nanducú ró ruhū, te ma nánihín ró ruhū, chí quendōo cuéchi ró siquí ró quiví cúu ró. Te jeé yúcuán máa cúu jinūcōo ró núu quihín rī, achí yá.

<sup>22</sup>Yūcuán na te tēe hebreo un ní cacahán máa de:

¿A cahni tēe yáha máa de, te jeé yúcuán cáhán de jeé ma cúu jinūcōo yó núu quihín de, chí naún? Achí de.

<sup>23</sup>Te ni cahán yá:

Máá ró jijnáhan ró chí ñayiví yáha véjicoo ró, te ruhū chí nde andiví vēji rí. Máá ró cácuu ñayuu ñayiví yáha, te ruhū chí nasūu tēe ñayiví yáha cúu rí. <sup>24</sup>Jeé yúcuán ní cahán rí jeé quendōo cuéchi ró siquí ró quiví cúu ró. Chí núu ma candije ró jeé máá rí cúu Cristo, te quendōo nahín cuéchi ró siquí ró quiví cúu ró. Achí yá.

<sup>25</sup>Te ni cacajnūhún de ya:

Núu súcuan ¿te ndé ñn cúu ró?



Te ni cahān yā:

Je ni cachi ri nuū rō nde xīhna ñūhún ndé ñn cúu ri. <sup>26</sup> Te iyó cuēhe gā jñuhun cuu cahān rī jīn rō te sándaā rī siquī rō. Te ma cahān rī, chí ini ñayivi yáha cahān rī maá-ni jñuhun jeé ní jini ri ni cahān Yaā ní tají ruhū vēji rī. Te máni jñuhun ndaā cahān yā. Achí yá.

<sup>27</sup> Te tu ní cájecūhun ni de jeē cahān yā jñuhun Tátá yā andiví jīn de. <sup>28</sup> Jeē yúcuan ni cahān gā yā:

Nde na yáha jeē cáta caa rō ruhū, Yaā ní nduu tēe, jicá cruz, yūcuán na te cuni rō ndé ñn cúu ri. Te cuni rō jeē tú na vé sáha ri jeē maá rī, chí cahān rī maá-ni jñuhun ni steén Tátá rī nuū rī. <sup>29</sup> Chí maá Tátá rī, Yaā ní tají ruhū, ndéé yá jīn rī. Te tu stóo máñúhún yá ruhū, chí níni sáha ri jniñu jeē núnahan ni maá yá. Achí yá.

<sup>30</sup> Te jeē ni cahān yā jñuhun yáha, te cuēhē ñayuu ni cacandje i ya.

*Siquī ndé-ni cúu sēhe Yaā Dios jīn sēhe jexeén*

<sup>31</sup> Yūcuán na te ni cahān Jesús yā jñáhan ñuu yá hebreo jeé ní cacandje i ya:

Te núu cuiñi ñihin rō jīn jñuhun steén rī nuū rō, te cuu ndije rō ñayuu scuáha jīn rī. <sup>32</sup> Te jecūhun ni rō jñuhun ndaā, te jñuhun ndaā un sáha jeé nduu libre rō nuū jeē yáhi rō ndaha.

<sup>33</sup> Te ni cacahān i jīn yá:

Sēhe yucūn Abraham cácuu rī, te tu cáyihí cuiñi rī ndaha ni ñn. ¿Te ndese cúu jeē cahān rō jeé nduu libre rī núu súcuan?

<sup>34</sup> Te ni cahān Jesús:

Jendaá cahān rī jīn rō jeē táca ñayuu casáha cuēchi, tu iyó libre i, chí yáhi i chíji cuēchi jeē jejniñu cáha i nuū. <sup>35</sup> Te ñayuu jejniñu cáha, chí tu cúu i ñn jñáhan ñayuu vehe nuū jejniñu i. Te ñn sēhe chí sa suhva cúu ndije i jñáhan ñayuu vehe ún. <sup>36</sup> Núu súcuan te maá rī jeé cúu Sēhe Yaā Dios, núu sáha ri jeé tuá cuajniñu cáhā rō nuū cuēchi, núu súcuan te nduu libre ndije rō jñáhan rō, te cuu rō sēhe ya. <sup>37</sup> Te jini rī jeē sēhe yucūn Abraham cácuu rō, te vēsú súcuan te cácuu rō cahni rō ruhū, chí tu cájetáhú rō jñuhun cahān rī. <sup>38</sup> Ruhū chí cahān rī jñuhun jeé ní steén Tátá rī nuū rī. Te maá rō chí casáha rō jniñu jeé ní cahān tatá maá rō jñáhan rō. Achí yá.

<sup>39</sup> Te ni cacahān i:

Sēhe yucūn Abraham cácuu rī.

Te ni cahān Jesús:

Núu jeé candje rō nájñuhun ni candje Abraham návaha cuu ndije rō yucūn de, yūcuán na te jniñu váha ni sáha de suni sáha maá rō nuū. <sup>40</sup> Te vijna chí cácuu rō cahni rō ruhū, vēsú ni cahān rī jīn rō táca jñuhun ndaā ni steén Tátá rī nuū rī. Te Abraham chí

tu ní sáha cuiñi de súcuan. <sup>41</sup> Máa rō chí ñuu casáha rō jīn tatá maá rō. Achí yá jīn i.

Yūcuán na te ni cacahān i:

Máa rī chí tu cácuu rī sēhe ndáhú jeé tu tátá. Chí iyó ñn-ni tátá rī, te Yaā Dios cúu ya.

<sup>42</sup> Te ni cahān Jesús:

Núu Yaā Dios cúu ndije tátá rō, te coo maní rō jīn rī nuū. Chí nde nuū Yaā Dios ni quenda rī vēji rī. Te tú vēji rī jeé cuni maá rī, chí maá yá ní tají ruhū. <sup>43</sup> ¿Te najehé tu cájecūhun ni rō jñuhun cáhān rī núu súcuan? Suu siquī jeé tu cácuu rō chusóhó rō jñuhun nácani rī. <sup>44</sup> Máa rō jñáhan rō chí tátá rō cúu jexeén. Te cácuu rō sáha rō máa jeé cuni tátá rō ún. Máa jexeén ni jehni ndiyi nde jeé xīhna ñūhún. Te tu ní ñn cuiñi jīn jñuhun ndaā, te tú cuiñi na jñuhun ndaā cahān. Te jeé cahān jexeén jñuhun stáhú cúu jeé súcuan cá maá. Chí maá un cúu jeé ndiso jñuhun stáhú, te maá un cúu jeé ní squéjeé ndihí jñuhun stáhú. <sup>45</sup> Te ruhū chí cahān rī jñuhun ndaā, te jeé yúcuan cúu jeé tu cácuu rō ruhū. <sup>46</sup> Te ní ñn rō ma níhín rō cuēchi siquī rī, chí tú cuiñi na cuēchi rī. Te máni jñuhun ndaā cahān rī, ¿te naun tu cácuu rō ruhū? <sup>47</sup> Ñayuu cácuu sēhe Yaā Dios, chí cáchusóhó i jñuhun Yaā Dios. Te nastú sēhe Yaā Dios cácuu rō, te jeé yúcuan tu cácuu rō chusóhó rō. Achí yá jīn de.

*Iyó Jesús nde ná tu coo Abraham*

<sup>48</sup> Yūcuán na te ni cacahān jñáhan ñuu yá hebreo un:

Ndaā cacahān rī jeé canéé rō nájñuhun ñayuu Samaria, te ñuhun tachí ini rō.

<sup>49</sup> Te ni cahān Jesús:

Tu ñuhun tachí ini rī, chí yáñūhún rī jīn Tátá rī. Te maá rō jñáhan rō chí tu cáhiyo yáñūhún rō jīn rī. <sup>50</sup> Máa rī tu ndúcú rī jeé cujéhu rī. Iyó ñn jeé sáha jeé cujéhu rī, te maá yá sándaā siquī jñuhun cáchān rō. <sup>51</sup> Jendaá cahān rī jīn rō, núu ndé ñayuu squícu jñuhun cáhān rī, ma cúu cuiñi i. Achí yá.

<sup>52</sup> Te tēe hebreo un tu ní cájecūhun ni de, te ni cacahān de:

Vijna te ni cacacáhu ni rī jeé ñuhun ndije tachí ini rō. Chí Abraham jīn táca tēe ni canacani jñuhun Yaā Dios nde jenahán, ní cajihí de. Te rōhó cáhān rō, núu ndé vé squícu jñuhun cáhān rō, te ma cúu cuiñi i, achí rō. <sup>53</sup> ¿Te chí jéhu ga rō vēsú jii yó Abraham naun? Chí ní jihí de, te suni ní cajihí táca tēe ni canacani jñuhun ya. ¿Te ndé ñn ga sáha rō maá rō núu súcuan? Achí de.

<sup>54</sup> Te ni cahān Jesús:

Núu ruhū sajeñu rī maá rī, te tu níhín jniñu. Máa Tátá rī cúu jeé sajeñu ruhū. Te cacahān rō jeé maá yá cúu Yaā Dios maá rō. <sup>55</sup> Te vēsú súcuan te tu cájini rō ndese Yaā cúu ya. Te ruhū chí jini rī yá. Te núu cahān rī jeé tu jini rī yá, te cuu rī tēe stáhú nájñuhun

maá ró jijnáhan ró. Te tuú chi jíní ndije ri yá, te squícu ri jnūhun cáhán yá. <sup>56</sup> Te jíní ró Abraham ni cusī ni de jeē coto de quivī quēē rī. Te je ni jito de, te ni jito ri jeē ní cusī ndasí ni de. Achí yá.

<sup>57</sup> Yūcuán na te ni cacahān tēe hebreo un jíní yá:

Ni ná tu coo ró uū xico uxī cuiyá, ¿te ndese cúu jeē cahán ró jeē ní jito ró nuū Abraham? achí de.

<sup>58</sup> Te ni cahān Jesús:

Jendaá cahán rī jíní ró jeē nde ná tu cacu Abraham te je íyó rī, achí yá.

<sup>59</sup> Yūcuán na te ni caquihin de yuū jeē cuáha de xiní yá. Te Jesús chi ní quenda sāhi yá ni yāha ya mēhñū de, ni quenda ya ini templo cuahān yá.

*Jeē ní nasávaha ya ñin tēe ni cacu cuáá*

## 9

<sup>1</sup> Te jeē jíca Jesús cuahān yá, te ni jito ya nuū ñin tēe ni cacu cuáá. <sup>2</sup> Te tēe cáscuáha jíní yá ni cacajnūhún de ya:

Maestro, ¿naun ni cacu cuáá tēe yáha? ¿A cuéchi tátá de náná de cúu, chí cuéchi máá de cúu, chí naún?

<sup>3</sup> Te ni cahān Jesús:

Nasūu cuéchi máá de, ni nasūu cuéchi tátá de náná de cúu jeē ní cacu de súcuán, chí sa suhva návaha cuni ñayuu jniñū jéhnū sāha Yaā Dios jíní de. <sup>4</sup> Níní jēē cúu nájñūhun nduú ñi ñayiví, te cánuú sāha ri jniñū Yaā ní tají rúhū. Chí quee tiempo jeē coo nájñūhun jecuáá, jeē tuá cuu sájñūni ní ñin. <sup>5</sup> Níní jēē íyó rī ñi ñayiví te cúu ri luz jeē cundijin ñi anuá ñayuu ñayiví, návaha jecūhun ní i siquī Yaā Dios. Achí yá.

<sup>6</sup> Te ná ni cahān yá súcuán, te ni tesíhi yá nuū ñūhun, te ni sāha ya ndehyū jíní tesíhi yá un, te ni tee ya siquī tñūu tēe cuáá un. <sup>7</sup> Te ni cahān yá jíní de:

Cuáhán nuū pila Siloé te nacate ró tñūu ró, achí yá. Te jñūhun Siloé cuní cahān, ndute ní cascáca de ni quee.

Yūcuán na te cuahān de, te ni nacate de tñūu de, te ni ndundijin-ni, te ni nandicó de vēji de. <sup>8</sup> Yūcuán na te ñayuu yúcu yajni jíní de, jíní ñayuu jeē ní cajito jeē cúu de tēe cuáá, ni cacajnūhun jnāhan i:

¿A násūu tēe yáha cúu jeē ndeé-ni yāhá te jicān caridad?

<sup>9</sup> Te sava i ni cacahān:

Suu de cúu.

Te sava ga i ni cacahān:

Nasūu de cúu, te súcuán cuní coto de.

Te máá de chí ni cahān de:

Suu ri cúu.

<sup>10</sup> Yūcuán na te ni cacajnūhún i de:

¿Te ndese cúu jeē ní nanune tñūu ró núu súcuán?

<sup>11</sup> Te ni cahān de:

Tēe nání Jesús ni sāha de ndehyū, te ni tee de tñūu rī, te ni cahān de jíní rī: Cuáhán nuū pila Siloé te nacate ró tñūu ró. Te ni jehēn rī, te ni nacate rī, te ni nanune-ni tñūu rī, achí de.

<sup>12</sup> Yūcuán na te ni cacajnūhún i de:

¿Nde nuū ñne tēe ún? achí i.

Tu jíní rī, achí de.

*Jeē ní castíchi tēe fariseo tēe ni cacu cuáá*

<sup>13</sup> Yūcuán na te ni cajendeca i tēe ni iyo cuáá un nuū tēe grupo fariseo. <sup>14</sup> Te quivī ndétātu cúu jeē ní sāha Jesús ndehyū jeē ní nanune ya tñūu de. <sup>15</sup> Te tēe fariseo un ní cacajnūhún tucu de tēe ún ndese ni nanune tñūu de. Te ni cahān de:

Ni tee de ndehyū siquī tñūu ná, te ni nacate ná, te ni ndundijin-ni tñūu ná, achí de.

<sup>16</sup> Yūcuán na te ni cacahān sava tēe fariseo: Tēe ún chí nasūu ndé nuū Yaā Dios vēji de, chí tu nēe ñi de quivī ndétātu.

Te sava ga de chí ni cacahān:

¿Nde cuu sāha tēe un táca jniñū jéhnū yáha te núu tēe íyó cuéchi cúu de?

Te ni cacusín de siquī yá. <sup>17</sup> Te ni cacajnūhún tucu de tēe ni iyo cuáá un:

Róhó, ¿ndese cáhán ró siquī tēe ni nanune tñūu ró núu súcuán?

Te máá de ni cahān de:

Ñin tēe nácani jñūhun Yaā Dios cúu de, achí de.

<sup>18</sup> Te tēe hebreo un chí tu ní cácan dije de jeē ní iyo cuáá tēe ún te ni ndundijin tñūu de. Te ni cacana xiní tátá de náná de. <sup>19</sup> Te ni cacajnūhún de:

¿A yáha cúu sēhe ro jēē ní cacu cuáá cácahán ró? Núu súcuán ¿te ndese ni ndundijin tñūu de vijna? achí.

<sup>20</sup> Te ni cacahān tátá de náná de:

Suu sēhe ri cúu tēe yáha jēē ní cacu cuáá.

<sup>21</sup> Te tu cájini rī ndese ni ndundijin tñūu de vijna, ni tu cájini rī ndé tēe ni nanune tñūu de. Cajñūhun ró maá de, chí je jéhnū de, te na cáchi máá de.

<sup>22</sup> Súcuán ni cacahān tátá de náná de, chí cáyūhú de cájito de jnāhan de tēe hebreo. Chí je ni casándaá tēe un jēē núu ndé ñayuu cachi i jeē Jesús cúu Cristo, Yaā ní tají Yaā Dios, te quenehen de i jeē ma cúu ga quiví i ñi vehe ñi sinagoga. <sup>23</sup> Jeē yúcuán ní cacahān tátá de náná de: Cajñūhun ró maá de, chí je jéhnū de.

<sup>24</sup> Yūcuán na te tēe hebreo un ní cacana tucu de tēe ni iyo cuáá un. Te ni cacahān de jíní:

Cachi cají ró nuū rī, jito jíní Yaā Dios. Chí cájini rī jeē tēe íyó cuéchi cúu tēe ni nanune tñūu ró.

<sup>25</sup> Yūcuán na te ni cahān de:

Tu jíní na núu íyó cuéchi de, chí naún. Te íyó ñin jeē jíní ná, cúu jeē tēe cuáá ní cuu ná, te vijna chí ni ndundijin tñūu ná. Achí de.

<sup>26</sup> Te ni cacajñūhún tucu de:

¿Nde se ni sáha de jín ró? ¿Nde se ni nanune de tinūu ró núu súcuan?

<sup>27</sup> Te ni cahān de:

Je ni cuu ni castūhun ná nuū ní, te tu ní cáculni ní cuatáhú ní. ¿Te najehē cáculni ní jéé cáchi tucu ná nuū ní? ¿Te chí suni cáculni ní jijnáhan ní candíje ní yá naún?

<sup>28</sup> Yūcuán na te ni cacahān neé jín de, te áhí:

Máá ró chí candíje ró téé ún, te máá rí chí cáculni rí Moisés. <sup>29</sup> Te cáculni rí jeé ni cáhān Yāá Dios jín Moisés. Te téé yūcuán, ni tu cáculni rí ndé nuū véji de.

<sup>30</sup> Te ni cahān téé ni iyo cuáá:

Nāá ni na jéé cáculni ní jéé tu cáculni ní jeé véji de nuū Yāá Dios, vésú ni nanune de tinūu ná. <sup>31</sup> Te cáculni yō jeé Yāá Dios tu jini nahín yá jeé cáculni náyuu iyó cuéchi. Chí jini nahín yá nuū maá-ni náyuu jeé cáculni hún i ya te casáha i jeé cuní yá. <sup>32</sup> Te ní véji yó te tu ní jini sōho cuiti yō jeé in téé nanune de tinūu inga téé ni cacu cuáá. <sup>33</sup> Te núu nasūu ndé nuū Yāá Dios véji téé ún, te ma cúu cuiti sáha de in jniñu súcuan. Achí de.

<sup>34</sup> Te ni cacahān téé hebreo un:

Róhó chí iyó ndasí cuéchi ró ndé quiví ní cacu ró, ¿te á máá ró steén nuū rí naún? áhí.

Te ni caquenehen téé un yátá vehe i sinagoga.

*Siquí náyuu cáhīyo cuáá ánuá*

<sup>35</sup> Te ni jini jñūhun Jesús jeé ní caquenehen de téé ún. Te ni nihín jñáhan ya jín de, te ni cahān yā jín de:

¿A candíje ró Séhe Yāá Dios?

<sup>36</sup> Te ni cahān de:

¿Nde in cúu ya návāha candíje ná yá?

<sup>37</sup> Te ni cahān Séhe:

Je ni jito ró núu yā, te suu cúu ruhū jeé cahān jín ró, achí yá.

<sup>38</sup> Yūcuán na te ni jecuiñí yití de nuū yá, te ni cahān de:

Candíje ná jéé nihín cúu Jitoho ná.

<sup>39</sup> Te ni cahān Jesús:

Véji rí ini náyivi yáha jéé sándaá rí siquí náyuu. Chí náyuu jeé nájnūhun cáculni ánuá, ndundijin ini anuá i jeé jécūhun ni i siquí rí. Te náyuu jeé jéni ni i jeé cáculni ní i, nájnūhun nducuaá ánuá i. Achí yá.

<sup>40</sup> Te sava téé fariseo jeé cáhīn jín yá, ná ni cajini de jñūhun yáha, te ni cacahān de jín yá:

¿Te chí jéni ní rō jeé suni téé tu cáculni ní cacu máá rí naún?

<sup>41</sup> Te ni cahān Jesús:

Núu jeé cáculni ró téé tu jécūhun ni nuú, te ma cóo cuéchi ró. Te siquí jeé ní cacahān rō jeé cáculni ní rō, te tu cáculni ró, jeé yūcuán condee cuéchi siquí rō.

*Jñūhun yátá siquí lanchi*

## 10

<sup>1</sup> Jendaá cahān rí jín ró, núu yíhi lanchi ini corral cánevāha cáhnu náyuu, te núu ndé téé tu quiví de ichi yéhyí corral un, chí sa suhva inga lado cáa de quiví de, téé un cúu náculni, chí véji jeé saculni. <sup>2</sup> Te téé quiví ichi yéhyí, chí téé un cúu pastor ndíto lanchi. <sup>3</sup> Te téé ndíto yéhyí, núne de te quiví téé ún. Te lanchi de cáculni tí tachí de. Te cána de síhví lanchi máá de, te táva de tí. <sup>4</sup> Te núu ni tava de ndíhi lanchi máá de, te yósnuú de nuú tí cuahān de. Te lanchi un cáculni tí de, chí náculni tí tachí de. <sup>5</sup> Te ma cóndiquin tí yatá inga téé, chí sa suhva cunu tí coto tí de, chí náculni tí jeé nasūu jitocho tí cúu.

<sup>6</sup> Jñūhun yátá yáha ní cahān Jesús jín náyuu, te tu ní cáculni ní i na jñūhun cúu jeé ní cahān yá.

*Jesús cúu máá pastor vāha*

<sup>7</sup> Yūcuán na te ni cahān gā Jesús jín i:

Jendaá cahān rí jín ró: Máá rí cúu nájnūhun yéhyí corral nuú quivícoo náyuu cáculni nájnūhun lanchi rí. <sup>8</sup> Táca téé jeé tu ní táji Yāá Dios, jeé ní quivícoo de ndé ná tu quee rí, cáculni de nájnūhun náculni, chí tu ní cáculni de jñūhun ndaá. Te náyuu cáculni nájnūhun lanchi rí, tu ní cáculni i de. <sup>9</sup> Máá rí cúu nájnūhun yéhyí. Te náyuu jeé jín máá rí quivícoo, jnama rí i. Te cuu i nájnūhun lanchi jeé ndícoo tí nuú yíhi vāha tí, te quéndacoo tí nuú cáji vāha tí.

<sup>10</sup> Téé culni chí máni véji de jeé saculni de lanchi, te cahni de, te snáa de. Te ruhū chí véji rí návāha cotecu náyuu cáculni lanchi rí, te nde yóhō vāha ndetū coo i. <sup>11</sup> Máá rí cúu máá pastor vāha. Te pastor vāha chí ndíto vāha de lanchi de, vésú nde cuu de jeé siquí tí. <sup>12</sup> Te in téé yíyāhu, nasūu pastor tí cúu de, chí nasūu lanchi máá de cúu tí. Te núu jito de jeé véji yíhi, te stóo de lanchi, te jinu de cuahān de. Te yíhi chí jni tí lanchi, te sáha tí jeé jité núu lanchi. <sup>13</sup> Te téé yíyāhu ún chí jinu de cuahān de siquí jeé lanchi tátú cúu jeé ndíto de, te jeé yūcuán tu cundáhú ní de tí.

<sup>14</sup> Máá rí cúu máá pastor vāha. Te jini rí táca náyuu cáculni nájnūhun lanchi rí, te máá i cáculni i ruhū. <sup>15</sup> Te yáha cúu nájnūhun jeé Tátá rí jini yá ruhū, te máá rí jini rí Tátá rí. Te cuu rí jeé siquí náyuu cáculni lanchi rí. <sup>16</sup> Te suni iyó gā náyuu jeé cáculni lanchi rí, te sín sín náyuu cáculni i. Te cáculni jéé suni condeca rí náyuu ún. Te cuatáhú i jñūhun cáhān rí. Te coyūcu cáhnu-ni ndíhi náyuu candíje, te coo in-ni pastor i.

<sup>17</sup> Te Tátá rí maní ndasí yá jín rí siquí jeé jéhe rí máá rí jeé cúu rí jéhe náyuu, te natecu tucu rí. <sup>18</sup> Ni in ma cúu cahni ruhū, chí máá rí cúu jeé jéhe jñūhun cuu rí. Jeé cáculni máá rí te cuu rí, te jeé cáculni máá rí te natecu rí, chí súcuan iyó poder rí. Súcuan ni cahān Tátá rí jeé sáha rí. Achí yá.

<sup>19</sup> Te jeē ní cajini jnāhan ñuu yā hebreo jñūhun yāha, te ni cacusñin tucu i. <sup>20</sup> Te cuehē i ni cacahān:

¿Naun cáchusóhó ró jeē cahán de? Chi ñūhun tachī ini de, te ni tñvī xini de.

<sup>21</sup> Te sava ga i ni cacahān:

Tu súcuan cáhán tēe ñūhun tachī ini, nájñūhun cáhán tēe yāha. Te tēe ñūhun tachī ini, ¿á cuu nanune de tinūu tēe cuáá naún? Achí.

*Jeē ní casquéhichī i Jesús*

<sup>22</sup> Te tiempo mñin cúu, te ñuu Jerusalén cānasáha ñayuu vico jeē cánucūhun ni i quivī ní cuhīi templo cáhnu. <sup>23</sup> Te jica cuu Jesús ini templo, ini corredor jeē naní Salomón. <sup>24</sup> Te jnāhan ñuu yā hebreo ni cacutútú i nuū yā, te ni cacahān i:

¿Nasaa ga quivī sáha ró jēe ma cucáhnu ni rí? Cachí cají nuū rí jijnāhan ri núu máá ró cúu Cristo.

<sup>25</sup> Te ni cahān Jesús:

Je ni castūhun rí nuū rō, te tu ní cácadñje ró. Táca jñiñu jeē ní tejñiñu Tátá rí ruhū sáha ri, yūcuan stéen cají jēe maá yá ni tají ruhū. <sup>26</sup> Te tu cácadñje ró, chi nasūú lanchi ri cácuu ró, nájñūhun je ni cahān rí jijn ró. <sup>27</sup> Ñayuu cácuu lanchi ri, chi nácuni i jeē maá rí cúu jeē cahán jijn i. Te jini rí i, te cándiquin i ruhū.

<sup>28</sup> Te cotecu i ní cáni sáha rí, te ma jnahnú ndetū cuiti i. Te ni ñin ma cúu quende i ndaha rí. <sup>29</sup> Máá Tátá rí ni squivī ya i ndaha rí. Te cújéhnu ga maá yá vesú táca gá. Te ni ñin ma cúu quende i ndaha ya. <sup>30</sup> Máá rí jijn Tátá rí, chí ñin-ni cúu ri, achí yá.

<sup>31</sup> Yūcuán na te jnāhan ñuu yā hebreo ni caquihñin tucu de yuū jeē cuáha de xini yā. <sup>32</sup> Te ni cahān yā jijn de:

Ni stéen rí cuehē jñiñu váha nuū rō jeē ni sáha ri jijn poder Tátá rí. ¿Te á siquī jeē ni sáha ri jñiñu váha cúu jeē cuáha ró yúu xini rí núu súcuan? Achí yá.

<sup>33</sup> Te ni cacahān de jijn yá:

Nasūu siquī jeē ni sáha ró jñiñu váha cúu jeē cuáha rí yuū xini rō, chí siquī jeē cahán ndeváha ró jēe achí ró jeē inuú cúu ró jijn Yaa Dios. Chi tēe-ni cúu ró, te sáha ró jēe inuú cúu ró jijn Yaa Dios. Achí de jijn yá.

<sup>34</sup> Te ni cahān Jesús:

Yósó núu tútu ley cáneváha ró jēe ni cahān Yaa Dios: Nájñūhun yaā cácuu ró, achí Yaa Dios, achí tútu. <sup>35</sup> Chi ñayuu jeē ní cajetáhú jñūhun ya, ni cahān yá jeē cácuu i nájñūhun yaā. Te cájini yō jeē ma cúu cahān yō jeē tú ndaā jñūhun cáhán tútu i. <sup>36</sup> Núu súcuan ¿te naun cacahān ró jeē jñūhun ndeváha cúu jeē ni cahān rí jeē Séhe Yaa Dios cúu rí? Chí máá Yaa Dios ni jeni ya ruhū siquī jñiñu i, te ni tají yá ruhū vēji ri ini ñayivī. <sup>37</sup> Núu tu sáha ri jñiñu sáha Tátá rí, núu súcuan te ma candñje ró ruhū. <sup>38</sup> Te núu sáha rí, te vesú tu cácadñje ró ruhū, te na cándñje ró siquī jñiñu sáha rí ún.

Te súcuan te cucáhnu ni rō jeē ñin-ni cúu Tátá rí jijn rí, te ñin-ni cúu rí jijn Tátá rí. Achí yá.

<sup>39</sup> Yūcuán na te cánducú tucu de jñi de ya. Te ni ndoñūhñn-ni ya cuahān yā.

<sup>40</sup> Te cuanuhun yā yūte Jordán ichi núu cáne niāndii, nuū ni íne Juan ni scuándute de. Te ni condee yā yūcuán. <sup>41</sup> Te ni quijicoo cuehē ñayuu nuū yā, te ni cacahān i jijn táca jnāhan i:

Ndaā chí vesú tu ní sáha Juan ni ñin jñiñu jéhnu, te ni cundaā ndiñi jñūhun ni cahān de siquī ndese sáha tēe yāha. Achí i.

<sup>42</sup> Te cuehē ñayuu jeē ní jéngoo nuū yā yūcuán, ni cacandñje i ya.

*Jeē ni jihī Lázaro*

## 11

<sup>1</sup> Te ni iyo ñin tēe cúhú, nání de Lázaro. Te máá de jijn cuáha de María jijn Marta, cácuu de ñayuu ñuu Betania. <sup>2</sup> Te María un jéé cúu cuáha Lázaro, suu ña cúu jeē ní chíhi aceite perfume jehē jitoho yō, te ni nasichí ña jijn ixi xini ña. <sup>3</sup> Te ndandúu cuáha de un ní catajñi ña jñūhun cuahān nuū Jesús:

Tēe jeē maní ni jijn, cúhú de, achí ña, achí mozo.

<sup>4</sup> Te ná ni jini Jesús jñūhun, te ni cahān yā:

Cuehyī yáha chí nasūu cuehyi jeē ví cuu de cúu. Chí sa suhva sáha Yaa Dios jeē cuni ñayuu ndese cújéhnu ya. Chí ruhū. Séhe Yaa Dios, jijn cuehyī yáha te stéen rí jeē suni cújéhnu máá rí. Achí yá.

<sup>5</sup> Te maní Jesús jijn Marta jijn cúhú ña jijn Lázaro. <sup>6</sup> Te vesú súcuan te nuū ni ñihñ yā jñūhun jeē cúhú de, te ni quendō ya uū gā quivī nuū ndee yá un. <sup>7</sup> Yūcuán na te ni cahān yā jijn tēe cáscuáha jijn yá:

Na quihñin tucu yó región Judea.

<sup>8</sup> Te tēe cáscuáha un ní cacahān de jijn yá:

Maestro, ná tu cuu quivī jeē ní canducú jnāhan yó hebreo cuáha de yuū xini ní. ¿Te cúní ni quihñin tucu ní yūcuan naún? Achí de.

<sup>9</sup> Te ni cahān Jesús:

Ma cúu cahni ñayuu ruhū núu ná tu quee maá quivī cuu rí. Chí jeē iyó rí ñayivī yáha cúu nájñūhun jeē iyó úxi uū hora ñin nduú. Te jeē sáha rí jeē cuni Yaa Dios, cúu rí nájñūhun tēe jeē jica nduú, te tu cáchihí de jehē de, chí cundñjin nuū de ñayivī yáha. <sup>10</sup> Te tēe jeē tu sáha jeē cuni Yaa Dios, chí nájñūhun jica de jecuáá, te nájñūhun cáchihí de jehē de, chí tu cundñjin ini anuá de. Achí yá.

<sup>11</sup> Yūcuán na te ni cahān tucu ya:

Amigo yō Lázaro quixí de, te quihñin rí sáha ri jeē nátahū ni de. Achí yá.

<sup>12</sup> Yūcuán na te tēe cáscuáha un ní cacahān de:

Núu quixí de te jini yō jeē nduváha de.

<sup>13</sup> Te Jesús chí súcuan ni cahān yā jeē jé ni jihī de. Te cájeni ni tēe cáscuáha jeē quixí ndije de. <sup>14</sup> Yūcuán na te ni cahān cají yá:

Je ni jihī Lázaro. <sup>15</sup> Te cúsī ni rī jeē tu ní cōyūcu yó yūcuán, návāha vāha ga candije ró jeē coto ró jniñu jéhnū sáha rī. Núu súcuan te na quíngoo yó nuū ndíyī ún. Achí yá.

<sup>16</sup> Yūcuán na te Tomás, tēe cúu cuatí, ni cahān de jíin jnāhan de jeē cascuāha jíin yá:

Suni na quíngoo yó návāha cuu yó jíin yá, achí de.

*Jesús cúu jeē sáha jeē nátecu te cotecu ní cáni*

<sup>17</sup> Te nuū ní quee Jesús, te jíinī yā jeē ní cuu cuñ quivī yíndūji Lázaro. <sup>18</sup> Te yajni-ni íne ñuu Betania jíin ñuu Jerusalén, nájñūhun uū kilómetro yosáva. <sup>19</sup> Te Marta jíin María, ni quecoo cuehē jnāhan ña hebreo jeē cahān i jñūhun ndeyí ni jíin ña jeē siquí jeē ni jíihī cuāha ña. <sup>20</sup> Te nuū ní jini Marta jeē véji Jesús, te ni quenda ña cuajnahān ña ya. Te María chí ni ndōo ña vehe. <sup>21</sup> Te ni cahān Marta jíin Jesús:

Núu ní íyo ní yáha, te ma cúu cuāha ná núu. <sup>22</sup> Te vesú súcuan te jíinī na jée táca jée cacán ni núu Yaā Dios, te sáha ya, achí ña.

<sup>23</sup> Te ni cahān Jesús jíin ña:

Natecu cuāha ró.

<sup>24</sup> Te ni cahān Marta:

Jíinī na jée nátecu de quivī nátecu táca ndíyī nde quivī jínu ñayiví.

<sup>25</sup> Te ni cahān Jesús:

Máá rí cúu Yaā sáha jeē nátecu jíin jée cótecu ní cáni. Ñayuu candije jeē jnāma rī i, vesú na cúu i, te natecu i. <sup>26</sup> Te ñayuu cátecu te cándije i ruhū, cotecu i ní cáni andiví. ¿A cándije ró jñūhun yáha? Achí yá.

<sup>27</sup> Te ni cahān ña:

Cándije ná jée maá ní cúu Cristo, Sēhe Yaā Dios, jeē achí tutu jeē quíji ini ñayiví, achí ña.

*Jeē ní ndáhyū Jesús nuū yíndūji Lázaro*

<sup>28</sup> Te ná ni cahān ña súcuan, te cuahān-ni ña, cuacana yuhu ña cuhū ña María:

Máá Maestro ni quee yā, te cána ya rohó, achí ña.

<sup>29</sup> Te jeē ní jini María jñūhun yáha, te yachí ni ndocuiñī ña, cuahān ña nuū yá. <sup>30</sup> Te ná tu quiví Jesús ñuu, chí ni ndōo-ni ya nuū ni jéjnahan Marta yá. <sup>31</sup> Te ñayuu hebreo un jée cáyūcu ini vehe jíin María, jeē cacahān i jñūhun ndeyí ni jíin ña, ni cajito i jeē yachí ni ndocuiñī ña cuahān ña. Te ni candiquin i ña cuangoo i, chí cájeni ni i jeē cuándahyū ña nde nuū yíndūji ndíyī.

<sup>32</sup> Yūcuán na te ni jíin María nuū íne Jesús, te ni jecuiñī yití ña nuū jehé yá, te ni cahān ña:

Núu ní íyo ní yáha, te ma cúu cuāha ná núu, achí ña.

<sup>33</sup> Te ni jito Jesús jeē ndahyū ña jíin jée cándahyū ñayuu vējicoo jíin ña. Te yóhyo ni ndocuihyá ní yá, te ni jnahuhū ní yá jeē cundáhú ní yá i. <sup>34</sup> Te ni cajñūhun yá ña:

¿Nde mí ní cachindūji ró de?

Te ni cacahān ña jíin yá:

Quíhín yó te cuni ní, achí ña.

<sup>35</sup> Te ni ndahyū Jesús. <sup>36</sup> Yūcuán na te ni cacahān ñayuu hebreo un:

Condēhe náa yóhyo maní de jíin ndíyī ún.

<sup>37</sup> Te sava i chí ni cacahān i:

Tēe yáha jeē ní nanune de tñūnu tēe cuáá, ¿á tu ní cúu sáha de jeē ma cúu Lázaro nuú? achí i.

*Jeē ní natecu Lázaro*

<sup>38</sup> Te yóhyo ni jnahuhū ni tucu Jesús, te ni quee yā nde nuū yíndūji ndíyī. Te ñin yaū cava cúu, te yuyáú un ndíhyū ñin yuū. <sup>39</sup> Te ni cahān yā:

Tejiyo yuū un jíjnāhan ró, achí yá.

Te Marta, cuāha ndíyī un, ní cahān ña:

Je jéén xicō de, chí je ní cuu cuñ quiví yíndūji de.

<sup>40</sup> Te ni cahān Jesús jíin ña:

¿A násūú je ní cahān rī jíin ró jeē núu candije ró te coto ró jée yóhyo cújéhnū Yaā Dios jíin poder yá? achí yá.

<sup>41</sup> Yūcuán na te ni catejiyo i yuū jeē ndési yuyáú ndíyī ún. Te ni ndacoto-ni Jesús ichi andiví, te ní cahān yá:

Tátā, na cútahū na núu ní jée sáha ní jée jicán na. <sup>42</sup> Te jíinī na jée níni sáha ní jée jicán na. Te jeē vāha ñayuu cáhīn yáha cúu jeē súcuan cáhān na, návāha na cándije i jeē maá ní ní tají sáña.

<sup>43</sup> Te ná ni cahān yā súcuan, te ni cahān jee ya:

Lázaro, quenda quiji ró, achí yá.

<sup>44</sup> Te ni quenda-ni tēe ní jíihī ún, te ñúsúcún ndaha de síhīn de jíin tira sahma. Te nuū de ñúsúcún ñin sahma. Te ni cahān Jesús jíin i:

Nandají ró sahma ñúsúcún de, návāha cuu caca de, achí yá. Te ni canandají i.

*Jeē ní casquijñahan de jñūhun jeē cáhni de Jesús*

(Mt. 26.1-5; Mr. 14.1-2; Lc. 22.1-2)

<sup>45</sup> Yūcuán na te cuehē ñayuu hebreo jeē ní quijicoo nuū María, ni cacandije i Jesús, chí ní cajito i jniñu ní sáha ya. <sup>46</sup> Te sava i chí cuangoo i nuū tēe grupo fariseo, te ni cacastühún i ndese ní sáha Jesús. <sup>47</sup> Yūcuán na te tēe fariseo un jíin sūtū cácujeñnu ni candutútū de junta jíin táca gá tēe cácujeñnu. Te ni cacahān de:

¿Ndese sáha yó? Chí tēe ún yóhyo cuehē jniñu jéhnū sáha de. <sup>48</sup> Te núu condēhé-ni yó, te ndivii ñayuu candije i de. Te quijicoo táca tēe nación Roma jeē cácujeñnu, te canu de templo cáhnu yó, te scuíté núu de ñayuu nación yó, achí de jíjnāhan de.

<sup>49</sup> Te ñin jnāhan de jeē naní Caifás, jeē cúu maá sūtū cujeñnu ga cuiyā ún, ni cahān de:

Róhó chí tu cájini cuiití ró. <sup>50</sup> ni tu cájecūhun ní ró jeē vāha ga jeē cúu ñin tēe jehē ñayuu nación yó vesú jeē náa ndivii i, achí de.

<sup>51</sup> Te tu ní cáhán de jñuhun yáha jéé jéni ní maá de. Chi siquí jeé cúu de sutú cujéhu ga cuiyá ún, te ní sáha Yaá Dios jíin de jeé ní nacani de jñuhun jeé cúu Jesús jehé ñayuu nación hebreo. <sup>52</sup> Te nasūu maá ñn-ni jehé nación hebreo, chi suni jehé ndivii ñayuu cácuu sêhe Yaá Dios jeé ní cajitē núu táca nación, návaha ñn na cuu i jíjnáhan i. <sup>53</sup> Yūcuán na te nde quiví ún te táca tée hebreo cácujeñhu un, ní casquijnáhan de jñuhun jeé cáhni de Jesús.

<sup>54</sup> Jeé yūcuán tuá ní jica ndijin yá nuū jnáhan ñuu yá hebreo un, chi ní quenda ya región Judea, te cuahán yá ñn ñuu naní Efraín, nuū iyó yajni ñuhun téhé. Te ní condee yá yūcuán jíin tée cácuáha jíin yá.

<sup>55</sup> Te ní cuyajni vico pascua jeé cánasáha ñayuu hebreo. Te cuehē ñayuu táca ñuu yūcuán cuángoo i ñuu Jerusalén, návaha squícu i jeé cahán ley jeé cúchi i ndundoo i nuū Yaá Dios, te sáá te quejéé vico pascua. <sup>56</sup> Te cánanducú i Jesús, te cácajnñuhun jnáhan i ini templo:

¿Ndesé cájeni ní rō? ¿A quiji de vico, chí tutú? Achí i.

<sup>57</sup> Te sutú cácujeñhu jíin tée fariseo ní candacu de jniñu jeé núu ndé ñn ñayuu jiní ndé nuū íne ya, te na cástühún i, návaha jñi de ya.

*Jeé ní chuhun María perfume jehé Jesús  
(Mt. 26.6-13; Mr. 14.3-9)*

## 12

<sup>1</sup> Te cúmani iñú gá quiví te coo vico pascua. Te ní jehén tucu Jesús ñuu Betania nuū ndeé Lázaro, tée ní jihí te ní nastécú yá de. <sup>2</sup> Te ní casáha i ñn vico xíni jeé yíñühún i jíin yá. Te Marta ní jeni ña cohō. Te Lázaro yéji de staā jíin yá nuū mesa jíin táca gá ñayuu. <sup>3</sup> Yūcuán na te María ní quee ña jíin nájnñuhun sava litro aceite perfume jeé máni ita nardo cúu, te yōhō yahu ndeé. Te ní chuhun ña jehé Jesús, te ní nasichí ña jíin íxi ña. Te ní ini vehe un ní chítú xicō perfume un. <sup>4</sup> Yūcuán na te ní cahán Judas Iscariote sêhe Simón, ñn tée scuáha jíin yá un, te suu de cúu jeé nastúu de ya:

<sup>5</sup> ¿Najehē tu ní cúyáhu perfume yáha jéé uní ciento denario, te cuáha yó núu ñayuu ndahú núu. Achí de.

<sup>6</sup> Súcuán ní cahán de, nasūu jéé cundáhú ndije ní de ñayuu ndahú, chí sa suhva jeé cúu de tée cuíhná. Chí maá de ndíso yijni xühún, te quíhin cuíhná de jeé cájequin táca tée ún. <sup>7</sup> Yūcuán na te ní cahán Jesús:

Ma stáhán rō ña. Chí jeé ní sáha ña yáha cúu jeé ní sátühva ña ruhú nde quiví jeé quíndüji ri. <sup>8</sup> Chí níni cáyūcu ñayuu ndahú jíin ró, te ruhú chí tuá condee rí jíin ró. Achí yá.

*Jeé ní casquijnáhan de jñuhun jeé cahni de Lázaro*

<sup>9</sup> Te cuehē ñayuu hebreo ní cajini jñuhun i jeé néne ya ñuu Betania. Te ní jinūcoo i, te nasūu maá ñn jeé cuní i coto i nuū Jesús, chí suni jeé cuní i coto i nuū Lázaro, tée jeé ní nastécú yá. <sup>10</sup> Yūcuán na te sutú cácujeñhu ní casquijnáhan de jñuhun jeé suni cahni de Lázaro. <sup>11</sup> Chí jeé siquí Lázaro te ní cujiyo cuehē jnáhan ñuu de hebreo nuū de, te cácañdije i Jesús.

*Jeé ní quiví Jesús Jerusalén*

*(Mt. 21.1-11; Mr. 11.1-11; Lc. 19.28-40)*

<sup>12</sup> Te inga quiví ún, te ñayuu cuehē jeé ní quecoo vico pascua un, ní cajini jñuhun i jeé véji Jesús ñuu Jerusalén. <sup>13</sup> Te ní cajehnde i ndaha ñúu, te ní quendacoo i cuajnahán i ya. Te cácana jee i:

Yōhō cújéhu Yaá Dios. Yōhō vāha Yaá cúu Yaá jeé véji jíin jniñu maá Jítoho yō Yaá Dios. Yōhō vāha Yaá cúu Rey nación yō Israel. Achí i.

<sup>14</sup> Te ní nihín Jesús ñn burro, te ní jecosō yá tí, nájnñuhun cáhán tutu íi:

<sup>15</sup> Ñayuu ñuu Jerusalén jeé naní ñuu Sion, ma yūhu ró jíjnáhan ró.

Yáha condēhe ró jeé véji Rey rō, te yósó yá ñn burro.

Achí tutu.

<sup>16</sup> Te quiví ún te tée cácuáha jíin yá, tu ní cájecühun ní de jeé súcuán squícu táca jéé yosó núu tútu íi. Te nde ná ní ndujéhu Jesús jeé cuánuhun yá andiví, te sáá te ní canucühun ní de táca jñuhun yósó síquí yá, jíin jéé ní casáha de súcuán jíin yá.

<sup>17</sup> Te ñayuu ní cahín jíin yá ná ní cana ya xini Lázaro nuū ní yindüji de, te ní nastécú yá de, ní canacani i jñuhun ndese ní sáha ya. <sup>18</sup> Jeé yūcuán ní quendacoo ñayuu cuehē un, ní jejnahan i ya, chí ní cajini jñuhun i jeé ní sáha ya jniñu jéhu un jéé ní steén yá poder ya. <sup>19</sup> Yūcuán na te ní cacahán maá tée fariseo:

Vijna te je ní cajito yó jéé ma cúu cuiñi gá casi yō. Chí jíto yó jéé ndivii cuiñi ñayuu cuangoo i jíin de. Achí de jíjnáhan de.

*Ñayuu nación Grecia nánducú i Jesús*

<sup>20</sup> Te sava ñayuu nación Grecia, suni ní quijicoo i ñuu Jerusalén vico pascua un jéé chíñühún i Yaá Dios. <sup>21</sup> Te ní quecoo i nuū Felipe, tée ñuu Betsaida ndañúu Galilea. Te ní cacahán i jíin de:

Tátá, cácuni ná cahán na jíin Jesús, achí i.

<sup>22</sup> Te ní jehén Felipe, ní castühún de nuū Andrés. Te ndindúu de cuacastühún de nuū Jesús. <sup>23</sup> Te ní cahán Jesús jíin de:

Je ní quee quiví jeé ndujéhu Yaá ní nduu tée. <sup>24</sup> Te jendaá cahán rí jíin ró, ñn nuní trigo núu tú ñingava nuū ñuhun te quíndüji, núu súcuán te quendōo maá ñn-ni. Te núu quíndüji, te nacayá cuehē ndasí. Te suni súcuán cánúu cuu rí quíndüji ri, návaha coo cuehē ñayuu jeé ndúu i sêhe Yaá Dios. <sup>25</sup> Te

na-ni ñayuu núu tu jéhe i jñuhun ndoho i jeé siquí ruhū, te jñahnū ndetū i. Te ñayuu jeé jéhe i jñuhun ndoho i jeé siquí ruhū ini ñayiví yáha, cotecu i ní cáni andiví. <sup>26</sup> Núu ndé ñayuu cuní i cuajniñu i nuū rí, na cóndiquín i ruhū. Te nuū cóndee rí, suni yūcuán condee ñayuu jejniñu nuū rí. Te ñayuu jejniñu nuū rí, chí sáha Tátá rí jeé cujéhu i.

*Jeé ni cáhān Jesús jeé cuu yā*

<sup>27</sup> Te vijna te cúcuhyá ndasí ní rí sáha jñúndóho quiji siquí rí. ¿Te ndese cahān rí? ¿A cáhān rí jiín Tátá rí: Jnama ní sáña núu jñúndóho jeé quíji siquí ná, achi rí? Ma cúu, chí jeé siquí yūcuan cúu jeé véji rí. <sup>28</sup> Tátá, steén ní jeé cujéhu ndasí ní jiín poder ní, áchí yá.

Yūcuán na te ichi ándiví ní cahān ññ jñuhun:

Je ni steén rí jeé cujéhu rí, te sáha tucu rí inga jiín, áchí yá.

<sup>29</sup> Te ni cajini ñayuu cáhiin yūcuán, te ni cacahān i jeé taja cáhān. Te sava ga i ni cacahān:

ññ ndajéhe Yaā Dios ni cahān jiín yá.

<sup>30</sup> Te ni cahān Jesús jiín i:

Tu ní cáhān jñuhun yáha jeé siquí ruhū, chí sa suhva návaha cuní rō siquí jñuhun jeé ní cáhān yā jiín rí. <sup>31</sup> Vijna cúu jeé sándaā Yaā Dios siquí cuéchi ñayuu ñayiví yáha. Vijna cúu jeé scúnu ya jexeén jeé ndácu jniñu ini ñayiví yáha. <sup>32</sup> Te ruhū, núu na jínu condita caa rí cuu rí ini ñayiví, te sáha rí jeé jnáā táca ñayuu quivicoo i ndaha rí, áchí yá.

<sup>33</sup> Súcuán ni cahān yā jeé steén yā ndese modo cuu yā. <sup>34</sup> Te ni cacahān ñayuu jiín yá:

Ni cajini sōho ná jeé cahān tutu ley Yaā Dios cánevaha yó, jeé Cristo cotecu yā níf cáni. ¿Te naun cáhān ní jeé Yaa ní nduu tēe, cánuú condita caa ya cuu yā? ¿Nde ññ cúu máá Yáa ní nduu tēe núu súcuán? Achí i.

<sup>35</sup> Yūcuán na te ní cahān Jesús:

Máá jecu na quiví condee rí jiín ró jeé cúu rí luz cundijín ini anuá rō. Núu súcuán te vijna jeé iyó gá luz rí jiín ró, te caa ró jiín, chí sanaa ní rō te cuahān rí, te nájñuhun quendōo ró núu née. Chí ñayuu cájica nájñuhun nuū née, tu cajini i ndé nuū cuángoo i. <sup>36</sup> Núu súcuán te ní ní ndéé gá rí jiín ró, te candije ró ruhū jeé cúu rí luz, návaha nduu ró ñayuu cájica jiín luz, áchí yá.

Súcuán ni cahān Jesús táca jñuhun yáha, te cuahān-ni ya, te tuá ní steén yā maá yá nuū i.

*Jeé tu ní cácandje ñayuu hebreo jeé cúu ya Cristo*

<sup>37</sup> Te vésú cuehē jniñu jéhu ní sáha Jesús jeé steén yā poder yā nuū i, te tu ní cácandje i ya. <sup>38</sup> Chí squícu nahín jñuhun ní cahān Isaías, tēe ní nacani jñuhun Yaā Dios nde jenahān:

Tátá Yaā Dios, tu ní cácandje ñayuu jñuhun ní canacani ná,

te tu ní cácandje i jniñu jéhu jeé ní steén ní poder ní núu i.

Achí Isaías. <sup>39</sup> Jeé yūcuan tu ní cúu candije i, chí ni cahān tucu Isaías:

<sup>40</sup> Ní sáha ya jeé nájñuhun cáhiyo cuáá ánuá i, jiín jeé cácuñhni ní i, návaha coo nájñuhun jeé tu cájito i, te ní ma jécūhun ní i,

ní ma násāma ini i quivicoo i nuū rí, jeé nasávaha rí anuá i nuū cuéchi i.

Achí Cristo, achí tutu. <sup>41</sup> Jñuhun yáha ní cahān Isaías, chí je ní jito de ndese yōhyo cújéhu Jesús, te ní cahān de ndese coo quiví jeé quíji ya.

<sup>42</sup> Te vésú súcuán te cuehē ñayuu hebreo chí ní cacandje i ya, te suni nde jiín sava tēe cándacu jniñu. Te tu ní cácahi de jeé cácandje de ya, chí siquí jeé cáyūhú de táca tēe fariseo. Chí núu súcuán te quenehen ún de ini vehe ññ sinagoga jeé ma cuáha ga jñuhun quivicoo de. <sup>43</sup> Chí cácusí gā ní de jeé cujéhu de sáha ñayuu, vésú jeé cujéhu de sáha Yaā Dios.

*Jñuhun cáhān Jesús cúu jeé sándaā siquí ñayuu*

<sup>44</sup> Te ni cahān jee Jesús:

Ñayuu cácandje ruhū, nasūu máñúhún-ni ruhū cácandje i, chí suni cácandje i nde maá Tátá rí, Yaā ní tají ruhū. <sup>45</sup> Te ñayuu cájito nuū rí, suni cájito i nuū Yaā ní tají ruhū. <sup>46</sup> Máá rí jeé cúu rí luz cundijín ini anuá ñayuu, ní quiji rí ini ñayiví návaha táca ñayuu cácandje ruhū, ma cáca i nájñuhun nuū née. <sup>47</sup> Te núu ññ ñayuu jini sōho i jñuhun cáhān rí, te núu tu jétáhú i, te nasūu ruhū sándaā siquí i. Chí tú véji rí jeé ndénehen rí cuéchi siquí ñayuu ñayiví, chí sa suhva jeé jnáma rí i. <sup>48</sup> Te ñayuu jeé casquéhichí i ruhū te tu cájetáhú i jñuhun cáhān rí, iyó ññ jeé sándaā siquí i. Suu táca jñuhun jeé ní cáhān rí, jñuhun un cúu jeé ndenehen cuéchi siquí i quiví jínu ñayiví. <sup>49</sup> Chí tu cáhān rí jeé cúu ní maá rí, chí Tátá rí, Yaā ní tají ruhū, máá yá ní ndacu jniñu nuū rí ndese cahān rí jiín ndese steén rí. <sup>50</sup> Te jini rí jeé jniñu ndácu Tátá rí sáha jeé cótecu ñayuu níf cáni. Núu súcuán te jñuhun cáhān rí, chí máni jñuhun jeé ní cachí Tátá rí cúu, áchí yá.

*Jeé ní nacate ya jehē tēe cáscúha*

## 13

<sup>1</sup> Te jehíni inga quiví te quejéé vico pascua. Te je jini Jesús jeé ní quee quiví jeé quénda ya ñayiví yáha quíñuhun yā nuū Tátá yā. Te ní ní cundáhú ní yā ñayuu maá yá jeé cáyūcú ini ñayiví. Te vijna jeé jínu jeé ññ yā ñayiví, te sáha ya ññ jniñu jeé steén cají yá jeé cundáhú ní yā i.

<sup>2</sup> Te jexeén je ni squívi ini anuá Judas Iscariote sêhe Simón, jeé vjna nastúu de ya.  
<sup>3</sup> Te jíní Jesús jeé véji ya nuú Yaá Dios, te nuhún yá nuú Yaá Dios, jíní jeé ni sáha Tátá yá jeé cujéhu ya siquí ndihí-ni. <sup>4</sup> Te cúxíni ya jíní tée cáscuáha jíní yá, te ni ndocuñí yá. Te ni stáa ya sahma ndú ya, te ni jihni yá ñn toalla chíji ya. <sup>5</sup> Te ni chuhun ya ndute ini ñn tijehē. Te ni quejéé yá nácate ya jehē tée cáscuáha. Te násíchí yá jíní toalla jeé nuhni chíji ya.

<sup>6</sup> Te ni jínú yá nuú Simón Pedro. Te ni cahān Pedro jíní yá:

¿Sa máá ní nacate jehē ná naún?

<sup>7</sup> Te ni cahān Jesús:

Tu jécuhun ni rō jeé sáha ri vjna, te cúcuéé gá te jécuhun ni rō.

<sup>8</sup> Te ni cahān Pedro jíní yá:

Ma nácate cuítí ni jehē ná.

Te ni cahān Jesús:

Núu tú nacate ri jehē rō, te ma cúu cundúú rō jíní rí.

<sup>9</sup> Te ni cahān Simón Pedro:

Núu súcuan cúu te nasúu máá jehē-ni ná, chí suni nacate ní ndaha ná jíní xíní ná, áchí de.

<sup>10</sup> Te ni cahān Jesús jíní de:

Tēe jeé sa ní jichí, tu jíní ñúhún ndundoo ní cáhnu de, chí máá jehē-ni de, chí je íyó ndoo ní cáhnu de. Te máá rō chí je ni candundoo rō. Te tú ndihí rō cáhño ndoo.

<sup>11</sup> Chí je jíní yá ndé ñn de cúu jeé nastúu de ya, te jeé yúcuán ní cahān yá: Tú ndihí rō cáhño ndoo.

<sup>12</sup> Te nuú ni jínú ni nacate ya jehē de jijnáhan de, te ni naquihín ya sahma ndú ya, te ní nucōo tucu ya nuú mesa. Te ni cahān yá:

¿A cájecūhun ni rō na vé cuní cahān jeé ni sáha ri jíní rō? <sup>13</sup> Cácahān rō jeé Maestro jíní Jítoho rō cúu ri, te ndaaí cácahān rō, chí suu ndije cúu ri. <sup>14</sup> Núu súcuan te vésú Maestro rō jíní Jítoho rō cúu ri, te ni nacate ri jehē rō jijnáhan rō, te suni súcuan cánuú jéé nacate máá rō jehē jnāhan rō. <sup>15</sup> Chí jniñu yáha ni sáha ri jeé stéén rí nuú rō jeé suni súcuan sa cuajniñu rō núu jnāhan rō, nájñuhun sa máá rí ni jejniñu rí nuú rō. <sup>16</sup> Jendaá cahán rí jíní rō jeé ñn mozo tu cújéhu de nuú patrón de, te tēe jíca jniñu táhu nuú de, te cújéhu de nuú tēe ni tají de. Te máá rō cácuu mozo rí, te na cuajniñu rō núu jnāhan rō nájñuhun ní stéén rí nuú rō. <sup>17</sup> Te núu ni cájecūhun ni rō jñuhun yáha, te yōhyo ndetū rō te núu squícu rō.

<sup>18</sup> Te nasúu jéé cahán rí jeé ndihí rō ndétū, chí je jíní rí táca róhó jéé ní nacáji ri. Te cánuú squícu jñuhun yáha jeé cahán tutu ñ: Tēe yéji staa jíní rí, ní ndió cuñí de siquí rí, achí tutu. <sup>19</sup> Te vjna te je cástūhun rí táca jéé yáha núu rō nde ná tu coo, návāha núu na cóo, te candíje rō jéé máá rí cúu Yaá ní tají

Yaá Dios. <sup>20</sup> Jendaá cahán rí jíní rō jeé na-ni ñayuu jeé cuatáhu i táca jéé tají rí, te ruhū jetáhu i. Te ñayuu jetáhu rúhū, suni jétáhu i Yaá ní tají rúhū véji ri, achí yá.

*Jeé ní cachi yá jeé nastúu Judas yá*

(Mt. 26.20-25; Mr. 14.17-21; Lc. 22.21-23)

<sup>21</sup> Te ná ni cahān Jesús táca jñuhun yáha, te ni cucuíhyá ndasí ni yá. Te ní cahān cají yá:

Jendaá cahán rí jíní rō jijnáhan rō jéé ñn máá rō nastúu ruhū, achí yá.

<sup>22</sup> Yúcuán na te tēe cáscuáha jíní yá, ní candacóo de nuú jnāhan de, cájeni ní de ndé ñn de cúu jeé ní cahān yá. <sup>23</sup> Te ñn máá tēe scuáha jeé maní gá yá jíní, néne de xiin ya mesa jeé cácuixíni de jíní yá. <sup>24</sup> Te ní sáha Simón Pedro seña nuú de jeé na cájnūhún de ya ndé ñn de cúu jeé ní cahān yá. <sup>25</sup> Yúcuán na te tēe un ní scáyi de máá de nuú Jesús, te ní cajñūhún de ya:

¿Ndé ñn de cúu? áchí de jíní yá.

<sup>26</sup> Te ni cahān Jesús:

Na chúndaji rí staa te cuáha rí nuú ñn de, te suu tēe un cúu, áchí yá.

Te ní chundaji ya staa, te ní jēhe ya nuú Judas Iscariote sēhe Simón. <sup>27</sup> Te jeé ní quihín de staa ún, te ní quívi-ni Satanás ini anuá de. Yúcuán na te ní cahān Jesús jíní de:

Jniñu jéé sáha rō, na sáha yachí rō.

<sup>28</sup> Te ní ñn tēe cáyeji staa jíní yá, tu ní cájecūhun ni de naun ní cahān yá súcuan jíní de. <sup>29</sup> Chí sava de cájeni ní de jeé ní cahān Jesús jíní Judas jeé cájan de jéé jíní ñúhún yá vico ún, chí jéé cuáha de jecu xūhun núu ñayuu ndahú. Chí máá de ndiso yijni xūhún.

<sup>30</sup> Te jeé ní yeji de staa ún, te ní quenda-ni de cuahān de. Te je ni cuaa.

*Jeé ní ndacu ya jniñu jéé*

<sup>31</sup> Yúcuán na te jeé cuahán Judas te ní cahān Jesús:

Vjna te ruhū, Yaá ní nduu tēe, stéén rí ndese cújéhu rí, te suni jíní rúhū te cuní ñayuu ndese cújéhu Yaá Dios. <sup>32</sup> Te núu jíní rúhū cuní ñayuu ndese cújéhu Yaá Dios, núu súcuan te suni stéén Yaá Dios ndese cújéhu ruhū jeé cúu rí Sēhe ya. Te yachí-ni stéén yá. <sup>33</sup> Sēhé, tuá nahán condee rí jíní rō jijnáhan rō. Te nanducú rō ruhū, te nájñuhun ní cahān rí jíní táca jnāhan yó hebreo, suni súcuan cahán rí jíní rō vjna, jeé ma cúu jinūcoo rō núu quihín rí. <sup>34</sup> Te vjna te ndácu rí ñn jniñu jéé núu rō, jeé na cundáhu ní rō jnāhan rō. Nájñuhun cundáhu ní rí rohó, suni súcuan na cundáhu ní rō jnāhan rō. <sup>35</sup> Te núu cundáhu ní rō jnāhan rō, súcuan te cuní táca ñayuu jeé cácuu rō tēe cáscuáha jíní rí, achí yá.

*Jeé ní cachi yá jeé yūhu Pedro cahān de jeé jini de ya*

(Mt. 26.31-35; Mr. 14.27-31; Lc. 22.31-34)

<sup>36</sup> Te ni cahān Simón Pedro jíní yá:

¿Ndé nuú quihín ní núu súcuan?



Te ni cahān Jesús:

Nuū quihín rī chi ma cúu condiquin rō ruhū vijna, te cúcuéé gá te jinū rō.

<sup>37</sup> Te ni cahān Pedro:

¿Najehē ma cúu condiquin na níhín vijna? Tu yúhú ná cuu na jéé siquí ní.

<sup>38</sup> Te ni cahān Jesús:

¿A jéni ni rō jeé tu yúhú ró cuu rō jeé siquí rí? Jendaá cahán rī jín rō jeé nde ná tu cana líhli, te uní jínu yúhu ró te cahán rō jeé tu jíní rō ruhū. Achí yá.

*Jesús cúu ichi jeé jinú yō nuū Tatá yá*

## 14

<sup>1</sup> Te ni cahān gā yá:

Ma cuculhyá ni rō siquí tāca jnūndóho. Na cándije rō jéé sāha Yaā Dios jehē rō, te suni na cándije rō jéé sāha ri jehē rō. <sup>2</sup> Chi nuū ndeé Tātá rī, iyó cuéhē vehe condee rō jijnáhan rō. Te núu jeé tu súcuan iyó, te je ni castūhun rí nuū rō nuū. Núu súcuan te quihín rī quisátuhva ri nuū cóyūcu rō. <sup>3</sup> Te jeé quihín rī sātúhva ri nuū cóyūcu ró, te ndiji ri quinaquihin ri rohó quihín yō, návaha suni cóyūcu ró nuū cóndee máá rí. <sup>4</sup> Te je cájini rō ndé nuū quihín rī, te cájini rō ndese jinū rō yūcuán. Achí yá.

<sup>5</sup> Te ni cahān Tomás jín yá:

Tu cájini na ndé nuū quihín ni, ¿te ndese cuni ná ichi jínú yūcuan núu súcuan?

<sup>6</sup> Te ni cahān Jesús jín de:

Máá rí cúu ichi jinū rō andiví, te máá rí cúu jnūhun ndaā jín jnūhun cotecu rō ní cáni. Te ni in ma jinú nuū Tatá rī te núu tú ruhū. <sup>7</sup> Te nuū je ni cájini rō ruhū, te suni je ni cájini rō Tatá rī núu súcuan. Te ndé vijna je cájini rō yá, chí je ni cajito ró nuū rī, achí yá.

<sup>8</sup> Te ni cahān Felipe jín yá:

Stéén ni Tātá ni núu ná, te na cúvaha ni na jijnáhan ná, áchí de.

<sup>9</sup> Te ni cahān Jesús:

Felipe, je ni cuu cuehē quiví jica ri jín rō jijnáhan rō, ¿te á ná tu cuni rō ndé in cúu ri naun? Tēe jeé jito ruhū, suu Tātá rī jito de. Núu súcuan ¿te najehē cahán rō jeé steén rī Tatá rī nuū rō? <sup>10</sup> ¿A tu cándije rō jéé in-ni cúu ri jín Tatá rī, te Tātá rī in-ni cúu ya jín rí, máá yá sāha tācá jniñu jeé sāha rí. <sup>11</sup> Candije rō jijnáhan rō jéé in-ni cúu ri jín máá Tātá rī, te Tātá rī in-ni cúu ya jín rí. Te núu tu cájēcūhun ni rō, te cándije rō ruhū siquí tācá jniñu sāha rí. <sup>12</sup> Jendaá cahán rī jín rō, núu ndé ñayuu candije ruhū, jniñu jéhu jeé sāha ri yáhá, suni sāha i. Te jéhu ga jniñu sāha i vésú yáhá, chí quinhun rī nuū ndeé Tatá rí. <sup>13</sup> Te tācá na-ni vé cacán rō nuū Tatá rí siquí jeé cándije rō jéé cúu ri Sēhe ya, te sāha ri jeé cacán rō, te súcuan steén rī jeé yóhyo

cújéhu Tātá rí. <sup>14</sup> Chi tācá na-ni vé cacán rō siquí jeé cándije rō ruhū, te sāha nahín rí.

*Jeé ni jéñuhun ya jeé tají yá Espíritu Santo*

<sup>15</sup> Te núu maní rō jín rī jijnáhan rō, te na squícu ró jniñu ndácu ri nuū rō. <sup>16</sup> Te cacán tahú rí nuū Tatá rí, te tají yá inga Yaā chindéé ñáhán rohó, te sāha ya jeé cóo sī ni rō jijnáhan rō. Te Yaā un cúu máá Espiritu jeé steén jnūhun ndaā, te condee yá jín rō ní cáni. <sup>17</sup> Te ñayuu ñayiví má cúu cuatáhú i ya, chí tu cúu coto i nuū yá, ni tu cúu cuni i ndese Yaā cúu ya. Te máá rō chí je cájini rō ndese Yaā cúu ya, chí ndeé yá jín rō, te condee yá iní anuá rō ní cáni. <sup>18</sup> Ma stóo uun ri rohó, chí ndiji ri nuū rō. <sup>19</sup> Jecu na quiví te ma cóto ga ñayuu ñayiví núu rí. Te máá rō jijnáhan rō chí coto ró núu rí, chí cotecu rí ní cáni, te jeé yúcuau suni cotecu máá rō. <sup>20</sup> Te quiví ún te cuni rō jeé in-ni cúu ri jín Tatá rí, te máá rō in-ni cúu ró jín rí jeé ndeé rí iní anuá rō jijnáhan rō. <sup>21</sup> Te na-ni ñayuu núu ñūhun ni i jniñu ní ndacu rí, te squícu i, ñayuu un cúu jeé maní ndije jín rí. Te ñayuu jeé maní jín rí, suni coo maní Tatá rí jín i. Te suni ruhū coo maní rí jín i, te steén rí nuū i jeé nduú rí jín i. Achí yá.

<sup>22</sup> Te ni cahān Judas jín yá (te nasūu téé cúu Iscariote):

Najehē cúu jeé steén ni máá ní nuū ná, te nuū ñayuu ñayiví chí tuú?

<sup>23</sup> Te ni cahān Jesús:

Ñayuu jeé maní jín rí, chí cásquicu i jeé cahán rí. Te coo maní Tatá rí jín i. Te Tātá rí jín máá rí quijicoo ri cundúú rí jín i. <sup>24</sup> Te ñayuu jeé tú maní jín rí, tu cásquicu i jeé cahán rí. Te jnūhun cájini sōho ró cáhan rí, nasūu jnūhun máá rí cúu, chí jnūhun máá Tātá rí jeé ní tají ruhū cúu.

<sup>25</sup> Tāca jnūhun yáha cáhan rí jín rō ní ní íne ga rí jín rō. <sup>26</sup> Te Tātá rí chí tají yá Espiritu Santo, quiji nucuiñi nuū rí. Te máá yá chindéé ñáhán yá rohó, te sāha ya jeé cóo sī ni rō. Te steén yá tāca jnūhun nuū rō, te nacachi tucu ya tāca jéé ni cahán rí jín rō.

<sup>27</sup> Te jeé quihín rí, te sāha ri jeé cóo ndeyí coo sī ni rō. Nájñuhun iyó ndeyí sī ni máá rí, suni súcuan coo ndeyí sī ni rō sāha rí. Te jeé sāha ri jeé cóo ndeyí sī ni rō, tu quijnáhan jín jnūhun ndeyí cácahān ñayuu ñayiví. Ma cuculhyá ni rō siquí tāca jnūndóho, te ni ma yúhu ró. <sup>28</sup> Je ni cájini sōho ró jéé ni cáhan rí jeé quihín rí, te ndiji ri cundúú rí jín rō. Te núu cáhíyo maní vaha rō jín rí, te cusí ni rō jeé ni cáhan rí jeé nuhún rí nuū Tatá rí. Chí cújéhu ga Tatá rí vijna vésú ruhū. <sup>29</sup> Je ni castūhun rí nuū rō tāca jnūhun yáha nde ná tu coo, návaha núu je ni cuu, te cándije rō ruhū jijnáhan rō.

<sup>30</sup> Ma cahán rí cuehē gā jnūhun jín rō, chí je vėjí jexeén jeé ndácu jniñu iní ñayiví yáha. Te tú na vé cúu sāha siquí rí nuú. <sup>31</sup> Te na

cóo nájñuhun ni ndacu Tátá rí jñiñu nuñ rí, návāha cuni ñayuu ñayivi jéé maní rí jín Tátá rí, te sáha ri jñiñu ní ndacu ya. Ndocuifñi jijnáhan ró na quíngoo yó. Achí yá.

*Jesús cúu nájñuhun yoyúcu uva*

## 15

<sup>1</sup> 'Máá rí cúu nájñuhun yoyúcu uva váha ndaá, te Tátá rí cúu nájñuhun tēe ndíto yoyúcu uva un. <sup>2</sup> Te máá ró chi cácuu ró nájñuhun ndaha, te núu tu jéhe ró ndehē te quende yá rohó. Te núu cácuu ró nájñuhun ndaha jéé jéhe ndehē, te nasándoo ya nacahnde yá rohó nájñuhun jéé cúu ró ndaha ún, návāha cuāha ró cuéhē gā ndehē. <sup>3</sup> Te máá ró chi je ni candundoo ánuá ró jín jñuhun ni steén rí nuñ rō, nájñuhun ndúndoo ndaha uva. <sup>4</sup> Na cundúu ró jín rí, te suni máá rí cundúu rí jín rí. ñin ndaha uva ma cúu cuāha ndehē jéé maá, te núu tu yjññi jicā yóho. Te suni súcuan máá ró, ma cúu sáha ró jñiñu váha te núu tu cundúu ró jín rí.

<sup>5</sup> 'Máá rí cúu yoyúcu un, te máá ró cácuu ndaha rí. Ñayuu jéé nduú jín rí, te ruhú ndúu rí jín i, máá i cúu nájñuhun ndaha jéé jéhe cuehē ndehē. Chi núu tú cundúu ró jín rí, te tú cuiti na jñiñu váha cuu sáha ró.

<sup>6</sup> Ñayuu jéé tu cundúu jín rí, quende yá i nájñuhun ñin ndaha uva, te ichí. Te ndoho i nájñuhun ndaha uva un jéé ndutútú te cayú nuñ ñuhún.

<sup>7</sup> 'Núu ndúu ró jín rí, te cañuhun ni ró jñuhun cáhān rí, yúcuán na te cacān ró na-ní vé cácuni ró, te sáha ri jéé cacāhān ró. <sup>8</sup> Te núu cásáha ró cuéhē jñiñu váha, súcuan cástéén ró jéé cúu ndíje ró ñayuu cascuáha jín rí, te súcuan nácani ñayuu jéé yóhoo cújéhu Tátá rí. <sup>9</sup> Nájñuhun maní Tátá rí jín rí, suni súcuan maní rí jín ró jijnáhan ró. Núu súcuan te ma siaá ró jñuhun maní rí jín ró. <sup>10</sup> Núu squícu ró jñiñu ní ndacu ri nuñ rō, te níni coo maní rí jín ró, nájñuhun máá rí squícu ri jñiñu ní ndacu Tátá rí nuñ rí, te níni iyó máni yá jín rí.

<sup>11</sup> 'Súcuan ni cahān rí jín ró návāha coo sñi ni ró nájñuhun iyó sñi ní rí, chi nde cusñi teyí ni ró. <sup>12</sup> Te yāha cúu jñiñu ndácu ri nuñ rō jijnáhan ró: jéé na cundáhú ní ró jñáhan ró nájñuhun cundáhú ní rí rohó. <sup>13</sup> Núu ñin tēe cuu de jehē amigo de, te tuá na vé cúmaní gā sáha de jéé cundáhú ní de amigo de. <sup>14</sup> Te máá ró cácuu amigo rí núu squícu ró jñiñu ndácu ri nuñ rō. <sup>15</sup> Ma cahān gā ri mozo jín ró, chi ñin mozo tu cástühún patrón nuñ i ndese jéni ni de sáha de. Chi sa suhva amigo cahān rí jín ró, chi je ni castühun rí nuñ ró táca jñuhun ni cahān Tátá rí jín rí. <sup>16</sup> Máá rí ni nacāji rohó jéé jnáma ri rohó, te nasūu máá ró ní cáncani ni xihna gā jéé cóndiquín ró ruhú. Te ni jeni rí rohó jéé caca ndaá ró te scándíje ró cuéhē ñayuu jéé cuu i sēhe ri níñ

cáni. Te súcuan te ndáhi jéé cacān ró nuñ Tátá rí squí jéé cácandíje ró ruhú, sáha ya jéé jicān ró. <sup>17</sup> Te yāha cúu jñiñu ndácu ri nuñ rō: jéé na cundáhú ni ró jñáhan ró.

*Jéé cáquití ni ñayuu ñayivi núu Jesús jín núu ñayuu cácandíje*

<sup>18</sup> 'Te núu cáquití ni ñayuu ñayivi núu ró jijnáhan ró, te je cájini ró jéé xihna gā nuñ máá rí ni caquití ni i. <sup>19</sup> Te núu jéé iyó gá ró jín modo ñayuu ñayivi, te coo maní ñayuu ñayivi jín ró nuñ, nájñuhun maní i jín jñáhan i. Te ni nacāji ri rohó jéé tuá coo ró jín modo ñayuu ñayivi. Te jéé yúcuan cáquití ni i nuñ rō, chí tuá cácuu ró cuenta ñayivi. <sup>20</sup> Nucúhūn ni ró jñuhun ni cahān rí jín ró: Núu tu iyó yñíñuhun ñayuu nuñ patrón, te naga ni cuu nuñ mozo de. Núu ni cajito xeén i ruhú, te suni súcuan coto xeén i rohó jéé cácuu ró mozo rí. Te núu jéé ni cájetáhú i jñuhun ni steén rí, te suni cuatáhú i jñuhun cástéén ró. <sup>21</sup> Te táca jñiñu yáha sáha i jín ró jéé squícu ruhú, chí tu cájini i Yáa ní tají ruhú vèji ri.

<sup>22</sup> 'Núu jéé tu ní quíji ri nacani ri jñuhun nuñ i, te ma cóo cuéchi i núu. Te vijna chí ma cúu ga cahān i jéé tu jín i jéé iyó cuéchi i.

<sup>23</sup> Ñayuu jéé cáquití ni nuñ rí, suni nuñ Tátá rí cáquití ni i. <sup>24</sup> Núu jéé tu ní sáha ri jñiñu jéhu nuñ i jéé ní ñin tēe tu ní sáha de súcuan, te ma cóo cuéchi i núu. Te vijna je ni cajito i jñiñu ún, te vésú súcuan te cáquití ni i nuñ rí jín núu Tátá rí. <sup>25</sup> Te súcuan cásáha i návāha squícu jñuhun yósó núu tútu ley Yáa Dios jéé cánevāha i: Ni caquití ni i nuñ rí, vésú tú na cuéchi ri, achí.

<sup>26</sup> 'Te tají rí maá Yáa chindéé ñáhān rohó te sáha ya jéé cóo sñi ni ró. Te Yáa un cúu máá Espíritu jéé steén jñuhun ndaá, te quíji ya nde nuñ Tátá rí, te nacani cáji yá jñuhun rí. <sup>27</sup> Te suni máá ró nacani ró jñuhun ri, chí je cáhñn ró jín rí nde náa ni quejéé rí nacani ri jñuhun.

## 16

<sup>1</sup> 'Tāca jñuhun yáha ní cahān rí jín ró návāha ma náyūhu ró jéé quíji jñúndóho. <sup>2</sup> Chi quenehen i róho jéé ma cuāha ga i jñuhun cone ró táca vehe ñi sinagoga. Te quee quiví jéé cahñi i róho, te caní ni i jéé ñin jñiñu váha ní sáha i nuñ Yáa Dios. <sup>3</sup> Te súcuan sáha i jín ró, chí tu cájini cuiti i máá Tátá rí ní máá rí. <sup>4</sup> Te ní cahān rí jñuhun yáha jín ró návāha núu je ni quee quiví jéé súcuan coo, te nucúhūn ni ró jéé jé ni cahān rí jín ró.

*Jñiñu sáha Espíritu Santo*

'Te tu ní cahān rí jñuhun yáha jín ró nde xihna ñuhún, chí ñne máá rí jín ró jijnáhan ró. <sup>5</sup> Te vijna chí nuhún ri condee rí jín Yáa ní tají ruhú vèji ri. Te ni ñn ró tu cájñuhun ró ndé nuñ quíhñ rí. <sup>6</sup> Chi máá jéé cácuufhyá ndasí ní ró jéé ní cahān rí súcuan jín ró. <sup>7</sup> Jendaá cahān rí jín ró: Jéé váha máá ró

jijnáhan ró cúu jeē quihín rī. Chi núu tú quihín rī, te ma quiji Yaā chindéé ñáhan róhó te sáha ya jeē cóo sīi ni rō. Te núu cuahān rī, te tají rī yā quiji ya nuū rō. <sup>8</sup> Te jeē quée yā, te stéén yā nuū ñayuu ñayivi jée iyó cuéchi i, jín ndese quívicoo i ichi ndaa, jín jée sándaā Yaā Dios siquī cuéchi i. <sup>9</sup> Stéén yā jeē iyó cuéchi i, chi tu cácanđe i ruhū. <sup>10</sup> Te stéén yā siquī ichi ndaa, chi máá rī nuūhūn rī nuū Tatá rī, te ma cóto ga rō nuū rī. <sup>11</sup> Te stéén yā siquī jeē sándaā Yaā Dios cuéchi ñayuu, chi je ni cundaā jeē jnahnú ndetū máá jéxeén jeē cujéhu ini ñayivi yáha.

<sup>12</sup> Te iyó cuéhē gā jnūhun cúní rī cahān rī jín ró, te ma cúu jecūhun ni rō vijna. <sup>13</sup> Te jeē quée máá Espiritu jeē stéén jnūhun ndaa, te máá yā stéén táca jnūhun ndaa un núu rō. Chi ma cahān yā jeē máá yā, chi cahān yā táca jée jíní sōho ya cahān Yaā Dios. Te stéén yā siquī táca jniñu jeē coo. <sup>14</sup> Te stéén yā jeē cujéhu rī, chi nacastūhun yā nuū rō táca jnūhun jeē jé ni cahān rī, te sáha ya jeē jécūhun ni rō. <sup>15</sup> Ndihi ndese cújéhu Tatá rī, suni súcuan cújéhu máá rī. Jeē yúcuan ní cahān rī jeē Espiritu Santo nacastūhun yā nuū rō táca jnūhun jeē jé ni cahān rī, te sáha ya jeē jécūhun ni rō jijnáhan ró.

#### *Vēsú cácuulhyá ni rō, te ndusī ni rō*

<sup>16</sup> Jecu na te ma cóto ga rō nuū rī. Te jecu tucu quiví te coto tucu ró núu rī, chi quínuhun rī nuū ndeé Tatá rī. Achí yá.

<sup>17</sup> Yúcuan na te sava tēe cácuáha jín yá, ni cacajnūhun jñahan de:

¿Na jnūhun cúu jeē yáha jeē cahān yā jín yó? Chi achí yá jeē jecu na te ma cóto ga yó nuū yá, te jecu tucu quiví te coto tucu yó núu yá, chi siquī jeē quínuhun yā nuū ndeé Tatá yá. <sup>18</sup> ¿Na jnūhun cúu jeē yáha jeē cahān yá, jecu na? Tu cájecūhun ni yó na vé cúu jeē cahān yá. Achí de.

<sup>19</sup> Te ni jíní Jesús jeē cáconi de cajnúhún de ya. Te ni cahān yā jín de:

¿A cácajnūhun jñahan ró na vé cúu jeē ni cahān rī jín ró jeē jecu na te ma cóto ga rō nuū rī, te jecu tucu quiví te coto tucu ró núu rī? <sup>20</sup> Jendaá cahān rī jín ró jeē ndahyū rō jijnáhan ró te cucuíhyá ni rō, te ñayuu ñayivi chi sa cusī ni i. Te vēsú cucuíhyá ni rō, te sa ndusī ni rō jeē cóto tucu ró núu rī. <sup>21</sup> In ñahan núu cuacuyajni scácu ña, te jéhnde chíji ña, chi je ni quee hora jeē scácu ña. Te núu je ni scácu ña sūchi lúlí, te tuá nahān ña jeē ní ndoho ña, chi cusī ni ña jeē ní cacu sēhe ña. <sup>22</sup> Te suni súcuan cúu jeē cándoho ró vijna, chi cácuulhyá ni rō jín rī. Te jecu ni quiví te coto jñahan tucu yó, te cusī ndasí ni rō. Te ni in ma cúu casi jeē jéxéén ni rō.

<sup>23</sup> Te quiví ún chi tú na vé cacān gā rō nuū rī. Chi jendaá cahān rī jín ró jeē nuū máá Tatá rī cacān rō, te sáha ya ndihi jeē cájicān

rō, siquī jeē cácanđe ró rúhū. <sup>24</sup> Nde vijna te ná tu cacān rō nuū Tatá rī jeē jín síhvi rī. Te vijna te na quéjéé ró cacān rō jín síhvi rī, te nihín rō, náváha cusī ndasí ni rō.

*Je ni quende yā poder ndihi jeneé cáhiyo ini ñayivi*

<sup>25</sup> Táca jnūhun yáha ní cahān yatá rī jín ró. Te quee quiví jeē ma cahān yatá gá rī jín ró, chi sa suhva castūhun cáji rī nuū rō siquī Tatá rī. <sup>26</sup> Te quiví ún chi cacān rō nuū Tatá rī siquī jeē cácanđe ró rúhū. Te tu cahān rī jín ró jeē cacān tahú rī jehe rō nuū Tatá rī. <sup>27</sup> Chi máá Tatá rī je cundáhú ni yá rohó siquī jeē cáhiyo maní rō jín rī, te ni cacandje ró jée ndé nuū máá yá véji rī. <sup>28</sup> Ni quenda ri nde nuū Tatá rī, te ni quee rī ini ñayivi. Te vijna te quenda rī ini ñayivi, te nuhūn tucu rī nuū Tatá rī. Achí yá.

<sup>29</sup> Te ni cacāhān tēe cácuáha jín yá:

Vijna te cahān caji ní, te tuá cahān yatá ní.

<sup>30</sup> Vijna te cájini na jée jíní ni ndivii cuti, te tuá jíní nūhún jée cájnūhún ni in ná nihín. Jeē yúcuan cácanđe ná jée véji ní ndé nuū Yaā Dios. Achí de.

<sup>31</sup> Te ni cahān Jesús jín de:

¿A ndé vijna te cácanđe ró naún? <sup>32</sup> Te quiji quiví, te je ni quee, jeē cutié núu ró quínungoo ró ná vehe ná vehe rō, te stóo máñuhún ró ruhū. Te nasūu jée quéndóo máñuhún rī, chi Tatá rī ine ya jín rī. <sup>33</sup> Táca jnūhun yáha ní cahān rī jín ró náváha coo ndeyí coo sīi ni rō siquī jeē cácanđe ró rúhū. Ini ñayivi chi cánuú coto ró jnúndóho. Te vēsú súcuan te na cóo sīi ni rō, chi je ni quende rī poder táca jeneé cáhiyo ini ñayivi. Achí yá.

*Jeé ni jicān tahú Jesús jehē ñayuu cácanđe*

## 17

<sup>1</sup> Te ná ni cahān Jesús táca jnūhun yáha, te ni ndacoto ya ichi ándiví, te ni cahān yá:

Tatá, je ni quee quiví jeē ndóho ná. Vijna te stéén ní jée cujéhu máá ná jeē cúu ná Sēhe ní, náváha suni máá ná stéén na jée cujéhu máá ní. <sup>2</sup> Chi ní sáha ní jée ndóo jniñu ná siquī táca ñayuu, náváha táca ñayuu jeē ní jéhe ní núu ná, cotecu i níf cáni sáha ná. <sup>3</sup> Te suhva cúu jnūhun cotecu i níf cáni: suu jeé na cúní i nihín jée mañuhún-ni ní cúu Yaā ndaa, jín jée cúní i sáña jeē cúu ná Jesucristo, Yaā ní tají ní.

<sup>4</sup> Je ni stéén na núu ñayuu ñayivi jée cujéhu ní, te je sinu ná jniñu ní ndacu ní núu ná. <sup>5</sup> Te vijna, Tatá, sáha ní jée ndujéhu tucu ná ndé nuū néne ní, najnúhun cújéhu ná jín ní nde ná tu jecóo ñayivi.

<sup>6</sup> Ñayuu jeé ní nacáji ní ini ñayivi, ni jéhe ní i nuū ná, te ni stéén na núu i ndese Yaā cúu ní. Cuenta máá ní cúu i, te ni jéhe ní i nuū ná. Te ni cajetáhú i jnūhun ní, te ni casquíc i. <sup>7</sup> Te vijna te cájini i jeé ndé nuū máá ní véji

tāca jēē iyó jín ná. <sup>8</sup> Chi tāca jnúhun ni cahān ni jín ná, ní castúhun ná núu i, te ni cajetáhú i. Te ni cajini i jeē ní quenda ndije ná ndé nuū maá ní, te ni cacandíje i jeē maá ní ni tají sáña.

<sup>9</sup> Te jícán tahú na jéhē maá i jínáhan i. Tu jícán tahú na jéhē ñayuu ñayívi jēē tu cācandíje, chí sa jehē maá ñayuu ni jēhe ni núu ná, chí cuenta maá ní cácuu i. <sup>10</sup> Te tācá i jeē yíhi i ndaha maá ná, suni cuenta maá ní cúu. Te tācá i jeē cúu i cuenta maá ní, suni cuenta maá ná cúu i. Te cástéén i ndese cújéhu ná.

<sup>11</sup> Te tuá condee ná ini ñayívi. Te maá i chí quendōo i ini ñayívi, te maá ná chí najeē ná condee na jín ní. Yaā ì Yaā ndoo cúu ní, Tātá. Te jín poder ní condito ní tāca ñayuu ni jēhe ni núu ná, návāha inuú na cóo ni i jínáhan i, nájñuhun cúu maá yó. <sup>12</sup> Te jeē ní condee na jín i ini ñayívi, te jín poder ni ní condito ná i. Tāca ñayuu ni jēhe ni núu ná, ni condito yúcún ná i. Te tu ní jēhe na jnúhun naa i jínáhan i, chí maá ìn-ni tēe jeē je cúu de tēe jnahñū ndetū, návāha squícu jnúhun yósó núu tútu ìi.

<sup>13</sup> Te vijna te najeē na núu ní, te cáhán na tāca jnúhun yáha jín i níni jēē íne ga ná ini ñayívi, návāha na cóo sīi ndasí ni i nájñuhun cúu ni maá ná. <sup>14</sup> Ni castúhun ná jnúhun ní núu i. Te ni caquití ni ñayuu ñayívi núu i, chí tuá cácuu i cuenta ñayívi, nájñuhun maá ná tu cúu ná cuenta ñayívi. <sup>15</sup> Te tu jícán tahú na jēē quénehen ní i ini ñayívi, chí sa suhva jēē cóndito ní i nuū jexeén. <sup>16</sup> Nasūu cuenta ñayívi cácuu i, nájñuhun maá ná jēē násūu cuenta ñayívi cúu ná. <sup>17</sup> Jín jnúhun ndaā ní te sáha ní jēē coo ndoo coo ìi i nuū ní. Tāca jnúhun cáhán maá ní cúu jnúhun ndaā. <sup>18</sup> Te nájñuhun ni tají ní sáña ní quiiji ná ini ñayívi, suni súcuu tají ná i nacani i jnúhun ní núu ñayuu ñayívi. <sup>19</sup> Te jehē maá i cúu jeē jēhe ná maá ná cuu ná, návāha suni maá i coo ndoo coo ìi i nuū ní jēē jín jnúhun ndaā.

<sup>20</sup> Te nasūu maá ìn-ni jehē ñayuu yáha jícán tahú na, chí suni jehē tāca gá ñayuu jēē candíje i sáña núu na cúní sōho i jnúhun jēē nácani maá i jínáhan i. <sup>21</sup> Te jícán tahú na jēē inuú na cóo ni i jínáhan i. Nájñuhun ìn-ni cúu ní jín ná, Tātá, te ìn-ni cúu ná jín maá ní, suni súcuu na cóo inuú i jín yó. Te cúní na jēē inuú na cóo ni i, návāha na cándíje ñayuu ñayívi jēē maá ní ni tají ní sáña. <sup>22</sup> Ni sajhéhu ná i nájñuhun ni sajhéhu ní sáña, návāha inuú na cóo ni i, nájñuhun inuú-ni cúu yó. <sup>23</sup> Te ndúú ná jín i, te ndúú ní jín ná, te súcuu te inuú cuiti coo ni i jínáhan i. Yúcuán na te cuni ñayuu ñayívi jēē maá ní ni tají ní sáña, jín jēē maní ndasí ní jín i nájñuhun maní ni jín ná.

<sup>24</sup> Tātá, maá ní ni jēhe ní i nuū ná. Te cúní na jēē cóyúcú i jín ná nuū cóndee ná, návāha coto i ndese luu cújéhu ná ni sáha ní. Chí iyó

maní ndasí ní jín ná nde ná tu jecōo ñayívi te nde vijna. <sup>25</sup> Yaā ndaā cúu ní, Tātá, te ñayuu ñayívi tu jín i níhín, te maá ná chí jín na níhín. Te ñayuu yáha chí cájini i jeē maá ní ni tají sáña. <sup>26</sup> Ni steén na núu i jínáhan i ndese Yaā cúu ní. Te steén gā na súcuu nuū i, návāha na cóo maní ndasí i jín jnáhan i, nájñuhun iyó maní ndasí ní jín ná, te návāha condee ná ini anuá i. Achí yá.

*Jeē ní cajñi de Jesús*

*(Mt. 26.47-56; Mr. 14.43-50; Lc. 22.47-53)*

## 18

<sup>1</sup> Te nuū ní cuu ni cahān Jesús tāca jnúhun yáha, te ni quenda ya jín tēe cáscuáha jín yá, cuahān yā inga lado yuu Cedrón. Te yūcuu ñayó ìn huerto nuū ní quívi ya jín tēe cáscuáha jín yá. <sup>2</sup> Te Judas, tēe jeē nastúu de ya, suni jín de lugar un, chí cuehē jínu ni nataca Jesús yūcuu jín tēe cáscuáha jín yá. <sup>3</sup> Te ni jinú de yūcuu jín ìn grupo soldado jín jecu policía cándito templo, jēē ní catajái sutú cácujeñhu jín tēe grupo fariseo. Te cándiso de machete, te cájñi de linterna jín yiti. <sup>4</sup> Te Jesús je jín yā tāca jnúndóho jēē véji siquí yá. Te ni quenda ya ichi núu de, te ni cahān yá:

¿Ndé ìn cánanducú ró?

<sup>5</sup> Te ni cacahān de jín yá:

Jesús tēe ñuu Nazaret cánanducú rí.

Te ni cahān yá:

Maá rí cúu.

Te Judas, tēe jeē nastúu de ya, suni íne de jín tēe ún. <sup>6</sup> Te jeē súcuu ni cahān yá, maá rí cúu, te ni cajica yátá de, te ni cacotúú-ni de.

<sup>7</sup> Yúcuán na te ni cajñuhún tucu ya de:

¿Ndé ìn cánanducú ró?

Te ni cacahān de:

Jesús tēe ñuu Nazaret.

<sup>8</sup> Te ni cahān Jesús:

Je ni cachi rí jeē maá rí cúu. Te núu ruhú cánanducú ró, te maá-ni rí jñi ró, te tēe yáha na quíngoo de. Achí yá.

<sup>9</sup> Súcuu ni cuu návāha na squícu jnúhun jēē ní cahān yá jín Tátá yá: Tu ní jēhe na jnúhun naa ni ìn tēe jeē ní jēhe ni núu na, áchí yá. <sup>10</sup> Te Simón Pedro ndiso de ìn espada. Te ni tava de, te ni jehnde de sōho lado váha ìn tēe nání Malco. Te tēe un cúu de mozo maá sūtú cujeñhu. <sup>11</sup> Te ni cahān Jesús jín Pedro:

Nachuvāha espada rō ini cubierta. ¿A tu cánuú jēē ndóho rí jnúndóho yáha jēē ní sándaá Tátá rí jēē ndóho rí? Achí yá.

*Jeē ní indichi Jesús nuū sutú cujeñhu*

*(Mt. 26.57-58; Mr. 14.53-54; Lc. 22.54)*

<sup>12</sup> Yúcuán na te tācá soldado un, jín capitán de, jín tāca policía tēe hebreo un, ni cajñi de Jesús, te ni cajihni de ya. <sup>13</sup> Te xihna gā vehe Anás cuangoo de jín yá. Te tátá chíso Caifás cúu Anás. Te Caifás cúu maá sūtú cujeñhu ga cuiyá ún. <sup>14</sup> Te suu de ni

cachi nuū jnahan de hebreo jeē cānuū jéē cūū ñn tēe jehē nación de.

*Jeē ní cachi Pedro jeē tu jíní de ya*  
(Mt. 26.69-70; Mr. 14.66-68; Lc. 22.55-57)

15 Te Simón Pedro jín inga tēe scuáha, cándiquín de Jesús cuangoo de yatā yā. Te inga tēe scuáha ún chí jíní jnahan de jín sūtū cujéhnū. Jeē yúcuan ní quívi de jín Jesús ini patio vehe sūtū cujéhnū ún. 16 Te Pedro ni quendōo de yatā yehyí. Te máá tēe scuáha jéē jíní jnahan jín sūtū cujéhnū ún, ni quenda de ni cahān de jín ñahan ndíto yehyí, te ní squívi de Pedro ini patio. 17 Yūcuán na te ñahan ndíto yehyí un ní cajnúhún ña Pedro:

¿A násūū ñn tēe scuáha jín tēe índichi nuū sūtū un cūū ró?

Te ni cahān de:

Nasūu cūu ri, achí de.

18 Te tāca mozo jín policia un ní cascáyū de ñuhún jín tícayí, chí mijin sāha. Te cáhūn de cánasaā de. Te suní índichi Pedro, násaā de jín tāca tēe ún.

*Jeē ní stíchí sūtū cujéhnū ún Jesús*  
(Mt. 26.59-66; Mr. 14.55-64; Lc. 22.66-71)

19 Te sūtū cujéhnū un ní stíchí de Jesús ndé-ní cūū tēe cáscuáha jín yā, jín na jnúhun cūū jeē steén yā. 20 Te ni cahān Jesús:

Níní ní cahān rī nuū chíti ñayuu, ni cajini sōho ndihí ñayuu. Te níní ní steén rī jnúhun ini táca vehe ñi sinagoga jín ini templo cáhnu nuū ndutútū ndívii jnahan yó hebreo. Te tú ni ñn jnúhun ní cáhān sāhi rī. 21 ¿Te naun cájnūhun ró ruhū? Cajnúhun ñayuu ní cajini sōho jnúhun ní cahān rī, te máá i cachi ndese ni cahān rī. Chí cajini i ndese ni cahān rī.

22 Te jeē ní cahān Jesús súcuan, te ñn policia ndíto templo jeē índichi de yūcuán, ní cani-ni de nuū yā. Te ni cahān de jín yā:

¿A súcuan cáhān rō jín sūtū cujéhnū naún?

23 Te ni cahān Jesús:

Núu ní cahān rī ñn jnúhun néé, cachi na jnúhun néé ní cahān rī. Te núu tu ní cáhān rī ñn jnúhun néé, ¿te naun cáni ró ruhū? achí yā.

24 Yūcuán na te Anás, sūtū cujéhnū un, ní taji de ya, núhni yā cuahān yā nuū Caifás, tēe cūū máá sūtū cujéhnū ga.

*Jeē ní cachi tucu Pedro jeē tu jíní de ya*  
(Mt. 26.71-75; Mr. 14.69-72; Lc. 22.58-62)

25 Te níní jéē súcuan cūū, te índichi-ni Pedro, násaā de yuñhún. Te ni cacahān jín de: ¿A násūū ñn tēe scuáha jín tēe un cūū ró, chí naún?

Te máá de tu ní cáchi de:

Nasūu cūu ri, achí de.

26 Yūcuán na te ñn mozo sūtū cujéhnū, jnahan tēe jeē ní jehnde Pedro sōho, ní cahān jín de:

¿A násūu máá ró cūū jeē ní jito ri jín de ini huerto?

27 Te Pedro tu ní cáchi tucu de. Te ni cana-ni líhi.

*Jeē ní índichi Jesús nuū Pilato*  
(Mt. 27.1-2, 11-14; Mr. 15.1-5; Lc. 23.1-5)

28 Yūcuán na te ni quendacoo de jín Jesús vehe Caifás, cuangoo de jín yā nde palacio tēe nación Roma jeē cūū gobernador. Te je cuacundijin. Te ñayuu hebreo tu ní quívicoo i ini palacio, návaha tu stívi i ley i jeē cahán jeē ma quívi i ini vehe ñn ñayuu jeē násūū hebreo cūū. Chí núu súcuan te ma cūū cuxíní i víco pascua jeē cóo inga quívi ún. 29 Yūcuán na te ni quenda Pilato, tēe cūū gobernador, ni cahān de jín i jínjahan i:

¿Na cuēchi cájicān rō síquí tēe yáha?

30 Te ni cacahān i:

Núu jeē násūu tēe cúnéé cūū tēe yáha, te ma jnái ná de jeē quíndeca ná de nuū ní núú, achí i.

31 Te ni cahān Pilato:

Cuángoo jínjahan ró, te sándaā rō síquí de jín ley cánevāha máá ró.

Te ni cacahān ñayuu hebreo un:

Máá ná jeē cácuu ná ñayuu hebreo, tú na permiso cánevāha ná jéē cáhni ná ní ñn ñayuu.

32 Súcuan ni cacahān i návaha squícu jnúhun jeē ní cachi Jesús jeē quívi ya ndaha tēe Roma te cahni de ya jicā cruz. 33 Te ni ndívi Pilato ini palacio, te ni cana de jeē na quíji Jesús. Te ni cajnúhún de ya:

¿A máá ró cūū Rey ñayuu hebreo naún?

34 Te ni cahān Jesús jín de:

¿A cájnūhun ró ruhū jeē súcuan jéni ní máá ró, chí jéē ní castatūhun ñayuu hebreo nuū ró?

35 Te ni cahān Pilato:

¿Chí tēe hebreo cūū ri jeē cúni rí? Ñayuu nación máá ró jín sūtū cácujehnū ní cachihi rōhó ndaha rí. ¿Na vé ní sāha ró núu súcuan? Achí de.

36 Te ni cahān Jesús:

Nasūu jéē ndácu ri jniñu nájnūhun cándacu táca rey ñayivi yáha. Chí núu jeē ñayuu ñayivi ní casáha jeē cūū ri rey, yūcuán na te tēe cándiquín ruhū, cuajnáhan de návaha ma quívi ri ndaha jnahan ri hebreo nuū. Te nasūu núu ñayivi yáha cūū jeē ndácu ri jniñu vijna. Achí yā.

37 Yūcuán na te ni cahān Pilato jín yā:

¿Te á ñn rey cūū ró jéē súcuan?

Te ni cahān Jesús:

Rey cūū ri, nájnūhun cáhān rō. Ni quiji ri ní cacu ri ini ñayivi yáha návaha nacani ri jnúhun ndaa. Te ndihí ñayuu cájetáhú jnúhun ndaa, cajini nahín i jnúhun cáhān rī. Achí yā.

38 Te ni cahān Pilato:

¿Ndese cuni yō ndé ñn cūū máá jnúhun ndaa?

*Jeē ní cundaā jeē cūū yā*

(Mt. 27.15-31; Mr. 15.6-20; Lc. 23.13-25)

Te jeē ni cāhān de jnūhun yáha, te ni quenda tucu de nuū ñayuu hebreo. Te ni cāhān de jíin i:

Tú cuiti na cuēchi níhín rī siquī de. <sup>39</sup> Te iyó costumbre maá ró jijnáhan ró jée vico pascua te siaá rī ñin tēe ñe vecāa nuū rō. ¿Te á tu cáculi rō jeē siaá rī Rey rō nuū rō? Achí de.

<sup>40</sup> Yūcuán na te ndivii i ni cacana jee tucu i:

Ma siaá ni tēe jíinā, chí Barrabás siaá ni, achí i.

Te tēe cuihná cúu Barrabás.

## 19

<sup>1</sup> Yūcuán na te ni cāhān Pilato jeē na jnā soldado Jesús, te caní de ya jíin cuarta ñii.

<sup>2</sup> Te ni casáha de ñin corona iñu, ni cachuhun de xinī yā. Te ni cachuhun de ya ñin sahma cuehé ndíhí jée cúu sahma rey. <sup>3</sup> Te ni jecandichi de nuū yā, te ni cacahān catá de:

Nacā jeē váha rey cúu Rey ñayuu hebreo. Te ni cacani de nuū yā.

<sup>4</sup> Yūcuán na te ni quenda Pilato inga jínu, te ni cāhān de jíin ñayuu:

Yāhá condēhe ró tava rī de, návāha na cúni rō jeē tú na cuēchi níhín rī siquī de.

<sup>5</sup> Te ni quenda Jesús, ñūhun ya corona iñu jíin sahma cuehé ndíhí un. Te ni cāhān Pilato jíin i:

Yāhá condēhe ró de jíináhan ró.

<sup>6</sup> Te nuū ní cajito sutū cáculjēhnu jíin táca policia nuū yā, te ni cacana jee de:

Cata caa ní de jicā cruz, na cúu de.

Te ni cāhān Pilato:

Núu súcuan te najni máá ró de te cahni rō de. Chí ruhū, tú na cuēchi níhín rī siquī de.

<sup>7</sup> Te ni cacahān ñayuu hebreo un:

Cānevāha ná ñin ley, te jeē siquī ley un cánuū jée cúu de, chí sáha de máá de jeē Séhe Yā Dios cúu de.

<sup>8</sup> Te jeē ní jini sōho Pilato jnūhun yáha, te víhyá gā ni yūhú de. <sup>9</sup> Te ni ndivicoo tucu de ñin palacio, te ni cajnuhūn de Jesús:

¿Ndé nuū véji ró?

Te tu ní cāhān cuiti Jesús jíin de. <sup>10</sup> Yūcuán na te ni cāhān de jíin yá:

¿Naun tu cāhān rō jeē cāhān rī? ¿A tu jíin rō jeē ndíso jniñu rī jeē cáhni rī rohó jicā cruz, te suni ndíso jniñu rī jeē siaá rī rohó quíhín rō?

<sup>11</sup> Te ni cāhān Jesús:

Núu tu ní sáha Yā Dios jeē ndíso jniñu ró, te tú na vé cúu sáha ró siquī rī. Jeé yūcuán tēe jeē ní nacuāha ruhū ndaha ró, cuēchi xeēn gā condee siquī de vesú maá ró. Achí yá.

<sup>12</sup> Yūcuán na te nde hora un nducú ndéyí Pilato ndese siaá de ya. Te ñayuu hebreo chí cácana jee i:

Núu siaá ní tēe jíinā, te tu cúu ní amigo rey Roma jeē cujéhnu ndácu jniñu núu súcuan. Chí táca tēe jeē sáha de rey maá de, núu

súcuan te cúu de enemigo siquī rey un. Achí i.

<sup>13</sup> Te jeē ní jini sōho Pilato jnūhun yáha, te ni ndacu de jniñu jeē na quēnda Jesús ñin vehe quiji ya. Te ni cucōo de silla nuū cúndaā jniñu, nuū máni máá yūu ní jecāva, te lugar un nání Gabata nuū yūhu hebreo. <sup>14</sup> Te cuacuca cahuxí uū, te jehíni quiví ún quejéé vico pascua. Te ni cāhān Pilato jíin ñayuu hebreo:

Yāha índichi maá rey rō.

<sup>15</sup> Te ni cacana jee i:

Na cúu de. Cata caa ní de jicā cruz, achí i.

Te ni cāhān Pilato jíin i:

¿A jée cata caa rī rey rō jicā cruz naún?

Te sutū cáculjēhnu un ní cacahān de:

Tuá na inga rey cānevāha ná jíináhan ná, chí máa-ni rey Roma jeē cujéhnu ndácu jniñu nuū ná.

<sup>16</sup> Yūcuán na te Pilato ni nacuāha de ya nuū i jeē na cúu yā jicā cruz. Te ni cajni i ya cuangoo i jíin yá.

*Jeē ní cacata caa de ya jicā cruz*

(Mt. 27.32-44; Mr. 15.21-32; Lc. 23.26-43)

<sup>17</sup> Te ní quenda Jesús, ndíso ya cruz yā, cuangoo de jíin yá ñin lugar nuū naní Yiqui Xiní, te nuū yūhu hebreo naní Gólgota. <sup>18</sup> Te yūcuán ní cacata caa de ya jicā cruz. Te suni ní cacata caa de uū tēe nuū uū gā cruz, ñin ñin de ñin lado yā, te máá Jesús mēhñú. <sup>19</sup> Te suni ní ndacu Pilato jniñu jeē na cōndee jnūhun xiní cruz yā, jeē cāhān: Tēe yáha cúu Jesús ñuu Nazaret, Rey ñayuu hebreo, achí. <sup>20</sup> Te cuehé ñayuu hebreo ni cacahu i jnūhun yáha, chí máá yajni yuñúú cúu nuū ní cacata caa de ya. Te jnūhun un yósó jíin yuhu hebreo jíin griego jíin latín. <sup>21</sup> Te táca sutū cáculjēhnu nuū ñayuu hebreo, ni cacahān de jíin Pilato:

Ma tēe ní jée cúu de Rey ñayuu hebreo, chí sa suhva tēe ní jée maá de ni cāhān jeē cúu de Rey ñayuu hebreo.

<sup>22</sup> Te ni cāhān Pilato:

Ma násama rī jeē jé ni ndacu rī jniñu ni jecondee.

<sup>23</sup> Te soldado un, nuū ní cuu ni cacata caa de Jesús jicā cruz, te ni caquihin de sahma ya, te ni cajehnde de ni nduu cuñ parte, te ñin ñin parte ni cuu ñin ñin soldado un. Te suni ní caquihin de camisa yā. Te camisa un tu ní quícu, chí ni cunu ní. <sup>24</sup> Te ni cacahān maá de:

Ma cāhnde yō, chí váha ga na sáha yó sorteo, te na cōndēhe yó ndé ñin yó níhín, achí de.

Te súcuan ní squícu jnūhun yósó núu tútu ñi nde jenahán jée cāhān Jesús: Ni caquihin de sahma rī cuu maá de. Te ní casáha de sorteo siquī camisa rī. Achí. Súcuan ní casáha soldado un.

<sup>25</sup> Te yajni cruz nuū ndíta caa Jesús ñe náná yā, jíin cúhú ña María ñasihí Cleofas,

jiin María ñuu Magdala. <sup>26</sup> Te ni jito Jesús nuū naná yā jiin nuū tée scuáha jeē maní gā yā jiin, suni índichi de yūcuán. Te ni cahān yā jiin náná yā:

Náná, nde vijna te máa de nucuiñi de cuu de sehe ní.

<sup>27</sup> Yūcuán na te ni cahān yā jiin tée scuáha ún:

Nde vijna te cuu ña nájñuhun náná rō, achí yá.

Te nde hora un ní cana de ña cuacondee ña vehe de condito de ña.

*Jeē ni jihī Jesús*

(Mt. 27.45-56; Mr. 15.33-41; Lc. 23.44-49)

<sup>28</sup> Yūcuán na te ni jini Jesús jeē je ní jinu táca jniñu jeē cánuu ndoho ya. Te návaha squícu jñuhun cáhán tutu ii, te ni cahān yā:

Jichí rī ndute, achí yá.

<sup>29</sup> Te yucuan ún in tindoñó ñuhun chitú vinagre iyá. Te ni cachundaji de in cachí nuū vinagre un, te ni catee de xini in ndaha yújnu hisopo, te ni catee de yuhu ya jeē cóho ya. <sup>30</sup> Te ná ni jihī ya vinagre un, te ni cahān yā:

Je ni jinu, achí yá.

Te ni cáyi-ni xini yā, te ni jihī-ni ya.

*Jeē ní cují soldado lanza xiin ya*

<sup>31</sup> Te inga quiví ún coo vico pascua. Te tēe hebreo tu cáncuni de jeē cóndita caa ndīyi ún jíca cruz quiví ndétátú un. Chi quiví ndétátú jeē cúu vico pascua, ii ndasí gá vésú táca gá quiví ndétátú. Te ni cacahān de jiin Pilato jeē na ndácu de jniñu jeē jnahnú sñin tēe cándita caa, te na cújiyo de jíca cruz. <sup>32</sup> Te ni quecoo soldado, te ni cajehnú de sñin in tēe jeē ndita caa jiin yá, te suni súcuán inga de. <sup>33</sup> Te nuū ní quecoo de nuū Jesús, te ni cajito de jeē je ní jihī yā. Jeē yucuan tu ní cájehnú de sñin ya.

<sup>34</sup> Te in soldado chi ní cují de lanza xiin ya, te ni cane-ni niñi jiin ndute. <sup>35</sup> Te máa rí jeē tēe tutu yáha, ni jito rí jeē súcuán ni cuu, te nácani ndáa rí jñuhun ndese ni cuu. Te jini rí jeē iyó ndáa jñuhun cáhán rí, návaha suni candije máa ró jijnahn ró. <sup>36</sup> Chi súcuán ni cuu návaha squícu jñuhun cáhán tutu ii: Ma cahnú de ni in yiqui ya, achí. <sup>37</sup> Te suni inga jñuhun cáhán tutu ii: In quiví te coto i nuū Yaá jeē ní cují i lanza, achí.

*Jeē ní quindūji Jesús*

(Mt. 27.57-61; Mr. 15.42-47; Lc. 23.50-56)

<sup>38</sup> Te ni cuu táca jeē yáha. Te iyó in tēe ñuu Arimatea jeē naní José, te cúu de tēe cándije Jesús. Te yuhu-ni cándije de, chi yuhú de jñáhan de hebreo. Te ni cahān ndahú de jiin Pilato jeē na cuáha jñuhun quihin de yiqui cúñu Jesús. Te ni jēhe Pilato jñuhun. Yūcuán na te cuahān José, ni snúu de yiqui cúñu Jesús. <sup>39</sup> Te suni ni jinū Nicodemo, tēe ní quiji nuū Jesús in jecuáa. Te ndíso

de nájñuhun ocō uxí kilo sūje uvuā jeē ní saca jñáhan jiin yúctú áloe. <sup>40</sup> Te ndindúú de ní caquihin de yiqui cúñu Jesús, te ni cachusúctún de jiin tira sahma jeē ní quiví yucú jeē jeén asin ún, nájñuhun iyó costum-bre maá ñayuu hebreo jeē cáchindūji i ndīyi.

<sup>41</sup> Te yajni nuū ní jihī Jesús iyó in huerto. Te nuū huerto un ndéé in yaú jeē ní caan jeé jíca in cava, nuū ná tu quindūji ndīyi.

<sup>42</sup> Te yucuan ní cachindūji de Jesús, chi ine yajni yaú ndīyi ún. Chi je yajni quejéé quiví ndétátú de jeē cácuu de ñayuu hebreo, te tú na ley chindūji de ndīyi núu je ní quejéé quiví ún.

*Jeē ní natecu Jesús*

(Mt. 28.1-10; Mr. 16.1-8; Lc. 24.1-12)

## 20

<sup>1</sup> Te jenéhen quiví domingo ni jinū María ñuu Magdala nuū ní yindūji Jesús, te yínee gā cúu. Te ni jito ña jeē ní cujiyo yuū ndihyú yuyáú ndīyi. <sup>2</sup> Yūcuán na te jinu ña cuahān ña nuū Simón Pedro jinū inga tēe scuáha ún jeē maní gā Jesús jiin. Te ni cahān ña jiin de:

Ni catava de Jitoho yō nuū ní yindūji ya, te tu cájini yō ndé nuū ní cachune de ya, achí ña.

<sup>3</sup> Te ni quendacoo Pedro jinū inga tēe scuáha ún, cuácondéhé de yaú ndīyi. <sup>4</sup> Te cájino tayí ndindúú de. Te inga tēe scuáha ún, nihin ga ni jinu de vésú Pedro. Te xihna gā de ni jinū yaú ndīyi. <sup>5</sup> Te ni scáyí de máa de, te ni jito nihni de ini yaú. Te ni jito de jeē tira sahma un cáyūcu máa na. Te tu ní quiví de. <sup>6</sup> Te sáa te ni jinū Simón Pedro jeē ndiquín jñáhan de vēji de jiin inga tēe ún. Te ni quiví de nuū ní yindūji Jesús. Te suni ni jito de jeē tira sahma cáyūcu máa na. <sup>7</sup> Te ni jito de sahma jeē ní ñūsúcn xini Jesús, tu cáttú jiin tira sahma, chi ní natuu te cáttú sñin. <sup>8</sup> Yūcuán na te suni ní quiví inga tēe scuáha jeē ní jinū xihna gā nuū ní yindūji ya. Te ni jito de ndese iyó, te ni candije de jeē ní natecu yā. <sup>9</sup> Chi nde ná tu jinūcoo de yaú ndīyi, te tu ní jécūhun ni de jñuhun cáhán tutu ii, jeē jini ñuhún natecu yā núu je ní jihī yā. <sup>10</sup> Yūcuán na te ndindúú tēe cáscuáha ún cuanungoo de vehe de.

*Jeē ní nane ya nuū María ñuu Magdala*

(Mr. 16.9-11)

<sup>11</sup> Te María índichi ña ndáhyú ña nuū ní yindūji ya. Te nini ndáhyú ña, te ni scáyí ña máa ña, ni jito nihni ña ini yaú ún. <sup>12</sup> Te ni jito ña uū ndajéhé andiví, cáñuhun ya sahma cuijin. Te in ya néne ichi xini, te inga ya néne ichi núu jehé nuū ní cáttú yiqui cúñu Jesús.

<sup>13</sup> Te ni cacahān yā jinū ña:

¿Najehē ndahyú rō?

Te ni cahān ña:

Ni catava de Jitoho ná, te tu jini na ndé nuū ní cachune de ya.

<sup>14</sup> Te jeē ni cāhān ña súcuan, te ni ndiío cóto ña, te ni jito ña nuū Jesús jeē índichi yā yūcuán. Te tu ní nacuni ña jeē maá yá cúu.

<sup>15</sup> Te ni cahān yā jíin ña:

¿Najehē ndahyú rō? ¿Nde ñn nánducú rō? achí yá.

Te maá ña jéni ni ña jeē tée ndíto huerto cúu ya. Te ni cahān ña jíin yá:

Núu maá ní ni quenehen ní yá, te cachi ní ndé nuū ní jéchine ní yá, te na quínuquihin ná yá, achí ña.

<sup>16</sup> Te ni cahān Jesús jíin ña:

María, achí yá.

Te jeē ni cāhān yā súcuan, te ni nacuni ña ya, te ni ndiío cóto ña, te ni cahān ña jíin yuhu hebreo:

Raboni, achí ña. Te jnūhun un cúní cahān, Maestro.

<sup>17</sup> Te ni cahān Jesús jíin ña:

Ma quehé rō rúhū, chí ná tu ndaa ri quinuuhun ri nuū Tatá rī. Te cuáhān núu táca hermano rī, tēe ni cascuáha jíin rī, te cachi rō nuū de jeē ndaa ri quinuuhun ri nuū Tatá rī, jeē suni Tátá maá rō jíinñahan rō cúu. Te cúu ya Yāā Dios maá rī jíin Yāā Dios maá rō jíinñahan rō. Achí yá.

<sup>18</sup> Yūcuán na te María ñuu Magdala un, cuáhān ña, te ni castūhūn ña nuū tēe cascuáha un jēe ní jito ña nuū maá Jítoho yō jíin jēe ní cahān yā jnūhun yáha jíin ña.

*Jeē ní nane ya nuū tēe cascuáha jíin yá*

(Mt. 28.16-20; Mr. 16.14-18; Lc. 24.36-49)

<sup>19</sup> Te jeē ní cuaa maá quívī domingo un, te cáhiin tútu tēe cascuáha ún ini ñn vehe. Te cándihyū yehyí, chí cáyūhú de jnāhan de hebreo jeē coto xeēn i de. Te ni quee-ni Jesús, ní jecuiñi yā mēhñú de vēsū ndihyú yehyí, te ni cahān yā jíin de:

Ndeyí sñ coo ní rō jíinñahan rō, achí yá.

<sup>20</sup> Te ná ní cahān yā súcuan, te ni steén yā ndaha ya jíin xiin ya nuū de. Te ni cacusñ ní tēe cascuáha un jēe ní cajito de nuū maá Jítoho yō. <sup>21</sup> Yūcuán na te ni cahān tucu Jesús:

Ndeyí sñ coo ní rō jíinñahan rō. Te nájnūhun ní tají Tátá rī ruhū ini ñayiví, suni súcuan tájí rī rohó nacani rō jnūhun ri nuū ñayuu. Achí yá.

<sup>22</sup> Yūcuán na te ni tñvī tachí yā nuū de jíinñahan de. Te ni cahān yā:

Vijna te ni canihñ rō Espíritu Santo. <sup>23</sup> Te táca ñayuu jeē cone cáhnu ní rō nuū cuéchi i, núu súcuan te coo jnūhun cáhnu ní nuū cuéchi i. Te núu tú cone cáhnu ní rō nuū cuéchi i, te ma cóo jnūhun cáhnu ní nuū cuéchi i. Achí yá.

*Jeē ní nane ya nuū Tomás*

<sup>24</sup> Te Tomás, tēe ní cacu cuatí, ñn jnāhan jeē uxí uū tēe cascuáha jíin yá, tu ní íne de quívī jeē ní nane Jesús nuū táca gá tēe cascuáha.

<sup>25</sup> Yūcuán na te sava ga tēe cascuáha un, ní cacahān de jíin Tomás:

Ni cajito ri nuū maá Jítoho yō.

Te ni cahān Tomás:

Núu tú coto ri nuū ní túji ndaha ya ní sáha ndūyu cāa, te núu tú chune ri xiní ndáha ri nuū ní íne ndūyu cāa, te núu tú chune ri ndaha ri xiin ya, te ma candije cuiti rī, achí de.

<sup>26</sup> Te nuū uná quiví, te tēe cascuáha un cáhiin tútu tucu de ini ñn vehe. Te íne Tomás jíin de. Yūcuán na te ní quee-ni tucu Jesús, ní jecuiñi yā mēhñú de, vēsū cándihyū yehyí. Te ni cahān yā jíin de:

Ndeyí sñ coo ní rō jíinñahan rō.

<sup>27</sup> Te ni cahān-ni ya jíin Tomás:

Chune xiní ndáha rō ini ndaha ri yāhā te coto rō. Te scáá ndaha rō, te chune rō xiin ri nuū ní tújī. Te ma cáni siquí gá ní rō, chí sa suhva na cándije rō.

<sup>28</sup> Yūcuán na te ni cahān Tomás jíin yá:

Aí, Jítoho maá ná jíin Yāā Dios maá ná cúu ní, achí de.

<sup>29</sup> Te ni cahān Jesús jíin de:

Tomás, nde ní jito rō núu rī, te ni candije rō. Te yōhyo ndetū táca ñayuu jeē candije ruhū vēsū tu ní jito i nuū rī, achí yá.

*Najehē ni tee Juan libro yáha*

<sup>30</sup> Te suni ní sáha Jesús cuehē gā jniñū jēhnu jeē ní steén yā poder yā nuū tēe cascuáha jíin yá, jeē tu yósó núu tútu yáha.

<sup>31</sup> Te táca jniñū yáha ní tee ri návāha candije rō jíinñahan rō jēe Jesús cúu Cristo, maá Séhe Yāā Dios. Chí jeē candije rō yá, te cotecu rō ní cáni sáha ya.

*Jeē ní nane ya nuū uxá tēe cascuáha jíin yá*

## 21

<sup>1</sup> Te ni cuu jecu quiví, te inga jínu ní nane Jesús nuū tēe cascuáha jíin yá, jeē cáhiin de yumar Tiberias. Te suhva ní steén yā maá yá nuū de: <sup>2</sup> Cáhiin tútu Simón Pedro, jíin Tomás, tēe ní cacu cuatí, jíin Natanael, tēe ñuu Caná ndañū Galilea, jíin ndíndúú séhe Zebedeo, jíin uū gá tēe cascuáha. <sup>3</sup> Te ni cahān Simón Pedro jíin de jíinñahan de:

Quíjñi rī chácá.

Te ni cacahān de:

Suni quingoo ri jíin rō.

Te cuangoo de, te ni quívicoo de ñn barco. Te tu ní cániñi cuiti de tí jecuaá yūcuán. <sup>4</sup> Te jeē cuácundijin, te íne Jesús yumar. Te tēe cascuáha ún, tu ní cánacuni de jeē maá yá cúu.

<sup>5</sup> Yūcuán na te ni cahān yā jíin de:

Aá rō jíinñahan rō, ¿á ní canihñ rō chácá caji yō?

Te ni cacahān de:

Tú cuiti, achí de.

<sup>6</sup> Yūcuán na te ni cahān yā jíin de:

Síngava ñunu rō ichi lado váha barco, te nihñ rō tí.

Te ni casingava de ñunu, te tuá ní cúu cuiti natava de, jeē ní quívicoo cuehē ndasi chácá.



7 Yūcuán na te tēe scuáha jeē maní gā Jesús jíin, ní cahān de jíin Pedro:

Máá Jítóho yō cúu, áchí de.

Te jeē ní jíin sóho Simón Pedro jeē maá Jítóho yō cúu, te ni nachuhun de sahma de, chí ni tava de jeē sájniñu de. Te ni ndava-ni de nuū mar cuahān de nuū yā. 8 Te tāca gá tēe cáscuáha ún, vendicoo de jíin barco yundúte, cástaa de ñunu ñúhun chítú cháca. Chí tu jíicá cáhlin de jíin ñuhun íchi, chí nájñuhun ciento-ni metro cúu. 9 Te nuū ní quendacoo de ini barco, te ni cajito de jeē nduhvá tūca ñuhūn, te íne staa jíin ñin chācá chíhyó. 10 Te ni cahān Jesús jíin de:

Cuáquihin jecu chācá jéé sa ní cajñi ró, na táu yó, áchí yá.

11 Te ni quiví Simón Pedro ini barco, te ni staa de ñunu, ni quee de jíin ndé nuū ñúhun íchi. Te ñúhun chítú cháca náñnu, ñin ciento uū xico uxí uní tī cúu. Te vésú ñin súcuan tí ñúhun, te tu ní táhndé ñunu. 12 Te ni cahān Jesús jíin de:

Nehen jíināhan ró na cási ni yō.

Te ni ñin tēe cáscuáha ún tu ní cūndeyí ni de cajñuhún de ya núu ndé ñin cúu ya. Chí je cájini de jeē maá Jítóho yō cúu ya. 13 Te ni quindēhe Jesús yuñúhún, te ni quihin ya staa ún, te ni jēhe ya nuū de, te suni súcuan chācá un.

14 Yāha cúu vuelta uní jeē ní nane Jesús nuū tēe cáscuáha jíin yá, ná ni natecu yá.

*Jeē ní ndajñuhún Jesús jíin Simón Pedro*

15 Te nuū ní cuu ní cajesi ni de, te Jesús ni cajñuhun yá Simón Pedro:

Simón sēhe Jonás, ¿á mání gā rō jíin rí vésú tāca gá tēe yāha?

Te ni cahān de:

Je jíiní ní jeē maní na jíin ní, achí de.

Te ni cahān yā jíin de:

Núu súcuan te stéén rō jñuhun ri nuū ñáyuu cácuu nájñuhun londe ri.

16 Te ni cajñuhun yá de vuelta uní:

Simón sēhe Jonás, ¿á mání rō jíin rí?

Te ni cahān de jíin yá:

Je jíiní ní jeē maní na jíin ní, achí de.

Te ni cahān yā:

Condito ró ñáyuu cácuu nájñuhun lanchi ri núu súcuan.

17 Te ni cajñuhún tucu ya de vuelta uní:

Simón sēhe Jonás, ¿á mání rō jíin rí?

Te ni cucuihyá ni Pedro jeē ní cajñuhun yá de vuelta uní núu maní de jíin yá. Te ni cahān de:

Máá ní jíiní ni ndihi, te jíiní ní jeē maní na jíin ní.

Te ni cahān yā:

Núu súcuan te stéén rō jñuhun ri nuū ñáyuu cácuu nájñuhun lanchi ri. 18 Te jendaá cahān ri jíin ró jeē nde ná suchí ró, te ni quihin máá ró sahma ró, te ni jica ró ndé nuū cuní maá ró. Te núu na yáí ró, te nasúu jéé cuní maá ró,

chí inga ñáyuu quindēca i róhó nuū tu cuní rō quihin rō. Te scáá rō ndindúú ndaha ró jéé cuu rō.

19 Jñuhun yáha ní cahān yā jeē ní stéén yā jeē cóndita caa de jíicá cruz cuu de, te jeē súcuan cuatáhú de cúu jeē stéén de jeē yóhyo cújéñnu Yaa Dios. Yūcuán na te ni cahān gā yā:

Condiquín rō ruhū jeē sáha ró jniñu ní ndacu ri nuū rō, achí yá.

*Jñuhun tēe scuáha jeē maní gā yā jíin*

20 Te ni ndió cóto Pedro, te ní jito de tēe scuáha jeē maní gā Jesús jíin, ndíquín de vēji de yatá. Tēe un cúu jeē ní conene xiin Jesús ná ni cacuxíni de jíin yá, te ni cajñuhún de ya: ¿Ndé ñin de cúu jeē nastúu nihín? 21 Te jeē ní jito Pedro nuū tēe ún, te ni cajñuhún de Jesús:

Te tēe yáha, ¿ndese coo jíin de?

22 Te ni cahān Jesús:

Núu cuní rí jeē cótecu de nde quiví ndíji ri, ¿te naun ndíhví ni rō? Máá ró chí condiquín rō ruhū jeē sáha ró jniñu ní ndacu ri nuū rō, achí yá.

23 Yūcuán na te jñuhun yáha ní jitē núu nuū tācá hermano, jeē tēe scuáha un má cūú de. Te tu ní cáhán Jesús jeē ma cūú de, chí sa suhva ni cahān yā: Núu cuní rí jeē cótecu de nde quiví ndíji ri, ¿te naun ndíhví ni rō?

24 Te tēe scuáha un jéé maní gā Jesús jíin, suu cúu ruhū jeē nácani jñuhun tācá jniñu yáha, te suu ri tēe tāca jñuhun yáha. Te cájini rō jíināhan ró jéé iyó ndáa jñuhun nácani ri.

25 Te suni íyó cuéhē ndasí gá jniñu ní sáha Jesús. Te núu tee yó ná ñin ná ñin, te ma cánda ní ñáyiví cuhun tutu jeē cóso jñuhun ún, jéni ní rí. Te ni cuu. Amén.

## JNIÑU JEHNU JEE NI CASAHA TEE APOSTOL

*Jeē ní jéjnūhun ya quiji Espíritu Santo*

<sup>1</sup> Amigo Teófilo, nuū tūtu jeē ní tee ná xihna gā ni castūhun ná nuū ní táca jniñu ní sáha Jesús, jiín táca jnūhun ní steén yā nde quiví ní quejéé yá ní sáha ya <sup>2</sup> te nde quiví ní ndaa ya cuanuhun yā andiví. Te nde ná tu ndaa ya quihñ yā, te ní sáha Espíritu Santo jeē ní ndacu ya jniñu nuū táca apóstol, tēe ní nacāji ya. <sup>3</sup> Te nuū ní jinu ní ndoho ya jeē ní jíhí yā, te uū xico quiví te tijni jinu ní steén ndijin yā maá yá nuū tēe un jijnáhan de, te súcuan ní cajini de jeē iyó ndaa jeē ní natecu yā. Te ní cahān yā jiín de siquí ndese ndácu Yāa Dios jniñu.

<sup>4</sup> Te ná cáhiin tūtú de jiín yá, te ní cahān yā jiín ndihí de jeē ma quéndaco de ini ñuu Jerusalén, chí áchí yá:

Condetu ró ndé quee Espíritu Santo jeē ní jéjnūhun maá Tátá rí Yāa Dios. Chí je ní cachi rí nuū ró jeē ní jéjnūhun ya quiji Espíritu Santo. <sup>5</sup> Chí Juan, jendaá jeē maá ndute-ni ní scuándute de ñayuu. Te róhó jijnáhan ró, jecu na quiví te nájñūhun cuandute ró jiín Espíritu Santo, cúu jeē condee yā ini anuá ró, achí yá.

*Jeē ní ndaa Jesús cuanuhun yā andiví*

<sup>6</sup> Yūcuán na te tēe cáhiin tūtú jiín yá, ní cacajñūhún de ya:

¿A vijna te nasáha ní jéē ñayuu ñuu yó Israel ndujéhu ní ndacu i jniñu nuū nación yó chí naún? áchí de.

<sup>7</sup> Te ní cahān yā:

Ma cúu cuni ró quiví chí cuiyā jeē cóo jeē ní sándaá maá Tátá rí, chí maá iin-ni maá yá jini yā na quiví sáha ya. <sup>8</sup> Te jeē cúni ró cúu jeē quee Espíritu Santo te condee yā ini anuá ró jijnáhan ró. Yūcuán na te nihñ ró poder te nacani ró jnūhun rí ní ini ñuu Jerusalén, ní Judea, ní Samaria, nde ní cáhnu ñayiví, áchí yá jiín de.

<sup>9</sup> Te ní ndihí ní cahān yā táca jnūhun yáha. Te níni cájito de nuū yā, te ní ndaa-ni ya cuanuhun yā andiví. Te ní quee vicó ní jesi-ni nuū cuahān yā, te tuá ní cájito de ya. <sup>10</sup> Te níni cáhiin de cájito ndaa de ichi ándiví núu ní ndaa ya cuahān yā, te uū jnāhan ndajéhé yā cáñūhun ya sahma cuijín ní cajecuñi yā xiin de jijnáhan de, te cájito ya nájñūhun tēe. <sup>11</sup> Te ní cacahān yā jiín de:

Róhó tēe Galilea, ¿nájehé cájito ndaa ró ichi ándiví? Chí maá Yāa Dios ní naquihin ya Jesús cuanuhun yā andiví, te suni súcuan ndiji ya nájñūhun cájito ró cuahān yā andiví, achí yá.

*Jeē ní canacāji de Matías jeē nucuiñi de nuū Judas*

<sup>12</sup> Yūcuán na te ní nanungoo de yucu jeē nani Olivos, cuanungoo de ñuu Jerusalén. Te yajni-ni íne yucu un jiín ñuu Jerusalén, nájñūhun iin kilómetro-ni, cúhva jeē ní jéhe ley permiso caca ñayuu quiví ndétátú. <sup>13</sup> Te ní ndávico de ini ñuu. Te ní ndacoo de cuarto xiní véhe nuū cáyūcu núu de. Te táca de cúu Pedro, Jacobo, Juan, Andrés, Felipe, Tomás, Bartolomé, Mateo, Jacobo sēhe Alfeo, Simón jeē cúu jnāhan grupo cananista, jiín Judas ñani Jacobo. <sup>14</sup> Táca tēe yáha, níni cándututú inuu de cájicān tahu de jiín táca ñani Jesús jiín náná yā María jiín sava ga ñahan.

<sup>15</sup> Te iin quiví te ní jecondichi Pedro nuū táca hermano cáandije. Te cáhiin nájñūhun ciento ocó ñayuu. Te ní cahān de:

<sup>16</sup> Hermano jijnáhan ní, ní squícu nahín jnūhun cáhan tutu ií jeē ní cahān David nde jenahán ní sáha Espíritu Santo. Te jnūhun un ní cuu siquí Judas jeē ní yosnúu núu tēe ní cajini Jitoho yó Jesús. <sup>17</sup> Te suu tēe un ní jica de jiín yó, te ní chindéé ñáhan jnāhan de jiín yó siquí jniñu ní jeni ya yohó. <sup>18</sup> Te ní cajeen iin ñuhun jiín xūhun ní nihñ tēe un siquí jniñu neé ní sáha de. Te ní ninga ndeyi de, te ní ndatā sáva chíji de, te ndihí yiti de ní jite. <sup>19</sup> Te ní jite jnūhun yáha núu táca ñayuu cáyūcú ñuu Jerusalén, te jeē yúcuán cúu jeē ní casnání i ñuhun ún Acéldama nuū yúhu maá i, jeē cuni cahān ñuhun jeē cúu cuenta niñi. <sup>20</sup> Chí súcuan je yósó núu tūtú Salmo siquí Judas:

Vehe de na quéndoo iyú,

te ma cóndee ní iin ga ñayuu ini vehe ún.

Te suni cáhan:

Jniñu ní condiso de na cóndiso inga tēe.

Achí.

<sup>21</sup> Núu súcuan te jini ñūhún jéē núcuñi iin tēe lugar maá de jiín yó. Te tēe nucuiñi jiín yó un, nacāji yó de mēhñu táca tēe ní cajica jiín yó táca quiví jeē ní jica maá Jitoho yó Jesús jiín yó. <sup>22</sup> Te tēe nacāji yó un cúu tēe jeē ní iyo de jiín yó nde quiví ní jendute ya ní sáha Juan, te nde quiví ní ndaa ya cuanuhun yā andiví. Te tēe nucuiñi jiín yó na cúu de testigo jiín yó jeē ní natecu yā, achí de.

<sup>23</sup> Te ní catee nuū de uū jnāhan tēe: Matías jiín José jeē nani de Barsabás te suni nání de Justo. <sup>24</sup> Te ní cajicān tahu de:

Tátá Yāa Dios, maá ní chí jini ní ndese cáa ánuá táca ñayuu. Núu súcuan te jeē ndindúú tēe yáha, steén ní ndé iin de cúu jeē ní nacāji ní. <sup>25</sup> Te condiso jniñu de cuu de apóstol. Te naquihin de jniñu ní stóo Judas, chí ní sáha de cuēhi te cuahān de lugar xeēn nuū cánuú quihñ de, áchí de.

<sup>26</sup> Yūcuán na te ní casáha de iin sorteo te ní jinū Matías, te ní nucuiñi de ní nduu de jnāhan ndihúxi iin apóstol.

*Jeē ní quee Espiritu Santo***2**

<sup>1</sup> Te máá quiví vico Pentecostés ni cahĩn tútú ñayuu cácadje ñuu Jerusalén. <sup>2</sup> Te sanaa-ni te ni quejéé nĩhin véji nde andiví nájñũhun tachĩ nĩhin queé, te táca ñayuu jeé cáyũcú ini vehe un ní cajini sũho i jeé nĩhin ún. <sup>3</sup> Te ni cajito i nájñũhun yáñũhũn jeé ní cajitẽ núu te ni cacucũo xinĩ ná ñn ná ñn i. <sup>4</sup> Te ndihĩ i, ni cunuũ Espiritu Santo jĩn i, te ni quejéé i cácahãn i sãĩn sãĩn yuhu, ndese ni steen máá Espiritu nuũ ná ñn ná ñn i cahãn i.

<sup>5</sup> Te ñuu Jerusalén, suni cáhĩn ñayuu hebreo, yĩñũhũn núu Yaa Dios, jeé ní quijicoo i nde táca naciõn nĩ cáhnu ñayiví. <sup>6</sup> Te jeé ni nĩhin súcuan te ni cacutútú cuéhẽ ñayuu ún. Te ni cunéé ñi ni i jĩnãhan i, chí ná ñn ná ñn i ni cajini sũho i jeé téé ni canĩhĩn Espiritu Santo cácahãn de jñũhun yuhu ñũũ jicá nuũ véji i. <sup>7</sup> Te ni canaa ni i cajito i te ni cacahãn i:

¿A násũu téé Galilea cácuu táca téé yáha jeé cácahãn de táca yuhu ñũũ nuũ véjicoo yó? <sup>8</sup> ¿Na vé ni cuu yáha núu súcuan? Chí ná ñn ná ñn yó cajini sũho yó cácahãn de jñũhun yuhu ñũũ nuũ ní cacacu yó. <sup>9</sup> Chí véjicoo yó ndé táca ñuu jicá. Sava yó véji nde Partia jĩn Media jĩn Elam. Te sava ga yó véji yó ndé Mesopotamia jĩn Judea jĩn Capadocia jĩn Ponto jĩn Asia. <sup>10</sup> Suni nde Frigia jĩn Panfilia jĩn Egipto jĩn tjini ñuu jeé ñe nde yatã gã ñuu Cirene ñuhun Africa véjicoo yó. Te sava ga yó nde ñuu Roma véjicoo yó, te cáyũcu jĩn-ni yó yáha. Te máá yó jeé véjicoo ñuu Roma, sava yó cácuu máá ñayuu hebreo te sava ga yó cácuu ñayuu sãĩn ñuu, ni cacandje yó ndiquĩn yó ley ñayuu hebreo. <sup>11</sup> Suni nde Creta jĩn Arabia véjicoo sava yó. Te cajini sũho yó jéé jĩn jñũhun yuhu ñũũ ná ñn ná ñn máá yó cácahãn de táca jniñũ jéhu ní sáha Yaa Dios, achĩ i.

<sup>12</sup> Te ndihĩ i chí ni canaa ñi ni i cajini nahĩn i. Te ni candajñũhũn i jĩn jnãhan i:

¿Na vé cúu jeé ní cuu núu súcuan jeé cácahãn de yuhu ñũũ yó? achĩ i.

<sup>13</sup> Te sava i ni cacahãn catã i:

Tuú chí jeé cánajĩni de, achĩ i.

*Jeē ní nacani Pedro jñũhun nuũ ñayuu*

<sup>14</sup> Yũcuán na te ni candocuiñĩ Pedro jĩn ndihũxĩ ñn ga apóstol, te ni cahãn jee Pedro jĩn ñayuu ún:

Nĩhĩn jnãhan ñuu yó hebreo, jĩn ndihĩ nĩhĩn jéé cáyũcu ní Jerusalén, jñũhun yáha na chũhun ni ni jĩnãhan ní, chí cuni nahĩn ní cahãn na jĩn ní. <sup>15</sup> Chí máá ná jijnãhan ná, nasũu jéé cajĩni ná nájñũhun cájeni ni ní, chí sáá cahĩn jenẽhen cúu, te nasũu hora cánajĩni ñayuu cúu. <sup>16</sup> Chí sa suhva squĩcu jniñũ yáha nájñũhun ni cahãn Joel, téé ni

nacani jñũhun Yaa Dios nde jenahãn, chí súcuan ni cahãn de:

<sup>17</sup> Achĩ Yaa Dios: Quiví sãndihĩ na

te tajĩ rĩ Espiritu rĩ cunuũ yá jĩn táca ñayuu, te sehe yĩ ró jĩn sehe sãhĩ ró, nacani i jñũhun rĩ,

te táca téé lulĩ chí coto ndijin de jeé steen rĩ nuũ de,

te táca téé jéhu chí sáha rĩ jeé scóto jeni de.

<sup>18</sup> Te quiví ún chí tajĩ rĩ Espiritu rĩ cunuũ yá jĩn táca mozo rĩ, cúu téé cúu ñahan,

te nacani i jñũhun rĩ.

<sup>19</sup> Te ichi andiví sáha rĩ jniñũ jéhu jeé náa ni ñayuu coto i,

te sáha rĩ jniñũ jéhu ini ñayiví jéé steen jeé cujéhu rĩ,

chĩ coo niñĩ jĩn ñũhũn jĩn ñũhmã nájñũhun vicõ.

Yũcuu cúu jeé sáha rĩ jeé cóo jñũndóho xeẽn.

<sup>20</sup> Te nduu jnúũ níandii te ma cũndijin gã,

te yoõ coto cuéhẽ nájñũhun niñĩ.

Yũcuán na te quee quiví jeé ndĩji máá Jitoho rõ Jesús.

Quiví ún coo cuéhẽ jniñũ jéhu, te cuni ndihĩ ñayuu jeé quiví máá Jitoho rõ cúu.

<sup>21</sup> Te táca ñayuu jeé cahãn ndahú i jĩn yá te jnama ya i, achĩ Yaa Dios.

Achĩ Joel ni nacani de jñũhun ya.

<sup>22</sup> Jeé yũcuu nĩhĩn téé ñuu yó Israel, cuni nahĩn gã ni jñũhun yáha jijnãhan ní. Ni steen Yaa Dios jeé ní tajĩ yá máá Jesús, Yaa ní jehnu ñuu Nazaret, chí máá Yaa Dios ni jehne ya jeé ni sáha Jesús jniñũ jéhu mēhñũ máá ní, jĩn jniñũ jeé steen jeé cujéhu ya, te jniñũ un ní canaa ni ni ní cajito ní. Te je cajini vãha ní jéé súcuan ni cuu. <sup>23</sup> Te máá ní ni cajini ní yá, te ni cajendeca ní yá nuũ téé xeẽn ni cajehni de ya jicã cruz ni casáha ní. Te nde jĩn tiempo je ni jini Yaa Dios jeé súcuan sáha ní jijnãhan ní, chí súcuan je ni sãndaã yá. <sup>24</sup> Te ni nastécu Yaa Dios Jesús te tuá ní cúu ya ndĩyĩ, chí jñũhun xeẽn jeé jihĩ ñayuu, tuá na vé cúu ga sáha jĩn yá. <sup>25</sup> Chí nde jenahãn suhva ni tee David jñũhun ndese ni cahãn Jesús jĩn Yaa Dios:

Jini na núu máá ní jeé cúu ní Jitoho ná, chí ní cáni ndéé ní jĩn ná,

chĩ ndéé ní ichi ndávãha ná, cúu jeé chindéé ñãhãn ní sãña návãha coo ndeyĩ ni ná.

<sup>26</sup> Jeé yũcuu cúuñĩ ní ná te cáhãn na jñũhun sãĩ ni.

Jeé yũcuu ma nãcani uhũ ni na síquĩ jñũhun cuu ná.

<sup>27</sup> Chí ma cuáha ni jñũhun quendõo ánuá na lugar nuũ cáyũcu ánuá ndĩyĩ,

ni ma cuáha ni jñũhun tehyũ ná, chí jéniñũ ná núu ní te mani ní jĩn ná.

<sup>28</sup> Te ni steen ni núu na jéé nátecu ná,

te sáha ní jéé cusĩ teyĩ ní ná condee na jĩn ní ní cáni.

Achĩ Jesús, ni achi David.

29 Tāca nihín jijnáhan ní, na cástūhun cáji ná nuū ni jnūhun jii yō David, chi tu ní cáhán de jnūhun yáha síquī maá de. Chi ní jihí de te ní quindūji de, te jini yō nuū yindūji de nde vijna. 30 Chi ní cuu de tēe ní nacani jnūhun Yaā Dios nde jenahán. Te ní jini de jeē váha ní jejnūhun ya nuū de jeē chíji yucūn maá de quiji Cristo, te condee yā mesa de ndacu ya jniū nájnūhun ní ndacu de jniū jeē ní cuu de rey. 31 Te nde jini tiempo ní jini de jeē nátecu Cristo, te ní cahān de jeē anuá yā, ma ndóo lugar nuū cáyūcu ánuá ndiyi, ní yiqui cúnu yā ma tehyú. 32 Chi Yaā Dios ní nastécu yā Jesús, te maá ná cácuu ná testigo jeē ní natecu yā. 33 Te ní ndujéhu tucu ya ní sáha Yaā Dios jini poder yā. Te nde nuū maá Yāa Dios, Yāa cúu Tátá yā, ní nihín Jesús Espiritu Santo, chí súcuu ní jejnūhun ya. Te ní tají Jesús Espiritu Santo, te suu ya sáha jniū jeē cájito ní te cájini sōho ní vijna. 34 Te David, nasū síquī maá de ní cáhán de tāca jnūhun yáha, chí tu ní ndáa yiqui cúnu de andiví. Chí síquī Cristo cúu jeē ní cáhán de suhva:

Maá Yāa Dios ní cahān yā jini Jitoho rī Cristo: Cucōo ró ichi ndávaha ri jeē steén jeē cujéhu ró.

35 Te na sáha ri jeē quende rō poder tāca jéé cájito uhú rohó, achí yá.

Achí David.

36 Nū súcuu te ndihí ní jéé cácuu yó ñayuu Israel, na cúni váha ní jéé vesú ní cajehni ní yá jicá cruz, te Yaā Dios ní jeni ya maá Jesús jeē cúu ya Jitoho yō te suni cúu ya Cristo, Yāa jnáma yóhó, achí Pedro jini i.

37 Te jeē súcuu ní cajini sōho i jnūhun yáha, te ní cajnahuhú ní anuá i. Te ní cacajnúhún i Pedro jini tāca gá apóstol:

¿Te ndese sáha ná jijnáhan ná nuū súcuu? achí i.

38 Te ní cahān Pedro jini i:

Nacani ní ní jéé stóo ní cuéchi ní jijnáhan ní, te cuandute ní jéé ní cacandije ní Jesucristo, návaha cone cáhnu ní Yaā Dios nuū cuéchi ní, te cuáha Yaā Dios Espiritu Santo yā condee yā ini anuá ní. 39 Chí súcuu ní jejnūhun maá Tátá yō Yaā Dios nuū yō jini nū séhe yó, te suni súcuu ní jejnūhun ya nuū ñayuu tāca gá nación, tācá i jeē cána ya i candije i.

40 Te jini cuéhé gā jnūhun súcuu ní cahān cají Pedro, te ní stihví ní de i:

Nducú ndéyí ní jeē na cácu ní, chí jnahnū ndetú ñayuu casáha jniū neé, achí de.

41 Yūcuán na te tācá i jeē ní cajetáhú jnūhun ní cahān de, ní cajendute i. Te quiví un ní nducuehé gā ñayuu cácadije, nájnūhun uní mil gā ñayuu. 42 Te ní cahān nihín i síquī jnūhun cástéén apóstol. Te inuú-ni cándajnúhun mání i te cájicān tahú i, te in cáhnu-ni cáyeji i pan, nájnūhun ní steén maá Jitoho yó jeē núcūhun ní yó síquī yá.

*Ndese ní coyūcu ñáyuu jeē ní cacandije jeē xlnha ñúhún*

43 Te ndihí ñayuu ní cayúhú i ní cajito i, chí cuéhé jniū jéhu jeē steén jeē cujéhu ya ní casáha tēe apóstol. 44 Te inuú ní cahíyo ní ñayuu cácadije, te ní cacuu inuú i tāca jéé cánevāha i. 45 Te ní caxícó i na-ni na vé cánevāha i, te ní casaja i xúhún un nū tāca jnáhan i, nú ndese jini ñúhún in in i. 46 Te ndijnahan quiví ní candutútú i ini templo. Te maní ní cayeji cáhnu i pan tācá vehe jnáhan i nájnūhun ní steén yā, te ní cahíyo sñ ní i. 47 Te ní cacahān i jeē yóhyo cujéhu Yaā Dios. Te ndihí ñayuu ñuu ní cajejnúhún i ñayuu cácadije. Te ndijnahan quiví ní jnama Jitoho yō sava ga ñayuu, te ní nduu inuú i jini ñayuu cácadije.

*Jeē ní nduvāha tēe ríngo*

### 3

1 Te in quiví te maá cáhuni jehini ní caa Pedro jini Juan cuango de templo, chí hora un cájicān tahú jnáhan de hebreo. 2 Te cájendēca ñayuu in tēe cáringo nde quiví ní cacu de. Te tēe un ndéé de ndijnahan quiví yehyí templo jeē naní Hermosa, jicān de caridad nuū tāca ñayuu quívicoo ini templo. 3 Te tēe un ní jito de nuū Pedro jini Juan jeé véji de quívicoo de ini templo, te ní jicān de caridad nuū Pedro jini Juan. 4 Te Pedro jini Juan ní cajito váha de nuū tēe un. Te ní cahān Pedro jini de:

Condehe nū rī jijnáhan ri, achí de.

5 Te maá tēe un ndétu túhva de, ní jeni ní de jeé cuáha Pedro jini Juan jecu xūhun nū de. 6 Te ní cahān Pedro:

Tú na xūhun plata ní xūhun oro cánevāha ri. Te iyó in jeé váha ga sáha ri jini ró: jini poder maá Jesucristo, Yāa ní jehnu ñuu Nazaret, cáhán rī jini ró, ndocuñí te caca ró, achí de.

7 Te ní jni de ndaváha tēe ún, te ní ndonehen de. Te jehé de jini súcūn jehé de ní nduváha-ni. 8 Te in ní scānda de maá de ní ndocuñí de, te ní quejéé de jica de. Te ní quiví de jini Pedro jini Juan ini templo, jica de, cānda de, te nácuatáhú de nuū Yaā Dios. 9 Te ní cajini tāca ñayuu jeé jica de te nácuatáhú de nuū yā. 10 Te ní canacuni i de jeé maá de cúu tēe ní condee yehyí templo jeé naní Hermosa, ní jicān de caridad. Te ní canaa ní i ní cajito i, te ní cayúhú i cájito i jeé ní nduváha tēe ún.

*Jeē ní nacani Pedro jnūhun ini corredor jeé naní Salomón*

11 Te tēe ní nduváha ún, tu siáa de Pedro jini Juan. Te ní cacutútú-ni cuéhé ñayuu nuū de ini corredor jeé naní Salomón, te ní canaa ní i cájito i. 12 Te ní jito Pedro jeé ní cutútú ñayuu ún, te ní cahān de jini i:

Nihín tēe ñuu yō Israel jijnáhan ní, ¿zajehé cánaa ní ní cájito ní jniū yáha? ¿Najehé cájito

ni núu ná te cájini ni ni jéē maá ná jijnáhan ná iyó poder na jéē sáha ná jéē nácaca tēe yáha? ¿Chí ní nduváha de siquī jeē tēe cájica ndaá cácuu ná cájini ni ní? <sup>13</sup> Tuú chi máá Yáa Dios jíi yō Abraham jíin Isaac jíin Jacob jíin táca gá jíi yō, ni sáha ya jniñu yáha náváha cuni ñayuu jeē cujéhu Sēhe ya Jesús, Yáa jeē ní cajendēca ní núu tēe cácujeñhu. Te ná ni cuni Pilato jeē siaá de ya, te tu ní cájēhe ni jñuhun. <sup>14</sup> Te ni casquéhichí ni yá vēsú cūu ya Yáa ndaá, Yáa íi. Te sa suhva ñn tēe jéñhi ndiyi ni cacahān ni jíin Pilato jeē na siaá de. <sup>15</sup> Te ni cacahān ni jéē na cūu Yáa jeē sáha jeē técu ndihí-ni. Te Yáa Dios ni nastécu ya Jesús jeē ní cuu ya ndiyi, te máá ná cácuu testigo jeē ní natecu yá. <sup>16</sup> Te tēe yáha jéē cájito ní te canacani ní de, ni candíje de jíin ná jeē iyó poder Jesús nasáváha ya de, te jeē yúcuu ní nasáváha ya de. Te jeē súcuu ni cacandíje ná ní sáha ya, jeē yúcuu ni nduváha váha de nájñuhun cájito ndihí ní.

<sup>17</sup> Te na cástūhan ná núu ni jíináhan ní, je jíni na jéē maá ní jíináhan ní jíin tēe cácujeñhu nuú yō, tu ní cájēcūhun ni ní, te jeē yúcuu ní cajehni ní yá. <sup>18</sup> Te súcuu ni squícu jñuhun ni cahān Yáa Dios nde jehanáñ jéē cánuu ndoho Cristo siquī cuéchi ñayuu, chi ní sáha ya jeē súcuu ni cacahān tēe ni canacani jñuhun ya nde jehanáñ. <sup>19</sup> Te na nácani ni ní jéē stóo ní cuéchi ní, te nasāma ini ní, te quívicoo ní ndaha Yáa Dios náváha ndahva yá cuéchi ní. Te quee quiví jeē ndúsí ni ní sáha máá Jítho yō. <sup>20</sup> Te natají yá Jesús ndíji ya, chí cūu ya Cristo, Yáa ní jeni Yáa Dios jeē jnáma ya yohó. <sup>21</sup> Te jíni ññuhún jéē cóo ya andiví ndé nasájéé yá táca jéē iyó, nájñuhun ni cacahān tēe ndoo ni canacani jñuhun nde jehanáñ ní sáha Yáa Dios. <sup>22</sup> Chi suhva ni nacani jíi yō Moisés jñuhun nuú táca jíi yō: Máá Jítho yō Yáa Dios cani ya Yáa nacani jñuhun nuú rō jíináhan ró, nájñuhun ni jeni ya ruhū. Te cuu ya ñn jnáhan ñuu yō. Te na chúhun ni rō táca jñuhun jeē nácani ya ún. <sup>23</sup> Te núu ndé tēe tú chuhun de te de jñuhun cahān yá, jñahnū ndetú de, te ma cūu ga de jnáhan ñayuu yá Israel, áchí Moisés.

<sup>24</sup> Te táca tēe ni canacani jñuhun nde jehanáñ, nde tiempo ni quiji Samuel te ní gá nde vijna, suni ní canacani de jñuhun siquī táca jniñu cūu quiví yáha. <sup>25</sup> Yucūn maá tēe ni canacani jñuhun ya nde jehanáñ cácuu yó, te suni siquī maá yó jíináhan yó cūu jeē ní sáha Yáa Dios contrato jíin jíi yō. Chí ni cahān yá jíin Abraham: Yucūn maá ró cane Yáa sáha jeē quéndōo ndetú táca ñayuu níi cáhnu ñayiví, áchí yá. <sup>26</sup> Te jeē ní nastécu Yáa Dios Sēhe ya, te ni quiji ya nuú maá yó xíhna gá, náváha quéndōo ndetú yō sáha ya, chí sama ya anuá yō jeē ma sáha ga yō jniñu neé, áchí Pedro.

*Jeē ní cajendēca de Pedro jíin Juan nuú tēe*

*cácujeñhu*

## 4

<sup>1</sup> Te Pedro jíin Juan níni cácahān gā de jíin ñayuu ún te ni quecoo táca sūtū jíin tēe grupo saduceo, jíin tēe cácujeñhu nuú tēe cándito templo. <sup>2</sup> Te yōhyo ni caquítí ni de siquī jeē castéén Pedro jíin Juan nuú ñayuu, jíin jéē canacani de jñuhun jeē nátecu ndiyi chí je ní natecu Jesús. <sup>3</sup> Te ni cajnií ún de, te ni cachuhun ún de vecāa cone de nde cundijin inga quiví, chí je ní ini. <sup>4</sup> Te cuehē ñayuu jeē ní cajini sōho jñuhun ni cacahān Pedro jíin Juan ni candíje i. Te ni nduu nájñuhun uhūn mil jeē maá nene tēe jeē ní cacandíje.

<sup>5</sup> Te jeē ní cundijin inga quiví ún, te tēe cácujeñhu nuú ñayuu hebreo jíin tēe jéhu cándiso jniñu jíin tēe castéén jñuhun tutu ley yá, ni candutútú de ini ñuu Jerusalén. <sup>6</sup> Te suni ni candutútú de jíin Anás jeē cūu sūtū cujéhu ga, jíin Caifás jíin Juan jíin Alejandro jíin táca gá jeē cácuu jnáhan sūtū cujéhu ga ún. <sup>7</sup> Te ni candacu jniñu jeē na quíjicoo Pedro jíin Juan condichi de mehñū, te ni cacajnūhún de:

¿Ndé ñn ni tejniñu róhó te ndese ni nihín jniñu ró ní sáha ró jéē nduváha tēe yáha? áchí.

<sup>8</sup> Yucúan na te Pedro chí ni cunuú maá Espíritu Santo jíin de, te jíin poder yá ni cahān de jíin táca tēe ún:

Tāca níhín tēe cácujeñhu nuú núu yō Israel jíin táca níhín tēe jéhu cándiso jniñu, <sup>9</sup> vijna te cástíchi ní sáña siquī ñn jniñu váha ní casáha ná jéē ní nduváha tēe cūhú yáha. <sup>10</sup> Te na cástūhun ná nuú nihín jéē cácujeñhu ní, náváha suni cuni ndihí jnáhan ñuu yō Israel jeē jíin poder maá Jesucristo, Yáa ní jehnu ñuu Nazaret, ni nduváha tēe índichi nuú ni yáha. Te suu ya cūu Yáa jeē ní cajehni ní jíca cruz, te ní sáha Yáa Dios jeē ní natecu yá. <sup>11</sup> Jesús cūu nájñuhun yūu cimientu jeē quítuu vehe. Te máá ní jíináhan ní cácuu nájñuhun tēe casáha vehe, te ni casquéhichí ní yá nájñuhun jeē cátejiyo ní yúu, chí tu ní cácaníje ní yá. Te ní sáha Yáa Dios jeē cūu ya nájñuhun yūu cánuu gá jeē quítuu vehe. <sup>12</sup> Te tú cuítí inga jeē cūu jnama yóhó, chí tuá na inga jeē cujéhu ní jeni Yáa Dios ini ñayiví yáha jéē cūu jnama yóhó, áchí Pedro.

<sup>13</sup> Yucúan na te ni cajini un jéé Pedro jíin Juan jéñhu-ni cacahān de. Te je cájini jeē tú tūhva de, chí tēe súcuu-ni cácuu de. Te ni canaa ní cájito nuú de, te ní casáha cuenta jeē ní cajica de jíin Jesús. <sup>14</sup> Te cándēhe núu tēe ní nduváha un, índichi de jíin Pedro jíin Juan, te tu ní cániñ gā modo ndese ga cahān. <sup>15</sup> Yucúan na te ni candacu jniñu jeē na quéndacoo sán de yatá véhe juzgado te ndajñuhun máá jíináhan. <sup>16</sup> Te ni cacahān:

¿Ndese sáha yó jíin tēe yáha núu súcuu? Chí ní jitē jñuhun yáha núu táca ñayuu ñuu Jerusalén jeē súcuu ni casáha de ñn jniñu

jéhnú, te ma cúu cahán yō jeē tu iyó ndáa.  
 17 Te návāha ma cuité gā jñūhun yáha, na cúxeēn yō nuū de jeē ma cahán cuité gā de jñūhun Jesús nuū ní ñn ñayuu, áchí.

18 Te ni cacana ún de, te ni cacahān ñihin jín de jeē ma cahán cuité gā de jñūhun Jesús ni ma steén gā de jñūhun un núu ní ñn ñayuu.

19 Yūcuán na te ni cacahān Pedro jín Juan:

Cani vāha ni ní te núu núnjahan ni Yāa Dios jeē stóo ná jñiñu ní ndacu ya jeē sáha ná te cuandije ná máa na jñiñu nándacu ní. 20 Chi ma cúu stóo ná jñiñu jeē nácani ná jñūhun ní cajini sōho ná jín jñiñu ní cajito ná, áchí de.

21 Yūcuán na te tēe ni cacutútu un ní cacuxeēn tucu de nuū Pedro jín Juan. Te ni casiaá de cuango de, chi tú cuité na modo stóho de chí cáyūhu cájito ñayuu, chí siquí jñiñu jéhnú ni cuu ún te ndíhi i cacahān i jeē yóhoyo cújéhnú Yāa Dios. 22 Chi tēe jeē ní sáha ya jñiñu jéhnú jín de jeē ní nduvāha de, víhyá gā uū xico cuiyā de.

*Jeē ní cajicān tahú ñayuu cácadje*

23 Te ná ni casiaá un Pedro jín Juan cuango de, te ni najinūcoo de nuū táca gá jñáhan de, te ni cacachi de ndese ni cacahān sutū cácujeñu jín tēe jéhnú cándiso jñiñu. 24 Te jeē ní cajini sōho de jñūhun yúcuán, te inuú-ni ni cajicān tahú de nuū Yāa Dios:

Tátā Yāa Dios jeē cújéhnú ní núu ndíhi, máa ní cúu Yāa Dios ni sáha andiví jín ñáyivi jín mar jín táca ndíhi jeē iyó. 25 Te jeē jín Espírítu Santo te ni sáha ní jéē ní cáhān mozo ní David nde jehán:

¿Najehē cáquití ndevāha ni ñayuu sín nació? ¿Te najehē cájeni sáa ní i jeē ndóna i siquí ní?

26 Ni cacutútu jéē cácuu rey ñáyivi jínjahan, te tēe cácujeñu ni cacutútu de, te inuú-ni ni candonda de siquí máa ní jee cúu ní Jitoho ná,

jín siquí Cristo, Yāa jeē ní jeni ní. Achí David.

27 Te jendaá chí Herodes jín Poncio Pilato jín táca tēe ñuu yō Israel jín tēe táca gá nació, ni cacutútu de ini ñuu yáha ní candonda de siquí Séhe íi ní Jesús, Yāa ní jeni ní. 28 Te súcuán ni cuu návāha squícu táca jñiñu jeē jín poder ní ní cundaā ni ní ndé jehán jéē súcuán coo. 29 Te vijna, Tátā, coto ní ndese cacahān xeēn de nuū na jínjahan ná, te cuāha ni fuerza ni núu na jéē cácuu ná mozo ni, návāha jéhnú-ni nacani ná jñūhun máa ní. 30 Te jín poder ní nasávāha ni ñayuu cácuñu, te sáha ní jñiñu jéhnú jeē steén jeē cújéhnú ní. Te táca jéē yáha sáha ní jín poder Séhe íi ní Jesús, áchí i jínjahan i.

31 Te nuū ní ndíhi ní cajicān tahú i, te nuū cáyūcu tútu i un ní sáha ya jeē ní jnáa. Te ndíhi i ní cunuú Espírítu Santo jín i, te ni jéhe ya fuerza te jéhnú-ni ni canacani i jñūhun Yāa Dios.

*Jeē ní caneñāha cáhnu i ndajniñu*

32 Te ñayuu cuehē jeē ní cacandje chí inuú cáhīyo ni i jínjahan i. Te tú ni ñn i ní cáhān jeē ndajniñu jeē névāha máa i cuu máa-ni i, chí táca ndajniñu ni caneñāha cáhnu i. 33 Te ñihin cácani apóstol jñūhun jeē ní cajito de jeē ní natecu Jitoho yō Jesús. Te yóhoyo ni chindéé ñhān yá ñayuu cácadje. 34 Chí tú cuité ni ñn i ní ndóho jeē cumaní nuū i, chí táca ñayuu caneñāha cuehē ñuhun chí vehe, ni caxícó i sava te ni caquindeca i xūhún un. 35 Te ni cajéhe i xūhún un núu tēe apóstol, te ni casaja tēe apóstol nuū ñayuu cácadje núu ndese jini ñūhún ñn i. 36 Te iyó ñn tēe nání José jeē cúu yucūn Leví, ni cacu de Chipre, ñuhun jeē íne sín nuū ndúte. Te tēe apóstol ni casnání de tēe ún Bernabé, jeē cuní cahān: tēe cáhān jñūhun ndeyí ní. 37 Te ní xicó de ñn ñuhun de, te ndáhá de xūhún un ní jéhe de nuū tēe apóstol.

*Siquí cuēchi jeē ní casáha Ananías jín Safira*

## 5

1 Te suni inga tēe nání Ananías jín ñasihí de Safira, ni caxícó de ñn ñuhun de. 2 Te ni chuvāha de sava xūhún un cuu máa de jín ña, chí súcuán ni candajñūhú de jín ña, te ndáhá de inga sava nájnūhun jeē ndíhi cúu, te ni jéhe de nuū tēe cácuu apóstol. 3 Te ni cahān Pedro:

Ananías, ¿naun ni jéhe ro jñūhun jeē quívi jexeén, jeē cúu Satanás, ini anuá ró te stáhú ró Espírítu Santo cuní ró? Chí jeē ní caxícó ró ñuhun ró te cuēchi ró cúu jeé tu ní cáchi ndaā ró jeē ní squendóo ró jecu xūhún un cuajniñu máa ró, chí ni sáha ró nájnūhun jeē ndíhi xūhún ní jéhe ró. 4 ¿Te á násūu cuenta máa ró cúu ñuhun un ndé ná tu xico ró? Te ná ni xico ró ¿te á násūu cuenta máa ró cúu xūhún jéē cuajniñu ró ndé nuū cuní máa ró? ¿Te naun ni jeni ní ró jeē stáhú ró súcuán? Te nasūu máni máa tēe cúu jeē jicu ró stáhú ró, chí suni Yāa Dios, áchí Pedro.

5 Te ná ni jini sōho Ananías táca jñūhun yáha, te ni cotútu-ni de ni jihí de. Te táca ñayuu ní canihñ jñūhun ún, yóhoyo ni cayūhú i. 6 Te ni candocuiñí tēe suchí, te ni cachusúcún de ndíyi un cuáchindūji de.

7 Te ni cunduú nájnūhun uní hora. Te ni jinú ñasihí ndíyi un ní quívi ña ini vehe ún, te tú na vé jini cuité ña. 8 Te Pedro ni cajñūhún de ña:

Cachi nuū rí, ¿á ñn súcuán-ni ni caxícó ró ñuhun ró chí tuú? áchí de.

Te ni cachi ña:

Suu súcuán-ni ni caxícó ná, áchí ña.

9 Te ni cahān Pedro jín ña:

¿Naun ni casquíjahan jñūhun ró jéē cóto ndee ró Espírítu Santo máa Jitoho yō? Chí ni nducú ró stáhú ró yá. Cuni nahín jéē

cáhma nanecoo tēe cuachindūji yāi ró, te suni súcuan quichindūji de rōhó, áchí de.

<sup>10</sup> Te ni cotúú-ni ña nuū jehé Pedro te ni jihí-ni ña. Te ni ndivicoo tēe suchí un te ni cajito de jeē jé ni jihí ña, te ni caquenehen de ña, te ni jechindūji de ña xiin yá ña. <sup>11</sup> Te yōhoyo ni cayūhū ndiviū ñayuu cácardije jíin táca gá ñayuu jeē ní cajini jñūhun jeē súcuan ni cuu.

*Cuehē jniñu jéhu ni casáha apóstol*

<sup>12</sup> Te cuehē jniñu jéhu jeē steén jeē cújéhu Yaā Dios ni casáha tēe apóstol nuū ñayuu. Te táca ñayuu cácardije, inuū-ni cándutúú i ini corredor jeē nani Salomón. <sup>13</sup> Te tu ní cáchundeyí ni inga ñayuu quijnáhan jíin i. Te cácejnūhūn i ñayuu cácardije. <sup>14</sup> Te ni nducuehē gā i, chí cúu tēe cúu ñahan ni cacandije i máá Jitoho yō. <sup>15</sup> Te cáquindeca ñayuu jñahan i jeē cácuhū, te cájequin i ini calle cácaa i nuū camilla jíin nuū yūu, chí cácum i vēsū ste cuándahū Pedro na yáha siquī i te nduváha i. <sup>16</sup> Te suni cuehē ñayuu táca ñuu cáhiyo yajni yūcuan ní quijicoo i ñuu Jerusalén ni caquindeca i jñahan i jeē cácuhū jíin jéé cándoho tachí, te ndihi i ni canduváha i.

*Jeē ní cajito xeēn i tēe cácuu apóstol*

<sup>17</sup> Yūcuán na te sutū cújéhu ga jíin táca gá jñahan jeē cácardije sahan saduceo, ni cacucuéstun ni jeē siquī tēe cácuu apóstol. <sup>18</sup> Te ni cajni de tēe cácuu apóstol ni cachuhun de vecāa. <sup>19</sup> Te in ndajéhé máá Jitoho yō ni nune ya yehyí vecāa ún jecuaá, te ni quenehen ya de jíináhan de. Te ni cahān yā jíin de:

<sup>20</sup> Cuáhān te cuíñi ró ini templo, te yūcuán nacani cájī ró jñūhun nuū ñayuu siquī ndese nihin tahú i cotecu i ní cáni, áchí ndajéhé yā.

<sup>21</sup> Te ni cajini sōho de jñūhun yáha. Te nuū ní cundijin te nehen ni quivicoo de ini templo, te cástéén de jñūhun ya nuū ñayuu.

Te níni cástéén de te sutū cújéhu ga jíin táca jñahan de ni canastútú de tēe junta cújéhu ga, jeē cúu ndihi tēe jéhu cándiso jniñu nuū ñayuu nación Israel. Te ni catajī de policía cuaquenehen tēe apóstol ini vecāa. <sup>22</sup> Te nuū ní jíinūcoo te tuá gā tēe apóstol. Te ni canandió cóo te ni cacachi:

<sup>23</sup> Jendaá cúu jeē ní cajito ná ndési vāha vecāa, te cáhiin tēe cándito yehyí un. Te nuū ní canune ná, te tú cuiti gā tēe un cáhiin ini vecāa ún, áchí de.

<sup>24</sup> Te sutū cújéhu ga jíin tēe cújéhu nuū tēe cándito templo jíin sūtū cácujehu, nuū ní cajini sōho de jñūhun yáha, te ni cajeni ni de ndese ga cúu un núu súcuan. <sup>25</sup> Te ni quee-ni in tēe te ni cachi:

Tēe jeē ní cachuhun ní vecāa, cáhiin de ini templo, te cástéén de jñūhun nuū ñayuu, áchí de.

<sup>26</sup> Yūcuán na te tēe cácujehu nuū tēe cándito templo, jíin tēe cácuu policía de, ni

jengoo de, te yúcuun ní nacueca de táca tēe apóstol vendicoo de jíin, chí cayūhū de jeē sanaa te cuāha ñayuu yuū xiní de núu sáha xeēn de jíin táca tēe apóstol. <sup>27</sup> Te nuū ní najinūcoo de jíin tēe apóstol, te ni cajecuiñi de nuū tēe casáha junta. Te sutū cújéhu ga ni cahān:

<sup>28</sup> Ni cacahān nihin ri jíin ró jeē ma steén cuiti gā rō jñūhun tēe nání Jesús. ¿Te naun ni casáha ró jéé ní ndecāva jñūhun un ní ñuu Jerusalén yāhá? Te cácum i ró staú yáhu ró rúhū jíináhan ri siquī jeē ni jihí tēe ún, áchí.

<sup>29</sup> Te Pedro jíin táca gá apóstol ni cacahān de:

Cánuú jéé squícu ná jniñu ní ndacu Yaā Dios nuū ná te nasūú jniñu nándacu tēe. <sup>30</sup> Máá Yáa Dios jíi yō ní nastecu yā Jesús, Yaā ní cajehni má ní jeē ní cata caa ní yá jíic cruz. <sup>31</sup> Te ní sáha Yaā Dios jeē ní ndujéhu tucu Jesús néne ya ichi ndáváha Yaā Dios, te cúu ya Yaā ndácu jniñu, Yaā jnáma ñayuu. Te súcuan ni sáha Yaā Dios náváha yóhó, jéé cácuu yó ñayuu Israel, na nácani ni yō jeē stóo yó cuéchi yó, te cone cáhu ni yā nuū táca cuéchi yó. <sup>32</sup> Te máá ná ni cajito ná táca jniñu yáha, te suni máá Espírítu Santo steén cají yá jeē súcuan cúu, chí jéhe Yaā Dios Espírítu Santo yá condee ini anuá táca ñayuu jeē cájendetū nuū yá, áchí de.

<sup>33</sup> Te ná ni cajini sōho un jñūhun yáha, te yōhoyo ni caquiti ni, te cahni de cácum i nuū.

<sup>34</sup> Te mēhñū un jíináhan néne in tēe grupo fariseo nání de Gamaliel, te cúu de maestro jeē steén ley yá, te táca ñayuu cácejnūhūn i de. Te ni ndocuiñi de, te ni ndacu de jniñu jeē na cújiyo núu tēe apóstol. <sup>35</sup> Te ni cahān de:

Róhó jñahan ñuu yō Israel, cani vāha ni ró núu na vé cácum i ró sáha ró jíin táca tēe yáha. <sup>36</sup> Chí nucūhun ni ró jeē in cuiyā ni ndonda Teudas siquī gobierno, te ni cahān de jeē tēe téyí cúu de, te ni cacutútú nájnūhun cuūn ciento tēe jíin de. Yūcuán na te ni cajehni ñayuu Teudas, te táca jéé ní caqui-jñahan jíin de ni cajitē núu cuangoo sáa-ni, te ni jecuiñi-ni jniñu ún. <sup>37</sup> Yūcuán na te quiví ni iyo censo te Judas, in tēe Galilea, ni ndonda de siquī gobierno, te ni cacutútú cuéhé tēe jíin de. Te suni ni cajehni ñayuu Judas, te táca tēe jeē ní caqui-jñahan jíin de ní cajitē núu cuangoo. <sup>38</sup> Te vjina na cuáha ri consejo rohó. Ma stáhān gā ró tēe yáha. Siáá de na quíngoo de. Chí núu ñayuu-ni ni squejéé jniñu yáha, te jecuiñi ii. <sup>39</sup> Te núu Yaā Dios ni squejéé, te ma cúu casi ró, chí sanaa te siquī Yaā Dios cándonda ró, áchí de.

<sup>40</sup> Te ni cachusóhó jéé ní cahān Gamaliel. Te ni canacana tēe cácuu apóstol, te ni cacani de jíin cuarta ñi te ni cacahān xeēn jíin de jeē ma cahān gā de jñūhun Jesús, te ni casiáá de cuangoo de. <sup>41</sup> Te máá apóstol ni quendacoo de nuū junta cuangoo de, cácusñi de de jeē ni jéhe ya jñūhun ndoho de jeē cuáha ñayuu

jnūhun canu de siquī jeē cácanđje de ya.  
<sup>42</sup> Te ndiquivī castéén de jnūhun vāha Jesu-  
 cristo, te cácanani de jnūhun ún ini templo  
 jín táca-ni vehe.

*Jeē ní cajeni de uxā tēe cuajniñu mēhñu  
 ñāyuu cácanđje*

## 6

<sup>1</sup> Te ni cucuehē ñayuu cácanđje. Te tiempo  
 un te tēe hebreo jeē cácahān yuhu griego,  
 ni quejéé de cácahñu de nuū jnāhan he-  
 breo de, áchí de jeē ñahan viuda jeē cácahān  
 yuhu griego tu cániññ vāha ña staā jeē  
 cásaja de táca quivī cuu ña. <sup>2</sup> Yūcuán na te  
 máá ndihúxí uū apóstol ni canastútú de táca  
 ñāyuu cácanđje, te ni cacahān de:

Tú vāha jeē jécuiñī jniñu jeē cácanani ri  
 jnūhun Yaā Dios siquī jeē cásaja rī staā.  
<sup>3</sup> Núu súcuán te róhó, hermano, nacāji ró uxā  
 jnāhan máá yó, te na cóndiso jniñu de saja de  
 staā. Te nacāji ró tēe jeē cácejnūhún ñāyuu de,  
 tēe ndíchí jeē ní cunuú Espiritu Santo jín de.  
<sup>4</sup> Te ruhū jijnāhan ri, máni cacān tahu rī jín  
 jeē nácani ri jnūhun ya, achí de.

<sup>5</sup> Te ndihi ñayuu ni canujnahan ni i jnūhun  
 ni cacahān de. Te ni canacāji i Esteban, tēe  
 cándje vāha jeē ní cunuú Espiritu Santo jín  
 de. Te suni ni canacāji i Felipe jín Prócoro  
 jín Nicanor jín Timón jín Parmenas jín  
 Nicolás. Te Nicolás cūo tēe ñuu Antioquía, te  
 ni nduu de tēe cándje sahān ñayuu hebreo  
 nde ná tu candje de jnūhun Cristo. <sup>6</sup> Te ni  
 cajeni i táca tēe yāha nuū tēe cácuu apóstol, te  
 tēe apóstol un ni casoó de ndaha de xinī táca  
 tēe un ní cajicān tahu de nuū Yaā Dios siquī  
 jniñu condiso de.

<sup>7</sup> Te jnūhun Yaā Dios ni jitē gā cuahān, te  
 ni nducuehē teyī ñayuu cácanđje i jnūhun  
 ya ini ñuu Jerusalén. Te suni cuehē sutū ni  
 cacandje de jnūhun ya.

*Jeē ní cajni de Esteban*

<sup>8</sup> Te ni chindéé ñahān yá Esteban ni jēhe ya  
 poder nuū de, te ni sáha de táca jniñu jēhnu  
 nuū ñāyuu, jniñu jeē steén jeē cūjēhnu Yaā  
 Dios. <sup>9</sup> Te ñayuu hebreo jeē ní cacuyāhu i  
 te ni canduu libre i, iyó vehe i sinagoga i.  
 Te tēe un cácuu tēe ñuu Cirene jín tēe ñuu  
 Alejandria jín tēe Cilicia jín tēe Asia. Te  
 sava tēe un ní caquejéé de cástāhān jnāhan  
 de jín Esteban. <sup>10</sup> Te tu ní cácuñdeyí jín de,  
 chí ndíchí ní cahān de ni sáha máá Espiritu  
 Santo. <sup>11</sup> Yūcuán na te ni cascāhān sava  
 tēe jeē na cáhān jnūhun stáhú siquī Este-  
 ban. Te ni cacahān jeē ní cajini sōho cáhān  
 ndevāha Esteban siquī Moisés jín siquī Yaā  
 Dios. <sup>12</sup> Te jeē súcuán ni cacahān te ni caquiti  
 ni táca ñayuu jín tēe jēhnu cándiso jniñu jín  
 tēe cástéén jnūhun tutu ley yā. Te ndihi de  
 ni candonda siquī Esteban, te ni cajni de  
 cuango jín de nde nuū junta cūjēhnu ga.

<sup>13</sup> Te ni cajeni de tēe cahān jnūhun yáá siquī  
 Esteban, te suhva ni cacahān:

Tēe yāha tu ndé jécuiñī de jeē cahān  
 ndevāha de siquī templo i yāha jín siquī ley  
 yā. <sup>14</sup> Chí ni cajini sōho ná cáhān de jeē Jesús,  
 tēe ni jehnu ñuu Nazaret, canu de templo  
 yāha te nasama de jeē tajnúní ley yā jeē ni  
 jēhe Moisés nuū yō, áchí.

<sup>15</sup> Yūcuán na te ndihi tēe cáyucu nuū junta  
 un ní candacoto vāha nuū Esteban, te ni  
 cajini jeē jito nuū de ná jito nuū iñ ndajéhe  
 Yaā Dios.

*Jnūhun ni nacani Esteban*

## 7

<sup>1</sup> Te máá sūtū cūjēhnu ga ni cajnūhún Este-  
 ban:

¿A ndāá jeē súcuán ni sáha ró nájñūhun  
 cácahān de yāhá? áchí.

<sup>2</sup> Te ni cahān Esteban:

Ndihí níhín jēé cácuu ní jnāhan ñuu yō, jín  
 ndihí níhín jēé cácuujēhnu ní nuū ñūū yō, cuni  
 nahín ní jnūhun cahān ná: Máá Yāā Dios jeē  
 yóhoyo cūjēhnu ya, ni steén yā máá yā nuū  
 jii yó Abraham nde na néne ga de región  
 Mesopotamia, nde ná tu quihñ de condee  
 de ñuu Harán. <sup>3</sup> Te ni cahān yā jín de: Stóo  
 ñuu ró jín táca jnāhan ró te quihñ ró nuū  
 cuāhi ri condee ró, chí máá ri steén ichi nuū  
 quihñ ró, achí yā. <sup>4</sup> Yūcuán na te ni quenda  
 de región Caldea, te ni jinū de ni condee de  
 ñuu Harán. Te yūcuán ní jihí tatá de. Yūcuán  
 na te ni sáha Yāā Dios jeē ní quee de ñuu yāha  
 nuū cáyūcu yó vijna. <sup>5</sup> Te tu ní jēhe ya ni iñ  
 tíhli ñuhun yāha cuu tahu de. Te vēsú súcuán  
 te ni jejnūhun ya jeē cuāha ya ñuhun un nuū  
 de nde jín nuū táca sēhe de, vēsú ná tu coo  
 sēhe de sáá. <sup>6</sup> Te súcuán ni cahān Yaā Dios  
 jín de: Sēhe ró coyūcu jicá i inga ñuu, te cūñ  
 ciento cuiyā sājniñu sáá-ni i te stóho ñayuu  
 yūcuán i. <sup>7</sup> Te siquī jeē súcuán sáha i jín sēhe  
 ró, te máá rí chí stóho ri ñayuu ñuu ún. Te sáá  
 te quendacoo sēhe ró yūcuán, te nucoyūcú i  
 yāhá chíñhún i ruhū, achí yā. <sup>8</sup> Te ni cahān  
 yā jín Abraham jeē na chú de circuncidar,  
 jeē cúu iñ jnuñi jeē ni sáha ya contrato jín  
 de. Te ná ni cacu sēhe de Isaac te ni sáha de  
 circuncidar i nuū uná quivī. Te suni súcuán  
 ni sáha Isaac jín sēhe de Jacob, te Jacob jín  
 sēhe yí de jeē cácuu ndihúxí uū yucūn ñayuu  
 Israel.

<sup>9</sup> Te táca sēhe Jacob ni cacucuésun ni de  
 jín ñani máá de José, te ni caxicó de i nuū tēe  
 jeē ní cajendēca i nde nación Egipto. Te Yaā  
 Dios chí ni ndito ya José. <sup>10</sup> Te ni jnama ya i  
 nuū táca jnūndóho ní jito i, te ni cundichí i ni  
 sáha ya. Te Faraón, tēe cúu rey nación Egipto,  
 ni cusñ ni de jín i ni sáha ya, te ni tejniñu  
 de José jeē cúu de gobernador te ndacu de  
 jniñu nación Egipto jín nuū ñayuu cáyūcú  
 vehe Faraón.



<sup>11</sup> Te ni quiji quiv̄i jeē ni iyo ñn jnamā xeēn, te ni ndoho ñayuu n̄i cáhnu nación Egipto jíin ndé ñuu Canaán. Te tāca jíi yō ún, tuá ní cánih̄n de jeē cáji de. <sup>12</sup> Te ni nih̄n Jacob jñuhun jeē iyó trigo nde nación Egipto, te ni taji de sēhe de ní jengoo de ni cajeen de trigo vuelta ñn. <sup>13</sup> Te jeē cuángoo de vuelta uū te ni nastúu José jeē maá de cúu ñani de jíjnahan de. Yūcuán na te ni jini rey Faraón ndé ñn jnahan cúu José. <sup>14</sup> Te ni cahān José jíin tāca ñani de jeē na cóndeca de tátá de Jacob jíin nd̄hi jnahan vehe de. Te ni iyo un̄i xico xahūn i. <sup>15</sup> Te súcuan ni cuu jeē ni jínu Jacob ni condee de nación Egipto nde ni jih̄i de. Te suni yūcuan ní coyūcu sēhe de jeē cácuu jíi yō un ndé ni cajih̄i maá de. <sup>16</sup> Te ná ni quee quiv̄i jeē ndénehen ya tāca yūcūn de jeē cáyūcu tátú de nación Egipto, te ni cacondiso de yiqui ndihúxi uū nd̄iyi jíi un jéē nd̄iji ñuu Siquem, te ni cachindūji de ini yaū nd̄iyi ndeé jíca cáva jeē ní jeen jíi yō Abraham nuū tāca sēhe Hamor ñuu Siquem.

<sup>17</sup> Te nde ná cáyūcu gá de nación Egipto, te cuacuyajni quiv̄i jeē squicu jñuhun ní cahān Yáa Dios jíin Abraham jeē quéndacoo sēhe de nucoyūcú i ñuu ni jéjnūhun ya nuū i, te ñayuu un ní tahū cuehē i ini nación Egipto. <sup>18</sup> Yūcuán na te ni nucuiñ̄i inga rey ñuu Egipto jeē tu ní jíni de jeē váha ní sáha nd̄iyi José. <sup>19</sup> Te rey un ní stahú de tāca jíi yō te ní sáha ndeváha de jíin i, chi ní sáha fuerza de i jeē ma cóto ga i sēhe yiquín i te na cúu. <sup>20</sup> Te tiempo un ní cacu Moisés, te ni cusñ̄i ní Yáa Dios jíin i. Te un̄i yoó ní condito sáhi náná i tátá i. <sup>21</sup> Te tuá ní cúu condito sáhi de i, te ni cachune de i nuū nanih̄n sēhe sñ̄i Faraón i, te ni naquih̄n sēhe ña i ni scuehnu ña i nájñūhun sēhe maá ña. <sup>22</sup> Te ni cutúhva Moisés tāca jñuhun ndíchí ñuu Egipto, te ni cujéhnu de jíin jñuhun cáhán de jíin jñiñu sáha de.

<sup>23</sup> Te nuū uú xico cuiyá de te ni jecondēhé de jnahan de jeē cácuu ñayuu Israel. <sup>24</sup> Te ni jito de nuū ñn tēe nación Egipto jeē sáha ndeváha jíin ñn tēe Israel. Te Moisés ni jnama de jnahan de Israel ún, chi ní jehni de tēe Egipto un. Te súcuan ni ndutahū jeē ní sáha ndeváha jíin jnahan de ún. <sup>25</sup> Te máa Moisés jéni ni de jeē jécūhun ní tāca jnahan de jeē Yáa Dios ní taji yá de jeē jnáma de jnahan de ún ini nación Egipto nuú, te tu ní cájécūhun cuiñ̄i ní jnahan de ún. <sup>26</sup> Te inga quiv̄i suni ní jito de nuū uú tēe Israel jeē cájénahan, te cuní de jeē na jécuiñ̄i. Te jeē yūcuan ní cahān de jíin: ¿Najehē casáha ndeváha ró jíin jnahan ró? Chi nájñūhun ñn ñani-ni cácuu ró, áchi de. <sup>27</sup> Te máa tēe cáni tahū jnahan un ní chundahá de Moisés te ní cahān de: ¿Ndé ñn ni jeni róhó jéē cujéhnu ró núu r̄i te sándaa ró jñiñu ri jíjnahan ri? <sup>28</sup> ¿Chí suni cuní ró cahni ró ruhū nájñūhun ni jehni ró tēe Egipto icu chí naún? áchi de

jíin Moisés. <sup>29</sup> Te nuū ní jini sōho Moisés jñuhun yáha, te ni yūhú de jeē cáhni rey de, te ni jinu de cuahān de inga nación. Te ni condee de ñuu jíca Madián, te yūcuan ní scácu ñasih̄i de uū sēhe yíi de.

<sup>30</sup> Te ní jinu uū xico cuiyá jeē néne de yūcuán. Yūcuán na te ñn ndajéhé Yáa Dios ni quenda ya nuū de nde nuū ññuhun téhé nuū ñn yucu súcún Sinaí. Te ni quenda ya nuū de xin̄i ñn yucú cuí cáhnu cándahá yáñuhūn, te tu ní cáyú yucú ún. <sup>31</sup> Yūcuán na te Moisés ni naa ní de jíto de ún, te ní jehēn de nde nuū, náváha coto váha de. Te ni jini sōho de jeē cahán maá jítoho yō jíin de: <sup>32</sup> Máa r̄i cúu Yáa Dios tāca jíi ró jenahán, Abraham jíin Isaac jíin Jacob, achí yá. Te Moisés, quísi i de jeē yūhú de, te jeē yūcuan tuá ní cundeyí ní de coto de nuū. <sup>33</sup> Te máa jítoho yō ní cahān yá jíin de: Quenehen ndijēn ró chi nuū ñn ró, ñuhun íi cúu. <sup>34</sup> Je ní jini r̄i ñayuu maá r̄i jeē yóhoyo cándoho i nación Egipto, te suni jíni sōho ri jeē cájnana uhū i, te ní cuun r̄i vej̄i ri jeē jnáma ri i jíjnahan i. Núu súcuan te vijna chí taji r̄i rohó ndicó ró quih̄n ró nde nación Egipto, achí yá jíin de.

<sup>35</sup> Te nde ná tu quenda Moisés Egipto, te tāca jnahan de ní casquéhichí i de jeē ní cacahān i jíin de: ¿Ndé ñn ni jeni róhó jéē cujéhnu ró núu r̄i te sándaa ró jñiñu ri? ní cacahān i jíin de. Te vesú súcuan te máa ndajéhé Yáa Dios ni quenda nuū Moisés un jéē cándahá cáyú yucú cuí ún. Te súcuan ni cuu jeē ní nataj̄i yá de cuanuhun de nde Egipto jeē ndácu de jñiñu nuū i te jnama de i. <sup>36</sup> Te máa Moisés ní sáha de jeē ní quendacoo jnahan ñuu de ini nación yūcuan, te ni cayáha de Mar Rojo, te ní cajica cuu de ñuhun téhé uū xico cuiyá. Te ní tiempo un ní sáha de cuehē jñiñu jéhnu jeē steén jeē cujéhnu Yáa Dios. <sup>37</sup> Te máa Moisés cúu jeē suhva ní cahān de jñuhun yáha jíin jnahan ñuu yō Israel: Máa Yáa Dios cani ya Yáa nacani jñuhun nuū ró jíjnahan ró nájñūhun ní jeni ya ruhū. Te cuu ya ñn jnahan ñuu yō. Te na chúhun ní ró jñuhun cahān Yáa ún, áchi. <sup>38</sup> Te suni nde ná ní cajica cuu jíi yō nde nuū ññuhun téhé, te ní cahān ndajéhé yá jíin Moisés xin̄i yúcu súcún Sinaí, te ní nih̄n de jñuhun jeē cahān ndese nih̄n tahú yō cotecu yō, te ní nacani de jñuhun un núu tāca jíi yō, te ní quendōo jñuhun un núu yō.

<sup>39</sup> Te tāca jíi yō ún tu ní cácuñi de cuandetu de nuū Moisés, chí sa suhva ní cacuni de squéhichí ní de Moisés, te ní cacuni de nandicó de nungoo de Egipto nuú. <sup>40</sup> Te ní cacahān de jíin Aarón: Sáha ní tijni yaá na cósnūu núu yō. Chi Moisés, jeē ní quenehen de yóhó Egipto vej̄icoo yō, tu cájini yō na vé ní ndoho de jeē tú de ndeé jeē cuahán de xin̄i yucu Sinaí, achí. <sup>41</sup> Yūcuán na te ní cajéhe de oro ní cuváha ñn becerro oro, te nuū becerro ídolo un ní casocó de quiti, te

ni cacusi ni de jín ídolo ni casáha de ún.  
 42 Te Yaā Dios ni cujiyo ya cuahān yā, te ni stóo ya de na chíñúhún de nuū tāca jéē jító yó ín andíví, nájñuhun yósó nuū tútu tēe ni canacani jñuhun Yaā Dios nde jenhán:

Ni cahān yā: Róhó ñayuu Israel,  
 ¿á cájeni ni rō jeē nuū ruhú ni casocō rō quitu ná ni cajica cuu ró úu xico cuiyā nde nuū ñuhun téhé?

43 Tuú, chí sa suhva ni cacondiso ró nicho jeē íne ídolo jeē naní Moloc

jín figura quimi jeē naní Renfán,  
 ídolo jeē ní casáha máá ró ni cachíñúhún ró. Jeē yúcuau cúu jeē síaha ri rohó quihín jicá ró nde yatá ñúu Babilonia, achí yá.

44 Te ni ndacu ya jñíñu nuū Moisés jeē na sáha de vehe ñí nuū chíñúhún de ya, nájñuhun cáa jeē ní steén yā nuū de. Te tāca jíí yō, nde nuū ñuhun téhé ní canevehā de vehe íi un nuū ní cachuvāha de tabla yuū jeē yosó jñuhun ley yā. 45 Te ni castóo de vehe un nuū ndíhi sēhe de jeē cúu jíí yō. Te ni quívi Josué jíin jíí yō iní nación yáha, te ni sáha ya jeē ní cacundeyí de jíin tāca ñayuu jeē ní cacoyūcu yáha ní cajinu i cuangoo i. Te ni quívicoo de tācá ñuu i jíin vehe íi ún, te ni quendōo nde quívi ní cuu David rey. 46 Te ni cusí ni Yaā Dios jíin rey David. Te ni jicān de nuū yā jeē sáha de ñn vehe íi yā nuú, chí máá yá cúu Yaā Dios jíi de Jacob. 47 Te ni cuu jeē nde sēhe yíi de Salomón ni sáha vehe íi yā. 48 Te vesú súcuau ní cuu te Yaā cujéñhu téyí, tu ndéé yá máá vehe jeē casáha ñayuu, nájñuhun ní cahān tēe ni nacani jñuhun ya nde jenhán:

49 Ní cahān yā:

Andíví cúu nájñuhun mesa nuū ndácu ri jñíñu

te ñayívi cúu nájñuhun ñn nuū yítuu jehé rí. Núu súcuau ¿te ndese cuu sáha ró vehe jeé cóndee rí,

te ndese cuu sáha ró nuū ndétātu rí?

50 ¿A násúu máá rí ní sáha ndíhi jeé iyó?

achí máá Jítóho yō Yaā Dios.

51 Te cáhán gā Esteban:

Yōho cácuñíni ní ní, te tu cácuu ní nájñuhun ñayuu tācá nación jeē tu cájini i jñuhun ya ni tu cácandíje i ya. Chí níni cájesi ní nuū Espíritu Santo, te nájñuhun ní casáha jíí yō jenhán, suni súcuau casáha ní vjna. 52 ¿A ní Iyo tēe nácani jñuhun ya nde jenhán jeē tu ní sáha ndevāha jíí yō jíin de? Chí jíí yō ní cajehni de tēe ní canacani jñuhun jeé quíji máá Yáa ndaā. Te je ni quíji Yaā ún, te máá ní ni canastúu ní yá nuū tēe ní cajehni de ya. 53 Te vesú nde jíin tāca ndajéhé yā ní jēhe ya ley yā nuū yō, te máá ní chí tu cásquícu ní, achí Esteban.

*Jeé ní cajehni de Esteban*

54 Tāca jñuhun yáha ní cajini sōho, te yōhyo ní caquítí ní, te cáncayíhí yuhu cájito nuū Esteban. 55 Te máá Esteban chí ní cunuú Espíritu Santo jíin de. Te ní jito de ichi andíví, te ní jini de jeé ndíndēe nuū néne Yaā Dios, te índichi Jesús ichi ndávāha ya. 56 Te ní cahān de:

Vjina te jito ri jeé núne andíví, te jito ri nuū máá Yáa ní nduu tēe, índichi yā nuū cujéñhu ya lado vāha Yaā Dios, achí de.

57 Yūcuán na te ní cajesi un sóho, te ní cacana cóho, te inuú-ni ní candonda siquí Esteban. 58 Te ní caquenehen Esteban cuangoo jíin de nde yatá ñúu. Te tēe ní cacahān yaā un jíin ndíhi jñahan de ní cachucú de ticāchí de ndíto ñn tēe suchí nání Saulo, te ní cacani de yuū xiní Esteban. 59 Te níni jéé cácani tāca tēe un yúu xiní de te ní jicān tahú de nuū yā:

Tátā Jesús jeé cúu ní Jítóho ná, naquihín ní ánuu na vjna, achí de.

60 Te ní jecuíñi yítí de te ní cahān jee de:

Tátā Yaā Dios, ma quénehen ní cuéchi siquí i jeé casáha i jíin ná, achí de.

Súcuau ní cahān de te ní jihí-ni de.

*Jeé ní jito xeēn Saulo ñayuu cácandíje*

## 8

1 Te Saulo, ní nujnahan ní de jeé ní jíhi Esteban.

Te quívi un ní caquejéé de cájito xeēn ndasí de ñayuu cácandíje Jesús iní ñuu Jerusalén, te jeé yúcuau cúu jeé ní cajitē núu ñayuu cácandíje cuangoo i ní Judea jíin ní Samaria. Te tēe apóstol chí tu ní cájité núu de. 2 Te sava tēe yíñúhún nuū Yaā Dios, ní cachindúji de Esteban. Te yōhyo ní candahyū de jeé ní jíhi Esteban. 3 Te Saulo chí jito xeēn de ñayuu cácandíje, te quívi de ndijnahan vehe te jñí de tēe, ñahan, chúhun de i vecāa.

*Jeé ní canacani i jñuhun Yaā Dios ndaíñúu Samaria*

4 Te tācá ñuu nuū cuangoo tāca ñayuu ní cajitē núu un ní canacani i jñuhun ndese jnáma Yaā Dios ñayuu. 5 Te ní jinū Felipe ñn ñuu ndaíñúu Samaria, te nuū ñayuu yúcuau ní nacani de jñuhun Cristo, Yaā ní jeni Yaā Dios jeé jnáma ya yohó. 6 Te tāca ñayuu ní cacutútú un ní cajini nahín vāha i tāca jñuhun ní nacani Felipe, te ní cajito i tācá jñíñu jéñhu ní sáha de. 7 Chí cuehē ñayuu cándoho tachí ní canduvāha i, te cácana cóhó táchí un ní caquendacoo. Te cuehē ñayuu ní íjin jíin ñayuu ringo ní canduvāha. 8 Te jeé yúcuau ní cacusi teyí ní ñayuu ñuu ún.

9 Te iní ñuu un néne ñn tēe nání Simón, te tēe tásí cúu de. Te nde ná tu jinū Felipe ñuu Samaria, te yōhyo cánaa ní ñayuu ñuu un cájito i jeé sáha Simón, te ní stahú de i ní cahān de jeé ñn tēe cujéñhu téyí cúu máá de.

10 Te nde tēe cácujuhnu jíin ndivii cuiti ñayuu, cájetáhú ndasí i jñuhun cáhán de, te ni cajeni ni maá i te ni cacahán i:

Tēe yáha ní jēhe Yaá Dios cuehē poder nuū de, áchí i.

11 Te cájetáhú váha i jñuhun cáhán de, chi cuehē tiempo ni sáha de jñiñu stáhú ní canaa ni i ni cajito i. 12 Te nuū ni jíin Felipe, ni nacani de jñuhun váha ndese ndácu Yaá Dios jñiñu, jíin jñuhun Jesucristo, te ni cacandíje i te ni cajendute i, cúu tēe cúu ñahan. 13 Te suni maá Simón ni candíje de te ni jendute de, te ni jica cuu de jíin Felipe. Te ni naa ni de jito de táca jñiñu jéhu jeé sáha Felipe jeé steén jeé júehnu Yaá Dios.

14 Te cáyūcu tēe apóstol ñuu Jerusalén, te ni canihín de jñuhun jeé ñayuu Samaria ni cacandíje i jñuhun Yaá Dios. Te ni catajé de Pedro jíin Juan cuangoo de yūcuán. 15 Te ni jinūcoo de, te ni cajicān tahú de jēhē ñayuu un návāha na quívi Espíritu Santo ini anuá i jíinánhan i. 16 Chi ná tu quívi ya ini anuá ni ñin i, chí maá-ni jeé ní cajendute i jeé ní cacandíje i Jitoho yō Jesús. 17 Yūcuán na te Pedro jíin Juan ni casoó de ndaha de xiní i jíinánhan i, te ni quívi Espíritu Santo ini anuá i.

18 Te ni jito Simón jeé súcuán casoó apóstol ndaha de xiní ñayuu ún te súcuán quívi Espíritu Santo ini anuá i, te cúni de cuāha de xūhun núu tēe apóstol návāha nihín de poder un núu. 19 Chi ní cahán de:

Cúni na jéé cuāha ní poder yáha núu na, návāha núu ndé ñayuu soó ná ndaha ná xiní i te quívi Espíritu Santo ini anuá i, áchí de.

20 Yūcuán na te ni cahán Pedro jíin de:

Na náá xūhun ró je jnahnū ndetū rō siquí jeé jéni ní rō jeé jíin xūhun te cuu cuaan ró tahú jeé véji nuū Yaá Dios. 21 Ma nihín tahú rō jeé sáha rō jñiñu yáha, chi tu íyó ndáá anuá rō nuū Yaá Dios. 22 Núu súcuán te jíni ñúhún jeé stóo rō jñuhun jeé jéni neé ní rō súcuán te cahán ndahú rō jíin Yáa Dios, te maá yá sanaa te cone cáhu ni yá siquí jeé jéni neé ní rō súcuán. 23 Chi jíni rí jeé cucuésún ni rō siquí jeé sáha ri jñiñu yáha. Te táca jéé neé jéni ní rō ni cunuú un jíin ró, achí Pedro jíin de.

24 Yūcuán na te ni cahán Simón jíin de:

Cacān tahú ní jēhē na jíinánhan ní núu maá Jitoho yō návāha tú jnahnū ndetū na nájñuhun ní cahán ní, áchí de.

25 Te Pedro jíin Juan ni cacahán cají de ndese cácuandíje de jñuhun Yaá Dios. Te jeé cuánungoo de ichi únú Jerusalén, te tijni ndañúú Samaria ni canacani de jñuhun jeé jnáma ya ñayuu.

*Felipe jíin tēe nación Etiopía*

26 Yūcuán na te ni cahán ndajéhé maá Jitoho yō jíin Felipe:

Quihin ichi te quihín rō ichi sur, ichi jeé quéndé Jerusalén cuahán nde ñuu Gaza, áchí yá.

Te ichi chúcuán chí maá ñuhun tēhé cúu. 27 Te ní quihin Felipe ichi cuahán de. Te nde nación Etiopía ní quiji ñin tēe eunuco jeé ndíso jñiñu de cúu de tesorero nuū ñáhan cúu reina ndácu jñiñu nación Etiopía, nání ña Candace. Tēe un ní quichiñúhún de Yaá Dios ñuu Jerusalén. 28 Te cuanuhun de néne de nuū carreta de, te cáhu de tutu jeé ní tee Isaías, tēe ní nacani jñuhun Yaá Dios nde jenahán. 29 Te maá Espíritu ní cahán yá jíin Felipe:

Cuahán quíjnahan rō tēe cuahán jíin carreta un.

30 Te ní jejnahan Felipe carreta un, te ní jini sōho de jeé cáhu tēe ún tutu jeé ní tee Isaías. Te ní cajñuhún de tēe ún:

¿A jécūhun ní ní jñuhun jeé cáhu ní chí tú? áchí de.

31 Te ní cahán maá tēe un jíin Felipe:

¿Te ndese jecūhun ní ná? Chí tú na tēe castūhun núu ná ndese cúu ún, áchí de.

Te ní cahán de jíin Felipe jeé na cáa de conēne ndúú de jíin de ini carreta.

32 Te jñuhun cáhu de tutu ñi un cáhán suhva:

Nájñuhun lanchi jeé cuahán tí nuū cúu tí, súcuán ní casáha ñayuu jíin yá.

Te nájñuhun ñin londe quíti sáte jéé tu ndáhyú tí, súcuán ní sáha ya,

chí tú na vé ní cahán cuíti yá ná ní cajicān i cuēchi siquí yá.

33 Te hora jeé ní cajēhe i jñuhun canu yá, tu ní casáha ndaa i siquí yá jíin jñuhun ndaa,

te ní cajehni i ya ini ñayívi yáha.

Te coo cuehē ñayuu candíje nuū yá jeé ma cánda ní ñin ñayuu cahu i ñayuu ún.

Achí.

34 Yūcuán na te ni cahán tēe Etiopía un:

Cava váha ní ní cachi ní núu ná, ¿ndé siquí cahán tēe ní nacani jñuhun yáha? ¿A siquí maá de chí siquí ñnga tēe? áchí de jíin Felipe.

35 Yūcuán na te ní nacani Felipe jñuhun váha Jesús nuū tēe ún, chí ní quejéé de ní castūhún de jñuhun jeé ní cahú tēe ún, jíin táca gá jñuhun jeé yosó núu tútu yá. 36 Te níni cuángoo de ichi ún te ní jinūcoo de nuū ñúhún ndute, te ní cahán tēe Etiopía:

Yáha ñúhún ndute ¿te á tú cuu cuandute ná? áchí de.

37 Te ní cahán Felipe:

Cuu te núu cándíje níhin ní ndé jíin ini jíin ánuá ní táca jéé ní sáha Jitoho yō Jesús jēhē yō, áchí de.

Te ní cahán tēe Etiopía:

Cándíje ná jéé Jesucristo cúu maá Séhe Yaá Dios, achí de.

38 Te ní sáha de jeé na jécuiñi carreta de, te ní nuu ndindúú de cuangoo de ichi véyí

núu ñúhun ndute ún, te ni scuándute Felipe tée Etiopía. <sup>39</sup> Te nuú ní quendacoo de nuú ndúte, te Espíritu maá Jítoho yō ní sáha ya jeē ní ndoñúhún-ni Felipe. Te tē Etiopía vēsú tuá ní jito de nuú Felipe, te cúsi ní de cuahān de. <sup>40</sup> Te ni nane Felipe ñuu Azoto. Te nácani de jñuhun ndese jnáma ya ñayuu, cuahān de táca ñuu nde ní jinú de Cesarea.

*Jeē ní nasāma ini Saulo ní sáha Jesucristo  
(Hch. 22.6-16; 26.12-18)*

## 9

<sup>1</sup> Te Saulo chí máni cáhán de jeē cáhni de táca ñayuu cácandje i máá Jítoho yō, te jeē yúcuán ní jehēn de nuú sutú cujéhu ga. <sup>2</sup> Te ní jicān de carta jeē cahān jeē quihín de táca vehe i sinagoga ñuu Damasco te cuhni de tēe ñahan jeē cácandje i Jesús, quiji de jíin i ñuu Jerusalén nuú. <sup>3</sup> Te ní quihín de ichi cuahān de. Te cuacuyajni de ñuu Damasco, te sanaa-ni te ichi ándiví ní stíndēé in luz nuú de. <sup>4</sup> Te ní cotúú-ni de nuú ñuhun, te ní jini sōho de in jñuhun cáhán jíin de:

Saulo, Saulo, ¿najeheé jito xeēn rō ruhū? achí.

<sup>5</sup> Te ní cahān maá de:

¿Na nihín cúu jeē cahān, Tátā?

Te ní cahān yā jíin de:

Máá rí cúu Jesús, te jeē jito xeēn rō ñayuu cácandje i ruhū cúu jeē jito xeēn rō ruhū. Te jeē sáha ró súcuán cúu nájnūhun stiquí jeē tu jéndje ti te jéñú yatá tí xiní pulla, te súcuán stóho ti maá tí, achí yá.

<sup>6</sup> Te máá de chí quisi i de jeē yūhú de, te ní cahān de:

Tátā, ¿na vé cuní ní jēé sáha ná núu súcuán? achí de.

Te ní cahān maá Jítoho yō jíin de:

Ndocuñí, quiví ró ini ñuu, te yúcuán íyó in tēe jeē cachi nuú rō na vé cúu jeē cánuú sáha ró, achí yá.

<sup>7</sup> Te tēe cuangoo jíin Saulo, ní canaa ndasi ní de cajini sōho de ndusu jeē cahān, te tu ní cájito cuiti de nuú jeē cahān un. <sup>8</sup> Yúcuán na te ní ndocuñí Saulo. Te ní nducú de coto de, te tuá cúu coto de, te ní cajni tēe ún ndaha de ní jinúcoo jíin de nde ini ñuu Damasco. <sup>9</sup> Te yúcuán ní condee de uní quiví. Te tu ní cúu cuiti coto de, ní tú na vé ní yéji de, ní tú na vé ní jíhi de.

<sup>10</sup> Te ñuu Damasco néne in tēe cándje, nání de Ananías. Te máá Jítoho yō ní steén ndijin ya maá yá nuú de te ní cahān yā jíin de:

Ananías, achí yá.

Te máá de ní cahān de jíin yá:

Naun ní sáña, Tátā, achí de.

<sup>11</sup> Te ní cahān maá Jítoho yō jíin de:

Quihín ichi te quihín rō calle jeē naní Calle Derecha, te vehe Judas cajnūhun ró in tēe nání Saulo ñuu Tarso, chí jicān tahú de.

<sup>12</sup> Te nájnūhun ní jito ndijin de jeē maá ró, Ananías, ní jinú rō, te ní soó ró ndaha ró xiní de, te ní nanune tinú de, achí yá.

<sup>13</sup> Yúcuán na te ní cahān Ananías:

Tátā, cuehē ñayuu cácahān jeē tēe yúcuán yōhoyo jito xeēn de ñayuu cácandje i nihín ñuu Jerusalén. <sup>14</sup> Te vijna ní quee de yáhá, chí sutú cácujeñhu ní catejñū de véji de jni de táca ñayuu cácahān ndahú i jíin ní, achí de.

<sup>15</sup> Te ní cahān maá Jítoho yō jíin de:

Cuahān, chí máá rí ní nacaji tēe un jēe quihín de nacani de jñuhun ri nuú táca ñayuu nación Israel jíin núu ñayuu táca gá nación nde jíin núu táca rey. <sup>16</sup> Chí steén rí nuú de jeē cánuú ndoho de cuehē jñundóho jeē siquí rí, achí yá.

<sup>17</sup> Yúcuán na te cuahān Ananías. Te ní quiví de ini vehe nuú néne Saulo, te ní soó de ndaha de xiní Saulo, te ní cahān de:

Hermano Saulo, máá Jítoho yō Jesús, Yāá ní quenda ndijin nuú ní ichi jeē véji ní, ní taji yá sáña véji ná núu ní návaha na nánune tinú ní, te návaha na cúnuú Espíritu Santo yā jíin ní, achí de.

<sup>18</sup> Te ní nanune-ni tinú Saulo, chí ní nungoo-ni nájnūhun soó chácá ní condihyú tinú de ún. Te ní ndocuñí de ní jendute de. <sup>19</sup> Yúcuán na te ní nacaji de staá, te ní nanihin ni de. Te ní condee de jecu quiví jíin tēe cácandje jeē cáyúcú ini ñuu Damasco.

*Jeē ní nacani Saulo jñuhun ini ñuu Damasco*

<sup>20</sup> Te ní quejéé-ni de nácani de jñuhun Jesús ini táca vehe i sinagoga, achí de jeē Jesús cúu Sēhe Yāá Dios. <sup>21</sup> Te táca ñayuu ní cajini sōho jñuhun cáhán de ní canaa ni i, te ní cacahān i:

¿A násūu tēe yáha cúu jeē yōhoyo jito xeēn de táca ñayuu Jerusalén jeē cájicān tahú nuú Jesús? Te siquí yúcuán ní quee de yáha jēe cúhni de ñayuu cácandje, te quihín de jíin i nuú sutú cácujeñhu núu, achí i.

<sup>22</sup> Te víhyá gā ní nacani Saulo jñuhun ya, te ní steén cají de jeē Jesús cúu Cristo, Yāá ní jeni Yāá Dios jeē jnáma ya yohó. Te tēe hebreo jeē cáyúcú ñuu Damasco, tu ní cánihín de modo cahān de jeē tu íyó ndāá jeē cahān Saulo.

*Jeē ní cácu Saulo nuú jnáhan de hebreo*

<sup>23</sup> Te ní yáha cuehē quiví. Te jnáhan de hebreo ní casquínáhan jñuhun de jeē cáhni de Saulo. <sup>24</sup> Te ní nihín Saulo jñuhun jeē cándito de nduú ñuu táca yéhyi pared jeē ní condúu ndihyú ñuu ún. <sup>25</sup> Yúcuán na te in jecuáá te tēe cácandje ní caquihín de Saulo, te ini in jica cáhnu ní cascúun de Saulo jicá pared ún, te súcuán ní cācu de.

*Jeē ní najinú Saulo ñuu Jerusalén*

<sup>26</sup> Te nuú ní najinú de ñuu Jerusalén, te cúní de najnáhan de jíin tēe cácandje. Te

ni cayūhu tēe un ní cajito de Saulo, chí tu ní cácdánje de jeē ní nduu Saulo tēe cácdije nuū Jesús. <sup>27</sup> Te Bernabé cuahān de jín Saulo nuū cáyūcu tēe apóstol, te ní nacani de jñūhun nuū tēe ún ndese ní jini Saulo nuū máá Jítoho yō ichi nuū cuahān de, jín jeē ní cáhān yā jín de, jín jeē jéhu-ni ní nacani de jñūhun Jesús ini űuu Damasco. <sup>28</sup> Te ní condee Saulo űuu Jerusalén ní jica de jín táca tēe apóstol. <sup>29</sup> Te jéhu-ni ní nacani de jñūhun máá Jítoho yō. Te jnáhan űuu de hebreo jeē cácahān yuhu griego, ní castáhān jnáhan jín de, te máá tēe un cácu ni de cahni de Saulo. <sup>30</sup> Te ní cajini táca hermano cácdánje, te ní cajendēca de Saulo nde űuu Cesarea. Te yūcuan ní canatajǐ de Saulo cuanuhun de nde űuu de Tarso.

<sup>31</sup> Te űayuu cácdánje Jesús jeē cáyūcú Judea jín Galilea jín Samaria, tuá ní cájito xeēn űayuu i. Te ní ije ga i jín jñūhun ya, te cácdiso Iyo i nuū máá Jítoho yō. Te Espiritu Santo ní chindéé űáhān yá i te ní nducuehē gā i.

#### *Jeē ní nduvāha Eneas*

<sup>32</sup> Te táca lado jécondēhe Pedro űayuu cácdánje, te suni ní jecondēhé de űayuu cácdánje cáyūcú űuu Lida. <sup>33</sup> Te yūcuan ní jini de nuū ĩn tēe nání Eneas jeē ní cuu unā cuiyā cáa de chí ní ĩjin de. <sup>34</sup> Te ní cahān Pedro jín de:

Eneas, Jesucristo cúu Yaā nasāvāha ya rohó. Ndocuĩni te natuu ró yuu ró, áchí de.

Te ní ndocuĩni-ni tēe ún. <sup>35</sup> Te táca űayuu cáyūcú űuu Lida jín ndúhvā Sarón ní cajito i jeē ní nacaca Eneas, te ní casquéndōo i táca jñūhun jeē tu íyó ndāá te ní cacandije i máá Jítoho yō.

#### *Jeē ní natecu Dorcas*

<sup>36</sup> Te nde űuu Jope ní Iyo ĩn űahan cácdije, nání űa Tabita, te nuū yūhu griego nání űa Dorcas. Te űahan yáha máni jniū yáha ní sáha űa, te ní sáha űa caridad ní chindéé űáhān űa űayuu cúmanǐ nuū. <sup>37</sup> Te tiempo yūcuan ní quejéé cuéhǐ jín űa, te ní jihǐ űa. Te ní cascúchi i ndǐyi ún, te ní cajequin i ndǐyi un ndé ini cuarto xinǐ véhe. <sup>38</sup> Te yajni íne űuu Lida jín űuu Jope, te tēe cácdánje űuu Jope ní cajini jñūhun de jeē néne Pedro űuu Lida, te ní catajǐ de uū tēe cuacana de Pedro, te ní cacahān de:

Ma cucuéé ní na quhín yachǐ yō űuu Jope, áchí de.

<sup>39</sup> Yūcuán na te ní quihin Pedro ichi cuahān de jín tēe ún. Te nuū ní jínū de, te ní cacao tēe un jín de nde xinǐ véhe nuū catú ndǐyi ún. Te táca űahan viuda ní candicó ndúū űa de cándahyū űa, te cástéén űa táca sahma jín tícachi jeē ní sáha Dorcas te ní saja űa nde na técu űa. <sup>40</sup> Yūcuán na te ní ndacu Pedro jniū jeē na quéndacoo ndihi űayuu ún quingoo i nde yatá véhe. Te ní jecuíni yitǐ

de ní jicān tahú de, te ní nandió cóto de nuū catú ndǐyi ún, te ní cahān de:

Tabita, ndocuĩni ní, áchí de.

Te máá űa ní ndacoto-ni űa te ní jito űa nuū Pedro, te ní nucōo-ni űa. <sup>41</sup> Te ní jniū de ndaha űa, te ní ndōnehen de űa. Yūcuán na te ní nacana de xinǐ űayuu cácdánje nde jín űahan viuda ní ndǐvicoo i, te ní steén de űa nuū i jeē ní natecu űa. <sup>42</sup> Te ní jite jñūhun jniū yáha ní űuu Jope cuahān, te cuehē űayuu ní cacandije i jñūhun máá Jítoho yō. <sup>43</sup> Te cuehē quivǐ ní ndōo Pedro ini űuu Jope, néne de vehe ĩn tēe sáha curtir űi, nání de Simón.

#### *Pedro jín Cornelio*

## 10

<sup>1</sup> Te ini űuu Cesarea ní Iyo ĩn tēe nání Cornelio, ní cuu de capitán grupo soldado jeē nání Italiano. <sup>2</sup> Te cúu de tēe ndiso Iyo nuū Yaā Dios nde jín ndihi űayuu vehe de, te yōhoyo caridad ní tēe cúu de, chí jéhe de xūhun núū űayuu hebreo cándoho ndáhú, vésú nasúu tēe hebreo cúu de. Te ní ní jicān tahú de nuū Yaā Dios. <sup>3</sup> Te ĩn quivǐ ní steén ndǐjin yā nuū tēe yáha nájñūhun cahunǐ jehini, te ní jito de jeē ĩn ndajéhé máá Yāā Dios ní quivǐ ya nuū néne de. Te ní cahān yā jín de:

Cornelio, áchí yá.

<sup>4</sup> Te máá de ní ndacoto vāha de nuū yá, te ní yūhú de. Te ní cahān de:

¿Na vé cuni ní, Tátá? áchí de.

Te ní cahān yā jín de:

Je chíhi Yaā Dios cuenta jeē jicān tahú ró jín jeē sáha ró caridad. <sup>5</sup> Vijn te tajǐ ró jecu tēe na quingoo de nde űuu Jope, quicana de Simón jeē suni nání de Pedro, na quǐji de. <sup>6</sup> Chí néne núu de vehe tocayo de Simón, tēe sáha curtir űi, te ndéé vehe ún yajni yumar. Te máá de castūhun núu ró na vé cúu inga jeē cánuú sáha ró, áchí ndajéhé yā.

<sup>7</sup> Te ndajéhé yā jeē ní cáhān jín Cornelio, cuahān-ni ya. Te ní cana de uū mozo de jín ĩn soldado jeē yǐñūhun núū Yaā Dios, chí cúcáhu ni de jeē squícu vāha tēe ún. <sup>8</sup> Te ní nacani ndihi de jñūhun nuū táca tēe ún, te ní tajǐ de cuangoo nde űuu Jope.

<sup>9</sup> Te inga quivǐ un cájica de ichi cuangoo de, te cuacuyajni de űuu Jope. Te je yajni cahuxǐ uū cúu, te suu hora un ní caa Pedro siquǐ véhe chí cándaá, te yūcuan cácan tahú de. <sup>10</sup> Te ní quee sōco chíji de, te ní cuni de caji de staā. Te sáá casáha űa ndeyu te ní steén ndǐjin yā nuū de. <sup>11</sup> Te ní jito de jeē núne andǐví. Te ní jito de nájñūhun ĩn sahma manta jite cáhu te núhni jnáhan ndicúun punta, te ní cuun vǐji nuū de. <sup>12</sup> Te chíji un cáñūhun ndinuū quiti, táca quiti cúun ndaha jín táca cóo jín táca quiti cándava. <sup>13</sup> Te ní jini sōho de ĩn jñūhun ní cahān:

Pedro, ndocuifĩ te cahni rō tācá quiti jiñā, te caji rō tĩ, áchí.

<sup>14</sup> Te ni cahān Pedro:

Ma caji na, Tātā, chí tu yéji cuiti na táca quiti jeé cahān ley ni jéé tú vāha caji na tí, chí nájñuhun jeé tu cáhiyo ndoo ti nuū ní, áchí de.

<sup>15</sup> Te ni cahān tucu jñuhun un jíin de:

Achí rí jeé iyó vāha caji rō tācá quiti jiñā, chí ni sándoo rí, te ma cahān maá rō jeé tu cáhiyo ndoo ti, áchí. Te súcuan ni steén caji yá nuū de jeé cúu quihĩn de nuū ñáyuu vēsú násū jnāhan ñuu de hebreo cúu.

<sup>16</sup> Te uní jínu ni cahān súcuan jíin de. Te sahma un ní ndaa cuanuhun andiví. <sup>17</sup> Te níni nācani ndasí ní Pedro na vé cuní cahān jeé ní jito ndijin de ún, te ní jinūcoo-ni tēe ní tají Cornelio, cácajnūhún de vehe Simón nde ní jinūcoo de yéhyí tēe ún. <sup>18</sup> Te cácahān jee de cácajnūhún de núu yūcuan ndéé Simón jeé suni nání de Pedro. <sup>19</sup> Te níni nācani ga ní Pedro siquĩ jeé ní jito ndijin de ún, te Espíritu Santo ni cahān yā jíin de:

Ni quecoo uní tēe cánanducú róhó.

<sup>20</sup> Ndocuifĩ te nanuu ró, te ma cáni ní rō jeé tú vāha quihĩn rō jíin de, vēsú násū jnāhan ñuu rō hebreo cácuu de, chí maá rí ní tají rí de vējicoo de, áchí yá.

<sup>21</sup> Yūcuán na te ní nanuu Pedro nuū tēe ní tají Cornelio, te ni cahān de:

Maá ná cúu tēe cánanducú ní. ¿Te na siquĩ vējicoo ní núu na núu súcuan? áchí de.

<sup>22</sup> Te ni cacahān mozo un:

Cornelio, tēe cúu capitán, ní tají de saña. Te tēe ndaá, tēe ndiso iyo nuū Yaā Dios cúu de, te táca ñáyuu hebreo suni cácahān i jeé tēe vāha cúu de. Te ni cahān ĩn ndajéhé yā jíin de jeé na cána de níhín jéé ní vehe de te chusóhó de jñuhun cahān ní jíin de.

<sup>23</sup> Yūcuán na te ni cahān Pedro jíin mozo un jéé na cúcoo de ĩni vehe ún, te ní candóo de yūcuán. Te nuū ní cundijin, te ní quihin Pedro ichi cuahān de jíin mozo un. Te suni cuango jecu hermano cácañje ñuu Jope jíin de.

<sup>24</sup> Te nde inga quivĩ ní jinūcoo de ñuu Cesarea. Te Cornelio ndétu de jinūcoo Pedro, chí ní nastútú de táca jnāhan de jíin táca amigo de jeé quijnāhan vāha ga de jíin. <sup>25</sup> Te nuū ní jíin Pedro jijnāhan de, te ní quenda Cornelio ni cahān de jíin Pedro, te ní jecuifĩ yití de jeé chíñuhún de Pedro nuú. <sup>26</sup> Te Pedro ní ndonehen de Cornelio, te ni cahān de:

Ndocuifĩ ní, chí saña suni ĩn tēe-ni cúu ná, áchí de.

<sup>27</sup> Te cándajnūhún de ní quivicoo de ĩni vehe. Te ní jito Pedro jeé cáyūcu cuéhē ñáyuu ĩni vehe de. <sup>28</sup> Te ni cahān Pedro jíin ñáyuu ún:

Je cájini vāha ní jíināhan ní jéé ley jeé cánevāha saña ñáyuu hebreo, cahān jeé tú vāha jeé quijnāhan ná jíin ní quivicoo ná

vehe ní siquĩ jeé cúu ní ñáyuu sún nación. Te Yaā Dios chí ní steén yā nuū na jéé ma cujéé ní na núu ní ĩn ñáyuu. <sup>29</sup> Jeé yūcuan cúu jeé vēji-ni ná, chí ní cana ní saña, te tu ní sájéé ní ná. Te na cájnūhun ná níhín, ¿na siquĩ ní cana ní saña? áchí Pedro.

<sup>30</sup> Yūcuán na te ni cahān Cornelio:

Vijna iyó cúun quivĩ nájñuhun maá hora yāha jéé cúu cahuní jehĩni, te ndite ní ná chí súcuan chíñuhún ná nuū yā, te jícan tahú na ĩni vehe ná. Te ní quiji ĩn ndajéhé yā nuū ná, te ndíndéé sahma ñuhun ya. <sup>31</sup> Te ni cahān yā jíin ná: Cornelio, je ní jimi sóho Yaā Dios jeé jícan tahú rō, te chíhi ya cuenta jeé saha ró caridad. <sup>32</sup> Núu súcuan te tají rō mozo na quíngoo de ñuu Jope quicana de Simón jeé suni nání de Pedro, na quíji de nuū rō. Chí tēe un néne de vehe tocayo de Simón, tēe saha curtir ñi, te yajni yumar ndeé vehe de. Te quee tēe ún te castūhún de nuū rō jñuhun cánuú, áchí yā jíin ná. <sup>33</sup> Súcuan ní cuu te ní tají-ni ná mozo na cuajécoo de cana de níhín, te na cútahú ná, chí vāha ní saha ní jéé vēji ní. Te vijna ní candutútú ná yāha návāha táca ná cuni sóho ná ndihí jñuhun jítoho yó Yaā Dios jeé ní jéhe ya cahān ní, áchí de.

*Jeé ní nacani Pedro jñuhun ya vehe Cornelio*

<sup>34</sup> Yūcuán na te ni cahān Pedro:

Vijna te ní jini vāha ná jéé Yaā Dios ĩnuú-ni saha ya jíin táca ñáyuu, cúu ñáyuu hebreo jíin ñáyuu táca ga nación. <sup>35</sup> Chí cúsi ní yā jíin ñáyuu táca-ni nación núu cándiso iyo i núu ya te casáha i jniñu ndaá. <sup>36</sup> Chí ní cahān yā jíin ñáyuu Israel jeé ndávicoo táca ñáyuu nuū jñuhun maní yā jíin i saha Jesucristo. Te maá yá cúu jítoho táca yóhó. <sup>37</sup> Maá ní je cájini ní ndese ni cuu. Chí ná ní jínu ní nacani Juan jñuhun jíin jéé ní scuándute de ñáyuu, te ní quejéé Jesús nācani ya jñuhun nde Galilea, te ní jitē jñuhun un ní cánuu Judea. <sup>38</sup> Te cájini ní jéé Yaā Dios ní jéhe ya Espíritu Santo jíin poder nuū Jesús, Yaā ní jehnu ñuu Nazaret. Te cájini ní jéé ní jica cuu ya ní saha ya jniñu vāha, te ní nasávāha ya táca ñáyuu jeé cándoho i saha jexeén, chí Yaā Dios ní chindéé ñāhán yā Jesús. <sup>39</sup> Chí maá ná cánacani cáji ná jñuhun táca jíin ní cajito ná ní saha ya ní cánuu Judea jíin ĩni ñuu Jerusalén. Yūcuán na te ní cajehni i ya, chí ní cata caa i ya jíca cruz. <sup>40</sup> Te Yaā Dios ní nastécu yā maá Jesús nuū uní quivĩ, te ní ndiji ya nuū na ní cajito ná nuū yā ní saha Yaā Dios. <sup>41</sup> Te tu ní quíji ya nuū táca inga ñáyuu, chí nuū maá-ni táca ná jeé jí ní nacáji Yaā Dios saña jéé nācani ná jñuhun táca jíin jeé ní cajito ná. Chí ní cayeji na stáa ní cajihí ná ndute jíin yá ná ní nane ya jeé ní natecu yā. <sup>42</sup> Te ní ndacu ya jniñu nuū na jíināhan ná jéé na nācani ná jñuhun ya nuū táca ñáyuu te cahān cáji ná jeé maá Yaā Dios ní jeni ya

Jesús jeë sándaá yá jniñu ñayuu cátecu jíin ñáyyu ní cajiñi. <sup>43</sup> Chi jñuhun Jesús cúu jeë ní cacahān tāca tée ní canacani jñuhun Yaā Dios nde jenahān. Chi ní cacahān de jeë tāca ñáyyu jeë candíje i Jesús, cone cáhnu ní yá nuū cuēchi i, áchí Pedro.

*Jeë ní quiví Espiritu Santo ini anuá ñayuu jeë násiū hebreo cácuu*

<sup>44</sup> Te níni cáhān gā Pedro tāca jñuhun yáha te ní quiví-ni Espiritu Santo ini anuá tāca ñáyyu cájini nahín jñuhun ya jeë cahān de.

<sup>45</sup> Te tée hebreo jeë ní jinūcoo jíin Pedro jeë suni cácandíje de Jesús, nahān ní canaa ní de ní cajito de jeë suni ní quiví Espiritu Santo ini anuá ñayuu jeë násiū hebreo cácuu. <sup>46</sup> Chi ní cajini sōho de cácahān ñayuu un sñin yuhu, te cácahān i jeë yōhoyo cújéhnu Yaā Dios. <sup>47</sup> Yūcuán na te ní cahān Pedro:

¿Ndé ñin casi jeë ma cuándute ñayuu yáha? Chi ní quiví Espiritu Santo ini anuá maá i, nájnūhun ní quiví ya ini anuá maá yó, áchí de.

<sup>48</sup> Te ní cahān de jíin i jeë na cuándute i siquí jeë ní cacandíje i Jesucristo. Yūcuán na te ní cacahān ndahú i jíin Pedro jeë na quéndoo de jecu quiví jíin i.

*Jeë ní nacuaña Pedro cuenta nuū ñáyyu cácandíje ini ñuu Jerusalén*

## 11

<sup>1</sup> Te tée apóstol jíin tāca hermano cáyūcú Judea, ní canihin de jñuhun jeë súni ñayuu sñin naciōn ní cacandíje i jñuhun Yaā Dios.

<sup>2</sup> Te cuanuhun Pedro ñuu Jerusalén. Te sava tée hebreo jeë cácandíje de ya ní cacahān de nuū Pedro:

<sup>3</sup> ¿Najehē ní condee ní vehe ñayuu jeë násiū ñáyyu naciōn yō cúu? Te ní yeji ní jíin i, áchí.

<sup>4</sup> Yūcuán na te ní nacani cáji Pedro jñuhun nuū tée ún ndihí ndese ní cuu siquí tée sñin naciōn:

<sup>5</sup> Néne ná ñuu Jope. Te níni jícan tahú na, te ní steén ndijin ya nuū ná, te ní jito ná nájnūhun ñin sahma mānta jíte cáhnu jeë nuhní jñáhan ndicúun punta, te nde ichi ándiví ní cuun ní quiji nuū ná. <sup>6</sup> Te ní jito vāha ná, te ní jini ná jéé chíji un cáñūhun quiti cúun ndaha jíin quiti xéén jíin cóo jíin quiti cándava. <sup>7</sup> Te ní jini sōho ná ñin jñuhun ní cahān jíin ná: Pedro, ndocuiñi te cahni rō tāca quiti jíñā, te caji rō tí, áchí jíni ná. <sup>8</sup> Te ní cahān ná: Ma cáji na, Tātā, chí tu yéji cuiiti na tāca quiti jeë cahān ley ní jéé tu cáhīyo ndoo tí nuū ní, áchí ná. <sup>9</sup> Yūcuán na te jñuhun jeë véji nde ándiví ní cahān tucu jíin ná: Ní sándoo máá rí tí, te ma cahān gā rō jeë tu cáhīyo ndoo tí, áchí jíni ná. <sup>10</sup> Te uní jinu ní cahān súcuan. Yūcuán na te ní ndaa sahma un cuánuhun ándiví. <sup>11</sup> Te hora un ní jinūcoo uní tée vehe nuū ní cóndee ná un, cánanducú

de sáñá, te ñin jñáhan ñuu de Cesarea ní tají de vejicoo de. <sup>12</sup> Te máá Espiritu ní cahān yá jíin ná jeë ma cáni ní na jéé tú vāha quihān na jíin de. Te suni iñu hermano yáha ní jengoo jíin ná, te ní quivicoo ná ini vehe tée nání Cornelio. <sup>13</sup> Te tée un ní nacani de jñuhun nuū na jíjñáhan ná jéé ní jito de ñin ndajehé Yaā Dios, índichi yá ini vehe de, te ní cahān yá jíin de: Tají ró jecu tée na quingoo de ñuu Jope, quicana de Simón jeë suni nání de Pedro, na quíji de. <sup>14</sup> Te tée ún cachi de nuū rō ndese jnama Yaā Dios rohó jíin ndihí ñayuu cáyūcú vehe ró, áchí yá. Achí Cornelio jíin ná. <sup>15</sup> Te suni ní quejéé ná cahān na, te ní quiví-ni Espiritu Santo ini anuá i jíjñáhan i, nájnūhun ní quiví ya ini anuá maá yó xihna gā. <sup>16</sup> Yūcuán na te ní nucūhun ní na jñuhun ní cahān maá Jítoho yō: Jendaá jeë maá ndute-ni ní scuándute Juan ñayuu. Te rohó jíjñáhan ró chí nájnūhun cuandute ró jíin Espiritu Santo, cúu jeë cóndee yá ini anuá rō, áchí yá. <sup>17</sup> Te suni ní jēhe Yaā Dios Espiritu yá nuū maá i nájnūhun ní jēhe ya nuū maá yó jeë cácandíje yó Jítoho yō Jesucristo. Núu súcuan çte ndé ñin cúu ná jéé cási ná jniñu jeë sáha Yaā Dios? áchí Pedro.

<sup>18</sup> Súcuan ní cajini sōho de jñuhun yáha, te tuá ní cacahān de nuū Pedro, chí sa suhva ní cacahān de jeë yōhoyo cújéhnu Yaā Dios. Te ní cacahān de:

Suni ní jēhe Yaā Dios jñuhun jeë na nácani ní ñayuu táca gá naciōn jeë stóo i cuēchi i návāha cotecu i ní cáni núu súcuan, áchí de.

*Ñayuu cácandíje ini ñuu Antioquia*

<sup>19</sup> Te quiví ní cajehni de Esteban ní quejé de cájito xéen de ñayuu cácandíje, te jeë yūcuan ní cajitē núu ñayuu un tāca ñuu cuangoo i, te ní jinūcoo i Fenicia jíin Chipre jíin ñuu Antioquia. Te ní canacani i jñuhun vāha ya nuū máni jñáhan hebreo i jeë cáyūcu yūcuan, te tu ní canacani i jñuhun ya nuū inga ñayuu. <sup>20</sup> Te jecu tée cácandíje jeë cáyūcu Chipre jíin ñuu Cirene ní jinūcoo de ñuu Antioquia, te suni nuū ñayuu táca naciōn jeë tu cájini i jñuhun ya ní canacani de jñuhun máá Jítoho yō Jesús jeë jnama ya i. <sup>21</sup> Te máá Jítoho yō ní chindéé ñáhān yá de, te cuehē ñayuu ní castóo i jniñu jeë tu iyó ndáa te ní cacandíje i máá Jítoho yō.

<sup>22</sup> Te ñayuu cácandíje ini ñuu Jerusalén ní cajini jñuhun i, te ní catajái i Bernabé cuahān de nde ñuu Antioquia. <sup>23</sup> Te nuū ní jinū Bernabé yūcuán, te ní jini de jeë yōhoyo vāha ní sáha Yaā Dios jíin i, te ní cusí ndasi ní de. Te ní stihví ní de táca ñayuu un jéé jíin ini jíin ánuá i na cóndihví ní i squicu vāha i nuū maá Jítoho yō, te ma náyhúhí i. <sup>24</sup> Chi tée vāha cúu Bernabé, te ní cunuú Espiritu Santo jíin de, te cándíje nihin de. Te ní cacandíje cuehē ñayuu nuū maá Jítoho yō ní sáha de.

<sup>25</sup> Yūcuán na te cuahān de nde ñuu Tarso cuananducú de Saulo. Te ni nanihñ jnāhan de jíin Saulo, te ndéca de tēe un ní ndee de ñuu Antioquía. <sup>26</sup> Te ní ñi cuiyā ni candutú de jíin ñāyuu cácadnje yūcuán, te ni castéen de jñūhun ya nuū cuehē ñayuu. Te ñuu Antioquía cúu nuū xíhna ñūhún gá ni canonani ñayuu cristiano siquí jeē ní cacandje i Cristo.

<sup>27</sup> Te suni tiempo un ní quendacoo tēe cánacani jñūhun Yaā Dios ñuu Jerusalén cuangoo de nde ñuu Antioquía. <sup>28</sup> Te ñi jnāhan de jeē nani Agabo ní ndocuiñi nuū hermano cácadnje. Te ni stéén Espiritu Santo nuū de, te ni castūhún de jeē cóo ñi jnamā xeēn ní cáhnu. Te ni cuu jnamā ún ñi parte tiempo jeē ní ndacu Claudio jniñu jeē ní cuu de rey. <sup>29</sup> Yūcuán na te ni candajñūhun tēe cácadnje ñuu Antioquía jeē cuáha ñi ñi de nasaa canda de cuáha de te tají de quihñ cotecu hermano cáyūcú Judea. <sup>30</sup> Te súcuani ni casáha de. Te ni catají de Bernabé jíin Saulo ni cajendéca de nuū tēe jéhu cándiso jniñu nuū ñāyuu cácadnje cáyūcú Judea.

*Jeē ní jehni Herodes Jacobo, te ni chune de Pedro vecāa*

## 12

<sup>1</sup> Te suu tiempo un ní quejéé rey Herodes jito xeēn de sava ñayuu cácadnje. <sup>2</sup> Te ni ndacu de jniñu jeē jíin espada na cáhni i Jacobo ñani Juan. <sup>3</sup> Te ni jini de jeē ní cacusiñi ní tēe hebreo jeē ní sáha de súcuani, te jeē yúcuani suni ní jniñi de Pedro. Te máá quiví ni ní cuu vico jeē yéji ñayuu pan jeē tu yñi levadura. <sup>4</sup> Te nuū ní jniñi de Pedro, te ni chune de vecāa, te ni jeni de cuñ grupo soldado jeē cóndito Pedro, cuñ cuñ soldado cúu jeē ñi ñi grupo. Chi cúni Herodes jeē na yáha vico un jéé cúu vico pascua te quenehen de Pedro vecāa un stéén de nuū ñāyuu cuehē. <sup>5</sup> Te súcuani ñe Pedro vecāa, te cándito soldado un de. Te ñayuu cácadnje chi ñihni ni cajicān tahu i jehē Pedro nuū Yaā Dios jeē na cácu de.

*Jeē ní quenehen Yaā Dios Pedro vecāa*

<sup>6</sup> Te jeni ni Herodes jeē na cundijin inga quiví te quenehen de Pedro vecāa, te stéén de nuū ñāyuu un núú. Te núhni Pedro jíin úu cadena, cátu de quixí de mēñu úu soldado jecuáá ún, te suni cáhni ga soldado cándito yéhyí vecāa ún. <sup>7</sup> Te suu jecuáá ún te sanaa-ni te ni jinú ñi ndajehé máá Jítoho yō, te ni ndindeé ñi vecāa. Te ni squñi ya Pedro, te ni natakū ní de. Te ni cahān yā:

Yachí ndocuiñi ró, achí yá.

Te cadena nuhni ndaha de un ní canandají-ni. <sup>8</sup> Te ni cahān ndajehé yā jíin de:

Nacuhni ñihni chíji ró, te nuquñi ró ndijēn ró, achí yá.

Te súcuani ní sáha de. Te ni cahān tuu ndajehé yā jíin de:

Condií ticāchi ró, te condiquín ró ruhū na quihñ yō, achí yá.

<sup>9</sup> Te ni quenda de ndíquín de ya cuahān de jíin yá, te jeni ni de jeē násuu jéndaá cúu jeē sáha ndajehé yā jíin de, chi jeni ni de jeē ñi jeē ní stéén yā jíto ndijin de cúu. <sup>10</sup> Te ni yáha ya jíin de uū nuū cándito soldado. Te ni jinú yā jíin de yéhyí cáa nuū quenda de caca de calle, te yéhyí un ní nune ñi-ni máá. Te ni quenda ya jíin de, te ni yáha de ñi calle cuahān de. Yūcuán na te ni cujiyo-ni ndajehé yā nuū de cuahān yā. <sup>11</sup> Te ni nducájí ni Pedro te ni cahān máá ní cahān ñi de:

Vijna te ni jini ndaā rí jeē ní tají máá Jítoho rí ndajehé yā ní quiji, te ni jnama ya ruhū nuū Herodes jíin núú táca ñāyuu hebreo jeē cácuni i sáha xeēn i jíin rí nuú, achí de.

<sup>12</sup> Te nuū ní jini de jeē ní cácu ndije de, te ni quihñ de ichi cuahān de vehe María naná Juan jeē suni nání de Marcos. Te yúcuani cáhñi tūtú cuehē ñayuu cájicān tahu i jehē Pedro. <sup>13</sup> Te cáhñ Pedro ní jinú de yéhyí fuera, te ñi sūchi sñi nání Rode cuahān i jeē cúni i núu ndé ñi cuu jeē cahān. <sup>14</sup> Te ni nacuni i tachi Pedro, te jeē ní cusñi ni i te tu ní nune i yéhyí un, chi ní nandió cóo i te jinu i ni ndivi i ini cuarto. Te ni castūhún i jeē ní quee Pedro indichi de yéhyí fuera. <sup>15</sup> Te ni cacahān jíin i:

Jeē cahān neé ró, achí.

Te máá i ñihni cahān i jeē máá de cúu. Yūcuán na te ni cacahān:

Ndajehé yā jeē ndíto Pedro cúu núu súcuani, achí.

<sup>16</sup> Te víhyá gā cahān Pedro. Yūcuán na te ni canune i yéhyí, te ni canacuni i nuū de, te nahān ní canaa ni i cájito i. <sup>17</sup> Te máá de ní sáha de ndaha de jeē ma cúvaā gā i, te ni castūhún de ndese ni quenehen máá Jítoho yō de vecāa. Te ni cahān de:

Castūhun núu Jacobo jíin núú táca gá hermano jeē ní quenehen ya ruhū vecāa, achí de.

Te ni quenda de cuahān de inga lugar.

<sup>18</sup> Te nuū ní cundijin, te ni cacuvaā teyí soldado jeē tuá Pedro. <sup>19</sup> Te ni ndacu Herodes jniñu jeē na nánducú váha i Pedro. Te tu ní cánanihñ i de, te nuū ní cuu ní stichí de soldado jijnāhan, te ni ndacu de jniñu jeē na cúu. Yūcuán na te ni quenda Herodes Judea cuahān de ñuu Cesarea, te ni condee de yūcuán.

*Jeē ní jñi Herodes*

<sup>20</sup> Te yōhyo ní quítí ni rey Herodes nuū ñāyuu ñuu Tiro jíin ñuu Sidón. Te ñayuu un ní candajñūhún i jeē inuú-ni quivicoo ndihí i nuū rey un. Te ni casáha i amigo i jíin Blasto, tēe cújéhu jéniñu nuū rey un. Te ni cacahān



ndahú i jíin de jeē na cáhán ndahú de jíin rey un jeē na ndéē ni de jíin i. Chi nde űuu maá rey un cájeen i jeē cáyeji i. <sup>21</sup> Te ni jeni Herodes ĩn quivĩ. Te ni nucũhun de sahma yĩũhũn de, te ni cucõo de mesa nuũ ndácu de jniũu, te ni cahãn de ĩn jnũhun jehũ ni cajini sõho i. <sup>22</sup> Te ñayuu un ní caquejéé i cácahãn jee i jnũhun yĩũhũn jíin de:

Nasũu tēe-ni cúu ní, chi ĩn yaã cúu ní, áchĩ i jíinãhan i.

<sup>23</sup> Te maá hora un ní sãha-ni ĩn ndajéhé maá Jítóho yõ jeē ní jniũ ĩn cuehyĩ xeēn rey Herodes, te ni cayeji tindácũ de, te ni jihĩ de, chi ni sandúxĩ-ni de maá de te tu ní cáhãn de jeē Yaã Dios cúu jeē cujéhuu.

<sup>24</sup> Te ni jitē gã jnũhun maá Jítóho yõ, te cuehẽ ndasĩ ñayuu ni cacandije i tãcã-ni lugar.

<sup>25</sup> Te ni jĩnu jniũu jeē ní quindeca Bernabé jíin Saulo jeē cótecu ñayuu Judea. Te ni quendacoo de Jerusalén cuanungoo de Antioquia, te cándeca de Juan jeē suni nání de Marcos cuahãn jíin de.

*Jeē ní caquejéé Bernabé jíin Saulo caca cuu de nacani de jnũhun ya*

### 13

<sup>1</sup> Te mēhũu grupo ñayuu cácaandije ini űuu Antioquia ní cahĩyo tēe cástéen jíin tēe cánacani jnũhun Yaã Dios, te cácani de Bernabé, Simón jeē suni nání de Negro, Lucio űuu Cirene, Saulo, jíin Manaēn tēe ni jehnu jíin inga Herodes jeē ní cuu gobernador Galilea. <sup>2</sup> Te ĩn quivĩ jeē cáhĩyo ndite ní tēe yãha cáchiũhũn de nuũ maá Jítóho yõ, te ni cahãn maá Espĩritu Santo jíin de:

Cúni rĩ jeē sasĩn ró Bernabé jíin Saulo na quĩngoo de jniũu jee ní jeni rĩ de, áchĩ yã.

<sup>3</sup> Yũcuãn na te ni cajicãn tahũ ndite ní de, te ní casoõ de ndaha de xinĩ Bernabé jíin Saulo, te súcuan ni catajĩ de ndĩndúũ tēe ún cuanacani de jnũhun nuũ tãca ñayuu.

*Jeē ní canacani Bernabé jíin Saulo jnũhun ya nde Chipre*

<sup>4</sup> Te ni sãha Espĩritu Santo jeē ichi űũu Seleucia cuangoo de. Te yũcuan ní quĩvicoo de ĩn barco cuangoo de nde Chipre, ñuhun jeē ĩne sãn nuũ ndũte. <sup>5</sup> Te ni jinũcoo de ñuu Salamina nuũ cájecuĩñĩ barco, te ni canacani de jnũhun Yaã Dios ini tãcã vehe ĩi sinagoga jnãhan hebreo de. Te suni cuahãn Juan chĩndéé ñãhãn jíin de. <sup>6</sup> Te ní cajica nuu de ní-ni Chipre nde ní jinũcoo de ñuu Pafos jeē suni ĩne nuũ Chipre. Te yũcuan ní cajini de nuũ ĩn tēe hebreo nání Barjesús. Te tēe tásĩ cúu de, te cáhãn stahũ de jeē ĩn tēe nácani jnũhun Yaã Dios cúu de. <sup>7</sup> Te tēe tásĩ un jéjĩniũ de nuũ gobernador Sergio Paulo, te tēe ndichĩ cúu gobernador ún. Te ní cana de Bernabé jíin Saulo jeē cúni nahĩn de jnũhun Yaã Dios. <sup>8</sup> Te tēe tásĩ un suni nání de Elimas.

Te ndúcũ ndéyĩ de casi de jeē ma cándije gobernador ún. <sup>9</sup> Te Saulo jeē suni nání de Pablo, ni cunuũ Espĩritu Santo jíin de, te ni ndacoto vãha de nuũ tēe tásĩ un. <sup>10</sup> Te ni cahãn de:

Tēe sãha jniũu neé stahũ ñãhãn cúu ró, chi sehe jexeén cúu ró te jesĩ ró nuũ tãcã jniũu ndaã. Te tu jécucĩñĩ ró jeē sãca núu ró síquĩ jnũhun ndaã maá Jítóho yõ návãha ma candije ñayuu nuũ yã. <sup>11</sup> Te maá Jítóho yõ stóho ya rohó vijna, te cucuáã ró jeē ma cóto ga ró niãndii jecu quivĩ, achĩ Pablo.

Te ni cunee-ni nuũ tēe tásĩ un, te quẽndãha quẽhiyũ de cuahãn de ndúcũ de ndé vé jniũ ndaha de stéen ichi nuũ de quĩnuhun de. <sup>12</sup> Yũcuãn na te ni jini gobernador jeē súcuan ni cuu, te ni candije de jnũhun maá Jítóho yõ, te nãã ní de jíni sõho de jnũhun ya.

*Jeē ní coyũcu Pablo jíin Bernabé Antioquia ndaũũ Pisidia*

<sup>13</sup> Yũcuãn na te ni quendacoo Pablo jíin Bernabé jíin Juan űuu Pafos, te ni quĩvicoo de barco te cuangoo de űuu Perge ndaũũ Panfilia. Te yũcuan ní cusãn Juan, te cuanuhun de űuu Jerusalén. <sup>14</sup> Te ni quendacoo Pablo jíin Bernabé űuu Perge cuangoo de, te ni jinũcoo de űuu Antioquia ndaũũ Pisidia. Te quivĩ ndétãtu ní quĩvicoo de ini vehe ĩi sinagoga, te ni cacucõo de. <sup>15</sup> Te ní cahu tutu ley yã jíin tutu ní catee tēe ní canacani jnũhun ya nde jenahãn. Yũcuãn na te tēe cácujeħnu ini vehe ĩi sinagoga, vii-ni ní catajĩ de tēe cahãn jíin Pablo jíin Bernabé:

Amigo, núu íyõ jnũhun cahãn ní jéé stihvĩ ní ní ñayuu yãha, te cahãn ní na cúni nahĩn i núu súcuan, áchĩ de.

<sup>16</sup> Yũcuãn na te ni ndocucĩñĩ Pablo te ní sãha de seña jíin ndaha de jeē nahĩn-ni coo ñayuu ún, te ní cahãn de:

Nihĩn jnãhan űuu yõ Israel jíin nihĩn tēe jeē suni cáchiũhũn ní Yaã Dios, cuni nahĩn ní jijnãhan ní. <sup>17</sup> Maá Yãã Dios yohó ñayuu Israel, ni nacãji ya jíi yõ jijnãhan de. Te níni jéé cáyũcu tãtu de ñuu Egipto, te ní sãha ya jeē ní nducuehẽ de. Yũcuãn na te jíin poder maá yã ní quenehen ya de nación Egipto. <sup>18</sup> Te uũ xico cuiyã ní cajica de nuũ űũhun téhẽ, te ní jendeyĩ ni yã jíin de jeē ní castĩvi de. <sup>19</sup> Te ní snãã yã uxã nación Canaãn, te ní jēhe ya ñuhun un núu tãca jíi yõ cúu tahũ de. <sup>20</sup> Yũcuãn na te ní jeni ya tãca tēe ní candacu jniũu nuũ de nãjnũhun cuũn ciento uũ xico uxĩ cuiyã, nde quivĩ ní cotecu Samuel, tēe ní nacani jnũhun ya. <sup>21</sup> Yũcuãn na te maá ñayuu un ní cajicãn i ĩn rey, te ní jeni Yaã Dios Saúl ní ndacu de jniũu nuũ i uũ xico cuiyã. Te yucũn Benjamĩn sehe Cis ní cuu Saúl. <sup>22</sup> Te ní quenehen ya jniũu Saúl, te ní jeni ya David ní cuu de rey nuũ i. Te ní cahãn cajĩ yã jnũhun de: Cúsĩ ní rĩ jíin David sehe Isai, chí sãha de tãca jéé cuni rĩ, achĩ yã.

<sup>23</sup> Te cáhán gā Pablo:

Te sêhe yucūn David ní cacu Jesús, Yaā ní jeni Yaā Dios jeē jnáma ya yohó ñáyyu Israel, chí súcuan ní jejnūhun ya. <sup>24</sup> Te nde ná tu quejéé Jesús nacani ya jnūhun nuū ñáyyu, te ní nacani Juan jnūhun nuū táca jnáhan ñuu yō Israel jeē na nácani ni i jeē stōo i cuēchi i, te cuandute i. <sup>25</sup> Te nuū cuácuyajni jeē cū Juan, te ní cahān de: Cándetu ró jéē quiji Cristo, te jéni ní rō jeē cacujéhu nuū i, te nasūu rí cū. Chí quiji ya, te cújéhu ndasí yá jeē ní ndijén yā tu cújéhu ri tava rí, achí de.

<sup>26</sup> 'Amigo jijnáhan ní, táca níhin jéē cácu yó séhe yucūn Abraham jíin táca níhin jéē suni cándiso Iyo ní nuū Yaā Dios, chí cúní Yaā Dios jeē na cúní yō jnūhun yáha jeē cáhán ndese jnáma ya yohó. <sup>27</sup> Chí táca ñáyyu ñuu Jerusalén jíin táca tée cacujéhu nuū i, tu ní cájecūhun ní i jeē Jesús cúu Cristo, Yaā ní jeni Yaā Dios jeē jnáma ya yohó. Te ndijnahan quiví ndétātu ní cajini sōho i jnūhun ni cacahu jeē ní catee tée ní canacani jnūhun Yaā Dios nde jenahán. Te vésú súcuan te tu ní cájecūhun ní i, te ní candonda i ní cacahān i jeē na cū yá. Te súcuan ní casquícú i siquí táca jnūhun jeē ní cacahān tée ní canacani jnūhun ya nde jenahán. <sup>28</sup> Vésú tu ní cánihín i ní in cuēchi siquí yá jeē cū yá, te ní cacahān níhin i jíin Pilato jeē na cū yá. <sup>29</sup> Te ná ní jinu ní squícú siquí yá táca jnūhun cáhán nuū tútu íi, te ní casnúu de ya jicā cruz, te ní cachindūji de ya in yaú ní jete jicā cáva. <sup>30</sup> Te ní sáha Yaā Dios jeē ní natecu yá. <sup>31</sup> Te ñáyyu Galilea jeē ní jéngoo jíin yá nde Jerusalén nde na técu yá, nuū maá i ní steén ndijin yá maá yá cuehē quiví ná ní natecu yá, te ñáyyu un cácu jeē cánacani cáji jnūhun ya nuū táca gá jnáhan yó hebreo vjna.

<sup>32</sup> Te maá ná jijnáhan ná cánacani ná jnūhun váha yáha nuū ní jijnáhan ní jéé súcuan ní jejnūhun ya nuū táca jí yō. <sup>33</sup> Te jnūhun yáha ní squícú Yaā Dios nuū maá yó jeē cácu yó séhe yucūn de, chí ní nastécu yá Jesús. Chí suhva cáhán salmo uñ jeē cahán yá jíin Séhe ya Jesús: Máá ró cúu Séhe ri, te vjna ní sajeñu ri rohó jéé cúu ri Tatá rō, achí yá. <sup>34</sup> Te ní nastécu yá Séhe ya Jesús náváha ma tehyú cuiti yá, chí suhva cáhán tutu íi jeē ní cahān Yaā Dios nde jenahán: Te níhin maá ró táca jéé váha ní jejnūhun ri nuū David, achí. <sup>35</sup> Te suni súcuan cáhán inga salmo jeē ní tee David jnūhun jeē cahán Jesús jíin Yáa Dios: Ma cuáha ní jnūhun tehyú ná, chí jéjníñu ná nuū ní te maní ní jíin ná, achí. <sup>36</sup> Te David chí jíin yō jeē ní jejníñu de nuū ñáyyu ní cotecu de jíin, nájnūhun ní cuni Yaā Dios. Te ní jihí de, te ní quindūji de nájnūhun ní quindūji táca jí yō, te ní tehyú de. <sup>37</sup> Te Jesús, Yaā ní nastécu Yaā Dios, chí tu ní téhyú cuiti yá. <sup>38</sup> Jeē yúcuán jíni ñúhún jecūhun ní ní, amigo, jeē Jesús cúu Yaā cóne cáhu ní nuū táca cuēchi yó. <sup>39</sup> Chí ní

canducú ní ndahva ní cuēchi ní jéé squícú ní ley jeē ní jéhe ya nuū Moisés, te tu ní cúu ndahvā cuēchi ní súcuan. Te Jesús cúu Yaā ndáhva ndihi cuēchi ñáyyu jeē cácanđe i táca jéé ní sáha ya jehé i. <sup>40</sup> Núu súcuan te coto ní jíjnáhan ní jéé ma ndóho ní táca castigo jeē ní cacahān tée ní canacani jnūhun Yaā Dios nde jenahán, chí suhva ní cahān Yaā Dios:

<sup>41</sup> Táca rohó ñáyyu jeē casacatā, na cóto ró na castigo xeēn quiji siquí rō, te naa ní rō coto rō, te cuu rō.

Chí tiempo maá ró te sáha ri jniñu xeēn jeē ma cándđe cuiti rō jeē súcuan sáha ri vésú nacani ñáyyu jnūhun un núu rō, achí yá.

Achí Pablo.

<sup>42</sup> Te ní quendacoo Pablo jíin táca jnáhan de vehe íi sinagoga jnáhan hebreo de. Te ñáyyu sáin naciōn ní cacahān ndahú i jíin de jeē inga quiví ndétātu nacani tucu de jnūhun yáha nuū i. <sup>43</sup> Te ní jité ñáyyu un cuángoo i. Te cuehē ñáyyu hebreo jíin ñáyyu sáin naciōn jeē ní cacandđe sahān hebreo te cáchiñúhún i nuū Yaā Dios, cuangoo i jíin Pablo jíin Bernabé. Te ní cacahān níhin de jíin i jeē na cuñí níhin i jíin jnūhun jeē maní Yaā Dios jíin i.

<sup>44</sup> Te quiví ndétātu inga semana te je yajni ndihi ñáyyu ñuu un ní candutútu i jeē cúní nahín i jnūhun Yaā Dios. <sup>45</sup> Te nuū ní cajini tée hebreo jeē ní candutútu cuehē ñáyyu, te ní cacucúésún ní de, te ní cacahān de jeē násúu jnūhun váha cúu jeē steén Pablo, te ní cacahān neé de nuū Pablo. <sup>46</sup> Yúcuán na te jéñu-ni ní cacahān Pablo jíin Bernabé, achí de:

Cánuú jéé xíhna gā nuū maá ní jeē cácu ní jnáhan ñuu yō hebreo nacani ná jnūhun Yaā Dios, te tu ní cájetáhú ní. Núu súcuan te cuēchi maá ní cúu jeē ma níhin tahú ní cotecu ní níf cáni. Te vjna te quinacani ná jnūhun ya nuū ñáyyu táca naciōn jeē tu cajini i jnūhun ya. <sup>47</sup> Chí suhva ní ndacu maá Jítoho yó jniñu nuū na jíjnáhan ná: Ní jeni ri rohó jéé cúu ró nájnūhun luz jeē steén iní anuá ñáyyu táca naciōn, chí ní ñáyyiví steén rō jnūhun ri nuū ñáyyu jeē jnáma ri i, achí yá.

Achí de.

<sup>48</sup> Te ñáyyu sáin naciōn, nuū ní cajini sōho i jnūhun yáha te ní cacusí teyí ní i. Te ní cacahān i jeē yōhyo váha jnūhun cúu jnūhun maá Jítoho yó, te táca ñáyyu jeē ní nacáji Yaā Dios i jeé cotecu i níf cáni, ní cacandđe i. <sup>49</sup> Te ní jité jnūhun maá Jítoho yó cuahān níf región yúcuán. <sup>50</sup> Te ñuu Antioquía cáyucú ñahan cácu nuū te cáchiñúhún ña Yaā Dios. Te tée hebreo ní cascáhán de ña, te suni ní cascáhán de tée cacujéhu ñuu ún, te ní cajito xeēn i Pablo jíin Bernabé te nde ní cascúu i de cuangoo de. <sup>51</sup> Te ní cascóyo de ticachā jehé de jeé steén de jeé iyó cuēchi i. Te ní

jinūcoo de ñuu Iconio. <sup>52</sup> Te vēsū sūcuan te ñayuu cācandije un ní cunuū Espírítu Santo jíin í, te cācusī teyí ní í.

*Jeē ní coyūcu Pablo jíin Bernabé ñuu Iconio*

## 14

<sup>1</sup> Te ñuu Iconio ní quīvicoo Pablo jíin Bernabé ini vehe íi sinagoga jnāhan de hebreo. Te jíin jñuhun jeē ní canacani de te ní cācandije cuehē jnāhan de hebreo, te suni sūcuan cuehē ñayuu sīn naciōn ní cācandije í. <sup>2</sup> Te jnāhan de hebreo jeē tu ní cācandije, ní cascāhan de ñayuu sīn naciōn, te ní cajeni ní í jeē nāsūu ñayuu vāha cácuu ñayuu cācandije. <sup>3</sup> Te ní caquendōo Pablo jíin Bernabé yūcuan cuehē gā quivī. Te jēhnu-ní ní canacani de jñuhun Jitoho yō, chí cācucāhnu ní de ya jeē vāha quihīn jñiñu un sāha ya. Te máá yá chí ní steén yā jeē iyó ndáá jñuhun jeē yóhoyo vāha ní yā jíin í jeē cānacani de, chí ní jēhe ya jeē sāha de jñiñu jēhnu jeē steén jeē cūjēhnu ya. <sup>4</sup> Te ñayuu ñuu un ní cācusīn ní í jñjñāhan í, sava í jíin téē hebreo jeē tu cācandije de Jesús, te sava gā í jíin téē apóstol. <sup>5</sup> Te ñayuu hebreo jíin ñayuu sīn naciōn jíin téē cácuu tohō ní casqujñāhan jñuhun jeē sāha xeēn jíin Pablo jíin Bernabé, jíin jēē cuāha yuū xiní de núú. <sup>6</sup> Te ní cajini de jeē sūcuan cáculi sāha, te ní cajinu de cuangoo de nde ñuu Litra jíin ñuu Derbe ndañūū Licaonia jíin táca ñuu yajni yūcuán. <sup>7</sup> Te yūcuan ní canacani de jñuhun jeē jnāma ya yohó.

*Jeē ní cajēhe í yuū xiní Pablo ini ñuu Litra*

<sup>8</sup> Te ñuu Litra néne íin téē jeē tu cúu caca, te tu jīca cuiti de chí nde quivī ní cacu de cācójó de. <sup>9</sup> Téē un ní jini sōho de jñuhun jeē cahán Pablo, te ní jito vāha Pablo nuū de, te ní jini de jeē candije vāha téē un jēē ndúvaha de. <sup>10</sup> Te ní cahān jee Pablo jíin de:

Ndocuñī, condichi rō, achí de.

Te ní scānda téē un máá de ní nucōndichi-ní de, te ní quejéé de caca de. <sup>11</sup> Te ní cajini ñayuu ún jñiñu jēhnu jeē ní sāha Pablo, te ní cacahān jee í jíin yuhu máá í jeē cúu yuhu Licaonia:

Ní cuun yāá ní quecoo nuū yō, te cájica najñuhun cájica téē, achí í.

<sup>12</sup> Te ní cacahān í jee Bernabé cúu yāá Júpiter, te Pablo cúu yāá Mercurio chí Pablo cúu téē nácani jñuhun. <sup>13</sup> Te yajni yuñūū un néne veñūhun yāá Júpiter. Te máá sūtū jejñiñū ini veñūhun un ní quihīn de stiquí jijnāhan tí te ní scutú de tí ita te vēji de nde nuū quivī í yuñūū, te máá de jíin ñayuu ñuu un cáculi de cahni de stiquí un sócō de nuū Bernabé jíin Pablo nuū. <sup>14</sup> Te Bernabé jíin Pablo, téē cácuu apóstol, ní cajito de jeē sūcuan cáculi ñayuu un sāha í, te ní candatá de sahna de jeē steén de jeē castívī ndasí í jeē casáha í sūcuan. Te ní quenendava de

ní quīvicoo de mēhñu ñayuu cuehē ún, te ní cacana jee de:

<sup>15</sup> Tātā jijnāhan ní, ma sāha cuiti ní sūcuan, chí sāhá suni téē-ní cácuu ná najñuhun máá ní jijnāhan ní. Te vējicoo ná nacani ná jñuhun vāha Yāá Dios nuū ní, chí cahān na jíin ní jeē ma sāha gā ní táca jñiñu vāha jēē tu ndé jējñiñu cuiti, chí sa suhva na chíñūhūn ní máá Yāá Dios, Yāá técu, Yāá ní sāha andiví jíin ñáyiví jíin ndute mar jíin táca gā jeē iyó ní cáhnu. <sup>16</sup> Te nde jenahán ní jēhe ya jñuhun jeē na sāha táca ñayuu modo cáculi máá í. <sup>17</sup> Te vēsū sūcuan te ní ní steén yā ndese Yāá cúu ya, chí máni sāha ya jñiñu vāha jíin yō, chí scūun ya saū, te sāha ya jeē cúu vāha itu yō, te jēhe ya jeē jíni ñūhūn yó návāha caji yō te coo sīí ní yō, achí ndindúú de.

<sup>18</sup> Te vēsū sūcuan ní cacahān de, te yōhoyo uhū ní cajesi de nuū ñayuu un návāha tú socō í stiquí un núú de jeē chíñūhūn í ndindúú de.

<sup>19</sup> Yūcuán na te ní quecoo jecu téē hebreo ñuu Antioquía jíin ñuu Iconio, te ní cascāhan de ñayuu cuehē ún, te ní cajēhe í yuū xiní Pablo. Te ní caquenehen í de yatá ñūú ún, chí ní cajeni ní í jeē jé ní jíhí de. <sup>20</sup> Te téē cācandije ní cacondúú de Pablo, te ní ndonda Pablo, te ní ndiví de ini ñuu. Te inga quiví ní quihīn de ichi cuahān de jíin Bernabé nde ñuu Derbe.

<sup>21</sup> Te ini ñuu un ní canacani de jñuhun jeē jnāma ya ñayuu, te ní cācandije cuehē ñayuu ní casáha de. Te ní canandicó de cuanuhun de ñuu Litra jíin ñuu Iconio jíin ñuu Antioquía. <sup>22</sup> Te ní cahije gā ní ñayuu cācandije yūcuan ní casáha de. Te ní castívī ní de í jeē na cuñī níhín í jíin jñuhun ya, chí ní cacahān de jeē níni quijí cuehē jñūndóho siquí yō te yūcuán na te jinū yō ñuu nuū ndácu Yāá Dios jñiñu. <sup>23</sup> Te táca ñuu ní cajeni de téē jēhnu cándiso jñiñu condito de ñayuu cācandije. Te ní cahīyo ndite ní Pablo jíin Bernabé nuū yā, te ní cajicān tahú de, te ní cacahān de jíin máá Jitoho yō jeē na cóto ya ñayuu ún chí cācandije í máá yá.

*Jeē cuánuhun tucu Pablo jíin Bernabé ñuu Antioquía ndañūū Siria*

<sup>24</sup> Te ní cayāha de cuangoo de región Písidia, te ní najñūcoo de región Panfilia. <sup>25</sup> Te ní canacani de jñuhun ya ini ñuu Perge región Panfilia, te sáá te cuangoo de ñuu Atalia. <sup>26</sup> Te yūcuan ní quīvicoo de barco, te ní najñūcoo de ñuu Antioquía. Te ñuu yūcuan cúu nuū ní cajicān tahú ñayuu nuū Yāá Dios jēhē de jeē na chíndéé ñāhán yá de jeē quíngoo de nacani de jñuhun. Te ní jinu jñiñu, te ní najñūcoo de ñuu ún. <sup>27</sup> Te nuū ní najñūcoo de yūcuán, te ní casáha de junta jíin ñayuu cācandije, te ní canacani de jñuhun táca ndese cuehē jeē vāha ní sāha Yāá Dios jíin de, chí ní jēhe ya jñuhun jeē suni candije ñayuu táca naciōn jeē tu ní cájini í jñuhun ya.

28 Te ni caquendōo de yūcuan cuéhē quivī jīn ñayuu cácadnje.

*Siqui junta ñuu Jerusalén*

## 15

1 Yūcuán na te jecu tēe Judea ni quijicoo de ñuu Antioquia, te ni castéen de nuū tācá hermano jeē nuu tu sāha i circuncidar, nájñuhun cáhán ley jeē ni jēhe ya nuū Moisés, te tú na modo cácu i. <sup>2</sup> Te Pablo jīn Bernabé ni catejnáhan de jīn tēe ún, te tu ní cūndaá. Te jeē yūcuan ní candajnūhún de jeē quíngoo Pablo jīn Bernabé jīn jecu gā tēe cácadnje un ndé ñuu Jerusalén, te yūcuán ndajnūhún de siquī jñuhun yáha jīn tēe cácuu apóstol jīn tēe jēhu cándiso jñiñu nuū ñayuu cácadnje yūcuán.

<sup>3</sup> Te ñayuu cácadnje un ní canachuhun íchí i de. Te ni cayáha de ichi Fenicia jīn Samaria, te cánacani de jñuhun jeē suni ñayuu tāca gā nación jeē tu ní cájini i jñuhun ya, ni castóo i jñiñu jeē tu íyó ndáá te ni cacandje i Yaa Dios. Te yóhoyo ni cacusī ni tācá hermano jeē ní canihín de jñuhun jeē sūcuan ni cacandje ñayuu ún.

<sup>4</sup> Te ni najinūcoo de ñuu Jerusalén, te ñayuu cácadnje yūcuan jīn tēe apóstol jīn tēe jēhu cándiso jñiñu nuū ñayuu un, ní cacusī ni de jeē ní najinūcoo jñáhan de ún. Te Pablo jīn Bernabé ni canacani de tāca jñuhun ndese cuehē jeē vāha ni sāha ya siquī jñiñu jeē ní canacani de jñuhun ya. <sup>5</sup> Te sava tēe grupo fariseo jeē cácadnje ni candocuīñi te ni cacahān:

Ñayuu sīn nación jeē cácadnje i Jesús, jīni ññuhún jēe sāha i circuncidar nájñuhun cása máa yó, te cánuu ndacu yó jñiñu nuū i jeē na squícu i ley jeē ni jēhe ya nuū Moisés, áchí.

<sup>6</sup> Te tāca tēe apóstol jīn tāca tēe jēhu cándiso jñiñu nuū ñayuu cácadnje, ni candutútú de junta návāha ndajnūhún de te sándaá de siquī jñuhun yáha. <sup>7</sup> Te tācá de ni cacahān de ndese cájini de ní. Yūcuán na te ni ndocuīñi Pedro, te ni cahān de:

Hermano jijnáhan ní, je cájini vāha ni jēe je íyó tiempo jeē ní nacáji Yaa Dios saña jēe quihín na nuū ñayuu sīn nación te nacani ná jñuhun nuū i jeē jñáma ya i, návāha candje i Jesucristo. <sup>8</sup> Te Yaa Dios chí jīni yā ndese cáa ánuá ndihí ñayuu, te ni steén yā jeē jetáhu yá i, chí suni ní jēhe ya Espirito Santo nuū i jijnáhan i, nájñuhun ní jēhe ya nuū máa yó. <sup>9</sup> Te inuú-ni sāha ya jīn yó jīn máa i, chí siquī jeē suni ní cacandje i jñuhun jeē jñáma ya i, te jeē yūcuan ní sándoo ya anuá i nuū tāca cuéchi i. <sup>10</sup> Te vijna zñaun cácuni ní ndacu ní jñiñu jeē na squícu i ley un? Chí tu núnjahan ní Yaa Dios jeē sūcuan. Chí cácuni ní tee ní jñiñu yí yáha siquī ñayuu cácadnje ún, te ní tāca jí yó tu ní cácuendeyí de squícu

de, te ní máa yó. <sup>11</sup> Chí sa suhva cácadnje yó jēe jñáma ya yohó sūcuan-ni siquī jeē yóhoyo vāha ni máa Jítoho yó Jesús jīn yó, te suni sūcuan-ni jñáma ya máa i, nasūu siquī jeē squícu i ley un, áchí de.

<sup>12</sup> Yūcuán na te tēe cuehē un ní cacuu nayúu de, te ni cajini nahín de jñuhun cácahān Bernabé jīn Pablo. Chí ni cacastūhún de jeē ní jēhe ya poder jeē ní casáha de tācá jñiñu jēhu jeē steén jeē cujēhu ya, ni cajito ñayuu tācá nación jeē tu cájini i jñuhun ya. <sup>13</sup> Te nuū ní jīnu ni cacahān Pablo jīn Bernabé, te ni cahān Jacobo:

Hermano jijnáhan ní, cuni sōho ní na cáhán na. <sup>14</sup> Ni nacani Simón Pedro jñuhun ndese ni quejéé nuū jñiñu jeē jñáma Yaa Dios ñayuu tācá nación jeē tu cájini i jñuhun ya, chí suni mēñu máa i nacáji ya ñayuu jeē ndúu i ñayuu máa yá. <sup>15</sup> Te quíjnáhan jñuhun ni cahān de yáha jīn jñuhun ni catee tēe ni canacani jñuhun Yaa Dios nde jenahán jeē yosó nuū tútu i:

<sup>16</sup> Achí Yaa Dios:

Nájñuhun ní cotúu vehe David cúu jeē tuá ndácu sēhe yucūn de jñiñu, nájñuhun ní ndacu máa de jñiñu nde jenahán.

Te in quivī te ndee ri

te jeē nasáha ri vehe de cúu jeē sāha ri jeē nandacu Sēhe yucūn de jñiñu.

<sup>17</sup> Sūcuan sāha ri návāha tāca gā ñayuu na nánducú i ruhū

nde jīn ñayuu tācá nación jeē tu cájini jñuhun ri, tācá i jeē cána ri i candje i ruhū.

<sup>18</sup> Sūcuan cáhán máa Jítoho yó, te nde jenahán ní steén yā jñuhun yáha nuū ñayuu.

Achí tutu i.

<sup>19</sup> Jeē yūcuan jéni ní na jēe ñayuu tāca gā nación jeē ní castóo i jñiñu jeē tu íyó ndáá te ni cacandje i máa Yaa Dios, ma stáhán yó i jeē ndácu yó jñiñu jeē squícu i ley Moisés.

<sup>20</sup> Chí sa suhva na tēe yó carta quihín nuū i jeē ma cáji i ndeyu jeē ní sócō nuū ídolo, te ma cáca jnéni i, te ma cáji i cūñu quití jeē jíhí jeē tu jéti niñí tī, te ní ma cáji i niñí. <sup>21</sup> Jñuhun yáha-ni tee yó quihín nuū i nájñuhun je cástéen nde jenahán. Chí nde jenahán je íyó tēe cástéen jñuhun ley jeē ní jēhe ya nuū Moisés, te ndijnahan quiví ndétātu cácahu de ley un ini vehe i sinagoga tācá ñuu, áchí Jacobo.

<sup>22</sup> Yūcuán na te tēe apóstol, jīn tēe jēhu cándiso jñiñu, jīn ndivií ñayuu cácadnje, ní cacundaá ní de jeē nacáji de tēe quingoo jīn Pablo jīn Bernabé nde ñuu Antioquia. Te tēe ní canacáji de un cácuu Silas jīn Judas, te inga sīhví de cúu Barsabás. Te cándiso jñiñu de nuū tācá hermano cácadnje. <sup>23</sup> Te ni cajendeca de carta jeē cahān suhva:

Máa ná cácuu tēe apóstol, jīn tāca tēe jēhu cándiso jñiñu nuū ñayuu cácadnje, jīn tāca gā

hermano yō. Te cátee ná carta yáha cuájeē nuū ní jínáhan ní, hermano, jeē cácuu ní ñáyyuu sñn nación jeē cáyūcu ní ñuu Antioquía jíin Siria jíin Cilicia. Cuandeyí ní ní jínáhan ní. <sup>24</sup> Ni cajini jñuhun ná jée ní quendacoo sava jñáhan ná yáha ní jengoo nuū ní, te jíin jñuhun jeē ní cacahān de te ni casáha jeē ní canacani ndasí ní ní, te ni cacuxí ní ní, chí cándacu de jñíñu jeē sáha ní circuncidar jíin jée squícu ní jñíñu cáhán ley jenahán jée ní jéhe ya nuū Moisés. Te nasūu sáña ní cátaji tée un jée jeē de nuū ní. <sup>25</sup> Jeē yūcuan ní cajeni ní ná, te inuū ní ni cacundaā ní ná, te ní nacāji ná tée cuajēcoo nuū ní jíin úu hermano yō jeē maní yō jíin, cúu Bernabé jíin Pablo. <sup>26</sup> Te ndindúú de je ni catana de máá de nuū jñúndóho vēsú na cúu de jeē siquí jñuhun Jitoho yō Jesucristo. <sup>27</sup> Núu súcuan te cátaji ná Judas jíin Silas jeē nuū ní, te suni nájnūhun cáhán carta yáha suni súcuan castūhún de nuū ní jínáhan ní. <sup>28</sup> Chí máá Espíritu Santo ní steen yā ñn modo jeē ní cacundaā ni na jée ma tée ná táca jñíñu yí ley Moisés siquí ní, chí máá-ni jñíñu yáha jée cánuu gá: <sup>29</sup> Ma cáji ní táca jée ní casocó nuū ídolo, ní ma cáji ní níñí ní quítí jeē jíhí jeē tu jéti níñí tí, te ma cáca jnéni ní. Te vāha squícu ní núu tuá sáha ní táca jée yáha. Súcuan na cóo te sándeiy ní ní, áchí carta.

<sup>30</sup> Yūcuán na te tēe quingoo un cuángoo de nde ñuu Antioquía. Te ni cacana de xini ñáyyuu cácañdije ni candutútu de junta, te ni cajéhe de carta un núu í. <sup>31</sup> Te ni cacahu í, te ni candusí ní i jeē ní níñín i jñuhun ndeyí ní nuū carta ún. <sup>32</sup> Te suni tēe cáncani jñuhun Yáa Dios cácuu Judas jíin Silas, te jíin cuéhē jñuhun ní cacahān de te ní candundeiy ní táca hermano un, te ni cahije ga ni i jíin jñuhun ya. <sup>33</sup> Te ni coyūcú de yūcuán jecu quiví. Yūcuán na te hermano yūcuan ní canacuátáhu i nuū de jeē quinuuhun de nuū tēe jeē ní cataji de. <sup>34</sup> Te Silas ni nujnahan ni de ni quendōo de yūcuán. <sup>35</sup> Te suni ni caquendōo Pablo jíin Bernabé ñuu Antioquía, te máá de jíin sava ga tēe ni castéen de te ni canacani de jñuhun vāha máá Jítoho yō.

*Jeē quihín Pablo inga jínu nacani de jñuhun ya*

<sup>36</sup> Te ni cuu ga quiví, te ni cahān Pablo jíin Bernabé:

Vijna te na quícondēhe yó táca hermano yō ndijnahan ñuu nuū ní nacani yó jñuhun máá Jítoho yō, na cóndēhe yó ndese cáhíyo í, áchí de.

<sup>37</sup> Te Juan jeē suni nání de Marcos, cúni Bernabé jeē quihín tēe un jíin de. <sup>38</sup> Te tu ní cúni Pablo jeē quihín tēe un jíin de, chí nde Panfilia ní cusñn Marcos nuū Pablo jíin Bernabé, chí tuá ní chindéé ñáhan de ndindúú tēe un siquí jñíñu ya nde saá. <sup>39</sup> Te

nahán ní candajnūhun Pablo jíin Bernabé, te tu ní cácuandaā ní de siquí Marcos, te ní cacusñn de. Te Bernabé ni jeca de Marcos, te ni quivícoo de barco cuangoo de nde Chipre, ñuhun jeē íne sñn nuū ndúte. <sup>40</sup> Te Pablo ní nacāji de Silas quihín jíin de. Te táca hermano cácañdije ní cajicān tahú de nuū máá Jítoho yō jeē siquí jeē vāha ni yā te na chindéé ñáhan yá Pablo. Te cuahān Silas jíin Pablo. <sup>41</sup> Te ní cajica cuu de ní Siria jíin Cilicia. Te táca grupo ñáyyuu cácañdije ní cahije ga ni i jíin jñuhun ya ní casáha de.

*Jeē cuahán Timoteo jíin Pablo jíin Silas*

## 16

<sup>1</sup> Yūcuán na te sáá te ni jinū Pablo jíin Silas ñuu Derbe jíin ñuu Listra. Te yūcuan néne ñn tēe suchí cándije, nání i Timoteo. Sēhe yí ñn ñahan hebreá cúu í, te ñahan cándije cúu ña. Te tátá í chí tēe griego cúu de. <sup>2</sup> Te táca hermano ñuu Listra jíin ñuu Iconio cácejnūhún de Timoteo. <sup>3</sup> Te cúni Pablo condeca de Timoteo quihín de jíin í. Te ní cahān Pablo jeē quihín í cuu i circuncidar, chí tu cúni Pablo jeē cahān ñáyyuu hebreo jeē tu ní squícu Timoteo costumbre un, chí ndíhí ñáyyuu cájini í jeē tēe griego cúu tátá í. <sup>4</sup> Te táca ñuu nuū cuángoo de te ni cacastūhún de nuū ñáyyuu cácañdije jeē na squícu í máá jñíñu jeē ní casándaā tēe apóstol jíin táca tēe jéhu cáyūcú ñuu Jerusalén jeē cándiso jñíñu nuū ñáyyuu cácañdije. <sup>5</sup> Te ñáyyuu cácañdije ní cahije ga ni í. Te ndijnahan quiví ní cacandije cuehé gā ñáyyuu.

*Jeē ní jito ndijin Pablo ñn tēe ñuu Macedonia*

<sup>6</sup> Te tu ní jéhe Espíritu Santo yā jñuhun jeē nácani de jñuhun ya ní Asia. Jeē yūcuan ní cayāha de ichi Frigia jíin Galacia cuangoo de. <sup>7</sup> Te ní jinūcoo de nuū quijnáhan Misia jíin Bitinia. Te cácumí de quingoo de Bitinia, te máá Espíritu Jesús tu ní jéhe ya jñuhun quingoo de. <sup>8</sup> Te ní cayāha de ñn lado Misia cuangoo de ñuu Troas jeē íne yajni yumar. <sup>9</sup> Te ñn jecuáá te nájnūhun ñn jēni ní jito ndijin Pablo, te ní jito de jeē índichi ñn tēe ñuu Macedonia nuū de cáhán ndahú jíin de: Nehen ní ñuu ná Macedonia te chindéé ñáhan ní sáña jínáhan ná, áchí. <sup>10</sup> Te súcuan ní jito ndijin de. Yūcuán na te sáña, Lucas, ní quijnáhan ná jíin de. Te ní casátūhva ná jíin de jínáhan de jeē quingoo ná Macedonia, chí ní cajini cají ná jeē máá Yáa Dios táji yá sáña jínáhan ná jée castūhún ná nuū ñáyyuu yūcuan jñuhun jnama ya í.

*Jeē ní coyūcu Pablo jíin Silas ñuu Filipos*

<sup>11</sup> Te jíin barco ní quendacoo ná ñuu Troas, te cuangoo ndaā-ni ná ndé Samotracia, ñuhun jeē íne sñn nuū ndúte. Te inga quiví ní jinūcoo ná ñuu Neápolis. <sup>12</sup> Te yūcuan ní quendacoo ná, te ní jinūcoo ná ñuu Filipos

jeē cūu ñuu cujéñnu ga íne Macedonia, chi máá ñáyyuu ñuu Roma ni casáha i ñuu i ún. Te ni coyūcu ná ñuu Filipos jecu quiví. <sup>13</sup> Te ñn quiví ndétātu ní quendacoo ná ñuu ún, te ni jengoo ná ñn yuyúte, chi yūcuan cūu ñn lugar nuū cájicān tahú ñayuu. Te ni cacucōo ná, te ni canacani ná jñūhun ya nuū tācā ñahan ní canataca yūcuán. <sup>14</sup> Te ñn ña nání Lidia jeē véji ña ñuu Tiatira, xico ña sahma ndihí jeē yáhu ga ndeé. Te máá ña níni chíñūhún ña Yaā Dios. Te ni jini sōho ña jñūhun canacani ná, te máá Jitoho yō Jesús ni sáha ya jeē ní candíje ña jñūhun jnáma ya ña jeē ní cáhān Pablo. <sup>15</sup> Te ni jendute ña nde jín ñayuu cáyūcu vehe ña, te ni cahān ndahú ña jín ná:

Núu cácuáhnu ni ni jéé candíje ndije ná máá Jitoho yō, te cuajeé ní coyūcu ní vehe ná, áchí ña.

Te ni cana fuerza ña sãña jínáhan ná.

<sup>16</sup> Te ñn quiví te cuangoo tucu ná suu lugar nuū jéngoo ñayuu cájicān tahú. Te ni canajnáhan ná jín ñn sūchi síhí jéé ñūhun tachí ini i, te máá un sáha jeē cahán i tācā ndese coo te cūndaā jeē cahán i. Te sūchí un ní cajeen patrón i, návaha nihín de cuehē xūhun síquī jeē cástūhún i nuū ñn ñn ñayuu ndese coo ichi núu. <sup>17</sup> Te sūchí un ndíquín i sãña jínáhan ná cána jee i:

Tēe yáha cájejníñu de nuū Yaā Dios, Yaā cujéñnu téyí, te cácastūhún de ndese cácu ní núu cuéchi ní jínáhan ní, áchí i.

<sup>18</sup> Te cuehē quiví ni cuu súcuan te nde ni jnanini ni Pablo. Te ni ndió cóto de nuū i, te ni cahān de jín táchí ún:

Jín poder máá Jesucristo ndácu ri jniñu nuū rō jeé na quénda rō ini i quihín rō, áchí de.

Te hora un ní quenda-ni cuahān.

<sup>19</sup> Yūcuán na te ni cajini patrón i jeē ma nihín gā i xūhún cuu de, te jeé yūcuan ní cajni de Pablo jín Silas cuangoo jín de nde vehe juzgado nuū cáyūcu tóhō. <sup>20</sup> Te ni cajeni ún de nuū juez, tēe cásándaā jniñu, te ni cacahān:

Tēe hebreo cácuu tēe yáha, te cástóna de ñayuu ñuu yō cúvaā i. <sup>21</sup> Te cájequin de inga costumbre jeē ma cūu cuatáhú cuiti yō, ni ma cūu sáha yō, chí tu jéhe ley nación yō jñūhun, chí ñayuu nación Roma cácuu yō, áchí.

<sup>22</sup> Te suni ni candonda ñayuu síquī Pablo jín Silas. Te tēe cácuu juez ni canduca de jniñu jeē na quénda sahma ndindúú de te cani yujnu síquī de. <sup>23</sup> Te nuū ni jínu ni cacani téyí un de, te ni casquíví de vecāa. Te ni canduca jniñu nuū tēe ndíto vecāa jeē na cóndito ndasi de jeē ma cácu ndindúú tēe ún. <sup>24</sup> Te jeē súcuan ni tahú jniñu nuū tēe ndíto vecāa te ni squíví de Pablo jín Silas nde ichi íni gā, te ni squíví jehé de t̄sin yujnu ndéé yaú te ni cajihni de.

<sup>25</sup> Te nuū ní cuu sava ñuu, te cájicān tahú Pablo jín Silas, te cájita de yaa í nuū máá Yáa Dios. Te ñayuu cáhīn jín de vecāa un ní cajini nahín i. <sup>26</sup> Te sanaa-ni te ni jnaā nihin téyí, te nde nuū cimiento vecāa un ní canda. Te ni canune-ni yéhyí vecāa ún, te ni canandají-ni cadena jeē cánuhni tāca ñayuu ún. <sup>27</sup> Te ni natahū ni tēe ndíto vecāa, te ni jito de jeē núne yéhyí vecāa ún. Te ni tava de espada jeē cáhni de máá de nuū, chí ni jeni ní de jeē ndivii cuiti ñayuu cáhīn vecāa un cuángoo i. <sup>28</sup> Te ni cana jee Pablo:

Ma cáhni ní máá ní, chí cáhīn ndihí ná, áchí de.

<sup>29</sup> Yūcuán na te máá tēe ndíto vecāa ni cana de jeē na quíndeca i ñuhún, te yachí ní quíví de ini vecāa. Te ni jecuiñí yití de nuū Pablo jín Silas, te quísi i de jeé yūhú de. <sup>30</sup> Te ni quenehen de Pablo jín Silas, te ni cajnūhún de:

Tátā, ¿na vé cánuú sáha ná te jnama ya sãñá? áchí de.

<sup>31</sup> Te ni cacahān de jín tēe ún:

Candíje ní táca jéé ní sáha Jitoho yō Jesucristo jehé ní te cácu ní, te suni súcuan cácu ndihí ñayuu cáyūcu vehe ní, áchí de.

<sup>32</sup> Te ni canacani de jñūhun máá Jitoho yō nuū tēe un jín núu táca ñayuu cáyūcu vehe de. <sup>33</sup> Te suu máá jecuáa yūcuan ní nacate tēe ndíto vecāa un núu ní catují Pablo jín Silas jeé ní cacani yujnu síquī de. Yūcuán na te ni jendute de jín ndihí ñayuu cáyūcu vehe de. <sup>34</sup> Te ni jeca de Pablo jín Silas cuahān de jín vehe de, te ni jéhe de staā ni cayejí de, te cácusí ni ndihí de vehe de jeé ní cacandíje de Yaā Dios.

<sup>35</sup> Te nuū ní cundijin, te tēe cácuu juez ni catají de policía cuangoo jín jñūhun jeé na siáá tēe ndíto vecāa un Pablo jín Silas quingoo de. <sup>36</sup> Te tēe ndíto vecāa un ní castūhún de jñūhun yáha núu Pablo:

Tēe cácuu juez ni catají de jñūhun véji jeé na siáá na nihín quíngoo ní. Núu súcuan te quendacoo ní quihín ní, te cuandeyí ni ní, áchí de.

<sup>37</sup> Te ni cahān Pablo jín policía:

Cuehē ñayuu ni cajito i jeé ní cacani de sãñá, te ni tu ní cásándaā de x̄hna gā núu ndaā jeé iyó cuéchi ná. Te ni cachuhun de sãñá vecāa, vesú cácuu ná séhe nación Roma, te iyó ley jeé ma cūu sáha súcuan jín ñayuu cácuu séhe nación Roma. Te vijna zá quenehen sáhi de sãña cácuu de naún? Ma cūu cuiti. Na quícoo máá de quenehen de sãña jínáhan ná, áchí Pablo.

<sup>38</sup> Te ni canandió cóo policía ni castūhún de jñūhun yáha núu tēe cácuu juez, te ni cayūhú de jeé ní cajini sōho de jñūhun jeé séhe nación Roma cácuu Pablo jín Silas. <sup>39</sup> Te ni quecoo tēe cácuu juez ún, te yōhyo ni cacahān ndahú jín Pablo jín Silas jeé na cóne cáhu ni de. Te ni caquenehen de vecāa ún,

te ni cacahān ndahū jín de jeē na quéndacoo de ñuu un quíngoo de. <sup>40</sup> Yūcuán na te ni quendacoo de vecāa, te ni jengoo tucu de vehe Lidia, te ni cacahān de jñūhun ndeyí ni jín táca hermano. Te ni caquihin de ichi cuangoo de.

*Jeē ní cacuvaā ñayuu Tesalónica*

## 17

<sup>1</sup> Te Pablo jín Silas ni cayāha de ñuu Anfīpolis jín ñuu Apolonia cuangoo de, te ni jinūcoo de ñuu Tesalónica nuū iyó in vehe iī sinagoga jñāhan de hebreo. <sup>2</sup> Te ni coyūcú de yūcuan únī semana, te táca quiví ndétātu jéhen Pablo vehe iī sinagoga, nájñūhun sáha sáha de, te ni nacani de jñūhun ya nuū tēe un. <sup>3</sup> Te jín jñūhun cáhán tutu iī ni steén de jeē súcuan ni jini ññūhun ndoho Cristo jeē cúu yā te natecu yā. Te ni cahān de:

Jñūhun nācani ná nuū ni cúu jñūhun Jesús, te máá yá cúu Cristo, Yāá ní jeni Yāá Dios jeē jñāma ya yohó, áchí de.

<sup>4</sup> Te ni cacandije sava jñāhan de hebreo jín cuéhē ñayuu griego jeē cáchiñūhún i Yāá Dios, jín cuéhē ñahan cácuu nuū, te ni nduu inuú ni i jín Pablo jín Silas. <sup>5</sup> Yūcuán na te yōho ni cacucuesún ni jñāhan de hebreo jeē tu cácadije, te ni castítú tēe cunéé jēé cájica cúxí-ni, te ni quejéé cácana ndee cuangoo. Te súcuan ni casaca núu de xini ñayuu ñuu ún. Te ni jengoo de vehe Jasón cánanducú de Pablo jín Silas jeē jñí de tēe un quíndeca de nuū ñayuu cuéhē. <sup>6</sup> Te tu ní cánanihín de, te ni cañuhun de Jasón jín sava ga hermano cuangoo de jín nuū tohó ñuu ún. Te jeē siquí Pablo jín Silas ni cacana jee de:

Tēe jeē castívi xini ñayuu ní ñáyiví, je ni quecoo de nde yahá. <sup>7</sup> Te máá Jasón ni jēhe núu vehe cáyūcu tēe ún. Te tēe ún tu cájetáhú de ley máá rey yohó ñayuu Roma, chí sa suhva cácahān de jeē cájetáhú de nuū inga rey jeē nani Jesús, áchí de jññāhan de.

<sup>8</sup> Te ñayuu jín tēe cácuu tohó ni cajini sōho i jñūhun yāha, te ni cacuvaā i siquí. <sup>9</sup> Te Jasón jín táca gá hermano ni castóo de xūhún de, chí ni cacahān tohó un jín de jeē nde núu tají de Pablo jín Silas quíngoo de inga ñuu, yūcuán na te nacuāha tohó un xūhún de. Te súcuan te ni casiáá de Jasón jín táca gá hermano cuangoo de.

*Jeē ní coyūcu Pablo jín Silas ñuu Berea*

<sup>10</sup> Yūcuán na te táca hermano un, yachí-ni ni cascáca de Pablo jín Silas jecuáá un, cuángoo de nde ñuu Berea. Te nuū ni jinūcoo de yūcuán, te ni quivicoo de vehe iī sinagoga jñāhan ñuu de hebreo. <sup>11</sup> Te jñāhan ñuu de hebreo cáyūcu yūcuan, vāha ga ni máá de vesú jñāhan ñuu de hebreo cáyūcú ñuu Tesalónica, chí vāha ni cacusí ni de jín jñūhun ni cacahān Pablo jín Silas. Te ndijnahan quiví cánanducú yúcún de nuū tútu iī núu súcuan

cáhán chí tuú. <sup>12</sup> Jeē yūcuan ní cacandije cuéhē jñāhan ñuu de hebreo te suni nde jín cuéhē ñayuu griego, cúu tēe cúu ñahan cácuu nuū. <sup>13</sup> Te jñāhan ñuu de hebreo cáyūcú ñuu Tesalónica ni cajini jñūhun de jeē suni nde ñuu Berea nācani Pablo jñūhun Yāá Dios, te ni caquihin de ichi cuangoo de Berea, te suni yūcuan ní castónca de ñayuu siquí Pablo. <sup>14</sup> Yūcuán na te táca hermano ni catají-ni de Pablo cuahān de nde yumar. Te ni ndōo Silas jín Timoteo ñuu Berea. <sup>15</sup> Te jecu hermano ni cajendēca de Pablo nde ñuu Atenas. Te ni cahān Pablo jín de jeē cahān de jín Silas jín Timoteo jeē na quíngoo yachí de nuū Pablo. Te vendicoo de ñuu Berea.

*Jeē ní ñne Pablo ñuu Atenas*

<sup>16</sup> Te níni ndétu Pablo jeē jinūcoo Silas jín Timoteo nuū de ñuu Atenas, te ni jini de jeē ñayuu ñuu ún yōho cáchiñūhún i ídolo, te ni nacani cuíhýá ni de. <sup>17</sup> Te ini vehe iī sinagoga ni cahān de jñūhun ya jín jñāhan ñuu de hebreo jín táca gá tēe cáchiñūhún Yāá Dios. Te suni táca quiví ni nacani de jñūhun ya nuū táca ñayuu cáhiin nuū yáhu. <sup>18</sup> Te sava tēe cácuāha jñūhun jeē castéén grupo epicúreo, jín inga sava tēe cácuāha jñūhun jeē castéén grupo estoico, ni caquejéé cácahān jín Pablo. Te sava ni cacahān:

¿Na jñūhun cáhán tēe tíóhlé yāha? áchí.

Te sava ga de ni cacahān:

Tēe nācani jñūhun táca yāá jeē tu cánevāha yó cúu de, áchí.

Súcuan ni cacahān de, chí nācani Pablo jñūhun vāha Jesús jeē ní natecu yā mehñu ndíyi. <sup>19</sup> Te ni cajeca de Pablo cuangoo de, te ni jinūcoo de nde lugar nuū nani Areópago nuū cándutútú ñayuu cándacu jññu, te ni cacahān de:

Cáculi ná cachi ni núu na jñūhun jeē jēé steén ni. <sup>20</sup> Chí cáhán ni jñūhun jeē ná tu cuni cuiti na jññāhan ná, te jeē yūcuan cáculi ná jecūhun ni na siquí táca jñūhun yāha, áchí jín de.

<sup>21</sup> Chí táca ñayuu ñuu Atenas jín táca ñayuu inga ñuu jeē cáyūcu núu i yūcuán, tuá na inga jññu cáculi gá ni i jín chí máá-ni jeē cuni nahún i jñūhun jeē chí jēe cahān i jñūhun jeē.

<sup>22</sup> Te índichi Pablo mehñu ñayuu ní cándutútú núu nani Areópago, te ni cahān de:

Tēe ñuu Atenas jijnāhan ní, jito ná jēé yóho cáchiñūhún ní yāá máá ní. <sup>23</sup> Chí ni jica nuu ná, te ni jecondēhe ná nuū jeē cáchiñūhún ní, te ni jito ná in altar jeē yosó jñūhun yāha: Yāha cúu altar yāá jeē ná tu cuni yó jñūhun ya, áchí. Te máá Yāá un jēé cáchiñūhún ní, vesú ná tu cuni ni jñūhun ya, suu jñūhun Yāá un cúu jeē nācani ná núu ní vjina.

<sup>24</sup> Chí Yāá un cúu Yāá jeē ní sáha ñayiví jín táca ndíhi jeē iyó, te máá yá cúu jitoho andiví jín ñáyiví, te tu ndéé yá ini veñūhun cásáha ñayuu. <sup>25</sup> Te ni tu cúmani ní in nuū yá

jeē cuáha ñayuu nuū yā, chi máá yá sáha jeē técu ñayuu, jín jeē stáa i tachi i, jín jeē nihín i ndihi jeē jini ñuhún i.

<sup>26</sup> Te ni sáha ya jeē chíji ñn-ni yucún ni tahū táca ñayuu jeē ní nduu táca nación, návaha coyúcú i ní cáhnu ñayiví, te ni tana yā cuiyā cotecu ñayuu jín lugar coyúcú i jínáhan i. <sup>27</sup> Te súcuan ni sáha ya chí cúní yā jeē nanducú yó yā, chi núu nanducú yó yā te cuni yō jeē iyó yá, chi yajni-ni cúu ya jín ñn ñn yó. <sup>28</sup> Chi máá yá sáha jeē iyó yó jín jeē cátecu yō jín jeē cácata yō. Chi suni súcuan ni cacahān sava tēe ñuu ni jēe cáta yaa: Suni nde yucún máá yá cácuu yó, áchí. <sup>29</sup> Te núu yucún Yaā Dios cácuu yó, te ma cáni ni yō jeē idolo oro chí plata chí yúu cúu ya, chí cájeni ni ñayuu jeē súcuan cáa ya, te súcuan cásvāha i idolo. <sup>30</sup> Te ni jendeyí ni yā siquī jeē tu ní cájecūhun ni i ní ndé saá, te vjna chi ndácu ya jniñu jeē ñayuu ní cáhnu ñayiví na nácani ni i jeē stóo i cuēchi i. <sup>31</sup> Chi Yaā Dios, je ni jeni ya quiví jeē ndaā sándaā yā siquī ñayuu ñayiví, te ni jeni ya Jesús jeē máá yá sándaā. Te je ni steén cájī Yaā Dios nuū táca ñayuu jeē máá yá ni jeni Jesús, chí ni nastécu yā Jesús, áchí Pablo.

<sup>32</sup> Te jeē ní cajini sōho i jñūhun jeē nátecu ndiyi te sava i ni cacahān catá i, te sava ga i ni cacahān i:

Vāha te núu cuu cuni sōho na jñūhun cáhán ni ndé inga jñu, áchí i.

<sup>33</sup> Te ni quenda Pablo mēhñu ñayuu un cuahān de. <sup>34</sup> Te cuahān jecu ñayuu jín Pablo, te ni cacandje. Te ñn de cúu Dionisio, tēe ndútútú jín tēe cácujeñnu cásvāha junta nuū naní Areópago, jín ñn ñahan naní Dámaris, jín jecu gā i.

*Jeē ní ñne Pablo ñuu Corinto*

## 18

<sup>1</sup> Yūcuán na te ni quenda Pablo ñuu Ate-nas, te cuahān de nde ñuu Corinto. <sup>2</sup> Te yūcuán ní jito de nuū ñn jñáhan ñuu de hebreo, naní Aquila, te tēe región Ponto cúu de. Te sáá jecu-ni tiempo ni quee de jín ñasihí de Priscila jeē ní quenda de Italia, chí rey Claudio ni ndacu de jniñu jeē na quéndacoo táca ñayuu hebreo ñuu Roma, jeē cúu capital Italia. Te ni jinu Pablo vehe Aquila jín Priscila jeē cáyúcú de ñuu Corinto. <sup>3</sup> Te suni jniñu sáha tēe un sáha Pablo, chí cáquicu de ñni cuu vehe. Te ni quendō Pablo jín tēe ún, te ni casájniñu de. <sup>4</sup> Te táca quiví ndétātu ní jehēn Pablo vehe ñi sinagoga ni nacani de jñūhun ya, te ni nducú ndeyí de jeē na cándje ñayuu jñūhun Jesús, cúu jñáhan ñuu de hebreo jín ñayuu táca nación jeē tu ní cájini i jñūhun ya.

<sup>5</sup> Te ni jinūcoo Silas jín Timoteo ñuu Corinto jeē véjicoo de nde Macedonia. Yūcuán na te tuá na inga jniñu ní sáha Pablo, chí

máni jñūhun ya nácani cájī de nuū ñayuu cácuu jñáhan de hebreo, jeē máá Jesús cúu ya Cristo, Yaā jeē cáñūhun ni i quiji ya. <sup>6</sup> Te ni caquejéé i ni cacahān i siquī jñūhun ún, te ni cacahān xeēn i nuū Pablo. Te máá de ni caja de sahna de jeē cúu seña jeē stóo de i jín cuēchi i, te ni cahān de jín i:

Cuēchi máá ní cúu jeē jñahnū ndetū ni núu súcuan, te nasūu cuēchi máá ná cúu. Nde vjna te quihñ na nuū ñayuu táca nación jeē tu cájini i jñūhun ya, te nacani ná jñūhun ya nuū i, áchí de.

<sup>7</sup> Te ni quenda de ini vehe ñi sinagoga, te ni jinū de vehe ñn tēe naní Justo ni condee de. Te chíñuhún tēe un Yaā Dios, te vehe tēe un néne yajni xiin véhe ñi sinagoga. <sup>8</sup> Te Crispo, tēe cújéñu ñni vehe ñi sinagoga, ni cándje de máá Jítoho yō nde jín ndihi ñayuu vehe de. Te cuehē ñayuu ñuu Corinto ni cajini nahín i jñūhun nácani Pablo, te ni cacandje i, te ni cajendute i. <sup>9</sup> Te ñn jecuáá ni sáha máá Jítoho yō jeē ní jito ndijin Pablo yā ni cahān yā jín de:

Ma yūhu ró ni ma cási rō yuhu ró, chí níni nacani ró jñūhun ri. <sup>10</sup> Chi ndíto ri rohó, te ma cúu sáha xeēn ni ñn ñayuu jín ró. Nacani ró jñūhun ri, chí coo cuehē ñayuu cándje jñūhun ri ñuu yáha, áchí yá.

<sup>11</sup> Te ni condee Pablo yūcuán ñn cuiyā yosáva ni steén de jñūhun Yaā Dios nuū ñayuu ún.

<sup>12</sup> Te ná cúu Galión gobernador Acaya, te ñayuu hebreo jeē cúu jñáhan ñuu Pablo, ñn cáhnu-ni ni candonda i siquī Pablo. Te ní cajeca i de cuango i jín de nde vehe juzgado. <sup>13</sup> Te ni cacahān i jín Galión:

Tēe yáha yōhyo scāhán de táca ñayuu jeē inga modo chíñuhún i Yaā Dios, suu ñn modo jeē cúu contra siquī ley, áchí i.

<sup>14</sup> Te quejéé Pablo cahān de núu, te ni cahān-ni Galión jín ñayuu hebreo un:

Ñayuu hebreo jijnáhan ró, núu ñn cuēchi xeēn cúu, te cánuú cuni nahín ri jñūhun cácahān rō núu. <sup>15</sup> Te tuú, chí máni siquī jñūhun-ni jín siquī ley máá ró jín siquī tēe cástéén cúu. Te na sándaā máá ró siquī jniñu yáha, chí tu sándaā rí siquī máá ñn jeē súcuan-ni, áchí de.

<sup>16</sup> Te ni cahān de nuū i jeē na quíngoo i fuera. <sup>17</sup> Yūcuán na te ñayuu griego ni cajniñ i Sóstenes, tēe cújéñu ñni vehe ñi sinagoga, te máá fuera yehyí vehe juzgado ni cacani i de, te Galión chí tu ní sáha cuiti de cuenta.

*Jeē ní najinū Pablo ñuu Antioquia, te cuahān de vuelta uní jeē nacani de jñūhun ya*

<sup>18</sup> Te cuehē gā quiví ni condee Pablo ñuu Corinto. Yūcuán na te ni nacuatáhu de nuū táca hermano yūcuán, te Aquila jín ñasihí de Priscila cuango de jín Pablo, te ni jinūcoo de ñuu Cencrea. Te yūcuán ní saté líi Pablo xiní de, te súcuan steén de jeē squicu de nuū



Yaā Dios jeē ní jéjnūhun de. Te ní quívicoo de barco jíin Aquila jíin Priscila quihín de región Siria. <sup>19</sup> Te ní jinūcco de ñuu Efeso, te yūcuan ní caquendōo Aquila jíin Priscila. Te ní jehēn-ni Pablo vehe ñi sinagoga, te ní cahān de jnūhun ya jíin jnāhan ñuu de hebreo jeē cándutútu yūcuan. <sup>20</sup> Te ní cacahān ndahú i jíin de jeē na cōnēne de jecu gā quiví jíin i, te tu ní jéhe de jnūhun. <sup>21</sup> Chi ní nacuatáhú de nuū i, te ní cahān de:

Cánuú jéē nuhūn ná ñuu Jerusalén cone ná vico. Te núu cúní Yaā Dios te ndee tucu ná núu ní, áchí de.

Te ní quenda de ñuu Efeso, te ní quívi de barco cuahān de. <sup>22</sup> Te ní jinū de ñuu Cesarea, te ní jehēn de ñuu Jerusalén. Te nuū ní ndíhi ní cahān de jíin grupo ñayuu cácadíje yūcuán, te cuanuhun de ñuu Antioquía. <sup>23</sup> Te ní coyūcú de yūcuán jecu quiví, te sáa te ní quenda tucu de cuahān de ní jica cuu de de ní Galacia jíin Frigia. Te ñayuu cácadíje ní cahije ga ní i jíin jnūhun ya ní sáha de.

*Jeē ní nacani Apolos jnūhun Jesús ñuu Efeso*

<sup>24</sup> Te ñuu Efeso ní quee ñin tēe hebreo nání Apolos, te tēe ñuu Alejandría cúu de. Te vāha nācani de jnūhun ya, chí vāha jíin de jnūhun jeē cahān tutu ñi. <sup>25</sup> Te je ní cutūhva vāha tēe un jíin jnūhun máá Jítoho yō Jesús, vēsú jíin de máni máá jnūhun ya jeē ní stéén Juan ná ní scuándute de ñayuu, te ndíhví ní de stéén cají de jnūhun ya nuū ñayuu. <sup>26</sup> Te jéhnū-ni ní nacani de jnūhun ya ñi vehe ñi sinagoga. Te ní cajini sōho Aquila jíin Priscila jnūhun nācani de, te ní cajeca de Apolos cuangoo sñin de, te ní cacastūhun yúcn ndíndúú de jnūhun ya jeē ná tu cuni Apolos. <sup>27</sup> Te cúní Apolos quihín de nde región Acaya. Te je cácadíje sava ñayuu yūcuan ní sáha Yaā Dios siquí jeē vāha ní yā. Te táca hermano ñuu Efeso ní cachindéé ñáhán i de, chí ní catee i carta quihín de jíin núu ñayuu cácadíje cáyūcú Acaya jeē na cuatáhú i Apolos. Te nuū ní jíin de yūcuán, te vāha ní chindéé ñáhán de táca ñayuu cácadíje un jíin jnūhun ya. <sup>28</sup> Te nuū táca ñayuu ñuu un ndé jíin jnāhan ñuu de hebreo jeē cáyūcú yūcuan, ní stéén cají de ndese cástívi táca jnāhan hebreo de siquí jnūhun ya. Te tu ní cánihín jnāhan de un jnūhun cahān siquí jeē ní stéén de, chí jíin jéē cahān tutu ñi ní stéén de jeē Jesús cúu Cristo, Yaā jeē cáñūhun ní de quiji ya.

*Jeē ní íne Pablo ñuu Efeso*

## 19

<sup>1</sup> Te ní ní néne Apolos ñuu Corinto, te ní yāha Pablo ichi síquí ñuu Efeso, te ní nanuu de ní jinū de máá ñuu ún. Te yūcuan ní níjnāhan de jíin tíjni tēe cácadíje. <sup>2</sup> Te ní cajnūhún de tēe ún:

¿A ní canihín ní Espírítu Santo ná ní candíje ní, chí ná tuú? áchí de.

Te ní cacahān de jíin Pablo:

Tuú, chí ní ná tu nihín na jnūhun jeē iyó Espírítu Santo, achí de.

<sup>3</sup> Yūcuán na te ní cahān Pablo:

¿Na siquí ní cajendute ní núu súcuan? áchí de.

Te ní cacahān de:

Ní cajendute ná siquí jnūhun ní steén Juan, achí de.

<sup>4</sup> Te ní cahān Pablo:

Jeē ní scuándute Juan ñayuu cúu jeē ní stéén de jeē na nācani ní i jeē stóo i cuēchi i, te ní cahān de jeē na cándíje i máá Yáa quiji jeē cúu Cristo Jesús, áchí Pablo.

<sup>5</sup> Te nuū ní cajini sōho tēe un jnūhun yāha, te ní cajendute de jeē ní cácadíje de máá Jítoho yō Jesús. <sup>6</sup> Te ní soó Pablo ndíndúú ndaha de xini táca tēe ún, te ní quívi ní Espírítu Santo ñi anuá de jíjnāhan de, te ní cacahān de sñin sñin yuhu te ní canacani de jnūhun ya. <sup>7</sup> Te ní ñyo nájnūhun uxí uú jnāhan tēe.

<sup>8</sup> Te uní yoó ní jehēn jehēn Pablo vehe ñi sinagoga. Te jéhnū ní nacani de jnūhun ya, te ní nducú ndéyí de jeē na cándíje ñayuu jnūhun ndese ndácu Yaā Dios jniñu. <sup>9</sup> Yūcuán na te sava i ní cacunihni ní i te tu ní cácadíje i, chí sa ní cacahān veē i siquí jnūhun vāha Yaā Dios jíin ñayuu cánatata. Jeē yūcuan ní cujiyo-ni Pablo nuū ñayuu ún, te ñayuu cácadíje cuangoo i jíin de. Te ndíjnahan quiví ní stéén de nuū ñayuu ún ñi escuela ñin tēe nání Tiranno. <sup>10</sup> Te súcuan ní sáha de uú cuiyā, te táca ñayuu cáyūcú Asia, cúu ñayuu hebreo cúu ñayuu táca gā nación, ní cajini sōho i jnūhun máá Jítoho yō Jesús. <sup>11</sup> Te ní jéhe Yaā Dios poder nuū Pablo jeē sáha de cuehē jniñu jéhnū téyí. <sup>12</sup> Te nde pañú jíin sahna jeē ní jni de ní cajengoo jíin núu ñayuu cácuuh, te ní canduvāha-ni i cuehyí cándoho i, te ní quendacoo tachí ñi i cuangoo.

<sup>13</sup> Te jecu tēe hebreo cájica cuu de jeē quénehen de tachí ñi ñayuu, te ní cajini siquí ní de jeē suni jíin poder máá Jítoho yō Jesús quenehen de tachí, te suhva ní cacahān de jíin táca táchi:

Jíin poder Jesús jeē nācani Pablo jnūhun ya, cáhán nihín rí jíin ró jeē na quénda ró quihín ró, achí de.

<sup>14</sup> Te súcuan ní casáha uxā sēhe yú ñin tēe hebreo nání Esceva, cúu de ñin sutú cujéhnū.

<sup>15</sup> Te ná ní casáha de, te ní cahān-ni tachí ún: Je jíin rí Jesús, te suni jíin rí Pablo. Te róhó jíjnāhan ró ¿ndé tēe cácuu ró jéē cuatáhú rí rohó? áchí jíin de.

<sup>16</sup> Te tēe ndóho tachí un ní ndonda de, te ní cundeyí de siquí ndihúxá tēe ún. Te ní sáha xeēn ndasí de jíin ndé ní catuji te ní cacuvichí lí ní quendacoo vehe un ní cajinu cuangoo. <sup>17</sup> Te jnūhun yāha ní cajini

tāca ñáyyu cáyúcú ini ñuu Efeso, cúu ñayuu hebreo cúu ñayuu tāca gá nación, te yōhoyo ni cayúhú i, te ni cacahān i jeē yōhoyo cújéhnú máá Jítoho yō Jesús.

<sup>18</sup> Te cuehē ñayuu jeē ní cacandíje ni qui-jicoo i nuū Pablo ní nacani ndaā i jñuhun tāca jniñu neé ní casáha i. <sup>19</sup> Te cuehē i jeē ní casáha jniñu tásí ní jinúcoo i cándiso i tutu i, te ni cajehmu i tutu un jító nuū tāca ñáyyu. Te ni catava i cuenta nasaa ndéé tutu ni cáyū ún, te ni cajini i jeē uú xico uxī mil xūhun plata cúu. <sup>20</sup> Te ni jitē jñuhun máá Jítoho yō cuahān, te ndihí ñayuu ni cajini i jeē cujéhnú ndasí jñuhun ya.

<sup>21</sup> Te nuū ní ndihí tāca jniñu yáha, te jéni téyí ni Pablo jeē quihín de Macedonia jíin Acaya, te sáa te najinū de ñuu Jerusalén. Te ni cahān de jeē na nájinū de ñuu Jerusalén, yūcuán na te jíni ñúhún quihín de nde ñuu Roma. <sup>22</sup> Te uū tēe jeē cáchindéé ñahán jíin Pablo cúu Timoteo jíin Erasto, te ni scāndu de ndindúú tēe yáhá cuāngoo de nde Macedonia, te ni quendōo máa de Asia jecu gā quiví.

### *Jeē ní cacuvaā ñayuu ñuu Efeso*

<sup>23</sup> Te suu quiví ún yōhoyo ni candonda ñayuu siquí jñuhun ya. <sup>24</sup> Chi ní Iyo iin tēe sájiniñu siquí plata, nání de Demetrio. Te máa de jíin ndihí tēe cásajiniñu jíin de, cánihín de cuehē xūhún, chi jíin plata casáha de vehe lulí jéē modo veñuhun ídolo i jeē cúu yaā Diana. <sup>25</sup> Te Demetrio ní nastútú de tēe cásajiniñu jíin de jíin tāca gá tēe jeē suni jniñu yūcuan casáha, te ni cahān de:

Tátá, cájini ní jéē siquí jniñu casáha yó yáha váha cánihín yó xūhún. <sup>26</sup> Te cájito ní te cájini sōho ní jéē iin tēe nání Pablo chí cáhān de jeē nástuu yāā cácuu jeē casáha ñayuu. Te je ni scandíje de cuehē ñayuu, nasūu máá iin-ni ñuu Efeso yáhá chí ní cáhnu Asia. <sup>27</sup> Te quiyúhú ní na jéē cahān ñayuu jeē tu ndé jéjiniñu jeē casáha yó. Te sanaa te suni sūcuan cahān i coto i máá veñuhun yaā síhí Diana jeē cujéhnú, te suni sájéē ní i nuū yaā Diana, te ma cúu ga cujéhnú ya vésú ndivii ñayuu Asia jíin ñayuu ní cáhnu ñayiví cáchíñúhún i ya vijna, áchí de.

<sup>28</sup> Sūcuan ní cajini sōho de jñuhun yáha te yōhoyo ni caquití ni de, te ni cacana jee de:

Cújéhnú téyí Diana, yaā cúu patrona ñuu yō Efeso, achí de.

<sup>29</sup> Te ñayuu ñuu Efeso ní cacuvaā i, te iin cáhnu-ni ní candonda i ní cajni i Gayo jíin Aristarco cuāngoo i jíin de nde vehe nuū cándutútú ñayuu casáha i junta. Te ndindúú tēe un cácuu tēe Macedonia, te cájica de jíin Pablo. <sup>30</sup> Te cúni Pablo quiví de nuū ñayuu cuehē un cáhān de jíin i, te ñayuu cácadíje tu ní cájéhe i jñuhun quihín de. <sup>31</sup> Te suni sava tohō jeē cácuu amígo de cáyūcu Asia, ní cataj jñuhun cuahān nuū de, cácahān ndahú jíin de jeē ma quihín de nuū ní cacutútú

ñáyyu ún. <sup>32</sup> Te ñayuu ní cacutútú un, sava i ní cacana jee i iin jñuhun te sava ga i inga jñuhun, te sūcuan ní cacuvaā teyí i, te cuehē i ní tu cájini cuiti i na siquí cúu jeē ní cacutútú i. <sup>33</sup> Te sava tēe hebreo ní cajeni de iin jñáhan de jeē nani Alejandro nuū ñayuu cuehē ún, te ni cacastúhún de nuū tēe ún na siquí cúu jeē cácuvaā i. Yūcuán na te Alejandro ní sáha de seña jíin ndaha de jeē na cúnayúú ñayuu, chí cúni de cahān de jíin i jeē násúu cuéchi tāca ñayuu hebreo cúu. <sup>34</sup> Te ni canacuni ñayuu un jéē tēe hebreo cúu de, te jeē yūcuan ní cacana jee téyí gá i nájnuhun uū hora:

Cújéhnú téyí Diana, yaā cúu patrona ñuu yō Efeso, achí i.

<sup>35</sup> Yūcuán na te ni cacunahín ñayuu ní sáha tēe cúu secretario ñuu ún, te ni cahān de:

Nihín ñayuu ñuu yō Efeso, ndihí ñayuu chí je cájini i jeē cándito váha yó veñuhun yaā Diana jíin imagen Diana jeē ní ñinga nde andiví. <sup>36</sup> Te ni iin chí ma cúu cahān jeē tú ndaā jñuhun yáha. Núu sūcuan te váha ga na cási ní yuhu ní, te ma sáha yachí ní iin jeē tu ní nacani váha ní ni siquí. <sup>37</sup> Chí tēe yáha ní caquindeca ní de yáhá vésú tu ní casáha de ní iin cuéchi siquí Diana yō, ní tu ní cácahān ndeváha de ní iin jñuhun siquí. <sup>38</sup> Te Demetrio jíin tāca gá tēe jeē iin-ni jniñu casáha jíin de, núu cácuu de cahān de cuéchi siquí iin tēe, te na quíngoo de nde vehe juzgado nuū cáyūcu juez, tēe cásánda jniñu, te yūcuán cundaā siquí de jíin ahān de. <sup>39</sup> Te núu iyó jñuhun jeē ma cúu cundaā yūcuán, te jíni ñúhún cundaā nuū iin junta nájnuhun tájniní ley. <sup>40</sup> Chí yúhú ná jeē sanaa te cahān tāca tóhō Roma jeē siquí gobierno de ní candonda yó, chí ma nihín yó jñuhun castúhún yó na siquí cúu jeē ní cacutútú yó ní cacuvaā yó vijna, áchí de.

<sup>41</sup> Te nuū ní ndihí ni cahān secretario jñuhun yáha, te ni cajitē ñayuu un cuāngoo.

### *Jeē ní jéhen Pablo Macedonia jíin Grecia*

## 20

<sup>1</sup> Te ná ni yáha jéē ní cacuvaā ñayuu, te ni cana Pablo ñayuu cácadíje, te ni jeni ichí de i. Te ni cañunundee jñáhan de jíin Pablo jeē ní nacuatáhu de, te cuahān de Macedonia. <sup>2</sup> Te ní jaca cúu de táca ñuu yūcuan. Te jíin cuehē jñuhun ní stihví ní de táca hermano cácadíje. Te ní jinū de Grecia. <sup>3</sup> Te ní condee de yūcuan úní yoō. Te je yajni quihín de jíin barco nde Siria nuú, te máá quiví ún te ní nihín de jñuhun jeē jñáhan ñuu de hebreo ní casquíñáhan jñuhun jeē ndonda siquí de ichi nuú quihín de, te jeē yūcuan ní nacani ní de te cuahān tucu de ichi Macedonia. <sup>4</sup> Te ní cahíyo sava tēe cájica jíin Pablo, te cánaní de Sópater ñuu Berea, Aristarco jíin tēe nání Segundo nde ñuu Tesalónica, Gayo ñuu Derbe, Tíquico jíin Tróximo nde Asia, jíin

Timoteo. <sup>5</sup> Te ni cacandu tēe yáha, te cándētu de Pablo jíin sáña, Lucas, nde ñuu Troas. <sup>6</sup> Te nuū ni yáha vico jeē cáyeji i pan jeē tu yíhi levadura, te jíin barco ni quendacoo ná ñuu Filipos, te nde nuū uhún quiví te ni canajnáhan ná jíin de nde ñuu Troas. Te ñuu yúcuán ní coyūcu ná uxā quiví.

*Jeē ni íne Pablo ñuu Troas*

<sup>7</sup> Te máá quiví domingo ni candutútu ñayuu cáandíje jeē cáji i pan, nájnūhun ní steén máá Jítóho yō jeē núcūhun ní yō siquí yā. Te ní steén Pablo jnūhun nuū ñayuu ún. Te siquí jeē inga quiví un jíni ñūhún quenda de quihín de, te nahán ní nacani de jnūhun nde ni cuñú. <sup>8</sup> Te vehe yósó jnáhan cóu vehe ún. Te nde cuarto xini nuū ní candutútu ná un ní íyo cuehē lámpara ni cundijin. <sup>9</sup> Te ñin sūchi yí nání i Eutico, néne i yuhu ventana. Te jeē ní cunahán nácani Pablo jnūhun, te yōhyo jíi i máhná, te ní quixi-ni i. Te nde piso uní un ní ñinga i nde nuū ñūhun. Te je ní jihí i ní candonehen de i. <sup>10</sup> Yúcuán na te ní nuu Pablo te ní jita ndeyi de ní canehen de i ní ñununde de i, te ní cahán de:

Ma yūhu ní jijnáhan ní, chi ni natecu i, áchi de.

<sup>11</sup> Te ni ndaa Pablo, te ni yeji de pan jíin i jijnáhan i jeē cáncūhun ní de siquí yā. Te nahán gá ní nacani de jnūhun nde cuacundijin. Yúcuán na te ní quenda de cuahán de. <sup>12</sup> Te Eutico chí íyó váha i cuanuhun i jíin de jijnáhan de, te ndivii ñayuu ún yōhyo cácusí ní i.

*Jeē ní quenda Pablo ñuu Troas cuahán de ñuu Mileto*

<sup>13</sup> Te ní quívicoo ná ini barco cuangooná. Te Pablo chí cúní de caca jéhé de, te ní cundaā jeē najnáhan ná jíin de nde ñuu Asón. <sup>14</sup> Te nuū ní canajnáhan ná jíin de ñuu Asón, te ní quiví de barco te cuangooná jíin de nde ñuu Mitilene. <sup>15</sup> Te yúcuán ní quendacoo tucu ná jíin barco te inga quiví ní jinúcoo ná xiin Quío, ñuhun jeē íne sán nuū ndúte. Te quiví uní ní jinúcoo ná Samos jeē súni nuū ndúte íne, te ní caquendōo ná Trogilio. Te quiví cuán ní jinúcoo ná ñuu Mileto. <sup>16</sup> Te tu ní jéngoo ná ñuu Efeso, chí jéni ní Pablo jeē yáha-ni de ñuu un quíhín de, náváha ma cucuéé de Asia te naa tiempo nuú, chí núu de jinú yachí de ñuu Jerusalén cone de máá quiví Pentecostés núu ná cóu.

*Jeē ní jeni ichí Pablo tēe jéhnú cándiso jniñú nuū ñayuu cáandíje ñuu Efeso*

<sup>17</sup> Te ná íne ga Pablo ñuu Mileto, te ní tají de jnūhun cuahán nde ñuu Efeso jeē na quíjicoo tēe jéhnú cándiso jniñú nuū ñayuu cáandíje yúcuán. <sup>18</sup> Te nuū ní quecoo tēe ún, te ní cahán de:

Je cájini váha ní ndese ní jica ndaa ná ndé ná ní quee nuú ná Asia te nde vijna.

<sup>19</sup> Chí ní tiempo jeē ní íne ná jíin ní te nde vijna, jéjniñú váha na síquí jnūhun máá Jítóho yō, te tu ní sándúxí ná maá ná. Te íyó jínu ní ndahyū na jéhé ñayuu. Te ní ndoho ná jnúndóho ní casáha jnáhan ñuu ná hebreo, chí ní casquijnáhan jnūhun i siquí ná. <sup>20</sup> Te cájini ní jéé tu ní táñúhún ná ní ñin, vésú ndese ga cácahán ñayuu siquí ná, chí ní nacani ná ndihi jnūhun ya jeē quéndōo váha ní sáha. Te ní steén na jnūhun ya nuū ní jijnáhan ní, cóu nuū chitú cóu táca vehe ní. <sup>21</sup> Te inuú-ni jnūhun ní nacani ná nuū ndihi ní, cóu jnáhan ñuu ná hebreo cóu ñayuu táca gá nacióon. chí ní cahán na jéé na nacani ní ní jéé stóo ní cuéchi ní te na cándíje ní máá Jítóho yō Jesucristo. <sup>22</sup> Te vijna chí ñūhun ichí ná quihín ná ñuu Jerusalén, chí stáhví ní Espiritu Santo sáña quihín ná. Te tu jíni ná ndese ga coo jíin ná yúcuán. <sup>23</sup> Te íyó ñin jeē jíni na, cóu jeé chune i sáñá vecáa te quíji jnúndóho siquí ná, chí Espiritu Santo súcuán cáhán jíin ná ndijnáhan ñuu nuú jica ná. <sup>24</sup> Te ní tu sáha ná cuenta vésú na cáhni i sáñá, chí jeé cuní na cóu jeé na sínu váha ná jniñú jeé ní tee máá Jítóho yō Jesús siquí ná, te súcuán cusí ní ná. Te jniñu un cóu jeé nácani ná jnūhun váha ya nuú táca ñayuu ndese váha ní Yáa Dios jíin yó.

<sup>25</sup> Te je ní jica cuu ná, ní nacani ná jnúhun ya nuú ní ndese ndácu Yáa Dios jniñú. Te vijna chí jíni na jéé ní ñin ní ma najnáhan ga yō nuú ñayiví yáha. <sup>26</sup> Jeé yúcuán cástūhun cáji ná nuú ní jijnáhan ní vijna jeé násū cuéchi ná cóu núu ndé ñin ní stávi. <sup>27</sup> Chí ní nacani ná núu ní ndihi jnūhun Yáa Dios jeé ní sándaā yá ndese coo, te tu ní quéndōo ní ñin jnūhun. <sup>28</sup> Núu súcuán te coto váha ní máá ní jíin ndihi ñayuu cáandíje, chí Espiritu Santo ní jeni ya nihín jéé cóndito ní ñayuu máá Jítóho yō, chí ní nacuaan ya i jíin níñi yā. <sup>29</sup> Chí jeé quíhín na te jíni na jéé quíjicoo tēe cástáhu quívicoo méhñu ní, te nducú de snáa de jnūhun ní cajetáhu ñayuu cáandíje, te xeén sáha jnūhun stáhu de nájnūhun xeén sáha yíhi jeé cájehni t̄lanchi. <sup>30</sup> Te suni nuū grupo máá ní quejéé sava de cahán de jnūhun stáhu, te stáhu de sava ñayuu cáandíje jeé na cóndiquín i jnūhun stáhu stéén de. <sup>31</sup> Jeé yúcuán condito ní jéé ma cóo súcuán. Te ma náá ní ní jéé uní cuiyá ndiquiví ndíñuu ní condihví ndasí ní na ndé ndahyú na jéhé ní, ní jeni ichí ná ñin ñin ní jijnáhan ní.

<sup>32</sup> Te vijna, hermano, jícan tahú na núu Yáa Dios jeé coto ya nihín. Chí jnūhun jeé váha ní yá ndíso poder sáha jeé íje ga ní jíin, te suu sáha jeé ñin quiví te cuáha ya tahú jeé ndujéhnú luu ní ndé jíin ndihi ñayuu ní nacáji ya jeé cóo ndoo coo íi i nuú yā. <sup>33</sup> Tu ní ndúcú ná jeé nihín na xúhun chí sahma nuú ní ñin i. <sup>34</sup> Chí je cájini váha ní jéé sa suhva ní sájniñú nihín ná náváha nihín na jéé cótecu na ndé jíin táca tēe cájica jíin ná. <sup>35</sup> Te

níní ní steén na núú ní jéé súcuan jíni ñúhún sájniñu yó návaha nihín yó jeé cuáha yó núú ñayuu cúmaní nuú. Te ma náa ní ni jnúhun jeé ní cáhān maá Jítoho yó Jesús, chí suhva ní cahān yā: Ndetū gā quendōo yó jéé cuáha yó vesú jeé nihín yó, achí yā. Achí Pablo.

<sup>36</sup> Te ni ndihi ní cahān de táca jnúhun yáha, te ni jecuiñí yití de, te ni jicān tahú de jíin ndihi tēe ún. <sup>37</sup> Yūcuán na te ndihi de ní cajecunundee jnāhan de jíin Pablo ní catechuhú de jeé cánacuatahú de, te ní candahyú de. <sup>38</sup> Chí cácuclhyá ndasí ní de jíin jnúhun ní cahān Pablo jeé ma ndácoto jnāhan ga de. Te cuangoo-ni de jíin Pablo nde núú íin barco.

*Jeé cuánuhun Pablo ñuu Jerusalem*

## 21

<sup>1</sup> Yūcuán na te ni caquendōo táca hermano ñuu Efeso, te ni quívicoo ná barco, te cuangoo ndaa-ni ná ndé Cos. Te inga quiví ní jinūcoo ná Rodas, te yūcuan ní quendacoo ná te ní jinūcoo ná ñuu Pátara. <sup>2</sup> Te ni cane ñin barco jeé quihín Fenicia, te ni quívicoo ná cuángoo ná. <sup>3</sup> Te nuú ní cajito ná núú Chipre jeé íne sáin nuú ndúte, te ni quendōo ichi lado jecó barco, chí ní cayāha ná cuángoo ná nde Siria. Te ní jinūcoo ná ñuu Tiro, chí yūcuan ndóo jeé ndíso barco ún. <sup>4</sup> Te ní jenducú ná ñayuu cácanđije, te ní caquendōo ná jíin i uxá quiví. Te maá Espíritu Santo ní steén nuú i jeé quiji jñúndóho siquí Pablo ñuu Jerusalem, te jeé yūcuan ní cacahān i jíin de jeé ma quihín de. <sup>5</sup> Te ní yáha uxá quiví ún, te ní quendacoo ná. Te táca tēe cácanđije jíin ñasíhí de jíin sēhe de ní cachuhun ichí de sáña ní jengoo de jíin ná nde yatá ñúú, te ní cajecuiñí yití ná jíin de yumar te ní cajicān tahú na. <sup>6</sup> Te ní cañunundee jnāhan ná ní canacuatahú ná yūcuán, te ní quívicoo ná barco cuangoo ná. Te ní canandió cóo de cuanungoo de vehe de.

<sup>7</sup> Te ní quendacoo ná ñuu Tiro cuangoo ná jíin barco, te ní jinūcoo ná ñuu Tolemaida ní quendacoo ná ñin barco. Te yūcuan ní jengoo ná ní cacahān na jíin táca hermano, te ní caquendōo ná jíin de ñin quiví. <sup>8</sup> Te inga quiví un ní cajica jéhe ná jíin Pablo, te ní jinūcoo ná ñuu Cesarea, te ní quívicoo ná vehe Felipe, tēe nácani jnúhun váha ya. Tēe un cúu jnāhan jeé ndihuxá tēe jeé ní casaja staá nuú ñāhan viuda. Te ní caquendōo ná jíin de. <sup>9</sup> Te tēe un íyó cúun sēhe síhí de jeé cáhíyo máá i, te cánacani i jnúhun Yāá Dios. <sup>10</sup> Te ní coyūcu ná yūcuán tijni quiví. Te ichi Judea ní quiji ñin tēe nácani jnúhun Yāá Dios, nání de Agabo. <sup>11</sup> Te ní quee de nuú ná. Te ní quihín de sanchú Pablo, te ní jihni de ndaha de jíin jéhe de, te ní cahān de:

Suhva cáhān Espíritu Santo. Jnāhan yó hebreo súcuan cuhni i tēe chíí sanchú yáha

ini ñuu Jerusalem, te nastúu i de nuú ñayuu sáin nación, achí de.

<sup>12</sup> Te jeé ní cajini sōho na jnúhun yáha te máá ná jíin táca tēe cácanđije cáyūcú ñuu Cesarea ní cacahān ndahú ná jíin Pablo jeé ma quihín de ñuu Jerusalem. <sup>13</sup> Yūcuán na te ní cahān Pablo:

¿Najehē cándahyū ní jíināhan ní, te cásaha ní jéé cuculhyá ní ná? Chí saña je íyó túhva ná jéé násūu máá jéé cónuhni ná ini ñuu Jerusalem, chí suni jeé vesú na cúu na jéé siquí máá Jítoho yó Jesús, achí de.

<sup>14</sup> Te jeé tu ní cúu cuiti casicoo ná, yūcuán na te sa suhva ní cacahān ná:

Na cóo ndese cúni máá Jítoho yó nuu súcuan, achí ná.

<sup>15</sup> Yūcuan na te sáa te ní casátúhva ná, te cuangoo ná ñuu Jerusalem. <sup>16</sup> Te suni jecu tēe ñuu Cesarea jeé cácanđije cuangoo de jíin ná. Suni cuahān ñin tēe Chipre nání de Mnasón, te je ní cuu cuehē cuiyā candije de. Te ná ní jinūcoo ná ñuu Jerusalem, te ní cacoyūcu ná vehe de.

*Jeé ní jécondēhe Pablo Jacobo*

<sup>17</sup> Te nuú ní jinūcoo ná ñuu Jerusalem, te hermano cáyūcú ñuu ún yóhíyo ní cacusi ní de jeé ní jinūcoo ná. <sup>18</sup> Te inga quiví un ní cajengoo ná jíināhan ná jíin Pablo vehe Jacobo, te yūcuan ní candutútu táca tēe jéhu cándiso jniñu nuú ñayuu cácanđije. <sup>19</sup> Te Pablo ní sáha de saludar tēe ún jíināhan de. Yūcuán na te ní castúhún de ndihi jniñu ní sáha Yāá Dios ná ní nacani de jnúhun ya nuú ñayuu táca nación jeé tu cajini i jnúhun ya. <sup>20</sup> Te ní cajini sōho de jnúhun yáha, te ní cacahān de jeé yóhíyo cújéhu Yāá Dios. Te ní cacahān de jíin Pablo:

Hermano, vijna te jíni ní náa cuehē mil jnāhan ñuu yó hebreo ní cacandije i Jesús, te cácahān nihín i jeé cánuu squicu yó ley jeé ní jéhe ya nuú Moisés. <sup>21</sup> Te ní canihín i jnúhun cácahān jeé stívi ní steén ní núú táca jnāhan yó ñayuu hebreo cáyūcu jíca i táca gá nación, chí ní steén ní núú i jeé ma cuatáhú gá i nuú ley Moisés, ní ma sáha ga i circuncidar sēhe i, ní ma cuatáhú gá i táca gá jeé tajnúni jengahán. <sup>22</sup> ¿Ndesé sáha ní núu súcuan? Chí cuni ñayuu un jéé ní ndee ní te cututú cuehē i. <sup>23</sup> Suhva sáha ní núu súcuan. Yáha íyó cúin tēe jeé ní cajejnúhun de ñin jeé squicu de nuú Yāá Dios. <sup>24</sup> Cueva ní tēe yáha quihín ní jíin de templo, te cuchi ní nasándoo ní máá ní jíin de nuú yá, te cuaan ní jéé sóco de nuú Yāá Dios jíināhan de. Yūcuán na te cuu sāté de xiní de, te suu steén jeé ní casquicu de ndihi jeé ní cajejnúhun de nuú yá. Yūcuán na te cuni ndihi ñayuu jeé tú ndaa táca jnúhun ní cajini sōho i siquí ní, chí coto i jeé suni máá ní sa squicu ní ley yá. <sup>25</sup> Te ñayuu táca nación jeé násūu ñayuu hebreo cácuu i te ní cacandije i ya, je ní catee ná carta cuahān nuú i jeé tu

cánuú squícu i ley un, chi máá-ni jeé ma cáji i cūñu jeé ni sóco nuú ídolo ni niñi ni quiti jeé jihí jeé tu jéti niñi tī, te ni ma cáca jnéni í, áchi de.

*Jeé ní cajni de Pablo ini templo*

<sup>26</sup> Yūcuán na te ni jeca Pablo tēe ún, te inga quiví un ní cajichi de ni canasándo de máá de nuú yá. Te ni quiví Pablo ini templo ni cachi de nuú sutú na quiví jinu jeé nasándo tēe un máá de nuú yá, te quindeca de quiti jeé socó de nuú yá.

<sup>27</sup> Yūcuán na te cácuu de jeé sínu de ndihúxá quiví jeé cándundo de nuú yá, te sava jnáhan hebreo de jeé véjicoo Asia ni cajini de jeé íne Pablo ini templo, te ni cascáhan de ndihi ñayuu, te ni cajni i Pablo. <sup>28</sup> Te ni cacana jee i:

Tēe ñuu yō Israel, cuáha núú ní ndaha jijnáhan ní na jni yó tēe yáha. Chi máá de cúu tēe jica cuu ní cáhnu stéén de nuú táca ñayuu, te cáhán de siquí nación yō jín siquí ley jeé ni jéhe ya nuú Moisés jín siquí templo yáha. Te suni je ni quivicoo de jín jecu tēe griego ini templo í yáha, te súcuu stívi de jnūhun í jeé cáhán jeé ma cúu quiví ñayuu ini templo te núu nasū ñayuu hebreo cúu í, áchi.

<sup>29</sup> Chi nde na íne Pablo ini ñuu un ní cajini tēe hebreo jeé jica de jín Trófimo, tēe ñuu Efeso jeé nású hebreo cúu de, te cájeni ní de jeé ni quiví tēe un jín Pablo ini templo.

<sup>30</sup> Te ndihi ñayuu ñuu un ní cuvaá, te ni cacutú-ni í, te ni cajni i Pablo, te ni castáa i de ni quenehen i de ini templo un, te ni canacasi-ni i yéhyí. <sup>31</sup> Te ni cacuni i cahni i de núú. Te general, tēe cújéhu nuú ndíhi soldado, ni nihin de jnūhun jeé ndihi ñayuu ñuu Jerusalén ni candona i cácuvaá í. <sup>32</sup> Te ni jeca general táca soldado jín capitán, te cájnu de cuango de nde nuú cáhín ñayuu cuehé ún. Te ná ni cajito ñayuu jeé ni jínūcoo general jín soldado, te ni cajecuñi i jeé cácani i Pablo. <sup>33</sup> Yūcuán na te ni quiví general mēñu ñayuu, te ni jni de Pablo, te ni ndacu de jniñu jeé conuhní de jín úu cadena. Yūcuán na te ni cajnūhn general ndé tēe cúu Pablo te na cuéchi ni sáha de. <sup>34</sup> Te ni cacana ñayuu cuehé ún, sava i ñn jnūhun te sava ga i inga jnūhun, te tu ní cúu cuni de na cuéchi ni sáha Pablo, chi cácuvaá í. Te ni ndacu de jniñu cuahán Pablo nde cuartel. <sup>35</sup> Te nuú ni jínū Pablo escalera cuartel ún, te soldado ni cajni de Pablo cándiso de siquí jeé cácani ñayuu ún jni i Pablo sáha xeén i jín de. <sup>36</sup> Chi ndihi i véjicoo i ichi yátá soldado, te cácana jee i:

Cahni ni tēe jíná, áchi í.

*Jeé ní cáhán Pablo jehé maá de nuú ñayuu*

<sup>37</sup> Te cásquivi de Pablo ini cuartel nuú, te jín jnūhun griego ni cáhán Pablo jín general:

¿A cuáha ni jnūhun cahán ná ñn jnūhun jín ní? áchi de.

Te ni cáhán general jín de:

Te jini rō cahán rō yuhu griego jeé súcuu. <sup>38</sup> Núu súcuu te nastu róhó cúu tēe Egipto jeé jeé ni cuu quiví ni ndonda siquí gobierno te ni quenehen cúu mil tēe jéhni ndiyi cuango jín de nde nuú ñūhun tēhé, áchi.

<sup>39</sup> Yūcuán na te ni cáhán Pablo:

Tuú, chi tēe hebreo cúu ná, te ni cacu ná ñuu Tarso, ñn ñuu jeé cújéhu ndañú Cilicia. Te quíñūhun ni ni cuáha ní jnūhun na cáhán na jín ñayuu yáha jijnáhan í, áchi de.

<sup>40</sup> Te general ni jéhe de jnūhun jeé cáhán de. Te ni jecondichi Pablo nuú escalera, te ni sáha de seña jín ndaha de jeé na cúu nayúú ñayuu ún. Te nuú ní cuu nayúú-ni í, te jín jnūhun yuhu ñúú de hebreo ni cáhán de:

## 22

<sup>1</sup> Ndihi níhín jeé cácuu ní jnáhan ñuu yō jín ndihi níhín jeé cácujeñu ní núú ñúú yō, cuni sóho ní jnūhun cahán na jéhe maá ná, áchi de.

<sup>2</sup> Te ni cajini sóho i jeé cáhán Pablo yuhu hebreo jeé cúu yuhu ñúú í, te vilyá gā ni cacunahín í. Te ni cáhán Pablo:

<sup>3</sup> Máá ná cúu jnáhan ñuu yō hebreo, te ni cacu ná ini ñuu Tarso ndañú Cilicia. Te ini ñuu Jerusalén yáha ní jehnu ná, te ni cutúhva ná núú Gamaliel, te ní stéén de ñayuu cáandje i jnūhun Jesús te nde cuni na jéé na cúu ndíhi i núú. Chi cúu tēe cúu ñahan ni jni ná ni chuhun ná vecáa. <sup>5</sup> Te sutú cújéhu ga jín táca tēe jéhu cándiso jniñu nuú ñúú yō, cácuu de testigo jeé súcuu ni sáha ná, te suni máá de ni cajéhe de tjini carta cuahán na jín jéé cuáha na núú táca jnáhan yó cáyucú ñuu Damasco. Chi cuahán ná ñuu un jéé jni ná ñayuu cáandje i Jesús te quindeca ná i ñuu Jerusalén yáha, náváha ndoho i núú.

*Jeé ní cachi Pablo ndese ni sama ya de (Hch. 9.1-19; 26.12-18)*

<sup>6</sup> Te ni quihin ná ichi cuahán ná, te cuacuyajni ná ñuu Damasco, te nájnūhun caxū cúu. Te ichi ándiví ní quiji ñn nduva ní ndindéé ndaxín núú ná. <sup>7</sup> Te ni cotúú-ni ná núú ñūhun, te ni jini sóho ná ñn jnūhun cáhán jín ná: Saulo, Saulo, ¿najehe jito xeén rō ruhū? áchi. <sup>8</sup> Yūcuán na te ni cáhán ná: ¿Na níhín cúu jeé cáhán, Tátá? áchi ná. Te ni cáhán yá jín ná: Máá rí cúu Jesús jeé ní jehnu ñuu Nazaret, te jeé jito xeén rō ñayuu cáandje i ruhū cúu jeé jito xeén rō ruhū, áchi yá. <sup>9</sup> Te tēe cuango jín ná ni cajini ndije de jeé ndíndéé, te ni cayuhú de, te tu ní cájini sóho de ndese ni cáhán yá jín ná.

10 Yūcuán na te ni cahān ná: Tátā, ¿na vé cuni ni jēe sáha ná? áchí ná. Te ni cahān máá Jítóho yō jín ná: Ndocuñí te quihñ rō ñuu Damasco, te yūcuan iyó ñn tēe jeē cachi nuū rō na vé cūu jeē cánuu sáha rō, áchí yá jín ná. 11 Te jeē ní ndindéé un ní sacuaá nuū ná, te tēe cuangoo jín ná un ní cajñi de ndaha ná cuángoo de jín ná ní jinūcoo ná ndé ñuu Damasco.

12 Te yūcuan ní condee ñn tēe nání Ananías, te táca jnāhan yó hebreo yūcuan cácahān jeē tēe váha cúu Ananías, chí váha squícu de ley jeē ní jéhe ya nuū Moisés. 13 Te ní quee tēe un nuū néne ná, te ni cahān de jín ná: Hermano Saulo, na ndúndijin tinūu ní, achí de. Te ni ndúndijin-ni tinūu ná, te ní jito ná nuū de. 14 Te ni cahān Ananías: Máá Yáa Dios táca jín yō, je ni nacāji ya nihín návāha cuni ní na vé cuni yá jeē sáha ní, te coto ní nuū máá Cristo, Yáa ndaa, te cuni sōho ni jñūhun jeē cahān yá. 15 Te nacani ní jñūhun ya nuū ndiviñ ñayuu táca jēe ní jito ní jín jēe ní jini sōho ní. 16 Ma cúhuun ni ní nuū súcuan. Ndocuñí ní, te cuandute ní te cahān ndahú ní jín máá Jítóho yō, návāha nacate ya anuá ní nuū cuéchi, áchí de jín ná.

*Jeē ní cachi Pablo ndese ní tají Yáa Dios de nuū ñayuu táca gá nación*

17 Te ní nandió cóo na ní ndee ná ñuu Jerusalén. Te jicán tahú na ini templo, te ní sáha máá Jítóho yō jeē ní jito ndijin ná. 18 Te ní jini na nuū yá ni cahān yá jín ná: Yachí quenda rō ñuu Jerusalén yáhá, chí ma cuatáhu ñayuu yáha jēe nácani rō jñūhun ri nuū i, áchí yá. 19 Te ni cahān na jín yá: Tuú, chí cuatáhu i, Tátā, chí je cájini i jeē ní quiví ná ndijnahan vehe ñi sinagoga ni jñi ná táca ñayuu cácañdije i nihín, te ni cani ná i, te ni chuhun ná i vecāa. 20 Te je cájini i jeē quiví ní cajehni i Esteban, tēe ní nacani cáj jñūhun ní, suni ní indichi na yūcuan, te ní jejnūhún ná jeē na cúu de, chí ní condito ná sahma tēe ní cajehni Esteban, áchí ná jín yá. 21 Te ni cahān yá jín ná: Cuáhán, chí máá rí tají rí rohó quihñ jicá rō nde nuū ñayuu táca nación jeē tu cájini i jñūhun ri, achí yá jín ná. Achí Pablo.

*Jeē ní íne Pablo nuū general*

22 Te táca ñayuu ún váha-ni ní cajini sōho i te nde jñūhun sandiñi yáha jēe ní tají yá de nuū ñayuu táca gá nación. Yūcuán na te ni cacuvaá i, te ni cacahān jee i:

Na cúu tēe jíná, chí tú váha jeē cótecu gá de, áchí i.

23 Te súcuan cácana jee i, te ní cascándoó i ticáchí i, te ní cascánda i ticachá. Te súcuan cástéén i jeē cáquiti xeén ni i. 24 Te ní ndacu general jñiñu jeē na quiví Pablo ini cuartel, te ni cahān de jeē na stichí soldado Pablo nde jín cuarta ñi, návāha cujnúni ní general na squí cúu jeē ní candonda ñayuu un squí

de. 25 Te ni cajihni de Pablo návāha súcuan te cani de. Te ni cahān Pablo jín capitán jeē índichi túhva:

¿A jéhe ley jñūhun jeē cani ní cuarta tēe cúu sēhe nación Roma núu ná tu sándaá ní nuū iyó cuéchi de? áchí de.

26 Te ní jini sōho capitán jñūhun yáha, te ni jecahān jín general:

Coto váha ní jēe ma stívi ní sáha ní jín tēe yáha, chí cúu de sēhe nación Roma, achí.

27 Yūcuán na te ní jinū general nuū Pablo, te ni cajñūhún de:

Cachi núu jendaá cúu jeē sēhe nación Roma cúu rō, áchí.

Te ni cahān Pablo:

Suu cúu ndije ná, áchí de.

28 Te ni cahān general:

Ruhú chí nde jeē ní jéhe ri cuehē xūhún te ní nduu ri sēhe nación Roma, áchí.

Te ni cahān Pablo:

Te sáñá chí nde quiví ní cacu ná cúu ná sēhe nación yō Roma, achí de.

29 Yūcuán na te táca tēe jeē cácani cani Pablo nuū, ni cacujyoyo-ni cuangoo, te suni nde general ni yūhú de, chí ní stívi de jeē ní jihni de Pablo, chí tu iyó váha sáha súcuan jín sēhe nación Roma.

*Jeē ní indichi Pablo nuū junta cujéhu ga jñāhan ñuu de hebreo*

30 Te inga quiví un cúní general cundaá váha ní de na squí cúu jeē ní candonda tēe hebreo squí Pablo. Te ni ndají de cadena jeē nuhni Pablo, te ni ndacu de jñiñu ni cacutútú táca sūtú cácujeñu jín táca tēe casáha junta cujéhu ga, te ní quenehen de Pablo, te ní jeni de nuū tēe ni candutútú un.

## 23

1 Yūcuán na te ní ndacoto Pablo nuū tēe ni candutútú junta un, te ni cahān de:

Tátā jijnāhan ní, ní ndé vijna váha iyó ní anuá na jēe tú na cuéchi ná, jito jínúu Yáa Dios, áchí de.

2 Yūcuán na te Ananías, sūtú cujéhu ga, ni cahān jín tēe cáhñ yajni nuū de jeē na cátu máá yuhu de. 3 Te ni cahān Pablo jín sūtú cujéhu ga ún:

Yáa Dios stóho ya nihín chí tēe stáhú-ni cúu ní, chí néne ní jēe sándaá ní nuū ní stívi ná ley yá, ¿te naun stívi máá ní ley jeē ndácu ní jñiñu jeē cáni de sáñá? áchí de.

4 Te ní cacahān tēe cáhñ nuū de ún:

¿Naun cáhán rō súcuan jín sūtú cujéhu ga? Chí nuū Yáa Dios jejnñu de, áchí jín de.

5 Te ni cahān Pablo:

Tátā jijnāhan ní, tu ní jini na jēe sūtú cujéhu ga cúu de, chí núu ní jini na te ma cáhán na súcuan núu, chí yósó nuū tútu ñi jeē ní cáhán yá jeē ma cáhán neé yó coto yó táca tēe cácujeñu nuū yó, áchí Pablo.

<sup>6</sup> Te nuū ní jini Pablo jeē sava de cácuu grupo saduceo te sava ga de cácuu grupo fariseo, te ni cahān jee de:

Tátá jijnáhan ní, máá ná cúu ñn jnáhan grupo fariseo, te suni súcuan ni iyo tátá na. Chí suni máá ná ñhūn ni na jéē nastécu yā ndīyí, te siquī yūcuan cúu jeē cácahān ni cuéchi siquī ná, áchí de.

<sup>7</sup> Te jeē súcuan ni cahān de te ni cacusān ni tēe junta jeē cácuu grupo fariseo jīn grupo saduceo, te ni cacahān ñhīn. <sup>8</sup> Chí cácahān tēe grupo saduceo jeē ma nátecu ndīyí, ni tu cáhiyo ndajéhé yā ni ánuá, te tēe grupo fariseo cácejnūhūn de ndinúní jnūhun yáha. <sup>9</sup> Te yōhyo ni cuvaā. Te sava tēe cástéén jnūhun cáhān tutu ley yā jeē cácuu jnáhan grupo fariseo, ni candocuñi de, te ni cacahān de:

Tú ni ñn cuéchi cánhīn na siquī tēe yáha. Sanaa te ni cahān ndije ñn ánuá jīn de chí ñn ndajéhé yā. Ma sáníhni ni yō nuū Yaā Dios nuu súcuan, áchí.

<sup>10</sup> Te yōhyo ni catejnáhan, te yūhú general jeē quende i chiyó Pablo, te ni ndacu de jniñu jeē na quívi soldado te quenehen de Pablo sava mēhñú i, te na ndívi de ini cuartel.

<sup>11</sup> Te jecuáā un ní quee-ni máá Jítoho yō nuū de, te ni cahān yā jīn de:

Pablo, cuandeyí ni rō, chí nájñūhun ni nacani rō jnūhun ri ini ñuu Jerusalén yáha, suni súcuan nacani nahīn rō jnūhun ri ini ñuu Roma, achí yá.

#### *Jeē ní casquijnáhan jnūhun cahni Pablo*

<sup>12</sup> Te nuū ní cundijīn te ni cacutūtú sava ñayuu hebreo, te ni casquijnáhan jnūhun, te ni cacahān teyí i jeē ma cáji cuíti i ni ñn ni ma cóho cuíti i nde núu tu cahni i Pablo. <sup>13</sup> Te vihýá gā uū xico tēe hebreo ni cacahān teyí jnūhun yáha. <sup>14</sup> Te ni jengoo nuū sutú cácujeñhu jīn núu tēe jēhnu cándiso jniñu nuū ñayuu hebreo, te ni cacahān jīn tēe ún:

Ni cacahān teyí ná jeē ma cáji cuíti ná ni ñn níni nde ná tu cahni na Pablo. <sup>15</sup> Núu súcuan te máá ni jijnáhan ni jīn táca gā tēe cásaáha junta cujeñhu ga, cuacáhān ni jīn general jeē quenehen de Pablo na jéé de nuū junta sajnē, chí cachi ni jéé cácuñi ni stíchi vāha ga ní de. Te máá ná jijnáhan ná cotūhva ná cahni ná de nde ná tu quee de nuū cáhīn tūtú ní, achí.

<sup>16</sup> Te sēhe yí cuáha Pablo ni nihīn i jnūhun jeē súcuan ni cacahān, te ni jehēn i cuartel, te ni castūhún i nuū Pablo. <sup>17</sup> Te ni cana Pablo xiniñ ñn jnáhan capitán, te ni cahān de:

Condeca ní súchi yáha quihīn ni jīn i nuū general, chí iyó ñn jnūhun castūhún i nuū de, áchí de.

<sup>18</sup> Te capitán un ní jeca de i cuahān i jīn de nuū general, te ni cahān de:

Pablo, tēe íne vecāa, ni cana de sañá, te ni cahān de jīn ná jeē quíndeca ná súchi yáha núu ní, chí iyó ñn jnūhun cahān i jīn ní, áchí de.

<sup>19</sup> Te ni jniñ general ndaha i cuahān de jīn i ñn lado, te yuhu-ni ni cajñūhūn de i:

Na jnūhun cúní rō cahān rō jīn rí, áchí de.

<sup>20</sup> Te ni cahān i:

Tēe hebreo ni casquijnáhan jnūhun de jeē cahān ndahú de jīn ní quenehen ní Pablo sajnē quihīn de nuū táca tēe cásaáha junta cujeñhu ga, chí cahān-ni de jīn ní jeē cácuñi de jeē stíchi vāha ga de Pablo. <sup>21</sup> Te ma cuáha ni jnūhun, chí vihýá gā uū xico de cándētu sáhi de ichi, te ni cacahān teyí de jeē ma cáji cuíti de ni ñn ni ma cóho cuíti de nde núu tú cahni de Pablo, te vijna je cándētu tūhva de jeē cuáha ni jnūhun quihīn Pablo nuū junta, áchí i.

<sup>22</sup> Te ni cahān general jīn i jeē ma cáchi i nuū ní ñn ñayuu jeē ni cahān i jnūhun yáha jīn de, te ni tají de i cuanuhun i.

#### *Jeē ní tají general Pablo cuahān de nuū Félix, tēe cúu gobernador*

<sup>23</sup> Yūcuán na te ni cana general uū capitán de, te ni ndacu de jniñu jeē sátūhva de uū ciento soldado cájica jéhé jīn úní xico uxí jeē cáyosó caballo jīn úu ciento jeē cándáha lanza, chí cahān jecuáā ún quendacoo de jīn Pablo quingoo de nde ñuu Cesarea. <sup>24</sup> Te suni ni ndacu de jniñu jeē coo tūhva caballo jeē cóso Pablo, te condito vāha soldado un Pablo quingoo de nde nuū Félix, tēe cúu gobernador. <sup>25</sup> Te ni tee de ñn carta jeē cahān jnūhun yáha:

<sup>26</sup> Máá ná cúu Claudio Lisias, te tēe ná carta yáha cuajeē nuū ní, señor Félix, gobernador cujeñhu. Ndese tahū cúu ní. <sup>27</sup> Ñayuu hebreo ni cajñi i tēe yáha, te je yajni cahni i de núu, te ni jnama ná de jīn soldado, chí ni jini na jéé sēhe nación Roma cúu de. <sup>28</sup> Te ni jendeca ná de nuū junta máá i jijnáhan i jeē sándaā i núu na cuéchi ni sáha de. <sup>29</sup> Te ni jini na jéé siquí ley máá i cúu cuéchi cácahān i siquí de, te tu ñhīn na ni ñn cuéchi siquí de jeē cúu de ni jeé cóne de vecāa. <sup>30</sup> Te ni ñhīn na jnūhun jeē sava tēe hebreo ni casquijnáhan jnūhun de jeé cahni de tēe yáha, te jeé yúcuñ cuú jeé yachí ni tají ná de cuajeē de nuū ní. Te suni je ni cahān na jīn ñayuu cájicān cuéchi siquí de jecoo i nuū ní, te jīñá cahān i jīn ní na cuéchi ni sáha de. Je ni cahān yō, achí carta.

<sup>31</sup> Te ni cajeca ñuu-ni soldado Pablo cuangoo jīn de nde ñuu Antípatris, nájñūhun ni tahū jniñu nuū de. <sup>32</sup> Te inga quíviñ ni canandió cóo-ni soldado cájica jéhé cuánungoo nde cuartel, te soldado cáyosó caballo cuangoo de jīn Pablo. <sup>33</sup> Te ni jinūcoo ñuu Cesarea, te ni cachihi carta ndaha gobernador, te suni ni cajeni Pablo

nuū de. <sup>34</sup> Te ni cahu gobernador carta un. Te ni cajñuhún de ndé ñuu cúu Pablo, te ni jini de jeē té ndañúú Cilicia cúu Pablo. <sup>35</sup> Te ni cahān de:

Nde na quécoo tēe cájequin cuēchi siquī rō te cuni nahín rí jñuhun cahān rō, áchí de.

Te ni cahān de jee na quíndiyū Pablo ini palacio ndiŷi Herodes.

*Jeē ni cahān Pablo jehē maá de nuū Félix*

## 24

<sup>1</sup> Te nuū uhún quivī te Ananías, sutū cujéhnū ga, ni quee de ñuu ún. Te suni ni quecoo sava tēe jéhnū cándiso jniñū nuū jñahan ñuu de hebreo jiín iin tēe cúu abogado, nání de Tértulo. Te ni quívicoo de nuū gobernador jeē cahān de cuēchi siquī Pablo. <sup>2</sup> Te ni cana gobernador Pablo ni quee de. Te ni quejéé Tértulo cahān de cuēchi siquī Pablo, chí suhva ni cahān de jiín Félix:

Tátá gobernador, siquī jeē cúu ní tóhō jeē váha ndíchí ndácu ní jniñū, te jeē yúcuán tú na jñuhun cájejnahan iyó, chí cáyūcu váha yó. <sup>3</sup> Te na cátañú ná, chí táca quivī váha cúu táca nuū ndácu ní jniñū jeē váha sáha ní, tátá Félix. <sup>4</sup> Te tu cúni na snáa na cuéhē tiempo ni, te cahán ndahú ná jiín ní cuni nahín ní jecu-ni jñuhun cahān na jiín ní. <sup>5</sup> Chí ni cajini na tēe yáha jéé cúu de iin tēe tíxín, te sáha de jeé cánacuajñahan máá jñahan ñuu ná hebreo ní cáhnu-ni táca lado, te cúu de tēe cujéhnū nuū ñáyyu cascuáha jñuhun tēe nání Jesús jeē ní jéhnū ñuu Nazaret. <sup>6</sup> Te suni je ndúcu de jeé stíví de táca jniñū ini templo ii, te ni cajni ná de. Te cácu ni na sándaá na siquī de núú, nájnūhun cahán ley ñuu ná. <sup>7</sup> Te ni jinū-ni general Lisias, te ni quende fuerza de tēe yáha nuū na jññahan ná. <sup>8</sup> Te ni ndacu de jniñū jeē táca ná jeē cácahān na cuēchi siquī tēe yáha quijicoo ná ndé nuū ní. Te vijna cuu stíchí maá ní de, te jiín jñuhun cahān maá de te cuni ní jéé ní sáha de cuēchi jeē cácahān na jiín ní, áchí Tértulo.

<sup>9</sup> Te suni ni cacahān tēe hebreo jeē ní jinūcoo jiín de jeé iyó ndáá jeé súcuán cúu cuēchi Pablo. <sup>10</sup> Yúcuán na te ni sáha gobernador seña nuū Pablo jeē na cahán de, te ni cahān Pablo:

Je jini na jéé cuéhē cuiyā cúu ní gobernador ñuu yáha, te jeē yúcuán núnjahan ni na jéé sándaá ni siquī ná. <sup>11</sup> Chí maá ní cuu nanducú ní te cuni ní jéé sáá maá úxí uū quivī ni cuu jeē ní jéhnē ná ñuu Jerusalén jeē chiñuhún ná Yaā Dios. <sup>12</sup> Te tu ní stáhān jñahan ná jiín ní iin ñayuu, ni tu ní stóna ná ñáyyu ini templo ni ini vehe ii sinagoga ni ini maá ñuu. <sup>13</sup> Ní tú na jiín stéén de jeé iyó ndáá jñuhun cácahān de siquī ná. <sup>14</sup> Te jñuhun cahán cají ná jiín ní cúu jeé chiñuhún ná Yaā Dios táca jíi na, te suu cúu jeé chiñuhún ná maá Jesucristo, te maá

jñuhun yáha-ni cúu jeē cácahān de jeé stíví ná. Te cándije ná táca jñuhun yósó núú tútu ley yā jiín núú tútu jeē ní catee tēe ni canacani jñuhun ya nde jenahán. <sup>15</sup> Te inuū ñuhun ni na jiín de jeē sáha Yaā Dios jeē nátecu táca ndiŷi, cúu ñayuu ní casáha váha jiín ñáyyu ní casáha néé. <sup>16</sup> Te jeē yúcuán máni jeē váha ndhví ní na sáha ná. Súcuán te váha iyó ní anuá na jéé tú na cuēchi ndéé siquī na núú Yaā Dios ni nuū ñáyyu.

<sup>17</sup> Te ni jica cuu ná táca ñuu jicá jecu cuiyā, te sáá te ni ndee na jiín xuhun jéé ní cajéhe táca ñáyyu jeē chindéé ñáhán i jñahan ñuu na cáyūcu Jerusalén. Te suni ní ndee na jéé socó na quiti nuū Yaā Dios. <sup>18</sup> Te íne ná ini templo siquī jeē cuchi ná ndundoo ná núú Yaā Dios te socó ná. Te jecu jñahan ñuu ná hebreo jeé véjicoo Asia ní cajito de sáñá ini templo, te tú na ñayuu cuéhē ní cóyūcu jiín ná jeé sávaá i. <sup>19</sup> Te núu ni stíví ná ¿te naun tu ní quijicoo tēe Asia un návaha suni cahān de ndese ni stíví ná? <sup>20</sup> Chí tēe ní quecoo yáha na cahán maá de núu na cuēchi ni canihín de siquī na ná ni indichi na núú junta tēe cácujeñū ini ñuu ná. <sup>21</sup> ¿Te chí cájequin de cuēchi siquī na jéé ní cahān jee ná suhva ná ní iyo ná nuū junta naún? Chí ní achi na jéé cándije ná jéé nátecu táca ndiŷi, te jeē yúcuán cájequin ní cuēchi siquī ná, ní achi na jiín de. Achí Pablo.

<sup>22</sup> Te Félix chí je jini váha de ndese cácañdije ñayuu Cristo. Te jeē ní jini sōho de jñuhun yáha te ni stétu de un jññahan, te ni cahān de:

Nde na quée general Lisias te cajñuhun gá rí siquī jniñū yáha, áchí de.

<sup>23</sup> Te ni ndacu de jniñū nuū capitán jeē na cóne ga Pablo vecā, te ma cási jeē sáha de jeé cuni de, te ni ma cási jeé quijicoo jñahan de jeé chindéé ñáhán i de.

<sup>24</sup> Te ni cuu jecu quivī, te ni quiji tucu Félix jiín ñasihi de Drusila, te ñahan hebreá cúu ña. Te ni ndacu de jniñū jeē na quiji Pablo návaha nacani de jñuhun ndese cándije yó Jesucristo. <sup>25</sup> Te ni cahān Pablo jiín de jeé cánuú sáha yó jniñū ndaá, te cánuú coto yó máá yó jeē ma sáha yó jniñū stíví, chí quivī sándihí te sándaá Yaā Dios jniñū ndiŷi ñayuu ndese ni casáha i. Te ni yūhu Félix te ni cahān de:

Vijna te cuáhán, te inga quivī jeé núne ri te cana ri rohó quiji ró, áchí de.

<sup>26</sup> Te ñuhun ni de jeé cuáha Pablo xuhun núú de te siáá de quenda de vecā. Jeé yúcuán tijni jinu ni cana de Pablo ni canda-jñuhún de. <sup>27</sup> Te súcuán ni cuu uū cuiyā, te sáá te ni nucuiñi Porcio Festo nuū Félix. Te cúni Félix jeē na cúsiñ ní ñayuu hebreo jiín de, te jeé yúcuán ní squéndō de Pablo vecā.

*Jeē ní indichi Pablo nuū Festo*



## 25

<sup>1</sup> Te sáá únī quivī jeē ni quivī Festo cuu de gobernador Judea, te ni quenda de ñuu Cesarea cuahān de ñuu Jerusalén. <sup>2</sup> Te tāca sūtū cácujeñhu jíin tēe cácujeñhu nuū ñáyyuu hebreo ni jinūcoo nuū Festo, te ni cajicān cuēchi siquī Pablo. <sup>3</sup> Te ni cacahān ndahú jíin Festo jeē núu vāha ni de te na nátají de Pablo ndiji ñuu Jerusalén. Súcuān ni cacahān, chí je ni casquínáhan jñūhun jeē cahni Pablo ichi. <sup>4</sup> Te ni cahān Festo jeē yíndesi vāha Pablo nde ñuu Cesarea, te je jéni ni de jeē jecu na quivī te nuhūn maá de ñuu Cesarea. <sup>5</sup> Te jeé yúcuān ní cahān de jíin tāca tēe ún:

Tāca níhín jeē cándiso jñíñu, na quíngoo yó nde Cesarea, te yúcuān cácan ni cuēchi siquī de te núu iyó cuēchi de, áchí de.

<sup>6</sup> Te ni ine de yúcuān únā chí úxī-ni quivī, te ni ndee de ñuu Cesarea, te inga quivī ni cucōo de mesa nuū sándaā de jñíñu, te ni cahān de jeē na quíji Pablo. <sup>7</sup> Te je cáhīn tēe hebreo jeē ní quijicoo nde ñuu Jerusalén. Te ni quee Pablo, te ni cajicó ndūu nuū de, te ni caquejé-ni cásájñuhún téyí siquī de, te tú na jíin ní cástéén jeē iyó ndáā jñūhun cacahān. <sup>8</sup> Te ni cahān Pablo jehē maá de:

Tu ní sáha ná ní ñin cuēchi siquī ley ñuu na jéē cácuu ná ñayuu hebreo, ni siquī templo, ni siquī rey nación Roma, achí de.

<sup>9</sup> Te Festo chí cúní de jeē cusī ni ñayuu hebreo jíin de, te ni cajñuhún de Pablo:

¿A tu cúní rō quinhun rō Jerusalén te yúcuān sándaā rī siquī rō? achí de.

<sup>10</sup> Te ni cahān Pablo:

Je índichi na núu cúndaā jñíñu jeē ndácu maá tēe cúu rey nación Roma, te yāha cúu nuū cánuú cúndaā jñíñu ná. Máá ní je jíiní vāha ni jéé tú na cuēchi ní sáha ná siquī tāca jñáhan ñuu ná hebreo. <sup>11</sup> Chí núu ní sáha ná ñin cuēchi xeēn jeē jíiní ññuhún cuu ná, te iyó vāha jeē cúu na núu súcuān. Te núu tu iyó ndáā jñūhun jeē casájñuhún tēe yāha siquī ná, te ní ñin tēe ma cúu chíhi de sáñá ndaha tēe yāha jíjñáhan de. Núu súcuān te cúní na quihín na núu maá rey nación Roma sándaā de siquī na, áchí de.

<sup>12</sup> Te ni cajñuhun Festo ndese cájeni ni tēe cándiso jñíñu jíin de. Yúcuān na te ni cahān de jíin Pablo:

Je ni cahān rō jeē cúní rō quihín rō nuū maá rey nación Roma sándaā de siquī rō. Núu súcuān te quihín nahín ró nuū de, áchí de.

*Jeē ni índichi Pablo nuū rey Agripa*

<sup>13</sup> Te ni cuu jecu quivī, te rey Agripa jíin Berenice ni jecóndéhé de Festo nde ñuu Cesarea. <sup>14</sup> Te tijni quivī ni coyucú de yúcuān. Te ni nacani Festo jñūhun siquī Pablo nuū rey un. Te suhva ni cahān de:

Félix jeē ní cuu de gobernador, ni stóo de ñin tēe ine vecāā yāhá. <sup>15</sup> Te ná ní jehēn ná ñuu

Jerusalén, te sūtū cácujeñhu jíin ñáyyuu jéñhu cándiso jñíñu nuū ñáyyuu hebreo ni jinūcoo i nuū na cájequin i cuēchi siquī tēe ún, te cácuñi i jeē na cúu de. <sup>16</sup> Te ni cahān na jíin i jeē tu iyó costumbre tāca tóhō Roma jeē cahni de ñin tēe súcuān-ni, chí jíiní ññuhún condichi de jíin ñáyyuu cájequin cuēchi siquī de, návāha cahān de jehē maá de te cúndaā núu iyó cuēchi de. <sup>17</sup> Yúcuān na te ni quecoo tútú i yāhá. Te inga quivī ún tu ní cúcuéé ná, chí ni cucōo na mesa nuū sándaā na siquī cuēchi, te ni ndacu ná jñíñu jeē na quíji tēe ún. <sup>18</sup> Te cáhīn ñayuu cájequin cuēchi siquī de. Te ni jeni ni na jéé iyó cuēchi xeēn cahān de siquī tēe un núu, te tú cuiti. <sup>19</sup> Chí jeē cacahān de cúu máni siquī jñūhun cácuñje-ni maá de, jíin siquī ñin tēe nání Jesús jeē jé ni jíin de, te Pablo cahān níhín de jeē ní natecu ndije tēe ún. <sup>20</sup> Te tu ní cújñúní cuiti ni ná ndese sándaā ná, te ni cajñuhun ná de núu cúní de quihín de ñuu Jerusalén te yúcuān cúndaā siquī de. <sup>21</sup> Te maá Pablo ni cahān de jeē cúní de quihín de nuū Augusto, rey yō nación Roma, te yúcuān sándaā rey cuēchi de, ni achí de. Te ni cahān na jéē na cóne de vecāā nde tají ná de quihín de nuū rey un, áchí Festo.

<sup>22</sup> Yúcuān na te ni cahān Agripa jíin Festo:

Suni cúní maá ná cuni sōho ná jéē cahān tēe un, áchí de.

Te ni cahān Festo:

Sajnē te cuni sōho ní jéē cahān de núu súcuān, áchí de.

<sup>23</sup> Te inga quivī un ní quecoo Agripa jíin Berenice. Te cáñuhun de sahma cújéñhu de, ni quivicoo de ini vehe juzgado jíin táca general jíin tēe cácujeñhu ñin ñuu ún. Te ni ndacu Festo jñíñu jeē na quíji Pablo. <sup>24</sup> Te ni cahān Festo:

Cáhān na jíin ní, tátā rey Agripa, jíin ndihi níhín jéē cáyūcu jíin yó yāhá vijna. Yāha cúu tēe jeē siquī de ní candonda ndivii jñáhan de hebreo ñuu Jerusalén jíin ndé ñuu Cesarea yāhá, te máni cacahān i jeē tú vāha jeē cótecu gā de. <sup>25</sup> Te jéni ni maá ná jéé tú na cuēchi xeēn ni sáha de jeē cúu de. Te je ni cahān de jeē cúní de quihín de nuū rey Augusto jeē sándaā rey un siquī de, te jeé yúcuān ní cahān na jéē tají ná de quihín de nuū rey un. <sup>26</sup> Te tu cúcáñhu ni ná na jñūhun tee ná núu tútú quihín jíin de nuū rey yō. Jeé yúcuān ní ndacu ná jñíñu ni quee de nuū yó jíjñáhan yó, te cánuú gá nuū maá ní, tátā rey Agripa. Te stíchí ní de návāha níhín na jñūhun tee ná siquī de, te quihín jñūhun un jíin de nuū rey. <sup>27</sup> Chí tu jéjñíñu cuiti jeē tají ná ñin preso quihín te núu tú castūhun ná nuū tútú na cuēchi ni sáha de, áchí Festo.

*Jeē ni cahān Pablo jehē maá de nuū rey Agripa*

## 26

<sup>1</sup> Yūcuán na te ni cahān rey Agripa jín Pablo:

Vijna te jéhe ri jnūhun cahān rō jehē maá rō, achí de.

Te Pablo ni sáha de ndaha de jeē ní quejéé de cáhān de, te suhva ni cahān de:

<sup>2</sup> Tātā rey Agripa, cúsi ni ná vijna jeē cúu cahān na jín ní siquī ndíhi jeē casájnūhún ñayuu ñuu yō hebreo siquī ná. <sup>3</sup> Chi je jíní vāha maá ní tāca jéé ní tajnúni ñayuu ñuu yō hebreo jín tāca jnūhun jeē tu cáhīn inuú i jín. Jeē yūcuán cáhān ndahú ná jín ní jeē coo paciencia ni cuni sōho ní jnūhun cahān na jín ní.

*Jeē ní cachi Pablo ndese ni sáha de nde ná tu sama ya ini de*

<sup>4</sup> Je cájini tāca jnāhan ñuu yō hebreo ndese ni sáha ná ini ñuu nuú ní cacu ná jín ini ñuu Jerusalén nde ná lulí ná. <sup>5</sup> Te núu cácuni maá de cahān ndaa de, te je cájini de saña jéé ndé lulí ná ní quívi ná nuú grupo fariseo, te grupo un ñihin ga cánducú ndéyi de squicu de ley yā vésú tāca gá grupo tēe nación yō. <sup>6</sup> Te ñūhun ni na jnūhun ni jejnūhun Yaā Dios nuú tāca jín yō jeē nastécu yā ndíyi, te maá siquī tāca jnūhun yāha-ni cúu jeē cájequin de cuēchi siquī ná. <sup>7</sup> Chi maá yō jeē cácuu yō jnāhan ndihúxi uú yucún ñayuu Israel, cáñūhun ni yō jnūhun ni jejnūhun ya jeē nastécu yā ndíyi, te jeē yūcuán nduú ñuú cáchiñūhún yō Yaā Dios te cájejniñu yō núu yā. Te suni súcuán ñūhun ni maá ná, tātā rey Agripa, te siquī jeē nácani ná jnūhun jeē natecu ndíyi cúu jeē cájicān jnāhan ñuu yō hebreo cuēchi siquī ná. <sup>8</sup> Te chí má nastécu Yaā Dios tāca ndíyi cájeni ni ní naún?

*Jeē ní cachi Pablo ndese ni jito xeēn de ñayuu cá candíje*

<sup>9</sup> Te maá ná chi ní jeni ni na jéé jíní ñūhún ndonda ná siquī ñayuu cá candíje i Jesús, Yaā ní jehnu ñuu Nazaret. <sup>10</sup> Te súcuán ni sáha ná ini ñuu Jerusalén, chi tāca sūtū cácujeñhu ni cajéhe de jnūhun jeē cóndiso jniñu ná chuhun ná cuéhē ñayuu vecāa siquī jeē cá candíje i Jesús, te íyo váha ni na núu cájehni de i. <sup>11</sup> Te tijní jínú ni sáha ndevāha na jín i ini tācá vehe ñi sinagoga jeē ní sáha fuerza na i jeē na stóo i jnūhun cá candíje i. Te xeēn ni quívi ni na núu i, chi nde ñuu jicá ní jehēn ná ni sáha xeēn na jín i.

*Jeē ní cachi tucu Pablo ndese ni sama ya ini de*

(Hch. 9.1-19; 22.6-16)

<sup>12</sup> Te sutū cácujeñhu ni cajéhe de jnūhun jeē cóndiso jniñu ná quihín na sáha xeēn na jín ñayuu cá candíje cáyūcú ñuu Damasco nuú. <sup>13</sup> Te cuahān ná ichi ún, tātā rey, te caxū cúu, te ichi ándiví ní quiji ñi nduva ni ndindéé ndaxín núu na jín núu tée cuangoo

jín ná, te víhyá gā ndíi vésú niándii. <sup>14</sup> Te ndíhi ná ní cacotúú ná nuú ñūhun. Te ní jini sōho ná ñi jnūhun ni cahān jín ná jín jnūhun yuhu yō hebreo: Saulo, Saulo, ¿najeñé jito xeēn rō ruhū? Chi jeē sáha ró súcuán cúu nájñūhun siquī jeē tu jéndíje ti, te jéñú yatá tí xiní pulla, te súcuán stóho ti maá tí, achí. <sup>15</sup> Yūcuán na te ni cahān ná: ¿Na ñihin cúu jeē cahān, Tātā? achí ná. Te maá Jítoho na ní cahān yā jín ná: Máá rí cúu Jesús, te jeē jito xeēn rō ñayuu cá candíje i ruhū cúu jeē jito xeēn rō ruhū. <sup>16</sup> Ndonda condichi rō, chí véji ri nuú rō jeē tejniñu ri rohó sáha rō jniñu cúní ri, te nacani cájí rō jnūhun tāca jéé ní jito ró vijna, jín jéé steén gā rí nuú rō tāca quívi quíji. <sup>17</sup> Te jnama ri rohó núu tāca jnāhan ñuu rō jín núu ñayuu tāca gá nación, chí nuú ñayuu un tájri rí rohó quíhín rō. <sup>18</sup> Te tájri rí rohó quíhín rō nuú i, chí nájñūhun nanune ró tñúú i cúu jeē steén rō jnūhun ri nuú i te jecūhun ni i. Chí ñayuu ná tu candíje i ruhū, nájñūhun cájica i nuú néé. Te jeē candíje i ruhū, quívi i nuú luz rí, te tuá quíhi i chíji jniñu jeē cúní jexeeñ jeē cúu Satanás, chí sa suhva quíhi i chíji jniñu cúní maá rí. Te tájri rí rohó quíhín rō nuú i, návāha candíje i ruhū te cone cáhnu ní rí nuú cuéchi i. Yūcuán na te inuú ñihin tahú i jín tāca gá ñayuu jeē ní sáando ri anuá i, achí yā jín ná.

*Jeē ní cachi Pablo ndese ni jetáhú de jnūhun ni cahān yā*

<sup>19</sup> Jeē yūcuán tu ní sánihni ni na núu jnūhun ni cahān yā ichi ándiví jín ná, tātā rey Agripa. <sup>20</sup> Chi ní jetáhú ná, te ni nacani ná jnūhun ya xihna gā nuú ñayuu ñuu Damasco, te sáa te ní nacani ná jnūhun ya nuú ñayuu ñuu Jerusalén jín ná región Judea jín núu ñayuu tāca gá nación. Te jnūhun ní nacani ná núu i cúu jeē na nácani ni i jeē stóo i cuéchi i te nasāma ini i sáha Yaā Dios, te na sáha i jniñu váha jeē steén jeē ní nasāma ini i. <sup>21</sup> Te siquī jeē súcuán ni nacani ná jnūhun te ní cajñi jnāhan ñuu yō hebreo sañá ini templo, te ni cacani i cahni i saña núu. <sup>22</sup> Te ní chindéé ñáhan Yaā Dios sañá, te jeē yūcuán índichi ñihin na ndé vijna nácani cájí ná jnūhun ya nuú ñayuu cácujeñhu jín núu tācá-ni ñayuu. Chí tu chíso gá na jnūhun siquī jnūhun jeē ní nacani Moisés jín tāca gá tēe ni canacani jnūhun Yaā Dios nde jenahán. <sup>23</sup> Te ní cundaā jnūhun ni canacani de un jéé cánuú ndoho Cristo nde cuu yā, te xihna gā maá yā natecu vésú tāca gá ndíyi, te súcuán steén cájí yā nuú ñayuu jeē jnáma ya i, cúu ñayuu nación yō Israel jín ñayuu tāca gá nación, achí Pablo.

*Jeē ní nducú ndéyi Pablo scandíje de Agripa jnūhun Jesús*

<sup>24</sup> Te súcuán ni cahān Pablo jehē maá de, te ní cahān jee Festo:

Ni nduloco rō, Pablo. Siquī jeē ni scuáha ndasí rō te jeē yúcuani ní t̄vī xínī rō, áchí de.

<sup>25</sup> Te ni cahān Pablo:

Tu ní t̄vī xínī na, tátā Festo, chí sa suhva íyó cájí ndāā jnūhun cáhān na. <sup>26</sup> Te máá rey Agripa je jíní vāha de táca jñīnu ní íyo jeē ní nacani ná, te tu yúhú ná cahān na táca jnūhun yāha, chí je jíní vāha na jéē jíní de táca jnūhun yāha, chí tú sāhi ní cúu táca jñīnu yāha. <sup>27</sup> Tátā rey Agripa, ¿á cándije ní jnūhun jeē ní cacahān tēe ní canacani jnūhun ya nde jenahān? Jéni ní na jéē cándije ní, áchí Pablo.

<sup>28</sup> Yúcuān na te ni cahān Agripa jín Pablo:

Va jéni ní rō jeē jín jecu jnūhun ní cahān rō te sāha rō jeē cándije ri Cristo, áchí de.

<sup>29</sup> Te ni cahān Pablo:

Vesú jín jecu-ni jnūhun chí jín cuéhē, te jícán tahú na jéē máá ní jín táca gá tēe cájini sóho jnūhun cáhān na vijna, na cándije ní nájñūhun cándije máá ná, te tu cúní na jéē cónuhni ní nájñūhun núhni na.

<sup>30</sup> Te ní ndihi ní cahān Pablo táca jnūhun yāha. Te ní ndocuñi rey jín gobernador jín Berenice jín táca gá tēe cácujeñu cáyūcu jín de. <sup>31</sup> Te ní cacujiyo de, te ní candajñūhun sín máá de:

Tú ní ñn cuēchi ní sāha tēe yāha jéē cúu de ní jeē cóne ga de vecāa.

<sup>32</sup> Te ni cahān Agripa jín Festo:

Cuu siáá ní tēe yāha núu jeē tu ní cáhān máá de jeē quihín de nde nuū rey yō nación Roma nuū, áchí de.

*Jeē ní catají de Pablo cuahān de ñuu Roma*

## 27

<sup>1</sup> Te ni cundaā jeē quihín Pablo jín barco nde Italia, te suni quingoo ná jín de. Te Pablo jín sava ga tēe cáhān vecāa ní quivicoo de ndaha ñn capitán naní Julio jeē quíndeca de tēe un ndé Italia. Te Julio cúu ñn jnāhan grupo soldado naní Augusto. <sup>2</sup> Te nde ñuu Adramitio nuū cájecuñi barco ní quenda ñn barco ní quee, te ní quivicoo ná, te quihín barco un táca ñuu jeē yíhi chíji Asia jeē yúcu yumar. Te suni cuahān Aristarco jín ná, te máá de cúu tēe ñuu Tesalónica región Macedonia. <sup>3</sup> Te inga quiví ní jinūcoo ná ñuu Sidón nuū cájecuñi barco. Te Julio ní cundahú ní de Pablo, te ní jēhe de jnūhun ní jeondēhe Pablo táca amigo de, te ní cachindéé ñhān i de. <sup>4</sup> Te ñuu yúcuani ní quenda barco cuahān jín ná. Te siquī jeē ñhin yíhi tachí te tu ní cúu quihín yohó barco, te ní tee xín barco cuahān jín ná xiin isla Chipre, ñuhun jeē íne sín nuū ndúte, te lado jecó barco ní quendōo Chipre. <sup>5</sup> Te ní cayāha ná yumar Cilicia jín Panfilia cuahān ná, te ní jinūcoo ná ñuu Mira ndañū Licia.

<sup>6</sup> Te ñuu yúcuani ní ñhin capitán ñn barco jeē véji ñuu Alejandría te quihín ichi Italia, te ní cahān de jín ná ní quivicoo ná barco

un. <sup>7</sup> Te cuéhē quiví ní cahān na núu ndúte jín barco, chí cuéé ní jica, te fuerza-ni ní jinūcoo ná yuñū Gnido. Te tuá ní jēhe tachí un jnūhun quihín yohó barco, te ní cayāha ná núu jnūhma tachí xiin ñūu Salmón jeē íne nuū isla Creta. <sup>8</sup> Te yōhō ní canducú ndéyí tēe cáscaca barco un, ní yāha jín ná ní yumar xiin Creta. Te ní jinūcoo ná ñn lugar naní Buenos Puertos nuū cájecuñi barco, te yajni un íne ñuu Lasea.

<sup>9</sup> Te je ní cuu cuéhē quiví ní cajica ná jín barco. Te je yajni quejéé vico m̄jin, te yúcuani cúu tiempo jeē yí jica barco te sanaa te coo jnūndóho nuū mar. Te ní cahān ñhin Pablo jín de:

<sup>10</sup> Tátā jijnāhan ní, jíní na jéē yōhō yí coo viaje yāha, te quiji jnūndóho siquī barco, te naa barco jín ndajñūnu, te nde máá yó sanaa te cuu yō, áchí de.

<sup>11</sup> Te tu ní chusóhó capitán jeē cahān Pablo, chí sa suhva jeē cahān tēe scáca barco un jín tēe chí barco. <sup>12</sup> Te siquī jeē tu íyó vāha lugar nuū ní jécuiñi barco un jéē cóyucú de ní vico m̄jin, te ní cajeni ní cuéhē gā de jeē vāha ga núu quendacoo de yúcuān. Chí cájeni ní de jeē núu cuu te jinūcoo de ñuu Fenice te yúcuān coyucú de vico m̄jin. Chí Fenice suni íne yundúte isla Creta nuū cájecuñi barco, te ndijin ichi noroeste jín suroeste.

*Jeē ní jéquihi ñn tachí ñhin jeē stóna ndute mar*

<sup>13</sup> Te ní jequihí vīta táchí ichi sur, te ní cajeni ní de jeē jinú de Fenice nuú, te ní cascáca ga de barco jica jín de xiin Creta. <sup>14</sup> Te ní cunúu jecu gā, te ní quejéé-ni ñn tachí ñhin ndasí jeē naní táchí nordeste. <sup>15</sup> Te tuá ní cúu ga quihín yohó barco, chí ní chundahá-ni tachí cuahān jín, te ní casiáá-ni de jeē cascáca de, te cháha chúcuani cuahān barco jín ndihi ná sāha tachí. <sup>16</sup> Te ní yāha jín ná xiin isla lulí jéē naní Claudia, nuū jnūhma tachí. Te vesú sūcuani te yōhō uhū ní cascáca ná barco lulí jeē ndiquín yatā barco cáhnu. <sup>17</sup> Te ní casquíví ná ñni barco cáhnu. Te ní casucun núu de barco cáhnu jín yoho. Te cáyuhú de jeē quihín barco nuū yaxín ndute nuū naní Sirte te jñi nuū ñti, te jeē yúcuani ní casnúu de sahma cóquin jeē stéchí te jica barco. Te ní casiáá de jeē na quihín ndé chí chundahá táchí. <sup>18</sup> Te jécuiñi cuiti jeē yíhi tachí ñhin. Te inga quiví un ní caquejéé de cájete de ndajñūnu ndiso barco, návaha nduñama gā barco te ma queé chíji ndute. <sup>19</sup> Te quiví uní ní cajēhe núu ná ndaha ní cajete ná máá ndajñūnu jéñiñu barco. <sup>20</sup> Te cuéhē quiví tu ní cájito ná ñandii ní quimi siquī jeē íin vicó, ní tu jécuiñi cuiti tachí ñhin ún, te tuá cáñūhun ní na cácu ná.

<sup>21</sup> Te ni cuu quivĩ jeé tuá cáyeji cuiti na stáa. Te ni jecundichi Pablo sava mēhñu tée ún, te ni cahān de:

Tātá jijnáhan ní, núu ní cájetáhú ní jñuhun jeé ni cahān ná te ma quéndacoo yó Creta nuú, te ni ma cóto yó jñundóho yáha ni ma náá ndajniñu núu. <sup>22</sup> Te vijna cáhán nihin na jín ní jeé cuandeyí ni ní jijnáhan ní, chí ní ñin ní má cúu ní, vésú naa barco. <sup>23</sup> Chi jeé cúni ní quiji ñin ndajehé jeé ní tají máá Yáa Dios nuú ná. Chí máá yá cúu Jitoho ná, te jéjñiñu ná núu yá. <sup>24</sup> Te ndajehé yá ún suhva ni cahān yá jín ná: Pablo, ma yūhu ró, chí váha-ni jinū rō nuū rey nación Roma, te jeé siquĩ rohó te sáha Yáa Dios jeé cácu ndihí tée cáhñin jín ró ini barco yáhá, áhí yá jín ná. <sup>25</sup> Tātá jijnáhan ní, ma yūhu ní núu súcuan, chí máá ná cucáhnú ní na Yáa Dios jeé coo nájnūhun ni cahān ndajehé yá jín ná. <sup>26</sup> Te jinū nahñin yó ñin isla, te ma jinú yachí yó nuū quíngoo yó, áhí de.

<sup>27</sup> Te ni cuu uxí cuñ jecuáa nde jeé ní quejéé táchí, te jíca barco nuū mar Adria, te cháha chúcuan cuahān barco sáha tachí. Te máá jecuáa ún te jeé ní cuu sava ñuu te cájeni ní tée cáscáca barco jeé jí cuacuyajni jinū barco ñuhun íchi. <sup>28</sup> Te ní casínga de ñin jeé cáchicuáhá de nasaa cúnú ndute, te ní cajini de jeé iyó ócō xahūn ñin metro. Te ní jíca barco jecu gā te ní casínga tucu de, te ní cajini de jeé iyó ócō uxā na metro. <sup>29</sup> Te cáyühú de jeé jécujnáhan barco jín toto, te ní cajihni de cuñ cāa gancho náhnú yatā barco un, te ní cascāne de nde jehé ndúte návāha chituu te jecuiñĩ barco. Te yōhyo jnāá de jeé na cundijin yachí. <sup>30</sup> Te tée cáscáca barco un ní canducú de cunu de quíngoo de jín barco lulí te cácu de nuū jñundóho quiji siquĩ barco cáhnú núu. Jeé yúcuan ní casnúu de barco lulí un núu ndúte, te cása-ha-ni de nájnūhun jeé snúu de inga cāa gancho ichi núu barco návāha tú cuni ñayuu jeé cácuni de cunu de quíngoo de. <sup>31</sup> Te ní cahān Pablo jín capitán jín táca soldado:

Núu tú coyūcu tée yáha ini barco cáhnú jín yó, te ma cácu cuiti maá ní jijnáhan ní, áhí de.

<sup>32</sup> Yūcuán na te soldado ní cajehnde de yoho núhni barco lulí, te ní jneni-ni cuahān.

<sup>33</sup> Te nuū cuáundijin te ní cahān Pablo jín táca tée un jéé na cáji de staā. Te suhva ní cahān de:

Vijna iyó úxí cuñ quivĩ jeé cándito ní te tu cáyeji cuiti ní stáa. <sup>34</sup> Te cáhán ndahú ná jín ní jeé na cáji ní stáa, návāha nanihñin ní ní te cácu ní, chí ní ñin yó má cúu, ní ma tují cuiti yó, áhí de.

<sup>35</sup> Te ní ndihí ní cahān de jñuhun yáha, te ní quihñin de ñin staā, te mēhñu táca ñayuu un ní nacuatáhú de nuū Yáa Dios, te ní tahú sáva de staā ún, te ní quejéé de yéji de. <sup>36</sup> Yūcuán na te ní candusí ni ndihí de, te suni ní cayejí

de staā. <sup>37</sup> Te ndivii na jéé cáñuhun ná ini barco cúu uú ciento uní xico xahūn ñin ná. <sup>38</sup> Te ní cayejí váha ndihí ná. Yūcuán na te ní cajete de trigo cuahān nuū ndúte un, návāha na ndúñama gā barco.

### *Jeé ni queé barco chíjĩ ndute*

<sup>39</sup> Te nuū ní cundijin te ní cajito de ñuhun, te tu ní cáncuni de ndé nuú cúu. Te ní cajito de nuū íne cuiñĩ ndute, te suni máá ñítí cúu, te cájeni ní de jinū de yúcuan jín barco nuū na cúu núu. <sup>40</sup> Te ní cajehnde de yoho núhni cāa gancho yúcuan, te ní caquendōo cāa un núu mar. Te ní canandají de yujnu jeé scotú chí barco, te ní nacata caa de sahma cóquin ichi núu návāha chundahá táchí barco, te ní quejéé caca quihñin jín de ichi núu iyó ñítí. <sup>41</sup> Te ní jinū barco nuū nihin náquijnáhan ndute. Te ní queé barco nuū ñítí ñuhun chíjĩ ndute, te ní jññ-ni ichi núu te tuá ní jíca cuiti, te yatā barco un ní cahya-ni jeé nihin ní cani suhmā ndute mar. <sup>42</sup> Yūcuán na te ní candajñuhñn soldado jeé cáhni de táca preso návāha ma súde i te cunu i quíngoo í. <sup>43</sup> Te cúní capitán un jéé cácu Pablo, te ní jesicoo de. Chí sa ní cahān de núu ndé ñayuu jiní suté te xíhna gā i na nungoo i suté i nuú ndúte, te na quénda-ni i quihñin i nuū ñuhun íchi. <sup>44</sup> Te suni súcuan na quécōo ndihí i quihñin i, sava i coso candá i jín yujnu cunu te sava ga i jín pedazo yujnu barco. Te súcuan ní cacácu ndihí ná ní jinūcōo ná ñuhun íchi.

### *Jeé ni íne Pablo isla Malta*

## 28

<sup>1</sup> Te nuū ní cacácu ná te ñayuu cáyūcu yúcuan ní cacachi i nuū na jéé isla un nání Malta. <sup>2</sup> Te ñayuu un ní cacundáhú ní i saña jijnáhan ná, te ní cascáyú i ñin ñuhñin cáhnú, te ní cacahān i jín ná jeé nasaá ná, chí mĩjin sáha jeé cúun saū. <sup>3</sup> Te ní stutú Pablo jecu tujnu íchi. Te jeé jnāá de tujnu un núu ñuhñin te ñin coō xeññ jinú tí ní quenda tí tujnu un jéé ní cujihñi, te ní chiyuhú-ni tí ndaha de. <sup>4</sup> Te ñayuu cáyūcu yúcuan ní cajito i jeé ndíta caa coō un yíyuhú tí ndaha de, te ní cacahān i:

Tée yáha vā sanaa te ní jehni de ndiyí núu súcuan, te vésú je ní cácu de nuū mar, te máá yáá sándaá jniñu ñayuu tu jéhe ga yá jñuhun jeé cótecu de, áhí í.

<sup>5</sup> Te ní caja Pablo ndaha de, te ní ninga coō un núu ñuhñin, te tú na vé ní ndóho de. <sup>6</sup> Te cándetu táca ñayuu jeé chúhun i cuiñĩ de chí cotúú-ni de te cuu de. Te ní cunahán téyí cándetu i, te ní cajito i jeé tú na vé ní ndóho de. Yūcuán na te ní nasāma cájeni ní i, te ní cacahān i jeé ñin yaā cúu Pablo.

<sup>7</sup> Te yajni yúcuan iyó ñuhun tée cújehnu ga Malta un, nání de Publio. Te ní cana tée un saña jijnáhan ná, te ní jéhe núu de vehe

de ni coyūcu ná jíin de uní quiví, te ni jito yúcun de saña. <sup>8</sup> Te tátá Publio cáa de, chi ndóho de cuehyí quiji jíin cuehyí niñí. Te ni jecondéhe Pablo tēe ún, te ni jicān tahú de te ni soó de ndaha de siquí tēe ún, te ni nduvāha-ni de. <sup>9</sup> Yūcuán na te ni quijicoo ndáhi ga ñayuu cácuñu yūcuán, te suni sūcuan ni canduvāha-ni i. <sup>10</sup> Te ñayuu un ní cajēhe i cuehē ndajniñu ni cacutahū ná. Te nuū ni jíin quiví jeē quingoo tucu ná jíin barco, te ni cajēhe i táca ndajniñu cuu ná ichi.

*Jeē ni jíin Pablo ñuu Roma*

<sup>11</sup> Te uní yoó ni coyūcu ná Malta. Te ñin barco jeē véji ñuu Alejandria ni ñe Malta ní vico mjin, te ichi núu barco un ndéé uñ figura ídolo ñuu de nání Cástor jíin Pólux. Te ni quivícoo ná barco un cuángoo ná. <sup>12</sup> Te ni jinūcoo ná ñuu Siracusa, te yūcuan ní coyūcu ná uní quiví. <sup>13</sup> Te ni quenda barco cuahān jíin ná nduu nduu yundúte, te ni jinūcoo ná ñuu Regio. Te inga quiví ún vāha ni quiji tachí ichi sur, te ni quendacoo ná ñuu Regio, te uū quiví te ni jinūcoo ná ñuu Puteoli. <sup>14</sup> Te yūcuan ní caquijnāhan ná jíin jecu hermano cácañdije, te ni cacana de saña ní coyūcu ná jíin de ñin semana. Yūcuán na te ni quendacoo ná jeē quihñ ná ñuu Roma. <sup>15</sup> Te hermano cáyūcú ñni ñuu Roma, je ni canihñ de jñuhun jeē jinūcoo ná, te ni quendacoo de, te sava de ni caquijnāhan de saña ndé ñuu Foro de Apio te sava ga de ñuu Tres Tabernas. Te ná ni jito Pablo nuū de jíināhan de, te ni nacuatáhú de nuū Yaā Dios, te ni ndundeyí ni de. <sup>16</sup> Te saá te ni jinūcoo ná ñni ñuu Roma, te capitān ni squiví de táca preso ndaha tēe cújēhnu nuū táca soldado ñuu Roma. Te ni cajēhe de jñuhun jeē cone sñin Pablo te condito ñin soldado de.

*Jeē ní nacani Pablo jñuhun ya ñni ñuu Roma*

<sup>17</sup> Te nuū uní quiví te ni cana Pablo táca tēe cácuñjēhnu nuū jñāhan ñuu de hebreo cáyūcú ñni ñuu Roma. Te ni cacutútú de, te ni cahān Pablo jíin de:

Tátá jíināhan ní, tú cuiti na vé ni sáha ná siquí jñāhan yó hebreo ni siquí táca jniñu ní catajníni jíi yó. Te vésú sūcuan te ni cajniñi i saña ndé ñuu Jerusalén ni casquíví i saña ndaha tēe ñuu Roma jíināhan de. <sup>18</sup> Te tēe ñuu Roma jeē cácuñjēhnu cáyūcú Cesarea ni castíchi de saña, te cácuñi de siáa de saña núu, chi ní cajini de jeē tú na cuēchi ná jeē cúñ ná. <sup>19</sup> Te jñāhan ñuu yó hebreo tu ní cajēhe de jñuhun. Jeē yūcuan ní cahān na jeē quiji ná núu maá rey cújēhnu ga nde ñuu Roma yāhá te sánda maá de siquí ná. Te tú véji ná jeē cáquin na cuēchi siquí ñayuu nación yó. <sup>20</sup> Jeē yūcuan ní cana ná nihñ jíināhan ní, návāha cuni na táca ní te nda-jñuhun yó. Chi yóhó ñayuu Israel cáñuhun ni yó jeē nátecu ndiyí, te suu jñuhun un nácani

na, te jeē yūcuan cúu jeē nuhñi na jíin cadena yāha, áchi de.

<sup>21</sup> Te ni cacahān tēe un jíin Pablo:

Tú ni ñin carta ni cátañi ñayuu cáyūcú Judea nuū na jeē cástūhun de jñuhun ní, te táca jñāhan yó Judea jeē ní quijicoo yāhá, tú ni ñin jñuhun neé ní cacahān de siquí ní. <sup>22</sup> Te cánujñahan ni ná cuni sōho ná ndese cúu jñuhun jeē cahān ní, chi je cájini na jeē táca-ni lado cácañān ñayuu contra siquí jñuhun jeē jeē steén ni, áchi de.

<sup>23</sup> Te ni cajeni de ñin quiví, te ni quijicoo cuehē de vehe nuū néne Pablo. Te ní nacani de jñuhun ndese ndácu Yaā Dios jniñu, te ni steén cají de jñuhun nde jenéhen te nde ni ñni. Te sūcuan ni nducú ndéyí de scándije de táca tēe un jñuhun Jesús, te ni steén de jeē suni sūcuan cáhān ley jeē ní jēhe ya nuū Moisés jíin jñuhun jeē ní catee tēe ni canacani jñuhun Yaā Dios nde jenahān. <sup>24</sup> Te ni cacandije sava de jñuhun ni cahān Pablo, te sava ga de tu ní cájetáñi de. <sup>25</sup> Chi tú inuú cáñyo ni de. Te saá cánducú de quingoo de te ní cahān Pablo:

Ndaā cahān jñuhun jeē ní cahān Isaías, tēe ni nacani jñuhun Yaā Dios nde jenahān, chi suhva ni cahān de jíin táca jíi yó ní sáha Espiritu Santo:

<sup>26</sup> Ni cahān Yaā Dios:

Cuahān núu jñāhan ñuu rō yāhá te cahān rō jíin i:

Vésú cuni nahñ vāha ró te ma jécuhun ní rō, te vésú coto vāha ró te ma cúni rō.

<sup>27</sup> Chi yōhyo nihni ní rō,

chi tu cácuñi rō cuatáhú rō.

Te yōhyo uhū cájini sōho rō,

chi tu cánujñahan ni rō cuni sōho rō jñuhun ri.

Te nájnñuhun cájesi rō tinūu rō

cúu jeē tu cácuñi rō nanducú rō ndese cúu,

te tu cácuñi rō jeē násāma ñni rō

návāha nasávāha ri anuá rō nuū cuéchi ró, ní achi Yaā Dios.

Achí tutu. <sup>28</sup> Núu sūcuan te na cástūhun ná nuū ni jeē jñuhun ni tají Yaā Dios jeē jñāya ya yohó, nde vijna te tají yá jñuhun yāha quíhñ nuū ñayuu táca nación jeē tu cájini i jñuhun ya, te máa i chi cuni sōho i, áchi de.

<sup>29</sup> Te ní jñu ni cahān de jñuhun yāha, te cuangoo jñāhan de hebreo, te yōhyo ní cacahān de siquí jñuhun yāha jíināhan de.

<sup>30</sup> Te ní condee Pablo uū cuiyá vehe jeē ní quihñ núu de ún. Te ní cusñ ní de cahān de jíin táca ñayuu ní quijicoo nuū de. <sup>31</sup> Te jēhnu-ni ní nacani de jñuhun ndese ndácu Yaā Dios jniñu, te ni steén de jñuhun máa jítoho yó Jesucristo, te tú ní ñin ní jési jeē nácani de jñuhun.

## CARTA JEE NI TEE SAN PABLO APOSTOL NUU ÑAYUU ÑUU ROMA

<sup>1</sup> Máá rí cúu Pablo, mozo Jesucristo, chí ni cana Yaā Dios ruhū cúu ri apóstol yā, ni jeni ya ruhū te ni taji yá ruhū jeē nácani ri jnúhun jeē jnáma ya ñayuu.

<sup>2</sup> Te jnúhun un ní jejnúhun ya nde jenahán ndasí, te yósó núu tútu íi jeē ní catee tēe ni canacani jnúhun ya. <sup>3</sup> Te jnúhun un cáhán siquī Jítoho yō Jesucristo, Yaā cúu Sēhe Yaā Dios. Te ní nduu ya tēe, ní cacu ya chíji yucūn rey David. <sup>4</sup> Te ní natecu yā mēhñu ndíyi ní sáha Espírítu íi, te súcuan ní steén Yaā Dios jeē cúu ya Sēhe ya jeē ndíso poder. <sup>5</sup> Te jeē jíin Jesucristo ní jēhe Yaā Dios jniñu luu yáha jeē cácuu ri apóstol, cájica ri jíin jnúhun Cristo, náváha coo ñayuu táca nación jeē candíje i jeē sáha ya jehé i, te cuatáhú i nuu yā. <sup>6</sup> Te suni máá ró jijnáhan ró, suni ní cana ya rohó ní quívicoo ró ndaha Jesucristo.

<sup>7</sup> Te tēe ri carta yáha cuajeē nuu rohó ñayuu ñuu Roma. Chí ni cundáhú ní Yaā Dios rohó, te ní cana ya rohó jēe coo ndoo coo íi ró nuu yā. Te ñuhun ní rí jeē máá Tátá yō Yaā Dios jíin Jítoho yō Jesucristo sáha ga yā jeē váha rohó, te sáha ya jeē coo ndeyí coo síi ní ró.

### *Jeē cuní Pablo quihñ de ñuu Roma*

<sup>8</sup> Te xihna gā cástúhun rí nuu ró jeē nácuatáhú rí nuu Yaā Dios jeē siquí rohó jijnáhan ró, chí ní sáha Jesucristo jeē váha rohó. Chí ní ñáyívi jíité núu jnúhun cuahán ndese váha cácandíje ró yá. <sup>9</sup> Te máá Yaā Dios jíin yá jeē níin jíicán tahú rí jehé ró jijnáhan ró nuu jíicán tahú rí. Chí yóhoyo ndíhví ní rí jejníñu rí nuu yá jeē nácani ri jnúhun Sēhe ya. <sup>10</sup> Te níin jíicán tahú rí nuu yá jeē núu cuní yá te nde vijna te cuu jecondéhe rí rohó. <sup>11</sup> Chí cúu ní rí coto rí nuu ró jijnáhan ró, te steén gā rí jnúhun ya nuu ró, náváha quendóo váha ga anuá ró te cuiñi ñhin ga ró jíin. <sup>12</sup> Súcuan cuní rí náváha sáha yó jēe inuu coo ndeyí ní yó jijnáhan yó siquí jeē inuu cácandíje yó yá.

<sup>13</sup> Hermano jijnáhan ró, cuní rí jeē na jécúhun ní ró jeē tíjni jínu ní cuu ní rí jecondéhe rí rohó, te nde vijna ná tu cuu. Chí cuní rí scuité núu ga rí jnúhun ya mēhñu ró, nájñuhun ní sáha rí mēhñu ñayuu táca gá nación. <sup>14</sup> Chí cúu rí tēe táu siquí jnúhun ya, chí táu rí nacuáha rí jnúhun ya nuu ndíhi ñayuu, cúu ñayuu jíin gā siquí ndíhi jeē iyó ñáyívi jíin jéé tu jíin cuiñi, cúu ñayuu túhva jíin jéé tú túhva. <sup>15</sup> Jeē yúcuu cúu jeē ndíhví ní rí jeē suni nuu rohó ñayuu ñuu Roma nacani ri jnúhun jnáma ya yohó.

### *Jeē ndíso jnúhun váha ya poder*

<sup>16</sup> Chí tu cúcanu rí siquí jnúhun váha ya, chí yúcuu cúu poder Yaā Dios jeē jnáma ya táca ñayuu cácandíje, xihna gā ñayuu hebreo te suni táca gá ñayuu. <sup>17</sup> Chí jnúhun váha ya un steén nuu yó jeē ndáhva Yaā Dios cuéchi yó siquí jeē candíje yó jéé sáha ya jehé yó, te máá jéé candíje yó ní cuahán yó. Chí súcuan cáhán nuu tútu íi: Ñayuu jeē ní ndahva yá cuéchi i, técu i jeē candíje i jeē sáha ya jehé i, áchi.

### *Siquí jeē iyó ndasí cuéchi ñayuu*

<sup>18</sup> Chí jíin váha yó jéé Yaā Dios andívi, cuáha ya castigo xeén nuu táca ñayuu tu cácandíje te máni cuéchi casáha. Chí jíin jniñu néé casáha i te cájesi i nuu jnúhun ndaa. <sup>19</sup> Te ma cúu cahán i jeé tu jécúhun ní i siquí ndese Yaā cúu Yaā Dios, chí máá yá ní steén nuu i. <sup>20</sup> Chí jíin táca jeē ní sáha ya te cúu jécúhun ní ñayuu ndese Yaā cúu máá Yaā tu jíto i nuu. Chí nde ní jecóo ñáyívi jíin ndé vijna te cúu jécúhun váha ní i jeé máá yá cúu Yaā Dios te iyó poder yá ní cáni. Te jeē yúcuu má cúu cuiñi cahán i jeé tu jíin i jeé iyó yá. <sup>21</sup> Chí vésú ní cajini i ndese Yaā cúu ya, te tu ní cáchiñuhún i ya jeé cúu ya Yaā Dios, te ní tu ní nácuatáhú i nuu yá. Chí sa suhva ní nduu i ñayuu cájeni cáhā ní, chí ní candunéé íi i, te ní quendóo nee ini anuá i. <sup>22</sup> Cácahán i jeé ndíchi i, te sa suhva cácuméé i. <sup>23</sup> Chí ní castóo i Yaā Dios jeé yóhoyo luu cújéhnu, jeé ma cúu cuiñi. Te ní cajetáhú i táca imágen jeé casáha i, jeé cáa nájñuhun tēe cájihí, te suni nde imágen saa jíin cóo jíin quiti cájica ndicúñ ndaha.

<sup>24</sup> Te jeé yúcuu ní siaá Yaā Dios i jeé na sáha i táca jniñu jnéhen jniñu néé jéé cuní i. Te casáha i jniñu néé jíin jnáhan i jeé cúu máá jnúhun canu. <sup>25</sup> Chí tu ní cácandíje i jnúhun ndaa Yaā Dios, chí sa ní cacandíje i jnúhun stáhú. Te cáhiyo yíñuhún i te cáchiñuhún i nuu táca jéé ní sáha ya, lugar jeé chíñuhún i máá Yaā ní sáha ún, Yaā jeé cánuú cahán yó jeé cújéhnu ya ní cáni. Amén.

<sup>26</sup> Jeé yúcuu ní siaá Yaā Dios i jeé na sáha i táca jniñu néé jéé cándiyo ní i jeé cúu máá jnúhun canu. Chí nde ñahan ní casama ña modo síhí, te ní quívi ña jíin modo neé. <sup>27</sup> Te suni súcuan tēe ní casiaá de modo chíñiñu jíin ñahan. Te nde ní nduquijí de ní casáha ndiyí de jíin jnáhan yí de, te tēe jíin tēe ní casáha de jíin jnúhun canu. Te cándoho de castigo siquí jniñu néé ní casáha de.

<sup>28</sup> Te jeé tu ní cácani i cuajnúhún i Yaā Dios, jeé yúcuu ní siaá yá i jeé na cáni néé ní i, te sáha i táca jniñu jeé tu iyó váha. <sup>29</sup> Te máni máá na jniñu jeé tu iyó ndaa cándihví ní, te cájica jnéni, casáha jniñu néé, cándiyo ní, cájito uhú jnáhan. Te máni jeé cácuuésun ní, cájehni ndiyí, cájehán, cástáhú, cáshuhú jnáhan, cásjnúhún siquí jnáhan. <sup>30</sup> Cácahán jnúhun néé siquí jnáhan,

cájito uhú Yaā Dios, cácujeé ni, cáсандúxi máá, cásatéyi máá, cájequin costumbre neé, tu cájendetú nuú tatá nuú naná. <sup>31</sup> Te tu cájecúhun cuiti ni, tu squícu jnúhun jéjnhun, tu iyó máni jíin jnáhan, tu íne cáhnu ni nuú jnáhan, tu cúndáhi ni jnáhan. <sup>32</sup> Te je cájini vāha i jeé ni sándaā Yaā Dios jeé ñáyyu casáha súcuan, cánuú jnahnú ndetú i. Te vésú súcuan cájini i, te níni cásaáha i jniñu neé un, te suni cánujnahan ni i jeé casáha jnáhan i súcuan.

*Ndaā sándaā Yaā Dios siquī cuéchi*

## 2

<sup>1</sup> Núu súcuan te róhó jéé cahán cuéchi siquī jnáhan, núu na-ni ñayuu cúu ró, ma cúu cahán rō jeé tú na cuéchi máá ró. Chi jeé cahán rō cuéchi siquī jnáhan ró cúu jeé ndénehen ró cuéchi siquī máá ró. Chi róhó jéé cahán cuéchi, suni súcuan sáha máá ró cuéchi. <sup>2</sup> Chi jíini yō jeé Yaā Dios, ndaā sáha ya jeé ndóna ya siquī cuéchi ñayuu casáha súcuan. <sup>3</sup> Te róhó jéé cahán cuéchi siquī ñayuu casáha cuéchi, te suni súcuan sáha máá ró, ¿te á jéni ni rō jeé cácu máá ró quiví ndóna Yaā Dios siquī cuéchi, chí naún? <sup>4</sup> ¿A cújéé ni rō nuú jnúhun jeé yóhoyo vāha ni Yaā Dios jíin ró, jíin jéé iyó paciencia yā jeé tú yachí cuāha ya castigo nuú rō? ¿Te á tu jécúhun ni rō jeé jnúhun jeé yóhoyo vāha ni yā sáha jeé nácani ni rō siquī cuéchi rō? <sup>5</sup> Chi níhni ni rō te tu nácani ni rō siquī cuéchi rō. Te jeé yúcuán cáyā gā rō castigo siquī rō quiví sáha Yaā Dios juicio, máá quiví jeé cóo ndijin jeé ndaā sándaā yā siquī cuéchi. <sup>6</sup> Chi chunaa yā nuú ná ñn ná ñn ñayuu núu ndese jniñu ni casáha i. <sup>7</sup> Te ñayuu jeé tu jécuiñi i jeé sáha i jniñu vāha, cuāha ya jnúhun jeé cótecu i ní cáni. Chi ndúcu i quiví i nuú ndujéhnu yñíhún i, nuú ní cáni cótecu i. <sup>8</sup> Te quiví ni yā te cuāha ya castigo nuú ñayuu cujéé ni nuú yā, te cúniñni ni nuú jnúhun ndaā, chí sa nuú jnúhun yacuá yóho jetáhu i. <sup>9</sup> Te táca ñáyyu casáha jniñu neé, chí níhni i jnúndóho xeén te cucuíhyá ndasí ni i, xíhna gā ñayuu hebreo te suni súcuan ñayuu táca gá nación. <sup>10</sup> Te sa suhva táca ñayuu casáha jniñu vāha, chí quiví i nuú ndujéhnu yñíhún i, te coo ndeyí coo sñ ni i, xíhna gā ñayuu hebreo te suni súcuan ñayuu táca gá nación.

<sup>11</sup> Chi Yaā Dios tu sáha ya cuenta ndese cúu ñn ñn ñayuu, chí inuú sáha ya jíini i. <sup>12</sup> Chi táca ñáyyu jeé casáha cuéchi, vésú tu cáyihni i chíji ley jeé ni jéhe ya nuú Moisés, te tu níni ley un te jnahnú ndetú i. Te táca ñáyyu cáyihni chíji ley Moisés te casáha cuéchi, jíin ley un sándaā yā cuéchi i. <sup>13</sup> Chi tu ndáhva Yaā Dios cuéchi ñayuu jeé máá jéé cúni nahín-ni i jnúhun cáhán ley yā. Chí sa suhva ñayuu squícu jeé cahán ley yā cúu jeé ndáhva yā cuéchi i. <sup>14</sup> Chi ñayuu táca nación jeé tu cánevāha tutu ley jeé ni jéhe ya nuú ñayuu hebreo, te núu cásquícu

máá i ley yā, suu cúu jeé cánevāha i ley yā ini anuá i, vésú tu cánevāha i tutu ley un. <sup>15</sup> Te súcuan cástéén i jeé jnúhun ndácu ley un chí ñúhun ini anuá i. Te táca jéé cájeni ni i jíin ánuá i, suu cúu jeé steén nuú i siquī núu ni sáha i cuéchi chí vāha ni sáha i. <sup>16</sup> Te súcuan coo máá quiví jeé jíin Jesucristo sándaā Yaā Dios siquī táca jéé tu iyó vāha jeé ní cajeni sáhi ni táca ñayuu. Súcuan cáhán jnúhun vāha ya jeé nácani rí.

*Siquī jeé tu cásquícu ñayuu hebreo ley Moisés*

<sup>17</sup> Te róhó cácahán rō jeé téé hebreo cácuu ró, te cátenuú rō máá ley Moisés, te cácutéyi ró jeé siquī Yaā Dios. <sup>18</sup> Te cájeni ni rō jeé jíini rō ndese nújnahan ni yā, jíin jéé cúu nácáji vāha ró ndé-ni cúu jniñu vāha, chí ni cacutúhva ró ley un. <sup>19</sup> Te cájeni ni rō jeé máá ró cácuu téé steén ichi Yaā Dios nuú ñayuu tu cájini cuiti, jíin jéé cúu sáha ró jéé cúndijin ini anuá ñayuu cájica nájnúhun nuú neé. <sup>20</sup> Te cájeni ni rō jeé cúu steén ró nuú ñayuu tú túhva jnúhun ya, jíin jéé máá ró cácuu maestro nuú ñayuu tu jécúhun ni. Chí jíin tutu ley yā te cájini rō ndese cúu jnúhun ndíchí jnúhun ndaā, cájeni ni rō. <sup>21</sup> Núu súcuan te máá ró jeé castéén nuú ñayuu, ¿te naun tu cástéén rō nuú máá ró? Te máá ró jeé cácahán jeé ma sácuihná i, ¿te naun cáscuihná máá ró? <sup>22</sup> Te máá ró jeé cácahán jeé ma cósiquí ndéé i, ¿te naun cásiquí ndéé máá ró? Te máá ró jeé cácahán jeé cácuquini ni rō ídolo, ¿te naun cáscuihná ró ndajñíhu jeé yúcu ini vehe ídolo? <sup>23</sup> Te cácutéyi ró jíin ley Yaā Dios, te vésú súcuan te casáha ró jéé cácahán ñayuu siquī yā, chí tu cásquícu máá ró jnúhun ndácu ley yā ún. <sup>24</sup> Chí súcuan yósó núu tútu íi: Ñayuu táca gá nación, máni cácahán ndevāha i siquī Yaā Dios, jeé siquī cuéchi róhó ñayuu hebreo.

<sup>25</sup> Te núu cásquícu ró ley Moisés, yúcuán na te níhni jniñu ndije jeé ní canihni rō jnuñi circuncidar. Te núu tu cásquícu ró ley un, te vésú ni cuu ró circuncidar, te nájnúhun jeé tu ní cúu ró. <sup>26</sup> Te téé táca nación, núu cásquícu de jniñu ndácu ley un, vésú tu ní cániñi de jnuñi circuncidar, núu súcuan te nájnúhun ni canihni de jnuñi circuncidar. <sup>27</sup> Te téé jeé tu ní cúu circuncidar yiquí cúñu de, te cásquícu de ley yā, máá de cahán cuéchi siquī rō. Chí tu cásquícu ró, vésú cánevāha ró tutu ley un, te ni cuu ró circuncidar. <sup>28</sup> Chí nasūu jéé cáca ichi siquí ñn téé sáha jeé cúu ndije de téé hebreo. Te ni nasūu jéé cúu circuncidar yiquí cúñu ñn téé sáha jeé cúu de téé ndaā. <sup>29</sup> Chí sa suhva téé cúu hebreo ndije, cúu jeé ini anuá de ñúhun jnúhun ndaā. Te téé cúu circuncidar ndije, chí nde jíin ini jíin ánuá de sáha de jniñu ndaā te nasūu jéé ndíso de jnuñi circuncidar jeé cahán ley un cúu.

Tēe cándāa súcuan, nasūu ñāyuu cájejnúhún i de, chí máá Yaā Dios.

### 3

<sup>1</sup> ¿Núu súcuan te na vé iyó gá nuū ñāyuu hebreo jeē quéndōo vāha ga i? ¿Te ndé nihín jnínū jeē casáha i circuncidar? <sup>2</sup> Vāha ndasí nihín jnínū. Xihna gā nihín jnínū jeē ni jéhe Yaā Dios jnūhun ya nuū maá i. <sup>3</sup> Te vēsú sava i tu ní cácdíje, ¿te á suu sáha jeē ma squícu ga Yaā Dios jnūhun ni jejnūhun ya, chí naún? <sup>4</sup> Tú cuítí jeē súcuan, chí vēsú núu ndíhi ñāyuu castáhú i, te Yaā Dios chí iyó ndāa yā. Chí suhva yósó nuū tútu ií jeē ní cáhān iin tēe jín yá:

Cahān ñāyuu jeē iyó ndāa ní jín táca jnūhun cáhān ni,

te cuni i jeē iyó ndāa ní vēsú núu cácahān i squícu ní.

Achí tutu.

<sup>5</sup> Te cácahān sava ñāyuu jeē iyó vāha jeē sáha yó cuéchi, chí cuéchi yó jéjníñu stéén jeē iyó ndāa Yaā Dios. Núu súcuan ¿te á cuu cahān yō jeē tú vāha sáha Yaā Dios jeē jéhe ya castigo núu jéjníñu cuéchi yó súcuan? (Va cáhān-ni nde rí nájñūhun cácahān ñāyuu ñāyiví.) <sup>6</sup> Tú cuítí jeē súcuan. Chí núu jeē tú vāha sáha Yaā Dios, ¿te ndese cuu sándaā yā cuéchi ñāyuu ñāyiví?

<sup>7</sup> Te núu jnūhun stáhú cácahān ñāyuu jéjníñu stéén jeē yóhoyó cújéhu Yaā Dios squícu jeē máni cáhān ndāa yā, ¿te á cuu cahān yō jeē tú vāha jeē cahān yā jeē cuéchi cúu jeē castáhú i? <sup>8</sup> Tuú, chí núu jeē súcuan cúu, te cuu cahān yō jeē vetú-ní sáha yó jéé neé návāha quee jeē vāha núu. Te sava ñāyuu cácahān ndevāha i squícu rí jeē súcuan cástéén rí, te tú ndāa. Ñāyuu ún chí iyó vāha jeē ndénehen ya cuéchi squícu i.

#### *Ndivii yō iyó cuéchi*

<sup>9</sup> Núu súcuan ¿te á vāha ga ñāyuu cácuu yóhó ñāyuu hebreo vēsú inga ñāyuu naún? Tú cuítí jeē súcuan. Chí je ní cacahān yō jeē vēsú ñāyuu hebreo chí ñāyuu táca gá nación, ndivii yō yíhi chíji cuéchi. <sup>10</sup> Chí suhva cáhān tutu ií: Tú cuítí na ñāyuu ndāa iyó, ní iin i.

<sup>11</sup> Te tú cuítí ñāyuu jécūhun ní iyó, te tú ní iin i nánducú i Yaā Dios.

<sup>12</sup> Ndíhi i ní cascuíta i jnūhun ya, te inuú-ni ní caství ndíhi i máá i.

Te tú cuítí ñāyuu sáha jniñu vāha iyó, ní iin i.

<sup>13</sup> Yaū sucūn i cúu nájñūhun yaū ndíyi jeē núne,

chí máni jnūhun stáhú cácahān i.

Te nájñūhun veneno coō yíhi yuhu i,

<sup>14</sup> chí máni máá jnūhun ndevāha jnūhun uvuā cácahān i.

<sup>15</sup> Te yóhoyó ñāma jehē i jeē cáhni i ndíyi.

<sup>16</sup> Te ndé-ni cúu-ni nuū cájica i te squícu i jnūndóho jeē jnañnú ndetú ñāyuu.

<sup>17</sup> Te tú cájica cuítí i jín jnūhun coyūcu máni i,

<sup>18</sup> te ní tu cáncani ní i jeē cónso iyo i nuū Yaā Dios.

Achí tutu.

<sup>19</sup> Te jíní yō jeē táca jnūhun cáhān ley jehān, chí cáhān nuū ñāyuu yíhi chíji ley un, návāha ndíhi i ma cúu cahān i jehē i. Chí ndenehen Yaā Dios cuéchi squícu i nde jín ñāyuu ní ñāyiví. <sup>20</sup> Chí tú ní iin ñāyuu quéndōo ndāa i nuū yā jeē nducú i squícu i jniñu ndácu ley un. Chí ley un jéjníñu máni návāha cuni yō jeē iyó cuéchi yó.

#### *Jeē jnáma ya yohó squícu jeē candíje yó jéé sáha ya jehē yō*

<sup>21</sup> Te vijna te je cájini vāha yó ndese ndáhva Yaā Dios cuéchi yó. Te nasūu ley un sáha jeē quéndōo ndāa yō, vēsú maá tutu ley jín tēe ní canacani jnūhun ya, ní cacahān ndese ndáhva yā cuéchi ñāyuu. <sup>22</sup> Chí táca ñāyuu jeē cácdíje i jeē ní jíhi Jesucristo jeē chúnaa yā cuéchi i, chí ndahva Yaā Dios cuéchi i squícu jeē súcuan cácdíje i. Chí inuú-ni cúu táca ndíhi ñāyuu. <sup>23</sup> Chí ndíhi yó ní casáha cuéchi, te jeē yúcuun tu ní cúu quéndōo ndāa yō nuū Yaā Dios. <sup>24</sup> Te squícu jeē yóhoyó vāha ní Yaā Dios, jeē yúcuun ndáhva yā cuéchi yó súcuan-ni. Chí squícu jeē ní jíhi Cristo Jesús cúu jeē jnáma ya yohó. <sup>25</sup> Chí Yaā Dios ní jeni ya Cristo návāha socó yā maá yā chunaa yā cuéchi yó jéé ní jíhi yā. Te jnáma ya yohó núu súcuan cándíje yó. Te súcuan ní sáha Yaā Dios návāha stéén yā jeē Yaā ndāa cúu ya. Chí ichi yátá ní iyo paciencia yā, te tu ní chíhi ya cuenta cuéchi ñāyuu. <sup>26</sup> Te tiempo yáha stéén yā jeē Yaā ndāa cúu ya, chí ndāa sáha ya jeē squéndōo ndāa yā ñāyuu candíje vēsú iyó cuéchi i, chí cácdíje i jeē ní chunaa Jesús cuéchi i ní ndahva yā.

<sup>27</sup> Núu súcuan ¿te á cuu cutéyi gá yō squícu maá yó? Ma cúu cuítí, chí ma cúu cutéyi yó cani ní yō jeē vāha squícu yó ley yā. Chí jnáma ya yohó máá squícu jeē candíje yó jéé sáha ya jehē yō. <sup>28</sup> Núu súcuan te je jíní yō jeē ndáhva Yaā Dios cuéchi yó squícu jeē súcuan cándíje yó, te nasūu jéé nducú yó squícu yó jéé ndácu ley.

<sup>29</sup> ¿Te á núu maá-ni ñāyuu hebreo cúu ya Yaā Dios, chí naún? Tuú, chí suni cúu ya Yaā Dios jeē jnáma ñāyuu táca gá nación. <sup>30</sup> Chí iin-ni Yaā Dios iyó, te ndáhva yā cuéchi ñāyuu cácdíje jeē ní sáha ya jehē i, cúu ñāyuu ndíso jnūni circuncidar, cúu ñāyuu jeē tuú. <sup>31</sup> Te jeē candíje yó jéé jnáma ya yohó, ¿á sáha jeé tuá jíní ñúhún squícu yó ley yā, chí naún? Tú cuítí, chí sa suhva sáha jeē vāha ga cuu squícu yó ley yā.

*Abraham cúu iin ejemplo nuū yō*



## 4

<sup>1</sup> Núu súcuan ¿te ndese cahān yō siquī tāca jēē ní cuu jín jí yō Abraham? ¿Ndesē ní ndahvā cuēchi de? <sup>2</sup> Nasūu jēē ní sáha máá de cúu jēē ní ndahva Yaā Dios cuēchi de. Chi núu jēē súcuan cúu núu, te cuu cutéyí de jēē váha ní sáha de. Te tu ní cutéyí de, chi nasūu siquī jēē ní sáha máá de cúu jēē ní ndahva Yaā Dios cuēchi de. <sup>3</sup> ¿Chi ndese cahān tutu ií? Cahān jēē ní candíje Abraham jēē sáha ya jēē ní jéjnūhun ya nuū de, te jēē yúcuan ní ndahva yā cuēchi de. <sup>4</sup> Te iin ñayuu sájniñu, te yāhu i chi nasūu jēē cútahū i cúu, chi jēē chúnāa yō nuū i cúu. <sup>5</sup> Te jēē jnāma Yaā Dios ñayuu, chi jēē cútahū i cúu. Chi vēsú tu cúu squícu i táca jniñu váha, te núu candíje i jēē jnāma ya i nuū cuēchi i, yūcuán na te ndahva yā cuēchi i. <sup>6</sup> Te David suni ní cahān de ndese yōhyo ndetū ñayuu jēē ndáhva Yaā Dios cuēchi i, vēsú tu cúu sáha i ní iin jniñu jēē quéndōo ndaā i nuū yā. <sup>7</sup> Chi ní cahān de: Nacā ndetū ñayuu jēē íne cáhnu ní yā nuū jniñu néē ní sáha i,

te tu ndénehen ya cuēchi siquī i.

<sup>8</sup> Te nacā ndetū tēe jēē tuá chíhi máá Jítoho yó cuenta cuēchi de.

Achí tutu.

<sup>9</sup> ¿Te á máni máá ñayuu squícu ley circuncidar cúu jēē quéndōo ndetū? ¿Chí suni quéndōo ndetū ñayuu jēē tu cúu circuncidar naún? Suni máá i quéndōo ndetū i. Chi je ni cahān yō jēē ní candíje Abraham jēē sáha ya jēē ní jéjnūhun ya, te jēē yúcuan ní ndahva yā cuēchi de. <sup>10</sup> Te ná ní ndahva yā cuēchi de, ¿á je ni cuu de circuncidar, chí ndé ná tuú? Nasūu jēē jé ní cuu de circuncidar, chí nde ná tuú. <sup>11</sup> Te cuéé gá te ní nihin de jnūi circuncidar. Te suu ní cuu iin seña, nájnūhun iin sello jēē ní ndahva yā cuēchi de siquī jēē súcuan ní candíje de. Te jēē yúcuan ní cahān yā jēē cuu de jíi nuū tāca ñayuu jēē candíje i jēē sáha ya jehē i, suni nuū ñayuu tu ní cuu circuncidar, chí suni ndahva yā cuēchi máá i. <sup>12</sup> Te suni cúu de jíi nuū ñayuu ní cuu circuncidar, te nasūu máni jēē ní cuu i circuncidar, chí suni jēē ní jni i ejemplo de. Chi cácandíje i jēē sáha ya jehē i, nájnūhun ní candíje máá de nde ná tu cuu de circuncidar.

*Núu candíje yó te sáha Yaā Dios jēē ní jéjnūhun ya*

<sup>13</sup> Chi ní jéjnūhun Yaā Dios nuū Abraham jín núu tāca yúcūn de jēē cuāha ya ní ñáyívi cuu tahū de. Te nasūu siquī jēē ní nducú de squícu de ley yā cúu jēē ní jéjnūhun ya un núu de, chí sa suhva siquī jēē ní candíje de jēē ní jéjnūhun ya, te ní ndahva yā cuēchi de. <sup>14</sup> Chi núu jēē máni máá ñayuu nducú squícu ley cúu jēē nihin jēē ní jéjnūhun ya, núu súcuan te cándíje cáha yó nuú, te ma nihin jniñu jēē ní jéjnūhun ya ún. <sup>15</sup> Te ley

chí sáha jēē nihin ñayuu castigo siquī jēē tu cúu squícu i. Te núu jēē tu ley, te suni tú na jnūhun stívi ñayuu siquī ley coo núu.

<sup>16</sup> Núu súcuan te ní jéjnūhun ya jēē sáha ya jēē váha jín ñayuu siquī jēē candíje i jēē súcuan sáha ya, te jēē cútahū i súcuan-ni cúu. Te jēē ní jéjnūhun ya ún, iyó cutú nuū tāca yúcūn Abraham, te nasūu núu máá-ni ñayuu jēē nducú squícu ley jenahān, chí suni nuū tāca ñayuu cácandíje nájnūhun ní candíje Abraham. Te súcuan cúu de jíi nuū tāca yó jēē cácandíje yó. <sup>17</sup> Súcuan ní sáha Yaā Dios chí ní candíje de jēē sáha ya. Chi súcuan cahān tutu i: Ní jeni ri rohó cuu ró jíi nuū cuehē ndasí ñayuu. Súcuan ní cahān máá Yaā jēē nastécu ndíyí te cahān yā ndese coo tāca jēē ná tu coo.

<sup>18</sup> Te ní candíje de, te ní cocuhun teyí ní de jēē ní jéjnūhun ya jēē coo cuehē yúcūn de, vēsú tuá na modo coo sēhe de núu. Te jēē yúcuan ní nduu de jíi nuū cuehē ndasí ñayuu, nájnūhun ní cahān Yaā Dios: Súcuan nducuehē yúcūn rō, achí yá jín de. <sup>19</sup> Te je yajni jinú de ciento cuya, te vēsú súcuan te tu ní quenda de nuū jnūhun cándíje de, vēsú jiní de jēē máá de jín ñasihí de Sara je jéhu ndasí ndindúu de jēē ma cúu ga coo sēhe de.

<sup>20</sup> Te tu ní nácani siquī ní de jēē ma cándíje ga de jnūhun ní jéjnūhun Yaā Dios jēē coo sēhe de. Chí sa suhva ní candíje nihin ga de, te ní nacuatáhú de nuū Yaā Dios. <sup>21</sup> Chí ní cucáhnu váha ní de jēē cúu squícu Yaā Dios ndíhi jēē ní jéjnūhun ya. <sup>22</sup> Te jēē yúcuan ní ndahva yā cuēchi de siquī jēē súcuan ní candíje de.

<sup>23</sup> Te nasūu máá-ni siquī Abraham cúu jēē yosó núu tútu jēē ní ndahva yā cuēchi de jēē ní candíje de. <sup>24</sup> Chí suni yosó jēē siquī yohó jijnáhan yó. Chí suni ndahva yā cuēchi máá yó jēē candíje yó jēē cúu ya Yaā ní nastécu Jítoho yō Jesús. <sup>25</sup> Chí ní jihí Jesús jēē chúnāa yā cuēchi yó, te ní natecu yā návāha ndahva Yaā Dios cuēchi yó.

*Ndesē quéndōo ñayuu jēē ndáhva yā cuēchi*

## 5

<sup>1</sup> Núu súcuan te je ní ndahva Yaā Dios cuēchi yó siquī jēē ní candíje yó jēē sáha ya jehē yó. Te jēē yúcuan ní sáha ya jēē ní ndívi yó núu jnūhun maní yá jín yó, siquī jēē ní jihí Jítoho yō Jesucristo jehē yó. <sup>2</sup> Chí máá Cristo ní sáha jēē ní quáivcoo yó núu Yaā Dios, chí ní sáha ya jēē váha yohó siquī jēē súcuan cándíje yó. Te cáhnu nihin yó jín jnūhun jēē sáha ya jēē váha yohó. Te cúsiñ ní yó chí ñūhun ní yó jēē jinú yó nuū lúu cujéhu yó jín Yaā Dios. <sup>3</sup> Te nasūu máá yáha-ni, chí suni cúsiñ ní yó jēē ndóho yó jnúndóho. Chí jíní yó jēē máá jnúndóho sáha jēē jéndeyí ní yó. <sup>4</sup> Te jēē jéndeyí ní yó sáha jēē íje váha yó cuu yó ñayuu ndaā. Te jēē íje váha yó sáha jēē ñūhun ní yó tāca jēē váha jēē cóo. <sup>5</sup> Te táca jēē ñūhun ní

yō, chi nihIn nahIn yō. Chi jñuhun cundáhú ni Yāā Dios yohó, ni cunuú ini anuá yō, sáha Yāā Dios jeē jíIn Espíritu Santo jeē ni jéhe ya nuū yō.

<sup>6</sup> Chi náa ndóho yó jée ma cúu cuiti jnama yó máa yó, te ni jihí Cristo jehé yohó jée cúu yó ñayuu iyó cuéchi. Te ni jihí yá máa quíví jeē jé ni jeni Yāā Dios. <sup>7</sup> Te yí cúu jeē cúu ñayuu jehé inga ñayuu, vésú jehé ñayuu ndaá. Chí sanaa te iyó jíIn jeē chúndeyí ni ñayuu tēe cuu de jehé ñayuu ndaá váha. <sup>8</sup> Te máa Cristo chí ni jihí yá jehé yó náa máni cuéchi sáha yó, te súcuan ni steén Yāā Dios jeē cundáhú ni yá yohó. <sup>9</sup> Te vijna je ni ndahva Yāā Dios cuéchi yó siquí jeē ni jihí Cristo jehé yó. Núu súcuan te suni jíIn váha yó jée jnama Cristo yohó núu castigo quiji quíví sáha Yāā Dios juicio. <sup>10</sup> Chi náa cúu ga yó enemigo Yāā Dios, te siquí jeē ni jihí Sehe ya jehé yó, te ni sáha ya jeē ndívi yó núu jñuhun maní yá jíIn yó. Te jeē súcuan ní ndívi yó nuū jñuhun maní yá jíIn yó, te suni jíIn váha yó jée cácu yó siquí jeē técu Cristo, nduú yá jíIn yó. <sup>11</sup> Te nasúu máa yáha-ni, chí suni cúsi ndasí ni yó jíIn Yāā Dios siquí jeē ni sáha Jitoho yó Jesucristo jehé yó, chí máa yá ni sáha jeē ní ndívi yó núu jñuhun maní Yāā Dios jíIn yó.

#### *Jñuhun Adán jíIn jñuhun Cristo*

<sup>12</sup> Núu súcuan te jíIn yó jeē ni quívi cuéchi ini ñayívi ní sáha máa ñayuu-ni tēe Adán. Te jeē siquí cuéchi yúcuau te ní jecóo cuehyí jéhni ñayuu. Te jeē yúcuau cúu jeē jihí ndihí ñayuu, chí ndihí i yíhi cuéchi. <sup>13</sup> Te nde ná tu cuáha ya ley nuū Moisés, te je iyó cuéchi ini ñayívi. Te siquí jeē ná tu coo ley yá, te tu ní chíhi ya cuenta jeē castívi i. <sup>14</sup> Te vésú súcuan te nde tiempo Adán te nde tiempo Moisés ni yíhi ñayuu chíhi cuehyí jeē jéhni i siquí jeē iyó cuéchi i. Chí ni jihí i siquí cuéchi ni casáha máa i, vésú tu ní sáha i njáhan cuéchi jeē ni sáha Adán jeē ní cunihni ní de nuū ñayuu ní ndacu ya. Te Adán ni cuu de ñayuu muestra máa Yāā ní quiji cuéé ga.

<sup>15</sup> Te jñuhun jeē ni sáha Adán cuéchi, tu quíjnáhan cuiti jíIn táhū jeē jnama Yāā Dios yohó. Chí jeē ní stívi máa ñayuu-ni tēe ún, jeē yúcuau cúu jeē jihí ndihí yó. Te jñuhun jeē jnama Yāā Dios yohó cújehun ndasí gá, chí siquí jeē ní sáha máa ñayuu-ni tēe Jesucristo cúu jeē súcuan-ni jnama ya ndihí ñayuu candíje. <sup>16</sup> Te cuéchi jeē ni sáha máa ñayuu-ni Adán, tu quíjnáhan cuiti jíIn jñuhun jeē jnama Yāā Dios yohó. Chí siquí máa ñayuu-ni tēe cuéchi ún te ni quívicoo ñayuu chíhi jñuhun jnahnū ndetū i. Te jñuhun jeē jnama ya ñayuu, sa suhva sáha jeē súcuan-ni ndáhva yá cuéchi i, vésú yóhyo cuehé cuéchi ni casáha i. <sup>17</sup> Chí siquí jeē ní sáha máa ñayuu-ni tēe Adán cuéchi, te ni nihIn poder cuehyí jéhni ñayuu. Te sa suhva siquí jeē ní jihí máa ñayuu-ni tēe Jesucristo, te vihyá gá ní nihIn ñayuu máa yá poder jeé cótecu i

caca ndaá i jíIn yá. Chí ni ndahva yá cuéchi i siquí jeé yóhyo váha ni yá.

<sup>18</sup> Núu súcuan te siquí jeē ní sáha máa ñayuu-ni tēe Adán cuéchi, te ni quívicoo ndihí ñayuu chíhi jñuhun jnahnū ndetū i. Te sa suhva siquí jeē ní sáha máa ñayuu-ni tēe Jesucristo ñayuu jniñu váha ndasí, te ndáhva Yāā Dios cuéchi ndihí ñayuu te cotecu i ní cáni. <sup>19</sup> Chí siquí jeē tu ní jéndije máa ñayuu-ni tēe, te ni quívicoo cuehé ndasí ñayuu chíhi cuéchi. Te suni súcuan siquí jeē ní jéndije máa ñayuu-ni tēe Jesucristo, te ndáhva Yāā Dios cuéchi cuehé ndasí ñayuu.

<sup>20</sup> Te ni jéhe ya ley yá náváha cuni yó jeé cuehé cuéchi casáha yó. Te jeē ní nducuehé cuéchi yó, te vihyá gá cuehé cúu jñuhun jeé váha ni yá jeé íne cáhnu ni yá nuū yó. <sup>21</sup> Núu súcuan te njáñuhun ni ñayuu poder cuehyí jéhni ñayuu siquí jeé iyó cuéchi i, suni súcuan iyó poder jñuhun jeé váha ni yá jíIn yó. Chí ndáhva yá cuéchi yó te cotecu yó ní cáni siquí jeē ní jihí Jitoho yó Jesucristo jehé yó.

*Jeé tuáyíhi yó chíhi cuéchi chí yíhi yó ndaha Cristo*

## 6

<sup>1</sup> Núu súcuan ¿te ndese cahān yó? ¿A caca ga yó jíIn cuéchi náváha vihyá gá sáha ya jeé váha yohó jée cóne cáhnu ni yá nuū yó? <sup>2</sup> Ma cúu cuiti. Chí njáñuhun je ni jihí yó jeé tuá yíhi yó chíhi cuéchi, te ma cúu ga caca yó jíIn cuéchi núu súcuan. <sup>3</sup> ¿A tu cájecúhun ni rō jeé táca yó jeé ní jendute yó siquí jeē ní quívi yó ndaha Cristo Jesús, suni ní jendute yó siquí jeē ní quívi yó chíhi jñuhun jeē ní jihí yó jíIn yá? <sup>4</sup> Chí jeē ní jendute yó cúu njáñuhun ni quíndúy yó jée ní jihí yó jíIn yá. Te vijna te cuu caca yó jíIn vida jeé jeé ní jéhe ya nuū yó, chí njáñuhun suni ní natecu yó jíIn yá. Chí ní natecu yá ni sáha Tátá yá jíIn poder jeé cújehnu ndasí yá.

<sup>5</sup> Chí núu ni cundúu yó jíIn yá siquí jñuhun jeē ní jihí yó jíIn yá, te suni súcuan cundúu yó jíIn yá siquí jñuhun jeē ní natecu yó jíIn yá. <sup>6</sup> Chí jíIn yó jeé ní naa modo máa yó jeé ní jíca yó jíIn ichi yátá, chí ni quívi yó núu jñuhun jeē ní jihí yó jíIn Cristo jíca cruz. Te súcuan ni naa modo yó jeé cúu yó mozo nuū cuéchi, náváha tuá cuajniñu yó núu táca jniñu jeé máni cuéchi cúu. <sup>7</sup> Chí ñayuu jeé jé ní cajihí, je ni quendacoo i chíhi táca cuéchi. <sup>8</sup> Te núu je ni jihí yó jíIn Cristo, te cándije yó jée suni súcuan ni natecu yó jíIn yá. <sup>9</sup> Chí jíIn yó jeé ní natecu Cristo, te ma cúu cuiti ga yá, chí cuehyí jéhni yohó, tuá na vé cúu sáha jíIn yá. <sup>10</sup> Chí jeé ní jihí yá, te ñayuu-ni ni jihí yá jeé siquí cuéchi ñayuu. Te jeé técu yá vijna, chí sáha ya jeé cuní Yāā Dios. <sup>11</sup> Te suni súcuan róhó jíIn náhan ró, sáha ró cuenta jeé njáñuhun ni cajihí rō jeé ní quendacoo ró chíhi cuéchi. Te cátecu rō náváha sáha ró jée cuní Yāā Dios, chí ndúu ró jíIn Jitoho yó Cristo Jesús.

<sup>12</sup> Núu súcuan te ma cuáha ga rō jñūhun quihí ró chíji cuéchi jíin yiqui cúñu rō jeé cúu. Chí cuéchi ún stáhní ní roho jéé na sáha ró táca jéé ndiyo neé ní rō. <sup>13</sup> Te ma cuáha ró máá ró cuajníñu ró núu cuéchi jeé cócuu ró jíin jñiñu neé. Chí sa suhva cuáha ró máá ró nuú Yaa Dios, te sáha ró cuenta jeé nájnūhun je ni cajihí rō te ni canatecu rō nuú yā. Te cuáha ndíhi ró máá ró nuú yā jeé cuajníñu ró núu jñiñu ndaa. <sup>14</sup> Chí tuá na poder cuéchi jeé cundeyí jíin ró, chí tuá cáyihí ró chíji ley jenahán, chí sa cáyihí ró chíji jñūhun jeé váha ni yā jíin rō.

*Jñūhun mozo jeé steén ndese quéndō ñayuu cácanđije*

<sup>15</sup> ¿Nde se sáha yó núu súcuan? ¿A caca ga yō jíin cuéchi siquí jeé tuá yíhi yó chíji ley jenahán, chí sa yíhi yó chíji jñūhun jeé váha ni yā jíin yó? Ma cúu cuiti. <sup>16</sup> Chí cájini rō jeé núu cuáha ró máá ró jeé cuatáhu rō sájníñu ró núu ñin tēe, núu súcuan te cácuu ró mozo nuú tēe ún, te cánuú cuandije ró núu de. Te suni súcuan núu cuáha ró máá ró jeé sáha ró cuéchi, te mozo cuéchi cácuu ró, te cuu rō. Te núu cuatáhu ró nuú máá yá, te mozo yā cácuu ró jéé cáca ndaa rō. <sup>17</sup> Te na cútahū yō nuú Yaa Dios, chí vēsū ní cacuu ró mozo nuú cuéchi, te vijna chí nde jíin ñi jíin anuá rō ní cajetáhu ró nuú jñūhun ya jeé ní quívicoo ró núu. <sup>18</sup> Te vijna te je ní nduu libre rō jeé tuá cácuu ró mozo nuú cuéchi, te cájejníñu ró núu jñiñu ndaa. <sup>19</sup> (Ní cahán rī ñi jñūhun ndese cúu siquí mozo ñi ñayivi yáha, chí tu cájecūhun yachí ní rō siquí jñūhun ya.) Núu súcuan te nájnūhun ní cajehé ró máá ró nde saá jeé ní cajejníñu ró núu táca jñiñu jnehén jñiñu neé, suni súcuan cuáha ró máá ró vijna jeé cuajníñu ró núu jñiñu ndaa, návaha coo ndoo coo ñi rō nuú Yaa Dios.

<sup>20</sup> Chí nde náa cácuu ró mozo nuú cuéchi, te tu ní cájejníñu ró núu jñiñu ndaa. <sup>21</sup> ¿Te na vé ní canihín rō siquí cuéchi ní casáha ró un jéé cácuu ró vijna sáha? Tú cuiti, chí máá jéé jñahnú ndetū ró níf cáni sáha. <sup>22</sup> Te vijna te je ní canduu libre rō jeé tuá cácuu ró mozo nuú cuéchi, te cájejníñu ró núu Yaa Dios. Te suu sáha jeé quéndō váha ró, chí cáhíyo ndoo cáhíyo ñi rō nuú yā, te nde sandíhi te cotecu ró níf cáni. <sup>23</sup> Chí yáhu jeé níhín ñayuu siquí cuéchi cúu jeé jñahnú ndetū i. Te sa tahū jeé jéhe Yaa Dios cúu jeé cótecu yō níf cáni andiví, siquí jeé nduu yó jíin Ítoto yó Cristo Jesús.

*Jñūhun ñasihí jíin yū jeé steén ndese quéndō ñayuu cácanđije*

## 7

<sup>1</sup> Hermano, je cájini rō ndese cáhán ley yā, te cájini rō jeé yíhi ñayuu chíji ley maá-ni núu técu i ñayivi yáha. <sup>2</sup> Te yáha cúu nájnūhun ñi ñahan jeé ní quijnáhan, chí cáhán ley jeé yíhi ña ndaha yíi ña maá-ni núu técu de. Te

núu ní jihí yíi ña, te je ní quenda ña chíji ley jeé ní quijnáhan ña jíin de. <sup>3</sup> Núu súcuan te núu quijnáhan ña jíin inga tēe níni técu gā yíi ña, te casíqui ndéé ña de. Te núu je ní jihí yíi ña, te je ní quenda ña chíji ley un. Te cuu quijnáhan ña jíin inga tēe, chí nasūu jéé casíqui ndéé ña núu súcuan.

<sup>4</sup> Te suni súcuan róhó jíin náhan ró, ñaní maní, chí ndúu ró jíin Cristo. Chí nájnūhun ní cajihí rō jíin Cristo, te ní quendacoo ró chíji ley jenahán. Te vijna chí nájnūhun ní quijnáhan ró jíin inga, cúu jeé ní quívicoo ró ndaha Cristo, Yaa ní natecu mehñu ndíyi, návaha cuu sáha ró jñiñu váha jeé cuní Yaa Dios. <sup>5</sup> Chí ná ní cajica yó jíin modo maá yó nde saá, te ley un ní sáha jeé ní ndiyo neé ní yō táca jéé cuní yiqui cúñu yō jeé sáha yó. Te yūcan ní sáha jeé jñahnú ndetū yō nuú. <sup>6</sup> Te vijna te je ní quenda yó chíji ley jenahán, chí nájnūhun je ní jihí yō jeé ma níhín gā poder siquí yō. Te súcuan te iyó libre yō jeé cuajníñu yó nuú Yaa Dios. Te jica yó jíin modo jeé jéé cuní maá Espíritu, chí tuá yíhi yó chíji ley jeé ní tee Moisés jenahán.

*Siquí cuéchi jeé ñūhun ñi anuá yō*

<sup>7</sup> ¿Nde se cahán yō núu súcuan? ¿A ley ndíso cuéchi? Tú cuiti jeé súcuan. Te núu jeé tú ley yā, te ma cúni cuiti rī jeé iyó cuéchi rī. Chí ma cúni rī jeé cuéchi cúu jeé ndiyo ní rī ndajniñu jñáhan rī núu tu ní cáhán ley jeé ma ndiyo ní yō. <sup>8</sup> Te súcuan ní níhín cuéchi modo cocuu jíin rī. Chí siquí jeé ndácu ley jñiñu jeé ma sáha yó cuéchi, te ní quejéé ndiyo ní rī sáha rī táca jéé neé. Te núu jeé tu ley, te suni tú na jñūhun stívi yó siquí ley nuú. <sup>9</sup> Chí ní iyo tiempo jeé técu rī jeé ná tu jecūhun ní rī jeé cahán ley. Te ná ní quejéé rī jécūhun ní rī jñiñu jeé ndácu ley, te ní jecūhun ní rī jeé iyó cuéchi rī, te ní nduu rī nájnūhun ndíyi. <sup>10</sup> Chí ní jini rī jeé ley jeé sáha jeé cótecu anuá rī nuú, te tuú chí sa ní sáha jeé jñahnú ndetū rī nuú. <sup>11</sup> Chí jíin jéé ndácu ley un jñiñu, te ní níhín cuéchi modo cocuu jíin rī, te ní stahú ruhū. Chí jíin jéé ndácu ley jñiñu, te cuéchi ní sáha jeé ní quenda jñūhun jeé jñahnú ndetū rī.

<sup>12</sup> Núu súcuan te iyó ndaa maá ley, te táca jñiñu ndácu chí iyó ndoo iyó ndaa váha. <sup>13</sup> Núu súcuan te ley jeé iyó váha ún, ¿a suu sáha jeé jñahnú ndetū rī naún? Tú cuiti. Chí sa suhva máá cuéchi cúu jeé sáha jeé jñahnú ndetū rī, te súcuan stúu cuéchi ndese iyó máá. Chí jíin jñiñu váha jeé ndácu ley te ní natūu jñiñu neé jéé cúu cuéchi.

<sup>14</sup> Chí jíin yō jeé nuú maá Espíritu vēji ley. Te ruhū chí sa névaha rī ñi modo neé máá rī jeé ní squívi ruhū jéjníñu cáha rī nuú cuéchi. <sup>15</sup> Chí táca jéé sáha rī, tu jécūhun ní rī najehé cúu jeé sáha rī. Chí jñiñu váha jeé cuní rī sáha rī, tu ndé níhín rī fuerza sáha rī, chí sa suhva sáha rī jñiñu neé jéé tu cúvaha ní

rī sāha rī. <sup>16</sup> Te náa sāha ri jniñu neé jéē tu cúní rī sāha rī, núu súcuan te nácuni rī jeē iyó ndáa ley. <sup>17</sup> Núu súcuan te nasūu rúhū cūu jeē sāha jniñu neé un, chí modo neé jéē ñúhun iní anuá rī cūu jeē sāha cuēchi. <sup>18</sup> Chí jíni rī jeē modo maá rí jeē névāha rí iní anuá rī, tú cuíti na vé jeē váha iyó. Chí cúní rī sāha ri jniñu váha, te tu ndé níhin rī fuerza sāha rī. <sup>19</sup> Chí jniñu váha jeē cuní rī sāha rī, tu sāha rī. Te jniñu neé jéē tu cúní rī, sa yúcuan sāha rī. <sup>20</sup> Te náa sāha ri jniñu jeē tu cúní rī sāha rī, te nasūu rúhū cūu jeē sāha, chí modo neé jéē ñúhun iní anuá rī cūu jeē sāha.

<sup>21</sup> Núu súcuan te ní jini rí jeē súcuan cūu jíni rí: Vēsú cuní rī sāha ri jniñu váha, te sa máni modo neé cūu jeē ñúhun iní anuá rī. <sup>22</sup> Chí cúsñ ní rí jíni ley Yaā Dios nde jíni iní anuá rī. <sup>23</sup> Te ní nacuní rí jeē iyó inga modo neé máá rí jeē jési nuū jeē cuní rī sāha rí jeē váha. Te cūu rí nájnūhun preso nuū cuēchi jeē jícu jíni rí.

<sup>24</sup> Nacá jeē ndahú gá cūu ri núu súcuan. ¿Ndeé ñin jnama ruhū nuū modo neé máá rí jeē jícu jíni rí jeē jnahnú ndetū rí? <sup>25</sup> Na cútahú ndasí rí nuū Yaā Dios, chí máá yá cūu jeē jnama ruhū nuū modo neé rí siquī jeē ní jíhi Jitoho rí Jesucristo jehé rí. Núu súcuan te vēsú cuní yó squícu yó ley Yaā Dios, te jeē jíni fuerza maá yó ma cūu, chí modo neé máá yó sāha jeē jejniñu cāha yó nuū cuēchi.

*Siquī jeē jíca yó jíni modo cuní Espiritu Yaā Dios*

## 8

<sup>1</sup> Núu súcuan te ma ndénehen Yaā Dios cuēchi siquī ñayuu cáyihí ndaha Cristo. Chí tuá cájica i jíni modo neé máá i, chí sa suhva cájica i nájnūhun cúní maá Espiritu yā. <sup>2</sup> Chí modo jeē sāha Espiritu cūu jeē técu yó siquī jeē yíhi yó ndaha Cristo Jesús. Te yúcuan ní sāha jeē ní nduu libre yó nuū jnúhun jeē ní yíhi yó chíji cuēchi jeē jnahnú ndetū yó nuú. <sup>3</sup> Chí ní sāha Yaā Dios jeē quéndō vāha ñayuu jeē tu ní cūu quendō vāha jíni ley Moisés, siquī jeē tú na fuerza i jíni modo maá i jeē squícu i ley un. Chí ní tají yá Sēhe ya ní quiji, te ní nduu ya nájnūhun ñayuu cáhīyo cuēchi, návāha socó yá maá yá siquī cuēchi, vēsú tú na cuēchi ya. Te súcuan ní ndonda Yaā Dios siquī cuēchi jeē ní casáha ñayuu jíni modo neé máá i. <sup>4</sup> Súcuan ní cuu návāha cuu squícu yó táca jniñu ndaá jeē ndácu ley, chí tuá jíca yó jíni modo neé máá yó, chí jíca yó nájnūhun cúní maá Espiritu.

<sup>5</sup> Chí ñayuu jeē cájica jíni modo neé máá, chí máni ndíhví ní i siquī jeē cuní maá i. Te ñayuu jeē cájica nájnūhun cúní Espiritu, chí máni ndíhví ní i siquī jniñu cúní maá Espiritu. <sup>6</sup> Te jeē ndíhví ní yó siquī modo cuní maá yó sāha jeē jnahnú ndetū yó. Te jeē ndíhví ní yó siquī jniñu cúní maá Espiritu, sa suhva sāha jeē cotecu yó níí cáni te coo ndeyí

coo sñ ní yó. <sup>7</sup> Chí ñayuu jeē ndíhví ní siquī modo neé cúní maá i, chí jíto uhú i Yaā Dios, chí tu cúní i cuatáhú i ley Yaā Dios, te ní ma cūu squícu i. <sup>8</sup> Jeē yúcuan, ñayuu jíca jíni modo cuní maá, tu cūu sāha i jeē cúsñ ní Yaā Dios jíni i.

<sup>9</sup> Te máá ró jijnáhan ró, chí tuá cájica ró jíni modo cuní maá ró, chí cájica ró nájnūhun cúní Espiritu, chí ndeé Espiritu Yaā Dios iní anuá rō. Te ñayuu jeē tu ndeé Espiritu Cristo iní i, tu cáyihí i ndaha ya. <sup>10</sup> Te núu ndeé Cristo iní rō, te vēsú ñin quiví te cuu yiqui cūñu rō jeē siquī cuēchi, te cotecu anuá rō siquī jeē ní ndahva Yaā Dios cuēchi rō. <sup>11</sup> Te núu iní rō jijnáhan ró ndeé Espiritu maá Yaā jeē ní nastécu Cristo Jesús mēñu ndíyí, yúcuan na te máá yá suni sāha ya jeē natecu yiqui cūñu rō jeē cūu. Te sāha ya súcuan jeē jíni maá Espiritu yā jeē ndeé iní rō.

<sup>12</sup> Núu súcuan, hermano jijnáhan ró, ndeé jniñu yó jéē caca ndaá yó, te nasūu jéē sāha yó modo neé cúní maá yó. <sup>13</sup> Chí núu caca ró jíni modo neé máá ró, te jnahnú ndetū rō. Te núu jíni fuerza maá Espiritu snáa rō táca jniñu casáha ró jíni modo neé máá ró, te cotecu rō níí cáni.

<sup>14</sup> Chí táca ñayuu jeē cándiquín modo jeē steén Espiritu Yaā Dios, máá i cácuu sēhe Yaā Dios. <sup>15</sup> Chí Espiritu jeē ní canihín rō, tu ní sāha ya rohó jéē cuu ró nájnūhun mozo nuū yā jeē yūhú tucu ró núu yā, chí sa ní sāha ya jeē cūu yó sēhe ya. Te jeē yúcuan cūu jeē cahán jee yó: Tátá maá ná. <sup>16</sup> Te máá Espiritu steén yā iní anuá yó jeē cūu ndije yó sēhe Yaā Dios. <sup>17</sup> Te núu sēhe ya cácuu yó, te suni níhin yó maá táhú jeē ní jéjnūhun ya, te ñin cáhnu-ni coo tahú yó jíni Cristo. Chí núu ndóho yó jíni yá vijna, suni cujéhnu yó jíni yá andiví.

<sup>18</sup> Núu súcuan te sāha ri cuenta jeē táca jnúndóho jeē ndóho yó vijna, lúli ndasí cūu nuū jnúhun jeē cujéhnu luu yó jíni yá cucueé gá. <sup>19</sup> Chí ndíhi jeē ní jécō, yóhoyo cándetū jeē na sāha Yaā Dios jeē nduvāha, quiví quenda ndijin jeē cujéhnu sēhe Yaā Dios jijnáhan i. <sup>20</sup> Chí táca jéē ní jécō, chí ní quiví chíji jnúhun jeē tu quéndō vāha. Te nasūu jéē ní castívi máá, chí ñayuu ní casáha cuēchi, te jeē yúcuan ní squéndō Yaā Dios súcuan. Te máni cándetū jeē nduvāha. <sup>21</sup> Chí ñin quiví te táca jéē ní jécō, chí quenda chíji jnúhun jeē tívi jíni jéē tehyú. Te nduluu ndasí nájnūhun coo táca sēhe Yaā Dios, chí cácu nuū jnúhun jeē tu quéndō vāha. <sup>22</sup> Chí jíni yó jeē táca jéē ní jécō, chí nde vijna te nájnūhun ñnuú-ni cándoho te cájitū ní jeē na ndúvāha ndíhi. <sup>23</sup> Te nasūu máá-ni táca jéē ní jécō cūu jeē ndóho, chí suni nde maá yó ndóho yó, vēsú je névāha yó Espiritu jeē cūu seña jeē ñin quiví te níhin yó ndíhi tahú yó. Chí yóhoyo ndóho yó jnúndóho, te ndetū yó jéē náquihin sēhe ya yohó te jnama ya yiqui cūñu yó jeē tuá

ndoho yó jíin. <sup>24</sup> Chi ní jnama ya yohó síquĩ jeé ñúhun ní yó jeé súcuan coo. Te núu je ní sáha ya nájnúhun ñúhun ní yó, yúcuán na te tuá ñúhun ní yó jeé sáha ya súcuan jíin yó. Chi tuá ndétu yó te núu je ní cuu súcuan. <sup>25</sup> Te núu ná tu coto yó jée sáha ya jeé ñúhun ní yó, yúcuán na te jíin paciencia ndétu yó jée sáha ya.

<sup>26</sup> Te suni súcuan máa Espíritu chindéé ñáhán yá yohó jée tú na fuerza ini yó. Chi tu jíin yó cacán tahu yó nájnúhun cánuú. Te máa Espíritu cahán ndahú yá jíin Yaá Dios jehé yó síquĩ táca jée jíitú ndasí ní yó te tu níhín yó jnúhun ndese cacán tahu yó. <sup>27</sup> Te máa Yaá Dios jeé jíto ndee anuá yó, chi jíin yá táca jée cuní máa Espíritu cahán yá jehé yó. Chi ñayuu cáyihí ndaha Yaá Dios, cahán ndahú Espíritu jehé i nájnúhun cuní Yaá Dios.

#### *Váha-ni cúndeyí yó síquĩ ndihí jeneé*

<sup>28</sup> Te jíin yó jeé táca-ní jeé quíji nuú ñayuu maní jíin Yaá Dios, jeé váha chí jée uhú, chí quéndoo váha ga i nuú yá, sáha ya jíin táca jée yúcuán. Chí cácuu i ñayuu jeé ní cana ya i ní quívicoo i ndaha ya síquĩ jeé súcuan ní tee ní yá nde jenahán. <sup>29</sup> Chí nde ná tu coo i te je jíin yá i, te je ní jeni ya i jeé ndoo ndaá nduu anuá i ndacu i máa Séhe ya, návaha na cúu Séhe ya ñani jéhu nuú cuehé ñayuu cácuu ñani cácandije. <sup>30</sup> Te jeé ní jeni ya i, te suni ní cana ya i. Te jeé ní cana ya i, te suni ní ndahva yá cuéchi i. Te jeé ní ndahva yá cuéchi i, te suni ní sáha ya jeé cujéhu i.

<sup>31</sup> ¿Te ndese ga cahán yó síquĩ jnúhun jéhu yáha núu súcuan? Chí núu íne Yaá Dios jíin yó, ¿te ndé ñin cuu cahán síquĩ yó? Tú ní ñin. <sup>32</sup> Chí máa yá tu ní jnama ya Séhe ya jeé ma cúu yá, chí sa suhva ní jéhe ya Séhe ya ní jíin yá jehé ndihí yó. Te núu súcuan ní jéhe ya Séhe ya, te nagá ní cuu jeé ma cuáha ya táca gá jeé jíin ñúhún yó. <sup>33</sup> ¿Te ndé ñin cuu cahán cuéchi síquĩ ñayuu jeé ní nacáji Yaá Dios? Tú ní ñin. Chí máa yá ní ndahva yá cuéchi i. <sup>34</sup> ¿Te ndé ñin cuu ndenehen cuéchi síquĩ yó núu súcuan? Tú ní ñin. Chí máa Cristo cúu jeé ní jíin yá jehé yó, te suni ní natecu yá. Te vijna te ndéé yá lado váha Yaá Dios nuú cujéhu ya, te cahán ndahú yá jíin Yaá Dios jehé yó. <sup>35</sup> ¿Te ndé ñin cuu quenehen yóhó núu jnúhun cundáhú ní Cristo yohó? ¿A jnúndóho, chí táca jée yí sáha, chí jée cájito xéen ñayuu yohó, chí jnama, chí jée cúmani sahma, chí jnúhun yúhú, chí jée cáhni i yóhó naún? Ní ñin táca jée yáha. <sup>36</sup> Chí súcuan yósó núu tútu íi jeé cácahán ñayuu cácandije jíin Yaá Dios:

Jeé síquĩ máa ní te ndihí-ni hora cácuu i cahni i sáña.

Te casáha i jíin ná nájnúhun casáha i jíin lanchi, quiti cúu.

Achí tutu. <sup>37</sup> Te tuú chí vésú cándoho yó táca jée yáha, te váha-ni cúndeyí yó síquĩ

ndihí-ni, sáha máa Yaá jeé ní cundáhú ní yohó. <sup>38</sup> Jeé yúcuán cúcáhuu ní rí jeé tú ní ñin cuu quenehen yóhó núu jnúhun cundáhú ní Yaá Dios yohó. Ní núu cuu yó, ní núu cotecu yó, ní táca ndajehé andiví, ní táca jée neé jée cácujehuu jnú poder, ní jeé iyó vijna, ní jeé cóo, <sup>39</sup> ní jeé iyó núu súcún, ní jeé iyó núu cúnú, ní táca gá jeé ní jecóo, ma cúu cuiti quenehen yóhó núu Yaá Dios, jeé jíin Jítho yó Cristo Jesús ní cundáhú ní yá yohó.

#### *Siquĩ ndese ní nacáji ya yucún Israel*

## 9

<sup>1</sup> Te cahán ndaá rí chí cúu rí tée cándije Cristo, te tu stáhú rí, te jíin rí ini anuá rí jeé cahán ndaá rí sáha Espíritu Santo. <sup>2</sup> Yóhyo cúculhyá ní rí, te níin jnáhuu ní anuá rí <sup>3</sup> jeé síquĩ táca jnáhan rí ñayuu nación hebreo, chí ñin-ni yucún rí jíin náhan rí. Chí jeé síquĩ máa i te cúu ní rí jeé núu na cúu te cujiyo rí nuú Cristo te jnahú ndetú rí, návaha jíin yúcuán te cuu cácu anuá máa i núu. <sup>4</sup> Chí cácuu i yucún ñayuu Israel, te nde jenahán ní sáha Yaá Dios jeé cúu i séhe ya, te méhhu vícō jeé ndíndéé ní condee yá jíin i sáa. Te jíin máa i ní sáha ya táca contrato, te ní jéhe ya ley yá nuú Moisés jeé cúu máa i, te ní steén yá ndese chíñúhún i ya ini templo, te nuú máa i ní jéjnúhun ya cuehé jnúhun. <sup>5</sup> Te máa i cácuu yucún táca jíi yó jeé ní cacujéhuu, te suni yucún máa i ní cacu Cristo jeé ní nduu ya tée. Te máa yá cúu Yaá Dios jeé jnú ndihí-ni, te ní cáni cahán ñayuu jeé cujéhuu ya. Amén.

<sup>6</sup> Te nasūu jée tu ní quee ndaá táca jnúhun jeé ní jéjnúhun Yaá Dios nuú ñayuu Israel. Chí ní quee ndaá nahín núu vésú jecu-ni i, chí tú ndihí-ni yucún Israel cúu jeé cácandije. <sup>7</sup> Chí nasūu ndihí yucún Abraham cácuu ndije séhe de jeé ní jéjnúhun ya. Chí ní cahán Yaá Dios jíin de: Nuú maá-ni séhe ró Isaac cúu nuú coo yucún ró jeé ní jéjnúhun rí nuú ró. <sup>8</sup> Te jnúhun yáha cúní cahán jeé ní ñin ñayuu tu cúu i séhe Yaá Dios síquĩ jeé ní cacu i ñin yucún jeé jéni ní i jeé váha ga cúu. Chí sa suhva máni yucún jeé ní jéjnúhun ya cúu ndije yucún jeé chíhi ya cuenta. <sup>9</sup> Chí yáha cúu jnúhun jeé ní jéjnúhun ya nuú Abraham: Máa tiempo jeé ní jeni rí te quiji rí, te cacu ñin séhe yí ñasíhí ró Sara, achí yá.

<sup>10</sup> Te nasūu máa yáha-ni, chí suni Rebeca ní cacu uú séhe yí ña, te ñin-ni tátá ndíndúu i, jeé ní cuu jíi yó Isaac. <sup>11-13</sup> Te nde ná tu cacu ndíndúu i, te ná tu sáha ní jeé váha jee uhú, te je ní cahán yá jíin Rebeca: Sūchi ní cacu xíhna gá cuajníñu i nuú sūchi cándíhí, achí yá. Chí suni súcuan cáhán tutu íi: Ní jito maní rí Jacob, te Esaú chí tuú, achí Yaá Dios. Te súcuan jíin yó jeé máa Yaá Dios cuu nacáji ya ñayuu núu ndese tée ní máa yá, te nasūu síquĩ jníñu jeé sáha i, chí sa suhva síquĩ ndese cúní máa yá nacáji ya i.

<sup>14</sup> ¿Ndese cahān yō núu súcuan? ¿A jéé tu íyó ndāā Yaā Dios jeē sāha ya súcuan, chí naún? Tú cuiti. <sup>15</sup> Chi nde jenahán ní cahān yā jíin Moisés: Ndé-ni cúu jeē cuní rī cundáhú ni rī, te cundáhú ni rī. Te ndé-ni cúu jeē cuní rī sāha rī jeē vāha jíin, te sāha rī jíin, áchí yā. <sup>16</sup> Núu súcuan te nasūu síquī jeē cuní maá ñáyu, ni nasūu jeē nducú ndéyí maá i cúu, chí síquī ndese cuní maá yā cundáhú ni yā i. <sup>17</sup> Chi suni súcuan yósó núu tútu íi jeē ní cahān yā jíin rey ñuu Egipto: Ni jeni rī rohó jéé cúu ró rey, návāha jíin rohó te stéén rī poder rī, te návāha cuité núu síhví rí ní ñáyví, áchí yā. <sup>18</sup> Núu súcuan te núu ndé ñi cuní yā cundáhú ni yā, te cundáhú ni yā. Te núu ndé ñi cuní yā jeē cuníhni ní, te sāha ya jeé cuníhni ní.

<sup>19</sup> Te sanaa te cahān ñi ró jíin rí: Núu súcuan cúu ¿te najehē cahán gā yā jeē cuēchi sāha yó? Chí ma cúu casi yō nuú yā jeē ndese cuní maá yā sāha ya. Achí rō. <sup>20</sup> Te sa suhva cáhán rī jíin ró: Róhó, ¿nde ñi cúu ró jéé jení ní ró stió cuñí rō nuú Yaā Dios? ¿A cuu cahān quísi ñuhun jíin téé ní sāha: Najehē ní sāha ró rúhú súcuan? achí. <sup>21</sup> Chi tēe sāha quísi, cuu sāha de ndese cuní maá de, chí ñi-ni ñuhun cuu sāha de ñi quísi fino te inga quísi corriente.

<sup>22</sup> ¿Te á tu jétáhú ró jeē suni súcuan sāha Yaā Dios jíin ñáyu? Chí cuní yā steén yā ndese sāha ya juicio síquī ñáyu, te súcuan te cuní i poder yā. Te vésú súcuan te ní íyo paciencia ni yā jeé tu ní ndóna yachí yā síquī ñáyu jeē ñahnú ndetú. <sup>23</sup> Te sāha ya súcuan návāha stéén yā ndese yóhyo luu cújéhu ya síquī jniñu sāha ya jíin yóhó ñáyu cundáhú ni yā. Chí nde jenahán je ní sátúhva ya yohó jéé luu cújéhu yó jíin yā. <sup>24</sup> Chí ní cana ya yohó jéé candíje yó, te sava yó cúu ñáyu hebreo te sava yó cúu ñáyu táca gá nación. <sup>25</sup> Chi suni súcuan ní cahān yā, yósó núu tútu Oseas:

Ñáyu jeé tu ní cúu ñáyu maá rí, vijna te cahān rī jeé cácuu i ñáyu maá rí.

Te ñáyu jeé tu ní íyo maní rī jíin, vijna te cahān rī jeé cácuu i ñáyu jeé maní rī jíin.

<sup>26</sup> Te maá lugar nuú ní cahān rī jeé násūu ñáyu rī cácuu i, suu yúcuan cáhán ñáyu jeé cácuu i sēhe Yaā Dios, Yaā técu ní cáni.

Achí yā. <sup>27</sup> Te Isaías sa suhva ní cahān de jñuhun ñáyu Israel: Vésú ní cayā yucūn Israel nájñuhun ñiti yumar, te jecu-ni i jnama ya. <sup>28</sup> Chí Jitoho yō Yaā Dios, yachí sínu ya jniñu jeé sándaā yā cuēchi ñáyu ñáyví. Achí tutu. <sup>29</sup> Chí nájñuhun ní cahān tucu Isaías:

Maá Yáa cúu Jitoho nuú táca ndajéhé andiví, núu tu ní jnama ya jecu yucūn yō nuú, te je ní ndoho yó nájñuhun ñáyu ñuu Sodoma jíin ñuu Gomorra, jeé ní naa ndíhi.

Achí tutu.

*Jeé tu cájetáhú ñáyu hebreo jñuhun jnama ya i*

<sup>30</sup> ¿Ndese cahān yō núu súcuan? Suu jeé ñáyu táca gá nación, vésú tu ní cánducú i quendóo ndāā i nuú Yaā Dios, te ní ndahva yā cuēchi i. Chí síquī jeé ní candíje i jeé ní jíin Cristo jehé i cúu jeé ní ndahva yā cuēchi i. <sup>31</sup> Te sa suhva ñáyu Israel, vésú cánducú i quendóo ndāā i nuú Yaā Dios sāha ley yā, te tu cundeyí i quendóo ndāā i. <sup>32</sup> ¿Te najehē? Síquī jeé tu cánducú i jeé ndahva yā cuēchi i jeé candíje i jeé ní jíin Cristo jehé i, chí sa jení ní i jeé squícu maá i ley te quendóo ndāā i. Te jeé stívi i súcuan cúu nájñuhun cácotúu i síquī maá yūu jeé cácachihí jehé, te suu cúu Cristo. <sup>33</sup> Chí súcuan cáhán nuú tútu íi:

Nde ñuu rī Sion sāha rī jeé cóne maá Yaā jeé cúu nájñuhun yūu jeé cácachihí i jehé i.

Te cúu ya nájñuhun toto jeé cotúu i sāha.

Te sa suhva ñáyu cándíje Yaā ún, chí jnama nahín yā i.

Achí Yaā Dios.

## 10

<sup>1</sup> Hermano jijnáhan ró, cúu ndasí ní rī te jícan tahú rī nuú Yaā Dios jehé ñáyu nación rī Israel, jeé na jnama ya i jíjñahan i. <sup>2</sup> Chí cáhán rī jeé vāha cásaha i jeé ndíhví ní i cáchíñúhún i Yaā Dios. Te vésú súcuan te cáchíñúhún cáhá i. <sup>3</sup> Chí tu cájecūhun ní i ndese ndáhva Yaā Dios cuēchi ñáyu, te ndúcu i quendóo ndāā i maá-ni jeé squícu i ley. Te tu cájetáhú i maá modo jeé ndáhva Yaā Dios cuēchi i. <sup>4</sup> Chí síquī jeé ní sāha Cristo te cuu quenda ñáyu chíjī ley Moisés. Te ndáhva Yaā Dios cuēchi táca ñáyu jeé candíje i jeé ní sāha Cristo jehé i.

<sup>5</sup> Chí súcuan ní tee Moisés jñuhun ñáyu jeé cánducú quendóo ndāā jíin ley: Núu ñi ñáyu cuu squícu i táca jniñu ndácu ley, te cotecu i núu, áchí. <sup>6</sup> Te jñuhun jeé ndáhva Yaā Dios cuēchi ñáyu síquī jeé candíje i jeé sāha ya jehé i, chí sa suhva cáhán: Ma cáni ní rō jeé jíni ñúhún caa ró andiví nasnúu ró Cristo jeé ndahva yā cuēchi ró. <sup>7</sup> Ní ma cáni ní rō jeé jíni ñúhún cuun ró ndé nuú cúnú ndonehen ró Cristo méhñu ndíyí, nájñuhun jeé tu ní nátecu yā. <sup>8</sup> ¿Te ndese cáhán jñuhun un núu súcuan? Yajni íyó jñuhun ya jíin ró, chí ñúhún ñi yuhu ró jíin ñi anuá ró, achí tutu. Te suu cúu jñuhun jeé na candíje yó jéé jéé jnama ya yohó. Te jñuhun yáha cúu jeé cácanani rí. <sup>9</sup> Chí núu cahān ró jeé Jitoho ró cúu Jesús, te núu candíje ró jíin ñi jíin ánuá ró jeé ní nátecu yā méhñu ndíyí ní sāha Yaā Dios, yúcuan na te jnama ya rohó. <sup>10</sup> Chí jíin ñi jíin ánuá yó candíje yó jéé ní jíin yā jehé yó, te súcuan te ndáhva Yaā Dios cuēchi yó. Te jeé cahān yó jeé Jitoho yó cúu Jesucristo, te súcuan te jnama ya yohó.

<sup>11</sup> Chi cáhán tutu i: Táca ñayuu jeē candíje i ya, chi jnama nahín yá i, áchí. <sup>12</sup> Chi inuú-ni cúu ñayuu hebreo jíin táca gá ñayuu, chi máá yá cúu Jitoho nuú ndihí yó, te cuehē jeē váha sáha ya jíin ñayuu cácahán ndahú jíin yá. <sup>13</sup> Chi súcuan cáhán jnūhun ya: Ndihi ñayuu cácahán ndahú jíin máá Jitoho yó, chi jnama ya i, áchí. <sup>14</sup> ¿Te ndese cahán ndahú i jíin yá te núu tu ní cándíje i jeē jnama ya i? ¿Te ndese candíje i te núu tu ní jíni sōho i jnūhun ya? ¿Te ndese cuni sōho i te núu tú na ñayuu nacani jnūhun nuú i? <sup>15</sup> ¿Te ndese nacani ñayuu jnūhun ya te núu jeē tu táji yá i quihín i? Chi nájnūhun cáhán tutu i: Yōhoyó luu jniñu cásaáha ñayuu cájica jíin jnūhun ndeyí sñ ní jeē cáncani i jnūhun váha ya, achí.

<sup>16</sup> Te nasúu ndihí i jétáhu nuú jnūhun jnama ya i. Chi ní cahán Isaiás nde jenahán: Tátá Yaa Dios, ¿ndé ñayuu ní candíje jnūhun jeē cáncani ná ví? áchí de. <sup>17</sup> Núu súcuan te núu cuni nahín ñayuu te cuu candíje i. Te jnūhun cuni nahín i cúu jnūhun Cristo.

<sup>18</sup> Te cájnūhun rí: ¿A tu ní cájini sōho i jnūhun un núu súcuan? Tuú chi ní cajini sōho i, chi cáhán tutu i: Ní ñáyivi ní cajini sōho ñayuu jnūhun jeē ní canacani de.

Te nde nuú jicá gá táca lado ní jinú jnūhun ún.

Achí tutu. <sup>19</sup> Te suni cájnūhun rí: ¿A tu ní cájécūhun ní ñayuu Israel jnūhun ún? Tuú chi ní cájécūhun ní i, te tu ní cájjetáhu i. Chi xihna gá Moisés ní cachi de jeē ní cahán Yaa Dios: Cucuíñí ró jijnáhan ró, chi cuáha ri jnūhun ri nuú inga ñayuu jeē násúu iin nacióon cúu.

Te quiví ní rō coto ró jeē cuáha ri jnūhun ri nuú iin nacióon jeē tu jécūhun ní.

<sup>20</sup> Te suni Isaiás ní chundeyí ní de ní cachi cáji de jeē ní cahán Yaa Dios: Ñayuu jeē tu ní cáncanducú rúhū, ní cajini i rúhū.

Te nuú ñayuu jeē tu ní cácajnūhún, ní steén ri nuú i ndese Yaa cúu ri.

<sup>21</sup> Te siquí ñayuu Israel sa ní cahán de jeē ní cáhán yá: Ndiquíví ní cana ri i jeē quívicoo i nuú rí, te tu ní cácuni i, chi ñayuu niñni ní, ñayuu jéé ní cácuu i. Achí yá, achí Isaiás.

*Jeé iyó jecu na ñayuu Israel jeé jnáma ya*

## 11

<sup>1</sup> Núu súcuan te cájnūhun rí: ¿A ní stóo Yaa Dios ñayuu maá yá Israel, chí naún? Tú cuiti. Chi ruhū suni tēe Israel cúu ri, te yucūn Abraham cúu ri, te Benjamín cúu jíi rí jenahán. <sup>2</sup> Tu ní stóo Yaa Dios ñayuu maá yá, chí je ní nacáji ya i nde jenahán. ¿A tu cájini rō ndese cáhán tutu i jnūhun Elías, tēe ní nacani jnūhun ya jenahán? Chi náa jicán tahú de, te ní cahán de siquí ñayuu Israel: <sup>3</sup> Tátá Yaa Dios, ní cajehni i táca tēe cáncani

jnūhun ní, te ní cajenu i táca altar ní. Te máñúhún na sáña ní quendóo, te vijna suni cácuni i cahni i sáña, áchí de. <sup>4</sup> Te Yaa Dios ní nastió cuíñí yá: Iyó nahín úxá mil ñayuu cácaandíje ruhū jeē tu ní cájecuñí yití i nuú ídolo naní Baal, achí yá. <sup>5</sup> Te suni súcuan vijna, chí iyó jecu na ñayuu jeē ní nacáji ya siquí jeē váha ní yá jíin i. <sup>6</sup> Te núu ní nacáji ya i siquí jeē váha ní yá jíin i, te nasúu siquí jeē ní sáha i jniñu váha cúu. Chi núu siquí jeē ní sáha i jniñu váha cúu, yūcuán na te nasúu siquí jeē váha ní yá cúu.

<sup>7</sup> ¿Te ndese cúu núu súcuan? Cúu jeē ñayuu Israel tu ní cundeyí i quendóo ndaá i nájnūhun ní canducú i. Te sava i jeē ní nacáji ya, chí máá i ní ndahva yá cuéchi i. Te sava ga i ní ndunihni ní i, <sup>8</sup> nájnūhun cáhán tutu i: Ní sáha Yaa Dios jeē tu jécūhun cuiti ní i siquí yá, ní tu jíni i jíin tñúu i, ní tu jíni nahín i jnūhun ya, te súcuan cúu nde vijna. Achí tutu. <sup>9</sup> Te suni ní cahán David:

Vico jeē casáha i, na cóo nájnūhun iin trampa chí iin xeyū, náváha nihín i castigo xeén siquí jeē castívi i casáha i cuéchi.

<sup>10</sup> Te ánuá i na ndúnee, nájnūhun jeé tuá cúu coto i, te na jécostáhi jnūndóho siquí i ní cáni. Achí tutu.

*Siquí jeé jnáma ya ñayuu táca gá nacióon*

<sup>11</sup> Núu súcuan te cájnūhun rí: ¿A tuá cúu cuiti ndívi ñayuu Israel nuú Yaa Dios jeé súcuan ní castívi i? Tú cuiti. Chi sa suhva jeé ní cacunihni ní i, te sa ñayuu táca gá nacióon ní canihín tahú máá i jnūhun jeé jnáma ya i. Te yūcuan sáha tucu jeé ñayuu Israel condihví ní i jeé suni candíje máá i. <sup>12</sup> Chi jeé ní castívi i, te sa ñayuu ní cáhnu ñáyivi ní canihín máá i jnūhun ya. Te jeé ní cajica yátá i, suu ní sáha jeé ní canihín ñayuu táca nacióon jnūhun ya. Núu súcuan te quíví jeé ndívicoo tucu ndihí ñayuu Israel ndaha ya, te ñayuu ñáyivi víhyá gá quendóo ndetú i sáha ún.

<sup>13</sup> Te vijna te cáhán rí jíin róhó ñayuu táca nacióon jeé tu ní jíni jnūhun ya. Chí ní táji Yaa Dios ruhū jeé scáca ri jnūhun nuú rohó ñayuu táca nacióon. Te ndúcú rí jeé na cuájñúhún ró jijnáhan ró jniñu sáha ri jeé nácani ri jnūhun ya. <sup>14</sup> Chi cúní rí jeé jíin yūcuan te nacani ní sava jnáhan ri ñayuu Israel jeé suni candíje máá i, te jnama ya i. <sup>15</sup> Chi jeé ní stóo ya ñayuu Israel, jeé yūcuan cúu jeé sa ñayuu ñáyivi ní sáha ya jeé ndívicoo i nuú jnūhun maní yá jíin i. Núu súcuan te quíví naquihín tucu ya ñayuu Israel, quíví ún suni váha ndasí sáha ya jíin ñayuu ní cáhnu ñáyivi. Chi coo nájnūhun jeé natecu i jeé cúu i nájnūhun ndívi. <sup>16</sup> Te ñayuu Israel cáscó i nuú Yaa Dios pan jeé quénda xihna gá nuú ñujen, te súcuan steén i jeé ndihí un cúu cuenta yá. Te iin yujnu, núu yhi jeé

cuenta yā cúu, te suu cúu nde yoho jíin ndé ndihi ndaha. Te suni súcuan ñayuu Israel, yñhi cuenta i nuū yā, siquī jeē jíi i xihna ñhūn, ni quivícoo de ndaha ya.

<sup>17</sup> Chi ñayuu Israel cácuu i nájñuhun ndayújnu olivo váha, te sava ndaha un ní quendē. Te rōhó ñáyuu táca nación jeē tu jíin jñuhun ya, cácuu ró nájñuhun ndayújnu olivo yucú, te ni nachuhun ya rohó núu ní quendē ñayuu cácuu ndayújnu váha ún. Te nájñuhun inuú-ni cástaa ró ndúxi jíin cajin jeē véji nde yoho yújnu ún. <sup>18</sup> Núu súcuan te ma sáha téyi ró maá ró nuū ñáyuu Israel jeē cácuu nájñuhun ndayújnu jeē ní quendē. Ma cutéyi ró, chi nucūhun ni rō jeē násúu jéé yohó stáa cajin nuū maá ró, chi sa maá ró stáa cajin jeē véji nde yoho.

<sup>19</sup> Te sanaa te cahān rō: Tú chi sava ndaha ni quendē návāha nachuhun ya ruhū nuū ní quendē ún, achi rō. <sup>20</sup> Ndaā, te ni quendē i siquī jeē tu ní cácandje i Cristo. Te rōhó chi máni siquī jeē cácandje ró, jeē yúcuan cúu jeē ni quivícoo ró lugar i. Te ma sándúxi ró maá ró núu súcuan, chí sa suhva conso iyo ró núu Yaa Dios. <sup>21</sup> Chi tu ní íne cáhnu ni yā nuū maá ndaha jeē chñiñu, te suni súcuan ma cóne cáhnu ni yā nuū ró jíinánhan ró te núu stívi ró. <sup>22</sup> Núu súcuan te sáha váha ro cuenta ndese váha ni Yaa Dios jíin ndese xeēn ni yā. Chi ni nduxeēn ni yā jíin ñayuu hebreo jeē ní castívi ún, te sa cundáhu ni yā rohó. Te cánuú cuiñi nihin ro jíin jñuhun jeē váha ni yā jíin ró. Chi núu tuú, te suni quende ya rohó. <sup>23</sup> Te maá i, núu candíje tucu i, te nucóndee tucu i, chí maá Yaa Dios cuu nachuhun tucu ya i. <sup>24</sup> Núu súcuan te rōhó ñáyuu táca nación jeē tu ní jíin jñuhun ya, ní quendē ró xiní yújnu olivo yucú, te ni nachuhun ya rohó xiní yujnu olivo váha, vésú nasúu ndaha maá yujnu un cácuu ró. Te nagā ni cuu ñayuu hebreo jeē ma náchuhun ya i nuū ní quendē i, chí cácuu i maá ndayújnu váha ún.

*ñin quiví te jnama ya ndihi ñayuu nación Israel*

<sup>25</sup> Hermano, cúni rī jeē na jécūhun ni rō jíinánhan ró ndese iyó jñuhun yáha jéé ní yisáhi, návāha ma cutéyi ró caní ni rō jeē ndichí xiní maá ró: Chi sava ñayuu Israel ni ndunihni ni i, te súcuan coo maá-ni nde quiví jínu candíje ñayuu táca nación jeē tu jíin jñuhun ya. <sup>26</sup> Te sáa te jnama ya ndihi ñayuu nación Israel, chí cáhán tutu íi:

Ichi ñuu rī Sión quiji Yaa jnama ñayuu, te sáha ya jeē tuá coo cuēchi nuū táca yúcūn Jacob.

<sup>27</sup> Te yáha cúu contrato jeē sándaā rī jíin i, quiví jeé quénde ri cuēchi i jíinánhan i, áchi Yaa Dios.

Achí tutu.

<sup>28</sup> Chi ñayuu hebreo un ní nduu i nájñuhun enemigo Yaa Dios siquī jeē tu ní cácandje i

jñuhun jnama ya i. Te jeé yúcuan te cuu cuité núu jñuhun un núu táca rōhó. Te vésú súcuan te siquī jeē ní nacāji ya táca jíi i jenahán, te cundáhu gá ni yā i jeē ma stóo ya i ní cáni. <sup>29</sup> Chi tu nácani yátá ni yā jeé cána ya ñayuu jíin jéé jéhe ya tahū i. <sup>30</sup> Te rōhó jíinánhan ró, suni ní cahíyo nihni ni rō nuū Yaa Dios nde saá. Te vijna jeē ní cacunihni ni maá ñayuu hebreo, te cundáhu ni yā rohó. <sup>31</sup> Te suni súcuan maá i, chí vésú cácuñihni ni i vijna, te cundáhu tucu ni yā i, nájñuhun cundáhu ni yā maá ró jíinánhan ró. <sup>32</sup> Chi Yaa Dios ni sáha ya jeē ní quendōo ndivii ñayuu chíji jñuhun cunihni ni i, návāha suni cuu cundáhu ni yā ndivii i.

<sup>33</sup> Núu súcuan te náhán náa ni yō jeé yóhoyo cuehē jñuhun ndichí iyó jíin Yaa Dios, te ndihi cuiti jíin yā. Te ni ma cúu cuiti castúhun yó ndese téé ni yā sáha ya táca-ni, te ma cánda cuiti yó jecūhun ni yó ndese cúu táca jéé sáha máa yá. <sup>34</sup> Chi cáhán tutu íi: ¿Ndé ñin ni jecūhun ni ndese jéni ni maá Jitoho yó? ¿Chí ndé ñin ni steén nuū yā? <sup>35</sup> ¿Ndé ñin ni jéhe xihna gá nuū maá yá, návāha nachunaa yā nuū i? <sup>36</sup> Chi nde nuū maá yá véji táca jéé iyó, te maá yá ni sáha ndihi, te jeé cúu maá yá cúu. Te na cáhán yō jeé yóhoyo luu cújéhnu Yaa Dios ní cáni. Amén.

*Jeē na cóo ndoo ánuá yō cuajñiñu yó núu Yaa Dios*

## 12

<sup>1</sup> Núu súcuan te cáhán ndahú rí jíin ró jíinánhan ró, hermano, jeé siquī jeé cundáhu ni Yaa Dios yohó. Na sóco ró maá ró nuū yā, coo ndoo coo íi ró cuajñiñu ró nuū yā, nájñuhun cúsiñ ni yā. Chí yáha cúu jeé chíñuhún ró yā nde jíin íni jíin ánuá ró. <sup>2</sup> Te ma cáca ró jíin táca modo casáha ñayuu ñayvii yáha, chí sa na sáma ró modo caní ni rō, te ndujeé jéé níjñuní ró. Te súcuan te cuu nacāji ró ndé-ni cúu jeé váha jeé nujnahan ni Yaa Dios, jeé cúsiñ ni yā, jíin jéé íje ni rō jíin jñuhun ya.

<sup>3</sup> Te siquī jeé váha ni yā ni jéhe ya jñiñu nácani rí jñuhun ya, jeé yúcuan cáhán rí jíin ndihi ró jéé ma cáni ni rō jeé váha ga ñayuu cúu ró núu cūhva jeé iyó ró. Chí ná ñin ná ñin ró na cáni ndaā ni rō siquī maá ró, te ma scáa ga ró caní ni rō jeé váha ga ñayuu cúu ró vésú nuū cūhva jeé ní jéhe Yaa Dios fuerza íni ró candíje ró. <sup>4</sup> Chí cácuu yó nájñuhun ñin yiqui cúñu jeé iyó cuéhe parte, te sáin sáin jéñiñu ñin ñin. <sup>5</sup> Chí vésú iyó cuéhe yó, te nájñuhun ñin-ni yiqui cúñu cúu yó jéé yñhi yó ndaha Cristo, chí ñin-ni ni nduu yó jíinánhan yó.

<sup>6</sup> Te sáin sáin tahū ni jéhe Yaa Dios nuū yó jeé cuajñiñu yó núu yā, núu ndese ni nujnahan ni yā ni jéhe ya nuū ñin ñin yó. Núu súcuan te na cuajñiñu váha yó jíin táhū ún. Núu ni nihin yó tahū jeé nácani yó jñuhun ya, te cánuú sáha yó ndé maá cūhva ni jéhe ya cándje yó. <sup>7</sup> Te núu ni nihin yó



tahū jeē chindéé ñáhan yó jnahan yó, te na sáha yúcun yó. Te núu ni nihñ yó tahū jeē steén yó, te na cóndihvī ni yó steén yó. <sup>8</sup> Te ñayuu jeē stihvī ni inga ñayuu, suni na sáha yúcun i. Te ñayuu jéhe nuū jnahan, na cuáha i sícuan-ni. Te ñayuu ndiso jniñu, na ndácu vāha i jniñu. Te ñayuu jito ndáhū ñayuu ndahú, na cúsh ni i sáha i.

*Ndese cánuú squícu ñayuu cácanđije*

<sup>9</sup> Te na cundáhú ndije ni rō jnahan rō, nasūu máa jéē cahán-ni rō. Te coto uhū rō jniñu néé, te condiquñ rō jniñu vāha. <sup>10</sup> Te cánuú coo manī rō jín jnahan rō nájñuhun jéē manī rō jín ñani rō. Te nducú rō jeē quéndōo yíñuhún gá jnahan rō vesú maá rō.

<sup>11</sup> Te ma cucúxí rō jín jniñu cásaah rō. Chi jín ini jín ánuá rō condihvī ni rō cuajniñu rō nuū máa jítoho yó.

<sup>12</sup> Te na cúsh ni rō jeē cáñuhun ni rō táca jéē vāha jeē cóo. Te na cuándeýi ni rō núu ndóho rō jñndóho. Te níni na cácan tahú rō.

<sup>13</sup> Te coto ndáhú rō ñayuu cácanđije núu cúmani nuū i. Te cuáha núu rō vehe nuū ñayuu cájica.

<sup>14</sup> Te cacān tahú rō jehē ñayuu cájito xeēn rohó. Ma cahán ndevāha ro síquī i, chí sa cacān tahú rō jehē i.

<sup>15</sup> Te núu cúsh ni ñayuu, te suni na cúsh ni rō jín i. Te núu cucúhyá ni ñayuu, te suni na cucúhyá ni rō jín i.

<sup>16</sup> Na cóo inuú ni rō jín táca jnahan rō. Te ma cundúxí rō, chí sa quijnahan rō jín ñayuu núu ga. Ma cáni ni rō jeē ndichí xini rō.

<sup>17</sup> Te ma nasáha ndevāha rō jín ni ñin ñayuu, núu ni sáha ndevāha i jín rō. Na cóndihvī ni rō sáha rō jniñu vāha, jito jínú táca ñayuu. <sup>18</sup> Te na cóndihvī ni rō coyūcu máni rō jín táca ñayuu, vesú ndese cándāa máa i. <sup>19</sup> Nāni máni jijnahan rō, ma nácuāha rō jéē ndútahū ñayuu casáha ndevāha jín rō, chí sa cuáha rō jñuhun jeē máa Yaā Dios cuāha ya castigo i. Chí cahán tutu i: Máa rí cuāha castigo i, máa rí nacuāha yāhu i, áchí jítoho yó. <sup>20</sup> Te suni cahán tutu: Tēe jito uhū rohó, núu jí de sóco, te cuāha rō jéē cáji de. Te núu jichí de, te cuāha rō jéē cóho de. Chí núu sáha rō sícuan, te cucanu de te nacani uhū ni de jeē ni jito uhū de rohó. <sup>21</sup> Ma cuáha rō jñuhun jeē cundeyí jniñu néé jín rō, chí sa jniñu vāha na sáha rō návāha ndahvā jniñu néé.

## 13

<sup>1</sup> Táca ñayuu na cuátahú i nuū tohó cándiso jniñu ñuu. Chí ma cóo tēe cándiso jniñu te núu tu ní sáha máa Yaā Dios. Te tēe cándiso jniñu chí Yaā Dios ni tee jniñu síquī de. <sup>2</sup> Te ñayuu jeē tu jétahú nuū tēe cándiso jniñu, núu sícuan te cunihni ni i nuū jeē ní jeni Yaā Dios. Te ñayuu jeē cunihni ni, chí cuéchi sáha i, te nihñ i castigo. <sup>3</sup> Chí táca

tēe ndiso jniñu, nasūu jéē ndiso jniñu de jeē yūhú ñayuu casáha jniñu vāha, chí sa jeē yūhú ñayuu casáha jniñu néé. Te núu cúni rō jeē ma cúxeēn tēe cándiso jniñu nuū rō, na sáha rō jniñu vāha núu sícuan. Yūcuán na te cuajnúhún de rohó. <sup>4</sup> Chí jéjniñu Yaā Dios de jijnahan de, návāha coyūcu vāha rō jijnahan rō. Te núu sáha rō jniñu néé, te sa yūhu rō, chí nasūu cáha-ni cúu jeē cándiso jniñu de stóho de ñayuu. Chí jéjniñu Yaā Dios de, návāha cuāha de castigo ñayuu casáha jniñu néé. <sup>5</sup> Jeē yúcuan cánuú jéē cuatáhú rō nuū tēe cándiso jniñu, te nasūu máni jeē ma nihñ rō castigo, chí suni jeē tú na cuéchi coo ánuá rō. <sup>6</sup> Te jeē yúcuan cúu jeē suni cájēhe rō xūhun nuū tēe cándiso jniñu cuu jniñu ñuu. Chí jéjniñu Yaā Dios de, te máni jniñu yúcuan casáha de.

<sup>7</sup> Te chunaa rō ndihi jeē cátaū rō nuū táca ñayuu. Cuāha rō xūhun ñuu nuū tēe stútú xūhun ñuu, te cuāha rō xūhun renta nuū tēe stútú renta. Te na cóo respeto rō nuū ñayuu cánuú coo respeto rō. Te na cóo yíñuhún rō nuū ñayuu cánuú coo yíñuhún rō. <sup>8</sup> Ma cótaū rō nuū ní ñin. Te íyó ñin jeē taū rō jeē ma tahndé cuiti, suu jeē ní cahán Yaā Dios jeē cundáhú ni rō jnahan rō. Chí ñayuu cundáhú ni jnahan, je ni squícu i ndihi jeē ndácu ley yā. <sup>9</sup> Chí sícuan ndácu ley jniñu: Ma cosíquí ndéé rō jnahan rō, ma cáhni rō ndiýi, ma sacuíhná rō, ma sajnúhún rō, ma ndiýo ni rō jeē névāha jnahan rō. Te táca jñuhun yāha jín táca gá jniñu ndácu ley, ndihi-ni yñi chíj jñuhun yāha: Cundáhú ni rō jnahan rō nájñuhun cundáhú ni rō máa rō, áchí tutu. <sup>10</sup> Te núu cundáhú ni yó jnahan yó, te tu sáha yó ni ñin jeē tu íyó vāha nuū i. Núu sícuan te jeē cundáhú ni yó jnahan yó, yúcuan cúu jeē squícu yó ní ley yā.

<sup>11</sup> Sícuan sáha rō jijnahan rō, chí sáha rō cuenta jeē cácuayajni quivī ndíji ya. Te ma cóo ga rō nájñuhun ñayuu quixi, jeē cúhuun ni rō. Chí vijna je ni cuyajni ga quivī jnáma ya yohó vesú quivī ní candíje yó jñuhun ya. <sup>12</sup> Chí nájñuhun je yajni yāha jecuáa, te cuacundijin quivī jnáma ya yohó. Núu sícuan te na stóo yó jniñu jeē ní sáha yó nuū néé, te na cúcutú yó jín táca jniñu ndaa jeē caca yó jín luz yā. <sup>13</sup> Na cáca yíñuhún yó nájñuhun cánuú caca yó jín luz yā. Ma nájini rō, ma sáha rō táca vico néé, ma cáca jnéni rō, ma sáha rō jniñu néé, ma cuajñahan rō, ma cucuéstún ni rō. <sup>14</sup> Chí sa suhva cuiñi cutú rō jín fuerza máa jítoho yó Jesucristo, jeē ma cuáha ga rō jñuhun sáha rō jniñu cúni modo neé máa rō.

*Ma cahán neé yó coto yó jnahan yó*

## 14

<sup>1</sup> Cuatáhú rō ñayuu jeē ná tu ije jín jñuhun ya, te ma tejñahan rō jín i síquī táca jñuhun jeē sáin jéni ni i jín máa rō. <sup>2</sup> Chí íyó ñayuu jeē

jéni ni i jeē cūu caji i ndinuū-ni. Te iyó ñayuu jeē ná tu ije jíin jnúhun ya, te cájeni ni i jeē tú vāha caji i cūñu, chí jeē ní casocó ñayuu nuū ídolo cūu. <sup>3</sup>Te rōhó tēe jeē yéji ndinuū-ni, ma cahán rō coto ró tēe jeē tu yéji ndinuū. Te rōhó tēe jeē tu yéji ndinuū, ma cahán rō coto ró tēe jeē yéji ndinuū. Chí Yaā Dios ni jetáhú yá tēe ún. <sup>4</sup>Te rōhó, ¿ndé iin cūu ró jēe cahán neé ró jito ró mozo Yaā Dios? Chí núu vāha chí neé sáha de, te máá yá cūu jeē sándaā jíin de, nasūu máá ró. Te tuú chí cuiñi vāha de, chí mozo máá Jitoho yō cūu de, te cuu sáha ya jeē ma stívi de.

<sup>5</sup>Te suni iyó ñayuu jeē jéni ni jeē íi gā iin quiví vésú inga quiví. Te inga ñayuu chí jéni ni i jeē inuū-ni cūu táca quiví. Te táca i na cúndaā vāha ni maá i siquí jeē jéni ni i. <sup>6</sup>Chí tēe jeē née íi quiví, chíñúhún de máá Jitoho yō jeē sáha de sūcuan. Te tēe jeē tu née íi quiví, suni chíñúhún de Jitoho yō jeē sáha de sūcuan. Te tēe jeē yéji ndinuū-ni, chíñúhún de máá Jitoho yō jeē sáha de sūcuan, chí nácuatáhú de nuū Yaā Dios. Te tēe jeē tu yéji ndinuū, suni chíñúhún de Jitoho yō jeē sáha de sūcuan, te suni nácuatáhú de nuū yā.

<sup>7</sup>Chí ni iin yó tu técu yō jeē vāha máá-ni yó, te ni iin yó tu jíhí yō jeē cuni máá yó. <sup>8</sup>Chí núu técu yō, te técu yō jeē cuajniñu yó núu máá Jitoho yō. Te núu cuu yō, te suni cuu yō siquí jeē cuni máá Jitoho yō. Núu sūcuan te núu jeē cótecu yō chí jēe cuu yō, te yíhi yó ndaha Jitoho yō. <sup>9</sup>Chí ni jihí Cristo te ni natecu yā, návāha cuu ya Jitoho nuū ñayuu ni jihí jíin ñayuu técu.

<sup>10</sup>Te rōhó, ¿naun jéni neé ni rō jito ró jnāhan ró núu sūcuan? ¿Te naun cújéé ni rō jito ró de? Chí táca yó cuiñi yó yuhu mesa Cristo jeē sándaā yá jniñu yó. <sup>11</sup>Chí suhva yósó núu tútu íi:

Jendaá ndije chí nuū máá rí cuiñi yítí táca ñayuu,

te ndíhi i cahān jeē máá rí cūu Yaā Dios, áchí máá Jitoho yō.

<sup>12</sup>Núu sūcuan te ná iin ná iin yó nacūaha yó cuenta nuū Yaā Dios ndese jniñu ni casáha yó.

#### *Ma sáha yó jēe quiví jnāhan yó cuéchi*

<sup>13</sup>Te jeē yūcuan ma cahān neé gá yō coto yó jnāhan yó. Chí sa tee ni rō jeē má sáha ró ni iin jniñu jeē sáha jeē stívi jnāhan ró te quiví i cuéchi. <sup>14</sup>Te jíni rí jeē ni iin jeē ni sáha Yaā Dios, tu stívi ánuá yō. Chí sūcuan ni cucáhnua vāha ni rí siquí jeē candije rí Jitoho yó Jesús. Te núu iin ñayuu jéni ni i jeē iyó jēe stívi ánuá í, yūcuán na te sūcuan sáha un jíin máá í. <sup>15</sup>Te núu jnāhan ró tu cūvāha ni de jeē yéji rō cūñu ni casocó ñayuu nuū ídolo, chí jéni ni de jeē stívi un ánuá rō, núu sūcuan te tu cúndáhú ni rō de jeē sáha ró sūcuan. Coto má snáá rō anuá jnāhan ró siquí jeē yéji rō iin jeē jéni ni de jeē cuéchi cūu. Chí suni jehē máá de ni jihí

Cristo. <sup>16</sup>Ma sáha ró jniñu jeē cahán i siquí, vésú jíni máá ró jeē iyó vāha. <sup>17</sup>Chí jeē ndáu Yaā Dios jniñu nuū yō, nasūu siquí ndese caji yō coho yó cūu, chí sa suhva siquí jeē na sáha yó jniñu ndaā, te coyūcu máni yō jíin jnāhan yó, te cusíi ni yō sáha Espírítu Santo. <sup>18</sup>Te ñayuu jeē sūcuan jéjniñu nuū Cristo, chí cusíi ni Yaā Dios jíin í, te suni cájējñúhún ñayuu í.

<sup>19</sup>Núu sūcuan te na cóndihví ni yō coyūcu máni yō, návāha jíin yūcuan chindéé ñájñahan yó ije yó jíin jnúhun ya. <sup>20</sup>Te ma cuáha ró jnúhun jeē ndeyu yéji rō snáá jniñu ni sáha Yaā Dios jíin jnāhan ró. Chí iyó ndoo ndije ndíhi jeē yéji yō, te vésú sūcuan te tú vāha jeē yéji rō ndeyu jeē sáha jíin jnāhan ró jēe caji de jeē jéni ni de jeē cuéchi cūu. <sup>21</sup>Vāha ga ma cáji rō cūñu, ni ma cóho ró vino, te ni iin ma sáha ró jēe stívi ánuá jnāhan ró, te quiví de cuéchi, te caca yátá de nuū jnúhun cándije de. <sup>22</sup>Te núu cándije ró jēe tú na vé sáha jeē yéji rō, te sūcuan na cándije máá-ni ró nuū Yaā Dios. Te nacá ndetú tēe jeē tu sáha jíin ánuá de jeē cuéchi cūu núu caji de coho de. <sup>23</sup>Te tēe yéji iin jeē jéni ni de sanaa te stívi ánuá de, núu sūcuan te sáha de cuéchi, chí tu cándije de jeē iyó vāha jeē yéji de. Chí táca jēe sáha yó, núu tu cándije yó jēe iyó vāha, te cuéchi cūu.

*Jeē na sáha yó jēe cusíi ni jnāhan yó*

## 15

<sup>1</sup>Te yóhó jēe ni lje yó jíin jnúhun ya, cánuú condito yó ñayuu jeē ná tu ije jíin jnúhun ya, návāha cándije vāha í. Te ma sáha yó jēe máá-ni yó cusíi ni. <sup>2</sup>Chí ná iin ná iin yó na sáha yó jēe cusíi ni jnāhan yó, návāha quendōo vāha í te ije í jíin jnúhun cándije í. <sup>3</sup>Chí ni Cristo, tu ní sáha ya jeē cusíi ni máá yá, chí sa suhva jeē cusíi ni Tátá yā. Chí suhva cahān tutu íi: Táca jnúhun ndevāha jēe cácahān ndevāha ñayuu siquí ní, ni ndívi siquí máá ná, áchí Cristo jíin Tátá yā. <sup>4</sup>Chí táca jnúhun jeē ní jecosó nuū tútu íi nde jēnahán, chí ni jecosó návāha stéén nuū yō, te nihín yó jnúhun jeē sáha jeē cuandeyí ni yō te ndusíi ni yō. Te sūcuan te cocuhun ni yō táca jēe vāha jeē cóo. <sup>5</sup>Te máá Yaā Dios jeē jēhe jnúhun cuandeyí ni jíin jnúhun ndúsíi ni, na sáha ya jeē cóo inuū ni rō, nájnūhun cúní Cristo Jesús. <sup>6</sup>Te sūcuan te iin-ni coo ró te inuū-ni cuu cahān ró jeē yóhoyo vāha Yaā cūu Yaā Dios, Tátá Jitoho yó Jesucristo.

*Jeē ni jtē jnúhun vāha ya nuū ñayuu táca nación*

<sup>7</sup>Núu sūcuan te cuatáhú ró táca jnāhan ró, nájnūhun ni jetáhú Cristo yóhó, návāha cuni ñayuu jeē luu cújēhnu Yaā Dios. <sup>8</sup>Chí cahán rí jeē ní quiiji Cristo Jesús, ni sáha ya táca jniñu jeē quendōo vāha ñayuu hebreo, návāha cúndaā táca jnúhun jeē ní jéjnūhun Yaā Dios nuū táca jíi í. Te sūcuan ni steén

Cristo jeē squícu Yaā Dios tāca jée ni jéjnūhun ya. <sup>9</sup> Te suni ni quiji ya návaha ñayuu tāca nación jeē tu jíni jnūhun ya, cahān i jeē yóhoyo váha ni Yaā Dios jeē cundáhú ni yā i. Chi suhva cáhán tutu íi:

Núu súcuan te cahān na jée yóhoyo váha ni ní, cuni ñayuu tāca nación,

te cata ná yaa jeē chiñhúhún ná nihín.

<sup>10</sup> Te cahán tucu tutu íi:

Róhó ñayuu tāca nación, inuú na cúsí ni rō jíin ñayuu maá yá.

<sup>11</sup> Te cahán tucu:

Róhó ñayuu tāca nación, na cahán rō jeē yóhoyo váha ni Jitoho yō Yaā Dios, te róhó ñayuu tāca-ni ñuu, suni na cahán rō jeē yóhoyo cújéhu ya.

<sup>12</sup> Te suni ni tee Isaiás jnūhun yáha:

Nuú yúcūn Isai quiji in jeē cújéhu, te ndacu ya jniñu nuú ñayuu tāca nación. Te ñayuu ún chi cocuhun ni i tāca jée sáha ya. Achí tutu.

<sup>13</sup> Te maá Yaā Dios jeē sáha jeē cáñuhun ni yō tāca jée váha jeē coo, na sáha ya jeē cóo síi ndasí ni rō jíin jée cóo ndeyí ni rō siquí jeē cácadíje nihin ró yá. Te súcuan te cocuhun teyí gá ni rō tāca jée váha jeē coo, sáha poder maá Espírítu Santo.

<sup>14</sup> Nānī mání, cúcáhu ni rī jeē váha ndasí cándihví ni rō jíin jniñu váha, te váha ndasí cájécūhun ni rō, te cúu stíhví jnāhan ni rō.

<sup>15</sup> Te ni jeni ni rī jeē tee ri carta yáha cáhán cají rī jíin ró jijnáhan ró, návaha víhyá gā na cocuhun ni rō tāca jnūhun yáha. Chi súcuan sáha rī siquí jeē váha ni Yaā Dios te ni jéhe ya jniñu nuú rī <sup>16</sup> jeē jejniñu rī nuú Jesucristo, jeē nácani rī jnūhun nuú ñayuu tāca nación jeē tu jíni jnūhun ya. Te nácani rī jnūhun váha Yaā Dios nuú i jeē jnāma ya i. Súcuan sáha rī návaha ñayuu tāca nación, cuu squíví rī i ndaha ya jeē cúu i nájñūhun in jeē socó rī nuú yā jeē cúsí ni yā jíin. Chi ni sáha Espírítu Santo jeē iyó ndoo iyó íi i nuú yá.

<sup>17</sup> Núu súcuan te siquí jeē candíje rī Cristo Jesús, te cúsí ni rī jeē jejniñu váha rī nuú Yaā Dios. <sup>18</sup> Chi ma cúu cahān rī siquí jniñu casáha inga tē, chi maá-ni siquí ndese ni jejniñu Cristo ruhū jeē sáha rī jeē ñayuu tāca nación tu ní jíni jnūhun Yaā Dios, vijná jétáhú i nuú yá. Chi súcuan ni cuu jíin jnūhun ni cahān rī jíin jniñu ni sáha rī. <sup>19</sup> Chi ni sáha rī jniñu jéhu ndíso poder jeē steén jeē cújéhu ya, te ni íyo poder Espírítu Santo jíin rí. Te súcuan ni nacani ndíhi rī jnūhun ndese jnāma Cristo ñayuu. Te ni nacani rī nde ñuu Jerusalén, jíin ndíhi tāca ñuu, jíin nde ní región Ilíríco. <sup>20</sup> Súcuan cúu jeē ní condíhví ni rī ni nacani rī jnūhun jeē jnāma ya ñayuu. Te ni jehén rī nuú ñayuu jeē ná tu cuni jnūhun Cristo, chi tu ní cúní rī nacani rī nuú ñayuu jeē jé ni jíni i ni canacani inga tē. <sup>21</sup> Chi sa suhva ni sáha rī nájñūhun cáhán tutu íi:

Tāca ñayuu jeē tu ní quiji jnūhun ya nuú i, vijná chí cuni i jnūhun ya, te tāca ñayuu jeē tu ní jíni cuítí jnūhun ya, vijná chí jecūhun ni i.

Achí tutu.

### *Jeē ñūhun ni Pablo jeē quihín de Roma*

<sup>22</sup> Te jeē yúcuan cúu jeē cuehē jínu ni cujnéñu rí, te tu ní cúu jecondéhe rí rohó jijnáhan ró. <sup>23</sup> Te vijná chí ni ndíhi jniñu rí ní cáhu tāca región ndaíñú yáha. Te je ni cuu cuehē cuiyá jeē cuní rī jeē rī nuú rō. <sup>24</sup> Núu súcuan te ñūhun ni rī jecondéhe rí rohó jijnáhan ró núu na yáha rí quihín rī España. Te ñūhun ni rī jeē núu je ni cusí ni rī jeē ní jito jnāhan yó, yúcuan na te chindéé ñáhán ró ruhū jeē quihín gá rí. <sup>25</sup> Te xíhna gá na quihín rī ñuu Jerusalén quindéca rí xūhún cuu hermano cáyūcu yúcuan. <sup>26</sup> Chi ñayuu Macedonia jíin Acaya ni cajeni ni i jeē cáquin i xūhun quihín nuú hermano cándoho ndáhú ñuu Jerusalén. <sup>27</sup> Chi súcuan ni cacusí ni i ni casáha i. Te íyó váha jeē súcuan, chí maá i jeē cácuu i ñayuu tāca gá nación, táu i jeē sáha váha i nuú ñayuu hebreo un. Chi ñayuu hebreo ni casáha jeē ní quiji jnūhun Yaā Dios nuú i jeē quéndōo váha ánuá i sáha. Jeē yúcuan cánuú jée chindéé ñáhán i ñayuu hebreo cácadíje jíin ndajniñu ñayívi yáha. <sup>28</sup> Núu súcuan te jeē jínu jniñu yáha jée quindéca rí xūhun yáha nuú i, yúcuan na te jecondéhe rí rohó jijnáhan ró jée yáha rí quihín rī España. <sup>29</sup> Te jíni váha rí jeē quiví jínu rí nuú rō, te váha ndasí quendōo ró jée nacani ga rí jnūhun váha Cristo nuú rō.

<sup>30</sup> Hermano jijnáhan ró, cáhán ndahú rí jíin ró jeē chindéé ñáhán ró ruhū cacān tahú rō jehé rí nuú Yaā Dios siquí jniñu ndécú ndeyí rí. Súcuan sáha ró siquí jeē candíje yó Jitoho yó Jesucristo, jíin siquí jeē cundáhú ni yó jnāhan yó sáha maá Espírítu. <sup>31</sup> Te cacān tahú ró jeē na cácu rí nuú tée región Judea jeē tu cácadíje, jíin jée na cúsí ni tāca hermano ñuu Jerusalén jeē quindéca rí xūhun yáha cuu de. <sup>32</sup> Te súcuan te núu cúní Yaā Dios te jecondéhe rí rohó jijnáhan ró, te cusí ni yó, te nanihín ni rī jeē condee rí jíin ró. <sup>33</sup> Te maá Yaā Dios jeē jéhe jnūhun ndeyí síi ni, na cóo ya jíin ró jijnáhan ró. Amén.

### *Jeē cahán Pablo jeē sándeýi ni i*

## 16

<sup>1</sup> Te vijná te cáhán rí jíin ró jijnáhan ró jée na chindéé ñáhán ró hermana Febe, chí cúu ña ñahan jéjniñu jeē siquí jnūhun ya nuú ñayuu cácadíje ñuu Cencrea. <sup>2</sup> Te cuatáhú ró ña nájñūhun cúní maá Jitoho yó, chí súcuan cánuú sáha hermano cácadíje. Te chindéé ñáhán ró ña na-ni vé cúu jeē jíni ñūhún ña, chí súcuan ni chindéé ñáhán maá ña cuehē ñayuu, te suni nde ruhū.

<sup>3</sup> Cahān rō jīn Priscila jīn Aquila jeē sándeýí ni ndindúú de, áchí rí, chí cáchindéé ñájnáhan de jīn rí siquí jníñu Cristo Jesús. <sup>4</sup> Chí ná ni iyo jnūndóho jeē cuu rí nuú, te ni cachundeyí ni de ni canducú de scácu de ruhū, vēsú suni cuu maá de nuú. Te nácuatáhú rí nuū ndindúú de, te nasūu maá-ni ruhū, chí suni táca grupo ñayuu cácanđje táca nación. <sup>5</sup> Te suni cahān rō jīn ñáyyu cácanđje ndútútú vehe de, sándeýí ni i, áchí rí. Te cahān rō jeē sándeýí ni Epeneto, tēe maní rí jīn. Chí ñuu Acaya, maá de cúu jeē ní candíje xīhna gā nuū Cristo. <sup>6</sup> Suni cahān rō jeē sándeýí ni Maria, ñahan jeē ní jejnīñu ndasí jeē siquí jnūhun ya mēhñu rō jijnáhan rō. <sup>7</sup> Te cahān rō jeē sándeýí ni Andrónico jīn Junias, tēe cácuu jnáhan ñuu rí jeē ní cahīn jīn rí vecāa. Te táca apóstol chí cájejnūhún de ndindúú tēe jīñá, te xīhna gā de ni cacandíje Cristo vēsú maá rí.

<sup>8</sup> Cahān rō jeē sándeýí ni Amplias, tēe maní rí jīn, chí cándíje de Jitoho yō. <sup>9</sup> Te cahān rō jeē sándeýí ni Urbano, tēe chindéé ñájnáhan jīn yō siquí jníñu Cristo Jesús, te suni súcuan Estaquis, tēe jeē maní rí jīn. <sup>10</sup> Suni cahān rō jeē sándeýí ni Apeles, tēe jeē ní stēen jeē candíje vāha de Cristo, te suni súcuan cahān rō jīn ñáyyu vehe Aristóbulo. <sup>11</sup> Cahān rō jeē sándeýí ni Herodión, tēe cúu jnáhan ñuu rí. Te suni súcuan ñayuu vehe Narciso jeē cácanđje maá Jítoho yō. <sup>12</sup> Te suni cahān rō jeē sándeýí ni Trifena jīn Trifosa, ñahan cásjñiñu siquí jnūhun maá Jítoho yō. Te suni sándeýí ni Pérsida, hermana jeē maní yō jīn, chí suni ní sájnīñu ndasí ña siquí jnūhun Jítoho yō. <sup>13</sup> Te cahān rō jeē sándeýí ni Rufo, tēe cájejnūhún ñáyyu jeē vāha cándíje de maá Jítoho yō. Te suni súcuan cahān rō jīn náná de, te maá ña suni ní jito ña ruhū nájnūhun jeē naná rí cúu ña. <sup>14</sup> Te cahān rō jeē sándeýí ni Asíncrito jīn Flegonte jīn Hermas jīn Patrobas jīn Hermes jīn táca hermano jeē cáyūcu jīn de. <sup>15</sup> Te suni súcuan Filólogo jīn Julia jīn Nereo jīn cuáha de, jīn Olimpas jīn ndíhi hermano cácanđje cáyūcu jīn de jijnáhan de.

<sup>16</sup> Te jeē cahān táca rō jīn jnáhan rō, te yīñúhún techūhu rō ndaha i. Te táca grupo ñayuu cácanđje nuū Cristo, cáhán i jeē na sándeýí ni rō.

<sup>17</sup> Te cáhán ndahú rí jīn rō, hermano jijnáhan rō, jēe cóto rō maá rō nuū ñáyyu cútucu ni te ndúcú ství jnáhan jīn jnūhun tu quíjnáhan jīn jēe ní cacutūhva rō. Te cujiyo rō nuū i jijnáhan i. <sup>18</sup> Chí ñayuu súcuan, tu jéjñiñu i nuū Jítoho yō Jesucristo, chí máni ndíhví ni i siquí jeē cájí i. Te yōhoyo ndúxí i jīn jnūhun cácahān i, te súcuan stáhú i ñayuu jeē tu jímí vāha. <sup>19</sup> Te maá rō jijnáhan rō, chí je cájini ndíhi ñayuu ndese vāha cájetáhú rō nuū yā, te jeē yúcuan cúsiñ rí. Te cúní rí jeē cóo listo vāha rō sáha rō jniñu vāha, te ma sáha rō jniñu néé. <sup>20</sup> Te maá Yā Dios jeē jéhe

jnūhun ndeyí sñ ni, yachí sáha ya jeē cúndeýí rō siquí jexeén jeē cúu Satanás. Te ñūhun ni rí jeē Jítoho yō Jesucristo na sáha ya jeē vāha rōhó jijnáhan rō.

<sup>21</sup> Sándeýí ni rō jijnáhan rō, áchí Timoteo, tēe chindéé ñáhn jīn rí siquí jnūhun ya. Te suni súcuan cácahān jnáhan ñuu rí Lucio jīn Jasón jīn Sosípater.

<sup>22</sup> Te ruhū jeē naní Tercio, jeē tēe ri carta yáha jēe cáhán Pablo, suni cáhán rí jeē sándeýí ni rō jeē cácanđje rō Jítoho yō.

<sup>23</sup> Te Gayo, tēe ni jēhe núu vehe ndéé ruhū Pablo, cáhán de jeē sándeýí ni rō jijnáhan rō. Te suni jēhe núu de vehe nuū táca ñáyyu cácanđje. Te suni súcuan cáhán Erasto, tēe cúu tesorero ñuu yáha, te suni súcuan cáhán hermano Cuarto.

<sup>24</sup> Te ñūhun ni rí jeē maá Jítoho yō Jesucristo, na sáha ya jeē vāha rōhó jijnáhan rō. Amén.

*Jnūhun sándihi jēe cáhán jeē yóhoyo cújēhnu ya*

<sup>25</sup> Te vijna na cáhán yō jeē yóhoyo cújēhnu Yā Dios. Chí maá yá cuu sáha jeē cuíñi ñihin ga rō jijnáhan rō jīn jnūhun jnáma ya rohó jeē nácani ri, jīn jnūhun Jesucristo jeē steén rí. Chí súcuan ni steén Yā Dios jnūhun sáhi yá, jeē ní yisáhi ní cáni nde ná tu jecōo ñayíví. <sup>26</sup> Te vijna te je ni nane cájí. Chí jīn tútu ñi jeē ní catee tēe ni canacani jnūhun ya, ni jítē núu jnūhun sáhi yáha nuū ñáyyu táca nación, návāha candíje i te cuatáhú i. Chí Yā Dios jeē tēcu ní cáni, súcuan ni ndacu ya jniñu.

<sup>27</sup> Te ní cáni na cáhán yō jeē yóhoyo cújēhnu Yā Dios siquí jniñu ní sáha ya jeē jīn Jesucristo. Chí maá ñn-ni ya iyó te yóhoyo ndíchí yá. Súcuan na cóo. Amén.

## CARTA HN JEE NI TEE SAN PABLO APOSTOL NUU ÑAYUU ÑUU CORINTO

<sup>1</sup> Máá rí cúu Pablo, te ni cana Yaá Dios ruhū cúu ri apóstol Jesucristo. Chi súcuan ni nujnahan ni yā ni tají yá ruhū nacani ri jñūhun ya. Te ndindúu rí jñin hermano yō Sóstenes <sup>2</sup> cátee rí carta yáha cuájeē nuū rohó ñayuu ñuu Corinto jeē cácadnje ró Yaá Dios. Chi cácuu ró ñayuu maá yá, chi cáyihí ró ndaha Cristo Jesús. Chi ni cana Yaá Dios rohó jñnahan ró jeē coo ndoo coo ií ró nuū yā. Te ni cana ya rohó ndé jñin táca gá ñayuu jeē ndácunehen i máá Jitoho yō Jesucristo, ndé-ni cúu nuū cáhíyo i. Chi Jitoho táca yó jñin i cúu ya. <sup>3</sup> Te cáñuhun ni rí jeē Tatá yō Yaá Dios jñin Jitoho yō Jesucristo na sáha ga yá jeē váha rohó, te sáha ya jeē coo ndeyí coo sñi ní rō.

*Cristo sáha ya táca jéé váha yóhó*

<sup>4</sup> Te níni nácuatáhú rí nuū Yaá Dios jeē siquí rohó jñnahan ró, chi jeē jñin Cristo Jesús ni sáha ya jeé váha rohó. <sup>5</sup> Chi cáyihí ró ndaha Cristo, te jeé yúcuan ní sáha Yaá Dios jeé cáhíyo cúcá ró jñin táca jñūhun ya, chi cájecūhun váha ni ró te cúu nacani ró. <sup>6</sup> Chi súcuan cúu jeé cáhñin nñhin ró jñin jñūhun Cristo jeé ní canacani ri nuū ró. <sup>7</sup> Te súcuan te tu cúmaní ni ñin tahú jeé jéhe ya cuu ánuá ró níni jéé cándetu ró quívi jeé quénda ndijjin Jitoho yō Jesucristo. <sup>8</sup> Te máá yá chí sáha ya jeé cuiñi nñhin ró nde na jñin quívi, náváha ma cóo cuéchi siquí ró quívi ndjji Jitoho yō Jesucristo. <sup>9</sup> Te squícu Yaá Dios táca jéé ni jéjñūhun ya, te ni cana ya rohó jñnahan ró náváha cuni jñnahan ró jñin Séhe ya, Yaá cúu Jitoho yō Jesucristo.

*Siquí jeé ma cóo sñin ni i jñin jñnahan i*

<sup>10</sup> Hermano, nde jñin síhví Jitoho yō Jesucristo cahán ndahú rí jñin ró jeé inuú-ni na ndájñūhun ró jñnahan ró, te ma cóo sñin ni ró. Chi váha inuú na cóo ni ró jñin táca jéé cájeni ni ró. <sup>11</sup> Súcuan cáhán rí, ñññí mání, chí ni cacastūhun ñayuu vehe Cloé nuú rí jeé cátejñahan ró. <sup>12</sup> Chi táca ññ ññ ró sñin sñin cácahán ró: Ruhū chí jñin Pablo índichi rí, cácahán sava ró. Te sava ga ró: Ruhū chí jñin Apolos. Ruhū chí jñin Pedro. Ruhū chí jñin Cristo. Cácahán ró. <sup>13</sup> Te jeé cácahán ró súcuan ¿te á cájeni ni ró jeé sñin sñin Cristo iyó jéé cánacani ri jñūhun? ¿Te á ruhū Pablo ni jñihí jicā cruz jéhe ró? ¿Chí jñin síhví ruhū ni cajendute ró, chí naun? <sup>14</sup> Tú cuiñi. Te na cútahú rí nuū Yaá Dios jeé tú cuehē ró ni scuándute rí, chí máá Crispo jñin Gayo-ni, <sup>15</sup> náváha ma cahán ni ñin ró jéé jñin síhví rí ni jendute ró. <sup>16</sup> Te sá núcūhun ni rí jeé suni ni scuándute rí Estéfanos jñin ñayuu vehe de.

Te sanaa te súcuan-ni cúu ñayuu ni scuándute rí, jéni ni rí. <sup>17</sup> Chi tu ní téjñíñu Cristo ruhū jeé scuándute rí, chí sa suhva jeé nácani ri jñūhun jeé jñama ya ñayuu. Te tu ní ndícú rí jeé steén rí nuú ró ññ modo ndichí jéé ma jécūhun ni ró, chí núu súcuan te ma cúu jecūhun váha ni ró jñūhun jeé ni jñihí Cristo jicā cruz.

*Jñin Cristo ni steén Yaá Dios poder yā jñin jñūhun ndichí yá*

<sup>18</sup> Te jñūhun jeé ni jñihí yá jicā cruz jeé jñama ya ñayuu, chí jñūhun cánéé í cúu nuū ñayuu cuango nuū jñahnú ndetú. Te máá yó jeé cuahán yó nuū cácu yó, chí jñin yó jeé jñūhun Yaá Dios jeé ndiso poder cúu. <sup>19</sup> Chi suhva yósó núu tútu ñi jeé ni cáhñ Yaá Dios: Na snáa rí jñūhun ndichí cácahán ñayuu ndichí cuenta ñayívi yáha,

te ma cuatáhú rí jñūhun cácahán ñayuu jeé jéni ni jeé jñin váha.

*Achí yá.*

<sup>20</sup> Núu súcuan ¿te ndé cuajñíñu tēe ndichí cuenta ñayívi yáha, jñin téé cástéén tutu, jñin téé cánanducú yúcun siquí jeé steén ñayuu ñayívi yáha? Chí táca jñūhun ndichí cuenta ñayívi yáha, ni cahán Yaá Dios jeé jñūhun cánéé í cúu. <sup>21</sup> Te yóhyo ndichí sáha Yaá Dios. Chí táca jñūhun ndichí cájini ñayuu ñayívi, ni cachi ya jeé tu jéjñíñu jeé cúni i ndese Yaá cúu ya. Yūcuán na te ni nujnahan ni yā jeé jñin jñūhun ya jeé cánacani ri te jñama ya ñayuu cácadnje, vésú cájeni ni ñayuu ñayívi jéé jñūhun cánéé í cúu.

<sup>22</sup> Chí ñayuu hebreo, máni cácuni i jeé sáha Yaá Dios cuehē jñiñu jéhu jeé steén poder yá. Te ñayuu griego chí máni siquí jñūhun ndichí cándihví ni i. <sup>23</sup> Te máá rí chí sa suhva cánacani ri jñūhun jeé ni jñihí Cristo jicā cruz jeé jñama ya ñayuu. Te jñūhun yáha sáha jeé jñánini ni ñayuu hebreo, te ñayuu táca gá nación chí cájeni ni i jeé jñūhun cánéé í cúu.

<sup>24</sup> Te ñayuu jeé ní cana ya ni quívicoo ndaha ya, vésú ñayuu hebreo chí ñayuu griego, chí jñin i jeé jñin Cristo ni steén Yaá Dios poder yá jñin jñūhun ndichí yá. <sup>25</sup> Chí jñūhun Yaá Dios jeé cácahán ñayuu jeé jñūhun cánéé í cúu, yóhyo ndichí gá vésú jñūhun ndichí ñayuu. Te cájeni ni ñayuu jeé tú na poder yá ná ni jñihí Jesús jeé jñama ya yóhó, te tu chí nñhin téyí gá poder yá ún vésú poder ñayuu.

<sup>26</sup> Hermano, máá ró cácuu jeé ní cana ya ni quívicoo ró ndaha ya. Te condéhe ró jeé tú cuehē ró ndichí jñin jñūhun ñayívi, ni tú cuehē ró cándacu jñiñu, ni tú cuehē ró cácuu séhe ñayuu cújéhu. <sup>27</sup> Chí sa suhva ni nacáji Yaá Dios táca jéé cácahán ñayuu ñayívi jéé tu ndichí cuiñi, náváha coo jñūhun canu nuú táca jéé ndichí. Te ni nacáji ya ñayuu tu téyí ñi ñayívi, náváha coo jñūhun canu nuú ñayuu teyí. <sup>28</sup> Te suni ni nacáji Yaá Dios táca jéé tu cújéhu ñi ñayívi, jñin táca jéé sajéé ni

i nuū, nde jín táca jéē tú jñiñu cájeni ni i, návaha snúu ya táca jéē cújéñu ini ñayívi. <sup>29</sup> Súcuan ni sáha ya návaha ni ñin ñayuu ma cúu sátéyí i máá i nuū yá. <sup>30</sup> Te máá ró jijnáhan ró chi ni sáha Yaā Dios jeē nduú ró jín Cristo Jesús. Chi nde nuū maá yá ni canihñin yō jñuhun ndíchí, te ni ndahva yā cuéchi yó, te ni sáha ya jeē iyó ndoo iyó íi yō nuū yá, chi ni jnama ya yohó. <sup>31</sup> Te jeē yúcuan na cóo nájñuhun cáhán tutu íi: Núu ñin ñayuu cuní i cutéyí i, te na cutéyí i siquí jeē ni sáha máá Jítoho yō jehé i, áchi.

*Jeē nácani Pablo jñuhun jeē ni jñí Cristo*

## 2

<sup>1</sup> Te ruhū, hermano, ná ni jeē rí nuū ró jijnáhan ró jéē nácani ndaā rí jñuhun Yaā Dios, te tu ni nácani rí jñuhun ndíchí jéē ma jécúhun ni ró. <sup>2</sup> Chi ná ní iyo rí jín ró te tú na inga jñuhun ní ndúcú rí castúhun rí nuū ró, chí máni máá jñuhun Jesucristo jeē ni jñí yá jicā cruz jeē jnáma ya yohó. <sup>3</sup> Te ná ní jinú rí nuū ró jijnáhan ró, chí tú na fuerza rí, te yúhú rí, te quísi i ruhū. <sup>4</sup> Te ná ní nacani rí jñuhun nuū ró, chí nasūu jín jñuhun ndíchí ñayuu ñayívi ní scándije rí rohó, chí sa suhva jín máá poder Espíritu yá ní steén rí nuū ró jijnáhan ró, <sup>5</sup> návaha ma cuiñí ró siquí jñuhun ndíchí cácahān ñayuu, chí cuiñí ró siquí poder Yaā Dios.

*Jín Espíritu te steén Yaā Dios ndese Yaā cúu ya*

<sup>6</sup> Te ndaā chí ndíchí cácahān rí jín ñayuu jeē jé ní ije jín jñuhun cándije i ya. Te nasūu jñuhun ndíchí jéē iyó ini ñayívi yáha, ni nasūu jñuhun ndíchí cácahān tēe cájéñu ñayívi yáha, chí tēe ún yáha-ni jeē cájéñu de. <sup>7</sup> Chí jñuhun cácahān rí cúu jñuhun ndíchí máá Yaā Dios jeē ní yisáhí. Chí jñuhun ndíchí un jéē ní yisáhí, ni jequin Yaā Dios nde ná tu jecóo ñayívi, návaha cácu yó jéē cótecu yó níí cáni sáha jñuhun ún. <sup>8</sup> Chí ní ñin tēe cújéñu nuū ñayívi yáha, tu ní jécúhun ni de jñuhun ndíchí un. Chí núu ní jecúhun ni de nuú, te ma cáhni cuiñi de máá Jítoho yō, Yaā cújéñu luu. <sup>9</sup> Chí cúu nájñuhun cáhán tutu: Táca jéē ní sátúhva Yaā Dios jeē cúu ñayuu jeē maní jín yá,

ni ñin ún tu ní jito jínúú ñayuu, ni tu ní jini sōho i,

ni tu ní quíji jeē súcuan cani ni i. Achí tutu. <sup>10</sup> Te máá yó jijnáhan yó chí ní steén Yaā Dios táca un nuú yō jeē jín Espíritu yá. Chí máá Espíritu jini vāha ya te steén yá ndíhi, chí nde ndíhi jeē ndíchí gá máá Yaā Dios.

<sup>11</sup> Chí ní ñin ñayuu ma cúu cuní i ndese jéni ni inga ñayuu, chí máá-ni i jín ánua i cúu jeē jini. Te suni súcuan ní ñin ñayuu tu jini i ndese jéni ni Yaā Dios, chí máá-ni Espíritu Yaā Dios cúu jeē jini. <sup>12</sup> Te máá yó chí ní nihñin yō

Espíritu un jéē véji nuū Yaā Dios, te tu cájeni ni yō nájñuhun cájeni ni ñayuu ñayívi. Te jeē yúcuan cúu jeē cájecúhun ni yō ndese ni sáha Yaā Dios jeē váha yóhó síquí jeē váha ni yá. <sup>13</sup> Te suu síquí táca jéē yáha cúu jeē cácahān rí, te nasūu jín jñuhun jeē castéén ñayuu ndíchí, chí jín jñuhun jeē steén máá Espíritu. Chí cástéén rí jñuhun Espíritu nuū ñayuu cánevāha Espíritu.

<sup>14</sup> Te ñayuu ñayívi tu cájetáhú i táca jñuhun jeē véji nuú Espíritu Yaā Dios, chí cájeni ni i jeē jñuhun cánéé íi cúu. Te ma cúu jecúhun ni i, chí tu cánevāha i máá Espíritu jeē sáha jeē jécúhun ni i. <sup>15</sup> Te ñayuu cánevāha Espíritu, chí cájecúhun ni i ndese iyó ndíhi-ni. Te ñayuu ñayívi ma cúu jecúhun ni i ndese ñayuu cácuu ñayuu ún. <sup>16</sup> Chí suhva cáhán tutu íi: ¿Ndé ñin cuu cuní ndese jéni ní máá Jítoho yō? ¿Te ndé ñin cuu steén nuú yá? Ní ñin ma cúu. Achí tutu. Te vésú súcuan te máá yó chí cájeni ni yō nájñuhun jéni ni Cristo.

*Jeē cáchindéé ñájñahan de cájeñiñu de nuú Yaā Dios*

## 3

<sup>1</sup> Te ruhū, hermano, tu ní cúu cahān rí jín ró jijnáhan ró nájñuhun cáhán rí jín ñayuu jica jín Espíritu. Chí ní cahān rí jín ró nájñuhun jín ñayuu cájica jín modo máá, chí cácuu ró nájñuhun sūchi lúlí jéē ná tu ije ró jín jñuhun Cristo. <sup>2</sup> Ni steén rí nuū ró jeē tú yí, chí cácuu ró nájñuhun sūchi lúlí jéē jéxin gā. Te tu ní cáhán rí jín ró jñuhun yí jeē cúu nájñuhun jeē ndáva jeē véji ñayuu ní ije, chí ná tu canda ró jín ndé saá. Te ní vijna ná tu canda ró jín. <sup>3</sup> Chí cájica ga ró jín modo neé máá ró. Chí cácuuésún ni ró, te cácajnáhan ró, te cácusñin ni ró. Núu súcuan te cácuu ró nájñuhun ñayuu ñayívi jéē cájica jín modo neé máá. <sup>4</sup> Chí ñin ró cáhán: Ruhū chí jín Pablo índichi rí. Te inga ró cáhán: Ruhū chí jín Apolos. Te súcuan cúu jeē cájica ró jín modo neé máá ró

<sup>5</sup> ¿Te ndé ñin cúu ruhū, te ndé ñin cúu Apolos núu súcuan? Chí máá mozo-ni Yaā Dios cácuu rí, te ní jeñiñu ya ruhū návaha cándije ró máá Jítoho yō. Chí ná ñin ná ñin rí ni sáha jñiñu ndese ní jehe máá Jítoho yō nuú rí. <sup>6</sup> Ruhū, nájñuhun ni taji rí jñuhun ya ini anuá ró, te Apolos, nájñuhun ni chuhun de ndute cúu jeē ní steén gā de nuú ró. Te máá Yaā Dios cúu jeē ní scuéñu jñuhun ini anuá ró. <sup>7</sup> Núu súcuan te tú na vé cúu sáha tēe táji ní tēe chúhun ndute, chí sa suhva máá Yaā Dios cúu jeē scuéñu. <sup>8</sup> Te tēe táji jín tēe chúhun ndute, ñin-ni cácuu de. Te táca de chí cuāha ya yáhu nuú de ndese jñiñu ní casáha ñin ñin de. <sup>9</sup> Chí ruhū jijnáhan rí chí tēe chindéé ñájñahan cájeñiñu nuú Yaā Dios cácuu rí. Te máá ró jijnáhan ró cácuu nájñuhun itu Yaā Dios jeē jicu ya jín.

Te suni nájñuhun ñin vehe jeē sāha Yaā Dios cácuu ró. <sup>10</sup> Te ruhū chí cūu rí nájñuhun ñin maestro albañil jeē ní jequin rí cimientu vehe ún, cūu jeē ní scándje rí rohó. Te inga de cásama de siquī, cūu jeē castéén gā de nuū ró. Núu súcuan te ná ñin ná ñin de na cóo cuidado de ndese sāma de siquī. <sup>11</sup> Te Jesucristo cūu cimientu vehe ún, te ní ñin ma cūu caquin inga cimientu, chí máa yá cūu jeē ní ndahva cuēchi ró. <sup>12</sup> Te tāca ñáyuu cácañje, chí sāha i vehe siquī cimientu un, núu jín ndajñiñu vāha nájñuhun oro chí plata chí yúu luu, chí jín jeē yachi naa, nájñuhun yujnu chí ite chí ndayóhó. <sup>13</sup> Te natūu jñiñu un jeē ní sāha ñin ñin i, te suu cūu ndese ní condihví ní i siquī maá yá. Chí máa quíví juico jeē sándaā yá jñiñu ñáyuu, quíví ún natūu cáji jñiñu i. Chí jín ñuhūn quiji quíví ún, te nájñuhun sāha ñuhūn jeē jēhmu tāca jéé cūu cayū, súcuan coto ndee ya jñiñu ñin ñin i. <sup>14</sup> Te núu tú cayū jñiñu ní sāha i siquī cimientu un, te nihín i tahū i. <sup>15</sup> Te núu tu ní condihví ní i jín jñiñu ya, te ma nihín i tahū i, chí nájñuhun cayū jñiñu i. Te máa i chí cácu ánuá i, vēsú nájñuhun je yajni cayū i núu yáñuhūn.

<sup>16</sup> ¿A tu cájini ró jeē cácuu ró nájñuhun templo Yaā Dios, chí ndéé Espiritu Yaā Dios ini ánuá ró? <sup>17</sup> Te núu ñin tēe stívi de templo Yaā Dios, te snáhnú ndetū yá tēe ún. Chí ndoo ndasí cūu templo yā, te suu cácuu máa ró.

<sup>18</sup> Ní ñin ró ma stahú ró máa ró jín jeē jéni ní ró. Núu ñin ñáyuu jéni ní i jeē ndichí i jín jñuhun ñayívi yāha, vāha ga na siáa i ún, návāha coo ndichí ndije i jín jñuhun máa yá. <sup>19</sup> Chí jñuhun ndichí jéé iyó ini ñayívi yāha, jñuhun cánéé íi cūu nuū Yaā Dios. Chí cáhán nuū tútu ñi: Ñayuu ndichí cuenta ñayívi, chí nájñi ya i siquī jñuhun ndichí i jeē jéni i jñuhun ya, achí. <sup>20</sup> Te cáhán tucu tutu: Máa Jítoho yó jini yá tāca jéé jéni ní ñáyuu ndichí, chí máni jeé jéni cáhá ní i, achí. <sup>21</sup> Núu súcuan te ní ñin ró má cutéyí ró jeé siquī ní ñin tēe ndichí. Chí cuenta máa ró cūu ndihí-ni. <sup>22</sup> Cūu Pablo, cūu Apolos, cūu Pedro jeé castéén nuū ró. Cūu ndihí jeé iyó ini ñayívi, jeé iyó vijna jín jeé quíji. Te vēsú núu cotecu ró chí cuu ró, te ndihí-ni chí cuenta máa ró cūu. <sup>23</sup> Te máa ró cácuu cuenta Cristo, te Cristo cūu cuenta Yaā Dios.

*Jeé casáñiñu apóstol siquī jñuhun ya*

#### 4

<sup>1</sup> Núu súcuan te na cáni ní ró jijnáhan ró jeé mozo-ni nuū Cristo cácuu rí, jeé ní tejniñu ya ruhū jeé steén rí jñuhun Yaā Dios jeé ní yisāhi ndé jenahán. <sup>2</sup> Te ndaā chí tēe jeé sáñiñu siquī ún, iyó responsable ná ñin ná ñin de jeé squícu vāha de. <sup>3</sup> Te ruhū tu sāha rí cuenta núu cánanducú ró siquī rí ndese sāha rí, chí

núu cánanducú ñáyuu cácujeñu ini ñayívi. Te ní máa rí tu chíhí rí cuenta siquī maá rí. <sup>4</sup> Chí vēsú jini rí jín ánuá rí jeé tú na cuēchi rí, te nasūu yúcuu cūu jeé quéndóo ndaā rí, chí máa Jítoho yó cūu jeé jito ndee ruhū. <sup>5</sup> Jeé yúcuu ma nánducú ró siquī nánducú jñuhun ró, chí nde na quée máa quíví te cuni ró. Chí nde na ndíji máa Jítoho yó te nastūu ndijin yá tāca jñiñu jeé yisāhi núu nēé, te steén ndijin yá tāca jéé jéni ní ñáyuu jín ánuá i. Yúcuu na te máa Yaā Dios cuajñuhūn yá ná ñin ná ñin i ndese ní casáha i.

<sup>6</sup> Hermano, tāca jñuhun yāha ní cahān rí návāha quéndóo vāha ró jijnáhan ró. Te ní cachi rí jeé máa rí jín Apolos cácuu rí mozo-ni nuū yá, te súcuan cácuu rí ñin ejemplo nuū ró. Te cáhán rí jeé súcuan cácuu rí, návāha cutūhva ró cani ní ró máa-ni nájñuhun cáhán tutu ñi. Chí ma sandúxi ró jeé cuajñuhūn ró ñin tēe steén, te inga de tuú.

<sup>7</sup> ¿Te naun cácutéyí ró nuū jñáhan ró núu súcuan? ¿Te na vé cūu jeé iyó núu ró jeé tu ní cácutahū ró nuū yá? Te núu ní cacutahū ró nuū yá, ¿te naun cástátéyí ró máa ró jeé nájñuhun jeé nasūu jéé ní cacutahū ró cūu?

<sup>8</sup> Va je ní cacucúca ró, chí je cánevāha ró ndihí, cájeni ní ró. Te je cándacu máa ró jñiñu, te ní tuá cájini ñuhūn ró ruhū, cájeni ní ró. Tú vāha jeé súcuan cácutéyí ró. Te nacā jeé vāha núu jeé cándacu ndije nde ró jñiñu núu, návāha suni cuāha ró jñuhun jeé ndacu nde rí jñiñu jín ró jijnáhan rí. <sup>9</sup> Te iyó jéni ní rí jeé ruhū tēe cácuu apóstol, ní sāha Yaā Dios jeé cácuu rí nájñuhun tēe núu gā nuū ñáyuu, nájñuhun tēe jeé jé ní cundaā jeé cūu. Te ní ñayívi jín andívi cándēhe vāha nuū rí, cūu ndajéhe Yaā Dios jín ñáyuu. <sup>10</sup> Chí jeé siquī Cristo te cáhán i jeé tēe cánéé cácuu rí. Te tāca róhó va ndichí ró jín jñuhun Cristo, cájeni ní ró. Te tāca ruhū chí tu fuerza rí, te róhó va iyó fuerza ró, cájeni ní ró. Te róhó chí cáhiyo yífuhūn ñáyuu nuū ró, te nuū rí chí casájéé ní i. <sup>11</sup> Ní véjicoo rí cáji rí sóco te nde vijna. Te cájichí rí ndute, te cúmani sahma rí, te tu casáha vāha ñayuu jín rí, te ní tu cánevāha rí vehe. <sup>12</sup> Te nihin casáñiñu rí jín ndaha rí. Cácahān neé i nuū rí, te cácahān vāha rí jín i. Cájito xeén i ruhū, te cájendeyí ní rí. <sup>13</sup> Cácahān neé i siquī rí, te sa cácahān maní rí jín i. Te cácuu rí nájñuhun yacá ini ñayívi, te casquéhichí i ruhū nde vijna.

<sup>14</sup> Te nasūu jéé tēe rí yāha jéé cúcanu ró, chí sa suhva jeé stihví ní rí rohó, chí cácuu ró nájñuhun sehe rí chí maní rí jín ró. <sup>15</sup> Chí vēsú na cóo uxí mil tēe steén jñuhun Cristo nuū ró, te ñin-ni tátá ró iyó. Te máa rí cūu nájñuhun tátá ró, chí ní scandíje rí rohó jéé ní nacani rí jñuhun vāha Cristo Jesús jeé jñáma ya yohó. <sup>16</sup> Núu súcuan te cáhán ndahú rí jín ró jeé na ndácu ró ruhū jijnáhan ró.

<sup>17</sup> Te jeé yúcuu cūu jeé tají rí Timoteo cuajeé de nuū ró. Chí cūu de nájñuhun sehe

ri jeē maní rí jín de, te squícu vāha de nuū maá Jítoho yō. Te máá de nacachi tucu de nuū rō ndese jíca ri jeē candíje ri Cristo, jín ndese stéén rí nuū táca grupo ñayuu cácaandíje táca lado. <sup>18</sup> Te sava ró chi cásatéyí ró maá ró, chí cájeni ní rō jeē cuiti gā rí nuū rō. <sup>19</sup> Te tuú chi yachi jeē rí nuū rō te núu súcuan cúní maá Jítoho yō. Yūcuán na te nanducú rí siquí tée cácutéyí, te ma sáha ri cuenta jñūhun cácahān-ni de, chí sa coto ndee rí de núu cuu squícu nde de. <sup>20</sup> Chi jeē ndácu Yaā Dios jniñu nuū yō, nasūu maá jée cahān i-ni yó cúu, chí jíní ñúhún condiso poder jñūhun cáhān yō jín jniñu sáha yō. <sup>21</sup> Núu súcuan ¿te ndese cáculni rō? ¿A jée cuxeēn rí nuū rō núu na jée rí, siquí jeē tu cánacani ní rō, chí nacani ní rō te jeē rí jín jñūhun cúndáhú ni jín jñūhun víta ní?

*Jeē sándaā Pablo siquí iñ cuēchi*

## 5

<sup>1</sup> Te ni nihīn rí jñūhun jeē jíca jnéni iñ tee jeē íne mēhñu ró, chí ndéca de naná uū de. Te xeēn ndasí sáha tēe ún, chí ni ñayuu jeē tu cájini jñūhun Yaā Dios, tu cásaáha i súcuan. <sup>2</sup> Te vēsú súcuan te cásatéyí ró maá ró jijnáhan ró. Vāha ga jeē na cúculhyá ndasí ní rō. Te cánuú jée na quēnehen ró tēe sáha cuēchi ún na quēnda de mēhñu ró. <sup>3</sup> Te ruhū, vēsú tu íyó rí jín ró, te nájnūhun jeē íyó rí jín ró cúu jeē ñúhún ní rí rohó. Te je ni sándaā rí siquí tēe ní sáha cuēchi ún, chí nájnūhun jeē íyó rí jín ró cúu. <sup>4</sup> Núu súcuan te na ndútútú ró jijnáhan ró, te máá Jítoho yō Jesucristo coo ya jín ró. Te máá rí chí nájnūhun cone rí jín ró, chí ñúhún ní rí rohó. Te poder maá Jítoho yō Jesús suni coo jín ró. <sup>5</sup> Te na chíhi yó tēe ún ndaha Satanás, návāha na ndóho yiqui cúñu de, te nacani ní de te cácu ánuá de quiví ndijí Jítoho yō Jesús.

<sup>6</sup> Tuú vāha jeē cásatéyí ró maá ró. ¿A tu cájini rō jñūhun cáhān suhva? Vēsú jecu-ni levadura te ndáa ní ñujen sáha, áchi. <sup>7</sup> Núu súcuan te quenehen ró tēe un nájnūhun scáne ró levadura jeē ní tíví. Te súcuan te cuu ró nájnūhun pan jeē cúvāha jín ñujen jée jée tú na levadura yíhi, jeē cáyeji i vico pascua. Te ndaā jeē súcuan cácu ró. Chí je ni jíhi Cristo jeē ní sócō yā maá yá jehē yō, chí cúu ya nájnūhun londe pascua jeē ní jíhi. <sup>8</sup> Núu súcuan te na cócūhun ní yō ndese ní cuu vico pascua un, te na cóo ndije ndaā anuá yō, te suu cúu nájnūhun pan jeē tú na levadura yíhi. Te ma sáha yó jniñu nées jín jniñu jnehén, jeē cúu nájnūhun levadura jeē ní tíví.

<sup>9</sup> Nuū inga carta jeē ní tee ri nuū rō jijnáhan ró ní cahān rí jeē ma quiví nduu ró jín ñayuu cájica jnéni. <sup>10</sup> Te tu ní cáchi rí jeē ma quíjñahan cuiti ró jín ñayuu tu cácaandíje jeē cájica jnéni, jeē ndíyo ní, jeē sácúhñá, jeē

chiñúhún ídolo. Chí núu súcuan te jíní ñúhún jeē quēnda ró ini ñayiví nuú, chí tuá na inga modo jeē cújyo ró nuú i chí ndéé yó ñayiví jín i. <sup>11</sup> Chí sa suhva ní cachi rí jeē ma quiví nduu ró jín máá ñayuu jeē cácahān i jeē cúu i hermano, te núu jíca jnéni i, chí ndíyo ní i, chí chíñúhún i ídolo, chí chíso jñūhun i siquí jñahan i, chí nájini i, chí cuíhñá i. Te ní ma cáji cuiti ró staā jín ñayuu casáha súcuan. <sup>12-13</sup> Chí nasúu jniñu rí cúu jeē sándaā rí siquí ñayuu jeē tu cáhīn jín yó. Yaā Dios cúu jeē sándaā siquí i. Te ñayuu cáhīn jín ró chí cánuú jée sándaā ró siquí i. Núu súcuan te cánuú jée quēnehen ró tēe ní sáha cuēchi un jeē íne de mēhñu ró, na quēnda de.

*Jeē ma cáquin i cuēchi siquí jñahan i nuū tohó tu cácaandíje*

## 6

<sup>1</sup> Te núu jñahan ró jée candíje ní sáha cuēchi siquí ró, ¿te naun jéngoo ró jín de nuū tohó jeē tu cácaandíje jín yó? ¿Te naun tu cásaandaā ró nuū jñahan ró cácaandíje Yaā Dios? <sup>2</sup> ¿A tu cájini rō jeē ñayuu cácaandíje Yaā Dios chí iñ quiví te sándaā i jniñu ñayuu ñayiví? Te núu iñ quiví sándaā rō jniñu ñayuu ñayiví, ¿te á má cúu sándaā rō vijna siquí táca cuēchi lúli cásaáha jñahan ró? <sup>3</sup> ¿A tu cájini rō jeē iñ quiví te sándaā yō nde jniñu táca ndajéhe andiví? Te nagā ní cuu jniñu ñayiví yáha jeē ma cúu sándaā yō. <sup>4</sup> Núu súcuan te núu jñahan ró sáha de iñ cuēchi siquí ró, ¿te naun jéngoo ró sa nuū táca tēe jeē tu cúu de jñahan ñayuu cácaandíje jeē sándaā de siquí cuēchi ún? <sup>5</sup> Súcuan cáhān rí návāha na cúcanu ró jijnáhan ró. ¿A tu íyó ní iñ tēe jécūhun ní mēhñu ró jeē cuu sándaā de siquí ró? <sup>6</sup> Tú vāha jeē iñ hermano caquin cuēchi siquí inga hermano nuū tohó jeē tu cácaandíje.

<sup>7</sup> Te jeē cájequin rō cuēchi siquí jñahan ró, chí jeē castíví í rō cúu. ¿A tú vāha ga cuandeyí ní rō na sáha i cuēchi siquí ró chí quende i ndajniñu ró? <sup>8</sup> Te tuú chí sa máá ró cásaáha cuēchi te cáquende ró ndajniñu, te nuū táca hermano ró cúu jeē casáha ró.

<sup>9-10</sup> ¿A tu cájini rō jeē ñayuu tu íyó ndáa, ma nihín tahú i quiví i ñuu nuū ndácu Yaā Dios jniñu? Ma stahú ró maá ró cani ní rō jeē nihín tahú ró, chí ní ñayuu jeē jíca jnéni, ní ñayuu chíñúhún ídolo, ní ñayuu casiquí ndéé jñahan, ní tēe sáha ndiyí jín jñahan yí, ní ñayuu cuíhñá, ní ñayuu ndíyo ní, ní ñayuu nájini, ní ñayuu chíso jñūhun siquí jñahan, ní ñayuu stahú jñahan siquí xūhun, ma nihín tahú i quivícoo i ñuu nuū ndácu Yaā Dios jniñu. <sup>11</sup> Te súcuan ní candāa sava ró núu, te vijna chí je ní nacate ya rohó, te cáhīyo ndoo cáhīyo í rō nuū yā. Chí je ní ndahva yā cuēchi ró jée jín máá Jítoho yō Jesús jín Espíritu Yaā Dios.



*Jeē iyó ndoo iyó ū yiqui cūñu ñayuu cácadñje*

<sup>12</sup> Te ndaa cúu jeē cácahān jeē ndihi-ni jñiñu iyó vāha sáha yó núu ndese cúní yō. Te vēsú sūcuan te nasúú ndihi sáha jeē quēndōo vāha ánuá yō. Ndihi chí cuu sáha yō, te vēsú sūcuan te tu iyó vāha jeē quívi yó núú jñiñu jeē stívi ánuá yō. <sup>13</sup> Te ndaa cúu jeē cácahān jeē ndeyu cúu jeē cūhun chíji, te chíji cúu jeē cūhun ndeyu. Te ñn quívi te tuá coo sūcuan, chí naa ndāndúú un sáha Yaa Dios. Te nasūu siquī jeē cáca jñení yó cúu jeē iyó yiqui cūñu yō, chí sa suhva jeē sáha yó jée cuní maá Jítoho yō. Te Jítoho yō chí ndító ya yiqui cūñu yō. <sup>14</sup> Te nájñūhun jeē ní nastécu Yaa Dios Jítoho yō, suni sūcuan nastécu yā yohó jín poder yā.

<sup>15</sup> ¿A tu cájini rō jeē yiqui cūñu táca ñn ñn rō cúu nájñūhun táca parte yiqui cūñu Cristo? Núu sūcuan ¿te á cuu quende yó ñn parte yiqui cūñu Cristo te squijnáhan yó jín ñn ñahan jica jñení? Ma cúu cuiti sūcuan. <sup>16</sup> ¿A tu cájini rō jeē tēe quijnáhan jín ñahan jica jñení, ñn na yiqui cūñu ni nduu de jín ña? Chí cáhan tutu íi: Jeē ndāndúú chí ñn na yiqui cūñu cuu, áchí. <sup>17</sup> Te ñayuu jeē quijnáhan jín maá Jítoho yō, chí suni sūcuan ñn na cúu i jín yá siquī jeē candíje i ya.

<sup>18</sup> Núu sūcuan te cunu rō jée ma quívi rō núu jñūhun jica jñení. Chí táca gá cuēchi jeē sáha ñayuu, chí nastúú yiqui cūñu i stívi i. Te núu jica jñení i, te siquī yiqui cūñu i cúu jeē sáha i cuēchi. <sup>19</sup> ¿A tu cájini rō jeē yiqui cūñu rō cúu templo Espírítu Santo jeē ní jéhe Yaa Dios nuū rō, te ndéé yá ñni rō? Te nasūu cuenta maá rō cácuu rō. <sup>20</sup> Chí Yaa Dios yahu ní cuu jeē ní nacuaan ya rohó jijnáhan rō. Te jeē yūcuan cánuu jée cáca yññūhun rō nuū Yaa Dios jee sáha rō jñiñu vāha nde jín yiqui cūñu rō jín ñni jín ánuá rō, chí máni cuenta Yaa Dios cúu.

*Jñūhun cástūhun siquī tēe jín ñasihí*

## 7

<sup>1</sup> Vijna te na cáchi ri siquī táca jñūhun jeē ní cacajñūhun rō ruhū nuū carta. Jendaá jeē vāha ga quendōo ñn tēe núu tú condeca de ñahan. <sup>2</sup> Te siquī jeē iyó jñūhun jñení, te vāha ga jeē táca tēe na cóo ñasihí maá de, te suni táca ñahan coo yñi maá ña. <sup>3</sup> Te yñi na squícu vāha de nuū ñasihí de jeē cúu de yñi ña. Te suni sūcuan ñasihí na squícu vāha ña nuū yñi ña. <sup>4</sup> Chí ñasihí chí tu cúu sáha ña jeē cuní ña jín yiqui cūñu ña, chí suni jeē cuní yñi ña. Te suni sūcuan yñi tu cúu sáha de jeē cuní de jín yiqui cūñu de, chí suni jeē cuní ñasihí de. <sup>5</sup> Te ma sasáhán rō maá rō nuū jñáhan rō. Te núu cácuni rō jeē vihyá gā cacān tahú rō jecu tiempo, te núu cáhíyo conforme ndāndúú rō, te cuu sásáhán rō maá rō nuū jñáhan rō. Te yūcuán na te vāha ga naquijnáhan tucu

ró, návāha ma cóto ndee Satanás rohó siquī jñūhun jñení.

<sup>6</sup> Te nasūu jée ndácu ri jñiñu jeē cánuu quijnáhan rō, chí jeē jéhe ri jñūhun cúu. <sup>7</sup> Chí nájñāhan ni rī jeē táca tēe na cóo maá ñn-ni de, nájñūhun iyó maá rí. Te sñn sñn ni sáha Yaa Dios jín ñn ñn de ndese cúu maá de, chí sava de cuu quendōo maá ñn-ni de, te inga de chí tuú chí sñn ni sáha ya jín de.

<sup>8</sup> Núu sūcuan te cáhan rī jín ñayuu cáhíyo maá ñn-ni, jín ñahan ní caquendōo ndáhú, jeē vāha ga te núu quendōo maá ñn-ni i, nájñūhun iyó maá rí. <sup>9</sup> Te núu jín i jeē ma cánda i quendōo maá ñn-ni i, te na quijnáhan i núu sūcuan. Chí vāha ga jeē quijnáhan i vēsú jeē ndúquji i.

<sup>10</sup> Te nuū ñayuu jeē jé ni quijnáhan chí ndácu ri jñiñu jeē ñahan ma ndusñn ña jín yñi ña. Te nasūu ruhū cúu jeē ndácu jñiñu, chí maá Jítoho yō. <sup>11</sup> Te núu ñn ñahan ndusñn ña jín yñi ña, te na quēndōo maá ñn-ni ña, chí cuu naquijnáhan ña jín yñi ña. Te yñi suni ma ndusñn de jín ñasihí de.

<sup>12</sup> Te jín sava ga ñayuu chí cáhan rī vāha jée jéni ni maá rí, te nasūu jée ní cachi maá Jítoho yó cúu. Núu ñn hermano ndéca de ñahan jeē tu cándíje, te núu nájñāhan ni ña condee ña jín de, te ma ndusñn de jín ña. <sup>13</sup> Te núu ñn ñahan ndéca ña tēe jeē tu cándíje, te núu nájñāhan ni de condee de jín ña, te ma ndusñn ña jín de. <sup>14</sup> Chí tēe tu cándíje, yñi cuenta de nuū Yaa Dios siquī jeē ní quijnáhan de jín ñahan cándíje. Te ñahan tu cándíje, yñi cuenta ña nuū Yaa Dios siquī jeē ní quijnáhan ña jín tēe cúu hermano cándíje. Chí núu tu sūcuan te sēhe i ma quñi cuenta i nuū Yaa Dios, te vijna chí yñi cuenta i nuū yā. <sup>15</sup> Te yñi chí ñasihí tu cándíje, núu fuerza cuní i ndusñn i jín jñáhan i, te na ndúsñn i. Chí núu sūcuan cuní i, te hermano chí hermana cándíje tu cánuu casi i jeē ndusñn jñáhan i jeē tu cándíje. Chí ni cana Yaa Dios yohó jée condee maní yō jín jñáhan yó. <sup>16</sup> Te rōhó jée cácuu ñasihí, tu cájini rō, sanaa te cándíje yñi rō sáha rō, te cácu de. Te suni sūcuan rōhó jée cácuu yñi, tu cájini rō, sanaa te cándíje ñasihí rō sáha rō, te cácu ña.

<sup>17</sup> Te ná ñn ná ñn rō na quēndōo rō ndese ni sáha Jítoho yō jeē cúu rō, jín ndese iyó rō ná ni cana ya rohó ní cándíje rō. Te sūcuan ndácu ri nuū táca grupo ñayuu cácadñje. <sup>18</sup> Núu ni cana ya ñn tēe jeē ní cuu circuncidar, te sūcuan na quēndōo de. Núu ni cana ya ñn tēe jeē tu ní cuu circuncidar, te ma cúu de circuncidar. <sup>19</sup> Chí tú na vé sáha núu cúu yó circuncidar chí tuú, chí jeē cánuu gá cúu jeē na squícu vāha yó jñiñu cuní Yaa Dios. <sup>20</sup> Ná ñn ná ñn rō na quēndōo rō ndese iyó rō ná ni cana ya rohó ní cándíje rō. <sup>21</sup> Núu mozo jeē ní jeen ñayuu cúu rō ná ni cana ya rohó, te ma cóndíhvī ni rō jeē quēnda rō. Te núu iyó modo jeē quēnda rō nduu libre rō, te iyó vāha

jeē sāha ró. <sup>22</sup> Chi tēe cúu mozo jeē ní jeen ñayuu, te núu ní cana Jitoho yō de, te vijna chí ni nduu libre de nuū cuéchi de, jéjníñu de nuū maá Jítoho yō. Te suni súcuan tēe sájniñu cuenta maá, te núu ní cana ya de, te vijna chí ni nduu de mozo jejniñu nuū Cristo jeē ní nacuaan ya de. <sup>23</sup> Chi yahu ni cuu jeē ní nacuaan Yaā Dios rohó jijnáhan ró, cúu jeē ní jíhí Sēhe ya jehē rō. Núu súcuan te ma cuajniñu ró núu jniñu cáhá-ni jeē ndácu ñayuu ñayíví. <sup>24</sup> Núu súcuan hermano, ná ñin ná ñin ró na quéndōo ró núu Yaā Dios ndese iyó ró ná ni cana ya rohó.

<sup>25</sup> Te vijna te siquī ñayuu jeē iyó máá-ni, tú na jñūhun ní ndácu Jitoho yō nuū rī. Te na cáhán rī jeē jéni ní maá rí, chí ni cundáhú ní Jitoho yō ruhū, te ni sāha ya jeē cúu cáhán ndaā rī. <sup>26</sup> Jéni ní rī jeē váha-ni núu quendōo-ni tēe ndese cáhíyo de, jeē siquī jeē iyó jñúndóho tiempo yáha. <sup>27</sup> Núu iyó ñasihí ró, te ma ndusñn ró jíin ña. Te núu tu iyó ñasihí ró, te ma nducú ró ña. <sup>28</sup> Te núu qui-jnáhan ró, te nasūu cuéchi cúu. Te núu qui-jnáhan sūchi sáhí, te suni nasūu cuéchi cúu. Te ñayuu qui-jnáhan, chí niññi i jñúndóho ñayíví yáha, te cúní rī jeē ma niññi rō jñúndóho.

<sup>29</sup> Hermano jijnáhan ró, jñūhun jeē cáhán rī yáha cúu jeē yachi-ni ndihí tiempo jeē sāha yó jniñu ya. Núu súcuan te nde vijna te tēe iyó ñasihí, na cóndihví gā ni de siquī jniñu máa yá vésú siquī ña. <sup>30</sup> Te ñayuu jeē ní jíhí jnáhan vehe i, na sāha i nájnūhun jeē tu cúcuíhyá ni i. Te ñayuu cúsiñ ni, na sāha i nájnūhun jeē tu cúsiñ ní i. Te ñayuu jéen, na sāha i nájnūhun jeē nasūú ndajniñu i cúu. Ma cuáha i jñūhun jeē cási táca un jé ma cúu cóndihví ní i jniñu máa yá. <sup>31</sup> Te ñayuu jeē ní cacóndihví ní siquī ndajniñu ñayíví yáha, ma cuoneñu ga i jíin. Chí je yajni naa táca jéé iyó ñayíví yáha.

<sup>32</sup> Cúní rī jeē ma nácani ndasi ní rō siquī táca jéé iyó ini ñayíví. Chí tēe cúu soltero, ndéhvi ní de jniñu máá Jitoho yō, ndese cusñ ní Jitoho yō sāha de. <sup>33</sup> Te tēe iyó ñasihí chí ndéhvi ní de jniñu iyó ñayíví, ndese cusñ ní ñasihí de sāha de. <sup>34</sup> Te suni súcuan sñn sñn jéni ní ñahan iyó yñ jíin ñahan iyó máá. Chí ñahan iyó máá, ndéhvi ní ña jniñu máá Jítoho yō, chí cúní ña jeē coo ndoo coo ñi anuá ña jíin yíqui cúñu ña cuajniñu ña nuū yā. Te ñahan iyó yñ chí ndéhvi ní ña jniñu iyó ñayíví, ndese cusñ ní yñ ña sāha ña.

<sup>35</sup> Jeē váha máá ró jijnáhan ró cúu jeē ní cáhán rī súcuan. Chí nasūu jéé nducú rí casi rī jeē qui-jnáhan ró, chí sa suhva cúní rī jeē caca yíñúhún ró te nune ró cuajniñu cutú ró núu maá Jítoho yō.

<sup>36</sup> Te núu ñin tēe iyó sēhe sáhí de, te núu cuayñ i, te núu jéni ní de jeē váha ga jeē qui-jnáhan i, núu súcuan te na sāha de jeē jéni ní de, te cuáha de jñūhun qui-jnáhan i, chí nasūu cuéchi cúu. <sup>37</sup> Te núu ñin tēe ní cundaā ní de jeē cóndee sēhe sáhí de súcuan-ni, jeē

ma cuáha de i vésú fuerza jícan ñayuu i, núu súcuan te cuu quendōo i nájnūhun cúní de, chí jeē váha sāha de. <sup>38</sup> Núu súcuan te tēe jéhe jñūhun qui-jnáhan i, váha sāha de. Te tēe tu jéhe jñūhun, chí váha ga sāha de.

<sup>39</sup> Te ñahan ní qui-jnáhan, chí yññi ña ndaha yñ ña níni jeē tēcu de. Te núu je ní jíhí yñ ña, yūcuán na te je ní cuu libre ña jeē qui-jnáhan tucu ña jíin na-ni tēe cúu ní ña, te núu tēe cándje nuū Jítoho yō cúu de. <sup>40</sup> Te jéni ní rī jeē ndetu gā coo ña te núu quendōo ña súcuan-ni. Te suni jéni ní rī jeē jíin Espiritu Yaā Dios cúu jeē cáhán rī.

*Siquī cúñu ní sóco nuū ídolo*

## 8

<sup>1</sup> Te vijna te na cáchi rī siquī cúñu ní sóco nuū ídolo. Ndaā chí táca yó jéni ní yō jeē maá yó cúu jeē jíni ndese cúu. Te táca jéé jíni yō ún, chí nducú sāha jeē cundúxi yó. Te sa suhva jeē cundáhú ní yó jnáhan yó, sāha un jéé ije i jíin jñūhun ya. <sup>2</sup> Núu na-ni ñayuu jéni ní i jeē jíni váha i, te tuú chí ná tu cuni cuiti i nájnūhun cánuú cuni i. <sup>3</sup> Te sa suhva ñayuu jeē máa i jíin Yaā Dios, máa i cúu jeē jetáhú yá.

<sup>4</sup> Núu súcuan te na cástūhun rí siquī cúñu jeē ní casocó ñayuu nuū ídolo. Ndaā chí jíni yó jeē táca ídolo ñayíví, tú ndaā cuiti. Te tú na inga yaā iyó, chí máa ñin-ni Yaā Dios. <sup>5</sup> Te ñayuu chí cájeni ní i jeē iyó táca yáa ini andívi jíin ñayíví, chí cácahán i jeē iyó ndije cuehé yaā i jíin jitoho i. <sup>6</sup> Te nuū maá yó chí ñin-ni Yaā iyó, jeē cúu Tátá yó Yaā Dios. Te máa yá ní sāha táca jéé iyó, te cuenta maá yá cúu yó jijnáhan yó. Te suni iyó ñin-ni Jitoho yó Jesucristo, te nde nuū maá yá véji táca jéé iyó, te suni máa yá ní sāha yóhó.

<sup>7</sup> Te ñayuu cácañdje, chí tú ndihí i jíni jñūhun yáha. Chí sava i ní cacáan i ní chíñúhún i ídolo nde ná tu candje i. Te nde vijna núu cáyeji i cúñu ún te sāha i cuenta jeē ní sóco nuū ídolo cúu. Te siquī jeē ná tu ije i jíin jñūhun Yaā Dios, te jéni ní i jeē cunjéhen anuá i sāha cúñu jeē ní sóco nuū ídolo ún. <sup>8</sup> Te ndaā chí nasūu jéé véji yó cúu jeē sāha jeē cuatáhú Yaā Dios yohó. Chí núu véji yó, nasūu yúcan sāha jeē quéndōo váha ga yó nuū Yaā Dios. Te núu tu véji yó, ní tu sāha jeē quéndōo ndáhú gá yó nuū yā. <sup>9</sup> Te vésú tú ní ñin jéni jeē ma cúu caji ró cúñu ún, te coto ró jnáhan ró jéé ná tu ije jíin jñūhun ya, te ma sāha ró jéé suni caji i jeé jéni ní i jeé cuéchi cúu. <sup>10</sup> Váha ga ma caji ró núu súcuan, chí sanaa te hermano ró jeé ná tu ije jíin jñūhun ya, coto de rohó jéé véji ró ini vehe ídolo, chí jíni váha ró jéé tú na vé sāha. Te súcuan te sāha ró jéé cájni ní de jeé suni caji maá de cúñu jeé ní sóco nuū ídolo, vésú jéni ní de jeé cuéchi cúu. <sup>11</sup> Te súcuan stívi ró anuá hermano ró jeé ná tu ije jíin jñūhun ya, jeé

vēsú jini vāha máá ró jeē tú na vé sáha jeē cáji rō. Te tú vāha sáha rō, chi suni jehé máá de ni jihí Cristo. <sup>12</sup> Te núu súcuan stívi ró anuá hermano rō jeē ná tu ije jíin jnúhun ya, núu súcuan te siquí Cristo cóu jeē sáha rō cuéchi. <sup>13</sup> Núu súcuan te núu cūñu un sáha jeē quívi hermano rī cuéchi, te ma cáji cuiti ga rī cūñu ún, návāha ma sáha rī jeē quívi de cuéchi.

*Siquí jeē iyó derecho tēe cácuu apóstol*

## 9

<sup>1</sup> Te máá rī chi jíca libre rī, te iyó derecho rī siquí jeē cóu rī apóstol, tēe ní tají yá scáca jnúhun ya. Chi ní jito rī nuū máá Jítoho yō Jesús, te máá ró jijnáhan ró cácuu jniñu jeē ní sáha rī jeē ní squívi rī rohó ndaha Jítoho yō. <sup>2</sup> Te núu sava ga ñayuu tu jétáhú i jeē cóu rī apóstol, te nuū máá ró chí suu cóu ndije rī. Chí siquí jeē ní scandíje rī rohó jijnáhan ró, te jeē yúcuan cácuu ró prueba jeē steén jeē ndiso jniñu rī cóu rī apóstol nuū máá Jítoho yō.

<sup>3</sup> Te jnúhun yáha cáhán rī jehé máá rī nuū ñayuu cácahán siquí rī. <sup>4</sup> Achí rī: Iyó derecho rī cáji rī coho rī jeē cajehe ñayuu núu cúní rī. <sup>5</sup> Te suni iyó derecho rī núu jeē cuní rī condeca rī in hermana candíje cuu ñasihí rī, caca ña jíin rī, nájñuhun iyó ñasihí Pedro jíin táca gá apóstol jíin tēe cácuu ñani máá Jítoho yō. <sup>6</sup> ¿Chí cájeni ní rō jeē máá ruhū-ni jíin Bernabé tú na derecho rī jeē stóo rī jniñu cásáha rī jeē cótecu rī, návāha nune ga rī nacani rī jnúhun vāha ya, chí naún? <sup>7</sup> ¿A iyó soldado jeē técu de xūhún vehe de? ¿A iyó tēe jeē jítu uva te tu yéji de ndehé ún? ¿A iyó tēe jeē ndító lanchi te tu jhi de leche tí? Tú cuítí. ¿Te á suni tu iyó derecho rī cotecu rī siquí jnúhun ya naún? <sup>8</sup> Te ma cáni ní rō jeē táca jeē cahán rī yahá, máni máá jeē cácahán ñayuu ñayívi cóu. Chí nde máá ley yá jeē ní jéhe ya nuū Moisés, cáhán súcuan. <sup>9</sup> Chí cáhán nuū tútu ley yá: Ma chúhun ró ñunu yuhu stíqui, quítí jéxín trigo, achí. Te ndaá chí nasúu máni siquí stíqui cóu jeē ní cáhán yá súcuan. <sup>10</sup> Chí suni siquí máá yó ní cahán yá. Chí ley un ní jéhe ya jeē vāha máá yó, chí steén jeē tēe jítu jíin tēe jéxín trigo cánuú jeē nihín de sava un quívi ndutútú. <sup>11</sup> Te suni súcuan ruhú jijnáhan rī jeē ní cataji rī jnúhun Espíritu ini anuá rō, ¿te á véyi cóu jíin ró núu nastútú rī jeē cótecu rī nuū rō? <sup>12</sup> Te núu sava ga tēe cástéén nuū rō, iyó derecho de cacán de nuū rō, te nagá ní cuu ruhú jijnáhan rī jeē ma cóo derecho rī cacán rī.

Te tu ní cájicán rī derecho un, chí sa suhva ní jendeyí ní rī coto máá rī jeē cáji rī, návāha ma cási rī jeē cáca jnúhun vāha Cristo. <sup>13</sup> Te cájini rō jeē sutú ní cajejniñu ini templo, ní cacotecu de siquí jeē ní casocó ñayuu ini templo. Chí sutú ní cajejniñu nuū altar nuū ní casocó i quítí, suni ní cayejí de sava quítí

ún. <sup>14</sup> Te suni súcuan ní ndacu máá Jítoho yō jniñu jeē tēe cánacani jnúhun jeē jnáma ya yohó, siquí jniñu un nihín de jeē cótecu de. <sup>15</sup> Te ruhú tu ní jíicán cuiti rī derecho rī yahá, te suni nasúu jeē tēe rī jnúhun yáha návāha cuáha ró núu rī jijnáhan ró. Chí jéni ní rī jeē vāha ga núu na cóu rī nasúu jéé quíhin rī jeē cuáha ró, chí casi jeē cúsiñi rī scáca rī jnúhun ya súcuan-ni.

<sup>16</sup> Te tú vāha núu sátéyi rī máá rī siquí jeē nácani rī jnúhun jeē jnáma ya yohó. Chí in jeē ní tejniñu ya ruhú cóu, te cánuú squícu rī. Chí nacá ndahú cóu rī te núu tú nacani rī jnúhun ya. <sup>17</sup> Te núu jeē cóu ní máá rī sáha rī nuú, yúcuán na te cuu cacán rī yahú rī. Te tuú chí cánuú sáha rī, chí máá Yáa Dios ní tee ya jniñu siquí rī. <sup>18</sup> Núu súcuan te yahú rī cóu jeē cúsiñi ní rī jeē súcuan-ni nácani rī jnúhun jeē jnáma ya yohó, te tu jíicán rī derecho rī jeē cotecu rī siquí jeē nácani rī jnúhun ya.

<sup>19</sup> Chí vēsú tú ní in ñayuu ndácu jniñu nuú rī, te ní sáha rī máá rī mozo nuú táca i jeē nácani rī jnúhun nuú i, návāha nihín rī cuehé i candíje i Cristo. <sup>20</sup> Núu ine rī jíin jnáhan rī hebreo te sáha rī nájñuhun cásáha i, návāha cuu scándíje rī i. Chí násáha rī máá rī nájñuhun tēe cáyihí chíji ley Moisés, návāha cuu scándíje rī i jeé cáyihí i chíji ley un, vesú tuá yáhi rī chíji ley un. <sup>21</sup> Te suni násáha rī máá rī nájñuhun ñayuu tu cáyihí chíji ley Moisés, návāha cuu scándíje rī ñayuu ún. Te vēsú súcuan te yáhi rī chíji ley Yáa Dios, chí suu cóu ley Cristo jeē squícu rī. <sup>22</sup> Te núu ine rī jíin ñayuu jeē ná tu ije jíin jnúhun ya, te sáha rī máá rī nájñuhun jeē ná tu ije rī jíin jnúhun ya, návāha cuu scándíje ga rī i. Núu súcuan te násáha rī máá rī núu ndese cándaa táca ñayuu, návāha táca-ni modo un te cuu scándíje rī sava i. <sup>23</sup> Táca yáha sáha rī jeē siquí jnúhun jeē jnáma ya yohó, návāha suni nihín rī tahú jeē ndiso jnúhun ya.

<sup>24</sup> Je cájini rō jeē tēe cájini carrera, jendaá chí ndihi de cájini, te in-ni de cúndeyí nihín premio. Te suni súcuan nducú ndéyi máá ró squícu ró, návāha nihín rō premio nuú yá. <sup>25</sup> Te táca tēe cúní cándeyí siquí in deporte, chí cácuáha de te cándito de máá de. Súcuan cásáha de návāha nihín de in premio jeé cóu corona ndaha yújnu jeé náa yachí. Te máá yó chí sa suhva cánducú ndéyi yó návāha nihín yō in premio jeé ma náa cuiti. <sup>26</sup> Te máá rī suni nducú ndéyi rī nájñuhun tēe cájini, te tu nducú ndéyi cáha rī. Te sáha rī nájñuhun tēe cácajnáhan juego jeé tu jéhe iyú de, chí queé jniñu sáha rī. <sup>27</sup> Chí sa suhva stóho rī yiquí cóuñu rī, te stáhví ní rī máá rī squícu rī. Chí vēsú ní stáhví ní rī inga ñayuu jeé nducú ndéyi i, te núu tu nducú ndéyi máá rī te snáa rī premio rī.

*Siquí jeē ma chíñuhún i ídolo*

## 10

<sup>1</sup> Hermano jijnáhan ró, cúní rí jeē na jécūhun ni rō ndese ni cajica jíi yō jengahán. Chi ndihí de ni cajica chīji vicō jeē ni stéén ichi nuū de, te ndihí de ni cayāha mēhñú ndute Mar Rojo jeē ní cusán, ni nune ichi. <sup>2</sup> Súcuan cúu jeē ní canduu inuú ndihí i jíin Moisés, chi ni candiquín i de chīji vicō jíin mēhñu mar. <sup>3</sup> Te ndihí i chi inuú-ni ni cayeji i alimento jeē ni jéhe máá Espíritu. <sup>4</sup> Te suni ndihí i ni cajihí ndute jeē ni jéhe Espíritu. Chi ni cajihí i ndute jeē ní cane jicā cáva nuū ní cajica cuu i. Te Cristo cúu nájnūhun cava un jéé jéhe ya ndute cotecu yō ní cáni. <sup>5</sup> Te vésú súcuan te cuehē i ni cunihni ni i, te tu ní cúsñi ni Yaa Dios jíin i, te jeē yúcuan ní cajihí i nuū ñūhun téhé.

<sup>6</sup> Te tāca jéé ní cuu ún, ñin ejemplo cúu nuū yō, návāha ma ndíyo ni yō tāca jéé neé, nájnūhun ni candiyo ni ñayuu ún. <sup>7</sup> Te ma chihñúhún ró ídolo, nájnūhun ni casáha sava i. Chi súcuan cáhán nuū tútu íi: Ni cacucōo ñayuu ún, ni cayeji i ni cajihí i vico ídolo, te ni ndocuñí i ni cajita jéhé i, áchi. <sup>8</sup> Te ni ma cáca jnéni ró nájnūhun ni casáha sava i, te ni cajihí ocō uní mül i jeē ñin quiví-ni. <sup>9</sup> Te ni ma sáha ró jniñu jeē squití ní rō Jitoho yō, nájnūhun ni casáha sava i, te ni cajihí i jeē ní catuu coō i, ni sáha ya. <sup>10</sup> Te ni ma cahán sóo ró siquí Yaa Dios, nájnūhun ni cacahán sóo sava i, te ni cajihí i jeē ní jehni ndajéhé yā i.

<sup>11</sup> Te tāca jéé ní cuu ún, chi ñin ejemplo cúu nuū yō. Te súcuan yósó nuū tútu návāha na chūhun váha ni maá yō. Chi cácuu yō ñayuu cátecu quiví cuándihí ñayiví. <sup>12</sup> Núu súcuan te róhó jéé cájeni ni rō jeē cáhñin nihin ró jéé ma sáha ró cuéchi, coto má quiví ró cuéchi. <sup>13</sup> Chi máni iyó jéé nducú squiví róhó cuéchi, te inuú-ni cándoho ró súcuan nde jíin táca gá ñayuu. Te cuu cucáhu ni rō Yaa Dios jeē ma cuáha ya jñūhun jeē vihyá gā coto ndee jexeén róhó vésú jeē cúu cundeyí ró jíin. Chi sa suhva núu vēji jeē nducú squiví róhó cuéchi, te chindéé ñáhán yá rohó quenda ró te cundeyí ró siquí.

<sup>14</sup> Náni máni, ma chihñúhún cuiti ró ídolo núu súcuan. <sup>15</sup> Cáhán rí jíin ró jéé cúu ró ñayuu cájecūhun ni, te na sáha ró cuenta núu ndaá jñūhun cáhán rí. <sup>16</sup> Máá copa íi jeē cájicán tahú yō jehé, suu cájihí cáhuu yó jéé steén yō jeē inuú cúu ndihí yó, chi ni jeti niñí Cristo jeē siquí yó ná ni jihí yā jicā cruz. Te pan jeē sacuéchi yó cáyeji cáhuu yó, stéén jeē inuú cúu ndihí yó siquí jeē ní jéhe Cristo yiqui cúñu yā ni jihí yā jehé yō. <sup>17</sup> Te vésú cuehē yō iyó, te ñin-ni ñayuu cácuu yó, chi ñin-ni pan un cáyeji cáhuu yó siquí jeē cácdíje yó.

<sup>18</sup> Condēhe ró ndese casáha ñayuu Israel. Tāca téé jeē yéji quiti jeē ní sócō nuū yā, chi inuú-ni cúu ndihí de siquí jeē cáyeji de jeē ní sócō ún. <sup>19</sup> Núu súcuan te cáhán rí jeē tu ndé jéjñíñu ídolo, ni tu jéjñíñu cúñu jeē

ni sócō nuū ídolo, chi inuú cúu jíin táca gá cúñu. <sup>20</sup> Te suni cáhán rí jeē ñayuu tu cájini jñūhun Yaa Dios, núu cáscōc i, te nuū tachí cáscōc i, nasūu nuū Yaa Dios. Te tu cúní rí jeē cuajñíñu ró nuū tachí. <sup>21</sup> Ma cúu coho ró copa máá Jitoho yō te nuū cájihí ró jéé ní sócō nuū tachí. Te ma cúu caji ró nuū mesa Jitoho yō te núu cáyeji ró jeē ní sócō nuū tachí. <sup>22</sup> Ma quiví nduu yō súcuan jíin táchí, návāha ma cucuñí Jitoho yō jíin yó. ¿Chí téyí gá máá yó vésú máá yá jeē ma cúu stóho ya yohó, cájeni ni rō, chí naún?

### *Ndihí chí sáha yó jíin jñūhun cúndáhú ní*

<sup>23</sup> Te ndaá cúu jeē cacahán jeē ndihí-ni jniñu iyó váha sáha yó núu ndese cúní yō. Te tuú chí nasúu ndihí sáha jeē quéndōo váha ánuá yō. Ndhí chí cuu sáha yó, te vésú súcuan te nasúu ndihí sáha jeē ije jnánhan yó jíin jñūhun ya. <sup>24</sup> Chi cánuú sáha yó jéé váha jnánhan yó, nastuu máni máá jéé váha máá yó.

<sup>25</sup> Cuu caji ró ndihí-ni cúñu cúyāhu nuū yáhu, te ma cájnūhun ró ni ma cáni ni ró núu jeē ní sócō nuū ídolo cúu. <sup>26</sup> Chi cuenta máá Jitoho yó cúu ñayiví jíin ndivii jeē iyó ini, te cuu cuajñíñu yó.

<sup>27</sup> Te núu ñin tēe tu cándíje, cana de róhó caji ró jíin de, te núu cácuu ró quihñi ró, núu súcuan te caji ró táca jéé cáni de nuū ró. Te ma cájnūhun ró ni ma cáni ni ró núu jeē ní sócō nuū ídolo cúu. <sup>28</sup> Te núu cachi ñin i nuū ró jeē cúñu ni sócō nuū ídolo cúu, yucúan na te ma cáji ró, chí siquí jeé jéni ni i jeé cuéchi cúu, te tu cúní ró sáha ró jéé quiví i cuéchi. <sup>29</sup> Te súcuan cáhán rí siquí jeé inga i cájeni ni i jeé cuéchi cúu, te nasūu jéé súcuan cájeni ni máá ró.

Te sanaa te cahán ñin ró: ¿A tu iyó libre rí caji rí jeé cuní maá rí, vésú cájeni ni inga i jeé cuéchi cúu? <sup>30</sup> ¿Te núu nácuatáhú rí nuū Yaa Dios te yéji rí, te najehé cacahán i siquí rí jeé yéji rí? achi ró. <sup>31</sup> Tuú chí ndihí jeé sáha ró, vésú jeé caji ró chí jéé coho ró, chí na-ni jniñu sáha ró, ndihí na sáha yihñúhún ró jíin Yaa Dios, návāha cuní ñayuu jeé luu cújéhu ya. <sup>32</sup> Te ma sáha ró jniñu jeé squiví ró ñayuu nuū cuéchi, cúu ñayuu hebreo, cúu ñayuu táca nación jeē tu jíin jñūhun ya, cúu ñayuu cácdíje Yaa Dios. <sup>33</sup> Te ruhú chí nducú rí jeé na cúsñi ni táca ñayuu jíin táca jniñu sáha rí. Tu nducú rí jeé váha máá-ni rí, chí sa nducú rí sáha rí jeé váha cuehē ñayuu, návāha cácu i.

## 11

<sup>1</sup> Te na ndácu ró ruhú jijnáhan ró, nájnūhun ndácu máá rí Cristo.

### *Siquí ndese cánuú sáha ñahan cándutúttú*

<sup>2</sup> Váha casáha ró, hermano, jeé niní cáncūhun ni ró ruhú, te cándihvi ni ró jíin táca jniñu jeē ní steén rí nuū ró. <sup>3</sup> Te cúní rí jeé na jécūhun ni ró jeé Cristo cúnuú yá

nuū tāca tēe. Te tēe cūnuú de nuū ñasihí de. Te Yaā Dios cūnuú yá nuū Cristo. <sup>4</sup> Nūū ñn tēe ññuhun de lélú te jícán tahú de chí nácani de jñuhun nuū ndutútú ñayuu cácanđje, núu súcuan te jéhe de jñuhun canu máá de. <sup>5</sup> Te sa núu ñn ñahan tu ndési xiní ña te jícán tahú ña chí nácani ña jñuhun, núu súcuan te jéhe ña jñuhun canu máá ña, chí ñn-ni cúu un núu ní sáte xiní ña. <sup>6</sup> Chí núu tú casi ña xiní ña, vāha ga na sáte ña ixi ña núu súcuan. Te núu cúcanu ña jeē sáte ña ixi ña chí jéē sáte líi ña, te na cási ña núu súcuan. <sup>7</sup> Te tēe chí ma cási de xiní de, chí máá de cúu muestra jeē steén ndese cúu Yaā Dios jeē cujéhu ya. Te ñahan chí stéén ña jeē cujéhu tēe. <sup>8</sup> Chí ná ni sáha ya tēe, te nasūu jíin yiqui ñahan ni sáha ya, chí sa suhva jíin yiqui tēe ni sáha ya ñahan. <sup>9</sup> Te ñahan chí ni cuvāha ña jeē siquí tēe, nasūu tēe jeē siquí ñahan. <sup>10</sup> Te jeē yúcuan cánuú jéē cóndesi xiní ñahan, te suu stéén jeē cujéhu tēe, chí suni cándehé ndajehé yā ndese sáha ña. <sup>11</sup> Te vesú súcuan te yohó jéē candíje yó, chí jíni yó jeē tu iyó tēe núu jeē tu iyó ñahan, te tu iyó ñahan núu jeē tu iyó tēe. <sup>12</sup> Chí vesú ni sáha ya ñahan jíin yiqui tēe, te vijna cácu tēe chíji ñahan, te máá Yaā Dios cúu jeē sáha táca-ní.

<sup>13</sup> Na sáha máá ró cuenta ¿á iyó váha núu tu ndési xiní ñahan te jícán tahú ña nuū Yaā Dios? <sup>14</sup> Chí sáha yó cuenta jeē ñni ñayiví yáha, núu cáni ixi tēe te cúcanu de sáha. <sup>15</sup> Te ñahan chí sa vāha jito ña te núu cáni ixi ña, chí suu ni jéhe ya jeē cóndesi xiní ña. <sup>16</sup> Te núu ndé ñn ñayuu cuní i cahān i siquí jñuhun yáha, te ruhú jíin táca grupo ñayuu cácanđje nuū Yaā Dios, tú na inga costumbre jejnúhún rí siquí jñuhun yáha.

### *Jeē castívi i siquí Cena Jitoho yó*

<sup>17</sup> Te iyó inga jñuhun cánuú cahān rí jíin ró, chí tu cúu cahān rí jeē vāha casáha ró. Chí nuū cándutútú ró te tu sáha jeē quéndōo vāha ga ró, chí sa jeē castívi ró. <sup>18</sup> Xihna jñuhun yáha cáhān rí, jeē nihín rí jñuhun jeē nuū cándutútú ró te cácusín ni ró. Te jéni ni rí jeē ndaā cúu. <sup>19</sup> Chí níni coo sava ró jéē cusín ni, návāha natūu ndé-ni cúu jeē cácanđje vāha mēhñu ró. <sup>20</sup> Te jeē cácusín ró súcuan nuū cándutútú ró, te nasūu cena máá Jitoho yó cúu jeē cáyeji ró núu súcuan. <sup>21</sup> Chí núu cáyeji ró, te táca ñn ñn ró cúní caji xihna gā vesú jñáhan ró. Te súcuan te sava ró tu cánihñn, te cáji sōco, te sava ró cániñni jeē cájihi cuehé. <sup>22</sup> ¿A tu cánevāha ró vehe nuū cáji ró coho ró, chí naún? Chí jeē casáha ró súcuan cúu jeē tu iyó yññuhún ró ñni vehe nuū cándutútú ñayuu cácanđje Yaā Dios, chí casáha ró jéē cácusanu ñayuu jeē tú na vé névāha. ¿Ndesse cahān rí jíin ró núu súcuan? ¿A cahān rí jeē vāha casáha ró? Tuú chí nasūu jéē vāha cúu jeē casáha ró súcuan.

### *Siquí jeē ní jequín Jitoho yó Cena yā* (Mt. 26.26-29; Mr. 14.22-25; Lc. 22.14-20)

<sup>23</sup> Chí jñuhun yáha jéē ní nastéén rí núu ró, chí nuū máá Jitoho yó ni nihín rí: Jeē máá jecuáá jeē ní nastúu de Jitoho yó Jesús, te ni quihin ya pan. <sup>24</sup> Te ni nacuatáhú yá, te ni tahú cuéchi yá, te ni cahān yá jíin tēe cácuáha jíin yá: Quihin te caji ró jijnáhan ró, chí yáha cúu yiqui cúñu rí jeē ní sōco rí jeē siquí ró. Te níni caji ró súcuan jeē cáñuhun ni ró ruhú jeē ní jíhi rí jehē ró. Achí yá. <sup>25</sup> Te suni súcuan ni quihin ya copa ná ni cuu ni cuxíni ya jíin de, te ni cahān yá: Jeē ññuhun copa yáha cúu niñi rí jeē sácútu contrato jeē jeē jnáma rí ñayuu. Te táca jínu jeē cájihi ró, te nucūhun ni ró ruhú. Achí yá. <sup>26</sup> Chí táca jínu jeē cáyeji ró pan un te cájihi ró copa un, súcuan cástéén ró jeē ní jíhi Jitoho yó jehé yó. Te súcuan na sáha ró ndé quiví ndíji ya.

### *Ndesse caji yññuhún i Cena yā*

<sup>27</sup> Te núu na-ni ñayuu caji i pan un chí coho i copa Jitoho yó ún, te núu tu sáha yññuhún i nuū Yaā Dios, núu súcuan te sáha i cuéchi jeē tu iyó yññuhún i siquí yiqui cúñu máá Jitoho yó jíin siquí niñi yá. <sup>28</sup> Núu súcuan te coto ndee ró máá ró núu iyó ndoo ánuá ró jeē tú cuéchi ró. Te sáa te cuu caji ró pan un te coho ró copa un. <sup>29</sup> Chí núu ñn ñayuu tu yéji tu jíhi yññuhún i te tu nucūhun ni i jeē yiqui cúñu yá cúu, ñayuu ún chí nihín i castigo núu na cáji i coho i. <sup>30</sup> Jeē yúcuan cúu jeē iyó cuehé ñayuu cácuñu jíin jéē ní cacuxíi, cáñiyo mēhñu ró. Te sava i je ni cajihi. <sup>31</sup> Te núu coto ndee yó máá yó nde ná tu caji yó, te Jitoho yó ma cuáha ya castigo yohó. <sup>32</sup> Te núu Jitoho yó jéhe ya castigo yohó, te súcuan stóho ya yohó návāha ma jnahnú ndetū yó jíin ñayuu ñayiví.

<sup>33</sup> Nání maní, núu súcuan te jeē cándutútú ró jeē cáji ró Cena yā, te condetu ró te caji ñnuú ró. <sup>34</sup> Te núu ñn ñayuu jíi i sōco, te xihna gā na cáji i vehe i návāha ma stívi i nuū cándutútú ró. Te súcuan te ma cuáha ya castigo i. Te quiví jecondéhe rí rohó te cachí rí ndese coo sava ga jññu.

### *Siquí táca táhū jeē jéhe Espíritu*

## 12

<sup>1</sup> Hermano, cúní rí jeē na jécūhun ni ró siquí táca táhū jeē jéhe Espíritu nuū yó, suu táca modo jejnñu ñn ñn yó núu Yaā Dios.

<sup>2</sup> Te cájini ró jeē ná ni cuu ró ñayuu ná tu candíje, te ni cacondihví ni ró ni cachññuhún ró ídolo ññhín. <sup>3</sup> Te vijna te na jécūhun ni ró jeē núu ndé ñayuu cahān ndevāha i siquí Jesús, te nasūu jíin poder Espíritu Yaā Dios cúu jeē cahān i súcuan. Te ni ñn i ma cúu cahān i jeē Jitoho i cúu Jesús, te núu tu ndéé poder Espíritu Santo ñni i.

<sup>4</sup> Te sñn sñn tahú jéhe ya jeē cuajññu ñn ñn yó núu yá, te ñn-ni máá Espíritu cúu jeē

jéhe. <sup>5</sup> Te s̄in s̄in jéjníñu yó, te nuū maá ñin-ni Jitoho yó jéjníñu yó. <sup>6</sup> Te s̄in s̄in modo sáha yó jniñu ya, te ñin-ni Yaā Dios cúu jeé sáha jniñu un jíin yó. <sup>7</sup> Te nuū ná ñin ná ñin yó ní jéhe Yaā Dios tahū jeé sáha Espiritu ya jíin yó, návaha na sáha yó jéé ije jnánhan yó jíin jnūhun ya. <sup>8</sup> Chi sava yó ní canih̄in tahū jeé ndichí cáhán yó jnūhun ya, sáha maá Espiritu. Te sava ga yó ní canih̄in yó jeé cúu jécūhun vāha ni yó te castūhun yó, te suni maá Espiritu sáha. <sup>9</sup> Te nuū sava ga yó ní jéhe ya tahū jeé cúu cándije nih̄in yó jéé sáha ya jeé jicán yó, te sava ga yó cúu sáha yó jéé ndúvāha ñayuu cácuñu, te suni maá Espiritu sáha. <sup>10</sup> Te sava ga yó cúu sáha jniñu jéhnū jíin fuerza Yaā Dios. Te sava ga yó cúu nácani jnūhun ya. Te sava ga yó ní sáha ya jeé nácuni yó táca jnūhun, núu vēji nuū Espiritu yá chí tuú. Te sava ga yó ní nih̄in tahū jeé cáhán yó tijni yuhu jeé tu jécūhun ni yó. Te sava ga yó cúu nacastūhun yó jnūhun ni cahān jnánhan yó jíin inga yuhu ún. <sup>11</sup> Te táca tahū yáha, chí ñin-ni maá Espiritu sája, te s̄in s̄in jéhe ya nuū ñin ñin yó, ndese nūjnahan ni maá yá.

*Ndih̄i yó cúu nájñūhun ñin na yiqui cúñu*

<sup>12</sup> Chi nájñūhun ñin yiqui cúñu iyó cuéhē parte, súcuan cúu yó jíin Cristo jeé cúu yó nájñūhun yiqui cúñu yá, chí ñin na cúu yó jíin yá. Te vesú cuéhē parte cácuu yó te ñin-ni cúu yó, nájñūhun ñin yiqui cúñu jeé iyó cuéhē parte. <sup>13</sup> Chi ñin na ní canduu yó jíin yá ní sáha ñin-ni maá Espiritu ná ní cajendute yó. Súcuan cúu vesú cúu yó ñayuu hebreo chí ñayuu griego, vesú mozo jeé ní jeen ñayuu chí téé sájñiñu cuenta maá. Te ndih̄i yó chí ñin-ni Espiritu ní canih̄in yó.

<sup>14</sup> Te ñin yiqui cúñu chí nasúú ñin-ni parte cúu, chí sa cuéhē parte cúu. <sup>15</sup> Te núu jehē cahān: Nasūu cuenta yiqui cúñu cúu ri, chí nasúú ndaha cúu ri, te tuú chí parte yiqui cúñu cúu nahín. <sup>16</sup> Te núu sōho cahān: Nasūu cuenta yiqui cúñu cúu ri, chí nasūu tññū cúu ri, te tuú chí parte yiqui cúñu cúu nahín. <sup>17</sup> Núu n̄í yiqui cúñu yó cúu tññú, ¿te ndese cuní sōho yó núu súcuan? Te núu n̄í yiqui cúñu yó cúu sōho, ¿te ndese cuaan yó xicō núu súcuan? <sup>18</sup> Te Yaā Dios ní chujnánhan ya ñin ñin parte yiqui cúñu, nájñūhun cuní yá jeé coo. <sup>19</sup> Chi núu ñin-ni parte cúu ndih̄i, te nasúú ñin n̄í yiqui cúñu cúu núu súcuan. <sup>20</sup> Te tuú chí cuéhē parte iyó, te ñin-ni yiqui cúñu cúu.

<sup>21</sup> Te ni ma cúu cahān tññū jíin ndaha: Tu jíni ññhún rí rohó. Te ni xiní ma cúu cahān jíin jéhē: Tu jíni ññhún rí rohó. <sup>22</sup> Chi sa suhva táca parte yiqui cúñu jeé jéni ní yó jeé núu ga fuerza, suu cúu jeé cánuú gá. <sup>23</sup> Te táca parte yiqui cúñu jeé jéni ní yó jeé tu cáa vāha, suu cúu jeé yucún gá chūhun yó sahma. Te parte jeé tú-ni luu cáa, sa vāha ga jési yó. <sup>24</sup> Chi parte jeé lúu cáa, tu cánuú

jeé condih̄yū. Chi súcuan ní chujnánhan Yaā Dios yiqui cúñu, jeé yucún gá ndító yó jéé tu cáa luu. <sup>25</sup> Súcuan ní sáha ya návaha ma cus̄in táca parte yiqui cúñu, chí sa chindéé ñájñánhan vāha jíin jnánhan. <sup>26</sup> Te núu jérú ñin parte yiqui cúñu, te suni n̄í cáhnu-ni jérú. Te núu ñin parte ndító yucún yó, te suni ndih̄i-ni parte quéndōo vāha.

<sup>27</sup> Te róho jíjnánhan ró chí nájñūhun yiqui cúñu Cristo cácuu ró, chí ñin na cúu yó jíin yá. Te ná ñin ná ñin ró cúu ñin ñin parte yá. <sup>28</sup> Núu súcuan te s̄in s̄in jniñu ní jéhe Yaā Dios nuū táca ñayuu cácañdije jeé cácuu i nájñūhun ñin ñin parte yá: Te suu ñin parte yá cúu táca apóstol jeé ní jeni ya x̄ihna gā jeé scáca de jnūhun ya. Yūcuán na te jeé uú, téé cáncani jnūhun ya, te jeé uní, téé cástéén. Yūcuán na te ñayuu casáha jniñu jéhnū jíin fuerza yá, jíin ñayuu casáha jeé ndúvāha ñayuu cácuñu, jíin ñayuu cachindéé ñájñánhan, jíin ñayuu cándiso jniñu, jíin ñayuu cácañhan s̄in s̄in yuhu jeé tu cájecūhun ní. <sup>29</sup> ¿A ndih̄i yó cácuu apóstol, chí naún? ¿A ndih̄i yó cáncani jnūhun? ¿A ndih̄i yó cástéén? ¿A ndih̄i yó cuu sáha jniñu jéhnū? <sup>30</sup> ¿A ndih̄i yó cuu sáha jeé ndúvāha ñayuu cácuñu? ¿A ndih̄i yó cuu cahān s̄in s̄in yuhu? ¿A ndih̄i yó cuu nacastūhún yuhu ún, chí naún? Tuú chí s̄in s̄in tahū ní canih̄in yó. <sup>31</sup> Núu súcuan te na cóndih̄v̄i ní rō cacān rō jeé cuáha Yaā Dios tahū cánuú gá nuū rō. Te vijna te na stéén r̄i nuū rō ñin jeé vāha ga nuū táca gá tahū ún, suu jnūhun cundáhú ní jnánhan.

*Jñūhun jeé cundáhú ní jnánhan*

### 13

<sup>1</sup> Vesú núu cuu cahān yó tijni yuhu jeé cácañhan ñayuu chí jéé cácañhan ndajéhé Yaā Dios, te núu tu cundáhú ní yó jnánhan yó, te jnūhun cahān yó un cúu nájñūhun ñin tambor jeé ndaxín cáján chí ñin platillo jeé ndaxín cáxin sánee sōho ñayuu. <sup>2</sup> Te vesú cuu nacani vāha yó jnūhun ya, te cuu jecūhun ní yó táca jnūhun sáhi yá jíin táca jnūhun ndichí, te núu tu cundáhú ní yó jnánhan yó, te tu ndé jéjñiñu cuiti yó núu súcuan. Te vesú cuu candije téyí yó jeé nde cuu cahān yó jeé cūjiyo yucu, te núu tu cundáhú ní yó jnánhan yó, te tu ndé jéjñiñu cuiti. <sup>3</sup> Te vesú na sája yó ndih̄i jeé névāha yó cuu ñayuu ndahú, te vesú núu cuāha yó jnūhun cahmu ñayuu yohó jéé siquí jnūhun ya, te núu tu cundáhú ní yó jnánhan yó, te tu ndé jéjñiñu cuiti.

<sup>4</sup> Ñayuu cundáhú ní chí iyó paciencia jíin jnánhan, te iyó mání ní, te tu cúcuésún ní. Te tu sándúxí, te tu sátéyí maá. <sup>5</sup> Tu sájéé ní, tu ndúcu jéé cuu maá-ni, tu quití ní, tu ñññun ní jnūhun quití ní. <sup>6</sup> Tu cúsh̄ ní jíto jniñu néé casáha jnánhan, chí sa cúsh̄ ní jíin jniñu vāha. <sup>7</sup> Ñayuu cundáhú ní chí ndih̄i jéhn̄de ní ndoho jehé jnánhan, te tu jécuiñi jeé candije jnánhan,

jiín jée ñúhun ni jeē squicu jnáhan, jiín jée jéndeiy ni jiín jnáhan.

<sup>8</sup> Jñuhun cundáhu ni chi ma náa cuiti. Te quiji quiví jeē tuá nacani i jñuhun, ni tuá cahán i tijni yuhu, ni tuá jini ñúhún jñuhun ndíhí. <sup>9</sup> Chi tu jini váha yáha yó vijna, te jñuhun cáncani yó suni jecu-ni cúu. <sup>10</sup> Te núu na quiji quiví jeē cuni yó ndíhi, yūcuán na te tuá coo jeē jini yó jecu-ni.

<sup>11</sup> Ná ni cuu yó sūchi lúli te ni cahán yó, ni jeni ni yó, ni jecūhun ni yó nájñuhun sūchi lúli. Te ná ni jehnu yó te ni stóo yó modo sūchi lúli. <sup>12</sup> Te suni sūcuán, jecu-ni jécūhun ni yó vijna, nájñuhun jeē jito yó núu ñn espejo jeē tú ndíjin váha. Te cúcuéé gá te jecūhun cáji ni yó ndíhi. Te vijna chi jecu-ni jini yó, te cúcuéé gá te cuni váha yó ndese Yaa cúu ya, nájñuhun jini váha ya yohó ndese ñayuu cúu yó. <sup>13</sup> Núu sūcuán te iyó úní jñuhun jeē quéndoo cutú ní cáni: Jeē candíje níhin yó jée squicu ya jeē ní jéñuhun ya, jeē cócuhun ni yó táca jée váha coo, jiín jée cundáhu ni yó jnáhan yó. Te jñuhun cundáhu ni chi jéhnu ndasí gá cúu nuú táca jée yáha.

*Siquí jeē cácahán i tijni yuhu*

## 14

<sup>1</sup> Na cóndíhví ni ró cundáhu ni ró jnáhan ró, te suni cóndíhví ni ró cacán ró táca táhū jeē jéhe Espíritu. Te tahū jeē cánuú gá cúu jeē nácani ró jñuhun ya. <sup>2</sup> Chi tée néváha tahū jeē cahán de tijni yuhu jeē tu jécūhun ni de, chi máa-ni Yaa Dios jini jeē cahán de, nasūu ñayuu. Chi ni ñn i ma jécūhun ni jeē cahán de. Chi sáha Espíritu jeē cahán de táca jñuhun yisáhi. <sup>3</sup> Te sa suhva tée nácani jñuhun ya, chi jiín ñayuu cahán de náváha íje i jiín jñuhun ya, te stíhví ni de i, te cahán ndeyí ni de jiín i. <sup>4</sup> Te tée jeē cahán tijni yuhu, chi máa-ni de íje jiín jñuhun ya. Te tée jeē nácani jñuhun ya, chi sa suhva sáha de jeē ñayuu cácañdije íje i jiín jñuhun ya.

<sup>5</sup> Nújnahan ni rí jeē ndíhi ró cuu cahán ró tijni yuhu jeē tu jécūhun ni ró, te jeē cánuú ndasí gá cúu jeē nácani ró jñuhun ya. Chi jéhnu ga jniñu sáha tée nácani jñuhun ya vesú tée cahán tijni yuhu. Chi núu tú tee castūhun jñuhun cáhan de, te ma cuajniñu jeē íje ñayuu cácañdije. <sup>6</sup> Jeé yúcuán hermano jijnáhan ró, núu na jée rí nuú ró, te núu cahán rí tijni yuhu jeē tu jécūhun ni ró, ¿te ndé cuajniñu ún? Te núu na cahán rí ñn jeē ní steén yá, chí ñn jeē cutúhva ró jñuhun ndaa, chí ñn jeē nácani rí jñuhun ya, chí ñn jeē steén rí nuú ró, yúcuán cúu jeē cuajniñu.

<sup>7</sup> Sáha yó cuenta jeē nájñuhun instrumento música, vesú tu técu, te cuu cata, nájñuhun flauta jiín arpa. Te núu tu jita sín sín nota, ¿te ndese cuni yó na yaa jita? <sup>8</sup> Te núu corneta tu jecu cáji, te ni ñn tée ma sátúhva de quihín de guerra. <sup>9</sup> Te suni

súcuán róhó jijnáhan ró, núu tu cáhan cají ró jñuhun jecūhun ni ñayuu, ¿te ndese cuni i ró vé cahán ró? Chi jñuhun cáhan ró ndíso tachí cuahán jiín. <sup>10</sup> Te ndaa chí iyó cuéhé yuhu ini ñayiví, te táca yuhu chí iyó ñayuu jécūhun ni. <sup>11</sup> Te núu tu jécūhun ni yó yuhu cáhan ñn tée, te cúu yó nájñuhun tée ñuu jicá núu tée cáhan, te suni nájñuhun tée ñuu jicá cúu de nuú maá yó. <sup>12</sup> Jeé yúcuán róhó jée cácuni ndasí ró níhin ró tahū jeé jéhe Espíritu, na cácan ró tahū jeé sáha jeé íje ñayuu cácañdije jiín jñuhun ya.

<sup>13</sup> Núu sūcuán te ñayuu jeé cahán inga yuhu jeé tu jécūhun ni i, na cacán tahú i jeé cuu nacastūhún i yuhu ún. <sup>14</sup> Chi núu jicán tahú yó jiín inga yuhu, te máa ánuá-ni yó cúu jeé jicán tahú, te tu ndé jéjniñu nuú jeé níjnúní yó. <sup>15</sup> ¿Ndese sáha yó núu sūcuán? Na cacán tahú yó jiín ánuá yó, te suni jiín jée níjnúní yó. Na cáta yó yaa íi jiín ánuá yó, te suni jiín jée níjnúní yó. <sup>16</sup> Chi núu nácuatáhu ró máni jñuhun jeé ní quiji nuú ánuá ró te tu jécūhun ni ró, núu sūcuán te tée jini sóho te tu jécūhun ni, ma cúu nacuatáhu de jini ró. Chi tu jini cuiti de na jñuhun cáhan ró. <sup>17</sup> Ndaa chí váha nácuatáhu máa ró, te inga de chí tú na vé níhín de jeé íje de jiín jñuhun ya. <sup>18</sup> Na cutáhu rí nuú Yaa Dios jeé cahán gá rí jiín tijni yuhu vesú maá ró jijnáhan ró. <sup>19</sup> Te vesú sūcuán te núu íne rí nuú cáyūcu tútú ñayuu cácañdije, te nújnahan gá ni rí cahán rí uhún-ni jñuhun jeé jécūhun ni i te steén nuú i, vesú jeé cahán rí uxí mil jñuhun jiín inga yuhu jeé tu jini cuiti i.

<sup>20</sup> Hermano jijnáhan ró, ma cáni ni ró nájñuhun sūchi lúli, chí sa suhva na íje ró jée jecūhun váha ni ró. Te coo ró nájñuhun sūchi lúli jée tu jini i jniñu neé. <sup>21</sup> Te yósó núu tútu ley yá jenahán: Jiín jñuhun cácahán tée inga yuhu, jiín jñuhun cácahán tée ñuu jicá, sáha rí jeé cúni sóho ñayuu yáha jñuhun rí. Te ni jiín sūcuán ma sáha i cuenta jñuhun cahán rí, achí máa Jítoho yó. <sup>22</sup> Núu sūcuán te tahū jeé cahán yó tijni yuhu, yúcuán cúu ñn jeé steén poder Yaa Dios nuú ñayuu tu cácañdije, nasūu núu ñayuu cácañdije. Te jeé nácani yó jñuhun ya, yúcuán cúu jeé steén nuú ñayuu cácañdije, nasūu núu ñayuu tu cácañdije. <sup>23</sup> Núu sūcuán te núu ndíhi ró ñayuu cácañdije cáhíyo tútú, te táca ró cácahán sín sín yuhu, te quívicoo ñayuu tu jécūhun ni jiín ñayuu tu cácañdije, ¿te á má cahán i jeé ní canduu loco ró? <sup>24</sup> Te núu táca ró cáncani jñuhun ya, te núu quiví ñn tée tu cácañdije chí ñn tée tu jécūhun ni, yúcuán na te nacuni de jeé tée iyó cuéchi cúu de, te coto ndee de máa de jiín jñuhun cáncani ró. <sup>25</sup> Te nucūhun ni de táca jée ní jeni yuhu ni de jiín ánuá de. Yúcuán na te jecuiñí yití de te chíñhún de Yaa Dios. Te cahán de jeé íne ndíje Yaa Dios jiín ró jijnáhan ró.

*Siqui jeē yucún yífúhún na cóo nuū ndutútúyó*

<sup>26</sup> Nuu súcuan hermano jijnáhan ró: Nuū cándutútú ró te tāca ró coo ñn yaa ñ cata ró, chí ñn jñūhun stéén ró, chí ñn jñūhun jeē ní sáha Yaā Dios jeē jécūhún ní ró, chí inga yuhu jeē cahán ró, chí jeē nácastūhun ró jñūhun inga yuhu ún. Te ndihí ún na sáha ró návaha ije ñayuu cácandije jñūhun ya. <sup>27</sup> Te núu cáhīyo tēe cahán inga yuhu, te na cáhán uū de chí únī-ni de, te ná ñn de na cáhán. Te suni jini ñūhún jeē nacastūhún ñn tēe jñūhun ún. <sup>28</sup> Te núu tu íyó tēe jeē cúu nacastūhún jñūhun ún, te tēe cácahán inga yuhu, váha ga ma cahán de nuū cándutútú ró, te na cáhán maá-ni de jñūhun Yaā Dios. <sup>29</sup> Te suni súcuan tēe cáncani jñūhun, na cáhán uū de chí únī de, te sava ga ró nacani ní ró núu íyó ndáa jeē cácahán tēe ún. <sup>30</sup> Te núu inga tēe néne ni nihín de ñn jñūhun jeē ní stéén yá nuū de, núu súcuan te tēe cáhán na jecuiñi jeē cahán de, návaha cahán inga tēe ún. <sup>31</sup> Te súcuan te ná ñn de na cáhán ró cuu nacani ró jñūhun jeē stéén yá nuū ró, návaha cutúhva ró te coo ndeyi ní ró. <sup>32</sup> Te tēe cáncani jñūhun, jini ñūhún cuatáhú de jeē nácani inga tēe jñūhun te jecuiñi jeē cahán maá de. <sup>33</sup> Chi Yaā Dios cuni yá jeē coo nayúú méhñu ró, násūu jéé sacá núu cuvaa ró.

Te nájnūhun cása ha tāca grupo hermano cácandije, <sup>34</sup> suni súcuan tāca ñahan cándutútú jñūhun ñayuu cácandije, na cóo nayúú ña. Chí tú váha jeē cahán ña, chí sa cuatáhú ña nájnūhun cáhán tutu ley ya. <sup>35</sup> Te núu cuni ña cucáhnu ní ña ñn jñūhun, te nde vehe na cájnūhún ña yá ña. Chí jñūhun canu cúu jeē cahán ñn ñahan méhñu núu cándutútú ró.

<sup>36</sup> Te na sáha ró cuenta jeē tu ní quénda jñūhun Yaā Dios nuū maá ró jijnáhan ró, te nasūu máá ñn máá ró ní cánihín jñūhun ya. <sup>37</sup> Núu ñn tēe jéni ni de jeē tēe nácani jñūhun ya jñūhun tēe névaha Espiritu cúu de, núu súcuan te na cuájñūhún de jeē jñūhún ní ndacu Jitoho yó cúu jeē tēe ri yáha. <sup>38</sup> Te núu tu jétáhú de jñūhun yáha, suni ma cuatáhú yó de.

<sup>39</sup> Núu súcuan, ñáni mánī jijnáhan ró, na cóndihvi ní ró nacani ró jñūhun ya, te ma cási ró nuū tēe cácahán sñn sñn yuhu. <sup>40</sup> Te yúcún yífúhún na sáha ró tāca jñūhún.

*Jñūhun jeē ní natecu Cristo*

## 15

<sup>1</sup> Hermano jijnáhan ró, vijna te nucūhun ní ró jñūhun jñama ya yohó jeē ní nacani ri nuū ró. Te jñūhun ún chí je ni cajetáhú ró, te suni cáhīn nihín ró jñūhun. <sup>2</sup> Te suni jñūhun ún te ní jñama ya rohó, te núu cáhīn nihín ró jñūhun ní nacani ri nuū ró, te núu tu ní cácandije cáha ró.

<sup>3</sup> Chi jñūhun cánuú gá jeē ní nihín maá ri ní nastéén ri nuū ró: Jeē ní jñūhū Cristo siquī cuéchi yó, nájnūhun je cáhán tutu ñn nde jenahán. <sup>4</sup> Te ní quindūji ya, te ní natecu yá nuū uní quivī, nájnūhun cáhán tutu ñn. <sup>5</sup> Te ní nane ya nuū Pedro. Te sáa te ní nane ya nuū ndihúxí gá apóstol. <sup>6</sup> Te sáa te ní nane ya nuū vihyá gá uhún ciento hermano jeē cáyūcu tútu. Te sava i tēcu gá nde vijna, te sava i je ní jñūhū. <sup>7</sup> Te sáa te ní nane ya nuū Jacobo, yūcuán na te nuū ndihí ga apóstol.

<sup>8</sup> Te jeē sándihí na te ní nane ya nuū maá ri. Te nájnūhun ñn jeē ní cacu yúte, súcuan cúu jeē ñn sanaa-ni te ní nduu ri apóstol. <sup>9</sup> Chí tēe núu ga nuū tāca gá apóstol cúu ri, te ní nasūu tēe váha cúu ri jeē cónaní ri apóstol, chí ní jito xēén ri ñayuu cácandije nuū Yaā Dios. <sup>10</sup> Te siquī jeē ní sáha Yaā Dios jeē váha ruhū, jeē yúcuan cúu ri apóstol vijna. Te jeē ní sáha ya jeē váha ruhū, chí tú cáha ní cúu, chí sa ní scáca ga ri jñūhun ya vésú tāca gá tēe apóstol. Te nasūu máá ri ní sáha, chí Yaā Dios ní sáha ya jeē váha un jñūhun. <sup>11</sup> Núu súcuan te vésú ruhū chí tāca gá tēe ún, súcuan cáncani ri jñūhun, te súcuan ní cacandije ró.

*Jñūhun jeē natecu ndiyi*

<sup>12</sup> Te jeē cáncani ri jñūhun Cristo jeē ní natecu yá méhñu ndiyi, zte naun cácahán sava ró jeē ma natecu ndiyi? <sup>13</sup> Chí núu jeē tú natecu ndiyi, te suni tu ní natecu Cristo nuū. <sup>14</sup> Te núu jeē tu ní natecu Cristo, te cáncani cáha ri jñūhun ya nuū, te suni cácandije cáha ró núu. <sup>15</sup> Chí núu jeē súcuan cúu núu, te cácuu ri tēe jeē tu cácahán ndaā jñūhun Yaā Dios, chí ní cacachi ri jeē ní nastécu Yaā Dios Cristo. Te núu jeē tú natecu ndije ndiyi, núu súcuan te tú ndaā jeē ní nastécu Yaā Dios Cristo. <sup>16</sup> Chí núu tú natecu ndiyi, te ní Cristo suni tu ní natecu yá nuū. <sup>17</sup> Te núu tu ní natecu Cristo, te cácandije cáha ró te cándiso ñn gá ró cuéchi ró núu. <sup>18</sup> Te núu jeē súcuan cúu núu, te suni je ní cajahnū ndetú ñayuu ní cacandije Cristo. <sup>19</sup> Chí núu tú natecu ndiyi, te núu máá ñn-ni siquī vida yáha ñūhún ní yó jeē sáha Cristo jeē váha yohó, núu súcuan te ndahú ndasí gá cácuu yó vésú tāca gá ñayuu, chí cácandije cáha yó nuū.

<sup>20</sup> Te tuú chí íyó ndáa jeē ní natecu Cristo méhñu ndiyi. Te máá yá cúu jeē xihna gá ní natecu nuū tāca gá ndiyi jeē natecu. <sup>21</sup> Chí siquī jeē ní stívi ñn-ni tēe Adán, te ní quejéé jíhí ñayuu. Te suni súcuan siquī jeē ní sáha ñn-ni tēe Cristo, te natecu ñayuu. <sup>22</sup> Chí nájnūhun cájihí ndihí yó siquī jeē cácuu yó yúcún Adán, suni súcuan natecu ndihí yó siquī jeē yíhí yó ndaha Cristo. <sup>23</sup> Te ná ñn de na cáhán ndese ndiquín jñahan máá: Xihna gá Cristo ní natecu yá, te sáa te quivī ndiji ya te natecu tāca ñayuu yíhí ndaha ya. <sup>24</sup> Yūcuán na te jñū tiempo, te snáa yá poder táca enemigo jeē cujéhu jñūhún jeē ndácu jñūhún jñūhún.



jéé iyó poder. Te ndihi jeé ndácu ya jniñu nuú, nacuaña ya nuú Tatá yá Yaa Dios. <sup>25</sup> Chi cánuú jéé ndacu Cristo jniñu nde quiiji quiví jeé quénde Yaa Dios poder táca jéé jito uhú nuú Cristo, te stóho ya. <sup>26</sup> Te jeé sándihí na te snáa yá cuehyi jéhi ñayuu. <sup>27</sup> Chi cáhán tutu ii jeé sáha Yaa Dios jeé kujéhu Cristo siquí ndihi, te cuatáhú núú yá. Te jeé cáhán jeé kujéhu ya nuú ndihi-ni, te jíní vāha yó jéé máa Yaa Dios ma quíhi ya ndaha Cristo, chí Yaa Dios cúu jeé ní chíhi táca un ndaha Cristo. <sup>28</sup> Te ná ní quiví ndihi ún ndaha Cristo, yūcuán na te suni máa Cristo jeé cúu ya Sehe, quiví ya ndaha Tatá yá, Yaa jeé ní chíhi táca un ndaha ya. Te súcuan te máa Yaa Dios jniñu ya ndihi-ni.

<sup>29</sup> Te iyó ñayuu cájendute jehé ndíyi. Te núu tú natecu cuiti ndíyi, ¿te najehé cájendute i jehé ndíyi núu súcuan?

<sup>30</sup> Te ruhú jijnáhan rí, ¿najehé cúu jeé ndiquiví cájendeyí ní rí jito rí jnūndóho cuu rí, te núu tú natecu ndíyi? <sup>31</sup> Hermano, nájñuhun iyó ndáa jeé cúsi ní rí siquí jeé cácandíje ró Jítoho yó Jesucristo, suni súcuan iyó ndáa jeé ndiquiví nducú ñayuu cahni ruhú siquí jniñu ya. <sup>32</sup> Te jeé ní ndoho rí ní casáha tēe xeēn ñuu Efeso, jeé cácuu de nájñuhun quiti xéén, ¿te na vé nihín rí siquí un núu súcuan? Chi núu tú natecu ndíyi, te cuu cahán yó nájñuhun áchí ñn jñuhun: Na cúsi ní yó caji yó coho yó, chí sanaa te sajne te cuu yó, achí yó nuú.

<sup>33</sup> Ma cuáha ró jñuhun stáhú ñayuu rohó. Chi áchí ñn jñuhun: Núu cájica ró jín ñayuu neé, te stíví i róhó jéé tuá caca ndaa ró. <sup>34</sup> Nachuhun ní ró jijnáhan ró, te sáha ró jniñu ndaa, te ma sáha ga ró cuéchi. Chi sava ró tu cájini cuiti ró ndese Yaa cúu Yaa Dios. Súcuan cáhán rí návāha na cúcanu ró.

### *Ndese natecu ndíyi*

<sup>35</sup> Te sanaa te cahán ñn ró: ¿Ndese natecu ndíyi? ¿Ndese coo yiqui cúñu i? achí ró. <sup>36</sup> Tu jécūhun cuiti ní ró núu súcuan. Chi cúu nájñuhun jeé cátají ró táca tata chíji ñuhun návāha nane yucú i. <sup>37</sup> Te tata jeé quiví chíji ñuhun, núu trigo chí inga tata, chí nasūu yucú cúu, chí máa núni-ni cúu. <sup>38</sup> Te cuéé gá te cane, chí Yaa Dios ní jēhe ya yucú tata ún, ndese ní nujnahan ní máa yá, te ná ñn ná ñn tata chí sñn sñn cáa yucú ní sáha ya. <sup>39</sup> Te suni súcuan táca yiqui cúñu, chí tú inuú cándaā. Chí sñn cáa ñayuu, te sñn cáa quiti, te sñn cáa saa, te sñn cáa chácá. <sup>40</sup> Te suni súcuan cúu táca jéé ñn andiví jín táca jéé iyó ñáyiví. Te sñn luu cáa jeé ñn andiví, te sñn luu cáa jeé iyó ñáyiví. <sup>41</sup> Te sñn ndíndēe nāndii, te sñn ndíndēe yóó, te sñn ndíndēe táca quími. Te táca ñn ñn quími chí suni sñn sñn ndíndēe. <sup>42</sup> Te suni súcuan coo jín ndíyi jeé natecu. Ndíyi jeé chíndūji yó chí téhyū, te jeé nastécu yá chí ma cúu gā. <sup>43</sup> Jeé chíndūji

yó chí ndáhú cáa, te jeé nastécu yá chí luu kujéhu. Jeé chíndūji yó chí tú na fuerza, te jeé nastécu yá chí coo fuerza. <sup>44</sup> Jeé chíndūji yó chí ñn yiqui cúñu cuenta ñáyiví cúu, te jeé nastécu yá chí ñn yiqui cúñu cuenta Espírítu yá cúu. Chi iyó yiqui cúñu cuenta ñáyiví, te suni iyó yiqui cúñu cuenta Espírítu.

<sup>45</sup> Chí súcuan yósó núu tútu ii: Adán, tēe xihna ñúhún, ní cuvāha de jín vida cuenta ñáyiví, áchí. Te Cristo cúu nájñuhun inga Adán uú, te máa yá cúu Espírítu jeé jēhe vida. <sup>46</sup> Te nasúu yiqui cúñu cuenta Espírítu cúu jeé ní cuvāha xihna gā, chí sa suhva yiqui cúñu cuenta ñáyiví, te sáá te ndu cuenta Espírítu. <sup>47</sup> Te cuenta ñáyiví cúu tēe xihna ñúhún, chí ní cuvāha de jín tícachā ñuhun. Te Adán uú jeé cúu máa Jítoho yó, chí nde andiví ní quiiji ya. <sup>48</sup> Te ñayuu ñáyiví yáha, chí cúu i jnāhan Adán jeé ní cuvāha jín tícachā ñuhun. Te ñayuu jeé quívicoo andiví, chí ndúu i nájñuhun máa Yaa ní quiiji nde andiví. <sup>49</sup> Chí jeé cáa yó nájñuhun tēe ní cuvāha jín tícachā ñuhun, suni súcuan coo yó nájñuhun cáa máa Yaa ní quiiji nde andiví.

<sup>50</sup> Jñuhun yáha cástūhun rí nuú ró jijnáhan ró, hermano, jeé yiqui cúñu yó cuenta ñáyiví yáha, ma cúu quiví ñuu nuú ndácu Yaa Dios jniñu. Chí jeé jíhi cúu, te ma cúu quiví nuú cótecu ní cáni. <sup>51</sup> Te cúni rí jeé na jécūhun ní ró jñuhun yáha jeé ní yisáhi: Nasúu ndihi yó cuu, te ndihi yó chí nasāma yiqui cúñu yó. <sup>52</sup> Chí quiví jeé cuécu sandihí na trompeta, te ñn yachí-ni, nájñuhun ñn jeé nácueni-ni yó, te nasama ya yohó. Chí cuecu trompeta un, te natecu táca ndíyi jeé ma cúu gā i. Te táca yó jeé cátecu yó quiví ún, chí nasama ya yiqui cúñu yó. <sup>53</sup> Chí jeé tehyú yáha, cánuú nucūhun jeé ma téhyú gā. Te jeé jíhi cánuú nucūhun jeé ma cúu cuiti gā. <sup>54</sup> Chí jeé jíhi jeé tehyú, chí quiiji quiví jeé nucūhun jeé ma cúu gā ma téhyú gā. Yūcuán na te cundaā jñuhun yósó núu tútu ii: Jín poder yá ní snáa yá cuehyi jéhi ñayuu. <sup>55</sup> Cuehyi jéhi yóhó ¿ndese ga cuu sáha xeēn jín yó? Chí natecu yó. ¿Te ndese ga cundeyí jín yó? Chí snáa yá. Achí tutu. <sup>56</sup> Chí cuéchi cúu jeé sáha jeé cundeyí cuehyi jéhi ñayuu. Te ley yá jengahán sáha jeé náne cuéchi siquí yó. <sup>57</sup> Te na cútahú yó nuú Yaa Dios, chí jín máa Jítoho yó Jesucristo sáha ya jeé cundeyí yó siquí cuéchi jín siquí jñuhun cuu yó.

<sup>58</sup> Jeé yúcuan, ñáni mání, cuiñi ñihin ró te ma cáca yátá ró jijnáhan ró. Te níni na sájniñu vāha ró jín jniñu máa Jítoho yó. Chí je cájini ró jeé tu casájniñu cáha ró jín máa Jítoho yó.

*Siquí jeé cáquin i xūhun cuu táca hermano*

## 16

<sup>1</sup> Te vijna te cahán rí siquí xūhun jéé cáquin ró cuu hermano cácandíje cándoho ndáhú.

Suni na sáha máá ró jijnáhan ró nájnūhun ni ndacu ri nuū tāca grupo ñayuu cácadnje ichi Galacia. <sup>2</sup> Tācá domingo te ná ñn ná ñn ró chuváha sñn ró jecu xūhún, núu ndese ni nihñn maá ró, náváha quiví jeē jinú rí nuū rō te je iyó túhva. <sup>3</sup> Te jeē jeé rí, te cuáha ri carta nuū tāca téee jeē nácāji ró, te tají rí de quingoo de nuū tācá hermano cáyucú Jerusalén, quísiáha de xūhun jéé ní casocō rō. <sup>4</sup> Te núu iyó váha jeē quihñn rí, te suni quihñn rí jín de jijnáhan de.

*Jeē cahán Pablo siquí jeē quícondéhé de ñayuu cácadnje*

<sup>5</sup> Te jeē jeé rí nuū rō jijnáhan ró, te jini ñúhún jeē xihna gā jeē rí región Macedonia, yūcuán na te jeē rí ñuu rō Corinto. <sup>6</sup> Te sanaa te quendōo rí jín ró jijnáhan ró jecu tiempo, chí sanaa te coyūcu yó ñí tiempo mñjin. Yūcuán na te cuu chindéé ñáhán ró ruhū, núu ndé chí quihñn tuu rí. <sup>7</sup> Chí tu cúní rí jeē rí nuū rō vijna te yáha yachí rí quihñn rí, chí ñúhun ni rí jeē quendōo rí jín ró jecu tiempo, te núu cuáha Jitoho yō jnūhun. <sup>8</sup> Te cone rí ñuu Efeso yáhá nde na yáha quiví Pentecostés. <sup>9</sup> Chí coo cuehē ñayuu scandje rí, te váha quihñn jniñu Jitoho yō. Te suni iyó cuehē ñayuu cácuu contra.

<sup>10</sup> Te núu na jéé Timoteo, te sáha ró jéé coo sñ ni de mēhñu ró, te ni ñn ma cáni ni de siquí. Chí suni jniñu máá Jitoho yō sáha de, nájnūhun máá rí. <sup>11</sup> Núu súcuan te ni ñn ró má sajéé ni rō nuū de. Chí sa suhva chindéé ñájnáhan ró jín de jeē na quihñn gā de, te coo ndeyí coo sñ ni de, náváha ndiji de coto jnáhan rí jín de. Chí ruhū jín sava ga hermano cándetu rí de.

<sup>12</sup> Te hermano Apolos chí ni cahán ndahú rí jín de jeē na jéé de jín sava ga hermano, condéhé de rōhó. Te ni jeni ni de jeē ma cúu jeē de vijna. Te núu na núne de te jeé de.

*Saludo jeē sándñí*

<sup>13</sup> Ndito coo ni rō jijnáhan ró, te cuiñi ñihin ro jín jnūhun cácadnje ró. Te téyí na cóo ni rō, te na cóo fuerza ini rō. <sup>14</sup> Te tāca jéé casáha ró, na sáha ró jín jnūhun cúndáhú ni jnáhan.

<sup>15</sup> Hermano, cájini rō jeē xihna gā ñayuu vehe Estéfnas ni cacandje ichi Acaya. Te ni cajéhe i máá i nuū jniñu jeē chindéé ñáhán i tācá hermano cácadnje. <sup>16</sup> Te cúní rí jeē suni máá ró jijnáhan ró, cuatáhú váha ró ñayuu casáha súcuan, jín táca ñayuu cachindéé ñájnáhan te casájniñu siquí jniñu ya. <sup>17</sup> Cúsñ ni rí jeē ní quijicoo Estéfnas jín Fortunato jín Acaico, chí téee yáha ni cajejniñu de nuū rí jehē rō jeē tu ní cáhño ró jín rí. <sup>18</sup> Chí ni ndundeyí ni rí, te suni súcuan máá ró jijnáhan ró, ni casáha de. Te cánuú cuajnúhún ró tāca téee cándāa súcuan.

<sup>19</sup> Sándeyí ni rō jijnáhan ró, áhí táca grupo ñayuu cácadnje cáyūcu Asia. Aquila jín

Priscila jín ñáyuu cácadnje jeē cándutútu vehe de, cácahán i jeē sándeyí ndasí ni rō jín jnūhun máá Jitoho yō. <sup>20</sup> Te tācá hermano cácahán i jeē sándeyí ni rō. Te jeē cahán rō jín táca jnáhan ró, te yíñúhún techūhu ró ndaha i.

<sup>21</sup> Ruhū Pablo, jín ndaha máá rí téee rí jnūhun yáha jeē na sándeyí ni rō jijnáhan ró.

<sup>22</sup> Te núu ndé ñn tu iyó maní jín Jitoho yō Jesucristo, te na jnánñu ndetū i núu súcuan. Te na cáhán yō: Jitoho ná, cúní na jéé yachí ndiji ní.

<sup>23</sup> Te ñúhun ni rí jeē máá Jitoho yō Jesucristo na sáha ga yā jeē váha rōhó jijnáhan ró.

<sup>24</sup> Te maní rí jín ró jijnáhan ró jéé cácadnje ró Cristo Jesús. Súcuan na cóo. Amén.

## CARTA UU JEE NI TEE SAN PABLO APOSTOL NUU ÑAYUU ÑUU CORINTO

<sup>1</sup> Máá rí cúu Pablo, apóstol Jesucristo, chi súcuan ni nujnahan ni Yaā Dios ni taji yá ruhū nacani rí jñūhun ya. Te ndindúú rí jín hermano yō Timoteo cátee ri carta yáha cuájeé nuū rohó hermano ñuu Corinto jeé cácan díje ró Yaā Dios, jín nuū ndihí rohó jée cáyihí ndaha Yaā Dios jeé cáyūcu ní cáhnu Acaya. <sup>2</sup> Te cáñuhun ni rí jeé Tatá yō Yaā Dios jín Jitoho yō Jesucristo na sáha ga yā jeé váha rohó te sáha ya jeé coo ndeyí coo sñ ni rō.

*Siquí jeé ní ndoho Pablo jñúndóho*

<sup>3</sup> Na cáhán yō jeé yóhoyo cújéhnu Yaā Dios, Yaā cúu Tatá máá Jitoho yō Jesucristo. Chi máá yá cúu Tatá yō jeé cundáhu ni yohó, te níni sáha ya jeé ndúsñ ni yō. <sup>4</sup> Chi sáha ya jeé ndúsñ ni yō siquí táca jñúndóho ndóho yó, náváha suni cuu sáha máá yó jeé ndúsñ ni jñáhan yó jée cándoho jñúndóho. Chi nájñūhun ni sáha ya jeé ndúsñ ni máá yó, suni súcuan sáha yó jée ndúsñ ni i. <sup>5</sup> Chi jeé ndóho yó cuehē jñúndóho nájñūhun ni ndoho Cristo, suni súcuan nihñ yó cuehē jñūhun ndusñ ni, sáha Cristo. <sup>6</sup> Jeé yúcuan núu cándoho rí jñúndóho te súcuan te cuu sáha rí jeé ndúsñ ni rō te quendóo váha ga anuá rō. Te jeé sáha Yaā Dios jeé ndúsñ ni rí, suu sáha tucu jeé ndúsñ ni máá rō, te quéndóo váha ga anuá rō. Te súcuan te nihñ rō fuerza jeé cuándeyí ni rō jín táca jñúndóho nájñūhun cándoho rí. <sup>7</sup> Te cáñuhun ndasí ni rí jeé cúu rohó, chi cájini rí jeé nájñūhun cándoho ró jñúndóho jín rí, suni súcuan ndusñ ni rō jín rí sáha máá Yaā Dios.

<sup>8</sup> Hermano, cácuni rí jeé na cúni rō jijnáhan ró ndese ni candoho rí ichi Asia. Chi yóhoyo xeēn jñúndóho ni cajito rí, nde je yajni tuá canda rí, te ni jeni ni rí jeé cuu rí nuú. <sup>9</sup> Te siquí jeé ní cajehnde ni rí cuu rí, te yúcuan ní sáha jeé ní cajecūhun ni rí jeé ma ténuu rí máá rí chi tú jñiñu rí, chi sa suhva Yaā Dios jeé nastécu ndiyí tenuu rí. <sup>10</sup> Chi máá yá ni scácu ruhū jijnáhan rí nuú jñúndóho xeēn jé yajni cuu rí nuú, te suni súcuan scácu ya ruhū vijna. Te ñūhun ni rí jeé suni scácu tucu ya ruhū ichi núu gā. <sup>11</sup> Te suni na chindéé ñáhan ró ruhū jijnáhan rí jeé cacān tahú ró jehē rí. Chi núu cuehē ñayuu cacān tahú jehē rí, te suni cuehē i cuu nacuatáhu jehē rí jeé ní sáha ya jeé váha ruhū.

*Jeé ní cucuéé Pablo quihñ de ñuu Corinto*

<sup>12</sup> Iyó ññ jeé sáha jeé cácusñ ni rí: Chi váha iyó ní anuá rí jeé váha ndoo te ndaā ni cajica rí nuú ñayuu ñayívi, te víhyá gā nuú máá ró jijnáhan ró. Chi siquí jeé váha ni Yaā Dios, te ni chindéé ñáhan yá ruhū, te nasūu siquí jeé

ndichí máá rí cúu jeé ní cajica rí súcuan. <sup>13</sup> Te jñūhun cátee rí nuú táca carta rí, chi máni jeé cúu cahu ró te jecūhun ni rō cúu. Te ñūhun ni rí jeé jecūhun váha ga ni rō, <sup>14</sup> nájñūhun je cájecūhun ni rō jecu. Te súcuan te cuu cusñ ni rō siquí rí quívi ndíji Jitoho yō Jesús, nájñūhun cácusñ ni rí siquí máá rō.

<sup>15</sup> Te siquí jeé súcuan ni cucáhu ni rí, te jeé yúcuan ní jeni ni rí jeé núu na quihñ rí Macedonia te jeé rí nuú maá ró xihna gā, náváha cusñ ni rō jeé jécondēhe rí rohó úu jínu nuú. <sup>16</sup> Chi ni jeni ni rí jeé jécondēhe rí rohó, te yáha rí quihñ rí Macedonia, te jeé nándicó rí Macedonia te ndíji tucu rí nuú rō. Yúcuan na te cuu chindéé ñáhan ró ruhū jeé quihñ rí ichi Judea nuú. <sup>17</sup> Te jeé súcuan ni jeni ni rí, ¿te á téu te nacani váha ni cúu rí jeé tu ní jée rí nuú rō, chí maá rō? ¿A cájini ni rō jeé cúu rí nájñūhun ñayuu ñayívi jée yachí cahán jeé cuu, yúcuan na te tuú, chí naún? <sup>18</sup> Tuú chí máá Yaā Dios jín yā jeé tu cáhán rí jín ró jeé cuu, te yachí nacáhan rí jeé ma cúu. <sup>19</sup> Chi ruhū jín Silvano jín Timoteo ni canacani rí jñūhun Jesucristo Sēhe Yaā Dios nuú ró jijnáhan ró. Te máá yá tu cáhán yā jeé cuu te nacáhan tucu ya jeé ma cúu. Chi squícu ya jeé cahán yā. <sup>20</sup> Chi ndihí jeé ní jéjñūhun Yaā Dios, squícu máá Cristo. Te jeé yúcuan cácahán yō jeé yóhoyo luu cújéhnu Yaā Dios, te cácahán yō Amén, chi ndihí squícu Cristo Jesús. <sup>21</sup> Te Yaā Dios cúu jeé sáha jeé ruhū jijnáhan rí jín rohó jijnáhan ró, cáhñ nñin yó jín Cristo, te ní sándoo ya yohó jée cuajñiñu yó núu yā. <sup>22</sup> Te suni ní jēhe ya Espíritu yā jeé cóndee ini anuá yō, te cúu ya nájñūhun ññ sello jeé steén jeé cúu yó sēhe Yaā Dios. Te sáha Espíritu jeé iyó ndaā ni yó jeé cuáha Yaā Dios tahú yō.

<sup>23</sup> Te jeé ná tu jeé rí nuú ró ñuu Corinto, nájñūhun ni jeni ni rí, suu cúu siquí jeé tu ní cúni rí cuxeēn rí nuú ró jeé tu casáha váha rō. Te máá Yaā Dios cúu Yaā jíní jeé cahán ndaā rí. Te iyó váha jeé na cúu rí te núu tu cáhán ndaā rí. <sup>24</sup> Te nasūu jée cácuni rí ndacu nñin rí jñiñu nuú ró siquí jñūhun cácan díje ró yá, chí je cáhñ nñin rō jín jñūhun ún. Chi sa suhva cácuni rí chindéé ñáhan rí rohó jée na cusñ gā ni rō.

## 2

<sup>1</sup> Núu súcuan te ni jeni ni rí jeé ma jée rí inga jñu nuú ró jín jñūhun cuxeēn rí te cucuíhyá ní ró sáha rí. <sup>2</sup> Chi núu cucuíhyá ní ró sáha rí, ¿te ndé ñayuu sáha jeé cusñ ni máá rí? Tuá na inga ñayuu, chí máni máá rohó, te ndese cuu te núu ní sáha rí jeé cucuíhyá ní ró. <sup>3</sup> Te jeé yúcuan cúu jeé ní tee rí carta unú rō, náváha nacani ni rō siquí cuéchi ró sáha, te ma cucuíhyá ní rí sáha cuéchi ró quívi jeé rí nuú rō. Chi sa suhva sáha ró jée cusñ ni rí. Te jíní váha rí jeé núu cusñ ni rí, te suni ndihí ró jijnáhan ró cusñ ni rō. <sup>4</sup> Te jeé ní tee rí carta

un núu rō, te yōho ni nacani ni rī siquī rō, te ni jnahuhū ni rī, te nde ndahyū rī ni tee rī. Te tu ní téē rī jeē sāha rī jeē cucuíhyá ni rō, chí sa suhva návāha cuni rō ndese yōho manī rī jín rō.

*Jeē íne cáhnu ni Pablo nuū téē ni sāha cuēchi*

<sup>5</sup> Te jeē ní cucuíhyá ni rī ni sāha téē jeē ni sāha cuēchi ún, te nasūu máá-ni rī, chí suni nde máá ró jijnáhan ró ni sāha de jeē ní cacucuíhyá ni rō jecu. Te cáhān rī jeē jecu-ni, chí tu cúní rī cuxeēn ndasí rī. <sup>6</sup> Te jín jeē ní cacuxeēn rō nuū de ná ni candutútú rō, te jín yúcuan-ni te ni cuu-ni. <sup>7</sup> Te vijna chí jíní ñúhún jeē cóne cáhnu ni rō nuū de, te sāha ró jeē ndúsí ni de, chí sanaa te caa ga cucuíhyá ni de, te ma ndúsí gā ni de. <sup>8</sup> Núu súcuan te cáhān ndahú rí jín ró jijnáhan ró jeē steén tucu ró jeē iyó manī rō jín de. <sup>9</sup> Chí jeē siquí jniñu yáha cúu jeē ní tee rī carta un núu rō, návāha coto ndee rī rohó núu cuatáhú váha ró jniñu ndácu rī nuū rō. <sup>10</sup> Núu súcuan te núu íne cáhnu ni rō nuū ñayuu, te suni súcuan ruhú. Chí jeē íne cáhnu ni rī nuū ñayuu núu ni sāha i cuēchi, te sāha rī súcuan siquí jeē maní rī jín ró jito jínúu Cristo. <sup>11</sup> Chí cánúu cone cáhnu ní yō, chí tu cúní yō jeē nihín Satanás cuēchi siquí yō, chí je jíní váha yō ndese ndúcú un stáhú yóhó sāha yó cuēchi.

*Jeē tu ní íyo nayúú ni Pablo ini ñuu Troas*

<sup>12</sup> Ná ni jehēn rī ñuu Troas jeē nácani rī jñuhun jito ho yō Cristo, te váha ni sāha ya jeē ní íyo modo jeē nácani rī jñuhun ya. <sup>13</sup> Te vésú súcuan te tu ní íyo nayúú ní anuá rī, chí tu ní níjnáhan rī jín hermano yō Tito. Yúcuán na te ni nacuatáhú rí nuū ñayuu yúcuán, te cuananducú rí de ichi Macedonia.

*Jñuhun jeē cujéhnu ndúú yó jín Cristo*

<sup>14</sup> Te na cútahú yō nuū Yaā Dios, chí níni ndéca váha ya yohó cuángoo yó jín Cristo Jesús, te ndúú yó jín yá jeē cujéhnu ndasí yá snáa yā poder ndíhi enemigo yā. Te jéjníñu ya yohó jeē scuité núu yó jñuhun ya táca-ni lugar, nájñuhun jíté núu íin xicō asín. <sup>15</sup> Te cúu yó nájñuhun íin síje jeē jeén asín nuū Yaā Dios sāha Cristo. Te nájñuhun jeē jinú xicō un núu ñayuu cácu ánuá jín núu ñayuu jñahnú ndetú. <sup>16</sup> Nuū ñayuu jñahnú ndetú chí cúu yó nájñuhun íin xicō jeē cúu i sāha, te nuū ñayuu cácu ánuá chí cúu yó nájñuhun íin xicō váha jeē cótecu i sāha. Te ní íin yó ma cánda yó sāha yó jniñu yáha, te núu ma chindéé ñahán yá yohó. <sup>17</sup> Te ruhú jijnáhan rī, tu cásáha rī nájñuhun cásáha cuehé téē jeē cánducú de nihín de xúhun siquí jñuhun Yaā Dios. Chí sa cácanani ndaá rī jñuhun ya, chí máá Yaā Dios ní tají ruhú, te máá yá jíní jeē cácanani ndaá rī siquí jeē cándíje rī Cristo.

*Jñuhun siquí contrato jeé*

### 3

<sup>1</sup> Te jeē cácahān rī súcuan, ¿te á cájeni ni rō jeē cánducú tucu rī cahān rī jeē váha ga téē cácuu rī, chí naún? ¿Te chí jíní ñúhún jeē steén rī carta recomendación nuū rō, chí jeē cacān rī cuáha ró núu rī jijnáhan rī, nájñuhun cásáha sava i? <sup>2</sup> Tuú chí máá-ni ró cácuu nájñuhun íin carta recomendación rī. Te jeē ñúhún ni rī jeē ní cacandíje váha ró ni sāha rī, suu cúu nájñuhun jeē yosó jñuhun carta un iní anuá rī. Te ndíhi ñayuu chí nájñuhun cáhu i, cúu jeē jíní i ndese ní nasāma ró. <sup>3</sup> Chí máá ró cácuu nájñuhun íin carta jeē ní tee Cristo te cáscaca rī. Te nasūu jín tinta ni tee ya, chí sa suhva jín Espíritu Yaā Dios, Yaā técu. Te nasūu núu tabla yuū nájñuhun ni tee ya ley yā, chí sa suhva nuū anuá ñayuu ni tee ya.

<sup>4</sup> Te cácahān rī súcuan, chí cácuacáhu ni rī Yaā Dios siquí jeē ni sāha Cristo. <sup>5</sup> Te nasūu jeē cájeni ni rī jeē cúu canda máá rí sāha rī jniñu ún. Chí sa suhva máá Yaā Dios sāha jeē cuu squícu rī. <sup>6</sup> Te máá yá ni sāha jeē cuu cuajníñu váha rī siquí contrato jeé yá. Te contrato yáha tu cáhān jeē squícu yó ley jeē ní tee jín letra, chí sa suhva jeē caca yó jín vida jeé, suu jeē ní jéhe Espíritu yá. Chí contrato ley jeē yosó jín letra, jñahnú ndetú ñayuu sāha. Te jeē sāha máá Espíritu cúu jeē cótecu yó ní cáni.

<sup>7</sup> Te ley jenahán jeē ní jéhe ya nuū Moisés, ni yosó letra nuū tabla yuū. Te yōho ni cujéhnu, te ni ndindéé ndasí ni sāha, te nde Moisés ndí nuū de ni sāha. Te tu ní cúu coto váha ñayuu Israel nuū de ni sāha. Te vésú súcuan te cuéé-ni cuéé-ni ni ndahvā jeē ndindéé nuū de. Te núu súcuan ni cujéhnu ndasí ley jeē sāha jeē cuu ñayuu te jñahnú ndetú i, <sup>8</sup> te sa víhyá gā cujéhnu ndasí gā jñuhun cotecu yō jeē jéhe Espíritu nuū yō. <sup>9</sup> Chí núu yōho ni cujéhnu ley un jeé jñahnú ndetú ñayuu sāha, te sa víhyá gā cujéhnu jñuhun jeē ndáhva Yaā Dios cuēchi yó. <sup>10</sup> Chí ley un jéé ní cujéhnu nde saá, tuá cujéhnu cuítí, siquí jeē cujéhnu ndasí gā jñuhun Espíritu jeé iyó vijna. <sup>11</sup> Te núu súcuan ni cujéhnu ley jeé ní íyo jecu-ni tiempo, te sa cujéhnu ndasí gā jñuhun jeé coo ní cáni.

<sup>12</sup> Te jeē súcuan cáñuhun ni rī, jeé yúcuan cáñíyo téyí ni rī nácani rī jñuhun yáha. <sup>13</sup> Chí tu cásáha rī nájñuhun ni sāha Moisés jeé ní jesí de íin sahma nuū de, návāha tú coto ñayuu Israel ndese cuandahvā jeé ní ndindéé nuū de. <sup>14</sup> Te ñayuu ún tu ní cájecúhun ni i. Te nde vijna núu cácahu ñayuu Israel tutu contrato ley jenahán, suni tu cájecúhun ni i, chí nájñuhun jesí sahma un núu jeé níjnúní i, te tu cújiyo cuítí. Chí nde jeé candíje i Cristo, yúcuán na te cújiyo. <sup>15</sup> Te suni súcuan nde vijna núu cácahu i tutu ley Moisés, te nájñuhun jeé jesí íin sahma nuū jeé níjnúní i. <sup>16</sup> Te jeé násāma iní íin ñayuu quívi i nuū máá Jítoho yō Cristo, yúcuán na te

cújiyo-ni jeé jési ún. <sup>17</sup> Chi Jitoho yó cúu máá Espíritu. Te nuú ine Espíritu maá Jitoho yó, yúcuan cúu nuú iyó libre ñayuu jeé tuá yáhi i chíji ley jenahán. <sup>18</sup> Te jeé yúcuan máá yó jijnáhan yó, tuá jési nuú jeé níjnūni yó. Chi cácuu yó nájñuhun espejo jeé jéhe nduva, cúu jeé cájica ndaá yó te suu stéén ndese yóhoyo luu cújéhnū máá Jitoho yó. Te máá yó táca quívi cuanasāma yó cuanduu luu ga anuá yó nájñuhun cáa máá yá. Chi máá Jitoho yó jeé cúu ya Espíritu, súcuan sáha ya jíin yó.

#### 4

<sup>1</sup> Núu súcuan te tu ndínuu ni rí cáncani ri jñuhun ya. Chi síqui jeé ní cundáhú ni yá ruhū jijnáhan ri te ni jéhe ya jniñu yáha nuú rí. <sup>2</sup> Te tu cása ha ri jniñu neé jéé cūcanu yó sáha, ni tu cájica cuu ri jíin jñuhun ndíchí stáhú, ni tu cásama ri jñuhun Yaá Dios. Chi sa suhva cácahán rí máni jñuhun ndaá. Te súcuan te cuu cuni táca ñayuu ini anuá i jeé cácahán ndaá rí jito jínú Yaá Dios. <sup>3</sup> Te núu iyó ñayuu tu jécūhun ni jñuhun jnama ya yohó jéé cáncani ri, te súcuan cúu nuú máni máá ñayuu jnahū ndetū. <sup>4</sup> Te jeé tu cácañdije i, te máá jéxeén jeé ndácu jniñu ini ñayívi yáha, ní jesi nuú jeé níjnūni i, náváha ma ndíndee jñuhun Cristo ini anuá i, te ma cūni i jeé yóhoyo luu cújéhnū Cristo, Yaá jeé ínuú cáa jíin Yaá Dios. <sup>5</sup> Te jeé cáncani ri jñuhun, te nasūu jñuhun máá rí, chi sa suhva jñuhun Jitoho yó Jesucristo cáncani ri. Te máá rí chi cácuu rí mozo-ni nuú rō jijnáhan ró jéé síqui jeé maní rí jíin Jesús. <sup>6</sup> Chi ná ni sáha Yaá Dios ñayívi te ni cáhán yá jeé na cúndijin nuú neé. Te suni súcuan ni sáha ya jeé ní cundijin nuú anuá yó jeé cájecūhun ni yó síqui Jesucristo, ndese ndíndee núu yá, cúu jeé yóhoyo luu cújéhnū ya nájñuhun cúu Yaá Dios.

*Jeé cándiquñ yó jñuhun cácañdije yó yá*

<sup>7</sup> Te táca jñuhun yáha jeé yóhoyo luu cújéhnū, chi nájñuhun jeé ñuhun ini ñi quísi ñuhun. Chi cácuu yó nájñuhun quísi ñuhun, chi tú na fuerza yó. Te jeé yúcuan cájini váha rí jeé máá Yaá Dios cúu jeé jéhe poder síqui jñuhun yáha jeé yóhoyo luu cújéhnū, te nasūu fuerza máá rí cúu. <sup>8</sup> Te jeé yúcuan, vesú táca lado cájito ri jñúndóho, te tu sáha jeé ma ndúsíi gá ni rí. Te vesú cácuuñyá ni rí síqui jñúndóho, te cáñuhun ni rí jeé quee váha jniñu rí. <sup>9</sup> Te vesú cájito xeén ñayuu ruhū, te máá yá tu stóo ya ruhū jijnáhan rí. Te vesú cánducú i snáa i ruhū jíin jniñu sáha ri, te ma cúu. <sup>10</sup> Te ndé-ni cúu nuú cuángoo rí, te nájñuhun ni ndoho Jesús jeé ní jíhi yá, suni súcuan cándoho ri jeé jé yajni cuu rí, náváha suni cuu stéén rí fuerza Jesús jeé técu yá ini yiqui cúñu rí. <sup>11</sup> Chi jeé níni cátecu rí, te táca quívi je yajni cahni ñayuu ruhū jeé síqui Jesús. Te súcuan te cájito ñayuu jeé técu Jesús ini

yiqui cúñu rí jeé cúu. <sup>12</sup> Núu súcuan te ruhū jijnáhan ri, níni cúu jeé jé yajni cuu rí síqui jñuhun ya, te yúcuan sáha jeé cotecu máá ró ní cáni jijnáhan ró.

<sup>13</sup> Te yósó núu tútu íi: Ni candije ri te jeé yúcuan ní cahán rí, achí. Te suni jeé cácañdije máá rí cúu jeé cáncani ri jñuhun ya. <sup>14</sup> Chi cájini rí jeé máá Yaá jeé ní nastécu Jitoho yó Jesús, suni súcuan nastécu yá ruhū, te sáha ya jeé ñi cáhnu ni cuiñi ndihi yó núu yá. <sup>15</sup> Chi táca jñúndóho yáha cándoho ri náváha coo váha ró jijnáhan ró. Te súcuan te cayá cuehē gá ñayuu jeé sáha ya jeé váha i. Yúcuán na te suni yóhoyo cuehē i nacuatáhú i nuú Yaá Dios, te cújéhnū ga yá sáha.

<sup>16</sup> Jeé yúcuan cúu jeé tu ndínuu ni rí, te vesú cuandihí fuerza yiqui cúñu rí, te sa suhva cuanduu fuerza gá anuá rí táca quívi. <sup>17</sup> Chi jñúndóho jeé ndóho yó ñayívi yáha, tú-ni xeén cúu, te yachí yáha. Te sáha jeé níhín yó ñi tahū jeé cújéhnū yó ní cáni jeé cáa ndasí gá vesú jñúndóho ún. <sup>18</sup> Te tu táñuhún yó nuú táca jñúndóho jito yó núu vijna, chi sa suhva táñuhún yó nuú táca jéé váha jeé tu jito yó núu vijna. Chi táca jéé jito yó núu vijna, chi yachí ndihi, te táca jéé tu jito yó núu, chi coo ní cáni.

#### 5

<sup>1</sup> Chi yiqui cúñu yó jeé ndeé yó ñayívi yáha, cúu nájñuhun ñi vehe jeé náa. Te cájini yó jeé núu na náa, te cuáha Yaá Dios ñi yiqui cúñu jeé, te suu cúu nájñuhun ñi vehe jeé coo ní cáni ichi ándivi. Te nasūu ñi vehe jeé sáha ñayuu cúu, chi jeé sáha Yaá Dios cúu. <sup>2</sup> Te níni jéé ndeé yó vehe yáha jeé cúu yiqui cúñu yó, te cájitu ni yó sáha, chi yóhoyo cúní yó jeé núcūhun yó yiqui cúñu jeé yó nde ándivi. <sup>3</sup> Chi jeé núcūhun yó un, te ma cóo máá na anuá yó jeé náa yiqui cúñu yó yáha. <sup>4</sup> Chi níni jéé iyó gá yó ñi vehe yiqui cúñu yó yáha, te jítu ni yó te cúcuñyá ni yó. Te nasūu jéé cuní yó jeé stóo yó yiqui cúñu yó te coo máá-ni ánuá yó. Chi sa suhva cúní yó núcūhun yó jéé jeé, náváha ndahvá yiqui cúñu yó jeé náa, te coo máá jéé cotecu ní cáni. <sup>5</sup> Te Yaá Dios cúu jeé ní sáha ya jeé súcuan coo yó. Te ni jéhe ya Espíritu yá jeé cóndee ini anuá yó, te sáha Espíritu jeé iyó ndáa ni yó jeé cuáha Yaá Dios tahū yó.

<sup>6</sup> Núu súcuan te níni cúu jeé cácuáhnu ni rí. Chi cájini rí jeé níni ndeé gá rí chíji yiqui cúñu yáha, te jíca cúu ri jíin núu ndeé máá Jitoho yó. <sup>7</sup> Chi vijna chi cácañdije ri jeé iyó yá jíin rí, vesú ná tu coto ri nuú yá. <sup>8</sup> Te cácuáhnu ni rí, chi sáha ri cuenta jeé váha ga núu na quénda ri chíji yiqui cúñu yáha te quíhín rí condee rí jíin máá Jitoho yó. <sup>9</sup> Jeé yúcuan cúu jeé cánducú ndeyí rí sáha ri jeé cusíi ni yá jíin rí, vesú núu ndeé gá rí yiqui cúñu rí chí vesú núu condee rí jíin yá. <sup>10</sup> Chi cánuú jéé ndihi yó cuiñi yuhu mesa Cristo jeé

sándaā yā jniñu yó. Te ná ñn ná ñn yó níñin yó siquī ndese ni casáha yó, á jéé váha chí jéé neé, ná ni condee yó chíji yiqui cúñu yó.

*Siquī jéé ndávicoo yó núu jñuhun manī Yaā Dios jín yó*

<sup>11</sup> Núu súcuan te cándiso ñyo ri nuū maá Jítoho yó, te jéé yúcuan ndúcú ndéyí ri scandije ri ñayuu. Te jíni Yaā Dios jéé cáhíyo ndaā rí, te ñuhun ni rí jéé suni súcuan cájini maá ró. <sup>12</sup> Te nasūu jéé cánducú tucu ri cahān ri jéé váha ga tēe cácuu ri, chí sa suhva cástuhun rí jéé cuu cusī ni rí jéé siquī rí jijnāhan rí. Te súcuan te cuu stío cuiñí ró nuū ñayuu jéé cutéyí i siquī ndese cáa ñayuu, te tu sáha i cuenta ndese cáa ini anuā ñayuu. <sup>13</sup> Te va sanaa te cájeni ni ró jéé tēe loco cácuu ri jéé cácahān rí súcuan. Te siquī jéé cándihví ni rí jehé Yaā Dios cúu. Te tu chí cáhíyo váha xinī rí, te jéé yúcuan cájejniñu rí jéé quéndoo váha ró. <sup>14</sup> Chí siquī jéé ní cundáhú ni Cristo ruhū jijnāhan rí cúu jéé cánuú nacani ri jñuhun ya. Chí cájini váha ri jéé ni jíhi mañúhún-ni ya jéé siquī ndihí yó, te jéé yúcuan nájnūhun ni jíhi ndihí yó jíin yá. <sup>15</sup> Chí ni jíhi yá jéé siquī ndihí yó návāha táca yó jéé tēcu, ma cótecu ga yó jéé sáha yó jéé cuní maá yó, chí sa suhva jéé cuní maá yá jéé ni jíhi yá te ni natecu yá jéé siquī yó. <sup>16</sup> Jéé yúcuan tuá casáha ri cuenta ndese-ni cándaā ñayuu, nájnūhun casáha ñayuu ñayiví. Te vésú súcuan ni casáha ri cuenta siquī Cristo nde saá, jéé ñn tēe-ni cúu ya, te vijna chí cájini rí jéé cúu ya Sēhe Yaā Dios. <sup>17</sup> Chí núu ñn ñayuu yíhi i ndaha Cristo, te je ni ndujeé i. Te táca modo neé ní nevāha i, je ni yāha cuahān, te vijna je ni ndujeé ndihí.

<sup>18</sup> Te Yaā Dios cúu jéé sáha ndihí jéé yáha, chí jíin Cristo ni sáha ya jéé ní ndávicoo yó núu jñuhun manī yá jíin yó. Te ni tejniñu ya ruhū jéé cánacani ri jñuhun jéé ndávicoo ñayuu nuū jñuhun manī yá jíin i. <sup>19</sup> Chí jíin Cristo te ni sáha Yaā Dios jéé ñayuu ñayiví ndávicoo i nuū jñuhun manī yá jíin i. Te tu ndácunehen ya cuēchi ni casáha ñayuu. Te ni tejniñu ya ruhū jéé cánacani ri jñuhun yáha ndese ndávicoo i nuū jñuhun manī yá jíin i. <sup>20</sup> Núu súcuan te cácuu ri tēe cájica jniñu maá Cristo. Te jéé cahán rí, te nájnūhun jéé maá Yaā Dios cahán ndahú yá jíin ró. Núu súcuan te cácahān ndahú rí jíin ró jéé cahán Cristo, jéé na ndávicoo ró núu jñuhun manī Yaā Dios jíin ró. <sup>21</sup> Te Cristo, vésú tú ni ñn cuēchi ya, te ni sáha Yaā Dios jéé ní nucondee cuēchi yó siquī yá. Te súcuan te yóhó jéé yíhi ndaha Cristo, ni nucondee siquī yó jéé iyó ndaā yó nájnūhun iyó ndaā Yaā Dios.

## 6

<sup>1</sup> Núu súcuan te siquī jéé cácuu ri tēe casájniñu jíin yá, te cácahān ndahú rí jíin ró

jéé ma stóo uun ró jñuhun jéé ni sáha Yaā Dios jéé váha róhó. <sup>2</sup> Chí áchí yá nuū tútu ñi: Máá tiempo cuní maá rí te cuní sōho rí jñuhun cáhān ndahú ró jíin rí.

Te maá tiempo jnáma ri ñayuu, te jnama ri rohó.

Áchí yá. Te vijna-ni cúu maá tiempo jéé cuní yá, chí vijna-ni cúu tiempo ni quiñi Yaā jnáma yóhó.

<sup>3</sup> Te cánducú rí jéé ma sáha ri ni ñn jniñu jéé casi jéé candije ñayuu, návāha ma cahán i siquī jniñu ndíso ri. <sup>4</sup> Chí sa suhva cánducú rí jéé ndihí jéé sáha ri, steén jéé cácuu ri tēe cájejniñu nuū Yaā Dios. Jéé yúcuan cájendeyí ni rí jíin jéé ndóho ri jñundóho, jíin jéé cúmani nuū rí, jíin jéé yí sáha jíin rí. <sup>5</sup> Chí ni ñyo tijni jínu jéé ní cacani i ruhū, jéé ní cachune i ruhū vecāa, jéé ní candonda i siquī rí, jéé ní casájniñu níñin rí, jéé ní cajehni rí máhna maá rí, jéé ní cahíyo ndite ni rí. <sup>6</sup> Te suni cánducú rí jéé cuajnúhún i ruhū siquī jéé ndoo cájica rí, te cájécuhun váha ni rí jñuhun ndaā, te cáhíyo paciencia ni rí, te váha ni rí, te ndéé Espíritu Santo ini rí, te cákundáhú ndije ni rí jñáhan rí. <sup>7</sup> Te cánacani ndaā rí jñuhun, te poder Yaā Dios íne jíin rí. Te jíin jñuhun ndaā cándahva rí táca jniñu neé, chí nájnūhun jéé cájejniñu rí siquī. Chí nájnūhun jéé ndónda un siquī rí te ndónda ri siquī. <sup>8</sup> Iyó jínu yíñúhún ñayuu jíin rí, te iyó jínu tuú. Iyó jínu jéjnúhún i ruhū, te iyó jínu cácahān i siquī rí. Iyó jínu cácahān i jéé tēe stáhú cácuu rí, te iyó jínu cácahān i jéé tēe ndaā cácuu rí. <sup>9</sup> Iyó jínu casáha i nájnūhun jéé tu jíni i ruhū jijnāhan rí, te iyó jínu jéé jíni váha i ruhū. Iyó jínu jéé cuní ñayuu cahni i ruhū, te cátecu nahín rí. Te vésú cástóho i ruhū, te tu cájihí rí sáha. <sup>10</sup> Te vésú iyó jéé cácuuhyá ni rí, te níni cácusí ni rí. Te vésú tēe ndahú cácuu rí, te sácúca rí cuehē ñayuu jíin jñuhun ya. Te vésú tú na vé cánevāha rí, te jíin maá yá te ndihí-ni cúu jéé cánevāha rí.

<sup>11</sup> Hermano ñuu Corinto, súcuan cúu jéé cácahān cáj rí jíin ró jijnāhan ró, chí siquī jéé maní rí jíin ró, jéé yúcuan cáchi ndihí ri ndese cándoho ri. <sup>12</sup> Máá rí jijnāhan ri cácahān cáj rí siquī jéé maní ndasí rí jíin ró, te maá ró jijnāhan ró sanaa te tu súcuan cúu. <sup>13</sup> Nájnūhun cáhān tatá jíin sēhe, súcuan cáhān ndahú rí jíin ró jéé nájnūhun iyó mán rí jíin ró, súcuan na cóo maní tucu ró jíin rí.

*Siquī jéé cúu yó templo Yaā Dios*

<sup>14</sup> Ma quíví nduu ró jíin jniñu neé casáha ñayuu tu cácdandje, chí ma cúu coo inuú ró jíin i. ¿Chí ndese cuu quiñáhan jniñu casáha ñayuu ndaā jíin jniñu casáha ñayuu tú ndaā? ¿Te ndese cuu coyúcu inuú ñayuu cájica jíin luz yá jíin ñayuu cájica nájnūhun nuū neé? <sup>15</sup> ¿Ndese cuu coo inuú ni Cristo jíin Satanás? ¿Te ndese cuu cuiñí cáhnu ñayuu cácdandje jíin ñayuu tu cácdandje? <sup>16</sup> ¿Te ndese cuu

quijnáhan templo Yaã Dios jín ídolo? Chi máá ró cácuu templo Yaã Dios, Yaã técu, chi ndéé yá ini anuá rō, nájñuhun ni cahān yā: Condee rī ini i te caca cuu ri mehñú i, te cuu ri Yaã Dios maá i, te cuu i ñayuu maá rī.

<sup>17</sup> Te jeē yúcuan ní cahān gā yā: Ma quiví nduu rō jín jñiñu neé cásaha i, te cusñn rō jijnáhan rō, áchí Jítoho yō. Te ma jññ rō táca jéé tú ndaā. Yūcuán na te naquihñ ri rohó, <sup>18</sup> te cuu ri Tatá rō jijnáhan rō, te cuu rō séhe yí rí jín séhe síhí rí, áchí Jítoho yō, Yaã jññ ndihí poder. Achí tutu.

## 7

<sup>1</sup> Núu súcuan, ñānī mānī, cánevāha yó táca jñuhun yáha jéé ni jéjnūhun ya. Jeē yúcuan na sándoo yó máá yó táca jéé sajnéhén yiqui cúñu yó jín ánuá yó. Te na cónso iyo yó núu Yaã Dios, te coo ndoo coo i yō nuū yā jín ndihí jñiñu cúní yā.

*Jeē ní canacani ni ñayuu Corinto siquí cuéchi i*

<sup>2</sup> Coo manī rō jín rí jijnáhan rō ví. Chi tu ní sáha rī falta nuū ní ñn rō, te tu ní stíví rí anuá ní ñn rō, te ní ñn rō tu ní stáhú rí. <sup>3</sup> Te nasūu jéé nducú rí cahān rī nuū rō cúu jeē cahān rī súcuan, chí je ní cahān rī jeē yóhoy manī rī jín rō. Te níñí ñuhun ní rí rohó, vésú cuu yó chí cotecu yō. <sup>4</sup> Te cúcáhu ndasí ní rí rohó jijnáhan rō, te cúsní teyí ní rí jeē siquí rō. Te vésú cájito rí táca jñndóhoyáha, te íyó ndeyí ní rí te cúsní ndasí ní rí jeē siquí rō.

<sup>5</sup> Ná ní jengoo ri Macedonia te tu ní iyo nayúú ní anuá rī, chí sa suhva yí ní iyo jñndóhoy jín rí táca lado. Chi ní iyo jeē ní castáhān jñāhan jín rí, te ní cayūhu rí sanaa te caca yátá ñayuu cácandje. <sup>6</sup> Te Yaã Dios jeē sáha jeē ndúndeyí ní ñayuu cácuuhyá ní, ní sáha ya jeē ní candundayí ní rí, chí ní quiji Tito ní sáha ya. <sup>7</sup> Te ní candusí ní rí, nasūu máá ñn-ní siquí jeē ní quiji de, chí suni jeē ní ndundayí ní de ní casáha rō. Chí ní castūhñ de jeē cáñuhun ní rō coto tucu rō rúhū, jín jéé cácuuhyá ní rō jeē siquí cuéchi rō, jín jéé canacani ní rō jehē rī. Te jeē yúcuan ní cusí gā ní rī.

<sup>8</sup> Te carta jeē ní tají rí nuū rō, vésú ní sáha jeē ní cacucuíhyá ní rō, te tuá nácani cuíhyá ní rí jeē ní sáha súcuan. Chí vésú ní cucuíhyá ní rí saá, te vijna te tuá, chí jíní rí jeē jecu-ní quiví ní cacucuíhyá ní rō ní sáha. <sup>9</sup> Te vijna te cúsní ní rí, te nasūu síquí maá jéé ní cacucuíhyá ní rō. Chí cúsní ní rí jeē ní jejnñiñu jeē ní cacucuíhyá ní rō, chí ní sáha jeē ní canacani ní rō siquí cuéchi rō. Chí ní cacucuíhyá ní rō nájñuhun cúní maá Yaã Dios, te nasūu jéé ní sáhuhū rí rohó. <sup>10</sup> Chí núu súcuíhyá ní yō nájñuhun cúní Yaã Dios, te suu sáha jeē nácani ní yó siquí cuéchi yó

te jnama ya yohó, te ma cóo ga jeē nácani cuíhyá ní yō. Te jeē cácuuhyá ní ñayuu tu cácandje, tu jéjnñiñu jeē nácani ní i, chí sa jñahnū ndetū i. <sup>11</sup> Te ní cacucuíhyá ní rō nájñuhun cúní Yaã Dios, te vijna te cájito rō náa váha ní jejnñiñu. Chí ní canacani ndasí ní rō ní sáha, te ní canducú rō jeē quéndoo ndaā rō, te ní cacuxeēn rō nuū téé ní sáha cuéchi, te ní cayūhu rō jeē ní castíví rō núu yā. Yūcuán na te yóhoy ní cacuní rō coto tucu rō núu rí, te yóhoy ní candihví ní rō ní cacuxeēn rō nuū téé ní sáha cuéchi ún. Te súcuan ní castéén rō jeé tú cuéchi rō, chí tu ní cájejnñhñ rō cuéchi ní sáha téé ún. <sup>12</sup> Te jeē ní tee rí carta un, nasūu máá-ní jeē cúxeēn rí nuū téé ní sáha cuéchi ún, ní nasūu máá-ní jeē cahān rí jehē téé ní ndoho ní sáha de. Chí sa suhva ní tee rí návāha nucūhñ ní rō ndese yóhoy ní canacani ní rō jehē rí jito jínúu Yaã Dios. <sup>13</sup> Jeē yúcuan ní candusí ní rí jeē siquí rō.

Te vihyá gā ní cacusí ní rí jeē ní jini rí jeē cúsní ní Tito, chí ní nduu nayúú ini de ní casáha rō. <sup>14</sup> Chí je ní cahān rí jín de jeē cúsní ní rí jeē váha ñayuu cácuu rō, te vijna te tu ní quéndoo rí jñuhun canu jeē siquí rō. Chí nájñuhun ní cajini rō jeē íyó ndaā táca jñuhun ní cacahān rí jín rō, suni súcuan ní cundaā jñuhun ní cacahān rí jín Tito jeē cúsní ní rí siquí rō jeé váha cácuu rō. <sup>15</sup> Te vihyá gā manī de jín rō vijna jeē ñuhun ní de jeé váha ní cajetáhú rō jeé cahān de, te ní cahíyo yíñuhñ rō ní candiso iyo rō núu de. <sup>16</sup> Núu súcuan te cúsní ní rí siquí jeé cucáhu ndasí ní rí rohó jijnáhan rō.

*Jeē na cúsní ní i socó i cuehē*

## 8

<sup>1</sup> Hermano, vijna te suni cácuu rí castūhñ rí nuū rō jijnáhan rō ndese cuehē jeé váha ní sáha Yaã Dios jín ñayuu cácandje cáyucu Macedonia. <sup>2</sup> Chí vésú yóhoy ní jito ndee jñndóhoy i, te suni yóhoy ní cacusí ní i jín jñuhun ya. Te vésú ñayuu ndahú ndasí cácuu i, te yóhoy váha ní cajejuñ i cuehē xūhñ jéé cúu ñayuu ndahú cácandje. <sup>3</sup> Chí cúu rí testigo jeē ní cacusí ní maá i ní cajēhe i ndésaa ní canda i, te nde vihyá gā ní cajēhe i. <sup>4</sup> Chí ní cacahān ndahú ndasí i jín rí jeé na cuáha rí jñuhun chindéé ñāhān i jín yó cuāha i xūhñ cuu hermano cándohoy ndahú. <sup>5</sup> Te vihyá gā ní casáha i vésú jeē ní cajeni ní rí, chí xñma gā ní casocó i máá i nuū Jítoho yō, te saá te ní cajēhe i máá i sáha i táca jéé cácuu rí, ndihí ndese nújñāhan ní Yaã Dios. <sup>6</sup> Te jeē súcuan ní casáha ñayuu Macedonia, te ní castihví ní rí Tito jeē na jéé tucu de nuū maá rō, sáha de jeé jñu jñiñu jeē ní squéjéé de jín rō jeé suni caquin rō cuehē xūhñ cuu ñayuu ndahú. <sup>7</sup> Chí máá rō yóhoy váha cásaha rō táca-ní, chí váha cácandje rō,

vāha cānacani rō jñūhun, vāha cājecūhun ni rō, vāha cāndihvī ni rō, vāha manī rō jīn rī jijnāhan rī. Nūu sūcuan te suni cānuū sāha vāha rō jñiñu yāha jēe cuāha rō jēe cūu ñayuu ndahū.

<sup>8</sup> Te nasūu jēe cunī rī ndacu rī jñiñu nuū rō, chi sa cástūhun rī nuū rō ndese yōhyo cācusī ni sava ga ñayuu jēhe i xūhún, te sūcuan te cuni rī jēe suni mǎá rō cācundáhū ndije ni rō ñayuu ndahū. <sup>9</sup> Chi je cājini rō ndese yōhyo vāha ni Jitoho yō Jesucristo jīn yō. Chi siquī jēe ní cundáhū ni yā rohó te ni nasáha ndáhū yá mǎá yá, vēsú cucá ndasí yá nde andíví nuū. Te sūcuan ni sāha ya jēe cācucá rō ndihi jēe ndiso jñūhun ya, siquī jēe ní nasáha ndáhū yá mǎá yá.

<sup>10</sup> Te jēe vāha mǎá rō cūu jēe na cáchi rī ndese jéni ni rī siquī jñiñu yāha. Vāha ni caquejé rō nde jendujin, chi nasūu mǎá-ni jēe ní cajequin rō xūhún, chi suni yōhyo ni cacusī ni rō sāha rō. <sup>11</sup> Nūu sūcuan te vijnā te sínu rō. Te nájñūhun ni cacusī ni rō ni caquejé rō jīn, suni sūcuan na cūsī ni rō sínu rō, chi cuāha rō nūu ndese cānevāha rō. <sup>12</sup> Chi nūu cūsī ni yō cuāha yō, te jétáhū yá nūu ndese névāha yō, chi tu jícán yā jēe cuāha yō jēe tu névāha yō.

<sup>13</sup> Te nasūu jēe cahán rī jēe cáhni ndahū rō mǎá rō jēe cáa ga nihīn i vēsú jēe ndóo nuū mǎá rō. <sup>14</sup> Chi sa suhva jēe ññ cūhva-ni conevehā rō jīn i. Chi cānevāha cuehē rō vijnā, te cuu cuāha rō jēe cūmanī nuū i. Yūcuán na te nūu ndé ññ quivī conevehā i, te suni cuu cuāha i te nūu ni cumanī nuū rō. Te sūcuan te ññ cūhva-ni conevehā rō jijnāhan rō, <sup>15</sup> nájñūhun cáhán tutu ī siquī ñayuu jēe ní canastútú maná nde jenahán: Tēe jēe ní nastútú cuehē, tu ní ndóo ga nuū de. Te tēe jēe ní nastútú jecu-ni, suni tu ní cūmanī nuū de. Achí tutu.

#### *Jñūhun Tito jīn ūu gā jñāhan de*

<sup>16</sup> Te na cútahū rī nuū Yaā Dios jēe ni sāha ya jēe ndihví ni Tito jehē rō nájñūhun cāndihvī ni mǎá rī. <sup>17</sup> Chi ni jetáhū de jēe ní cacahán rī jīn de jēe jēe de nuū rō. Te siquī jēe ndihví ni de jehē rō, jēe yūcuan cuájēe de, chi sūcuan cūu ni mǎá de.

<sup>18</sup> Te suni cātájí rī ññ hermano cuajeē jīn Tito nuū rō. Te tāca grupo ñayuu cācandíje cājeñhún i tēe un jēe vāha jéjñiñu de siquī jñūhun jēe jñāma ya yohó. <sup>19</sup> Te tāca grupo ñayuu cācandíje suni ni catee i jñiñu siquī de jēe cáca de jīn rī chindéé ñāhán de quindēca de xūhun jīn rī jēe ní cajēhe ñayuu. Te jñiñu yāha cāsáha rī návāha cahán ñayuu jēe yōhyo vāha Yaā cūu mǎá Jitoho yō, chi cuni i ndese yōhyo cācusī ni rō cāsocō rō xūhún. <sup>20</sup> Te quingoo ndindúú rī návāha ni ññ ñayuu ma tēe i cuēchi siquī rī siquī xūhun cāsocō ñayuu. <sup>21</sup> Chi nducú rī jēe squícu ndaá rī tācá jñiñu,

nasūu mǎá ññ-ni nuū Yaā Dios, chi suni nuū ñayuu.

<sup>22</sup> Te suni cātájí rī ññ hermano yō cuajeē de jīn ndindúú tēe yāha. Te tjini jīnu ni steén de jēe yōhyo cūsī ni de ndihví ni de tacá jñiñu. Te vijnā chi ndihví gā ni de jehē rō, chi cūcáhu ndasí ni de jēe cāsquícu rō. <sup>23</sup> Te nūu cācajnūhún ñayuu siquī Tito, te achí rō jēe cūu de tēe chindéé ñāhán jéjñiñu jīn rī nuū rō siquī jñūhun ya. Te uū gā hermano yō yāha, achí rō jēe cācuu de tēe jēe ni catejñiñu ñayuu cācandíje, te cáhīyo yññhún de nuū Cristo. <sup>24</sup> Nūu sūcuan te steén rō nuū de jēe cáhīyo manī ndije rō jīn de, návāha na cūni tāca grupo ñayuu cācandíje. Te sūcuan cuni i jēe tu ní cācusī cáhā ni rī siquī rō.

*Siquī jēe cājequin i xūhún cuu tācá hermano*

## 9

<sup>1</sup> Te vijnā te tuá jini ññhún tee rī nuū rō siquī xūhun jēe cājequin rō cuu tācá hermano cāndoho ndahū. <sup>2</sup> Chi je jini rī jēe cānujnahan ni rō cuāha rō. Te jēe yūcuan māni cūsī ni rī cahán rī jīn ñayuu Macedonia jēe rohó ñayuu Acaya, je ni casátūhva rō xūhun ndé jendujin. Te jēe sūcuan ni cacusī ni mǎá rō, te jēe yūcuan cuehē ñayuu Macedonia ni cacondihví ni i ni cajēhe mǎá i. <sup>3</sup> Te tájí rī ndinúni hermano yāha cuájēe mǎá de nuū rō xihna gā, návāha jēe jinū mǎá rī te ma quéndoo néé rī siquī jñūhun ni cahán rī jēe squícu vāha rō jīn jñiñu ún. Chi coo tūhva ndije rō jīn xūhun nájñūhun ni cahán rī jīn i. <sup>4</sup> Chi sanaa te jecoo jecu tēe Macedonia jīn rī, te nūu cuni de jēe tu cáhīyo tūhva rō, te coo jñūhun canu nuū rī, te suni nuū mǎá rō jijnāhan rō, chi ni cahán teyí rī jēe cáhīyo tūhva ndije rō. <sup>5</sup> Jēe yūcuan ní jeni ni rī jēe cānuú cahán rī jīn tāca hermano yāha jecoo de xihna gā, te sáa te jinū rī, návāha stíhvi ni de rohó jēe yáchī na cóo tūhva xūhun jēe ní cacahán rō jēe cuāha rō. Te sūcuan te coo tūhva siquī jēe vāha ni rō, te nasūu jēe safuerza rī rohó.

<sup>6</sup> Cocuhun ni rō jñūhun yāha, jēe nūu jecu-ni cuāha rō te suni jecu-ni nanihīn rō: Chi tēe jēe tihlī-ni táji, suni tihlī-ni nastútú. Te tēe jēe táji cuehē, suni cuehē nastútú. Achí tutu. <sup>7</sup> Tācá ññ ññ rō cuāha rō ndésaa ni tee ni rō. Ma cúxi ni rō cuāha rō, chi nasūu fuerza cūu. Chi Yaā Dios manī yā jīn ñayuu jēe cūsī ni cuāha. <sup>8</sup> Te mǎá Yaā Dios cuu sāha ya jēe nducuehē ndinuū jēe vāha cuu rō jijnāhan rō, návāha níni conevehā rō ndihi tācá jēe jini ññhún rō, te coo sobra gā jēe cuāha rō jēe cūu tācá jñiñu vāha. <sup>9</sup> Chi sūcuan cáhán tutu ī siquī tāca ñayuu jēhe: Ni scáa i ni jēhe i nuū ñayuu ndahū. Te tācá jñiñu vāha sāha i, chi quéndoo ní cáni.



Achí tutu. <sup>10</sup> Te Yaā Dios jéhe ya tata nuū tēe táji, te nihin de staā jeē cájide. Te suni súcuan cuāha ya ndinuū jeē vāha cuu ró, te sáha ya jeē cáyā te nducuehē jniñu vāha cásáha ró. <sup>11</sup> Súcuan cucúcá ró jín táca-ni, návāha cuu cuāha cuehē ró. Te xūhun jéē cuāha ró quihin nuū hermano cándoho ndáhú, suu sáha jeē nácuatáhú i nuū Yaā Dios. <sup>12</sup> Chi xūhun jéē cuāha ró núu i, nasūu máá ñn-ni jeē nihín i jeē cúmanī nuū i, chi suni sáha jeē nácuatáhú ndasí i nuū Yaā Dios. <sup>13</sup> Te cahān i jeē yóhyo vāha Yaā cúu Yaā Dios, chi xūhun jéē ní cajéhe ró stéen jeē vāha cácandje ró jñuhun Cristo. Te suni sáha jeē cahān i jeē yóhyo cújéhu Yaā Dios siquī jeē ní cajéhe cuehē ró nuū i jín núu sava ga ñayuu. <sup>14</sup> Te suni cacān tahú i jehē ró, chi coo manī ndasí i jín ró siquī jeē yóhyo vāha ni sáha Yaā Dios jín ró. <sup>15</sup> Te na cútahú yō nuū Yaā Dios, chi ni jéhe ya Sēhe ya nuū yō, jeē cúu ñn tahú cáhnu ndasí jéē ma cánda cuiti yō castühún ndihí yō.

*Jeē ndiso jniñu Pablo cúu de apóstol*

## 10

<sup>1</sup> Te ruhū Pablo, cáhān ndahú rí jín ró jijnáhan ró jín modo máá Cristo jeē vítá ni yā te vāha ni yā. Ruhū, chi cácahān ró jeē iyó suchí ni rí núu ndéé rí jín ró, te núu ndéé jíca rí te tu yúhú cuiti rí cahān nihin rí jín ró, cácahān ró. <sup>2</sup> Núu súcuan te cáhān ndahú rí jín ró jeē núu na jéé rí te ma cahān ró jñuhun jeē sáha jeē cuxeēn rí nuū ró. Chi sava ró cácahān jeē casáha rí jniñu ya siquī jeē máni jeē na nihín rí siquī ún. Núu súcuan te iyó túhva rí cuxeēn rí nuū ñayuu cácahān súcuan. <sup>3</sup> Chi vésú cácuu rí ñayuu cáyúcú ini ñayví, te tu cájejnāhan rí modo cájejnāhan ñayuu ñayví. Chi nájnūhun jeē cájejnāhan rí siquī táca jniñu neé. <sup>4</sup> Chi nasúu ndajniñu ñayví jéjníñu rí cájejnāhan rí, chi jín poder Yaā Dios cájejnāhan rí snáa rí táca fuerza jeē cúu contra siquī yā. <sup>5</sup> Súcuan cásnáa rí táca jñuhun ndúxí jín jñuhun téyí jeē nducú casi jeē ma cúni ñayuu ndese Yaā cúu Yaā Dios. Te cájei rí nuū ndihí jeē tú vāha jeē cájei ni ñayuu, návāha cuandetū i nuū Cristo. <sup>6</sup> Te jeē jinu cuandetū vāha máá ró, yúcuán na te coo túhva rí cuāha rí castigo nuū táca gá ñayuu jeē tu cájendetū.

<sup>7</sup> Máá ró jijnáhan ró máni cájei ni ró modo ñayuu tu cájecūhun ni. Núu na-ni tēe jéni ni de jeē Cristo ni tejníñu ya de, te na sáha de cuenta jeē suni súcuan ni tejníñu ya ruhū jijnáhan rí. <sup>8</sup> Te núu ni cahān teyí rí jín ró jeē ndiso jniñu rí, te tu cúcanu rí sáha. Chi máá Jítoho yō ni tejníñu ya ruhū jijnáhan rí, návāha sáha rí jeē ije ánuá ró jín jñuhun ya, nasūu jéē snáa rí. <sup>9</sup> Núu súcuan te tu cúni rí jeē cáni ni ró jeē nducú rí siuhú rí rohó jín carta rí. <sup>10</sup> Chi cácahān sava ró jéē táca carta rí yóhyo stáhví ni te nihin ndácu jniñu, te sa

suhva núu ndéé rí jín ró te tu cúndeyí ni rí ndacu nihin rí jniñu, te suni tu cúu cahān vāvihí rí, achí ró. <sup>11</sup> Te ñayuu cácahān súcuan na sáha i cuenta jeē nájnūhun nihin cáhān carta rí jeē íne jíca rí, suni súcuan nihin ndacu rí jniñu nuū ró jeē cóndee rí jín ró.

<sup>12</sup> Te va ma chūndeyí cuiti ni nde rí jeē sajéhu rí máá rí, nájnūhun cásáha sava tēe un jéē cájejnūhún nde de máá de. Táca tēe ún chi cácuáné de jeē cájei ni de jeē cújéhu ga de vésú jnāhan de, te tu cásáha de cuenta ndese cúni Yaā Dios jeē caca de. <sup>13</sup> Te ruhū jijnáhan rí, chi cuteyí nde rí máá cúhva-ni jniñu jeē ní jéhe Yaā Dios nuū rí, te ma yáha ga rí. Máá Yaā Dios ni tee cúhva yá ndésaa cúu jeē sáha rí, te máá yá ni jéhe jñuhun jeē ni jínú rí nuū rohó ñayuu ñuu Corinto. <sup>14</sup> Jeē yúcuán ná ni jinúcoo rí nuū ró jeē xúhna ñúhún te nasūu jéē ni yáha rí nuū cúhva jniñu ní jéhe ya nuū rí. Chi xíhna gá máá rí ni jinúcoo nuū ró ni canacani rí jñuhun vāha Cristo. <sup>15</sup> Te tu cácuteyí rí siquī jniñu ní casáha inga tēe, nájnūhun jeē jniñu máá rí cúu. Chi sa suhva cáñuhun ni rí jeē cuehē gá candje ró, te súcuan te cuu sáha rí cuehē gá jniñu ya méñu ró, te níni máá cúhva jeē ní jéhe ya nuū rí. <sup>16</sup> Yúcuán na te cácuani rí scuité núu ga rí jñuhun jnáma ya yohó núu táca gá ñuu yúcu ndé yúcuán gá. Te súcuan te ma quívi nduu rí cuteyí rí nuū jeé jé ni canacani inga tēe jñuhun.

<sup>17</sup> Te núu ndé tēe cúni de cuteyí de, na cuteyí de siquī jeē sáha máá Jítoho yō, nasūu siquī jeé sáha máá de. <sup>18</sup> Chi nasúu tēe jeē jejnūhún máá cúu jeē quéndō yíñúhún, chi sa suhva tēe jeē jejnūhún máá yá.

*Jeē cahān Pablo siquī tēe cácanani jñuhun stáhú*

## 11

<sup>1</sup> Cone cáhnu ni ró jijnáhan ró jeē cahān rí jecu jñuhun modo nájnūhun cácahān ñayuu canéé. Núu súcuan te cáhnu coo ni ró ví. <sup>2</sup> Chi cúcuñí rí jehē ró jijnáhan ró, nájnūhun cúcuñí Yaā Dios. Chi cácuu ró nájnūhun ñn sūchi síhí iyó ndoo, te ní sáha rí jeē quijnáhan ró jín Cristo, nájnūhun quijnáhan ñn sūchi síhí jín máñúhún-ni yí i. <sup>3</sup> Te yúhú rí sanaa te cuāha ró jñuhun stáhú táca tēe un rohó, te siáa ró jñuhun jeē chiñúhún ndáa ró Cristo nde jín ini jín ánuá ró. Chi suni súcuan ni sáha Satanás jín Eva, chi ni quívi ini ñn coo, te ni stahú un ña jín jñuhun ndíchí stáhú. <sup>4</sup> Chi núu quijcoo tēe nuū ró jeē tu cácanani ndáa de jñuhun Jesús nájnūhun ni canacani rí nuū ró, te va yóhyo vāha cájetáhú nde ró de. Te suni súcuan vāha cájetáhú nde ró núu inga espíritu jín núu inga jñuhun jeē tu quijnáhan jín Espíritu jín jñuhun jeē ní cacandje ró jéē jnáma ya rohó. <sup>5</sup> Te táca tēe cácandje ró un jéē cácahān jeē apóstol kujéhu ga cácuu, tú cuiti jeē cújéhu ga nde

de nuū rī. <sup>6</sup> Chi vēsū tu nīhīn vāha nde ri modo cahān rī, te jécūhun vāha ni rī. Chi jīn ndihī jniñū ni casāha ri mēñū rō ni castéén cají rī nuū rō jeē súcuan cúu.

<sup>7</sup> Tu ní jicān rī xūhun nuū rō siquī jeē ní nacani rī jnūhun jnáma ya yohó. Te súcuan ni cotecu ndahú rī návāha quendóo vāha ga maá rō jīn jnūhun ya. ¿Te va cuēchi ni sāha ri jeē ni sāha ri súcuan, chí naún? <sup>8</sup> Chi sava ga grupo ñayuu cácadnje ni quihin rī xūhun jeē ní cajēhe i nuū rī, návāha súcuan-ni nacani rī jnūhun ya nuū rō jijnáhan rō. <sup>9</sup> Te ná ni condee rī jīn rō te ni ndihī xūhun rī, te tu ní jicān cuiti rī nuū ní ñn rō. Chi hermano jeē ní quijicoo ichi Macedonia ni cajēhe de nuū rī jeē cúmani. Te jeē súcuan tu ní stáhān rī rohó, te ni ma sāha cuiti rī. <sup>10</sup> Te nájnūhun cúcāhnu vāha ni rī jeē jini rī jnūhun ndaā Cristo, suni súcuan jini rī jeē ma quihin rī xūhūn nuū ni ñn ñayuu ní ndáñū Acaya, návāha ma cási i jeē cúsi ni rī jeē súcuan-ni nacani rī jnūhun ya. <sup>11</sup> ¿Te á siquī jeē tú maní rī jīn rō cúu jeē cahān rī súcuan, jéni ni rō, chí naún? Tuú chí maá Yaā Dios jini yā jeē maní rī jīn rō jijnáhan rō.

<sup>12</sup> Te sāha ri ná-ni sāha ri, chi ma quihin rī xūhun rō, návāha casi rī nuū jeē casatéyí téé un maá de jeē cáchān de jeē inuú casāha de jniñū ya jīn rī. <sup>13</sup> Te téé ún chi nasūú apóstol ndaā cácuu de, chí māni maá jnūhun stáhú cáchān de, te casāha de maá de jeē cácuu de apóstol Cristo. <sup>14</sup> Te tu náa ni yō jito yó jéé casāha de súcuan, chi je jini yō jeē suni Satanás násama maá te stáhú jéé sāha maá nájnūhun ñn ndajéhe Yaā Dios jeē jica jīn luz yā. <sup>15</sup> Te jeē yúcuan suni tu náa ni yō jito yó jéé téé cájejniñū nuū Satanás, casāha de maá de jeē téé ndaā cácuu de. Te ñn quiví te nanihīn de siquī jniñū néé casāha de.

*Jnūndóho ni ndoho Pablo siquī jeē cúu de apóstol*

<sup>16</sup> Inga jīnu cáhān rī jīn rō jeē ni ñn rō ma cáni ni rō jeē téé cánéé cúu rī. Te núu súcuan cájeni ni rō, te va cuatáhú nde rō jéé cahān rī nájnūhun téé cánéé, návāha suni cuu cutéyí nde ri jecu nájnūhun casāha téé ún. <sup>17</sup> Jeé cahān rī vijna chi nasūu jéé ní ndacu maá Jítoho yō cúu, chí sa nájnūhun téé cánéé cahān rī jeé cutéyí nde ri. <sup>18</sup> Chi cuehē de casatéyí de maá de modo jeé iyó ini ñayiví, te suni súcuan na satéyí nde rī maá rī núu súcuan. <sup>19</sup> Te va téé cáhīyo cájī xini cácuu nde rō, te jeé yúcuan cúu vāha ni nde rō cuatáhú rō ñn téé cánéé núu súcuan. <sup>20</sup> Chi va vāha-ni cájendeyí ni rō nuū téé un jéé casáfuerza de rohó cuajniñū rō núu de, chí casāha de jeé ndundáhú rō, chí cácuende de ndajniñū rō, chí casájéhnu de maá de nuū rō, chí ndé cácatu de nuū rō. <sup>21</sup> Te vēsū cúcanu nde ri cahān rī, te na cáhān rī jeé tu ní cūndeyí ni

nde ri satéyí rī maá rī nájnūhun casāha téé ún.

Te vijna te núu iyó sava téé chūndeyí ni de satéyí de maá de, te va suni chūndeyí ni nde maá rī núu súcuan. Te va cáhān rī nájnūhun cáhān ñn téé cánéé. <sup>22</sup> Núu cácutéyí de jeé téé hebreo cácuu de, te suni súcuan ruhū. Núu téé Israel cácuu de, te suni ruhū. Núu yucūn Abraham cácuu de, te suni ruhū. <sup>23</sup> Núu téé cájejniñū nuū jnūhun Cristo cácuu de, te vihýá gā ruhū. Te va cáhān rī nájnūhun téé cánéé jéé cutéyí rī súcuan. Chi ni caa ga ni sájniñū rī vēsū maá de jijnáhan de, te ni caa ga ni cacani i ruhū, te cuehē gā jīnu ni ine ri vecāa, te suni cuehē gā jīnu ni cacani ñayuu cahni i ruhū. <sup>24</sup> Te jnāhan rī hebreo, uhūn jīnu ni cacani xeēn de ruhū jīn cuarta ññ, ñn cūhva jeé je yajni cuu rī sāha. <sup>25</sup> Uní jīnu ni cacani de ruhū jīn yujnu xii, te ñn jīnu ni cajēhe de yuú xini rī. Uní jīnu ni quēe barco jeé ní jica ri siquī jnūhun ya. Te ñn jecuáá jīn ñn ndiáca ni yosó candá rī nuū cunú ndute mar. <sup>26</sup> Cuehē jīnu ni ndoho ri ni jica ri ichi, te ni cácu rī nuū táca yúte, te ni cácu rī nuū táca ñacuihná. Ni cácu rī nuū ñayuu nación rī jīn nuū ñayuu ñuu jicá. Ni cácu rī cháha chúcuan ná ni Iyo rī ñuu jīn rancho jīn mar. Ni cácu rī nuū táca jnāhan rī jeé tu iyó ndáa. <sup>27</sup> Ni sájniñū nīhin rī te yí ní ndoho rī. Cuehē jīnu ni jehni rī maá rī máhná. Ni jīri rī sōco, ni jichí rī ndute. Cuehē jīnu ni Iyo ndite ni rī, ni cuijnu rī, ni cumani sahma rī

<sup>28</sup> Te siquī táca jéé yáha chí iyó gá. Chi ndiquiví ndóho rī jeé nácani ndasí ni rī jehé táca grupo ñayuu cácadnje. <sup>29</sup> Núu ñn ñayuu tu fuerza ini i, te suni ndóho rī jehé i. Te núu ñn ñayuu quiví i cuēchi sāha jnāhan i, te ndóho rī jnūhun cúcanu jīn jnūhun náxeēn ni. <sup>30</sup> Núu súcuan te núu cánuú cutéyí nde ri, te va cutéyí rī siquī táca jéé steén jeé tú na fuerza ini rī. <sup>31</sup> Te Yaā Dios, Yaā cúu Tátá maá Jítoho yō Jesucristo, jini yā jeé cahān ndaā rī. Te ní cáni na cáhān ñayuu jeé vāha ndasí Yaā cúu ya. <sup>32</sup> Ná ni Iyo rī ñuu Damasco, te gobernador jeé ndacu jniñū ndañūñ jeé jniñū rey Aretas, ni jeni de soldado ni cacondito táca yéhyí jeé ní condúu ndihyú ñuu ún, chí jniñū de ruhū quihin rī vecāa ni cuni de núu. <sup>33</sup> Te ni quiví rī chíjī ñn jica, te ñayuu cácadnje ni cascūn i ruhū ventana ñn vehe jeé néne jicá jeé ndihyú ñuu ún. Te súcuan ni cácu rī nuū téé ún.

*Jeé ní jito ndijin Pablo jeé ní stúu ya nuū de*

## 12

<sup>1</sup> Te tu nīhīn jniñū jeé cutéyí rī. Te vāha ga na cástūhun rī nuū rō siquī jeé ní jito rī jeé ní stúu maá Jítoho yō nuū rī te ni steén ndijin yā nuū rī. <sup>2</sup> Jini rī ñn téé cándje Cristo, te je ni cuu uxí cuūn cuiyā jeé ní sāha ya jeé ní caa téé un ní jehēn de nde andiví ún. Te tu jini rī

núu ni jehēn rī jīn yiqūi cūñu rī, chí ní jehēn anuá-ni rī. Máa Yaa Dios cúu jeē jini. <sup>3</sup> Te jini rī jeē ní ndonehen ya ruhū. Te á ní jehēn rī jīn yiqūi cūñu rī, chí ní ndōo, tu jini rī, chí máa-ni Yaa Dios cúu jeē jini. <sup>4</sup> Chí ní sáha ya jeē ní caa rī ni jehēn rī nde jardín andiví. Te yūcuan ní jini sōho rī tāca jnūhun sáhi ndasí jeē ma cúu castūhun yóhó ñayuu. <sup>5</sup> Te siquī jeē ní sáha ya sūcuan jīn rī cúu jeē cutéyí rī, te ma cutéyí rī siquī ndese cúu máa rī. Chí cutéyí rī máni jeē tú na fuerza ini rī. <sup>6</sup> Te núu cuní rī cutéyí rī siquī máa rī nuú, te nasūu jeē canéé rī núu sáha rī sūcuan núu, chí ndaa jeē jeé iyó jeē cutéyí rī. Te ni ma sáha rī, chí tu cuní rī jeē cani ni ñayuu jeē cujéhu ga rī vesú jeē ní jito i chí jeē ní jini i jnūhun rī.

<sup>7</sup> Te tu cuní yā jeē yáha rī cutéyí rī siquī jeē ní stéen ndijin yā jniñu jéhu ndasí un núu rī, te jeé yūcuan ni quiji ñn jnūndóho jeé ndiquín ruhū te stóho ruhū. Te ñn jeē ni jéhe ya jnūhun ni tají Satanás cúu, ñn jeē stóho ruhū, návāha ma yáha rī cutéyí rī. <sup>8</sup> Te uní jinu ni cahān ndahú rī jīn máa Jítoho yō jeē na téjyo ya quihīn. <sup>9</sup> Te ni cahān yā jīn rī: Tuú chí tu cúmani jeē cundáhú ní rī rohó. Chí ñayuu jeē tú na fuerza ini, sáha rī jeé nducuehē gā fuerza máa rī ini i, ni achi yā. Núu sūcuan te cúsi rī ní jeē tú na fuerza ini rī, chí sūcuan te nducuehē gā fuerza Cristo ini rī. <sup>10</sup> Jeé yūcuan cúu jeé cúsi rī ní jeé tú na fuerza rī, jīn jeé cácahān ndevāha ñayuu jīn rī, jīn jeé cúmani núu rī, jīn jeé cájito xeēn i ruhū, jīn jeé ndóho rī jnūndóho siquī Cristo. Chí jeé tú na fuerza máa rī, yūcuan sáha jeé nihín rī fuerza máa yá.

*Jeé nácani ni Pablo siquī ñayuu cácañje ñuu Corinto*

<sup>11</sup> Te va tēe cánéé cúu rī jeē ní sátéyí nde rī máa rī. Te siquī jeē tu cácañje ró ruhū, jeé yūcuan ní sátéyí rī máa rī. Chí canúu jeé máa ró cuajnúhun ró ruhū nuú. Chí vesú tú jniñu rī jeé máa rī, te va tu núu cuiñi nde rī nuú táca tēe un jeé cácahān ró jeé apóstol cujéhu cácu de. <sup>12</sup> Chí mēñhō ró ní sáha rī táca jniñu jeé stéen jeé cúu ndije rī apóstol. Chí jīn cuéhē paciencia ni sáha rī táca jniñu jéhu jeé stéen poder Yaa Dios, jīn táca jniñu jeé nahān ní cana ni rō ní cajito ró. <sup>13</sup> Te tu ní sáha rī jeé núu ga cácu ró núu táca gā grupo ñayuu cácañje, chí máa ñn-ni jeé tu ní stāhān rī rohó jeé cuāha ro jeé jini ñúhūn rī. Cone cáhu ni rō núu sūcuan ni sáha nde rī falta nuú ró víi.

<sup>14</sup> Te vijna jeé iyó túhva rī jecondēhe rī rohó vuelta uní. Te suni tú na vé cacān rī nuú ró, chí nasūu ndajniñu ró cúu jeé cuní rī, chí sa suhva jeé quendōo vāha ró jīn jnūhun ya. Chí nájnūhun sēhe rī cácu ró, te sēhe chí tu cánúu caya i jeé cúu tátá i, chí sa tátá cánúu cuāha de jeé quendōo vāha sēhe de. <sup>15</sup> Jeé yūcuan cúsi rī ní stāhi rī jeé névāha rī, te

nde stāhi rī fuerza máa rī, návāha sáha rī jeé quendōo vāha ánuá ró jijnáhan ró. Te maní gā coo rī jīn ró, vesú sanaa te jecu-ni cáhiyo maní ró jīn rī.

<sup>16</sup> Te iyó jecu ró cácahān jeé vesú tú na vé ni jicān rī nuú ró, te tēe stáhú cúu rī, chí ni nducú rī modo ndichí nihīn rī xūhun ró, cácahān ró. <sup>17</sup> ¿A táca tēe ní tají rī nuú ró, á ñn máa de ni stáhú de rohó jeé nihīn de xūhun ró cuu máa rī, chí naún? Tú cuiñi. <sup>18</sup> Ni cahān ndahú rī jīn Tito jeé jecondēhé de rohó, te ni tají rī ñn hermano ní jeé jīn de. ¿Te chí ní stáhú Tito rohó ní quihīn de xūhun núu ró jeé cuu máa de, chí naún? Tuú chí inuú-ni casáha ndindúú rī, te ñn-ni ánuá ndindúú rī.

<sup>19</sup> ¿Sanaa te cájeni ni ró jeé cahān rī jnūhun yáha návāha quendōo vāha rī jīn ró, chí naún? Nasūu sūcuan cúu, chí Yaa Dios jini yā jeé cahān rī máa-ni jnūhun jeé cuní Cristo. Te ndihi jeé cahān rī chí nducú rī jeé ije ró jīn jnūhun ya, ñāni máni. <sup>20</sup> Chí yúhú rī jeé núu na jéé rī, te sanaa te cuní rī jeé tu casáha ró jniñu núnahan ni rī. Te máa ró jijnáhan ró, suni ma núnahan ni ró ruhū. Chí sanaa te cátejnáhan ró, cácucaúsún ni ró, cácuñi rī ró, cáсандúxí ró, cásjnúhún ró, cácahān ró siquī jnáhan ró, cácutéyí ró, cájica néé ró. <sup>21</sup> Te yúhú rī jeé núu na jéé tucu rī te cuāha Yaa Dios jnūhun canu nuú rī jeé sūcuan casáha ró. Te sanaa te cucuiñyá ni rī nuú iyó cuéhē ró jeé ní casáha cuéchi ichi yátá, te tu nácani ni ró stóo ró jniñu jnéhēn jniñu jica jnéni jīn jniñu néé ndasí ní casáha ró.

*Saludo jīn jnūhun cástūhun Pablo jeé sándāhi*

## 13

<sup>1</sup> Yáha cúu vuelta uní jeé jecondēhe rī rohó. Te sándā yō jniñu nájnūhun cahān tutu: Jīn jnūhun jeé cahān uñ chí uní testigo te cundaa táca jniñu, áchi. <sup>2</sup> Te vijna jeé ine jicá rī te cahān tucu rī nájnūhun ni cahān rī ná ni ine rī jīn ró. Cahān rī nuú ñayuu ni casáha cuéchi un jīn núu ndihi ró, jeé núu na jéé tucu rī te ma cóo vitá ni rī jīn ró. <sup>3</sup> Te yūcuan cuu prueba jeé cánducú ró, suu núu jendaa jeé cahān rī jīn fuerza Cristo. Chí Cristo tu cúmani fuerza yā jeé sándā yā jīn ró, chí stéen yā poder yā mēñhū ró. <sup>4</sup> Te vesú tu ní stéen yā fuerza yā ná ni jilhi yā jicá cruz, te vijna chí técu yā jīn poder Yaa Dios. Te nájnūhun ni ndoho máa yá, suni sūcuan cándoho rī vijna jeé tu fuerza rī. Te vesú sūcuan te jīn poder Yaa Dios cátecu rī jīn yā jeé cuajniñu rī nuú ró jeé siquī jnūhun ya.

<sup>5</sup> Coto ndee ró máa ró núu cáhiñ nihin ró jīn jnūhun cácañje ró yá. Sáha vāha ro cuenta. ¿Te á tu cájini ró jeé ndeé Jesucristo ini anuá ró, te núu ndaa jeé ní cacandije ndije ró? <sup>6</sup> Te ñúhūn ni rī jeé suni cácucañu ni ró jeé máa rī cácañje ndije rī. <sup>7</sup> Te cájicān tahú rī nuú Yaa Dios jeé ma sáha ró ni ñn

jniñu néé. Te vēsú núu cuajnúhún ró jeē váha ndácu ri jniñu nuū rō, chí vēsú núu ma cuajnúhún rō, te tú na vé sáha, chí mání jeē na sáha ró jniñu ndaā cúu jeē cánducú rí. <sup>8</sup> Chí tu jési ri nuū jniñu ndaā, chí sa suhva scáca rí. <sup>9</sup> Núu súcuan te cácusī ni rí núu tú na fuerza maá rí, te núu iyó fuerza maá ró. Te níni cácan tahu rí jeē na íje ga ni rō jijnáhan ró jíin jnúhun ya. <sup>10</sup> Te téé rí carta yáha nuū rō nde ná tu jeē rí, náváha núu na jéé rí te tuá jíni ñúhún cuxeēn rí nuū rō. Chí ni jēhe Jitoho yō jniñu ndíso ri yáha jéé sáha ri jeē íje ánuá rō jíin jnúhun ya, nasūu jéé snáā rí.

<sup>11</sup> Je ni cahān yō núu súcuan hermano, te na cóo jeē váha jíin ró jijnáhan ró. Te na cóndihvī ni rō íje ró jíin jnúhun ya, te coo ndeyí ni rō. Te na cóo inuú ni rō te coyūcu mání rō jíin jnáhan ró. Te Yaā ndíso jnúhun ndeyí sī ni jíin jnúhun cundáhú ni, coo ya jíin ró jijnáhan ró. <sup>12</sup> Te jeē cahān rō jíin táca jnáhan ró, te yíñúhún techūhu ró ndaha i. <sup>13</sup> Sāndeyí ni rō jijnáhan ró, áchí hermano cácanđje jeē cáyūcu yáha.

<sup>14</sup> Te ñúhún ni rí jeē Jitoho yō Jesucristo na sáha ga yā jeē váha róhó jijnáhan ró, te Yaā Dios cundáhú ni yā rohó, te Espíritu Santo condee cáhnu ya jíin ró. Súcuan na cóo. Amén.

## CARTA JEE NI TEE SAN PABLO APOSTOL NUU ÑAYUU GALACIA

<sup>1</sup> Máá rí cúu Pablo apóstol. Te nasūu ñáyyuu ni jéni ruhū ni nasūu ñáyyuu ni tájí ruhū jeé nácani rí jñūhun, chí sa suhva máá Jesucristo jíin Tátá yō Yaā Dios, Yaā ní nastécu Jesús méhñu ndáyi. <sup>2</sup> Te ruhū jíin táca hermano cáyūcu jíin rí yāhá, cátee rí carta yáha cuájeé nuū rohó ñáyyuu cácan díje ní región Galacia. <sup>3</sup> Te cáñuhun ní rí jeé Tátá yō Yaā Dios jíin Jítoho yō Jesucristo, na sáha ga yā jeé váha rōhó, te sáha ya jeé coo ndeyí coo síi ní rō. <sup>4</sup> Chí Jesús ní socó yā máá yā jeé ní jíhí yā jeé síquí cuéchi yó, návāha jnama ya yohó nuū táca jeé neé íyó ñayívi yáha, chí súcuan ní nujnahan ní máá Tátá yō Yaā Dios. <sup>5</sup> Jeé yúcuán na cáhán yō jeé yóhoyo luu cújéhu ya ní cáni. Súcuan na cóo. Amén.

*Siquí jeé tuá na inga jñūhun cácu ñayuu*

<sup>6</sup> Te náhán náá ní rí jíto rí jeé yóhoyo yáchi cánducú ró stóo ró Yaā Dios, Yaā ní cana rōhó jeé quívi ró ndaha ya síquí jeé cundáhú ní Cristo yohó. Chí ní candiquín rō inga jñūhun jeé sín cáhán. <sup>7</sup> Te tú cuiti na inga jñūhun jnama yóhó íyó. Te cáhíyo jecu ñayuu castáhán i rōhó, te cácuni i nasama i jñūhun ndese jnama Cristo yohó. <sup>8</sup> Te núu ñi ñayuu nacani inga jñūhun nuū rō ndese jnama ya rohó, te núu tu quíjnáhan jíin jñūhun ní canacani rí nuū rō xihna gā, na jnáhnú ndetū ñayuu ún. Te vesú máá rí chí ñi ndajéhé jeé quíji nde andiví nacani inga jñūhun núu, na jnáhnú ndetū. <sup>9</sup> Je ní cahán rí jíin ró, te suni súcuan cáhán tucu rí vijna: Na-ní tēe nacani inga jñūhun nuū rō, te núu tu quíjnáhan jíin jñūhun jeé ní cajetáhú ró, na jnáhnú ndetū tēe ún.

<sup>10</sup> Te jeé cahán rí súcuan, ¿á ndúcú rí jeé cuajnúhún ñáyyuu ruhū, chí Yaā Dios? ¿Chí ndúcú rí jeé cúsi ní ñayuu jíin rí, cájeni ní rō? Núu ndúcú gá rí jeé cúsi ní ñayuu jíin rí, te nasūu mozo Cristo cúu rí núu súcuan.

*Ndese ní jinú Pablo cúu de apóstol*

<sup>11</sup> Te cástūhun rí nuū rō, hermano jíjnáhan rō, jeé jñūhun jnama ya yohó jéé nácani rí, nasūu jéé ní jeni ní máá rí jíin ñáyyuu cúu. <sup>12</sup> Chí nasūu ñáyyuu ní steén nuū rí, ní nasūu ñáyyuu ní sáha jeé ní cutúhva rí, chí sa suhva máá Jesucristo ní steén nuū rí.

<sup>13</sup> Chí je ní cajini jñūhun ró ndese ní sáha rí nde saá, ná ní chíñúhún rí sahán jnáhan rí ñayuu hebreo. Te cájini rō jeé yóhoyo ní jito xeen rí ñayuu cácan díje nuū Yaā Dios, te ní condihví ní rí snáá rí i núu. <sup>14</sup> Te váha ga ní cutúhva rí sahán ún vesú cuehē gā tēe nación rí jeé ní cajehnu jíin rí, chí ní condihví gā ní rí síquí táca jeé ní cajequin jíi rí. <sup>15</sup> Te vesú

súcuan te Yaā Dios je ní nacáji ya ruhū nde ná tu cacu rí, te ñi quívi te ní cusí ní yā ní cana ya ruhū jeé quívi rí ndaha ya, síquí jeé yóhoyo ní cundáhú ní yā ruhū. <sup>16</sup> Te ní steén yā Sēhe ya nuū rí, návāha nacani rí jñūhun ndese jnama ya ñayuu táca nación jeé tu jíni jñūhun ya. Yúcuán na te tu ní cájnūhun rí ní ñi ñayuu, <sup>17</sup> ní tu ní jéhén rí ñuu Jerusalén nuū tēe cácuu apóstol xihna gā vesú ruhū. Chí sa suhva ní jehēn-ní rí nde región Arabia, te saá te ní nuhūn tucu rí ñuu Damasco.

<sup>18</sup> Yúcuán na te nde ní yáha uní cuiyā, te ní jehēn rí Jerusalén. Te ní jini jnáhan rí jíin Pedro, te ní condee rí jíin de xahún-ní quívi. <sup>19</sup> Te tu ní jíto rí nuū táca gá apóstol, chí máá ñi-ní nuū Jacobo ñani máá Jítoho yō. <sup>20</sup> Jñūhun yáha jeé tēe rí cuajeé nuū rō, chí jíni Yaā Dios jeé ndaá cúu.

<sup>21</sup> Yúcuán na te ní jehén rí ní región Siria jíin Cilicia. <sup>22</sup> Te ñayuu cácan díje jeé yáhi ndaha Cristo, jeé cáyucu región Judea, ná tu coto cuiti i nuū rí saá. <sup>23</sup> Chí máni jñūhun-ní ní cajini i cácahán ñayuu: Tēe ní jito xeen yohó nde saá, vijna chí nácani de jñūhun cándíje yó jéé ní nducú de snáá de nde saá, áchí i. <sup>24</sup> Te ní cacahán i jeé yóhoyo cújéhu Yaā Dios jeé súcuan ní sáha ya jíin rí.

*Jeé ní cajetáhú táca gá apóstol un Pablo*

## 2

<sup>1</sup> Yúcuán na te nde nuū uxí cuñ cuiyā, te ní jehén tucu rí Jerusalén jíin Bernabé, te suni ní jeca rí Tito ní jehén de jíin rí. <sup>2</sup> Te ní jehén rí chí máá Yaā Dios ní steén yā jeé jíni ñúhún quíhin rí. Te ní candutútu sín nene tēe cácu jéhu nuū ñayuu cácan díje ún. Te ní castūhun rí nuū de síquí jñūhun jnama ya yohó jéé nácani rí nuū ñayuu táca nación tu jíni jñūhun ya. Te súcuan ní sáha rí návāha cuajnúhún de jniñu rí, te ma quéndōo cáhá jniñu sáha rí jíin jéé ní sáha rí. <sup>3</sup> Te ní tu ní casáha fuerza de Tito, tēe ní jica jíin rí, jeé cōndee jñuní circuncidar de, vesú nasūu tēe hebreo cúu de. <sup>4</sup> Te súcuan ní cundaá, vesú ní quívicoo jecu tēe stáhú jéé sáha de jeé hermano cácu de. Te tēe un ní quívicoo de návāha yuhu-ní coto de ndese ní ndulibre yō nuū ley circuncidar síquí jeé yáhi yó ndaha Cristo Jesús. Chí cácuni de jeé síquí tucu yó ley un, nduu tucu yó mozo nuū ley un. <sup>5</sup> Te tu ní cajetáhú cuiti rí nuū tēe ún, chí cúní rí jeé quéndōo ñiñi ró jíjnáhan ró jíin jñūhun jnama ya yohó.

<sup>6</sup> Te máá tēe cácu jéhu nuū ñayuu cácan díje ún, tuá na inga jniñu jéé ní cándacu de nuū rí. Te máá rí chí tu ní chíhi rí cuenta síquí jeé cácu jéhu de, chí suni Yaā Dios tu sáha ya cuenta, chí inuú-ní cúu ndívi tēe nuū yā. <sup>7</sup> Chí sa suhva ní cajini de jeé jñūhun jnama ya yohó, ndíso jniñu rí nacani rí nuū ñayuu táca nación jeé tu casáha circuncidar,

nájnūhun nácani Pedro jnūhun un núu ñáyyu hebreo jeē casáha circuncidar. <sup>8</sup> Chi Yaā Dios jeē ní tají Pedro jeē nácani de jnūhun nuū ñáyyu hebreo, suni máá yá ni tají rúhū jeē nácani ri jnūhun nuū ñáyyu táca nación tu jíni jnūhun ya.

<sup>9</sup> Jeē yúcuan, Jacobo jíin Pedro jíin Juan, ni cajini de jeē Yaā Dios ni jēhe ya jniñu luu yáha nuū rī. Te tēe un cácahān ñáyyu cácañdije jeē maá de cácujeñhu ga. Te ni cajini de ndaha ri jíin ndaha Bernabé, jeē ní castéén de jeē cáhiyo manī de jíin rī, jíin jéé ní cacundaā ni de jeē maá rī quingōo nacani jnūhun nuū ñáyyu táca gá nación, te maá de jíināhan de nuū ñáyyu hebreo. <sup>10</sup> Te maá in-ni jeē ní cajicān de cúu jeē cónahān rī chindéé ñáhān rī ñáyyu cándoho ndáhú, te jniñu ún je ni condihvi ní rī ni sáha ri.

#### *Jeē ni cáhān Pablo nuū Pedro*

<sup>11</sup> Te ná ni quiji Pedro ñuu Antioquía, te ni cahān cají rī nuū de, chi ni stívi de jniñu. <sup>12</sup> Chi nde ná tu quecoo sava jnāhan de hebreo jeē ní tají Jacobo, te yéji de staā jíin ñáyyu jeē násūu hebreo cácuu. Yūcuán na te nuū ní quecoo tēe ún, te ni cusin de jeē tuá yéji de jíin i, chi yúhú de jeē cúni táca tēe un jéé tuá squicu de ley jnāhan de hebreo. Chi áchí ley jeē ma cúu cají de staā jíin ñáyyu jeē tu casáha circuncidar. <sup>13</sup> Te sava ga tēe hebreo jeē cácañdije, suni ni cacujiyo de nuū i, nájnūhun ni sáha Pedro, chi cáyuhú de jeē cúni tēe ún. Te nde máá Bernabé ni cascāhān de ni cujiyo. <sup>14</sup> Yūcuán na te ni jini rī jeē ní canayūhú de cají de staā jíin ñáyyu ún, cúu jeē tuá jica de jíin modo jeē cahān jnūhun jnáma ya yohó. Te ni cahān rī nuū Pedro, jito jínūu táca de: Róhó jéé cúu tēe nación yó hebreo, tuá squicu ró ley jnāhan yó hebreo, chi yéji ró jíin ñáyyu ún. ¿Te najehē safuerza ró i jeē squicu i ley jnāhan yo hebreo núu súcuan? ní achí rī.

#### *in-ni modo jnáma ya ñáyyu hebreo jíin táca gá nación*

<sup>15</sup> Te yóhó chi cúu yó ñáyyu hebreo, te cácahān yó jeē násūu ñáyyu táca gá nación casáha cuēchi cácuu yó. <sup>16</sup> Te vēsú súcuan te jíni yó jeē ní in yó tu quéndōo ndaā yó nuū Yaā Dios jeē squicu yó jniñu ndácu ley Moisés jenahān, chi máá jéé candije yó jeē Jesucristo ndahva yā cuēchi yó. Jeē yúcuan suni máá yó ni candije yó Jesucristo, návaha ndahva yā cuēchi yó síquī jeē candije yó, nasūu jíin jéé nducú yó squicu yó ley un. Chi áchí tutu ii: Ni in ñáyyu ma quéndōo ndaā i nuū Yaā Dios jíin jéé nducú i squicu i jniñu jeē ndácu ley, achí.

<sup>17</sup> Te máá yó ñáyyu hebreo, núu cúni yó jeē ndahva Yaā Dios cuēchi yó síquī jeē ni jíhī Cristo jehē yó, suu cúu jeē jécūhun ni yó jeē suni ñáyyu casáha cuēchi cúu yó, nájnūhun táca gá ñáyyu. Núu súcuan ¿te á cuēchi ni sáha

yó jeē ni stóo yó ley jenahān ná ni candije yó Cristo? Tú cuiti jeē súcuan. <sup>18</sup> Chi sa núu naquihin tucu yó ley jeē ni stóo yó un, te súcuan tēe yó cuēchi síquī maá yó. <sup>19</sup> Chi ruhū, nájnūhun ni jíhī rī ni sáha ley un, te jeē yúcuan má cúu ga ndacu jniñu nuū rī. Te súcuan te cuu cotecu rī jeē sáha ri jeē cuní Yaā Dios. <sup>20</sup> Chi nájnūhun je ni jíhī rī jicā cruz jíin Cristo, te vijna chi tuá técu rī jeē maá rī, chi máá Cristo cúu jeē técu ini rī. Te jeē técu rī ini ñayivi yáha vijna cúu jeē candije ri jeē Sēhe Yaā Dios chindéé ñáhān yá ruhū. Chi ni cundáhú ni yā ruhū te ni socó yā maá yá jehē rī. <sup>21</sup> Núu súcuan te tu cuní rī casi rī nuū jnūhun jeē ndahva Yaā Dios cuēchi yó síquī jeē yóhoyo váha ni yá jíin yó. Chi núu jeē quéndōo ndaā yó nuū yā jeē nducú yó squicu yó ley jenahān, yúcuan na te tu ndé jéjiniñu jeē ni jíhī Cristo nuú.

#### *Jnūhun ley jíin jnūhun cándije*

### 3

<sup>1</sup> Róhó hermano ñuu Galacia, ¿naun tu cájecūhun ni ró? ¿Nde tēe ni saca núu xinī ró jeē tuá cájetáhú ró jnūhun ndaā? Chi ná ni canacani ri jnūhun ya nuū ró, te cají ndasí ni cajecūhun ni ró jeē ni jíhī Jesucristo jicā cruz jehē ró. <sup>2</sup> In-ni jnūhun yáha cájnūhun rī rohó: ¿Nde se ni canihin ró Espíritu Santo? ¿A jéé ní cacundeyí ró squicu ró jniñu ndácu ley Moisés? Tú cuiti, chi jeē ní cacandije ró jnūhun jnáma ya rohó jéé ní cajini sōho ró. <sup>3</sup> ¿Nde se cúu jeē tu cájecūhun cuiti ni ró? Chi xihna gā ni cacandije ró jéé ni jíhī Cristo jeē jnama ya rohó, te ni canihin ró Espíritu. Te vijna ¿á cajeni ni ró jeē stóo ró jnūhun ún te fuerza maá ró squicu ró ley un, te cácu ró naún? <sup>4</sup> Núu súcuan te tu ndé ní jéjiniñu cuiti jeē ní castóho ñáyyu rohó síquī jnūhun jnáma Cristo rohó, chi vijna cánducú ró squéndōo ró jnūhun ún. Nacá jeé váha te núu jeé tu ní castóo ró, chi sa cácañdije ndije ró yá. <sup>5</sup> ¿Te na síquī cúu jeē jēhe Yaā Dios Espíritu yá nuū ró te sáha ya jniñu jéhu mēñhu ró? Tu sáha ya síquī jeē cánducú ró squicu ró ley un, chi síquī jeē ní cacandije ró jnūhun jnáma ya rohó jéé ní cajini sōho ró.

<sup>6</sup> Abraham ni candije de jeē sáha Yaā Dios jeē ni jéjiniñun ya, te jeē yúcuan ní ndahva yā cuēchi de. <sup>7</sup> Núu súcuan te na jécūhun ni ró jijnāhan ró jéé ñáyyu cácañdije jeē sáha Yaā Dios jehē i, ndávi i yucūn Abraham síquī jeē súcuan cácañdije i. <sup>8</sup> Chi nde jenahān je cáhān tutu ii jeē ñáyyu táca nación tu jíni jnūhun Yaā Dios, ndahva yā cuēchi i núu candije i ún. Te nde ná tu cuu táca jéé yáha te je ni jejnūhun ya jnūhun váha yáha nuū Abraham: Jeē rohó cúu jeē quéndōo ndetū ñáyyu táca nación. <sup>9</sup> Núu súcuan te ñáyyu cácañdije, quéndōo ndetū i jíin Abraham, tēe ni candije jeē ni jéjiniñun ya.

<sup>10</sup> Te sa jnahnū ndetū ñayuu jeē cánducú i quendōo ndaā i jeē jiín ley Moisés. Chi súcuan yósó núu tútu ii: Jnahnū ndetū tāca ñayuu jeē tu squícu ndihi cuiṭi jñuhun yósó núu tútu ley, achí. <sup>11</sup> Núu súcuan te cáji cúu jeē ni ñin ñayuu ma quendōo ndaā i nuū Yaā Dios siquī jeē nducú i squícu i ley un. Chi cáhán tutu: Ñayuu jeē ní ndahva yā cuēchi i, técu i jeē candíje i jeē sáha ya jehē i, achí. <sup>12</sup> Te ley Moisés tu cáhán jeē cótecu yō ní cáni siquī jeē candíje yó, chí sa suhva cáhán: Núu ndé ñayuu squícu jniñu yáha, te cotecu i sáha, achí.

<sup>13</sup> Te Cristo ni jnama ya yohó núu jñuhun cáhán ley jeē jnahnū ndetū yó siquī cuēchi yó, chí máá yá ni ndoho siquī jñuhun jeē jnahnū ndetū yó. Chi yósó núu tutu ii: Tāca ñayuu condita caa jicá yújnu, jnahnū ndetū i, achí. <sup>14</sup> Te Cristo Jesús ni jihí yá jicá yújnu cruz návaha quendōo ndetū ñayuu tācá nación sáha ya. Chi jñuhun jeē ni jéjnūhun ya quendōo ndetū Abraham, jinū nuū i. Te súcuan te núu candíje yó jeē ni sáha Yaā Dios jehē yó, te nihín yó Espíritu jeē ni jéjnūhun ya quíji.

*Siquī ley jiín siquī contrato jeē ni jéjnūhun ya*

<sup>15</sup> Hermano, na cáhán rī ñin jñuhun ndese cásaña ñayuu ñayiví: Núu ñin tēe sáha de ñin contrato chí ñin acta, te núu je ni cucutú ni sáha de firmar, te ma cúu ga najnanū, ni ma cúu jecosó gā. <sup>16</sup> Te suni súcuan ni sáha Yaā Dios ñin contrato jeē ni jéjnūhun ya nuū Abraham jiín yúcūn de jeē quíji. Te tu cáhán tutu ii siquī cuehē yucūn de, chí sa cáhán siquī ñin-ni yucūn de, te suu cúu Cristo. <sup>17</sup> Núu súcuan te jñuhun jeē cahán rī yáha cúu jeē xīhna gā ni sáha Yaā Dios ñin contrato jiín Abraham, jeē quíji Cristo jnama ya yohó, te ni sácútu yá. Yūcuán na te ni yáha cuñ ciento ocó uxí cuiyá, te sáá te ni jéhe ya ley nuū Moisés. Te ley un jéē ní quee cueé gā, ma cúu nacanun contrato un, ni ma cúu casí nuū jñuhun jeē ni jéjnūhun ya jeē jnama ya yohó. <sup>18</sup> Chi núu jeē jiín ley Moisés jnama Yaā Dios ñayuu, yūcuán na te nasūu siquī contrato jeē ni jéjnūhun ya cúu. Chí sa suhva siquī máá jéē ni jéjnūhun Yaā Dios nuū Abraham cúu jeē ní jnama ya de.

<sup>19</sup> Núu súcuan ¿te ndese jéjñiñu ley Moisés? Jéjñiñu chí ni jéhe ya un cueé gā návaha nastúu cuēchi i. Te ni ndacu jñiñu máá-ni nde ná tu quíji Cristo, Yaā cúu yucūn jeē ni jéjnūhun Yaā Dios jeē quíji. Te nde ná ni jéhe Yaā Dios ley un núu ñayuu, te ni taji yá tācá ndajehé yá ni cacastūhun núu Moisés, te Moisés ni nacachí nuū i. <sup>20</sup> Te sín cúu jñuhun jeē ni jéjnūhun ya nuū Abraham jeē quíji Cristo, chí máñuhún-ni ya ni jéjnūhun, te tu ní jíní ñuhún ni ñin jeē nacachí nuū Abraham.

*Siquī ndese jéjñiñu ley jenahán*

<sup>21</sup> Núu súcuan ¿te á cúní cahán jeē ley jeē ni jéhe Yaā Dios nuū Moisés, téjiyo jeē ni jéjnūhun ya ún? Tú cuiṭi jeē súcuan. Chí núu jeē ni jéhe Yaā Dios ñin ley jeē cótecu ñayuu ní cáni sáha, yūcuán na te quendōo ndaā i nuū yá siquī jeē squícu i jniñu ndácu ley un núu. <sup>22</sup> Te tuú chí yósó núu tútu ii jeē ndihi ñayuu ñayiví, nájnūhun yíndihyū i vecāa chí cáyihí i chíji cuēchi. Te súcuan cúu návaha tācá i jeē candíje i jeē ní jihí Jesucristo jehē i, nihín i máá jéē ni jéjnūhun ya nuū i siquī jeē candíje i ún.

<sup>23</sup> Chi nde ná tu quee jñuhun candíje yó Cristo, te nájnūhun ni yíndihyū yó ni sáha ley jenahán, návaha condetu yó quiví quíji Cristo, Yaā candíje yó. <sup>24</sup> Núu súcuan te ley ni cuu ñin jeē ndíto yóhó nájnūhun ñin mozo ndíto sūchi lúlí, te ni jéjñiñu nde quiví ní quíji Cristo, návaha candíje yó jéē ní jihí yá jehē yó, te ndahva Yaā Dios cuēchi yó. <sup>25</sup> Te vijna jeē ní quee Cristo, Yaā candíje yó, te tuá yíhi yó ndaha ley jeē cúu nájnūhun mozo ndíto yóhó.

<sup>26</sup> Chi ndivii rō cácuu sēhe Yaā Dios siquī jeē ní cacandíje rō Cristo Jesús. <sup>27</sup> Chi tāca rō jeē ní jendute rō siquī jeē ní quiví rō ndaha Cristo, ni sáha ya jeē ní nduu rō nájnūhun cúu máá yá. <sup>28</sup> Te vijna chí tuá cuo rō ni ñayuu hebreo ni ñayuu griego, ni mozo jeē ní jeen ñayuu, ni ñayuu sájniñu cuenta máá, ni tēe ni ñahan. Chí ñin na cúu rō núu yá jeē cáyihí rō ndaha Cristo Jesús. <sup>29</sup> Te núu cáyihí rō ndaha Cristo, núu súcuan te yucūn Abraham cácuu ndije rō, te nihín rō máá táhū jeē ni jéjnūhun ya.

#### 4

<sup>1</sup> Jeē cahán rī jiín rō jijnáhan rō cúu jeē yáha: ñin sūchi chíu táhū, vésú máá i naquihin ndihi jeē névaha tátá i, te núu lulí i chí inuú cúu i jiín mozo. <sup>2</sup> Chí yíhi i ndaha tāca jéē ndíto i jiín jéē ndíto ndajniñu i, nde quee quiví jeē ní jeni tátá i, te sáá te nihín i. <sup>3</sup> Te suni súcuan yóhó, chí nde ná tu jecūhun ni yó siquī Cristo te ni cuu yó nájnūhun sūchi lúlí, te ni yíhi yó chíji tācá costumbre jeē ní cajequin ñayuu ñayiví. <sup>4</sup> Te nde ná ni quee quiví jeē ní jeni Yaā Dios, te ni taji yá Sēhe ya, ni cacu ya chíji ñin ñahan, te ní cacu ya yucūn ñayuu nación hebreo jeē cáyihí chíji ley Moisés. <sup>5</sup> Súcuan ni cacu ya návaha jnama ya yohó jéē tuá quíhi yó chíji ley un, te návaha naquihin Yaā Dios yohó cuu yó sēhe ya.

<sup>6</sup> Te siquī jeē cácuu rō sēhe ya, te ni taji Yaā Dios Espíritu Sēhe ya ni quiví ini anuá rō, te sáha ya jeē cacahán jee rō: Tátá máá ná. <sup>7</sup> Núu súcuan te tuá cácuu rō nájnūhun mozo, chí sēhe ya cácuu rō. Te jeē cácuu rō sēhe Yaā Dios, te suni nihín rō máá táhū jeē ni jéjnūhun ya jeē jiín Cristo.

*Jeē nácani ni Pablo siquī ñáyyu cácadnje*

<sup>8</sup> Chi nde saá, nde ná tu jecūhun ni rō ndese Yaā cūu Yaā Dios, te ni cacuu ró mozo nuū tāca jeē násūu yāā ndaā cūu. <sup>9</sup> Te vijna chí je cājini rō ndese Yaā cūu ya, te vāha ga na cāhán rī jeē maá yá je jíní yā rohó. Núu súcuan ¿te najehē cáculi rō nandió cóo ró nduu tucu ró mozo nuū tācá costumbre ñayuu ñayiví jeē tu níhín jníñu cuiti? <sup>10</sup> Chi máni jeē cánēe ì rō quiví jín yóo jín vico jín cuíyá. <sup>11</sup> Te yúhú rí sanaa te tu ní jéjníñu cuiti jeē ní nacani ri jñūhun nuū rō.

<sup>12</sup> Cāhán ndahú rí jín ró hermano, jeē na cáni ni rō nájñūhun jéni ni maá rí jeē tuá squícu ri costumbre ñayuu hebreo. Chi ruhú ní nasáha ri maá rí nájñūhun maá ró jeē tu ní cáyihí ró núu ley costumbre ñayuu hebreo. Te tú na vé ni casáha ró jéē cuculhyá ni rí nde saá. <sup>13</sup> Chi cājini rō ndese ni cuu ná ni nacani núu rí jñūhun nuū rō ndese jnáma ya yohó. Chi siquī jee cuhú rí te ni jecuiñí rí ñuu rō ni nacani ri jñūhun. <sup>14</sup> Te vésú jñūndóho ni cuu jeē ní cocuhú rí, te tu ní casájéē ni rō nuū rí, ni tu ní casquéhichí ni rō ruhú. Chi sa ni cajetáhú rō ruhú nájñūhun jeē cūu rí ñn ndajehé Yaā Dios, chí nájñūhun jeē cūu rí maá Cristo Jesús. <sup>15</sup> Núu súcuan ¿te najehē cūu jeē tuá cáculi ni rō jín rí vijna? Chi nāhán rí jeē vāha ni casáha ró jéē ní cajnahuhú ni rō núu jeē cūu te tava ró tinúu vāha maá ró, cuāha ró nduu tinúu rí nuú. <sup>16</sup> Te vijna ¿á ní nduu ri enemigo rō siquī jeē cachí rí máni jñūhun ndaā nuū rō, chí naún?

<sup>17</sup> Te cáhíyo tēe jeē cándihví ni siquī rō jijnáhan ró, te nasúu jéē quéndóo vāha ánuá ró, chí sa jeē cáculi de nasásin de rohó jín ruhú, návāha cándihví ni rō jeē cūu maá de. <sup>18</sup> Te iyó vāha jeē cándihví ní de jehé rō, te núu jeē quéndóo vāha ánuá ró cūu núu. Chi níni jini ñúhún sáha de jeē vāha rohó, vésú núu íne ri jín ró chí núu tú rí íne. <sup>19</sup> Séhē mání jijnáhan ró, jeē siquī rohó cūu jeē inga jínu jnāhuhú ni rí, chí nájñūhun ñn ñahan scácu sēhe, súcuan ndóho rí jehé rō. Te suu cūu jeē jnāhuhú ní rí ndétu rí jeē na ndúndaā anuá ró ndacu ró Cristo. <sup>20</sup> Nacá jeē vāha núu jeē ndeé rí jín ró vijna ñúhún, návāha cuu cahán maní rí jín ró. Te tu cújnúni cuiti ni rí ndese ga cūu jeē cáni ni rí siquī rō.

*Jñūhun yátá siquī Agar jín Sara*

<sup>21</sup> Rohó jijnáhan ró jéē cáculi rō quihí ró chíjey Moisés, cachí nuū rí: ¿á tu ní cājini sōho ró ndese cāhán ley un? <sup>22</sup> Chi cāhán tutu ì jeē Abraham ni iyo uū sēhe yí de. Te ñn i cūu sēhe Agar, ñahan cūu mozo vehe de. Te inga i cūu sēhe ñahan iyó libre, suu ñashí de Sara jeē ní cuu ña ñahan numá. <sup>23</sup> Te sēhe ñahan cūu mozo, ni cacu i nájñūhun cácu tāca gá sūchi lúlí. Te sēhe ñahan cūu libre, ni cacu i maá siquī jeē súcuan ni jéjñūhun Yaā Dios.

<sup>24</sup> Te yāha cūu ñn jñūhun yátá, chí ndíndúú ñahan un cūu ña nájñūhun ndíndúú contrato jeē ní sáha Yaā Dios jín ñayuu. Máá ñahan nání Agar, cūu ña nájñūhun contrato ley jeē véji nde yucu Sinaí. Te ñayuu cáyihí chíjey contrato ley, cácu i mozo nuū ley un. <sup>25</sup> Chi Agar cūu nájñūhun ley jeē ní jéhe Yaā Dios xíní yucu Sinaí jeē ñn nde Arabia. Te cūu ña nájñūhun Jerusalén, ñuu ñayuu hebreo, jeē iyó vijna, chí tāca sēhe ñuu Jerusalén, cácu i nájñūhun mozo nuū ley un. <sup>26</sup> Te Jerusalén jeē iyó andiví, chí sa suhva iyó libre nájñūhun Sara. Te yohó ñayuu cácadnje, nájñūhun sēhe un cácu yó, chí iyó libre yó nuū contrato ley. <sup>27</sup> Chi suhva yósó núu tutu ì:

Rohó jeē ní cuu ró ñahan numá jéē tú sēhe ró, na cūsí ni rō.

Rohó jéē tu ní jéhnde chíjey ró jéē scácu ró, na cána jee ró jéē cūsí ni rō.

Chi coo cuehē gá sēhe rohó jéē ní cuu ró ñahan numá vésú ñahan jeē jé ní scácu sēhe.

Achí tutu.

<sup>28</sup> Hermano, sēhe Yaā Dios cácu yó, chí súcuan ni jéjñūhun ya nuū yó, nájñūhun ni jéjñūhun ya nuū Abraham jeē cacu sēhe de Isaac. <sup>29</sup> Te nde saá te inga sūchi ní cacu nájñūhun cácu tāca gá ñayuu, ni jito xeén i Isaac, sūchi ní cacu ní sáha Espíritu. Te nájñūhun ní iyo saá, suni súcuan cājito xeén ñayuu tāca sēhe Yaā Dios nde vijna. <sup>30</sup> ¿Te ndese cāhán tutu ì? Achí: Quenehen ró ñahan cūu mozo na quíhín ña jín sēhe ña. Chí sēhe ñahan cūu mozo, ma níhín i tahú jín sēhe ñahan libre, achí yá jín Abraham. <sup>31</sup> Núu súcuan hermano, tu cūu yó nájñūhun sēhe ñahan cūu mozo, chí nájñūhun sēhe ñahan libre cūu yó.

*Na cuñi ñihin yó jín jñūhun jeē ní sáha libre yohó*

## 5

<sup>1</sup> Te Cristo ní sáha libre yá yohó jéē tuá yíhi yó chíjey Moisés. Núu súcuan te cuñi ñihin ró jín jñūhun jeē ní sáha libre yá yohó, te ma ndívicoo tucu ró cuu ró mozo nuū ley un.

<sup>2</sup> Sáha ró cuenta jijnáhan ró, chí ruhú Pablo cahán rí jín ró jeē núu squícu ró ley circuncidar, yūcuán na te tu níhín jníñu cuiti jeē ní candíje ró jéē ní jíhi Cristo jehé rō. <sup>3</sup> Te inga jínu cāhán ñihin rí jín táca tēe cánducu ngu circuncidar, jeē núu súcuan te suni cánuú jéē squícu de ndívii cuiti gá jñūhun cāhán ley Moisés. <sup>4</sup> Rohó jéē cánducu ró quéndóo ndaā rō jeē squícu ró ley un, je ní casiaá ró Cristo núu súcuan. Je ní castóo ró jñūhun jeē ndahva yá cuéchi ró siquī jeē cundáhú ní Yaā Dios rohó. <sup>5</sup> Te maá yó chí cájica yó jín Espíritu, te cácadnje yó jéē ní ndahva yá cuéchi yó, te jeē yúcuan ñūhun ní



yō jeē quendōo ndaā yō quivī cuñi yō nūu Yaā Dios. <sup>6</sup> Chi yóhó jéé cáyihí ndaha Cristo Jesús, vésu nūu jeē cúu yó circuncidar chí tu cúu yó, tú na vé nihín jniñu. Jeē nihín jniñu cúu jeē candíje yó jeē sáha ya jehē yō. Te yūcuan sáha jeē cundáhú ni yó jnánhan yó.

<sup>7</sup> Váha ni cacandíje ró nūú. <sup>7</sup> Te ndé ñin ni jesi jeē tuá cájetáhú ró jnūhun ndaā nūu súcuan? <sup>8</sup> Jnūhun jeē ní cascáhán de róhó, chí tú vēji nuū maá Yaā ní cana róhó ní quivicoo ró ndaha ya. <sup>9</sup> Te ma náa ni ró jeē téé cástáhú róhó, jnūhun cástéén de cúu nájñūhun levadura, chí vésú jecu-ni levadura, te ndáa ndihí ñujen sáha. <sup>10</sup> Te cúcáhnū ni rí jeē maá Jítho yó sáha ya jeē ma cándíje ró jijnánhan ró inga jnūhun jeē sín cáhán. Te maá Yaā Dios cuáha ya castigo téé jeē sáca nūu xiní ró, nūu ná ní téé cúu de.

<sup>11</sup> Te ruhū, hermano, nūu jeē nácani ga rí jnūhun ley circuncidar nde vijna, te jnánhan rí ñayuu hebreo ma cóto xeēn i ruhū nuú. Chí ma quití ni i jeē nácani rí jnūhun jeē ní jñí Cristo jica cruz, nūu jeē súni nácani rí jnūhun circuncidar nuú. <sup>12</sup> Te táca téé jeē sáca nūu xiní ró siquí jnūhun ún, váha ga na cáhnde gá de máá de nūu súcuan.

<sup>13</sup> Chi máá ró jijnánhan ró hermano, ni cana ya rohó náváha coo libre ró nuú ley un. Te vésú iyó libre ró, te ma cáni ni ró jeē cúu quivicoo ró táca cuéchi jeē cúu modo neé cuní maá rí, chí sa suhva na sáha ró máá ró mozo jeē chindéé ñáhán ró jnánhan ró siquí jeē cundáhú ní ró i. <sup>14</sup> Chi je ni squícu ró ndihí ley nūu squícu ró ñin-ni jnūhun ndácu jniñu yáha: Cundáhú ní ró jnánhan ró nájñūhun cundáhú ní ró máá ró, achí. <sup>15</sup> Te nūu máni jeē ndóna xeēn ró siquí jnánhan ró jéé cuajñáhan ró, te coto ma snáá ró jniñu jeē ní sáha ya mehñu ró jijnánhan ró.

*Modo cuní ñayuu tu cándíje jín modo sáha Espíritu*

<sup>16</sup> Súcuan cáhán rí jín ró jijnánhan ró: Caca ró nájñūhun cuní maá Espíritu, te yūcuán na te ma sáha ga ró modo jeē cuní maá ró. <sup>17</sup> Chi táca jéé cuní maá yó, yūcuan jési nuú jeē cuní maá Espíritu. Te jeē cuní Espíritu, jési nuú modo neé jéé cuní maá yó. Te jeē ndindúú yáha chí cájesi nuú jnánhan, te jeē yūcuan tu cúu sáha ró jniñu váha jeē cuní ró sáha ró. <sup>18</sup> Te nūu máá Espíritu steén nuú ró, nūu súcuan te tuá cáyihí ró chíji ley jenahán.

<sup>19</sup> Te iyó ndijin táca jniñu cásaña ñayuu cájica jín modo neé máá, te yáha cúu: Cásiquí ndéé jnánhan i, cásaña i jniñu jnéhén, cásaña neé ndasi i. <sup>20</sup> Cáchiñúhún i ídolo, cásaña tási i, cájito uhú jnánhan i, cájejnánhan i, cácuñí ni i. Te yachi cáquití ni i, te cándihví ni i jeē cúu máá-ni i, te cátejñánhan i cásasín i máá i. <sup>21</sup> Te cácuésún ni i, cájehni i ndíyi, cánajni i, cásaña i vico neé, jín táca gá jeē súcuan. Te cáhán nihín rí jín ró, nájñūhun je ni cahán

rí jín ró saá, jeē ñayuu casáha súcuan, ma nihín tahú i quivicoo i ñuu nuú ndácu Yaā Dios jniñu.

<sup>22</sup> Te ñayuu jeē nduú i jín Espíritu, táca jniñu yáha sáha ya jín i: Jeē cundáhú ni jnánhan, jeē cúsi ni, jeé iyó ndeyí sá ni, jeé iyó paciencia, jeē maní ni, jeé váha ni, jeé squícu váha. <sup>23</sup> Jeé tu sáha jeé cujéhnū, jín jéé jési modo jeé cuní maá. Te tú na ley cacán cuéchi siquí ró nūu sáha ró táca jniñu yáha. <sup>24</sup> Te ñayuu cáyihí ndaha Cristo, nájñūhun je ni cajehni i modo neé máá i jicá cruz, nde jín táca jéé ndíyo neé ni i te cutíndí i. <sup>25</sup> Te jeé súcuan ni jéhe máá Espíritu ñin vida jeé nūu yó, te suni na cáca yó jín modo steén Espíritu.

<sup>26</sup> Te ma sandúxí yó jéé squití ni yó jnánhan yó, te ni ma cucuésún ni yó siquí jnánhan yó.

*Jnūhun jeē chindéé ñáhán yó jnánhan yó*

## 6

<sup>1</sup> Hermano, nūu ñin jnánhan ró ni sáha cuéchi, te róhó jéé cájica jín Espíritu, na náchuhun ichí ró i. Te jín jnūhun vitá cahán ró jín i, te suni condito ró máá ró jeē ma cacán ñin ró sáha ró táca cuéchi. <sup>2</sup> Te chindéé ñáhán ró jnánhan ró nūu na vé cúu jeé ndóho i, chí súcuan cúu jeé squícu ró ley Cristo.

<sup>3</sup> Chí nūu ñin ñayuu jéni ni i jeé ñayuu teyí cúu i, vésú nastuú súcuan cúu, te stáhú i máá i nūu súcuan. <sup>4</sup> Te táca ñin ñin ró na cóto ndee ró ndese cáca jniñu sáha ró. Te nūu váha sáha ró, yūcuán na te cuu cusí ni ró jín jéé sáha máá ró, te tu níni jéé scáni jnánhan ró máá ró jín jnánhan ró. <sup>5</sup> Chí táca ñin ñin yó cánuú squícu yó jín jniñu ní jéhe ya nuú máá yó.

<sup>6</sup> Te róhó jéé casuáha jnūhun váha ya, na chindéé ñáhán ró téé cástéén nuú ró jín táca jéé váha cáneváha ró.

<sup>7</sup> Ma stívi ró caní ni ró jeé cuu sáha ró cuéchi. Chí ma cúu sácatá ró nuú Yaā Dios caní ni ró jeé tu sáha ya cuenta. Chí táca nūu ndese sáha ñayuu, suu yūcuán nanihín i. <sup>8</sup> Chí ñayuu jeé sáha i jeé cuní modo neé máá i, nihín i jeé jnahnú ndetú i sáha modo jeé cuní maá i ún. Te ñayuu jeé sáha jeé cuní maá Espíritu, chí nihín i jeé cótecu i ní cáni andiví sáha Espíritu. <sup>9</sup> Te ma cuíta yó jeé sáha yó jniñu váha nūu súcuan, chí jeé quée máá quiví te nanihín yó, te nūu ma cuíta yó. <sup>10</sup> Nūu súcuan te táca jín jeé cúu sáha yó, te na sáha váha yó jín táca ñayuu, te hermano yó jeé cácañíje cúu jeé cánuú gá.

*Saludo jín jnūhun cástūhun Pablo jeé sándihí*

<sup>11</sup> Condéhe ró jeé náhnū letra téé ri cuajeé nuú ró jijnánhan ró, chí ndaha máá rí téé ri yáha. <sup>12</sup> Te téé jeé casáfuerza de róhó cuu ró circuncidar, cásaña de siquí jeé cácuni de cuajnúhún ñayuu de. Te cásaña de náváha ma cóto xeēn ñayuu de jeé cáncani de jnūhun

jeē ni jīhī Cristo jehē yō. <sup>13</sup> Te ni máá de jeē casáha de circuncidar, suni tu squícu vāha de ndīhi ga ley jenahán. Te cáacuní de jeē cuu ró circuncidar, návāha cuu sátéyí de máá de núu quihin ró jnúnī circuncidar sáha de. <sup>14</sup> Te ruhū tu cúní rī satéyí rī máá rī siquī ní ñn jeē yúcuan, chí máá ñn-ni siquī jeē ni jīhī Jitoho yō Jesucristo jicā cruz. Chí siquī yúcuan cúu nájñūhun ni jīhī rī, chí ni siaá rī táca jéē iyó ini ñaywí, te suni nájñūhun ñn ndīyí cúu ri nuū ñaywí. <sup>15</sup> Chí núu yīhi yó ndaha Cristo Jesus, te tu níhín jníñu núu cúu yó circuncidar chí tuú. Chí jeē níhín jníñu cúu jeē ní nasájeé yá anuá yō. <sup>16</sup> Te ñúhun ni rī jeē táca ró jeē jíca ró jín modo yáha, na sáha ga yā jeē coo ndeyí coo sī ni rō, te cundáhú ni yā rohó. Te suni ñúhun ni rī jeē súcuan sáha ya jín táca gá i jeē cúu ndije i ñayuu cácanđije Yaā Dios.

<sup>17</sup> Te vijna jín ní gá cuahān yō, cúní ri jeē ma stáhān gā ni ñn ñayuu ruhū. Chí yiqui cúñu rī ndíso seña jeē ni túji rī ni ndoho ri jeē cúu ri mozo máá Jitoho yō Jesús.

<sup>18</sup> Hermano, ñúhun ni rī jeē na sáha ga Jitoho yō Jesucristo jeē vāha rōhó jínáhan ró. Súcuan na cóo. Amén.

## CARTA JEE NI TEE APOSTOL SAN PABLO NUU ÑAYUU ÑUU EFESO

<sup>1</sup> Máá rí cúu Pablo, apóstol Jesucristo, chi súcuan ni nujnahan ni Yaá Dios ni taji yá ruhü. Te téé ri carta yáha cuájeé nuü rohó ñáyyuu ñuu Efeso, jeé cácuu ró ñáyyuu maá yá jeé cácañdije ró Cristo Jesús. <sup>2</sup> Te ñuhun ni rí jeé Tatá yó Yaá Dios jiin Jítoho yó Jesucristo, na sáha ga yá jeé váha róhó, te sáha ya jeé coo ndeyí coo sñ ni ró.

*Jeé sáha Cristo jeé quéndõo vâha ánuá yó*

<sup>3</sup> Na cáhân yó jeé yóhoyo cújéhu Yaá Dios, Yaá cúu Tatá Jítoho yó Jesucristo. Chi ni jêhe ya táca jeé váha iyó andiví jeé quéndõo váha ánuá yó, chi yáhi yó ndaha Cristo. <sup>4</sup> Chi nde ná tu jecõo ñayiví te ni nacáji ya yohó jéé quívi yó ndaha Cristo, návâha coo ndoo ánuá yó te caca ndaa yó nuü yá. <sup>5</sup> Je ni cundáhú ni yá yohó nde saá, te ni tana ya yohó jéé náquihin séhe ya yohó. Te jiin Jesucristo ni sáha ya súcuan, chi ni nujnahan ni yá sáha ya. <sup>6</sup> Te jeé yúcuan niní na cáhân yó jeé yóhoyo cújéhu ya, chi yóhoyo váha ni sáha ya yohó jiin táca jéé váha ni yá, siquí jeé yáhi yó ndaha Cristo, Séhe ya jeé maní yá jiin. <sup>7</sup> Te siquí jeé yóhoyo váha ni yá jiin yó, te Séhe ya un ní jnama ya yohó jéé ní jíhi yá jehé yó, te ni ine cáhnu ni yá nuü cuéchi yó. <sup>8</sup> Te ni steén yá jeé cundáhú ndasí ni yá yohó, te ni sáha ya jeé jécũhun ni yó te cundichí yó jiin ñũhun ya. <sup>9</sup> Te ni sáha ya jeé cuni yó ñn jnũhun ya jeé ní yisáhi, jeé tu ní sáha ya jeé cuni ñayuu jenahán. Chi súcuan ni tee ni máá yá, chi sáha ya táca-ni jeé jé ni cundaá ni yá jeé nujnahan ni yá sáha ya. <sup>10</sup> Te yáha cúu jnũhun ún: Nde na queé tiempo te sáha ya jeé ndihí jeé yúcu andiví jiin jéé yúcu ñayiví, inuú-ni nduu, quíhi ndaha Cristo.

<sup>11</sup> Te siquí jeé yáhi yó ndaha Cristo, te nihin yó tahü yó, chi je ni nacáji Yaá Dios yohó nde saá. Chi súcuan ni tee ni máá yá, chi sáha ya táca-ni jeé jé ni cundaá ni yá jeé nujnahan ni yá sáha ya. <sup>12</sup> Súcuan ni sáha ya návâha máá rí jeé xíhna gâ ni cacandije ri Cristo, caca ndaa rí te súcuan sájeñhu rí yá jeé yóhoyo luu cújéhu ya. <sup>13</sup> Te suni máá ró jijnáhan ró, ni cajini ró jnũhun ndaa jnũhun váha jeé jnama ya rohó, te ni cacandije ró Cristo. Te ni canihin ró Espíritu Santo jeé ni jéjnũhun ya jeé cuáha ya. Te ndéé Espíritu yá ún ini anuá yó, te cúu ya nájñũhun sello jeé steén jeé cúu yó séhe Yaá Dios. <sup>14</sup> Te sáha ya jeé jini ndije yó jéé cucuéeé gá te cuáha Yaá Dios tahü yó, nde na sínu ya jniñu jeé jnama ya ñayuu yá. Te quívi ún cahân yó jeé cujéhu ya, chi yóhoyo luu cújéhu ya.

*Jeé jicán tahü Pablo jehé ñáyyuu cácañdije*

<sup>15</sup> Te ruhü ni jini jnũhun ri ndese cácañdije ró jéé ni sáha Jítoho yó Jesús jehé ró, jiin ndese cácañdáhú ni ró ndihí ñayuu cáyíhi ndaha Yaá Dios. <sup>16</sup> Te jeé yúcuan tu jécuiñí rí jeé nácuatáhú rí jehé ró, te jeé jicán tahü rí te tu náá ni rí cacán tahü rí jehé ró. <sup>17</sup> Chi jicán tahü rí jeé na sáha Yaá Dios jeé jécũhun váha ni ró te ndundichí ró jiin jnũhun ya, te cuni gâ ró ndese Yaá cúu ya. Chi máá yá cúu Yaá Dios Jítoho yó Jesucristo, te cúu ya Tatá yó jeé lúu ndasí cújéhu. <sup>18</sup> Te jicán tahü rí jeé na sándjijn gâ yá nuü jeé njññíni ró, návâha jecũhun ni ró ndese cáca ndihí jeé cáñuhun ni ró nihin ró siquí jeé ní cana ya rohó. Te jecũhun ni ró ndese cúca cácuu ró jiin táca jnũhun jéhu luu ndiso jnũhun ya jeé cúu ñayuu maá yá. <sup>19</sup> Te jicán tahü rí jeé na jécũhun ni ró ndese yóhoyo jéhu poder yá jeé sájniñu ya ini anuá yohó jéé cúu yó ñayuu cácañdije. Chi tu ndihí cuiti poder yá. <sup>20</sup> Te suu poder un cúu jeé ni steén yá ná ni sáha ya ñn jniñu jéhu ga jeé ni nastécu yá Cristo méñhu ndívi te ni scúcõo ya lado váha ya nde andiví. <sup>21</sup> Te ni jeni ya Cristo siquí táca jéé cujéhu, jiin jéé ndiso jniñu, jiin jéé jniñ poder, jiin jéé ndácu jniñu, jiin siquí táca jeé cácahân ñayuu jeé cujéhu, cúu tiempo yáha, cúu tiempo quíji. <sup>22</sup> Te ni jehé ya jeé cujéhu Cristo siquí ndiví. Te ni sáha ya jeé cúnuu yá cujéhu ya nuü ñayuu cácañdije. <sup>23</sup> Te ñayuu cácañdije un cácuu i nájñũhun yiquí cúñu ya, chi ñn na cúu i jiin yá te ñũhun chítú yá ini anuá i, chi Yaá jeé ñũhun chítú ní cáhnu-ni cúu ya.

*Ni cácu yó siquí jeé ní cundáhú ni yá yohó*

## 2

<sup>1</sup> Te ni sáha ya jeé cotecu ró ní cáni jiin Cristo. Chi je ni cacuu ró nájñũhun ndívi nuü yá, ni sáha cuéchi ró jiin jniñu néé ní casáha ró. <sup>2</sup> Chi ni cajica ró jiin jniñu yúcuan nde saá, ná ni cacondiquín ró jniñu ñayuu ñayiví, ná ni cajetáhú ró nuü jexeén jeé ndácu jniñu nuü táca táchi xeén, te jica nuü tachí. Te suu cúu jeé scánda ini ñayuu ñihni ni nuü Yaá Dios. <sup>3</sup> Te máá rí jijnáhan ri, suni súcuan ni cajica ri, chi ni casáha ri jniñu néé jéé cuni máá rí, jiin táca jéé jicán yiquí cúñu rí, jiin jéé cájeni néé ní rí nde saá. Jeé yúcuan suni ni cacuu ri ñayuu jeé nihin castigo xeén jeé cuáha ya nuü, chi inuú-ni ni casáha ri nájñũhun casáha máá i. <sup>4</sup> Te Yaá Dios chi yóhoyo cuehé ni cundáhú ni yá yohó, te váha ndasí ni yá jiin yó. <sup>5</sup> Te náa cúu yó nájñũhun ndívi nuü yá ni sáha cuéchi yó, te ni nastécu yá yohó jéé cotecu yó ní cáni jiin Cristo. Chi siquí jeé yóhoyo váha ni yá cúu jeé ní jnama ya yohó. <sup>6</sup> Te ni nastécu yá yohó jéé cotecu inuú yó jiin Cristo Jesús, te scúcõo ya yohó jiin yá nde andiví. <sup>7</sup> Súcuan ni sáha ya návâha ní gá tiempo jeé quíji, te steén yá ndese yóhoyo

manī yā jīn yó, jīn ndese vāha ni yā jīn yó jeē siquī Cristo Jesús. <sup>8</sup> Chi siquī jeē yóhō manī yā jīn ró cúu jeē ní jnama ya rohó, chi ní cacandje ró jeē sáha ya jehē rō. Te nasū siquī jeē ní casáha máá ró cúu, chi tahū jeē ní jēhe ya nuū rō cúu. <sup>9</sup> Chi tú na jniñu vāha ní casáha yó jeē jnama ya yohó, te jeē yúcuān ní ñn yó ma cúu sátéyí yó maá yó. <sup>10</sup> Chi cúu yó ñn jniñu luu jeē ní nasáha máá yá, chi ní nasáha ya yohó jeē cundúú yó jīn Cristo Jesús, návāha sáha yó táca jniñu vāha jeē jé ní sátūhva Yāā Dios jeē sáha yó.

*Jeē sáha Cristo jeē ndívi yó núu jñūhun manī Yāā Dios jīn yó*

<sup>11</sup> Núu súcuān te na núcūhun ní rō ndese ñayuu ní cacuu ró ndé saá. Chi tu ní cácuu ró ñayuu hebreo, chi sa suhva ní cacuu ró ñayuu táca nación jeē tu jíní jñūhun ya. Te ñayuu hebreo jeē casáha circuncidar yiqui cúñu, ní cacahān i jeē cácuu ró ñayuu tu sáha circuncidar. <sup>12</sup> Na núcūhun ní rō jeē ndé saá tu ní cáhīn ró jīn Cristo, te ní cacuu ró ñayuu ñuu jicá núu nación Israel. Te tu ní cájini ró táca jñūhun contrato jeē ní jéjñūhun Yāā Dios. Te tu ní ñne Yāā Dios jīn ró ñayivi yáha, te tú na vé jeē vāha ní cáñuhun ní rō jeē cóo. <sup>13</sup> Te vijna chi ní ndívicoo ró núu Yāā Dios jeē tu ní cájini ró jñūhun ya nde saá, chi ní quívicoo ró ndaha Cristo siquī jeē ní jīhī yā jehē rō. <sup>14</sup> Chi Cristo cúu Yāā sáha jeē ndúmaní jñáhan yó. Chi ní sáha ya jeē ñayuu hebreo jīn ñayuu táca gá nación, ní nduu yó ñn na nuū yá. Chi ní sáha ya jeē tuá jito uhū jñáhan yó, te suu cúu nájnūhun jeē ní jenu ya ñn jeē ndihyú sava mēñu yó jeē sásin yohó. <sup>15</sup> Chi ní socó yá maá yá ní jīhī yā, te súcuān ní ndahva yá ley jenahán jīn jñūhun ndácu jniñu jīn jéé tajnúní ndiso máá. Chi ley un ní sásin ñayuu hebreo jīn táca nación jeē tu ní jíní i ley un. Te ní nasquíjñáhan ya ndihī yó jéé ní nduu yó ñn na nación jeē, yīhī yó ndaha ya. Te súcuān ní sáha ya jeē ní ndumaní jñáhan yó. <sup>16</sup> Te jīn jéé ní jīhī yā jicá cruz, te ní snáá yá jñūhun cájito uhū jñáhan ñayuu hebreo jīn táca gá nación. Te ní sáha ya jeē ndívicoo yó núu jñūhun manī Yāā Dios jīn yó, te ní nduu yó ñn na ñayuu maá yá.

<sup>17</sup> Chi ní quiji Cristo ní nacani ya jñūhun vāha nuū táca ñayuu jeē na ndívi i nuū jñūhun manī yā jīn i, cúu rohó ñayuu tu ní cájini jñūhun ya, te suni ñayuu jñáhan ri hebreo jeē cájini jñūhun ya. <sup>18</sup> Te vijna te siquī jeē ní jīhī Cristo, te ndihī yó, cúu ñayuu hebreo chí ñayuu táca gá nación, cuu quívicoo yó núu Tatá yō Yāā Dios, te ñn-ni Espiritu yā sáha. <sup>19</sup> Núu súcuān te tuá cúu ró nájnūhun ñayuu ñuu jicá ní ñayuu tatú, chí ñn na ní nduu ró jīn ñayuu ñuu maá yá. Te jñáhan ñayuu vehe Yāā Dios cácuu ró. <sup>20</sup> Te cácuu ró nájnūhun ñn ñn parte ñn vehe cáhnu

jeē cúvāha siquī cimientu, te cimientu un cúu jñūhun Cristo jeē ní canacani táca apóstol jīn téé ní canacani jñūhun ya jenahán. Te máá Jesucristo cúu nájnūhun yuū cánuu gá jeē yítuu vehe. <sup>21</sup> Te ññ vehe cúvāha vāha siquī maá yá, cúúsúcun cuáhān, cúu ñn templo ñn jeē ndeé maá Jítoho yó. <sup>22</sup> Te suu cúu máá ró jijnáhan ró, chí ndúú ró jīn Cristo, te ñnuú-ni sáma ya rohó jīn táca ñayuu cácuandje, cácuu ró nájnūhun ñn ñn yuū templo. Te suu cúu jeē ndeé Espiritu Yāā Dios ñn ró nájnūhun ñn ñn templo.

*Jeē ndiso jniñu Pablo nácani de jñūhun nuū ñayuu tu jíní jñūhun Yāā Dios*

### 3

<sup>1</sup> Te jeē yúcuān ruhū Pablo, jicán tahū ri nuū yā. Te ñne ri vecāa siquī jeē ní nacani ri jñūhun Cristo Jesús nuū rohó ñayuu táca nación jeē tu ní jíní jñūhun ya nuū. <sup>2</sup> Te jíní ri jeē ní cájini ró jñūhun ndese yóhō vāha ní sáha Yāā Dios jīn rí, chí ní jēhe ya jniñu nuū ri jeē nácani ri jñūhun vāha ya nuū rō. <sup>3</sup> Te jñūhun ya jeē ní yisáhi, ní nastúu ya nuū rí, nájnūhun je ní tee ri jecu siquī un núu rō. <sup>4</sup> Te núu na cáhu ró te cuu jecūhun ní rō jeē ní jini vāha ri jñūhun Cristo jeē ní yisáhi un. <sup>5</sup> Te tu ní stéén yā jñūhun sáhi un núu ní ñn ñayuu táca cuiyā ní quiji ichi yátá. Te vijna cúu jeē steén ndijin yā jīn Espiritu yā nuū táca apóstol jeē ní jeni ndoo ya, jīn núu téé cánacani jñūhun ya. <sup>6</sup> Te súcuān cáhān jñūhun ní yisáhi un: Ñayuu táca gá nación, ñn cáhnu-ni nihīn i tahū i jíní ñayuu hebreo, chí ní cacandje i jñūhun jeē jnama ya i. Te ñnuú-ni ní nduu ndihī i, te ñn cáhnu-ni quéndōo ndetú anuá i sáha Cristo, nájnūhun ní jéjñūhun Yāā Dios. <sup>7</sup> Te jeē siquī jñūhun yáha cúu jeē ní jeni ya ruhū jeē nácani ri jñūhun nuū rō. Chí ní cutahū rí jniñu luu yáha jeē ní jēhe ya nuū rí. Te jīn poder yá ní sáha ya un jīn rí. <sup>8</sup> Te ruhū chí cúu ri téé núu ga nuū táca ñayuu núu ga jeē yīhī ndaha ya. Te vesú súcuān te nuū maá rí ní jēhe ya jniñu luu yáha jéé nácani ri jñūhun vāha ya nuū ñayuu táca nación jeē tu jíní, ndese yóhō cúca yó ndihī jeē ndiso jñūhun Cristo, jeé ma cánda cuiyí yó jecūhun ní yó. <sup>9</sup> Chi ní jeni ya ruhū jeé steén cáj rí jeé suni máá i jnama ya i. Te yúcuān cúu jñūhun Yāā Dios jeē ní yisáhi ndé jenahán ndasí, chí máá yá ní sáha ndihī-ni. <sup>10</sup> Te súcuān ní sáha ya jīn ñayuu, návāha vijna te táca jéé cácujeñnu jīn jéé ndiso jniñu nuū sucún, na cúni ndese ndichí ndasí Yāā Dios. Chí ndichí ndasí ní sáha ya jīn ñayuu cácuandje. <sup>11</sup> Chí súcuān ní tee ní yá nde ññ cáni, te ní sáha ya jeē Jítoho yó Cristo Jesús ní squícu ya ún. <sup>12</sup> Te siquī jeē ní sáha Cristo, te vijna te jíní ndije yó jéé cúu quívi yó cáhān yó jīn Yāā Dios siquī jeē candje yó Cristo. <sup>13</sup> Núu súcuān te cáhān

ndahú rí jín ró jeé ma cucuíhyá ní rō siquí jnūndóho jeé ndóho ri jehé rō. Chi suu sáha jeé quéndōo ndetū anuá rō jijnáhan rō.

*Cristo yóhyo cundáhú ní yā yohó*

<sup>14</sup> Te jeé yúcuan cúu jeé jécuiñí yití rí nuú maá Yaa cúu Tátá Jitoho yō Jesucristo. <sup>15</sup> Te maá yá cúu Tátá nuú ndíhi ñayuu yā jeé yúcu andiví jín ñáyiví. <sup>16</sup> Te jícán tahú rí jeé jín poder yā jeé kujéhu ndasí yá, na sáha ya jeé ije váha ní rō jín jnúhun ya, te coo fuerza ini anuá rō, sáha Espiritu yā. <sup>17</sup> Te jícán rí jeé candíje nihin rō Cristo, návāha condee yā ini anuá rō, te jni váha ró jnúhun jeé cundáhú ní yā rohó, te cuiñí nihin rō jín. <sup>18</sup> Te súcuan te cuu jecúhun váha ní rō jín táca ñayuu candíje, ndese cáa jnúhun cundáhú ní Cristo yohó. Chi yóhyo jité, cáni, cúnú, súcun jnúhun ún, chi yóhyo cuehē sáha. <sup>19</sup> Te jícán rí jeé na cúní váha rō ndese cundáhú ní yā yohó, vesú tu cúu cuiñí jecúhun ní yō ndíhi ndíhi. Te súcuan te cundúú ró jín Yaa Dios jeé cunuú yá ini anuá rō.

<sup>20</sup> Núu súcuan te na cáhán yō jeé yóhyo luu cújéhu ya, chí maá yá cúu Yaa iyó poder jeé sáha ya jeé váha ndasí gá vesú ndíhi jeé jícán yō chí jéé jéni ní yō. Te sáha ya un jín poder yā jeé sájniñu ini anuá yō. <sup>21</sup> Te na cáhán yō jeé yóhyo luu cújéhu ya jeé siquí jeé ní sáha ya jehé ñayuu cácandíje jín jéé siquí Cristo Jesús. Te súcuan na coo nde ní cáni cuiñí tiempo jeé quíji. Amén.

*Inuú-ni cácuu ñayuu cácandíje sáha Espiritu*

**4**

<sup>1</sup> Te ruhú jeé íne rí vecāa siquí jnúhun maá Jitoho yō, cáhán ndahú rí jín ró jeé na cáca ndaa rō nájñuhun cánuú cáca ró jéé cácuu ró ñayuu ní cana ya. <sup>2</sup> Te níni na coo suchí ní rō, te coo vitá ní rō. Te na coo paciencia rō, te cuandeyí ní rō jín jnáhan rō jéé cundáhú ní rō í. <sup>3</sup> Te na cóndihví ní rō coyūcu maní inuú ró, sáha maá Espiritu nuú véji jnúhun maní ní. <sup>4</sup> Chi ñn-ni cácuu ñayuu maá yá, te iyó ñn-ni Espiritu, te inuú cáñuhun ní yō jeé coo jéé váha siquí jeé ní cana ya yohó. <sup>5</sup> Te iyó ñn-ni Jitoho yō, jín ñn-ni jnúhun cándíje yó, jín ñn-ni jnúhun jéndute yó. <sup>6</sup> Te iyó ñn-ni Yaa Dios jeé cúu Tátá yō jijnáhan yó. Te maá yá cújéhu siquí ndíhi yó, te sájniñu ya jín ndíhi yó, te ndéé yá ini ndíhi yó.

<sup>7</sup> Te táca ñn ñn yó ní cacutahú yō sún sún jniñu sáha yó, núu ndese ní tana Cristo cúhva tahú un núu yó. <sup>8</sup> Jeé yúcuan cáhán tutu íi: Ná ní ndaa ya cuanuhun yā andiví, te ní stutú yá cuehē jeé yándihyú, cuahán yā jín.

Te ní saja ya tahú nuú táca ñayuu.

<sup>9</sup> Te jeé cahán tutu jeé ní ndaa ya, suni cúní cahán jeé xihna gā nde andiví ní cuun ya nde nuú cunú gá ñayiví yáha. <sup>10</sup> Te Yaa ní cuun, suni maá yá cúu jeé ní ndaa nde nuú

súcun gá andiví, návāha cuhun chitú yá ní cáhnu-ni. <sup>11</sup> Te ní tana ya sún sún jniñu sáha ñayuu. Chi ní jeni ya sava ñayuu cuu apóstol, te sava ga nacani jnúhun ya, te sava ga scándíje ñayuu jnúhun jeé jnáma ya í, te sava ga coo pastor condito ñayuu cácandíje, te sava ga steén. <sup>12</sup> Súcuan ní jeni ya ñayuu maá yá jeé cuajniñu í nuú yā, návāha cuehnu ga ñayuu Cristo jín jnúhun ya. <sup>13</sup> Te súcuan coo nde nduu inuú-ni ndíhi yó jín jnúhun cándíje yó, te cuni váha yó ndese Yaa cúu Sēhe Yaa Dios. Te súcuan ije váha yó ndé na cúchitú yó jín ndíhi jnúhun jeé ñuhun chitú ini Cristo. <sup>14</sup> Te súcuan te ma coo ga yō nájñuhun sūchi lúli jéé yachí jéni yāha jéni yūcuán ní í, ní ma quívi nduu yō cháha chúcuan jín sún sún jnúhun jeé cástéén tēe stáhú jéé yóhyo ndito de squívi de yóhó nuú jnúhun stáhú. <sup>15</sup> Chi sa suhva na cóndiquín yō jnúhun ndaa jín jnúhun cundáhú ní. Te súcuan cuehnu yó jín táca jniñu cúní Cristo, Yaa kujéhu nuú ñayuu cácuu nájñuhun yiquí cúñu yā, chí ñn na cúu í jín yá. <sup>16</sup> Te sáha ya jeé nduu inuú ní táca í jeé cáhije í cuahán í, chí cácuu í nájñuhun ñn na yiquí cúñu jín yá. Te jéjniñu váha táca ñn ñn í ndese ní nihin jniñu í, návāha scuéhu jnáhan te ije jijnáhan jín jnúhun cundáhú ní.

*Jeé ndújeé yó sáha Cristo*

<sup>17</sup> Núu súcuan te yāha cúu jnúhun cáhán rí jín ró, te jeé achí Jitoho yó cúu jeé cáhán nihin rí jín ró: jeé ma cáca ga rō nájñuhun cájica sava ga ñayuu jeé tu jini í ndese Yaa cúu Yaa Dios, chí cájica í jín jnúhun jeé jéni sáa-ni máa í. <sup>18</sup> Te iyó nee nuú jeé nijnúni í, te tu névāha í Espiritu jeé véji nuú Yaa Dios, chí tu jini í jnúhun ya, siquí jeé nihni ní í. <sup>19</sup> Te tuá cúcanu í, chí ní quívicoo í jín jniñu néé ndasí, te ndíhví ní í sáha í táca jniñu jnéhen. <sup>20</sup> Te róhó jijnáhan ró, nasūu súcuan ní cáscuáha ró jnúhun Cristo, <sup>21</sup> te núu ndaa jeé ní cajini ró jnúhun ya jín jéé ní cacutúhva ró jín jnúhun ndaa Jesús. <sup>22</sup> Núu súcuan te na stóo ró táca jniñu ní casáha ró ichi yátá, ná ní casáha ró modo cuní maá ró jeé ní cujnéhén ánuá ró ní sáha jniñu néé stáhú jéé ní ndiyo ní rō. <sup>23</sup> Te na ndújeé ánuá ró jín jéé nijnúni rō. <sup>24</sup> Te na cuáha ró jnúhun ndujeé ró, chí nasáha Yaa Dios rohó nájñuhun cuní maá yá jeé cáca ndaa rō jín jniñu váha jniñu ndoo.

<sup>25</sup> Núu súcuan te ma cahán gā rō jnúhun stáhú, te na cáhán ndaa rō jín táca jnáhan rō, chí ñn-ni cácuu ndíhi yó.

<sup>26</sup> Núu véji ñn jeé squití ní rohó, te ma quití néé ní rō. Te ma quití ní rō nde quée niándii. <sup>27</sup> Ma cuáha ró jnúhun jeé sáha jexeén jeé quívi ró cuéchi.

<sup>28</sup> Ñayuu ní sacuíhná, ma sacuíhná gá í, chí sa suhva na sájniñu í, te na cócuu í jín jniñu váha, návāha nihin í jeé cuáha í nuú ñayuu cúmaní nuú.

<sup>29</sup> Ni ñn jñuhun neé ma cahán rō, chi sa suhva na cahán rō jñuhun vāha jeé scuéhu jñáhan jíin jñuhun ya, te sāha jeé quéndō vāha ñayuu jíni sōho. <sup>30</sup> Ma sāha ró cuéchi návāha ma cucuíhá ni Espiritu Santo Yaā Dios. Chi Espiritu yā cúu nájñuhun sello jeé steén jeé cúu yó séhe Yaā Dios, nde quiji quiví jñu jñiñu jeé jñáma ya rohó.

<sup>31</sup> Te na siáá rō táca jñuhun cútuca ni, jíin jñuhun xeén ni, jíin jñuhun quítí ni, jíin jñuhun cahán ndevāha, jíin táca jñuhun neé. <sup>32</sup> Chi sa suhva na cóo vāha ni rō jíin jñáhan rō, te cundáhú ni rō i. Na cóne cáhu ni rō nuū jñáhan rō, nájñuhun ni ine cáhu ni Yaā Dios nuū rō siquí Cristo.

*Ndese cánuú caca ndaā séhe Yaā Dios*

## 5

<sup>1</sup> Núu súcuan te na ndácu ró Yaā Dios, chí cácuu ró séhe ya jeé maní yā jíin. <sup>2</sup> Te níni cundáhú ni rō jñáhan rō, nájñuhun ni cundáhú ni Cristo yohó, te ni socó yā maá yā jehē yō, ni cuu ya nájñuhun ñn londe jeé jeén asñ nuū Yaā Dios jeé ni socó yā maá yā.

<sup>3</sup> Te vijna jeé cácuu ró séhe Yaā Dios, te ni ma sāha ró ni ma ndájñuhun rō siquí jñuhun jíca jnéni, ni táca jñiñu jnéhen, ni jñuhun ndiyo ni ndajñiñu. <sup>4</sup> Te ni ma cahán rō táca jñuhun sāha jeé cúcanu jñáhan, ni jñuhun cánéé íi, ni jñuhun jeé tu ndé jéjñiñu cuíti. Chí táca un tu níhín jñiñu. Chí sa suhva na nácuatáhú ró nuū Yaā Dios. <sup>5</sup> Chí je cájini rō jeé ní ñn ñayuu cájica jnéni, ni jeé sāha jñiñu jnéhen, ni jeé ndiyo ni táca ndajñiñu, ma níhín tahú i quiví i ndaha Cristo jíin Yaā Dios jeé ndacu ya jñiñu nuū i. Chí táca jeé ndiyo ni i cúu nájñuhun idolo i jeé cáchiñúhún i. <sup>6</sup> Te coto ró jeé ma stahú ni ñn i rōhó jíin táca jñuhun cahán saá ni i, chí siquí táca jñuhun neé yāha cúu jeé quíji castigo xeén Yaā Dios nuū táca ñayuu níhni ni. <sup>7</sup> Ma quiví nduu ró jíin i núu súcuan.

<sup>8</sup> Chí táca quiví saá ni coyúcu ró nájñuhun nuū neé, te vijna chí cáyúcu ró jíin luz maá Jítoho yō, cúu jeé cájécúhún ni rō siquí yā. Te na cáca ró nájñuhun cájica ñayuu jeé steén luz yā ini anuá i. <sup>9</sup> Chí jñiñu sāha luz yā jíin yó cúu táca jñiñu maní ni, jñiñu ndaā, jíin jñiñu vāha. <sup>10</sup> Scuáha ró sāha ró táca jñiñu jeé nájñahan ni maá Jítoho yō. <sup>11</sup> Te ma quiví nduu ró jíin táca jeé tu níhín jñiñu jeé casáha ñayuu cáyúcu nájñuhun nuū neé. Chí sa suhva steén rō nuū i jeé tú vāha casáha i. <sup>12</sup> Chí cúcanu yō cahán yō siquí jñiñu casáha yuhu maá i. <sup>13</sup> Te luz yā sāha jeé nátū táca jñiñu neé casáha i. Te núu cuatáhú i luz yā te caca i jíin luz ún. <sup>14</sup> Jeé yúcuca cahán tutu:

Róhó jeé cúhuun ni, jeé nájñuhun quixí, natakū ni, te quenda ró méhñu ñayuu jeé cácuu nájñuhun ndiyo. Te Cristo steén yā luz yā ini anuá rō.

Achí tutu.

<sup>15</sup> Núu súcuan te coto vāha ró ndese caca yúcuu ró. Te ma cáca ró nájñuhun cájica ñayuu canéé, chí caca ró nájñuhun cájica tēe ndichí. <sup>16</sup> Ma snáā rō tiempo, chí condihví ni rō jíin jñiñu ya, chí iyó cuéhé cuéchi quiví yāha. <sup>17</sup> Núu súcuan te ma cóo neé xíní rō, chí sa suhva na jécúhún vāha ni rō na jñiñu nájñahan ni maá Jítoho yō. <sup>18</sup> Te ma nájñi ró, chí tēvi ró sāha. Chí sa suhva na ndúcu ró jeé cúnuú Espiritu Santo ini anuá rō. <sup>19</sup> Te cahán rō jíin jñáhan rō jíin salmo jíin himno, yaa íi jeé cahán jñuhun ya. Te ini anuá ró cahán rō jíin yā jíin táca yaa, chí yúcuca cúu jeé jíta ánuá rō nuū yā chíñúhún ró yā. <sup>20</sup> Te níni nacuatáhú ró siquí táca-ni nuū Tatá yō Yaā Dios te ndacunehen ró síhví maá Jítoho yō Jesucristo.

*Ndese siquícu vāha ñayuu cácuandje nuū jñáhan i*

<sup>21</sup> Te cuatáhú ró nuū jñáhan rō siquí jeé cáhño yíñúhún ró nuū Cristo.

<sup>22</sup> Róhó ñahan cácuu ñasihí, cuatáhú ró nuū yíi ró, nájñuhun jétáhú ró nuū Jítoho yō. <sup>23</sup> Chí yíi cújéhu nuū ñasihí, nájñuhun cújéhu Cristo nuū yohó ñayuu cácuandje, jeé cácuu yó nájñuhun yiqui cúñu yā, chí ñn na cúu yó jíin yā. Te maá yā jñáma ya yohó. <sup>24</sup> Chí nájñuhun ñayuu cácuandje cájetáhú i nuū Cristo, suni súcuan ñasihí cuatáhú ña ndihi jeé cahán yíi ña.

<sup>25</sup> Te róhó tēe cácuu yíi, cundáhú ni rō ñasihí ró, nájñuhun ni cundáhú ni Cristo yohó ñayuu cácuandje, te ni socó yā maá yā jehē yō. <sup>26</sup> Súcuan ni sāha ya jeé cóo ndoo coo íi yō nuū yā, te ni nacate ya anuá yō jíin jñuhun ya jíin jéé ní jendute yō. <sup>27</sup> Te yohó ñayuu cácuandje chí cuíñi yó núu yā, te luu cujéhu yō. Te ma cóndee cuéchi ánuá yō, ni jeé tú luu, ni ñn jeé súcuan, chí sa suhva coo ndoo coo íi yō nuū yā, te tú na vé cumaní gā. <sup>28</sup> Te nájñuhun Cristo ni cundáhú ni yā ñayuu cácuandje, suni súcuan cánuú jéé cundáhú ni yíi ñasihí de, nájñuhun cundáhú ni de maá de. Chí tēe cundáhú ni de ñasihí de, maá de cundáhú ni de. <sup>29</sup> Chí ni ñn tēe tu jíto uhú de maá de, chí sa suhva yéji de te ndíto yúcuca de maá de. Te suni súcuan sāha Cristo jíin yohó ñayuu cácuandje nuū yā. <sup>30</sup> Chí cácuu yó nájñuhun yiqui cúñu yā, te ñn ñn yó cácuu nájñuhun ñn ñn parte yiqui cúñu yā. <sup>31</sup> Te suu cúu nájñuhun tēe jeé stóo de tátá de náná de, te quíjñahan de jíin ñasihí de, te ñn na cúu ndíndúu de. <sup>32</sup> Yóhño jéhu jñuhun sáhi yāha, te cáhan íi jeé ñayuu cácuandje suni súcuan quíjñahan i jíin Cristo. <sup>33</sup> Te suni súcuan ná ñn ná ñn ró cundáhú ni rō ñasihí ró, nájñuhun cundáhú ni rō maá ró. Te ñasihí na cúu yíñúhún ña jíin yíi ña.

## 6

<sup>1</sup> Te róhó séhe jijnáhan ró, cuandije ró núu tatá ró nuu naná ró, chi yucuan cúu jeé váha sáha ró jéé candije ró Jítoho yó. <sup>2</sup> Chi yáha cúu in jnánhan jeé uxí jnūhun ndácu jniñu jeé ni jehe ya, te xihna gā jnūhun yáha ndiso tahū: Coo yifūhūn ró nuu tatá ró nuu naná ró, <sup>3</sup> náváha quendōo ndetū ró, te náhán cotecu ró ini ñayivi yáha. Achí.

<sup>4</sup> Te róhó tátá jijnáhan ró, ma squití ni ró séhe ró, chi sa suhva scuéhnu ró i jín jnūhun cuandije i, te stéén ró nuu i jeé candije i máá Jítoho yó.

<sup>5</sup> Te róhó mozo jijnáhan ró, cuandije ró núu patrón ró ñayivi yáha, te coo yifūhūn ró te conso iyo ró núu de. Te na sájniñu ndaā sájniñu ndije ró, caní ni ró jeé nuu Cristo cájejniñu ró. <sup>6</sup> Ma sájniñu ndúxí ró jeé maá jeé coto de te cuajnúhūn de róhó. Chi sa suhva sáha ró cuenta jeé mozo Cristo cácuu ró. Te sáha ró jéé nújnahan ni Yaā Dios nde jín ini jín ánuá ró. <sup>7</sup> Te na cúsiñi ni ró sájniñu ró, te na cáni ni ró jeé nuu maá Jítoho yó cájejniñu ró, nasūu núu ñayuu. <sup>8</sup> Chi je cájini ró jeé jniñu váha sáha in in ró, te nihin ró yáhu jniñu yucuan núu maá Jítoho yó, vésú cúu ró mozo chí téé sájniñu maá.

<sup>9</sup> Te róhó patrón jijnáhan ró, suni súcuan sáha ró jín mozo ró, te ma cahán xeén ró jín i. Chi na cócuhun ni ró jeé suni máá ró jín máá i yíhi ró ndaha Jítoho yó, Yaā ndeé andiví. Te tu sáha ya cuenta ndese cúu in in ñayuu, chí inuú sáha ya jín i.

*Na cúcutú yó jín táca fuerza Yaā Dios*

<sup>10</sup> Te iyó inga jnūhun, hermano jijnáhan ró. Nducú ró jeé na cóo fuerza ini ró jín fuerza maá Jítoho yó jeé nduú yá jín ró, chí iyó téyí poder yā. <sup>11</sup> Na cúcutú ró jín táca fuerza Yaā Dios, náváha cuu cuiñi nihin ró jéé ma stahú jexeén róhó. <sup>12</sup> Chi nájnūhun jeé cájejnáhan yó jín táca jéé neé. Te nasūu ñayuu cúu jeé cájejnáhan yó jín, chí sa suhva jín táca táchí cájica nuu sucún. Te yucuan cúu jeé cácujeñu, jín jéé cándiso jniñu, jín jéé cándacu jniñu nuu ñayuu ñayivi yáha jeé nájnūhun cájica i nuu neé. <sup>13</sup> Núu súcuan te na cúcutú ró jín ndihi fuerza Yaā Dios, náváha cuu cuiñi nihin ró quíví jito ndee jexeén rohó. Te súcuan coo túhva ró jín táca ndihi jeé cuiñi nihin ró jín. <sup>14</sup> Núu súcuan te cuiñi nihin ró jín jnūhun ndaā jeé cúu nájnūhun jeé yíhi nihin sanchíi chíjí ró. Te sácútu ró maá ró jín jnūhun caca ndaā ró, te suu cúu nájnūhun jeé cúcutú soldado jín sahma cáa jeé ndihyú de. <sup>15</sup> Te níni cotúhva ró nacani ró jnūhun ndeyí jnūhun sñi ni jeé véji nuu Yaā Dios. Te suu cúu nájnūhun jeé chíhi soldado ndijēn jehē de. <sup>16</sup> Te jeé cánuú gá cúu jeé candije ró jeé iyó yá jín ró. Te yucuan cúu nájnūhun jeé túhva ró máá ró yatá in escudo. Chí jín jnūhun cándije ró un

te cuu ndahva ró ndihi jeé tají máá jexeén, jeé cúu nájnūhun nduva jeé cayú yáñuhūn punta. <sup>17</sup> Te cuiñi ró jín jnūhun ni jnama ya rohó, jeé cúu nájnūhun in lélú cáa. Te cuajniñu ró jnūhun jeé yosó núu tútu Yaā Dios jeé ni jéhe Espiritu Santo nuu ró. Chi yucuan cúu nájnūhun jéjniñu soldado espada de. <sup>18</sup> Te níni cácan tahú ró nuu Yaā Dios siquí ndihi-ni, te cahán ndahú ró jín yá jín fuerza Espiritu. Núu súcuan te ndito na cóo ni ró, te ma jécuiñi ró jeé cacán tahú ró jehē táca ñayuu maá yá. <sup>19</sup> Te suni cahán ró jehē rí, náváha nihin rí jnūhun cahán rí, te coo téyí ni rí nacani cájii rí jnūhun jeé jnama ya yohó, suu jnūhun jeé ní yisáhí un. <sup>20</sup> Chi ni tají yá ruhū jeé jica rí nacani rí jnūhun ya ún, te jeé siquí un cúu jeé ine rí vecaā. Te na cácan tahú ró jeé coo téyí ni rí cahán rí jnūhun ya, nájnūhun cánuú cahán rí.

*Saludo jeé sándihí*

<sup>21</sup> Tíquico cúu in hermano jeé maní yó jín, te cúu de tēe squicu váha chindéé ñajnáhan jín rí nuu jniñu maá Jítoho yó. Te máá de castúhūn ndihi ndese cuahán jniñu rí te ndese iyó rí. <sup>22</sup> Jeé yucuan ní tají rí de cuajeé de nuu ró, náváha cachi de ndese cáhiyo rí, te coo ndeyí ni ró jijnáhan ró sáha de.

<sup>23</sup> Te ñúhūn ni rí jeé Tatá yó Yaā Dios jín Jítoho yó Jesucristo, na sáha ya jeé coo ndeyí coo sñi ni táca róhó jéé cácuu hermano, te coo maní gā ró jín yá, te candije váha ró. <sup>24</sup> Te ñúhūn ni rí jeé na sáha ga yā jeé váha róhó jijnáhan ró jéé maní ndije ró jín Jítoho yó Jesucristo. Súcuan na cóo. Amén.

## CARTA JEE NI TEE APOSTOL SAN PABLO NUU ÑAYUU NUU FILIPOS

<sup>1</sup> Máá rí cúu Pablo jiín Timoteo, mozo Jesucristo. Te cátee ri carta yáha cuájeé nuú táca róhó hermano cáyucú ñuu Filipos, jeé cácuu ró ñayuu maá yá jeé cáyihí ró ndaha Cristo Jesús. Te suni cátee ri nuú téé cándiso jníñu cándito róhó, jiín nuú téé cájejniñu mēññu ró. <sup>2</sup> Te cáñuhun ni rí jeé Tatá yō Yaá Dios jiín Jítoho yō Jesucristo, na sáha ga yā jeé váha róhó, te sáha ya jeé coo ndeyí coo síñ ni ró.

*Jeé jicán tahú Pablo jehé ñayuu cácandíje*

<sup>3</sup> Táca jínu jeé núcūhun ni rí rohó jijnánhan ró, te nácuatáhú rí nuú Yaá Dios. <sup>4</sup> Te náa jicán tahú rí, te níni cúsiñ ni rí jicán tahú rí jehé ró. <sup>5</sup> Chi ni chindéé ñájnánhan ró jiín rí jeé scáca yó jñūhun váha ya, nde quiví ní cacandíje ró te nde vijna. <sup>6</sup> Te jini ndije ri jeé maá Yaá ní squéjéé jniñu váha jiín ró, cocu ya jiín ndé quiví ndiji Jesucristo, te sínu ndihí ya. <sup>7</sup> Te íyó váha jeé súcuan jéni ni rí siquí táca róhó, chí yohyo maní rí jiín ró, te inuú-ni ni sáha ya jeé váha yóhó. Te súcuan cúu vésú íne rí vecáa chí vésú cuiñi rí nuú táca téé cújéñu, cahān rí jehé jñūhun jeé jnáma ya yohó jéé jñūhun ndaā cúu. <sup>8</sup> Chi Yaá Dios jini yā ndese yōhyo maní rí jiín ró jijnánhan ró, nájnūhun yōhyo maní Jesucristo jiín yó. <sup>9</sup> Te jicán tahú rí jeé na cáa ga jeé cundáhú ni ró jñánhan ró, jiín jéé na jécūhun ga ni ró te cundichí ró jiín táca jñūhun ya. <sup>10</sup> Te súcuan te cuu nacāji ró táca jéé váha condiquin ró, te caca ndaā ró, te ma cóo ni ññ cuēchi siquí ró quiví ndiji Cristo. <sup>11</sup> Te súcuan te cayā cuehē jniñu váha jeé sáha Jesucristo jiín ró. Te sáha jeé coo yññuhún ñayuu jiín Yaá Dios te cahān i jeé yōhyo luu cújéñu ya.

*Jñūhun jeé técu nduú yó jiín Cristo*

<sup>12</sup> Hermano, cúní rí jeé na cúcāñu ni ró jijnánhan ró ndese ni sáha jññódóho ni ndoho rí. Chi ni sáha jeé ní jite núu ga jñūhun jeé jnáma ya yohó. <sup>13</sup> Chi táca soldado cáyucú ini palacio, jiín táca gā ñayuu, cájini i jeé íne ri vecáa jeé siquí Cristo. <sup>14</sup> Te siquí jeé íne ri vecáa, jeé yúcuau cúu jeé vihyá gā jniñu ndeyí ni cuehē táca hermano cácandíje nuú Jítoho yō. Te cáhíyo téyí gā ni de nácani de jñūhun ya, te tu ndé ndíñu ni de.

<sup>15</sup> Te ndaā chí sava téé cácanani de jñūhun Cristo siquí jeé cuesún ni de jiín jéé nduxí de. Te sava ga de chí sa suhva cácanani de jñūhun ya siquí jeé váha ni de. <sup>16</sup> Sava de cácanani jñūhun Cristo siquí jeé nducú de jeé váha máa-ni de, te tú ndije de, chí cácani de jeé niññ gā rí jññódóho jeé íne ri vecáa. <sup>17</sup> Te sava ga de chí cácanani de jñūhun siquí jeé cundáhú ni de ruhū, chí cájini de jeé íne

ri vecáa siquí jeé cahān rí jehé jñūhun jeé jnáma ya yohó. <sup>18</sup> Tú na vé sáha núu súcuan, chí táca-ni modo cascuíté núu de jñūhun Cristo, vésú núu ndije de chí tuú. Te yáha cúu jeé cúsiñ ni rí sáha.

Te suni cusñ gā ni rí, <sup>19</sup> chí jini rí jeé táca jéé yáha sáha jeé váha ga coo jiín rí, chí cájicān tahú ró jehé rí, te Espiritu Jesucristo chindéé ñáñan yá ruhū. <sup>20</sup> Chi ñūhun ni rí te cúu ndasí ni rí jeé ma sáha rí ni ññ jeé sáha jeé cucanu ri nuú yā. Chí sa suhva coo téyí ni rí cahān rí jñūhun ya, náváha ndujéñu ga Cristo sáha máá rí vijna, nájnūhun je ni sáha rí ní véji ri, te vésú na cótecu rí chí vésú na cúu rí. <sup>21</sup> Chi jeé técu rí cúu jeé nduú rí jiín Cristo, te jeé cúu rí cúu jeé vihyá gā váha coo jiín rí. <sup>22</sup> Te núu cotecu gā rí, te cuu scáca ga rí jniñu máá Jítoho yō. Núu súcuan te tu cúcāñu ni rí ndé ññ cuu jeé váha ga, núu jeé cótecu rí chí jéé cúu rí. <sup>23</sup> Chi mēññú ndindúú jñūhun yáha íne niññ rí. Chí ññ cúu jeé cuní rí quihñ rí condee rí jiín Cristo, chí yúcuau cúu jeé vihyá gā váha coo jiín rí. <sup>24</sup> Te suni cánuu gā jeé cótecu gā rí jeé siquí rohó jijnánhan ró. <sup>25</sup> Núu súcuan te íyó ndáa ni rí jeé quéndoo rí condee gā rí jiín ró, náváha stéén gā rí nuú ró ndese caca váha ga ró jiín yá, te cusñ gā ni ró jiín jñūhun cácandíje ró. <sup>26</sup> Núu súcuan te condee tucu ri jiín ró, te cusñ teyí ni ró jeé siquí ruhū, sáha máá Cristo Jesús.

<sup>27</sup> Te máá ññ-ni jeé condihví ni ró caca ndaā ró, nájnūhun cánuú caca ró síquí jeé cácandíje ró jñūhun Cristo. Yúcuau na te vésú na jínú rí coto jñánhan yó, chí condee jicá rí, te niññ rí jñūhun ro jéé cáhñ niññ rí jiín jñūhun ya, te cáhíyo inuú ni ró, te inuú-ni cánducú ndeyí ró siquí jñūhun jeé cácandíje yó jéé jnáma ya yohó. <sup>28</sup> Te ma yuhú cuiti ró sáha jeé cájito uhú rohó. Chí jeé jito uhú i róhó, yúcuau stéén jeé jñahnú ndetū i, te suni stéén jeé cácu ánuá ró jijnánhan ró sáha Yaá Dios. <sup>29</sup> Chi ni jeé Cristo uú jeé váha nuú ró: nasūu máá ññ-ni jeé candíje ró yá, chí suni jeé na ndóho ró jéé siquí yā. <sup>30</sup> Chí máá rí jiín róhó jijnánhan ró, nájnūhun jeé cájejnánhan yó jiín táca jéé neé. Chí ni cajito ró jéé súcuan ni sáha máá rí, te cániññ ró jñūhun jeé sáha ga rí nde vijna.

*Jeé ni sáha suchí yá maá yá te ni ndujéñu ya*

## 2

<sup>1</sup> Núu súcuan te sáha Cristo jeé cáhíyo ndeyí ni ró, jiín jéé cúsiñ ni ró siquí jeé váha ni yā jiín ró. Te ndéé Espiritu yā jiín ró, te maní ró jiín jñánhan ró, te cájito ndáhú ró i. <sup>2</sup> Núu súcuan te na cócu ga ró jiín táca jñūhun yáha, náváha cusñ teyí ni rí. Te inuú-ni na cóo ni ró, te coyūcu maní ró, te inuú na cóo ánuá ró, te inuú caní ni ró. <sup>3</sup> Te ni ññ jniñu ma sáha ró jéé nducú ró jeé váha máa-ni ró, ni



jeē satéyí ró maá ró. Chi sa suhva sáha suchí ró maá ró, te sáha ró cuenta jeē váha ga jnánhan ró vēsú maá ró. <sup>4</sup> Te ma cóndihví ni ró maá-ni jniñu jeē quéndōo váha máá-ni ró, chi suni na cóndihví ni ró jniñu jeē quéndōo váha jnánhan ró.

<sup>5</sup> Te na cáni ni ró jijnánhan ró nájñuhun ni jeni ni Cristo Jesús. <sup>6</sup> Chi máá yá cujéhu inuú yá jíin Yaā Dios, te vēsú súcuan te tu ní jéni ni yā jeē cujéhu inuú yá jíin Yaā Dios. <sup>7</sup> Chi ni siaá yā jeē cujéhu ya, te ni nduu ya nájñuhun índāa mozo, te ni cacu ya ni nduu ya tēe. <sup>8</sup> Te ná ni nduu inuú yá jíin tēe, te ni sáha suchí yá maá yá. Te ní jendije ya nde jíin jñuhun jeē cū yā, te nde jíin jñuhun canu jeē cū yā jíicā cruz. <sup>9</sup> Jeē yúcuau ní sáha Yaā Dios jeē yóhoyo ni ndujéhu luu ya, te síhví yá cujéhu ndasí gá nuú táca gá síhví. <sup>10</sup> Te táca jéē cáhīin andiví jíin ñáyiví jíin chíjī ñáyiví, núu na cūni i síhví Jesús te jecuiñí yití i. <sup>11</sup> Te cahān ndaā ndivii i jeē Jesucristo cūu máá Jítho. Te súcuan stéén i jeē yóhoyo cújéhu máá Tátá yā Yaā Dios.

*Ñayuu cá candije cūu i nájñuhun quāmi jeē ndíndēē*

<sup>12</sup> Núu súcuan hermano jijnánhan ró, nájñuhun níni ní cajendije ró jñuhun ni cahān rí ná ni condee rí jíin ró, suni súcuan víhyá gā cuandije ró vijna jeē ndeē jíicá rí jíin ró. Te condihví ni ró jeē caca ndaā ró jíin jñuhun ní jnama ya rohó, te caca yíñuhún ró conso iyo ró núu yā. <sup>13</sup> Chi Yaā Dios jícu ya jíin ró jeē cūu ni ró sáha ró jniñu váha, te chindéē ñáhán yá rohó jéē squicu ró jniñu nájñahan ni yā.

<sup>14</sup> Ndhí jeē sáha ró, ma cahán sōo ró, ni ma tejnánhan ró, <sup>15</sup> návāha cuu ró séhe Yaā Dios jeē tú na cuéchi coo siquí ró te coo ndaā ró. Te caca ndoo ró méhñu ñayuu níni ni jeē casáha néé. Chi méhñu ñayuu un stéén ró jniñu váha ró, te súcuan cácuu ró nájñuhun quāmi jeē ndíndēē núu néé ñáyiví. <sup>16</sup> Te stéén ró jñuhun ya nuú i jeē cótecu i ní cáni sáha. Te súcuan te cusí teyí ni rí quiví ndíjī Cristo, chi cuni rí jeē tu ní jíca cáhá rí, ni tu ní sájñiñu cáhá rí. <sup>17</sup> Te vēsú na cūu rí jeē socó rí maá rí nuú yā jeē siquí rohó, te yúcuau cūu jeē nducú rí scandije ga rí rohó, návāha socó ró maá ró sáha ró jniñu váha jeē cá candije ró yá. Jeē yúcuau cúsí ni rí, te cūni rí jeē suni cusí ni ró jíin rí jijnánhan ró. <sup>18</sup> Núu súcuan te na cúsí ni maá ró jíin rí, te inuú na cúsí ni yó jijnánhan yó.

*Jñuhun Tímoreo jíin Epafrodito*

<sup>19</sup> Te ñuhun ni rí jeē cuáha máá Jítho yó Jesús jñuhun jeē tají yáchí rí Tímoreo jeē de nuú ró, návāha ndusí ni rí níu na níhín rí jñuhun ndese cáhīyo ró. <sup>20</sup> Chi tuá na inga tēe iyó yáha jéē inuú jéni ni jíin rí, nájñuhun máá de jeē ndihví ndije ni de jehē ró. <sup>21</sup> Chi táca de cánducú de jeē cūu máá de, te nasūu

jéē cuní Cristo Jesús. <sup>22</sup> Te je cájini ró jeē tēe váha cūu Tímoreo. Chi nájñuhun séhe jíin tátá, súcuan ni jejniñu de jeē nácani de jñuhun váha ya jíin rí. <sup>23</sup> Núu súcuan te ñuhun ni rí tají rí de jeē de nuú ró, te núu je ni cucáhu ni rí ndese coo jíin rí. <sup>24</sup> Te jéni ndije ni rí jeē cuáha Jítho yó jñuhun jeē suni máá rí jíin yáchí rí nuú ró jijnánhan ró.

<sup>25</sup> Te suni jéni ni rí jeē cánuú tají rí hermano yó Epafrodito jeē de, chi tēe sájñiñu jíin rí siquí jñuhun ya cūu de te chindéē ñájñahan de jíin rí. Chi máá ró ni catají ró de jeē cuajniñu de nuú rí táca jéē cūmaní nuú rí. <sup>26</sup> Chi yóhoyo cūu ni de ndacoto tucu de nuú ró jijnánhan ró. Te ni cucuíhyá ndasí ni de, chi ni canihín ró jñuhun jeē ní cocuhū de. <sup>27</sup> Chi jendaá ní cocuhū de, te je yajni cuu de núu. Te Yaā Dios ni cunduhú ni yā de, te nasūu máñuhún-ni de, chi suni ruhū, návāha tú caa ga cucuíhyá ni rí jehē de núu. <sup>28</sup> Jeē yúcuau cūu jeē ndihví gá ni rí tají rí de nuú ró, návāha ndusí ni ró jeē ndacoto tucu ró núu de. Te suni ruhū ma cucuíhyá ndasí gá ni rí. <sup>29</sup> Núu súcuan te na cúsí ni ró jeē nájñu de nuú ró, chi cūu de hermano yó jeē candije de maá Jítho yó. Te coo yíñuhún ró jíin táca tēe índāa nájñuhun cáa de. <sup>30</sup> Chi jeē siquí jniñu Cristo cūu jeē jé yajni cuu de núu. Chi ni chundeyí ni de jeē cūu de siquí jeē chindéē ñáhán de ruhū jíin jniñu jeē tu ní iyo modo sáha máá ró jijnánhan ró.

*Jñuhun jeē cáca ndaā váha yó*

### 3

<sup>1</sup> Te vijna, hermano jijnánhan ró, na cúsí ni ró jíin máá Jítho yó. Ruhū chi tu jnánini ni rí jeē tēe tucu rí jñuhun yáha núu ró, chi cuajniñu jeē quéndōo váha ga ró. <sup>2</sup> Condito ró máá ró nuú tēe casáha jniñu néé, jeē cándāa ná cándāa ina. Chi cánducú de stújī de rohó jéē casáha de circuncidar; te tu casáha de jniñu ndaā. <sup>3</sup> Te máá yó cácuu ñayuu ni cuu circuncidar ndije, chi cáchiñuhún yó nuú Yaā Dios nde jíin ini jíin ánuá yó, te cácusí ni yó jeē yihí yó ndaha Cristo Jesús, te tu tēnuú yó jeē quéndōo ndaā yó jíin jniñu jeē sáha máá-ni yó. <sup>4</sup> Núu jeē súcuan cūu te ruhū chi suni cuu tēnuú rí jniñu jeē sáha máá-ni rí nuú. Chi núu ndé tēe jéni ni de jeē cuu tēnuú de máá de, te ruhū chi víhyá gā cuu tēnuú rí maá rí. <sup>5</sup> Chi ni casáha circuncidar ruhū nuú uná quiví ná ni cacu rí. Te yacún Israel cūu rí, te suni jnánhan yucún Benjamín, te ñin hebreo séhe hebreo cūu rí. Te suni ni cuu rí tēe grupo fariseo jeē ni squicu rí táca ley jnánhan ñuu rí hebreo. <sup>6</sup> Te ní jito xeén rí ñayuu cá candije, chi yóhoyo ni condihví ni rí jeē ma sáma i modo ley jenahán. Te ni ñin tu ní cūu cahān jeē tu squicu rí ley un, chi ni squicu váha rí. <sup>7</sup> Te táca jéē ní tēnuú rí ún, chi sáha rí cuenta jeē tu ndé níhín jñifu

cuiti, chi vijna te ni candíje ri Cristo. <sup>8</sup> Te suni chíhi ri cuenta jeé vaha ga na naá ndihi jeé ní tenuū rí ún, chí vaha ndasí gá cúu jeé ni quívi ri ndaha máá Jítoho rí Cristo Jesús. Te jeé siquí maá yá te ni siaá rí ndihi ún, te sáha ri cuenta jeé nájnūhun yacá-ni cúu. Chí ni quívi ri ndaha Cristo, <sup>9</sup> te ndúú yá jíin rí. Te tuá nducú rí quendōo ndaā rí jeé jíin ley un, chí sa suhva Yaā Dios ni ndahva yā cuēchi ri jeé ní candíje ri Cristo. Chí súcuan squéndōo ndaā yā ñayuu cácandíje. <sup>10</sup> Te vijna te cúní rí jecūhun vaha ni rí ndese Yaā cúu ya. Te cúní rí jeé poder jeé ní natecu yá cone jíin rí. Te cúní rí ndoho ri jíin yá, te nde jinū rí ndoho ri nájnūhun ni ndoho máá yá jeé ni jíhi yā. <sup>11</sup> Chí yōhyo ñūhun ni rí natecu rí nájnūhun ni natecu yā.

*Jeé nducú ndeyí Pablo sínu de carrera de*

<sup>12</sup> Te ná tu nihín rí ndihi jeé ní cahān rí ún, ní ná tu ije ri jíin. Te ndúcú ndeyí rí siquí ún, chí ñūhun ni rí jeé nihín rí táca un, chí jeé yúcuán cúu jeé ní nihín Cristo Jesús ruhū xihna gā. <sup>13</sup> Hermano jíinánan ró, tu sáha ri cuenta jeé jeé ní nihín rí ndihi ún. Te iyó in jeé sáha ri, cúu jeé squéndōo rí táca jée ní cuu ichi yátá, te ndúcú ndeyí rí nihín rí táca jée iyó ichi núú. <sup>14</sup> Chí cúu un nájnūhun jeé jínu rí in carrera cuahān rí nde jinū rí andiví, te nihín rí premio jeé cuáha Yaā Dios. Chí ni cana ya yohó jée quihín yó nuú yá andiví siquí jeé yíhi yó ndaha Cristo Jesús.

<sup>15</sup> Te táca yó jeé jeé ní ije vaha yó jíin jnūhun cándíje yó, súcuan na cáni ni yó. Te núu ndé in ró sáin jeni ni ró, te Yaā Dios suni stéén yá nuú ró jeé násūu súcuan cúu. <sup>16</sup> Te jíni ñūhún caní ni yó te caca yó modo jeé quijnáhan jíin jée jeé ní nihín yó.

<sup>17</sup> Hermano, na ndácu ró rúhū jíinánan ró. Te condēhe vaha ró ndese cájica ñayuu ndaā, chí cájica i nájnūhun ni castéén rí nuú ró. <sup>18</sup> Te je ni cuu tíjni jínu ni cahān rí jíin ró, te nde ndahyú rí cahān tucu ri vijna, jeé iyó cuéhé ñayuu cájica i in modo jeé stéén jeé jito uhū i jnūhun jeé ní jíhi Cristo jíca cruz. <sup>19</sup> Te in quívi te jnahnū ndetū ñayuu ún. Chí máni jeé cáji vaha i cúu jeé cáchiñūhún i. Te sátéyí i máá i jíin jniñū neé jeé jéhe jnūhun canu. Te máni máá jée iyó iní ñayívi cúu jeé ndihví ni i. <sup>20</sup> Te máá yó chí ñayuu coyūcú andiví cúu yó, te cādetu yó jée nde yúcuán ndiji Jítoho yó Jesucristo, Yaā jnáma yóhó. <sup>21</sup> Te máá yá nasama ya yiqui cúūu ndahú yó, návaha nduu yó nájnūhun cáa máá yá jeé lúu cújéhu ya. Te súcuan sáha ya jíin poder yá jeé cujéhu ya siquí ndihi-ni.

*Níní na cúsiñ ni yó jíin Jítoho yó*

#### 4

<sup>1</sup> Núu súcuan hermano jíinánan ró, cuiñi nihín ró jíin jnūhun máá Jítoho yó. Chí yōhyo maní rí jíin ró, te cúní rí jeé coto jnáhan yó, te

cúsñ ni rí jíin ró, te nájnūhun premio rí cácuu ró.

<sup>2</sup> Te cahān ndahú rí jíin róhó Evodia jíin Síntique jeé inuú na cóo ni ró, chí cácuu ró hermana jeé cácandíje ró máá Jítoho yó. <sup>3</sup> Te suni cahān ndahú rí jíin róhó, téé jeé ní chindéé ñájnánan vaha jíin rí, jeé na chindéé ñáhnán ró hermana un, chí ni casájniñu nihin ña jíin rí siquí jnūhun jeé jnáma ya yohó. Te suni súcuan ni sáha Clemente jíin sava ga ñayuu ni sájniñu jíin rí. Te ni jecosō sihví i nuú libro jeé yosó shví ñayuu cotecu ní cáni.

<sup>4</sup> Te níní na cúsiñ ni ró jíinánan ró jíin máá Jítoho yó. Te inga jinu cahān rí jeé na cúsiñ ni ró. <sup>5</sup> Sáha vaha ró jíin táca ñayuu, návaha cuni i jeé súcuan vaha ni ró. Chí máá Jítoho yó, yajni-ni cúu ya jíin ró.

<sup>6</sup> Ma nácani ndasí ni ró siquí ni in. Chí sa cahān ró jíin Yaā Dios siquí táca jée nácani ni ró. Chí cacān tahu ró, te cahān ndahú ró, te suni nacuatáhú ró nuú yā. <sup>7</sup> Yúcuán na te sáha Yaā Dios jeé cóo ndeyí coo sñ ndasí ni ró, te súcuan coo jíin ró nde cūhva jeé ma jécūhun ni ró ndese cúu jeé sáha ya ún. Te condito vaha ya anuá ró jíin jée níjnūni ró, coo cuehé jnūhun ndeyí jnūhun sñ ni jíin ró, siquí jeé yíhi ró ndaha Cristo Jesús.

*Jeé na cáni ni yó siquí táca jée vaha*

<sup>8</sup> Te in na jnūhun iyó, hermano jíinánan ró. Na cáni ni ró siquí táca jée iyó ndaā, jíin jée sáha yíñūhún, jíin táca jniñu sáha vaha, jíin jniñu iyó ndoo, jíin táca jée iyó máni ni, jíin jée lúu sáha. Te máni na núcūhun ni ró táca jée vaha jeé sáha jeé nácuatáhú ró nuú yā.

<sup>9</sup> Táca jée ní stéén rí nuú ró, jeé ní cacutūhva ró nuú rí, jíin jée ní cajini ró ní cahān rí, jíin jée ní cajito ró ni sáha ri, táca yúcuán suni na sáha máá ró. Yúcuán na te máá Yaā jeé jéhe jnūhun ndeyí sñ ni, coo ya jíin ró.

*Jeé ní casocō ñayuu Filipos nuú Pablo*

<sup>10</sup> Te yōhyo cúsiñ ni rí sáha máá Jítoho yó, chí vijna te ni canucūhun tucu ni ró jeé chindéé ñáhnán ró rúhū. Te nasūu jée ní naa ni ró sáha ró súcuan, chí siquí jeé tu ní íyo modo. <sup>11</sup> Te nasūu jée cahān rí siquí jeé ndóho ndahú rí, chí je ni cutūhva ri cusñ ni rí jíin jée névaha rí. <sup>12</sup> Jini rí cotecu ndahú rí, te jíni rí cotecu cucá rí. Chí ni cān ri jíin táca-ni, núu jeé ndutú chíji rí chí jée ndóho rí sóco, núu jeé cónevaha cuehé rí chí jée cúmaní nuú rí. <sup>13</sup> Ndihi-ni cúu sáha ri, chí máá Cristo jéhe ya fuerza ini rí. <sup>14</sup> Te vesú súcuan te vaha ni casáha ró jée ní chindéé ñáhnán ró ruhū jíin jnúndóho jeé ndóho rí.

<sup>15</sup> Te róhó ñayuu ñuu Filipos, je cájini ró ndese ni cuu. Chí nde quívi ní quejée rí nácani ri jnūhun jeé jnáma ya yohó, ná ni quenda ri Macedonia vėji ri, te ni casocō ró xūhun núu rí siquí jeé ní canihín ró jnūhun ya ni nacani ri. Te ni in grupo ñayuu cácandíje tu ní sáha súcuan, chí máá-ni róhó jíinánan ró.

<sup>16</sup> Te ná íne ri ñuu Tesalónica, te ni catajǎ ró jecu jeē jíni ñúhún rí, ni jinū ñin uū jínu. <sup>17</sup> Te nasūu jeē nducú rí jeē cuáha ró núū rí, chi sa ndúcú rí jeē na cáyá gā jniñu váha ró, návaha cayā tahū rō nuū Yaā Dios. <sup>18</sup> Chi je ni nihīn rí ndihi jeē jíni ñúhún rí, te ndóo ga. Te íyó cuéhē nuū rí, chi ni nihīn rí jeē ní catajǎ ró vēji jíni Epafrodito. Te jeē ní catajǎ ró cúu nájnūhun ñin ofrenda jeē asín jeén, ni casocō rō nuū Yaā Dios, te cúsiī ni yā jíni. <sup>19</sup> Te Yaā Dios chi cuāha ya nuū rō tāca jeē cúmani nuū rō, chi cúcá ndasí yá jíni tāca jeē váha jeē lúu íyó núū Cristo Jesús. <sup>20</sup> Te na cáhán yō jeē yóhyo luu cújēhnu Tátá yō Yaā Dios níí cáni. Amén.

*Saludo jeē sándihí*

<sup>21</sup> Cachi rō nuū tāca ñáyuu maá yá jeē sándeyí ni i, áchí rí, chi cácanǎje i Jesucristo. Te hermano yō cáyūcu jíni rí yáha, cácahān de jeē sándeyí ni rō jijnáhan ró. <sup>22</sup> Te tāca ñáyuu maá yá jeē cáhīyo yáha, suni cácahān i jeē sándeyí ni rō. Te ñayuu cáyūcú vehe rey cújēhnu ñuu Roma yáha, máá i cácahān gā súcuan.

<sup>23</sup> Te ñúhun ni rí jeē maá Jítoho yō Jesucristo, na sáha ga yā jeē váha róhó jijnáhan ró. Súcuan na cóo. Amén.

## CARTA JEE NI TEE APOSTOL SAN PABLO NUU ÑAYUU ÑUU COLOSAS

1 Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū. Te jíin hermano yō Timoteo <sup>2</sup> cátee ri carta yáha cuájeē nuū rohó ñayuu ñuu Colosas, jeē cácuu ró ñayuu maá yá jeē cácañdije vāha nuū Cristo. Te cáñuhun ni rí jeē Tatá yō Yaā Dios na sāha ga yā jeē vāha rohó, te sāha ya jeē coo ndeyí coo sīi ni rō.

*Jeē jicān tahú Pablo jehē ñayuu cácañdije*

3 Te jeē cájicān tahú ri nuū Yaā Dios, Yaā cúu Tatá maá Jítoho yō Jesucristo, te níní cáncuatáhú rí nuū yā jeē siquí rohó jíjnāhan ró. <sup>4</sup> Chi ni cajini jñuhun ri ndese vāha cácañdije ró Cristo Jesús, jíin ndese cácañdáhú ní ró táca ñayuu maá yá. <sup>5</sup> Chi cáñuhun ni ró nihín ró jeē ñuhun vāha nde andiví cuu ró. Chi ná ni cajini ró jñuhun ndaā jeē jñama ya rohó, te ni caquejéé ró ñuhun ni ró. <sup>6</sup> Te jñuhun un jéē ní canacani nuū ró, chí ndúcuehē cuahān te nihín jñíñu ní cáhnu ñayiví. Te suni súcuan ni sāha jíin rohó jíjnāhan ró ndé quiví ní cajini ró te ni cajecūhun ni ró jeē ndaā cúu jeē yóhyo vāha ni Yaā Dios jíin ró. <sup>7</sup> Te jñuhun un cúu jeē ní steén Epafras nuū ró, tēe sájniñu jíin rí jeē maní rí jíin. Chi cúu de tēe jéjñíñu squícu vāha nuū Cristo jeē ndíto de rohó. <sup>8</sup> Te máá de ni castūhun núu rí siquí rohó, ndese cácañdáhú ní ró jñahan ró sāha maá yá.

<sup>9</sup> Jeē yúcuun suni tu cájecuiví rí jeē cájicān tahú rí jehē ró, nde quiví ni nihín rí jñuhun ún te nde vijna. Te cájicān rí nuū yā jeē na jécūhun vāha ní ró te coo ndichí ró jíin jñuhun ya, sāha máá Espíritu, návāha cuni ró ndihi ndese nujnahan ni maá yá. <sup>10</sup> Te cájicān rí jeē caca ndaā ró nájñuhun cánuú caca ró jéē cácuu ró ñayuu maá Jítoho yō. Te súcuan te sāha ró ndihi jeē nujnahan ní yā, te nihín jñíñu ró jíin táca jñíñu vāha, te jecūhun ga ní ró ndese Yaā cúu Yaā Dios. <sup>11</sup> Te cájicān rí jeē cuāha ya fuerza ini ró, nájñuhun íyó fuerza maá yá jeē cújehnu luu ya. Te súcuan te cuu cuandeyí ní ró jíin táca-ni jñúndóho, te cusí teyí ní ró. <sup>12</sup> Te cuu nacuatáhú ró nuū Tatá yō, chí máá yá ní chíhi fuerza yohó jéē iin cáhnu-ni jíin táca ñayuu maá yá nihín yō tahū yō. Chí cájica yó jíin luz yá jeē yíhi yó ndaha ya. <sup>13</sup> Chí ní jñama ya yohó jéē ní yíhi yó ndaha máá jéē jñí poder nuū néé, te ní squívi ya yohó ndaha Séhe ya jeē maní yá jíin, ndácu ya jñíñu nuū yō. <sup>14</sup> Chí Séhe ya un ní jñama ya yohó jéē ní jíhi yā jehē yō, te ní ine cáhnu ní yā nuū cuéchi yó.

*Jeē ní sāha Cristo jeē ní ndāví yó núu jñuhun maní Yaā Dios jíin yó*

<sup>15</sup> Yaā Dios jeē tu cúu coto yó, ní sāha ya jeē ní quiji Séhe ya, te súcuan ní jito yó máá yá. Te Séhe ya ún, je íyó yá nde ná tu jecōo táca jéē íyó. <sup>16</sup> Chí jíin Séhe ya ní sāha Yaā Dios ndihi jeē ní jécōo, ndihi jeē íyó andiví jíin jéē íyó ñayiví, jeē jíni yō nuū jíin jéē tu jíni yō nuū. Te suni ní sāha ya táca ndajehé jeē cándacu jñíñu, jíin jéē cándiso jñíñu, jíin jéē cácujeñnu, jíin jéē cájnií poder. Jíin Cristo ní sāha Yaā Dios jeē ní jécōo ndihi, te jeē cúu Cristo cúu. <sup>17</sup> Te je íyó Cristo nde ná tu coo ndihi jeē íyó. Te ndaha máá yá yíhi vāha ndihi-ni. <sup>18</sup> Te máá yá cújehnu nuū ñayuu cácañdije, nájñuhun cújehnu xini nuū yiqui cúñu, chí nájñuhun yiqui cúñu yā cácuu i, cúu jeē iin na cúu i jíin yá. Te máá yá sāha jeē cotecu i ní cáni, te xíhna gā maá yá ní natecu méñnu ndívi, návāha cújehnu ya nuū táca-ni. <sup>19</sup> Chí ní cusí ní Yaā Dios jeē ndihi ndese cúu máá yá, suni súcuan cúu Cristo. <sup>20</sup> Te siquí jeē ní jíhi Cristo, te ní cusí ní Yaā Dios sāha ya jeē ndávicoo táca-ni nuū jñuhun maní yá jíin, táca jéē yúcu ñayiví jíin jéē yúcu andiví. Chí jíin jéē ní jíhi Cristo jíca cruz, te ní sāha Yaā Dios jeē ndávicoo táca-ni nuū jñuhun maní yá jíin.

<sup>21</sup> Te máá ró jíjnāhan ró, chí sín siquí ní cahíin ró ndé saá, te ní cajito uhū ró yā ini anuá ró, chí maní jñíñu néé ní casáha ró. Te vijna chí je ní sāha Yaā Dios jeē ní ndávicoo ró núu jñuhun maní yá jíin ró. <sup>22</sup> Súcuan ní sāha ya siquí jeē ní sócō Cristo maá yá ní jíhi yā, návāha coo ndoo coo i ró cuiñi ró núu yā, te ma coo jnéhén ró, te tú na cuéchi coo siquí ró. <sup>23</sup> Te súcuan sāha ya núu cuiñi nihín ró jéē cándije vāha ró, te núu quendōo nihín ró jíin jñuhun vāha jeē cáñuhun ní ró jeē jñama ya rohó, te ma siaá cuiñi ró. Chí jñuhun un ní cajini ró, te ní jite núu ní cáhnu ñayiví. Te ruhū Pablo suni jéjñíñu rí jeē nácani rí jñuhun ún.

*Jeē jéjñíñu Pablo siquí ñayuu cácañdije*

<sup>24</sup> Te vijna te cusí ní rí jeē ndóho rí jehē ró jíjnāhan ró. Chí jíin yiqui cúñu rí ndóho rí jeē cúmaní gā ndoho rí jíin Cristo jehē ñayuu cácañdije, suu ñayuu cúu nájñuhun yiqui cúñu yā. <sup>25</sup> Te cúu rí tēe jéjñíñu siquí ñayuu cácañdije, chí súcuan ní tejñíñu Yaā Dios ruhū, návāha nacani ndihi rí jñuhun ya nuū ró te quendōo vāha ró. <sup>26</sup> Te nácani rí jñuhun ya jeē ní yisáhi, jeē tu ní cájni ñayuu nde jehán ndasi te nde ní cáni véji. Te vijna te je ní steén cají yá jñuhun un núu ñayuu maá yá. <sup>27</sup> Chí ní cusí ní yā jeē steén yá nuū i ndese cúcúca ndasí i jíin ndihi jeē ndiso jñuhun sāhi yāha jéē lúu cújehnu, te cuiñe núu quihín nuū táca nación jeē tu jíin. Te jñuhun sāhi yāha cúu jeē ndeé Cristo ini anuá ró, ndúu yá jíin ró, te jeē yúcuun cáñuhun ní ró táca jéē lúu jéñnu jeē coo.

<sup>28</sup> Te jñūhun Cristo un cūu jeē cānacani ri, te cástñhvī ni rī tāca ñāyuu, te cástéén rī jñūhun ya návāha jecūhun vāha ni i. Te sūcuan te ije vāha ni ndivii i jeē yñhi i ndaha Cristo Jesús. <sup>29</sup> Te siquī yūcuan cūu jeē sājñiñu ri, chi ndñhvī ni rī nācani ri jñūhun jín tāca fuerza Cristo jeē chindéé ñājñáhan ya jín rī.

## 2

<sup>1</sup> Chi cúní rī jeē na jecūhun ni rō ndese yōhoyo ndúcú ndéyí rī jehē rō, jín jéhē ñayuu ñuu Laodicea, jín ndé tāca ñāyuu jeē tu ní cājini cuiti nuū rī. <sup>2</sup> Chi cúní rī jeē coo ndeyí ni anuá i, te inuú-ni coyūco máni i, te jecūhun ndñhi ni i ndese yōhoyo cūcá i jín jñūhun jeē candíje nihin i. Chi cuni i ndese Yaā cūu Cristo, chi máá yá cūu jñūhun Yaā Dios jeē ní yísahí un. <sup>3</sup> Te ini Cristo yísahí tāca jñūhun jeē cucucá rō jín, suu jñūhun ndñchi jín jñūhun jécūhun ni. <sup>4</sup> Te jñūhun yāha cāhán rī jín rō jijnáhan rō, návāha ma stahú ni ñi i rōhó jín tāca jñūhun stáhú jée lúu cāhán. <sup>5</sup> Chi vésú ndeé jíca rī jín rō, te ñūhun ni rī rohó, te cúsñi ni rī jeē jini rī ndese cājica ndaā rō te cācandíje nihin rō Cristo.

<sup>6</sup> Núu sūcuan te nājñūhun ni cajatáhú rō jeē Jítho rō cūu Jesucristo, suni sūcuan na cáca ndaā rō jín yá. <sup>7</sup> Te na jñá vāha jñūhun ya ini rō, te na ije vāha rō jín jñūhun cācandíje rō yá, nājñūhun je ni cajini rō. Te níni nacuatáhú rō nuū Yaā Dios.

### *Jeē ndújeé yó sáha Cristo*

<sup>8</sup> Coto má cuāha rō jñūhun jeē stahú ni ñi ñayuu rohó jín jñūhun ndñchi jée tu jéñiñu, jín jñūhun ndúxi stáhú. Chi tu cācandíje i jñūhun Cristo, chi sa cācandíje i tāca jée tajnúni ñayuu, modo jeē castéén ini ñayívi yáha.

<sup>9</sup> Chi ndñhi ndese cūu máá Yaā Dios, suni sūcuan cūu Cristo. <sup>10</sup> Te ndñhi ndese cūu Cristo, suni sūcuan cūu rō jijnáhan rō, chi cáyihí rō ndaha ya. Te máá yá cújéñu nuū tāca jée cújéñu jín jée ndiso jñiñu andívi. <sup>11</sup> Te siquī jeē cáyihí rō ndaha ya, suu cūu jeē nājñūhun ni cuu rō circuncidar. Te jeē sūcuan ni sáha ya circuncidar rohó, chi nasūú ñi jñuní jeē yñhi yiqui cūñu rō cūu, chi sa suhva jeē ní sándoyo ya tāca cuéchi ni casáha rō jín modo neé máá rō. Chi sūcuan cūu jeē sáha Cristo circuncidar rohó. <sup>12</sup> Te jeē ní cajendute rō cūu nājñūhun jeē ní quindúji rō jín Cristo, te suni nājñūhun jeē ní natecu rō jín yá. Chi ni cacandíje rō jée jín poder Yaā Dios ni nastécu yā Cristo mēñhu ndáyi. <sup>13</sup> Chi ni cacuu rō nājñūhun ndñyi nuū yá siquī cuéchi rō, chi ná tu sáha ya circuncidar anuá rō nde saá. Te vijna te ni sáha Yaā Dios jeē cotecu rō ní cāni jín Cristo, chi ni ine cāhnu ni yá nuū tāca cuéchi rō. <sup>14</sup> Te nājñūhun jeē iyó ñi acta jeē jicán cuéchi siquī yó jeē ní stívi yó ley yá. Te ni ndahva yá acta

un, chi ni chunaa Cristo cuéchi yó jée ni jñhi yá jíca cruz. <sup>15</sup> Chi ná ni jñhi yá jíca cruz, te ni quende yá ndñhi poder tāca jéneé jée cācujéñu jín jée cājini poder. Te ni quende yá jeē tuá cújéñu, chi ni sáha ya jeē cuángoo nuū quindihyū, te sūcuan ni steén yá poder yá.

### *Na ndúcú yó jeē quéndoo vāha yó ndé andívi*

<sup>16</sup> Núu sūcuan te ma cuatáhú rō núu cācāhān ñayuu cuéchi siquī rō, siquī ñi jeē yéji rō chí siquī ñi jeē jñhi rō, chí jée tu nées ñi rō quiví víco jín quiví núcoso yó jín quiví ndetátú. <sup>17</sup> Chi tāca ley siquī un ní jéñiñu máá ndé ná tu quiji Cristo. Te vijna te ni quiji ya te tuá jini ñūhūn tāca ún. <sup>18</sup> Ma cuāha rō jñūhun jeē cási ni ñi ñayuu jeē nihín rō tahú rō. Chi cāchiñūhūn i tāca ndajéhé yá, te cācāhān i jeē sūcuan cásáha suchí i máá i. Te cācāhān i jeē cājini ndíje i jeé iyó ndaā jñūhun cānacani i, te tuú. Te sūcuan cásáha téyí saá-ni i máá i, chí cājini neé ni i. <sup>19</sup> Te tu cāhñi i jín Cristo, Yaā cújéñu nuū ñayuu cācuu nājñūhun yiqui cūñu yá chí ñi na cūu i jín yá. Chi máá yá scuéñu ya i jín jñūhun ya, te nduu inuú ni tāca i jeē cāhíje i cuahān i, nājñūhun ni jeni ni Yaā Dios.

<sup>20</sup> Núu sūcuan te nājñūhun jeē je ni cajihí rō jín Cristo, cūu jeē ní casiáá rō tāca jée tajnúni jeē castéén ini ñayívi. Núu sūcuan ¿te naun cásáha ga rō nājñūhun cásáha ñayuu ñayívi jée jéñdije rō tāca jée tajnúni i? <sup>21</sup> Chi cācāhān i: Ma quehé rō ma cāji rō jeē yáha chí jée yūcuan, ni ma jñá rō, áhí i. <sup>22</sup> Te máni jeē tajnúni ñayuu jín costumbre máá i cūu te tu nihín jñiñu jeē quéndoo ndaā ñayuu. <sup>23</sup> Te ndaā chí cājini ni i jeē jñūhun ndñchi cūu ún, chí sáha jín i jeē chññūhūn nihin i, jín jée sáha suchí i máá i, jín jée stóho i yiqui cūñu i. Te tu nihín jñiñu cuiti jeē casi tāca jñiñu neé jée cuní i sáha i.

## 3

<sup>1</sup> Núu sūcuan te nājñūhun ni natecu Cristo, suni sūcuan ni canatecu rō jeē ní cuu rō nājñūhun ndñyi ni sáha cuéchi rō. Te na cōndñhvī ni rō siquī tāca jée iyó andívi nuū ndeé Cristo lado vāha Yaā Dios nuū cújéñu ya. <sup>2</sup> Te na cāni ni rō siquī tāca jée iyó andívi, nasūu siquī jeē iyó ini ñayívi. <sup>3</sup> Chi nājñūhun je ni cajihí rō jín Cristo, te vijna chí nājñūhun cātecu rō jín yá andívi, chí cáyihí rō ini ndaha Yaā Dios. <sup>4</sup> Te quiví ndíji Cristo, Yaā sáha jeē cōtecu yó ní cāni, yūcuán na te suni quendacoo ndíjin máá rō jín yá, te cújéñu luu rō jín yá.

### *Ñayuu jíca jín modo cuní máá, jín ñayuu ní ndujeé*

<sup>5</sup> Núu sūcuan te casi rō tāca modo cuní máá rō jeē cāhíyo rō ini ñayívi yáha. Chi ma cáca jñéní rō, ma sáha rō jñiñu jñéhén,

ma ndiyo ni rō sāha ró táca jniñu néé, ma cutóó ró, ma ndiyo ni rō ndajniñu. Chi táca ndajniñu jeé ndiyo ni yō cúu nájñuhun ídolo yō jeé chiñuhún yō. <sup>6</sup> Chi siquī táca jniñu yáha cúu jeé cuāha Yaā Dios castigo xeēn nuū ñáyuu niñi ni nuū yā. <sup>7</sup> Te suni jín jniñu yáha ní cajica ró ndé saá, ná ni casáha ró súcuan. <sup>8</sup> Te vijna te na stóo ró táca jeé yáha: jeé quití ni, jeé xeēn ni, jeé sāha jniñu néé, jeé cahán ndeváha nuū jnánhan, jín jeé cahán táca jñuhun tú vāha. <sup>9</sup> Ma stahú ró jnánhan ró, chi yúcuan cúu modo maá ró jeé ní cajica ró jín ndé saá, te je ni castóo ró. <sup>10</sup> Te ni canduu ró ñáyuu jeé, cuandacu ró máa Yaā ni sāha róhó, te cuajecúhun vāha ni rō ndese Yaā cúu ya. <sup>11</sup> Te ñáyuu ní ndujeé tuá cúu i ñáyuu griego, ni ñáyuu hebreo, ni ñáyuu ni sāha circuncidar, ni ñáyuu tu ní sāha circuncidar, ni ñáyuu ñuu jicá, ni ñáyuu yucú jeé ní indaa néé, ni mozo jeé ní jeen ñáyuu, ni ñáyuu sájniñu cuenta maá, chi inuú cúu ndihí i nuú yā. Chi Cristo cúu Jitoho ndihí i, te ndéé yá iní anuá ndihí i, ndúú yá jín i.

<sup>12</sup> Chi ni nacáji Yaā Dios roho jijnánhan ró jeé cúu ró ñáyuu maá yá jeé maní yá jín. Núu súcuan te níni cundáhú ní rō jnánhan ró, te coo vāha ni rō jín jnánhan ró. Te coo suchí ni rō, te coo víta ní rō, te coo paciencia ni rō. <sup>13</sup> Cuandeyí ni rō jín jnánhan ró, te cone cáhnu ni rō nuú i te núu na vé ni sāha i nuú rō. Chi nájñuhun ni ine cáhnu ni Cristo nuú rō, suni súcuan sāha máa ró. <sup>14</sup> Te jeé cánuú gá cúu jeé cundáhú ndasí ní rō jnánhan ró. Chi yúcuan sāha jeé ndúu inuú ni rō te ije vāha ni rō jín jniñu vāha. <sup>15</sup> Te jñuhun coyúcu máni na cúnuú iní anuá ró sāha Yaā Dios. Chi ni cana ya roho jéé nduu ró ñin na ñáyuu jeé coyúcu máni rō. Te níni na nácuatáhú ró núu yā.

<sup>16</sup> Te scuáha vāha ró jñuhun Cristo návaha cunuú jñuhun ún iní anuá ró. Te stéén rō nuú jnánhan ró, te stáhví ni rō i jín táca jñuhun ndíchí yā. Te jín salmo jín himno, yaa ii jeé cahán jñuhun ya, na cátaлуу ró jeé nácuatáhú ró iní anuá ró nuú Yaā Dios. <sup>17</sup> Te táca jniñu sāha ró, núu jeé cahán ró chí jeé sāha ró cúu, ndihí na sāha ró jeé ndujéhu sáhví máa Jitoho yō Jesús, te nacuatáhú ró núu Tatá yō Yaā Dios sāha ya.

*Ndese cánuú squícu ñáyuu cácandíje nuú jnánhan i*

<sup>18</sup> Róhó ñahan cácuu ñasihí, cuatáhú ró nuú yí ró, chí súcuan cánuú sāha ró siquī jeé candíje ró Jitoho yō. <sup>19</sup> Te róhó téé cácuu yí, cundáhú ni rō ñasihí ró, te ma cútucu ni rō jín ña. <sup>20</sup> Róhó séhe jijnánhan ró, táca-ni jniñu cuandíje ró núu tatá ró nuú naná ró, chí súcuan cúsi ni máa Jitoho yō. <sup>21</sup> Te róhó tátá jijnánhan ró, ma squítí ni rō séhe ró, návaha ma cucuíhá ni í. <sup>22</sup> Róhó mozo jijnánhan ró, táca-ni jniñu cuandíje ró núu patrón ró

ñayívi yáha. Ma sájniñu ndúxí ró jeé maá jeé coto de te cuajñuhun de róhó. Chi na sájniñu ndaa sájniñu ndíje ró, te conso íyo ró núu Yaā Dios. <sup>23</sup> Te táca jniñu sāha ró, na cúsi ni rō sāha ró, te na cáni ni rō jeé nuú Jitoho yō cájejniñu ró, nasúu núu ñáyuu. <sup>24</sup> Chi jeé cájni rō jeé máa Jitoho yō cuāha ya cuehē tahū cuu ró ní cáni. Chi nuú máa Cristo cájejniñu ró, chí máa yá cúu Jitoho ró. <sup>25</sup> Te ñáyuu casáha jniñu néé, chí sa suhva ndutahú i siquī jeé ni sāha i. Chi tu sāha Yaā Dios cuenta ndese cúu ñin ñin ñáyuu, chí inuú sāha ya jín i.

#### 4

<sup>1</sup> Róhó patrón jijnánhan ró, vāha ndaa na sāha ró jín mozo ró. Te na núcúhun ni rō jeé suni iyó Jitoho maá ró, Yaā ndeé andívi.

<sup>2</sup> Te ndivii ró ma jécuiñí rō jeé jicán tahú ró, chí coo ndito ni rō jín, te nacuatáhú ró núu Yaā Dios. <sup>3</sup> Te suni cacán tahú ró jehē rí jijnánhan rí, jeé na sāha Yaā Dios jeé cóo ga modo nacani rí jñuhun, návaha cuu cahán rí jñuhun Cristo jeé ní yisáhi, jeé tu ní cájni ñáyuu jenahán. Te siquī jñuhun un cúu jeé íne rí vecáa. <sup>4</sup> Te cacán tahú ró jeé cuu cahán cají rí ndese cánuú cahán rí.

<sup>5</sup> Sāha yúcún vāha ró jín ñáyuu tu cácandíje. Ma cúhuun ni rō siquī i, chí condíhví ni rō scandíje ró i. <sup>6</sup> Te máni cahán vāha ró jín ñáyuu, te cahán rō jñuhun cuajniñu jeé quéndoo vāha i sāha. Te caní ni rō ndese vāha nastío cuñí rō jñuhun nuú ñin ñin i.

#### *Saludo jeé sándihí*

<sup>7</sup> Tíquico cúu ñin hermano jeé maní yō jín, te tēe squícu vāha chindéé ñájñahan jín rí cúu de, te jéjniñu de jín rí nuú máa Jitoho yō. Te máa de castúhün ndihí nuú rō ndese cuahán jniñu rí. <sup>8</sup> Jeé yúcuan ní tají rí de cuajeje de nuú rō jijnánhan ró, návaha cuni rō ndese cáhíyo rí jín jniñu, te coo ndeyí ni rō sāha de. <sup>9</sup> Te suni cuajeje Onésimo jín de, tēe cúu jnánhan máa ró jijnánhan ró. Te cúu de hermano jeé squícu vāha jeé maní yō jín. Te ndindúú de castúhün nuú rō ndese cuahán táca jniñu ichi cháha.

<sup>10</sup> Sándeyí ni rō jijnánhan ró, áhí Aristarco, tēe íne jín rí vecáa. Te suni súcuan cahán Marcos, ñani primo Bernabé. Te je ni ndacu rí jniñu nuú rō siquī Marcos, te núu ni jecondéhe de róhó te sāha vāha ró jín de. <sup>11</sup> Te suni súcuan cahán Jesús, tēe jeé suni nání Justo, jeé sándeyí ni rō. Te máa-ni de cácuu tēe hebreo cácandíje jeé chindéé ñahan cácanani jñuhun jín rí siquī ndese ndácu Yaā Dios jniñu. Te yóhyo ndeyí iyó ní rí casáha de.

<sup>12</sup> Sándeyí ni rō jijnánhan ró, áhí Epafra, tēe cúu jnánhan máa ró, te mozo Cristo cúu de. Te níni jicán tahú ndasí de jehē ró, jeé na cuñí niñin ró, te ije vāha ni rō jeé squícu vāha ró ndihí jniñu cúni Yaā Dios. <sup>13</sup> Chí cahán ndaa rí jeé yóhyo ndíhví ni de jehē ró jijnánhan ró,

jíin jéhē ñáyuu ñuu Laodicea jíin Hierápolis.

<sup>14</sup>Lucas, tēe cúu médico jeē maní yō jíin, suni cáhán de jeē sándeýí ni rō, te suni súcuan cáhán Demas.

<sup>15</sup> Cachi rō nuū tācá hermano ñuu Laodicea jeē sándeýí ni i, áchí rí. Te suni súcuan cahān rō jíin Ninfas, jíin táca ñáyuu cácandíje cándutútú vehe ña. <sup>16</sup> Te ná ni jíinu ni cacahu ró carta yáha, te suni tají ró na cáhu ñayuu cácandíje ñuu Laodicea. Te suni cahu máá ró carta jeē cuahán nuū ñáyuu Laodicea te ndiji nuū rō. <sup>17</sup> Te cachi rō nuū Arquipo jeē na ndúcú ndéýí de squícu de jniñu ní tee Jitoho yō siquí de, áchí rí.

<sup>18</sup> Ruhū Pablo, yāhá-ni cúu jeē tēe ri jíin ndaha máá rí, jeē sándeýí ni rō. Te nucūhun ni rō ruhū jeē íne ri vecāa. Te ñúhun ni rí jeē na sáha ga Yāa Dios jeē váha róhó jíjnáhan ró. Súcuan na cóo. Amén.

## CARTA HN JEE NI TEE APOSTOL SAN PABLO NUU ÑAYUU ÑUU TESALONICA

<sup>1</sup> Máá rí cúu Pablo jiín Silvano jiín Timoteo, te cátee rí carta yáha cuájeē nuū rohó ñayuu cácanđje ñuu Tesalónica, jeē cáyihí ró ndaha Tátá yō Yaā Dios jiín Jítoho yō Jesucristo. Te cañuhun ni rí jeē Tátá yō Yaā Dios jiín Jítoho yō Jesucristo, na sáha ga yā jeē váha róhó, te sáha ya jeē coo ndeyí coo sī ni rō jijnáhan rō.

*Ñayuu Tesalónica cúu i ñn ejemplo váha*

<sup>2</sup> Níní cánacuatahú rí nuū Yaā Dios jeē siquí rohó jijnáhan rō, te tu náa ni rí cacān tahú rí jehē rō jeē cájican tahú rí. <sup>3</sup> Te níní ndácunehen rí rohó núu Tátá yō Yaā Dios, jeē váha cásáha rō táca jniñu chí cácanđje rō, jiín jée váha cájejniñu rō núu yā chí maní rō jiín yá, jiín jée cájendeyí ni rō chí cañuhun ni rō jeē coo jeē váha sáha Jítoho yō Jesucristo. <sup>4</sup> Chí maní Yaā Dios jiín rō jijnáhan rō hermano, te cájini rí jeē ní nacáji ya rohó. <sup>5</sup> Chí ná ni canacani rí jñuhun nuū rō jeē jnáma ya rohó, te nasūu jée ní cáhān rí súcuan-ni, chí ni nacani rí jiín poder Espíritu Santo, te ni cacucáhnú váha ni rí jeē jñuhun ndaa cúu. Te cájini rō ndese ni casáha váha rí ná ni coyūcu rí jiín rō, chí ni nducú rí jeē quéndōo váha rō.

<sup>6</sup> Te róhó jijnáhan rō chí ni candacu rō ruhū, te suni ni candacu rō máá Jítoho yō. Chí ni cajetáhú rō jñuhun yá, te ni cacusí ni rō ni sáha Espíritu Santo, vésú ni cajito rō cuehē jñundóho siquí ún. <sup>7</sup> Te súcuan cácuu rō ñn ejemplo nuū ndihí ñayuu cácanđje jeē cáyūcú región Macedonia jiín Acaya jiñā. <sup>8</sup> Chí jeē siquí rohó jijnáhan rō cúu jeē ní jite núu jñuhun Jítoho yō, te nasūu máni Macedonia jiín Acaya, chí suni nñ cáhnu-ni ni jite núu jñuhun ndese cácanđje rō Yaā Dios. Te jeē yúcuan tuá jini ññhún jeē nácani máá rí jñuhun nuū i. <sup>9</sup> Chí sa máá i cánacani ndese ni cajetáhú váha rō ruhū ná ni jecoo rí nuū rō, jiín ndese ni castóo ro ídolo te ni quívicoo rō ndaha Yaā Dios, Yaā ndaa Yaā técu, jeē cuajniñu rō núu yā. <sup>10</sup> Te cánacani i jeē cándetu rō jée ichi ándiví ndiji Sēhe ya Jesús jeē ní nastécu yā. Te máá Jesús jnama ya yohó núu castigo xeēn jeē quíji.

*Jniñu jeē ni sáha Pablo ñuu Tesalónica*

## 2

<sup>1</sup> Chí cájini rō hermano, jeē tu ní jécoco cáhá-ni rí nuū rō. <sup>2</sup> Te cájini rō jeē ní castóho i ruhū te ni cacahān ndeváha i nuū rí ini ñuu Filipos. Te vésú súcuan te máá Yaā Dios ni chindéé ñáhán yá ruhū, ni sáha ya jeē ní iyo ndeyí ni rí, te ni jecoo rí ñuu rō ni canacani rí

jñuhun jeē jnáma ya rohó. Súcuan ni casáha rí vésú xeēn ni iyo jñundóho. <sup>3</sup> Te jñuhun ni canacani rí, nasūu jñuhun ni castívi rí cúu, ni nasūu jée nihín rí siquí rō, ni nasūu jée ní castáhú rí rohó. <sup>4</sup> Chí máá Yaā Dios ni jito ndee yá ruhū, te ni tejniñu ya ruhū jeē nácani rí jñuhun jeē jnáma ya rohó. Te jeē yúcuan cúu jeē cácahān rí. Te tu cácahān rí jñuhun jeē núnjahan ni ñayuu, chí sa jeē núnjahan ni Yaā Dios, chí máá yá jito ndee anuá rí. <sup>5</sup> Te cájini rō jeē tu ní cánducú rí cuajnúhún rí rohó ñn modo stahú, ni tu ní cácahān rí jeē cúsiñi rí jín rō náváha nihín rí xuhun rō. Te jini Yaā Dios jeē súcuan cúu. <sup>6</sup> Te ni tu ní cánducú rí jeē cuajnúhún rō ruhū, ni jeē cuajnúhún inga ñayuu ruhū, vésú súcuan cánuú coo núu, chí apóstol Cristo cácuu rí. <sup>7</sup> Chí sa suhva víta ní cacahān rí jiín rō, nájñuhun sáha ñahan ndéca yiquín jée yucún ndíto ña sēhe ña. <sup>8</sup> Te siquí jeē cácuandáhú ndasí ni rí rohó, jeē yúcuan ní cacondihví ni rí nacani rí jñuhun váha Yaā Dios nuū rō. Te nasūu máá yúcuan-ni, chí suni nde vida rí cuáha rí jeē siquí rō nuú, chí yóhoy maní rí jiín rō. <sup>9</sup> Te cánahan rō hermano, jeē tú ni ñn rō ní stáhān rí jeē cacān rí nuū rō ná ni canacani rí jñuhun váha Yaā Dios nuū rō. Chí ni canducú ndeyí rí ni casájiniñu ndasí rí siquí jeē cótecu rí. Te nduú ñuu ni casájiniñu rí.

<sup>10</sup> Máá rō cájini rō, te suni Yaā Dios jini yá ndese ndaa ndoo ni cajica rí nuū rohó ñayuu cácanđje. Te ni ñn tu cúu cahān cuēchi siquí rí. <sup>11</sup> Te suni cájini rō ndese ni castívi ní rí ná ñn ná ñn rō, te ni cacahān rí jñuhun ndeyí ni jiín rō, nájñuhun sáha ñn tátá jiín sēhe de. <sup>12</sup> Te ni cacahān nihín rí jiín rō jeē na cáca ndaa rō nuū Yaā Dios nájñuhun cánuú caca rō. Chí ni cana ya rohó jée quíngoo rō nuū ndácu ya jniñu, nuū luu cujéhnú rō jiín yá.

<sup>13</sup> Te jeē yúcuan níni nácuatáhú rí nuū Yaā Dios, chí ni cajetáhú rō jñuhun ya jeē ní canacani rí. Chí ni cajini rō jeē násūu jñuhun ñn tēe cúu, chí jñuhun Yaā Dios cúu. Te máá jéndaá jeē jñuhun un sájniñu ini anuá rohó ñayuu cácanđje nde ndacu rō yá. <sup>14</sup> Hermano, ñayuu ñuu rō ni cajito xeēn i róhó, te súcuan ni candoho rō nájñuhun ni candoho ñayuu cácanđje cáyūcú región Judea jeē cáyihí ndaha Yaā Dios jiín Cristo Jesús. Chí nájñuhun ni candoho i ni sáha jnánan i ñayuu hebreo, suni súcuan ni candoho rō. <sup>15</sup> Chí suu ñayuu hebreo ni cajehni de máá Jítoho yō Jesús, nájñuhun ni cajehni de táca tēe ñuu de jeē ní canacani jñuhun ya nde jenahán. Te suni nde ruhū jijnáhan rí ni cascúnu de. Te cásáha de jniñu jeē tu núnjahan ni Yaā Dios, te cúu de contra siquí táca ñayuu. <sup>16</sup> Chí jésicoo de jeē ma nácani rí jñuhun nuū ñayuu táca nación jeē tu jini, náváha tú cácu i. Te súcuan sáha de jeē nducuehē gá cuēchi siquí de. Te vijna te



yachī quiji quivī jeē cuāha Yaā Dios castigo xeēn nuū de.

*Jeē cunī Pablo quicōndéhé tucu de ñayuu Tesalónica*

<sup>17</sup> Hermano, ni cacujiyo ri ñn núnúu-ni nuū rō jijnáhan rō. Te vēsú tu cájito jnánhan yó, te níní cáñuhun ni rī rohó. Te yóhoyo ni cacuu ni rī ndacoto ri nuū rō jijnáhan rō. <sup>18</sup> Te jeē yúcuan ní cajeni ni rī jecoo ri nuū rō nuū. Te ruhū Pablo, tijni jínu ni nducú rī modo jeē rī, te Satanás ní jesi ichi ri jijnáhan rī. <sup>19</sup> Chi tuá na inga cáñuhun ni rī, te tuá na inga cácusī ni rī, chi suu máá rō jijnáhan rō. Te jeē siquī máá rō cúu jeē nihín rī premio rī te cusī teyī ni rī cuiñi yó nuū máá Jítoho yō Jesucristo quivī ndjiji ya. <sup>20</sup> Suu jeē siquī rohó cúu jeē cácusī teyī ni rī.

### 3

<sup>1</sup> Te jeē yúcuan tuá ni cáanda ri condetu ri nde nihín rī jñuhun ndese cáhiyo rō. Te ni casánda rī jeē quéndōo máá-ni ri ñuu Atenas. <sup>2</sup> Te ni catajī rī hermano yō Timoteo, tēe jéñiñu jín rī nuū Yaā Dios siquī jñuhun jeē jñama Cristo yohó. Te ni jecōndéhé de rōhó návaha sáha de jeē cuiñi nihín rō te coo ndeyī ni rō jín jñuhun cácandje rō. <sup>3</sup> Te ni jeē de návaha ma náyūhú ni ñn rō siquī táca jñúndóho jeē sáha ñayuu. Chi je cájini rō jeē súcuan cánuú ndoho yó. <sup>4</sup> Chi nde ná ni coyūco rī jín rō, te ni cacastūhun rī nuū rō jeē nihín nahín yó jñúndóho. Te je cájini rō jeē súcuan ni cuu, nájñuhun ni cacahan rī. <sup>5</sup> Te jeē yúcuan, náa tuá ni cánda ri condetu ri jeē nihín rī jñuhun ndese cáhiyo rō, te ni tajī rī de ni jeē de, návaha cunī rī núu cácandje nahín rō. Chi ni jeni ni rī á sanaa te jexeén jeē jito ndee yohó ní cundeyī jín rō, te naa cáhá-ni jñiñu jeē ní casáha rī jín rō.

<sup>6</sup> Te vijna chi je ni ndee Timoteo nuū rī jijnáhan rī jeē ní jéé de ñuu rō Tesalónica. Te ni nacani de jeē cácandje váha rō, te cácundáhú ni rō jnánhan rō. Te ni cachí de jeē cáñuhun ni rō ruhú, chi cáhiyo manī rō jín rī. Te cácuni rō ndacoto rō núu rī, nájñuhun cácuni rī ndacoto ri nuū rō. <sup>7</sup> Te jeē yúcuan ní candusī ni rī siquī jeē cácandje váha rō, hermano, vēsú xeēn iyó jñúndóho siquī rī. <sup>8</sup> Te vijna je ni cananihín ni rī, chi cáhiñ nihín rō jín máá Jítoho yō. <sup>9</sup> Núu súcuan te tu jínu cuiñi nacuatáhú rī nuū Yaā Dios jeē siquī rohó jijnáhan rō. Chi jito ya jeē cácusī ndasí ni rī jeē súcuan cáhiyo rō. <sup>10</sup> Te nduú ñuú cájicān tahú ndasí rī jeē ndácoto tucu ri nuū rō, te stéén gā rī na-ni jñuhun cúmani jecūhun ni rō siquī jñuhun cácandje yó.

<sup>11</sup> Te cácuni rī jeē máá Tátá yō Yaā Dios jín Jítoho yō Jesucristo, na núne ya ichi jeē cuu jecoo tucu ri nuū rō. <sup>12</sup> Te na sáha máá Jítoho yō jeē cuehē ndasí gá cundáhú ni rō jnánhan rō jín táca gá ñayuu, nájñuhun cácundáhú ni

rī rohó jijnáhan rō. <sup>13</sup> Te na sáha ya jeē íje ánuá rō jeē cuiñi nihín rō, návaha coo ndoo rō jéé ma cóo cuēchi rō núu máá Tátá yō Yaā Dios, quivī ndjiji Jítoho yō Jesucristo jín táca ñayuu yíhi ndaha ya.

*Siquī jeē caca ndaa yō modo jeē cúsi ni yā*

### 4

<sup>1</sup> Te vijna hermano, iyó inga jñuhun jeē cácahān ndahú rī jín rō te cáhān nihín rī jín rō, chi súcuan cunī máá Jítoho yō Jesús. Je ni castéén rī nuū rō ndese cánuú caca ndaa rō návaha cusī ni Yaā Dios. Te cácahān ndahú rī jín rō jeē sa víhyá gā na cáca rō súcuan.

<sup>2</sup> Chi je cájini rō na jñiñu ni candacu ri nuū rō jeē ní ndacu máá Jítoho yō Jesús. <sup>3</sup> Te cunī Yaā Dios jeē na cóo ndoo coo íi rō nuū yā, te ma cáca jení rō. <sup>4</sup> Te ná ñn ná ñn rō na cóndeca yíñuhún rō ñasihí máá rō, te súcuan caca ndoo rō. <sup>5</sup> Te ma sáha rō jñiñu néé jéé ndiyo ni rō jesihí, nájñuhun cásaaha ñayuu táca nación jeē tu cájini i jñuhun Yaā Dios. <sup>6</sup> Ni ñn rō ma sáha rō cuéchi jeē quénde rō ñasihí jnánhan rō. Chi máá Jítoho yō cuāha ya castigo xeēn nuū ñayuu casáha táca jñiñu súcuan, nájñuhun je ni cacahan nihín rī ni castūhun rī nuū rō. <sup>7</sup> Chi tu ní cána Yaā Dios yohó jéé sáha yó jñiñu jñéhén, chi sa jeē caca ndoo yó. <sup>8</sup> Núu súcuan te ñayuu jeē squéhichí jñuhun yáha, nasūu jñuhun ñn tēe squéhichí i, chi sa jñuhun Yaā Dios, Yaā ní jéhe Espíritu Santo nuū yó.

<sup>9</sup> Te tu jini ñuhún jéé tēe ri nuū carta yáha jéé coo manī rō jín táca hermano, chi je ní steén Yaā Dios nuū rō jeē coo manī rō jín jnánhan rō. <sup>10</sup> Te je cáhiyo manī rō súcuan jín táca hermano cáyūcu ní cáhnu Macedonia jñā. Te cáhān ndahú rī jín rō hermano, jeē sa víhyá gā na cóo manī rō jín i. <sup>11</sup> Te na cóndihví ni rō coyūcú nayúú rō, te ma cóndihví ni rō siquī ndese cásaaha jnánhan rō, chi condihví ni rō sáha rō jñiñu máá rō, nájñuhun ni candacu ri nuū rō. <sup>12</sup> Súcuan na sáha rō návaha ñayuu tu cándje, cuatáhú i rōhó, te suni ma cúmanī jeē cotecu rō.

*Siquī jeē ndjiji Jítoho yō*

<sup>13</sup> Suni cácuni rī, hermano, jeē na jécūhun ni rō jijnáhan rō siquī ñayuu cájihí, návaha ma cucuhíyá ni rō nájñuhun sava ga ñayuu jeē tu cáñuhun ni i jeē nátecu ndiyyi. <sup>14</sup> Chi nájñuhun cácandje yó jéé ní jñiñ Jesús te ní natecu yā, suni súcuan cácandje yó jéé nastécu Yaā Dios táca ñayuu ni cacandje nuū Jesús te ní cajihi.

<sup>15</sup> Jeē yúcuan cácastūhun rī ñn jñuhun jeē ní castūhun máá Jítoho yō nuū rī: Jeē yóhó jéé cátecu gā quivī ndjiji máá Jítoho yō, nasūu máá yó cosnúu jéé ndaa yó quihín yō. Chi xihna gā ñayuu je ni cajihí ndaa i quihín i. <sup>16</sup> Chi máá Jítoho yō nuu ya quiji ya ichi ándiví, te cana jee ya jeē máá yá ndácu jñiñu,

te cana jee ndajéhé cujéhu ga, te cucu trompeta Yaā Dios. Te xihna gā natecu tāca ndíyi jeē ní cacandíje Cristo. <sup>17</sup> Yūcuán na te yohó jeē cátecu gā yō quiví ndíji ya, suni ndonehen ya yohó jíin i, quihīn yō mēhñu vicó. Te naquijnáhan yó jíin máá Jítoho yō sava andiví. Te súcuan condee yō ní cáni jíin máá Jítoho yō. <sup>18</sup> Núu súcuan te jíin jnúhun yáha cahān ndeyí ni rō jíin táca jnáhan rō.

## 5

<sup>1</sup> Te tu jíni ñúhún jeē téé ri nuū carta yáha síquī cuiyā chí quiví jeē coo tācá un, hermano. <sup>2</sup> Chí je cájni vāha rō jéé ñn sanaa ni yō te quee quiví ndíji máá Jítoho yō, nájñuhun ñn sanaa ni yō te quíji ñacuñhá jecuáá. <sup>3</sup> Chí ná-ni cácahān ñayuu jeē nayúu-ni ñn te tú na jnúndóho coo, te ná-ni cácahān i súcuan te ñn sanaa ni i te quíji jnúndóho síquī i jeē náá i, te ma cácu cuií i. Chí quíji quiví un nájñuhun ñn sanaa-ni te quejéé jéhdē chíji ñn ñahan scácu sēhe. <sup>4</sup> Te rōhó hermano, tu cácu rō ñayuu cájica nájñuhun nuū néé jeē ñn sanaa-ni te quíji quiví un síquī rō nájñuhun quíji ñacuñhá. <sup>5</sup> Chí ndíhi rō cácu ñayuu jeē nájñuhun cájica rō nduú, chí stéén luz yā ñni anuá rō. Chí tu cácu yó nájñuhun ñayuu jeē tu jécūhun ni síquī Yaā Dios, jeē nájñuhun cájica i nuū néé. <sup>6</sup> Núu súcuan te ma cūhuun ni yō nájñuhun ñayuu cáquixí, chí sa ndito na cóo ni yō te coo cáji xíní yō. <sup>7</sup> Chí jecuáá cúu jeē cáquixí ñayuu, te suni jecuáá cúu jeē nájñi i. <sup>8</sup> Te máá yó chí nájñuhun jeē cájica yó nduú, te na cóo cáji xíní yō. Te na cúcutú yó jíin jnúhun cándíje ñihin yó jíin jnúhun cūndáhú ni yō jnáhan yó, nájñuhun cúcutú soldado jíin sahna cáa. Te na cúcutú yó jíin jnúhun jeē cáñuhun ni yō jeē cácu yó, nájñuhun cúcutú soldado jeē ñúhun lélú cáa xíní de. <sup>9</sup> Chí Yaā Dios tu ní jéni ya yohó jéé cuáha ya castigo yohó, chí sa suhva jeē jnama ya yohó sáha máá Jítoho yō Jesucristo. <sup>10</sup> Te máá yá ni jihí yā jehé yō, návāha cotecu inuú yó jíin yá, vēsú núu cotecu gā yō ñayívi yáha chí cúu yō. <sup>11</sup> Núu súcuan te cahān rō jnúhun ndeyí ni jíin táca jnáhan rō, te scuéhu jnáhan rō jíin jnúhun ya, nájñuhun je casáha rō.

### *Jeē jéni ichí Pablo táca hermano*

<sup>12</sup> Te cácahān ndahú rí jíin rō hermano, jeē cuatáhú rō téé cájeññu cándito rōhó, jeē cácujeéhu de nuū rō jíin jñiñu máá Jítoho yō, te cájeni ichí de rōhó. <sup>13</sup> Te coo yíñúhún ndasí rō nuū de, te coo maní rō jíin de síquī jñiñu ya jeē casáha de. Te na cóyūcu mání rō jíin táca jnáhan rō.

<sup>14</sup> Te suni cácahān ndahú rí jíin rō hermano, jeē na stíhví ni rō ñayuu cájica cúxí. Te cahān rō jnúhun ndeyí ni jíin ñayuu jeē yachí ndínuu ni i. Te chindéé ñáhán rō ñayuu jeē tu fuerza ñni. Te cuandeyí ni rō jíin ndíhi ñayuu.

<sup>15</sup> Te coto má nasáha ndevāha rō jíin ni ñn ñayuu te núu sáha ndevāha i jíin rō. Chí máni jeē vāha nducú rō sáha rō jíin táca jnáhan rō jíin ndíhi-ni ñayuu.

<sup>16</sup> Níní na cóo sñ ni rō jijnáhan rō. <sup>17</sup> Te níní na cácan tahú rō. <sup>18</sup> Te nacuatáhú rō jeē síquī tācá-ni. Chí súcuan cúni Yaā Dios jeē sáha rō jéé cácañíje rō Cristo Jesús.

<sup>19</sup> Te ma cási rō nuū jñiñu jeē sáha Espíritu Santo jíin rō. <sup>20</sup> Te ni ma cujéé ni rō nuū jnúhun cácahān téé cánacani jnúhun Yaā Dios. <sup>21</sup> Chí coto ndee rō táca jnúhun, te núu jeē vāha cúu, te cuatáhú rō. <sup>22</sup> Te ma quiví nduu rō jíin ni ñn jñiñu néé.

<sup>23</sup> Te máá Yaā Dios jeē jéhe jnúhun ndeyí sñ ni, ñúhún ni rí jeē sáha ndíhi ya jeē cóo ndoo coo ñi rō nuū yá. Te ñúhún ni rí jeē cóndito vāha ya anuá rō jíin jéé ñjñúni rō, jíin yíqui cúñu rō, návāha tú na cuéchi coo síquī rō quiví ndíji máá Jítoho yō Jesucristo. <sup>24</sup> Chí Yaā jeē ní cana rōhó, sáha ya ndíhi un jíin rō, chí síquī va jeē ni jéjñuhun ya.

### *Saludo jíin bendición jeē sándihí*

<sup>25</sup> Hermano jijnáhan rō, cacān tahú rō jehé rí jijnáhan rí.

<sup>26</sup> Te núu na cáhán rō jíin táca hermano, te techūhu yíñúhún rō ndaha i.

<sup>27</sup> Te cáhán ñihin rí jíin rō, chí súcuan cúni máá Jítoho yō, jeē na cáhu rō carta yáha nuū táca hermano.

<sup>28</sup> Te ñúhún ni rí jeē máá Jítoho yō Jesucristo na sáha ga yā jeē vāha rōhó. Súcuan na cóo. Amén.

## CARTA UU JEE NI TEE APOSTOL SAN PABLO NUU ÑAYUU ÑUU TESALONICA

<sup>1</sup> Máá rí cúu Pablo jiín Silvano jiín Timoteo, te cátee rí carta yáha cuájeē nuū rohó ñayuu cácardije ñuu Tesalónica, jeē cáyihí ró ndaha Tátá yō Yaā Dios jiín Jítoho yō Jesucristo. <sup>2</sup> Te cáñuhun ni rí jeē Tátá yō Yaā Dios jiín Jítoho yō Jesucristo, na sáha ga yā jeē váha róhó, te sáha ya jeē coo ndeyí coo sī ni ró jijnáhan ró.

*Jeē sándaā yā cuēchi quivī ndíji Cristo*

<sup>3</sup> Cánúú jee nini nacuatáhu rí nuū Yaā Dios jeē siquī rohó jijnáhan ró hermano. Chi súcuan iyó váha, chí yōhoyo váha cuahije ró jiín jñuhun jeē cácardije ró yá, te yōhoyo cuanducuehē jeē cácardáhú ní ró táca jñáhan ró. <sup>4</sup> Te jeē yúcuán cúu jeē cácusī teyí ní rí cánacani rí jñuhun ró núú táca grupo ñayuu cácardije nuū Yaā Dios. Chi váha cácardije ró, te váha cájendeyí ní ró jeē cájito xeēñ ñayuu rohó jiín jee cándoho ró táca gá jñúndóho. <sup>5</sup> Te jiín táca jee yáha chíhi ya cuenta jeē cácuu ró ñayuu váha jeē quívicoo ró ñuu nuū ndácu ya jñiñu. Chí siquī ñuu un cúu jeē cándoho ró. Te jeē súcuan chíhi ya cuenta siquī ró, yáha stéén nuū yō jeē váha Yaā cúu ya.

<sup>6</sup> Te suni iyó váha jeē nastóho ya ñayuu castóho róhó. <sup>7</sup> Te quivī ndíji Jítoho yō Jesús, quivī un sáha Yaā Dios jeē ndétatu róhó jee cándoho, te suni ruhú jijnáhan rí. Chí jiín yáñuhūn quiji Jesús ichi ándiví jiín táca ndajéhé yā jeē ndíso poder. <sup>8</sup> Te cuáha ya castigo nuū ñayuu jeē tu ní cájēhe i jñuhun cuni i ndese Yaā cúu Yaā Dios, te tu ní cájetáhú i jñuhun máá Jítoho yō Jesucristo jeē jnáma ya i. <sup>9</sup> Te ñayuu ún chi ndoho i ní cáni, chí cujiyo i nuū máá Jítoho yō, te ma cúu quívicoo i nuū lúu ndasí cújéhu ya jiín poder yā. <sup>10</sup> Súcuan sáha ya quivī ndíji ya jeē lúu cújéhu ya sáha ñayuu cácardije jeē yáhi ndaha ya. Te nahán naa ni i coto i nuū yā. Te suni súcuan róhó jijnáhan ró, chí ni cacandije ró jñuhun jeē ní canacani rí nuū ró.

<sup>11</sup> Te jeē yúcuán cúu jeē nini cájicān tahú rí jehé ró, jeē na cúu ró ñayuu váha jeē ní cana ya rohó. Te jiín fuerza yā na sáha ya jiín ró jeē squícu ró táca jñiñu váha jeē ní catee ní ró sáha ró siquī jeē cácardije ró. <sup>12</sup> Te súcuan te cújéhu máá Jítoho yō Jesucristo sáha ró, te suni cújéhu máá ró jijnáhan ró sáha ya. Chí Yaā Dios yō jiín Jítoho yō Jesucristo, súcuan cúu jeē sáha ya jeē váha yóhó.

*Jñuhun siquī máá téé sáha xeēñ cuēchi*

### 2

<sup>1</sup> Vijna te cahān rí siquī jeē ndíji máá Jítoho yō Jesucristo jiín jee ndutútu yó núu

yā. Cácahān ndahú rí jiín ró jijnáhan ró hermano, <sup>2</sup> jeē ma cuáha ró jñuhun sacá nuu cani ní ró, ní ma cunéé ní ró núu cácahān ñayuu jeē jé ní quee quivī ndíji máá Jítoho yō. Ma candije cuiti ró vesú núu cahān i jeē ní níhīn i iñ jñuhun siquī un núu Espiritu, chí iñ jñuhun jeē ní cáhān inga, chí núu cachi i jeē ruhú jijnáhan rí ní tají iñ carta jeē cahān súcuan. <sup>3</sup> Ma cuáha cuiti ró jñuhun jeē stahú ní iñ i róhó. Chí nde ná tu quiji quivī ún te xīhna gā ndunīhni ní cuehé ñayuu nuū yā, te quenda ndijin máá téé sáha xeēñ cuēchi, te téé jñáhnú ndetū cúu máá téé ún. <sup>4</sup> Chí téé jito uhú Yaā Dios cúu de, te ndonda de contra siquī táca jee casnání i yā i jiín táca jeē cáchiñuhún i. Te xeēñ gā sáha de, chí nde cucōo de ini templo Yaā Dios jeē iyó Jerusalén, te cahān de jeē máá de cúu Yaā Dios.

<sup>5</sup> ¿A cánahān ró jñuhun yáha? Chí súcuan ní cahān rí jiín ró ná ní iyo rí jiín ró. <sup>6</sup> Te je cájini ró ndé vé cúu jeē jési jeē ná tu quenda ndijin téé ún, chí nde na quee quivī máá de. <sup>7</sup> Chí je jicu sáhi táca cuēchi xeēñ ini ñayiví, te vijna chí iyó jee jési nuū, návaha ma cáa ndasí gá cuēchi, chí nde na cújiyo máá jee jési nuū. <sup>8</sup> Te sáá te quenda ndijin máá téé xeēñ ún. Te máá Jítoho yō Jesús cahni ya téé un jiín táchī yuhu-ni ya, te jiín jee ndíndee yá ndiji ya te snáhnú ndetū yā de. <sup>9</sup> Te jeē quiji téé xeēñ ún chí máá Satanás sáha. Te quiji de jiín cuéhē poder, te sáha de táca jñiñu jéhu jeē stahú de, jeē nahán naa ní ñayuu coto i. <sup>10</sup> Te jiín táca jñiñu neé te stáhu ndasí de ñayuu jeē jñahnú ndetū, chí tu ní cúní i cuatáhú i jñuhun ndaā jeē cácu i núu. <sup>11</sup> Te jeē yúcuán cuáha Yaā Dios jñuhun jeē cuatáhú i jñuhun jeē tú ndaā cuiti, te candije i jñuhun stahú un. <sup>12</sup> Te súcuan te jecondee cuēchi siquī ndíhi i jeē tu ní cácardije i jñuhun ndaā, chí sa jñiñu neé ní cacusi ní i jiín.

*Ñayuu jeē ní nacāji ya jeē cácu i*

<sup>13</sup> Te cánúú jee nini nacuatáhu rí jijnáhan rí nuū Yaā Dios jeē siquī rohó jee cácu ró hermano jeē maní Jítoho yō jiín. Chí nde ná ní jecōo ñayiví, te je ní nacāji Yaā Dios rohó jee jnáma ya rohó. Chí sáha Espiritu yā jeē cáhíyo ndoo cáhíyo i ró nuū yā te cácardije ró jñuhun ndaā. <sup>14</sup> Chí jeē yúcuán ní cana ya rohó jiín jñuhun jeē jnáma ya yohó jeē ní canacani rí, návaha quívicoo ró núu cújéhu lúu ró jiín máá Jítoho yō Jesucristo.

<sup>15</sup> Núu súcuan te cuifi níhni ró hermano, te conahán váha ró jñuhun jeē ní cacutūhva ró núu rí, núu jeē ní cacahān rí chí jee ní tee rí nuū carta. <sup>16</sup> Máá Jítoho yō Jesucristo jiín Tátá yō Yaā Dios ní cundáhú ní yā yohó, te ní sáha ya jeē coo sī ní yō ní cáni, jiín jee ñuhun ní yō táca jee váha jeē coo siquī jeē váha ní yā jiín yó. <sup>17</sup> Te na sáha ga yā jeē cóo ndeyí ní anuá ró jijnáhan ró, te na sáha ya jeē ije ró

cahān rō tāca jnūhun vāha ya, te sāha rō tāca jniñu vāha.

*Jeē na cacān tahu i jehē de*

### 3

<sup>1</sup> Te íyó inga jnūhun cánuú, hermano. Na cacān tahu rō jehē rī jijnáhan rī, návāha yachī cuitē núu jnūhun máá Jítóho yō, te cuatáhú vāha ñayuu, nájñūhun ni cajetáhú máá rō. <sup>2</sup> Te suni cacān tahu rō jeē na cácu ri nuú tāca tée casáha néé jéé cátejñáhan jíin rī. Chi tú ndihi tée cacandíje jnūhun ya. <sup>3</sup> Te máá Jítóho yō chi vāha squícu ya jeē ni jéjnūhun ya, te sāha ya jeē íje ni tāca rō jíin jnūhun ya, te coto ya rohó núu jeneé. <sup>4</sup> Te cácucañhu ni rī sāha máá Jítóho yō, jeē cócuu rō jíin jniñu jeē ní candacu ri nuú rō, te suni cocuu ga rō jíin. <sup>5</sup> Te ñūhun ni rī jeē máá Jítóho yō steén gā yā ndese coo maní gā rō jíin Yaā Dios nde jíin ini jíin ánuá rō, jíin jéé cuándeýí ni rō nájñūhun ni sāha Cristo.

*Jeē cánuú sájniñu yó*

<sup>6</sup> Te cándacu ri jniñu nuú rō hermano, chi súcuan ni ndacu máá Jítóho yō Jesucristo, jeē na cújiyo rō núu tācá hermano cájica cúxí te tu cájica vāha de nájñūhun ni castéén rī nuú rō. <sup>7</sup> Chi je cájini rō ndese cánuú ndacu rō rúhū jijnáhan rī, chi tu ní cájica cúxí rī ná ni cahíyo ri jíin rō. <sup>8</sup> Ni tu ní cáyeji rī staa ni ñn rō súcuan-ni, chi ni cachunaa rī. Chi sa ni canducú ndéýí rī ni casájniñu téýí rī nduú ñuú, návāha ma stáhān rī ni ñn rō. <sup>9</sup> Te vésú íyó derecho rī jeē cacān rī nuú rō nuú, te tu ní cájicān rī, chi súcuan ni casáha ri návāha cuu ri ñn ejemplo nuú rō ndese sāha rō jijnáhan rō. <sup>10</sup> Chi ná ni coyūcu rī jíin rō, te ni candacu ri jniñu yáha nuú rō: Núu ndé ñn ñayuu tu cúní i sájniñu i, te suni ma cáji i núu súcuan. <sup>11</sup> Chi ni canihīn rī jnūhun jeē cájica cúxí sava rō, te tu casájniñu rō, chi yāha yúcuan-ni sāha rō. <sup>12</sup> Te cándacu ri jniñu nuú rohó jéé casáha súcuan, te cástñví ni rī rohó jeē na cóo nayúú rō te sájniñu rō, návāha nihīn rō jeē cáji rō siquí jniñu sāha máá rō. Chi súcuan ndácu máá Jítóho yō Jesucristo jniñu.

<sup>13</sup> Hermano, ma ndínuu ni rō jijnáhan rō sāha rō tāca jniñu vāha. <sup>14</sup> Te nuu ndé ñn i tu jétáhú i jnūhun jeē cahán rī nuú carta yáha, te condēhe vāha ro ndé-ni i cúu, te ma quiijnáhan ga rō jíin i, návāha na cúcanu i te nacani ni i. <sup>15</sup> Te nasūu jéé cóto uhū rō i, chi sa cahān rō jíin i nájñūhun jíin ñani rō jeē na sájniñu vāha i.

*Bendición jeē sándihí*

<sup>16</sup> Te ñūhun ni rī jeē máá Jítóho yō, Yaā jeē jéhe jnūhun ndeyí sñ ni, níni na sāha ya jeē coo ndeyí coo sñ ni rō siquí tācá-ni, te coo ya jíin rō jijnáhan rō.

<sup>17</sup> Ruhū Pablo, yāhá-ni cúu jeē téé ri jíin ndaha máá rí jeē cahán rī jeē sándeýí ni rō

jijnáhan rō. Te súcuan jéhe ri firma nuú tāca carta rī, návāha cuni rō jeē carta máá rí cúu. Súcuan cáa letra rī. <sup>18</sup> Te ñūhun ni rī jeē máá Jítóho yō Jesucristo, na sāha ga yā jeē vāha rō jijnáhan rō. Súcuan na cóo. Amén.

## CARTA HN JEE NI TEE SAN PABLO APOSTOL NUU TIMOTEO

<sup>1</sup> Máá rí cúu Pablo, apóstol Jesucristo, chi Yaá Dios jeé jnáma yóhó, jín Jítoho yó Jesucristo jeé ññhun ni yó coto yó, ni catajé yá ruhú jeé nácani ri jññhun ya. <sup>2</sup> Te téé ri carta yáha cuájeé nuū rō Timoteo, chi cúu ndije rō nájnñhun sēhe ri siquī jeé ni scándije ri rohó. Te ññhun ni rī jeé Tatá yó Yaá Dios jín Jítoho yó Jesucristo, na sáha ga yá jeé váha rohó, te cundáhú ni yá rohó, te sáha ya jeé coo ndeyi coo sī ni rō.

*Jeé ma candije i táca jññhun stáhú*

<sup>3</sup> Ná ni quihin ri ichi jeé quihin ri Macedonia, te ni cahān ndahú rí jín rō jeé quéndō rō ñuu Efeso. Te suni súcuan cáhān rī jín rō vijna, návāha cahān ññhin rō jín sava ñayuu yúcuan jeé ma stéén i inga jññhun jeé tú ndaā. <sup>4</sup> Te ma cuatáhú i táca jññhun jeé cúu máá cuento-ni, jín jññhun jeé cahān siquī ndese vēji yucūn táca jí yó. Chi táca jéé yúcuan sáha jeé nahān cándajnñhun i siquī, te tu ndé jéjññú, te tu sáha jeé ije i squícu i nuū Yaá Dios siquī jññhun cácandije yó.

<sup>5</sup> Te ndácu ri jññú yáha chi cúní rī jeé na cundáhú ni i jñāhan i siquī jeé iyó ndoo iyó ndáā anuá i, te cácandije ndije i ya. <sup>6</sup> Te sava ñayuu chi ni cajica yátá i, te ni cascuíta i jññhun ya, ni quívicoo i nuū táca jññhun jeé tu ndé jéjññú. <sup>7</sup> Chi cácu ni i cuu i maestro ley yá, te ni tu cájecūhun ni i na jññhun cúu jeé cácahān i, jín na vé cúu jeé castéén ññhin i.

<sup>8</sup> Te jíní yó jeé iyó váha ley un, te núu jecūhun ni yó ndese jéjññú. <sup>9</sup> Chi cánúú sáha yó cuenta jeé tu ni jécōo ni ññ ley jeé siquī ñayuu ndaā, chi sa suhva siquī ñayuu jeé tu cájetáhú, jeé ññhi ni, jeé casáha jññú néé, jeé casáha cuéchi, jeé tu cáchiññhún Yaá Dios ni tu cácandije ley yá, jeé cájehni tatá jín náná, jín jéé cájehni ndiyi. <sup>10</sup> Te suni ni jécōo siquī ñayuu cájica jñéni, jín téé casáha ndiyi jín jñāhan yí, jín ñayuu casácuññá inga ñayuu, jín ñayuu castáhú, jín ñayuu cácahān ññhin jññhun yáá. Te ni jécōo siquī táca gá ñayuu jeé casáha jññú tu quíjnāhan jín jññhun ya jeé stéén ndaā váha. <sup>11</sup> Te jññhun ya un cúu jññhun yóhoyo jéhu jeé jnáma Yaá Dios yóhó. Te yóhoyo ndetū Yaá cúu ya. Te ni tejññú ya ruhú nácani ri jññhun ya.

*Jeé nácuatáhú Pablo siquī jeé ní cundáhú ni yá de*

<sup>12</sup> Te nácuatáhú rí nuū Jítoho yó Jesucristo, Yaá ni jēhe fuerza ini rī, chi ni quihin ya ruhú ni sáha ya jeé cuu squícu ri, te ni tejññú ya ruhú nácani ri jññhun ya. <sup>13</sup> Te súcuan ni sáha ya jín rí vēsú ni cahān ndevāha rí siquī

yá nde saá, te ni sáha ndevāha ri jín ññayuu cácandije, te xeēn ni sáha rí. Te vēsú súcuan te ni cundáhú ni yá ruhú, chi ná tu candije ri yá nde saá, te tu ní jécūhun ni rí na vé cúu jeé sáha rí. <sup>14</sup> Súcuan ni sáha Jítoho yó jeé váha ndasí jín rí. Te ni sáha ya jeé candije ri jín jéé cundáhú ni rí jñāhan ri siquī jeé ni quívi ri ndaha Cristo Jesús.

<sup>15</sup> Te ndaā ndije cúu jññhun yáha, te jeé cánúú candije ndihí ñayuu cúu: jeé ní quiji Cristo Jesús ini ññayívi návāha jnama ya ñayuu iyó cuéchi. Te ruhú cúu téé jeé vihyá gá ni sáha cuéchi. <sup>16</sup> Te ni cundáhú ni Yaá Dios ruhú, návāha jín ruhú jeé vihyá gá ni sáha cuéchi te stéén Jesucristo ndese yóhoyo ññe cáhnu ni yá. Te súcuan ni sáha ya jeé cúu ri ññ ejemplo nuū táca ññayuu candije ní cuahān yó, návāha ññññ tahú i cotecu i ní cáni. <sup>17</sup> Núu súcuan te ní cáni na cáhān yíññhún yó jeé yóhoyo luu cújéhu máá Yaá jeé cúu Rey siquī ndihí, jeé técu ní cáni, jeé tu náá cuítí. Te tu cúu coto yó nuū yá vijna, te máá ññ-ni ya iyó, te ndíchi yá. Amén.

<sup>18</sup> Nájnñhun sēhe ri cúu rō Timoteo, te jññú yáha téjññú ri rohó, jéé na ndúcú ndeyí rō siquī jññú váha. Te na cándije váha rō, te na cóo ndaā anuá rō. Chi nde saá je ni cacahān táca hermano jín jññhun Yaá Dios jeé súcuan condiso jññú rō. <sup>19</sup> Chi sava ñayuu tuá iyó ndáā anuá i nuū yá, te ni casnáā i jññhun cácandije i. <sup>20</sup> Himeneo jín Alejandro cúu uū téé ni casáha súcuan. Te je ni siaá rí de nuū Satanás, jeé stóho ún de, návāha jín jññndóho ún te cutúhva de jeé ma cáhān ndevāha ga de siquī Yaá Dios.

*Siquī ndese cacān tahú yó*

## 2

<sup>1</sup> Núu súcuan te xīhna gá ndácu ri jeé cacān tahú rō jehē táca ñayuu. Te cahān ndahú rō jehē i, te cacān rō na-ni na vé jíní ññhún i, te nacuatáhú rō nuū yá jeé siquī i. <sup>2</sup> Te cacān tahú rō jehē táca téé cácujehu jín jéé ndácu jññú, návāha sáha de jeé cuu coyucu váha yó te tú na jññndóho coo siquī yó, te cuu chíññhún váha yó Yaá Dios te sáha yíññhún yó jín táca-ni. <sup>3</sup> Chi yáha cúu jeé váha jeé núnjahan ni Yaá Dios, Yaá jnáma yóhó. <sup>4</sup> Chi máá yá cuní yá jnama ya táca ñayuu te cuní i ndese iyó jññhun ndaā yá. <sup>5</sup> Chi iyó ññ-ni Yaá Dios, te suni iyó ññ-ni Yaá jeé cahān jín Yaá Dios jehē ñayuu. Te Yaá un cúu máá Jesucristo jeé ní nduu téé. <sup>6</sup> Te ni socó yá máá yá ni jññí yá jeé ní chunaa yá cuéchi ndihí yó. Te ná ni quiji máá quívi ún, te ni quejéé ní canacani jññhun ún. <sup>7</sup> Te jeé siquī yúcuan ní jeni ya ruhú cúu ri apóstol jeé nácani ri jññhun ya, návāha stéén rí nuū ñayuu táca nación jeé tu jíní jññhun ya, jeé na cándije i jññhun ún te sáha i jññú ndaā.

Te siquĩ jeẽ candíje ri Cristo te ndaã cúu jeẽ cahán rĩ.

<sup>8</sup> Núu súcuan te cúnĩ rĩ jeẽ ndihi-ni lugar na cácan tahú táca té. Te na cóo ndoo ánuá de jeẽ ma quitĩ ni de ni ma tejnáhan de. <sup>9</sup> Te suni súcuan táca ñahan, na cási vâha ña máa ña nájñuhun cánuú, návâha ma cóo jñuhun canu. Te ma cóndihví ni ña jeẽ sâha luu ndasĩ ña xinĩ ña, chí jéẽ cuhun ña siquĩ oro chí perla chí sahna vâha ga. <sup>10</sup> Chí sa suhva na quéndõo luu ánuá ña jíin jniñu vâha sâha ña, nájñuhun cánuú sâha ñahan ndoo ánuá jeẽ cájejniñu nuũ Yaã Dios. <sup>11</sup> Te núu cáhiin ña jíin ñáyuu cascuâha jñuhun ya, te na cúnĩ nahín ña te cuatáhú ña. <sup>12</sup> Chí tu jéhe ri jñuhun jeẽ steén ñahan nuũ ñáyuu ndutútú, ni jeẽ ndácu ña jniñu nuũ té. Chí sa suhva na cúnĩ nahín ña. <sup>13</sup> Chí xihna gã Adán ni sâha ya, te sáa te ni sâha ya Eva. <sup>14</sup> Te tu ní stáhú jexeén Adán, chí sa suhva ni stáhú un ñasihĩ de, te ni sâha ña cuẽchi. <sup>15</sup> Te jeẽ scácu táca ña sêhe te coo vâha ña, te núu na quéndõo ña jíin jñuhun cándíje ña ya, jíin jéẽ cundáhú ni ña jñáhan ña, jíin jéẽ cóo ndoo ánuá ña, jíin jéẽ sâha yíñuhún ña.

*Ndese cánuú coo tẽe cándiso jniñu nuũ ñáyuu cácandíje*

### 3

<sup>1</sup> Ndaã cúu jñuhun yâha: Núu iin tẽe cúnĩ de condiso jniñu de condito de ñáyuu cácandíje, te vâha jniñu ndúcú de sâha de. <sup>2</sup> Núu súcuan te tẽe ndiso jniñu nuũ ñáyuu cácandíje, cánuú jeẽ ma cóo ni iin jeẽ nihín ñáyuu cuẽchi siquĩ de. Te na cóo iin-ni ñasihĩ de, te cájĩ coo ni de, te ndito coo xinĩ de, te sâha yíñuhún de. Te cánuú jeẽ ninĩ cuanúu de vehe nuũ ñáyuu cájica, te ninĩ stéén vâha de jñuhun ya. <sup>3</sup> Te ma cúu de tẽe nájini, te ma tejnáhan de, te ma ndiyo ni de xuhún. Chí sa suhva coo vâha ni de, te coo vítá ni de, te ma cutóó ni de siquĩ xuhun. <sup>4</sup> Te cánuú jéẽ na ndácu vâha de jniñu ini vehe de, te sâha de jeẽ squícu vâha sêhe de te coo yíñuhún i nuũ de. <sup>5</sup> Chí núu iin tẽe tu jíin de ndacu vâha de jniñu ini vehe de, ¿te ndese cuu condiso jniñu de nuũ ñáyuu cácandíje nuũ Yaã Dios? <sup>6</sup> Núu súcuan te tẽe ndiso jniñu nuũ ñáyuu cácandíje, ma cúu de tẽe jeẽ saá ní candíje, chí núu súcuan te sanaa te sánduxĩ de máa de, te inuú-ni cuẽchi jecondee siquĩ de jíin jéxeén. <sup>7</sup> Te cánuú cuu de tẽe jeẽ suni nde ñáyuu tu cácandíje, cuajñuhún i de, návâha ma nihín i cuẽchi siquĩ de, te ma cundeýĩ jexeén jíin de.

*Ndese cánuú coo tẽe cájejniñu mēhñu ñáyuu cácandíje*

<sup>8</sup> Te suni súcuan tẽe cájejniñu mēhñu ñáyuu cácandíje, cánuú jéẽ na cóo yíñuhún de, te na squícu de jíin jñuhun cahán de. Te ma cúu de tẽe nájini, te ni ma ndiyo ni de xuhún. <sup>9</sup> Te na cuñi nihin de jíin jñuhun cándíje yó jéẽ ni

yisâhi ndé jenahán, te na cóo ndoo ánuá de. <sup>10</sup> Te cánuú jéẽ xihna gã coto ndee rō de, te núu ni jini rō jeẽ tú na cuẽchi de, yūcuán na te cuu cuajñiñu de mēhñu ñáyuu cácandíje. <sup>11</sup> Te suni súcuan ñasihĩ de jíin ñahan ña, cánuú coo yíñuhún ña, te ma sajnuhún ña, te cájĩ coo ni ña, te squícu vâha ña táca-ni jniñu. <sup>12</sup> Te tẽe cájejniñu mēhñu ñáyuu cácandíje, na cóo iin-ni ñasihĩ de, te na ndácu vâha de jniñu nuũ sêhe de jíin nuũ ñáyuu vehe de. <sup>13</sup> Chí táca tẽe cájejniñu vâha mēhñu ñáyuu cácandíje, chí vâha quéndõo yíñuhún de, te nihín de modo jeẽ cajĩ gã nâcani de jñuhun Cristo Jesús jeẽ cácandíje yó.

*Jñuhun sâhi yá jeẽ cácandíje yó*

<sup>14</sup> Te vesú ñuhun ni rĩ cuajeẽ yachĩ rĩ coto jñáhan yó, te tẽe ri jñuhun yâha cuajeẽ nuũ rō, <sup>15</sup> návâha núu cucuéeé rĩ, te je jíin rō ndese cánuú sâha vâha ñáyuu cácuu sêhe Yaã Dios. Chí máa i cácuu ñáyuu cácandíje nuũ Yaã Dios, Yaã técu. Te máa i cásaña jeẽ iyó cutú jñuhun ndaã, chí cáhiin nihin i jíin. <sup>16</sup> Te jendaá ndije chí jéhuu ndasi cúu jñuhun yâha jeẽ cácandíje yó, jeẽ ní yisâhi ndé jenahán:

Yaã Dios ni steén yâ maá yá, chí ni nduu ya tẽe,

te Espiritu ni steén jeẽ iyó ndáa jniñu ni sâha ya,

te táca ndajéhé andivĩ ní cajito jniñu ní sâha ya.

Te ni jitẽ núu jñuhun ya nuũ ñáyuu táca naciõn,

te ni cacandíje ñáyuu ní ñáyiñi nuũ yá, te ni ndaa ya cuanuhun yá andivĩ.

*Siquĩ ñáyuu cájica yátá nuũ jñuhun cácandíje yó*

### 4

<sup>1</sup> Te cájĩ stéén Espiritu Yaã Dios jeẽ quivĩ cuándhi te coo sava ñáyuu caca yátá i nuũ jñuhun cácandíje yó. Te cuatáhú i táca jéẽ cácahan jñuhun stáhú jíin jñuhun ní castéén tachĩ. <sup>2</sup> Chí cuni nahín i jñuhun castéén tẽe cástáhú-ni, jeẽ tu cácahan ndaã de. Chí tẽe un ní cahije ndasi ni de jíin jñuhun stáhú, te tuá sâha jíin ánuá de jeẽ nâcani ni de. <sup>3</sup> Te cahán de jeẽ cuẽchi cúu jeẽ coo ñasihĩ té, te suni súcuan núu cajĩ ñáyuu sava ndeyu. Te ndeyu ún chí ni sâha Yaã Dios jeẽ cúu ñáyuu cácandíje jeẽ jíin jñuhun ndaã, návâha cajĩ i te nacuatáhú i nuũ yá. <sup>4</sup> Chí ndihi jeẽ ni sâha Yaã Dios, iyó vâha, te ma squexícó yó un iin, chí sa nacuatáhú yó te cajĩ yó. <sup>5</sup> Chí jíin jéẽ cáhu yó jñuhun Yaã Dios jíin jéẽ nâcuatáhú yó nuũ yá, te iyó ndoo ndihi-ni.

*Tẽe jéjniñu vâha nuũ Jesucristo*

<sup>6</sup> Te núu stéén rō jñuhun yâha núu táca hermano, núu súcuan te cuu rō tẽe jéjniñu vâha nuũ Jesucristo, te ije rō jíin jñuhun vâha ya jeẽ candíje rō, chí ni cutuhva rō te ndíquín rō. <sup>7</sup> Te ma quivĩ nduu rō jíin táca jñuhun jeẽ

cúu cuento-ni jeē cajúni cāhá ni ñayuu. Chi níni na scuáha ró ndese chiñúhún váha ró Yaā Dios. <sup>8</sup> Chi jeē scuáha yó ejercicio jeē cóo ndacuī yiqui cúñu yó, jecu-ni níhín jñíñu. Te jeē scuáha yó chiñúhún váha yó yá, suu yúcuau cúu jeē váha níhín jñíñu siquī tǎcá-ní, jeē cúu vida yáha jíñ vida quiji. <sup>9</sup> Te ndaā ndije cúu jñúhun yáha, te jeē cánuú candíje ndíhi ñayuu cúu. <sup>10</sup> Te jeē siquī yáha cúu jeē sájñiñu níhín yó siquī jñúhun ya te ndóho yó jéé cácahán ndeváha i nuū yó. Chi ñúhún ni yó jeē coto yó nuū maá Yaā Dios, Yaā técu. Te máa yá cúu Yaā jnáma tǎca ñáyuu, te ñayuu cácañdije jñúhun cúndáhú ni yá i, máa i cúu jeē jnáma ya.

<sup>11</sup> Tǎca jñúhun yáha cánuú jéé ndacu ró nuū i te stéén ró. <sup>12</sup> Ma cuáha ró jñúhun jeē cujéé ni ñi ñi i nuū ró siquī jeē suchí ró. Chi sa coo ró ñi ejemplo nuū ñáyuu cácañdije, jeē cúni i ndese váha cáhán ró, ndese váha sáha ró, ndese cúndáhú ni ró jnáhan ró, ndese cándíje ró, ndese iyó ndoo ánuá ró. <sup>13</sup> Te níni ndé ná tu jinū rí nuū ró, te condihví ni ró jeē cáhu ró tutu ñi nuū hermano cándutútú, jíñ jéé stihví ni ró i, jíñ jéé stéén ró nuū i. <sup>14</sup> Ma cúhuun ni ró jinū tǎhú jeē ni jéhe Yaā Dios nuū ró jeē nácani ró jñúhun ya. Chi tǎca tée jéñnu cándiso jñíñu nuū ñáyuu cácañdije, ni casóo de ndaha de xiní ró, te ni sáha Yaā Dios jeē ni cacahán de jeē súcuau condiso jñíñu ró.

<sup>15</sup> Núu súcuau te cocuu ró jíñ tǎca jñíñu yáha, te condihví ni ró jíñ, náváha cuni tǎca ñáyuu jeē váha íje ró cáhán ró jíñ. <sup>16</sup> Coo cuidado ró jeē caca ndaā ró jíñ jéé stéén váha ró jñúhun ya, te cuiñi níhín ró jíñ ndíhi. Chi núu súcuau sáha ró te quendóo váha ánuá maá ró jíñ ñáyuu chuhun ni jñúhun cáhán ró.

*Ndese sáha váha yó jíñ ñáyuu cácañdije*

## 5

<sup>1</sup> Ma cúxeēn ró nuū tǎca tée jéñnu, chi sa cahán váha ró jíñ de jeē ma stívi de, nájñúhun cáhán ró jíñ tǎtá ró. Te tǎca tée suchí, suni cahán váha ró jíñ de nájñúhun jíñ ñani ró. <sup>2</sup> Te suni súcuau cahán ró jíñ tǎca ñahan jéñnu, nájñúhun jíñ náná ró. Te suni súcuau jíñ tǎca ñahan súchí, nájñúhun jíñ cuáha ró, te yíñúhún ndajñúhun ró jíñ ña.

<sup>3</sup> Te ñayuu cácañdije na cuáha i jeē jíni ñúhún ñahan ni caquendóo ndáhú, te núu ni quendóo ndáhú ndíje ña jeé tú na ñayuu condito ña. <sup>4</sup> Chi ñi ñahan ni quendóo ndáhú, núu iyó séhe ña chí séhe chání ña jeé jéváha, te na cóto máa i ña. Chi cánuú cutúhva i jeé xihna gǎ nuū ñáyuu vehe i squícu i coto i. Te na nácoto i náná i tǎtá i siquī jeē ni cacondito ña i. Chi yáha cúu jñíñu váha jeē nújñahan ni Yaā Dios. <sup>5</sup> Te ñi ñahan ni quendóo ndáhú ndije jeé máa ñi na ña, ñúhun ni ña jeé maá Yaā Dios condito ya ña, te tu jécuiñi ña

jeé jícan tǎhú ña nduú ñuú. <sup>6</sup> Te sa suhva núu máni ndíhví ni ña siquī tǎca jéé cúñi ni maá-ni ña, yúcuán na te vésú técu ña, te nájñúhun je ni jíñi ña. <sup>7</sup> Jñíñu yáha ndacu ró nuū ñáyuu, náváha ma cóo cuéchi siquī i. <sup>8</sup> Te núu ñi ñayuu tu ndíto i jnáhan vehe i, te víhyá gǎ ñayuu ñi vehe i, núu súcuau te sáha i jñíñu jeé tu quiñáhan jíñ jñúhun cándíje yó, te cúu i ñi jeé neé gǎ vésú ñayuu tu cácañdije.

<sup>9</sup> Te ñahan viuda cuu quívi síhví ña nuū lista ñayuu jeé cáchindéé ñáhán ró jíñ xúhun, te núu je ni jíñu ña uní xico cuiyá, te núu ni íyo ñi-ni yí ña. <sup>10</sup> Te suni cánuú jéé cua-jñúhún ñáyuu ña jeé váha jñíñu ni sáha ña, núu jeé ni scuéñnu váha ña séhe ña, jíñ jéé ní jéhe núu ña vehe nuū ñáyuu cájica, jíñ jéé ní jeññíñu ña nuū hermano cácañdije, jíñ jéé ní chindéé ñáhán ña ñayuu cándoho jñíñúndóo, jíñ jéé ni sáha ña tǎca gǎ jñíñu váha.

<sup>11</sup> Te tǎcá ñahan viuda jeé iyó suchí gǎ, chi ma soó ró síhví ña nuū lista. Chi sanaa te nducú ña jeé cúñi ni maá-ni ña, te ma cóndihví ni ña siquī Cristo, chi cuu ni ña condeca tucu ña tée. <sup>12</sup> Te súcuau jeconde cuéchi siquī ña, chi tu ní squícu ña jeé ni jéñúhun ña ná ni jecosó síhví ña nuū lista. <sup>13</sup> Te suni cáca cuu ña tǎcá-ní vehe te quee cúxí ña. Te nasúu máni jeé cáca cúxí ña, chi suni siquī jeé sajnúhún ña, te quívi nduu ña cahán ña jñúhun jeé tu iyó váha jeé cahán ña. <sup>14</sup> Jeé yúcuau cúni rí jeé tǎcá ñahan viuda jeé iyó suchí, na nándáha ña, te scuéñnu ña séhe, te coto váha ña vehe ña, náváha ñayuu cácuu contra ma cúu cahán i siquī ña. <sup>15</sup> Chi sava ñahan viuda jeé ni cájica yátá ña te sáha ña jñíñu jeé cuni Satanás.

<sup>16</sup> Te núu ñi tée chí ñi ñahan cándíje, núu iyó ñahan viuda vehe i, te na cóto máa i ña. Te ma cóndee gasto ña siquī grupo ñayuu cácañdije, náváha cuu cuáha váha i nuū ñahan viuda jeé tu ndé ñi coto ña.

<sup>17</sup> Te tǎca tée jéñnu cándito ñayuu cácañdije, na jécunaá doble yáhu de, te núu cándihví ni de cástéén de cácanaci váha de jñúhun ya. <sup>18</sup> Chi cúu nájñúhun cáhán tutu ñi: Ma cánda stiquí caxín tí trigo, núu ma cuáha ró jéé cáji tí. Te suni cáhán: Tée jeé sájñiñu tǎtú, jíni ñúhún quiyáhu de, áchí.

<sup>19</sup> Ma cuajñúhún ró te núu jéquin ñayuu cuéchi siquī ñi tée jéñnu cándito ñayuu cácañdije te núu tu iyó úu chí úni testigo. <sup>20</sup> Te núu casáha ñayuu cuéchi, te cánuú cúxeēn ró nuú i, jíto jíñúñ ndíhi ñayuu, náváha na cónso íyo sava ga i. <sup>21</sup> Te cáhán níhín rí jíñ ró, jíto máa Yaā Dios jíñ Jítoho yó Jesucristo jíñ tǎca ndajéhé yá jeé ní nacáji ya: Squícu váha ró jñíñu yáha, te ma sáha ró cuenta ndese cúu ñi ñi i, chí inuú-ni sándaá ró siquī ndíhi-ni i. <sup>22</sup> Ma cáni yachí ró ñi tée jeé condiso jñíñu de nuū ñáyuu cácañdije, chí xihna gǎ coto ndee ró de. Chi sanaa te stívi de, te cuéchi de

suní condee siquī rō jín de. Te coto ró máá ró jeē ma quívi ró jín jniñu neé.

<sup>23</sup> Te siquī jeē núu-ni núu-ni chúh chiji ró, te ma cóho ga rō máni ndute, chí suní coho ró jecu vino.

<sup>24</sup> Cuēchi sava ñayuu chí je íyó ndijin nde ná tu quívi i nuū cúndaá cuēchi i. Te cuēchi sava ga i chí cúcuéé te natū nahín. <sup>25</sup> Te suní súcuan táca jniñu váha, chí íyó ndijin. Te vēsú ná tu natū jniñu váha ún, te ma cúu quisáhi ní cáni, chí natū nahín.

## 6

<sup>1</sup> Táca ñayuu cácuu mozo, na cóo yíñúhún váha i nuū patrón i, náváha ma cahán neé ñayuu siquī Yaā Dios jín siquī jñuhun ya jeē castéén yó. <sup>2</sup> Te mozo jeē yíhi nuū patrón cáandije, ma cáni ní i jeē cúhva-ni sáha yíñúhún i nuū de siquī jeē hermano cáandije cácuu de. Chí sa cuajniñu váha ga i nuū de, chí tēe cáandije tēe maní i jín cúu táca tēe un jeē sájniñu i nuū. Jñuhun yáha stéén rō te stíhví ní rō i.

*Siquī jeē chíñúhún váha yó yá te cusíi ni yó jín cúhva jeē névaha-ni yó*

<sup>3</sup> Te núu ndé tēe stéén de jñuhun tú ndaá jeē tu qujñahan jín jñuhun váha ndaá máá Jítoho yó Jesucristo, jín jñuhun ní stéén Yaā Dios jeē cáandije yó, <sup>4</sup> núu súcuan te máni tēe ndúxi tēe tu jécuhun cuíti ní cúu de. Chí cánéé xíní de, chí máni cúni de tejnáhan de siquī táca jñuhun stéén de. Te táca un sáha jeē cácuuésún ní, jín jéé cátejñahan, jín jéé cácahan ndeváha, jín jéé cájeni neé ní siquī jñahan, <sup>5</sup> jín jéé máni cástáhan jñahan. Súcuan cásaáha tēe jeē ní ndunéé xíní, jeē tu cájini jñuhun ndaá. Te cájeni ní de jeē nihín de cuehē xūhun siquī jñuhun cáandije de stéén de. Na cújiyo ró núu ñayuu cándaá súcuan. <sup>6</sup> Te jendaá jeé yóhvo váha quéndoo yó te núu chíñúhún váha yó yá, te núu cúsií ní yó jín cúhva jeē névaha-ni yó. <sup>7</sup> Chí tú na vé ní cácu yó jín ñayívi yáha, ní tú na vé condiso yó quíhín yó jín núu na cúu yó. <sup>8</sup> Te núu íyó jéé cáji yó jeē cusúcún yó, te na cúsií ní yó jín yúcuan-ni. <sup>9</sup> Chí ñayuu jeē cuní cucúcá, chí yachí quívi i cuēchi jeē jito ndee jexeén i. Te quívi i jín cuēhē jniñu cánéé jniñu stívi jéé ndíyo ní i. Te táca un sáha jeē tívi ñayuu te jñahnú ndetū i. <sup>10</sup> Chí jeé ndíyo ní yó xūhún, yúcuan sáha jeé quejéé táca jniñu neé. Te sava ñayuu jeé ndíyo ní xūhún, ní castóo i jñuhun cáandije i, te ní canihín i cuehē ndasí jñundóho.

*Jeē na ndúcu ndéyí yó siquī jñuhun cáandije yó*

<sup>11</sup> Te róhó chí tēe jéjniñu nuū Yaā Dios cúu ró, te cunu ró coto ró táca cuēchi yáha. Te condiquín rō jniñu ndaá, te chíñúhún váha ró Yaā Dios, te cándije váha ró, te cundáhu ní rō jñahan ró, te cuandeyí ní rō, te coo

vítá ní rō, <sup>12</sup> Te nducú ndéyí ró siquī jñuhun cáandije yó yá. Te cuiñi nihín rō jín jñuhun jeē ní nihín tahú yó cotecu yó ní cáni. Chí jeé yúcuan cúu jeé ní cana ya rohó, te cáji ní cahán rō jeé váha cáandije ró yá, jito jínúu cuehē ñayuu. <sup>13</sup> Te cahán nihín rō jín rō, jito máá Yaā Dios, Yaā jeé sáha jeé técu táca-ni, jín Jesucristo, Yaā jeé cáji ní cahán yá ní nacani ya jñuhun váha nuū Poncio Pilato. <sup>14</sup> Squícu váha ró jniñu ndácu ya nuū rō, te ma stívi ró sáha ró, náváha ma cahán ñayuu cuēchi siquī rō. Te súcuan sáha ró ní ndé quívi ndíji Jítoho yó Jesucristo. <sup>15</sup> Chí quíji ndijin yá máá quívi jeé ní jeni Yaā Dios. Te Yaā Dios chí máá ñn-ni ya cúu Yaā yóhvo ndetú, te jniñi ya ndihí poder. Te cúu ya Rey nuū táca rey, jín Jítoho nuū táca Jítoho. <sup>16</sup> Te máñúhún-ni ya cúu jeé íyó ní cáni. Te ndéé yá ñn lugar nuū ndí ndaxín, nuū ma cúu quívi yó. Te ní ñn ñayuu ñayívi yáha tu ní jito cuíti i nuū yá, te ní ma cúu coto i nuū yá. Te ní cáni na cóo yíñúhún yó nuū yá, chí jniñi máá yá poder ní cáni. Amén.

<sup>17</sup> Te cahán rō jín ñayuu cucá ndajniñu ñayívi yáha, jéé ma cúndúxi i. Te ma ténuú i xūhún i, chí yachí naa ún. Chí sa suhva na ténuú i jeé coo váha i sáha Yaā Dios, Yaā técu, chí máá yá jéhe cuehē yá táca-ni jeé cúsií ní yó jín. <sup>18</sup> Te ndacu ró jniñu nuū i jeé na sáha váha i, chí jeé sacúca ndije i máá i cúu jeé sáha i táca jniñu váha. Te na cúu i ñayuu váha ní jeé cuáha i jeé cúu jñahan i. <sup>19</sup> Te súcuan caya i cuehē jniñu váha jeé coo cucá i nuū yá ní tiempo jeé quíji. Te nihín tahú i cotecu i ní cáni.

*Jniñu sándíhi ndácu Pablo nuū Timoteo*

<sup>20</sup> Te róhó Timoteo, condito ró táca jniñu ní chíhi ya ndaha ró. Te ma quívi nduu rō jín táca jñuhun cáhá-ni, cuenta ñayívi yáha, jín táca jñuhun stáhu jéé cácahan i jeé jñuhun ndíchí ndáa cúu. <sup>21</sup> Chí sava ñayuu cándiquín táca jñuhun yáha, ní cajica yátá i ní castóo i jñuhun cáandije i ya.

Te ñuhun ní rí jeé Yaā Dios na sáha ga yá jeé váha róhó. Súcuan na cóo. Amén.



## CARTA UU JEE NI TEE SAN PABLO APOSTOL NUU TIMOTEO

<sup>1</sup> Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū jeē nácani ri jñuhun jeē ni jéjnūhun ya jeē cótecu yō ní cáni siquī jeē yíhi yó ndaha Cristo Jesús. <sup>2</sup> Te tée ri carta yáha cuájeē nuū rō Timoteo, chi cúu ro nájñuhun sēhe ri jeē maní ri jín. Te ñūhun ni rí jeē Tatá yō Yaā Dios jín Jítoho yō Jesucristo, na sáha ga yā jeē váha rōhó, te cundáhú ni yā rohó, te sáha ya jeē coo ndeyí coo sī ni rō.

### *Jeē nácani de jñuhun Cristo*

<sup>3</sup> Níní tu náa ni rí cacán tahú rí jehē rō nuū Yaā Dios nduū ñuu, te nácuatáhú rí nuū yā jeē siquī rō. Chi nuū maá yá jejniñu ri, nájñuhun ni casáha táca jí rí, te iyó ndoo ánuá rí nuū yā. <sup>4</sup> Te núcūhun ni rí jeē ni ndáhyū rō ná ni quenda ri cuahān rí. Te cúu ni rí ndacoto jñahan yó, náváha cusí ndasí ni rí. <sup>5</sup> Te núcūhun ni rí jeē váha ndije cándje rō Cristo, nájñuhun ni cándje náná jéhu rō Loida, jín náná rō Eunice xíhna gā. Te cúcáhu ni rí jeē suni súcuan cándje máá rō vjna.

<sup>6</sup> Te jeē yúcuan nástíhví ni rí rohó jée na cóndíhví gā ni rō jín táhū jeē ni jéhe Yaā Dios nuū rō jeē nácani rō jñuhun ya. Te tahū un ní nihin rō ná ni tee ri ndaha ri xíní rō. <sup>7</sup> Chi Espíritu jeē ni jéhe Yaā Dios nuū yō, tu sáha jeē yūhu yó nacani yó jñuhun, chi sa sáha jeē iyó fuerza ini yō, jín jée cundáhú ni yó jñahan yó, jín jée ndíto iyó xíní yō. <sup>8</sup> Núu súcuan te ma cúcanu rō nacani ndaā rō jñuhun máá Jítoho yō. Te suni ma cúcanu rō jeē siquī maá rí jeē íne ri vecāa siquī jñuhun ya. Chi sa cuáha rō jñuhun ndoho rō jín rí siquī jeē cánacani yó jñuhun jnáma ya yohó, núu ndese ni jéhe Yaā Dios fuerza ini yō. <sup>9</sup> Chi ni jnama ya yohó, te ni cana ya yohó jée coo ndoo ánuá yō cuajñíhu yó nuū yā. Te tu ní cána ya yohó siquī jeē váha ni sáha yó, chi siquī jeē ní tee ni maá yá jeē cundáhú ni yá yohó jée yíhi yó ndaha Cristo Jesús. Chi nde ná tu jecóo ñayíví, te je cundáhú ni yá yohó. <sup>10</sup> Te vjna jeē ní quenda ndijin Jesucristo, Yaā jnáma yóhó, te ni steén cají Yaā Dios jeē cundáhú ni yá yohó. Chi máá Cristo ni snáa yá poder cuehyí jéhi yóhó, chi jín jñuhun jnáma ya yohó ni steén cají yá nuū yō jeē cótecu yō ní cáni chi ma jnahnú ndetū yō.

<sup>11</sup> Te ní jeni Yaā Dios ruhū jeē nácani ri jñuhun ún, te ní tají yá ruhū cúu ri apóstol jeē steén rí nuū ñayuu táca nación jeē tu jíní jñuhun ya. <sup>12</sup> Te siquī un cúu jeē ndóho rí táca jñúndóho yáha íne ri vecāa. Te tu cúcanu rí, chi jíní rí ndese Yaā cúu Yaā cándje rí, te

cúcáhu ni rí jeē cúu coto ya jniñu jeē ní chihi ya ndaha ri nde vjna te nde quíví ndíji ya.

<sup>13</sup> Te cuiñi nihin rō jín táca jñuhun ya jeē steén ndaā, suu jñuhun jeē ni steén rí nuū rō. Te caca rō jín jñuhun cándje yó, te cundáhú ni rō jñahan rō siquī jeē yíhi rō ndaha Cristo Jesús. <sup>14</sup> Te condito rō táca jniñu váha jeē ní chihi ya ndaha rō, sáha poder maá Espíritu Santo jeē ndeé ini yō.

<sup>15</sup> Je jíní rō jeē táca ñayuu cáyūcu Asia ni castóo i ruhū. Te uu i cúu Figelo jín Hermógenes. <sup>16</sup> Te jícán tahú rí jeē cundáhú ni Jítoho yō ñayuu vehe Onesiforo, chi cuehē jínu ni nanihín ni rí ní sáha de, te tu ní cúcanu de siquī rí jeē ní ine ri vecāa. <sup>17</sup> Chi sa suhva ná ní quiji de ñuu Roma, te ni nanducú yúcun de ruhū nde ni nanihín de ruhū. <sup>18</sup> Te jícán tahú rí jeē máá Jítoho yó cundáhú ni yá de quíví ndíji ya. Te je jíní váha máá rō ndese yóhoyó ni chindéé ñáhán de ruhū ná ni cahíyo rí ñuu Efeso.

### *Jeē cúu yó nájñuhun soldado váha nuū Je-sucristo*

## 2

<sup>1</sup> Núu súcuan te rōhó, séhē mání, na cóo fuerza ni rō siquī jeē yíhi rō ndaha Cristo Jesús te sáha ya jeē váha rōhó. <sup>2</sup> Te táca jñuhun jeē ní jini rō ní cahān rí, jito jínúu ñayuu cuehē, jñuhun ún na nástéén rō nuū tēe cásquícu váha, náváha suni cuu steén tucu máá de nuū sáva ga í.

<sup>3</sup> Te rōhó na cuandeyí ni rō coto rō jñúndóho, chi cúu rō nájñuhun ñn soldado váha nuū Jesucristo. <sup>4</sup> Ni ñn soldado jeē ñn nuū guerra, tu sájñeñu de máá de jín jniñu máá de, chi cánuu jeē sáha de mání máá jée ndácu tēe ní tejniñu de. <sup>5</sup> Te suni súcuan tēe cásquícu deporte, ma nihín de premio te núu tú condíhví ni de cosíquí váha de máá modo chíjñiñu. <sup>6</sup> Te tēe sájñiñu nihin ñuhun, máá de cúu jeē nihín xíhna gā jeē cuáha itu. <sup>7</sup> Nacani ni rō siquī jeē cahān rí, te máá Jítoho yó sáha ya jeē jécūhun ni rō siquī ndíhi.

<sup>8</sup> Te cocuhun ndasí ni rō Jesucristo, Yaā ní quiji yucūn rey David, te ni natecu yá mehñu ndíyí, nájñuhun cahān jñuhun jnáma ya yohó jée nácani rí. <sup>9</sup> Te jeē siquī jñuhun un ndóho rí jñúndóho, te nde ní cajíhni i ruhū íne ri vecāa nájñuhun ñn tēe ni sáha cuéchi xeén. Te jñuhun Yaā Dios chi ma cúu cuhni i jeē ma cuité núu. <sup>10</sup> Núu súcuan te jéndeyí ni rí jito rí táca jñúndóho yáha siquī jeē cundáhú ni rí ñayuu jeē ní nacáji ya, náváha suni cácu máá i jeē quíví i ndaha Cristo Jesús, te quíhni i nuū cujéhu i ní cáni. <sup>11</sup> Chi ndaā cahān jñuhun yáha:

Núu vésú na cúu yō jeē siquī yá, te suni cotecu yō jín yá,

<sup>12</sup> te núu cuandeyí ni yó ndoho yó, te suni ndacu yó jniñu jín yá.

Te núu ma cuajnúhún yó yā, te suni ma cuajnúhún yá yohó.

13 Te vēsú tu squícu vāha yó, te máá yá chi máni squícu ya,

chi tu cúu sáfalta yā, chi squícu ya jeē ni cāhān ya.

*Tēe sājniñu squícu vāha jín jnúhun ya*

14 Jnúhun yāha na nástíhvi ni rō ñayuu, te cahān nihin ro jín i, jito máá Jítoho yó, jeē ma téjñāhan i siquī tāca jnúhun sáa-ni. Chi tu ndé jéjñiñu cuiti, chi sa stívi ñayuu jini sōho. 15 Te nducú ndéyí ró jeē cuajnúhún Yāā Dios rohó, jeē cúu rō tēe sājniñu squícu vāha jín jnúhun ya, návāha ma cúcanu rō nuū yā siquī ní ñin, chi vāha nacani ró jnúhun ndaā yā. 16 Te ma quívi nduu rō jín tāca jnúhun sáa-ni ñayívi yāha, chi suu sáha jeē ndúcuehé gā jniñu néé quívicoo ñayuu cácahān. 17 Te tāca jnúhun cástéén i chi cúu nájñuhun ñin ndíhyi; xeēn jeē sacáhú gá cuahān. 18 Te Himeneo jín Fileto cúu uú tēe jeē casáha súcuan. 18 Chi tēe un ní cajica yátá de nuū jnúhun ndaā, te cácahān de jeē jé ni cuu ni canatecu ndíyí. Te súcuan cácaha nuu de xini sava ñayuu cácañdije. 19 Te Yāā Dios ni jeni ya ñayuu maá yá, te iyó cutú ndaā i jeē ma cáca yátá i, nájñuhun yósó nuū tutu i: Je jini Jítoho yó Yāā Dios tāca ñayuu jeē yíhi ndaha máá yá. Te suni cāhān: Tāca ñayuu jeē ndácunehen síhvi Cristo, na cújiyo i nuū jniñu néé, áchi.

20 Te ini ñin vehe cáhnu iyó cuéhé cohó, nasūu máni cohó oro cohó plata, chi suni cohó yujnu cohó ñuhun. Te iyó jéé fino te iyó jéé corriente. 21 Te núu ñin ñayuu sándoo i máá i jeē quénda i nuū tāca jniñu néé, te cuu i nájñuhun ñin cohó fino. Te coo ndoo coo ñi i nuū Jítoho yó, te nihin jniñu i ndese cuní máá yá. Te coo tūhva i jeē sáha i tāca jniñu vāha.

22 Núu súcuan te cunu ró coto ró tāca jéé tú vāha jeē cándiyo ni tēe suchí. Te condiquin rō jniñu ndaā, jín jnúhun cándije ró yá, jín jnúhun cundáhú ni, jín jnúhun coyúcu máni jín jñāhan. Te súcuan sáha ró ndé jín tāca ñayuu ndoo ánuá jeē ndácunehen síhvi máá Jítoho yó. 23 Te ma quívi nduu rō jín tāca jnúhun cánéé i jeē tu iyó cáji, chi je jini ró jeē sáha jeē tejñāhan ñayuu. 24 Te mozo máá Jítoho yó, tú vāha jeē tejñāhan de, chi sa suhva cánuú jéé coo vāha ni de jín tāca ñayuu. Te coo vāha ni de stéén de, te cuandeyí ni de jín i. 25 Te jín jéé víta ni de te cani ichi de ñayuu nihni ni. Chi sanaa te nacani ni i sáha Yāā Dios, te jecúhun ni i ndese iyó jnúhun ndaā. 26 Te nducájí ni i te cácu i nuū jexeén jeē ní jniñu ún i, chi ni cundeyí jín i jeē sáha i jeē cuní máá.

*Siquí ndese coo ñayuu sáha néé quívi cuándihi*

### 3

1 Te suni na jécúhun ni rō jeē quívi cuándihi te quee quívi coo jnúndóho. 2 Chi coo ñayuu jeē chiñúhún máá, te ndiyo ni i xúhún, te sátéyí i máá i, te sánduxí i máá i. Te cahān neé i siquí Yāā Dios, te cuníhni ni i nuū tatá i nuū naná i, te ma nácuatáhú i, te ma chiñúhún i Yāā Dios. 3 Te ma cóo maní i jín jñāhan i ni ma cundáhú ni i. Te sājñuhún i, te ma cúu casi i tāca jéé ndíyo néé ni i, te yóhyo xeēn coo i, te quiti ni i coto i tāca jniñu vāha. 4 Te suni nastúu i jñāhan i, te ma yúhú i sáha i cuéchi, te coo nduxí ndasí i, te nducú i jeē cúsi ní ña jín i, te ma nducú i quívi i nuū Yāā Dios. 5 Te sáha-ni i jeē chiñúhún i ya, te casi i nuū poder yā jeē ma sáma modo i.

Ma quívi nduu rō jín ñayuu casáha súcuan. 6 Chi sava tēe ún quívi de vehe te stáhú de tāca ñāhan cánéé jéé iyó ndasí cuéchi. Te yachi quívi coo ña jín tāca jnúhun tú ndaā jeé cúsi ní ña jín. 7 Te vēsú nini scuáha ña na-ni jnúhun, te tu cúu cuiti jecúhun ni ña jnúhun ndaā yā. 8 Te nájñuhun ni casáha tēe tásí Janes jín Jambres jenahán, jeē ni canducú de casi de nuū Moisés, suni súcuan sáha tēe ún, chi nducú de casi de nuū jnúhun ndaā. Chi coo nee jeé njñúni de, chi ma candije ndije de jnúhun cándije yó. 9 Te ma quéé jniñu sáha de, chi cuni tāca ñayuu jeē tēe cánéé xini cácu de, nájñuhun ni cajini ñayuu jeē ni iyo néé xini ndindúú tēe jeē ní nducú casi nuū Moisés.

*Jniñu sándihi ndácu Pablo nuū Timoteo*

10 Te róhó chi je ni cutúhva vāha ró ndese stéén rí, ndese jica ndaā rí, ndese tēe ni rí sáha rí, ndese cándije rí yá, ndese néé rí paciencia, ndese cundáhú ni rí jñāhan rí, jín ndese jéndeýí ni rí. 11 Chi ni cajito xeēn ñayuu ruhú, te ni ndoho rí jnúndóho. Te jini ró tāca jéé ni ndoho rí ñuu Antioquía, ñuu Iconio, jín ñuu Listra. Te jini ró ndese ni cajito xeēn i ruhú. Te máá Jítoho yó ni jnama ya ruhú nuū ndíhi ún. 12 Chi ndaā cúu jeé tāca ñayuu jeē ndihví ni cuajniñu vāha nuū Cristo Jesús, ndoho i jeé coto xeēn ñayuu i. 13 Te ñayuu casáha jniñu néé jín ñayuu castáhú, chi sa víhyá gā cocuu i jín jniñu néé, chi stáhú i ñayuu, te suni candije máá i jnúhun stáhú.

14 Te róhó chi sa cuiñi nihin ró jín jéé ni cutúhva ró jín jéé ní cucáhnu vāha ni rō. Chi jini ró ndese ñayuu cúu jeé ní cástéén nuū rō. 15 Chi nde ná lulí ró, te je jini ró ndese cáhān tutu ñi jeé steén nuū rō ndese candije ró jeé ni jíhi Cristo Jesús jehé rō návāha cácu rō. 16 Te níf tutu ñi cúu jnúhun jeé ni cāhān Yāā Dios, te vāha nihin jniñu jeé steén nuū yó, jeé cahān nuū yó, jeé náchuhun ichi yóhó, jín jéé scuéhnu yóhó jín jniñu ndaā, 17 návāha tēe cájejniñu nuū Yāā Dios, ije ni de te coo tūhva vāha de sáha de tāca jniñu vāha.

## 4

<sup>1</sup> Te cáhán rí jín ró, jíto Yaā Dios jín Jítóho yō Jesucristo, Yaā quiji ndacu jniñu, te sándaā yā jniñu ñayuu cátecu jín ñáyuu ní cajihí. <sup>2</sup> Cáhán nñin rí jeē na nácani ró jnūhun ya, te stñví ní ró i candíje i. Te níni sáha ró súcuan núu núne i chí vésu tu núne i. Te sáha ró jeē na jécūhun ní i, te cahān rō nuū i, te caní ichí váha ró i, te jín cuéhē paciencia steén rō nuū i. <sup>3</sup> Chi quee tiempo jeē ma cuájñuhún cuiti ñayuu jñūhun ya jeē steén ndaā váha, chí sa cuajñuhún i jñūhun cúshí ní maá i, te nducú i cuéhē maestro jeē steén nuū i máni jñūhun jeē núnahan ní i cuni nahín i. <sup>4</sup> Te cujiyo i nuū jñūhun ndaā, te condihví ní i táca jñūhun jeē maá cuento-ni cúu. <sup>5</sup> Te rōhó chí níni coo ndito ní rō, te cuandeyí ní rō jín jnúndóho, te condihví ní rō nacani ró jñūhun jnáma ya yohó, te squícu váha ró jín jniñu ya jeē sáha ró.

<sup>6</sup> Te ruhū chí je ní socó rí maá rí jeē cúu rí, te je cuacuyajni quiví cuu rí. <sup>7</sup> Te je ní cundeyí rí jeē ní nducú ndéyí rí siquí jniñu váha, te je ní jinu ní jica rí ñayívi yáha, te tu ní siáá rí jñūhun cándíje rí yā. <sup>8</sup> Te vijna je íyó túhva premio jeē níhín rí siquí jeē ní jica ndaā rí. Chí Jítóho yō cuáha ya un núu rí maá quiví sándaā yā jniñu, chí maá yá cúu juez ndaā. Te nasūu núu maá ñn ruhū cuáha ya, chí suni cuáha ya nuū táca ñáyuu jeē cúu ní i jeē ndíji ya chí maní i jín yá.

*Jeē cána Pablo quiji Timoteo nuū de*

<sup>9</sup> Nducú ndéyí ró quiji yachí rō nuū rí. <sup>10</sup> Chí Demas ní stóo de ruhū, chí ndíyo ní de ndajniñu ñayívi yáha, te cuahān de ñuu Tesalónica. Te Crescente chí cuahān de Galacia, te Tito cuahān de Dalmacia. <sup>11</sup> Te máa ñn na Lucas íne jín rí. Te jeē quiji ró, te condeca ró Marcos quiji ró jín de, chí váha cuajniñu de jeē chindéé ñáhán de ruhū jín jniñu ya. <sup>12</sup> Tíquico ní tají rí de cuahān de ñuu Efeso. <sup>13</sup> Te jeē quiji ró, te condaha ró cotón jeē ní stóo rí vehe Carpo ñuu Troas. Te suni condaha ró táca libro, te jeē cánuú gá cúu táca tutu ní tee máá rí.

<sup>14</sup> Alejandro, tēe cúu herrero, yōhyo xeēn ní sáha de jín rí. Te máá Jítóho yō cuáha ya yāhu de jeē súcuan ní sáha de. <sup>15</sup> Te condito ró máá ró nuū de, chí yōhyo ní cuu de contra siquí jñūhun cástéén yó.

<sup>16</sup> Te ná ní ine rí jeē xlhna ñúhún núu táca tóhō, te tú ní ñn tēe ní índichi jín rí, chí ndihí de ní castóo de ruhū. Te ñūhun ní rí jeē Yaā Dios cone cáhnu ní yā nuū de. <sup>17</sup> Te vésú súcuan te máá Jítóho yō ní chindéé ñáhán yá ruhū, te ní jēhe ya fuerza ini rí, te súcuan ní sínu rí ní nacani ndihí rí jñūhun jnáma ya yohó, ní cajini nahín ñáyuu táca nación tu jíni jñūhun ya. Súcuan ní jnama Jítóho yō ruhū nuū táca tēe xeēn. <sup>18</sup> Te jnama ga yā ruhū nuū táca jniñu neé, te condito ya ruhū

nde quiví rí andiví núu ndacu ya jniñu. Te na cáhán yō jeē yóhyo luu cújéhu ya ní cáni. Amén.

*Saludo jín bendición jeē sándihí*

<sup>19</sup> Te cahān rō jeē sándeýí ní Prisca jín Aquila, jín ñáyuu vehe Onesíforo, achí rí. <sup>20</sup> Erasto ní quendōo de ñuu Corinto. Te ní quendōo Trófimo ñuu Mileto, te cúhú de. <sup>21</sup> Te condihví ní rō quiji ró nde ná tu quejéé vico míjin. Sándeýí ní rō, achí Eubulo jín Pudente jín Lino jín Claudia jín táca gá hermano.

<sup>22</sup> Te ñūhun ní rí jeē maá Jítóho yō Jesucristo na cóo ya jín ró, te Yaā Dios sáha ga yā jeē váha rōhó jínánhan ró. Súcuan na cóo. Amén.

## CARTA JEE NI TEE SAN PABLO APOSTOL NUU TITO

<sup>1</sup> Máá rí cúu Pablo, mozo Yaā Dios jíin apóstol Jesucristo, chí ni tají Yaā Dios ruhū jeē scándije rí ñayuu ní nacáji ya, návaha jecūhun ní i jñūhun ndaā yā jeē candíje yó, <sup>2</sup> te cocuhun ní i jeē cótecu i ní cāni. Chí nde ná tu jecōo ñayíví te ní jejnūhun Yaā Dios jeē cótecu yó, te iyó ndaā jñūhun ní cahān yā. <sup>3</sup> Te vijna jeē ní quee tiempo ní jeni ya, te steén caji yá jñūhun ya nuū yó. Te ní tejníñu ya ruhū ní ndacu ya jniñu jeē nácani rí jñūhun ya ún. Chí Yaā jnáma yóhó cúu ya. <sup>4</sup> Te tée rí carta yáha cuájeē nuū rō Tito, chí nájñūhun sēhe rí cúu ndije rō siquí jeē inuū-ní candíje yó yá. Te ñūhun ní rí jeē Tatá yō Yaā Dios jíin Jitoho yō Jesucristo, Yaā jnáma yóhó, na sáha ga yá jeē váha róhó, te cundáhú ní yá rohó, te sáha ya jeē coo ndeyí coo sñ ní rō.

### *Jniñu ya jeē ní sáha Tito nde isla Creta*

<sup>5</sup> Te ní stóo rí rohó ndé isla Creta, návaha sándaā rō siquí jniñu jeē cúmani gā cundaā, te caní rō táca tée jéhu condito ñayuu cácaandíje táca ñuu, nájñūhun ní ndacu rí jniñu nuū rō. <sup>6</sup> Te tée jéhu un cánuú jeē ma cóo ní ñin jeē níhín ñayuu cuéchi siquí de. Te cánuú coo ñin-ní ñasihí de. Te sēhe de cánuú cuu i sūchi cácaandíje jeē ma níhín ñayuu cuéchi siquí i jeē tu sáha váha i chí jéé níhni ní i nuū de. <sup>7</sup> Chí tée cácujeñu cándiso jniñu nuū ñayuu cácaandíje, cánuú caca ndaā de chí cándiso jniñu de siquí jniñu Yaā Dios. Te ma satéyí de máa de, ma quití yachí ní de, ma cúu de tée nájini, ma cuajnáhan de, te ma ndiyo ní de xūhún. <sup>8</sup> Chí sa cánuú jéé níni cuáha núu de vehe nuū ñayuu cájica, te níni sáha de jniñu váha, te ndito coo xiní de, te coo de tée ndaā, te coo ndoo ánuá de, te casi de modo jeē cuní maá de. <sup>9</sup> Te cánuú cuiñi níhin de jíin jñūhun ndaā jeē ní scuáha de, návaha cuu stíhví ní de ñayuu jíin táca jñūhun ndaā váha, te suni cuu sáha de jeē jécūhun ní ñayuu cácuu contra, te casi i yuhu i.

<sup>10</sup> Chí iyó cuéhē ñayuu níhni ní, te cástéén i inga modo jéni ní maá i jeē súcuán cácu ñayuu, te stáhú i ñayuu. Te jnáhan yó hebreo cúu jeē víhyá gā casáha súcuán. <sup>11</sup> Te cánuú jéé casi rō yuhu táca téé ún, chí cástéén de jñūhun jeē tu iyó váha stéén de, chí cuní de níhín de xūhun siquí ún. Te súcuán sáca nuu de xiní ndihí ñayuu táca vehe.

<sup>12</sup> Te ñin tée isla Creta jeē nácani jñūhun, ní cahān de siquí jnáhan ñuu de: Jnáhan yó ñayuu Creta, chí máni ñayuu stáhú cácuu i, te nájñūhun quití xéén casáha i, te máni ndíhví ní i caji cuéhē i, te cúxí i, áchí de. <sup>13</sup> Te ndaā cúu jñūhun ní cahān tée ún. Jeé yúcuán na

cúxeēn rō nuū i, návaha ndaā váha na cándije i. <sup>14</sup> Te ma sáha i cuenta táca jñūhun ní catava jnáhan yó hebreo, jeē maá cuento-ni cúu, ní ma siquícu i jniñu cándacu tée ní quendacoo nuū jñūhun ndaā.

<sup>15</sup> Te ñayuu jeē ní ndundoo jeē níjnūni, máni modo iyó ndoo iyó váha jéni ní i jito i táca-ni. Te ñayuu tu cándije jeē tu ní ndundoo jeē níjnūni, máni jéni ní i ñin modo tú ndoo tú váha siquí táca jéé jito i. Chí nde jeē níjnūni i jíin ánuá i iyó jnéhén. <sup>16</sup> Te vesú cácahān i jeē jíini i Yaā Dios, te jíin jniñu casáha i te jíini yó jeē tú ndije i. Chí ñayuu ndeváha ñayuu níhni ní cácuu i, te tu cúu sáha i ní ñin jniñu váha.

### *Jñūhun ya jeē steén ndaā váha*

## 2

<sup>1</sup> Te máá rō chí níni na cahān rō táca jñūhun jeē quijnáhan jíin jñūhun ya jeē steén ndaā váha. <sup>2</sup> Te cahān rō jíin táca téé jéhu jeē na cóo caji ní de, te sáha yíñúhún de, te ndito coo xiní de, te candíje níhin de jñūhun cundáhú ní yá de, te cundáhú ní de jnáhan de, te cuandeyí ní de. <sup>3</sup> Te suni súcuán táca ñahan jéhu, na sáha yíñúhún ña, te ma sajnúhún ña, te ma nájini ña. Te na stéén ña táca jéé váha. <sup>4</sup> Te na stéén ña nuú táca ñahan sūchí jéé coo maní ña jíin yí ña jíin sēhe ña. <sup>5</sup> Te ndito coo xiní ña, te coo ndoo ánuá ña, te coto váha ña jniñu vehe ña, te coo váha ní ña, te cuatáhú ña nuú yí ña, návaha ma cahān neé ñayuu siquí jniñu Yaā Dios.

<sup>6</sup> Te suni súcuán stíhví ní rō táca téé sūchí jeē ndito na cóo xiní de. <sup>7</sup> Te róhó, cuu rō ñin ejemplo nuú de jeé sáha rō táca jniñu váha. Te jeé steén rō nuú de te ndaā steén rō de coo ndije ní rō. <sup>8</sup> Te ndaā váha stéén rō, návaha ma cúu cahān ñayuu siquí. Te súcuán te cucanu ñayuu cácuu contra, chí ma cúu cahān i ní ñin cuéchi siquí rō.

<sup>9</sup> Te cahān rō jíin ñayuu cácuu mozo jeē na cuatáhú i nuú patrón i, te na sáha i táca jniñu jeé núnahan ní de, te ma cahān maá i núu ndacú de jniñu nuú i. <sup>10</sup> Te ma sacuíñá ní ndajniñu de, chí na cúu i ñayuu ndaā ndije, návaha jíin táca jniñu jeé sáha i, te cuní táca ñayuu jeé yóhoyo luu cúu jñūhun jeé steén siquí Yaā Dios, Yaā jnáma yóhó.

<sup>11</sup> Chí vijna je ní steén Yaā Dios ndese sáha ya jeé váha ñayuu, chí cuní yá jnama ya ndihí ñayuu ñayíví. <sup>12</sup> Te jñūhun jeé váha ní yá jíin yó, suu stéén nuú yó jeé na siáá yó jniñu neé jíin táca jéé ndiyo neé ní yó. Te ndito na cóo xiní yó ini ñayíví yáha, te caca ndaā yó, te chíñúhún váha yó Yaā Dios. <sup>13</sup> Te suni stéén nuú yó jeé cocuhun ní yó jeé quéndoo ndetú yó jeé quíji máa quíví jéhu jeé quénda ndijin Yaā Dios, Yaā cujéhu ndasí, suu Jesucristo, Yaā jnáma yóhó. <sup>14</sup> Chí ní socó yá maá yá jehé yó, návaha jnama ya yohó núu táca jniñu neé, te sándoos ndihí ya anuá yó jeé cuu

yó ñáyuu maá yá, te condihví ni yō sáha yó jniñu váha.

<sup>15</sup> Tāca jnúhun yáha cánuú stéén rō, te stíhví ni rō i, te cahān rō nuū i, chí súcuan ndiso jniñu rō. Te ma cuáha ro jnúhun jeē sajeē ni ni ñin i nuū rō.

*Ndese cánuú sáha ñayuu cácandíje*

### 3

<sup>1</sup> Te na nástíhví ni rō i jeē cuatáhu váha i nuū tēe cácujeñu jíin tēe cándiso jniñu ñuu. Te na squicu i jniñu cándacu de, te coo ñamá ni i sáha i tācá jniñu váha. <sup>2</sup> Te ma cahān neé i síquí ni ñin ñayuu, te coyūcu máni i jíin ñáyuu, te coo váha ni i, te coo vītá ni i jíin ndíhi ñayuu.

<sup>3</sup> Chí máá yó suni ni cuu yó ñáyuu canéé jeē tu jécūhun ni nde saá, te ni cacuníhni ni yō nuū Yaā Dios. Te ni cacandíje yó táca jnúhun tú ndaā, te ni cajejniñu saá-ni yó núú tāca jéé ní ndiyo neé ni yō jíin na-ni jniñu ni cusí ni yō. Te ni cajica yó jíin jniñu neé jíin jnúhun cuésún ni. Chí ni cajito uhū ñayuu yohó, te ni cajito uhū yō i. <sup>4</sup> Yūcuán na te Yaā Dios, Yaā jnáma yóhó, ní steén yā jeē váha ni yā te cundáhu ni yā ndíhi ñayuu ñayívi. <sup>5</sup> Te ni jnama ya yohó, te tú na jniñu váha ní casáha yó jéé jnáma ya yohó, chí sa síquí jeē ní cundáhu ni yā yohó. Chí ni nacate ya anuá yō, te súcuan ni nacacu jeé yó, te ni ndujeé yó ni sáha ya jíin máá Espíritu Santo.

<sup>6</sup> Te yōhyo ni cunuú Espíritu Santo ini anuá yō, jeē ni sáha Yaā Dios jeē jíin Jesucristo, Yaā jnáma yóhó. <sup>7</sup> Te súcuan te ni ndahva yā cuēchi yó síquí jeē váha ni yā, te nihín tahú yó cotecu yō ní cáni, nájnūhun ñúhun ni yō.

<sup>8</sup> Ndaā cúu jnúhun yáha, te cúni rī jeē niní cahān nihín ro táca jnúhun yáha, návaha ñayuu cácandíje Yaā Dios, na cóndihví ni i cocuu i jíin jniñu váha. Chí iyó váha tāca jéé yáha, te nihín jniñu jeē quéndōo váha ánuá ndíhi ñayuu. <sup>9</sup> Te ma quívi nduu rō jíin táca jnúhun cánéé íi, jíin jnúhun síquí ndese vēji táca jíi yō, jíin táca jnúhun sáha jeē cátejnhān i cácahān i jeē cánuú squicu yó ley Moisés. Chí máni jnúhun cáhá-ni jeē tu nihín jniñu cúu.

<sup>10</sup> Te núu iyó ñayuu jeē sáha jeē ndusín ini ñayuu cácandíje, te cahān rō nuū i ñin uū jíin, te núu ma chúhun ni i, te quenehen rō i. <sup>11</sup> Chí jíni rō jeē ñin ñayuu sáha súcuan, stívi ndasí i chí jíni i jeē tú váha sáha i, te jeé yúcuan jécondee cuēchi síquí i.

*Jeē cána Pablo quiji Tito nuū de*

<sup>12</sup> Te jeē tají rí Artemas chí Tíquico cuajeé de, yūcuán na te nducú ndéyí rō quiji rō núu rī ñuu Nicópolis, chí je ni cundaā ni rī jeé yúcuan condee rī tiempo mījin. <sup>13</sup> Te condihví ni rō chindéé ñáhān rō Zenas, tēe cúu abogado, te suni súcuan Apolos. Chí cuáha rō jéé jíni ñúhún de jeé quíngoo ga de

ichi nuū quihín de. Te coto rō jéé ma cúmani ni ñin nuū de. <sup>14</sup> Te ñayuu cáhīin jíin yó, cánuú cutūhva i sáha i tācá jniñu váha, te chindéé ñáhān i ñayuu cúmani nuū, návaha ma cótecu saá-ni i.

*Saludo jíin bendición jeē sándíhi*

<sup>15</sup> Tāca ñayuu cáyūcu jíin rí yáha, cácahān i jeē sándeyí ni rō. Te cahān rō jeē achi rí jeē sándeyí ni ñayuu jíin jeē maní yō jíin síquí jeē cácandíje yó. Te ñúhun ni rī jeē na sáha ga Yaā Dios jeē váha rōhó jíinhān rō. Súcuan na cóo. Amén.

## CARTA JEE NI TEE SAN PABLO APOSTOL NUU FILEMÓN

<sup>1</sup> Máá rí cúu Pablo, te íne ri vecāa jeē siquí jnúhun Cristo Jesús. Te jíin hermano yō Timoteo cátee ri carta yáha cuájeē nuū rō Filemón. Chì cúu rō téee jeē cáhiyo maní rí jíin, chí chéndéé ñájnánhan rō jíin rí siquí jníñu Yaā Dios. <sup>2</sup> Te suni cátee ri carta yáha nuū ñáyyu cácan díje cándutútu ini vehe rō, te suni nuū hermana yō Apia, jíin nuū Arquipo, téee chéndéé ñájnánhan jíin yō siquí jníñu cánducú ndeyí yō jíin. <sup>3</sup> Te cáñuhun ni rí jeē Tatá yō Yaā Dios jíin Jítoho yō Jesucristo, na sáha ga yá jeē váha rōhó jínánhan rō, te sáha ya jeē coo ndeyí coo sñ ni rō.

*Tēe cundáhú ni te cándíje váha cúu Filemón*

<sup>4</sup> Te jeē jíicán tahú rí nuū Yaā Dios te tu náa ni rí cacān tahú rí jehē rō, te níni nácuatáhú rí nuū yá jeē siquí rō. <sup>5</sup> Chì níhin rí jnúhun jeē váha cándíje rō jnúhun cundáhú ni Jítoho yō Jesús rohó, te cundáhú ni rō táca ñáyyu yñi ndaha Yaā Dios. <sup>6</sup> Te jíicán tahú rí jeē ñáyyu ni cacandíje siquí jeē cándíje máá rō, na jécúhun váha ga ni i siquí táca jéē váha jeē sáha ya yohó jeē jíin Cristo Jesús. <sup>7</sup> Chì cúsi ndasí ni rí te íyó ndeyí ni rí, hermano, siquí jeē cundáhú ni rō ñáyyu cácan díje. Chì máá rō ni sáha jeē ní ndusií ni i.

*Jeē jíicán Pablo ñin favor jehē Onésimo*

<sup>8</sup> Núu súcuan te cáhán ndahú rí jíin rō, vésú cuu ndacu ri nuū rō ndese cánuú sáha rō, chí cúu rí apóstol Cristo. <sup>9</sup> Te tuú chí sa cáhán ndahú rí jíin rō siquí jeē cáhiyo maní yō. Te cundáhú ni rō ruhū sáha rō jéē cuní ruhū Pablo, chí je jéhu rí, te íne ri vecāa jeē siquí jnúhun Cristo Jesús. <sup>10</sup> Te cáhán ndahú rí jíin rō jehē mozo rō Onésimo jeē ní jeen rō te ni jinu. Te vijna te cúu i nájnūhun sēhe rí, chí ni scándíje rí i ini vecāa yáhá.

<sup>11</sup> Te nde saá chí tu ní cúu i mozo squícu nuū rō, chí ni jinu i. Te nde vijna chí váha cuajníñu i nuū rō jíin núu rí. <sup>12</sup> Te nátají rí i najeē i nuū rō. Núu súcuan te cahān váha rō jíin i, te sáha rō cuenta jeē nájnūhun máá rí ni najinū, chí yōhyo maní rí jíin i. <sup>13</sup> Te cusí ni rí núu jeē na cúu quendōo i jíin rí yáhá, náváha cuajníñu i nuū rí lugar máá rō níni jéē íne ri vecāa jeē siquí jnúhun váha ya. <sup>14</sup> Te tu ní cuní rí sáha rí súcuan, chí nde cuāha máá rō jnúhun. Chì nasūu jéē safuerza rí rohó, chí jeē váha ni rō te sáha rō favor jíin rí, nájnūhun cúsi ni máá rō. <sup>15</sup> Chì sanaa te jeē siquí yáha cúu jeē ní jinu i ni cujiyo i nuū rō jecu-ni tiempo, suu náváha ví quendōo i jíin rō sáha Yaā Dios. <sup>16</sup> Te vijna tuá cúu i ñin mozo jeē ní jeen rō, chí ni nduu i ñin jeē váha ga, suu ñin hermano jeē maní rō jíin. Te ruhū

chì yōhyo maní rí jíin i, te nagā ni cuu máá rō jeē ma cóo maní rō jíin i. Te nasūu jéē maní rō jíin ñin téee súcuan-ni, chí siquí jeē cúu i ñin hermano jeē cándíje nuū Jítoho yō.

<sup>17</sup> Te núu sáha rō cuenta jeē ruhū cúu jnánhan rō cándíje, núu súcuan te cahān váha rō jíin i jeē jinú i nuū rō, nájnūhun jeē ruhū cahān rō jíin. <sup>18</sup> Núu na-ni falta ni sáha i nuū rō, chí núu táu i nuū rō, te cacān rō chunaa máá rí. <sup>19</sup> Ruhū Pablo, jíin ndaha máá rí téee rí yáha jéē máá rí nachunaa. Súcuan cáhán rí vésú cuu cahān rí jeē sa máá rō taú nuū rí sáha rō jéē cúsi ni rí siquí jeē ní scándíje rí rohó te ni cácu ánuá rō. <sup>20</sup> Núu súcuan, hermano, sáha rō favor yáha jíin rí siquí jeē cándíje rō Jítoho yō. Sáha rō jéē ndusií ni rí, siquí jeē cúu rō hermano cándíje Cristo.

<sup>21</sup> Te téee rí yáha núu rō, chí cúcáhu váha ni rí jeē cuatáhú rō, te nde vihyá gā sáha rō vésú jeē ní jíicán rí. <sup>22</sup> Te suni jíicán rí jeē sátúhva rō núu cóndee rí, chí ñúhun ni rí jeē quénda rí yáhá te jeē rí nuū rō sáha Yaā Dios siquí jeē cájicān tahú rō jehē rí.

*Saludo jíin bendición jeē sándihí*

<sup>23</sup> Epafras, téee íne jíin rí vecāa jeē siquí jnúhun Cristo Jesús, cáhán de jeē sándeýí ni rō. <sup>24</sup> Te suni súcuan cácahān Marcos, jíin Aristarco, jíin Demas, jíin Lucas, téee cáchindéé ñájnánhan jíin rí siquí jníñu ya.

<sup>25</sup> Te ñúhun ni rí jeē Jítoho yō Jesucristo na sáha ga yá jeē váha rōhó jínánhan rō. Súcuan na cóo. Amén.

## CARTA JEE CUAHAN NUU ÑAYUU HEBREO

*Jeë ní tǎjǎ Yaā Dios Sēhe ya ni nacani ya jñūhun*

<sup>1</sup> Tijnǎ jǎnu te tijnǎ modo ni cahān Yaā Dios jǎn tǎca jǎj yō nde jenahán, chi ni tǎjǎ yǎ tēe ni canacani jñūhun ya. <sup>2</sup> Te vijna te tiempo cuándihǎ yǎha ní tǎjǎ yǎ maá Sēhe ya ni nacani ya jñūhun nuū yō. Te jǎjn Sēhe ya ni sǎha ya ñayǎvǎ jǎjn tǎca gǎ, te ndǎvǎjǎ jeë iyó ní chihǎ ya ndaha Sēhe ya. <sup>3</sup> Te Sēhe ya yōhyo luu cújēhnu ya, nǎjnūhun luu cújēhnu maá yǎ. Te ndihǎ ndese cúu maá yǎ, sunǎ súcuan cúu Sēhe ya. Te jǎjn poder jñūhun ni cahān Sēhe ya te iyó cutú ndihǎ-nǎ. Te ni sǎndoo ya yohó tǎca cuéchi yó, te sǎá te ni cucōo ya lado váha mesa maá Yaā cújēhnu nde andǎvǎ.

*Jeë cújēhnu ga Sēhe Yaā Dios vēsú tǎcǎ ndajéhé yǎ*

<sup>4</sup> Te ni ndujéhnu ndasǎ gǎ Sēhe ya vēsú tǎcǎ ndajéhé andǎvǎ, chi ni nihǎn yǎ tahú jeë ndǎiso ya jñǎnu jēhnu ndasǎ gǎ vēsú jñǎnu cándiso ndajéhé. <sup>5</sup> Chi súcuan ni cahān Yaā Dios jǎjn Sēhe ya, te nasūu jǎjn ndajéhé yǎ: Máá ró cúu Sēhe ri,

te vijna te ni sajéhnu ri rohó jéë cúu ri Tatǎ rō.

Te sunǎ ni cahān yǎ jñūhun Sēhe ya, te nasūu jñūhun ndajéhé yǎ:

Máá ri cúu Tatǎ nuú Sēhe ri,  
te maá i cúu Sēhe nuū rǎ.

<sup>6</sup> Te sunǎ ná ni tǎjǎ yǎ Sēhe ya cújēhnu, ni quǎjǎ inǎ ñayǎvǎ yǎha, te ni cahān yǎ:

Ndihǎ ndajéhé ri na chíñtúhún i Sēhe ri.

<sup>7</sup> Te ni cahān tucu ya jñūhun ndajéhé yǎ:

Nǎjnūhun quée tachǎ, súcuan cájǎca ndajéhé ri sǎha ri,  
te tǎcǎ un jéë cájǎjñǎnu nuū rǎ, nǎjnūhun yǎñuhún cácuu.

<sup>8</sup> Te jñūhun Sēhe ya chi sa suhva cáhǎn yǎ:

Máá ró cúu Yaā Dios, te ndacu ró jñǎnu ñú cáni,

te jñǎnu ndácu ró, máni jñǎnu ndaá cúu.

<sup>9</sup> Cúsǎ ni rō jǎjn jñǎnu váha, te jǎto uhú rō jñǎnu neé.

Jeë yúcuan ruhú, Yaā Dios maá ró, ni sǎha ri jeë yóhyo ga cúsiñ ni rō vēsú tǎca gǎ jeë iyó andǎvǎ.

<sup>10</sup> Te sunǎ cáhǎn yǎ:

Máá ró cúu Jítóho, te nde xǎhna ñúhún ni sǎha ró jéë ní jécōo ñayǎvǎ.

Te andǎvǎ chi sunǎ jeë ní sǎha ró cúu.

<sup>11</sup> Te tǎcǎ un chí naa, te maá ró chí ñú cáni iyó rō.

Te tǎcǎ un chí cutúhú nǎjnūhun cutúhú ñin sahma,

<sup>12</sup> te nacaquin jñahnú rō te nasama ró jǎjnāhan.

Te maá ró chí ma sǎma cuiti rō,

te quǎvǎ cótecu rō ma ndǎhi cuiti.

<sup>13</sup> Te súcuan ni cahān tucu yǎ jǎjn Sēhe ya, te nasūu jǎjn ndajéhé yǎ:

Cucōo ró lado váha ri nuú cújēhnu ró,

te na sǎha ri jeë quende rō poder tǎca jéë cájǎto uhú rohó.

Achǎ yǎ. <sup>14</sup> Te tǎcǎ ndajéhé yǎ chí mozo-nǎ cácuu, te tǎjǎ yǎ cuangoos jeë chindéë ñǎhǎn ñayuu jeë nihún tahú jeë jñama ya.

*Jeë ma cúhuun ni yō jǎjn jñūhun jñama ya yohó*

## 2

<sup>1</sup> Núu súcuan te cánuú jéë váha ga chuhun ni yō tǎca jñūhun ya jeë ní cajǎni yó, chí núu tuú te sanaa te scuíta yó. <sup>2</sup> Chí nde jenahán ní jejnǎñu ya ndajéhé yǎ ni castúhun jñūhun ya, te ni cajǎni ñayuu jeë iyó ndáá. Te ñayuu nihni ní jǎjn ñayuu tu ní cájendetú jñūhun ún, vetú-nǎ ní canihǎn i castigo. <sup>3</sup> Te núu súcuan ni cuu, te yóhó, ¿ndese cácu yó núu ma chúhun ni yō jñūhun cánuú gǎ jeë jñama ya yohó? Chí xǎhna gǎ maá Jítóho yó ni nacani ya jñūhun yǎha, te sǎá te tēe jeë ní cajǎni nahǎn ni canacani ndaá tucu maá de nuú yó. <sup>4</sup> Te Yaā Dios sunǎ ni chindéë ñǎhǎn yǎ de jeë ní canacani de jñūhun ya. Chí ni sǎha ya jǎjn de jeë ní casǎha de sǎn sǎn jñǎnu jēhnu jeë nahǎn náa ni yō jǎto yó poder yǎ. Te sunǎ ni jēhe ya Espǎritu Santo yǎ nuú ñin ñin, ndese ní nujnahan ni maá yǎ sǎha yó.

*Jeë ní nduu Jesús jñǎhan ñayuu*

<sup>5</sup> Te Yaā Dios nasūu núu ndajéhé yǎ ní jēhe ya jñūhun jeë condiso jñǎnu siquǎ ñayǎvǎ jéë quǎjǎ, chí sa suhva nuú Sēhe ya Cristo ní jēhe ya. Te siquǎ ñayǎvǎ un cúu jeë cahán rǎ yǎhá. <sup>6</sup> Chí suhva yósó núu tútu jeë ní cahān David jǎjn yǎ:

¿Na vé cúu ñayuu jeë ñúhun ní ní i?

Te ndǎhvǎ ní ní siquǎ i, te maá ñayuu cúu i.

<sup>7</sup> Chí jecu-nǎ tiempo ní sǎha ní jeë núu i nuú tǎcǎ ndajéhé ní.

Yúcuan na te sajéhnu ní i te squéndōo yǎñúhún ní i,

te canǎ ní i jeë ndacu i jñǎnu nuú tǎca jéë ní sǎha ní.

<sup>8</sup> Te ndihǎ jeë iyó chí sǎha ní jéë cújēhnu i siquǎ.

Achǎ tutu. Te jeë ní sǎha Yaā Dios jeë cújēhnu i siquǎ ndihǎ, núu súcuan te ma quéndōo ní ñin jeë ma cújēhnu i siquǎ. Te vēsú súcuan te vijna te ná tu coto yó jéë cújēhnu i siquǎ ndihǎ jeë iyó. <sup>9</sup> Te jeë jǎjn yō vijna cúu Jesús, Yaā jeë ní nduu núu jecu-nǎ tiempo nuú tǎcǎ ndajéhé yǎ. Chí ni ndoho ya jeë ní jǎhǎ yǎ jēhē yó, te jeë yúcuan ní ndujéhnu luu tucu ya, te ndihǎ cáhǎyo yǎñúhún nuú yǎ. Chí jeë váha ní Yaā Dios jǎjn yó, jeë yúcuan ní jǎhǎ Jesús jēhē yó.

<sup>10</sup> Te ndihí jeē iyó chi cuenta Yaā Dios cúu, chí máá yá ni sáha. Te suni ndéca ya cuehē ndasí séhe ya jeē quihín i andiví núu luu cujéhu i jíin yá. Te váha nihín jniñu jeē ni jéhe ya jnūndóho nuū Jesús, chí jeē ní ndoho ya súcuan te cuu condeca váha ya ñayuu ni jnama ya. <sup>11</sup> Chí Jesús jeē ni sándoo ya i te máá i jeē ní candundoo i, chí ñn-ni Tátá i jíin yá. Te jeē yúcuan tu cúcanu Jesús jeē cahán yá hermano yá jíin i, vésú ndasí núu i. <sup>12</sup> Chí yósó núu tútu jeē ní cáhān yá jíin Tátá yá: Cachi na jnūhun ní núu táca hermano na, te mēñu núu cándutútú i cata ná ndese cújéhu ní.

<sup>13</sup> Te suni cáhān yá nájñuhun cácahān hermano yá:

Ruhū chí cándije ri yá.

Te cáhān tucu yá:

Yáha íne ri jíin táca gá séhe Yaā Dios jeē ni jéhe ya nuū rí.

Achí Jesús.

<sup>14</sup> Te nájñuhun cácahu ñayuu jeē cúu i yiqui cúnu, suni súcuan ní cacu Jesús, návāha cuu yá jehē yō. Te súcuan ní snāá yá poder jexeén jeē squíví ñayuu nuū cuéchi te jíin i. <sup>15</sup> Te ní cacu ya súcuan návāha cuu quenehen ya táca ñayuu chíji jñuhun jeē yuhú i cuu i. Chí ní vida i ndóho i sáha ún. <sup>16</sup> Te jendaá tu ní quiji ya jeē chindéé ñāhān yá táca ndajéhé yá, chí sa suhva jeē chindéé ñāhān yá ñayuu cácañje jeē ní nduu yucūn Abraham. <sup>17</sup> Jeē yúcuan ní jini ñūhūn nduu inuú yá jíin táca hermano yá, návāha cuu ya sutū cujéhu jeē squícu váha ya táca jniñu jehé i nuū Yaā Dios. Chí ní cundáhú ni yá i, te ní ndahva yá cuéchi i jeē ní sócō yá máá yá jehē i. <sup>18</sup> Chí suni máá yá ní ndoho ya jeē ní jito ndee jnūndóho ya, te jeē yúcuan cuu chindéé ñāhān yá ñayuu jeē jito ndee jnūndóho i.

*Cújéhu ga Jesús vésú Moisés*

### 3

<sup>1</sup> Hermano, ní cana Yaā Dios rohó, te cácuu ró ñayuu ndoo máá yá. Núu súcuan te na nácani váha ní ró siquí Cristo Jesús, Yaā cúu apóstol jeē ní tejniñu Yaā Dios, te suni cúu ya sutū cujéhu siquí jñuhun cácañje yó. <sup>2</sup> Chí ní squícu váha ya nuū Yaā Dios, Yaā ní tee jniñu un siquí yá, nájñuhun ní squícu váha Moisés nuū ñayuu jeē ní cáhān Yaā Dios jeē cácuu i ñayuu vehe ya. <sup>3</sup> Chí cújéhu ndasí gá Jesús vésú Moisés, nájñuhun cújéhu ndasí gá tēe sáha vehe nasūu máá vehe. <sup>4</sup> Chí táca vehe iyó téé ní sáha. Te máá Yaā Dios cúu jeē ní sáha táca jéé iyó. <sup>5</sup> Te Moisés ní squícu váha de jíin jniñu jeē ní cuu de mozo ní condito de ñayuu vehe Yaā Dios. Te ní castuhūn de siquí táca jñuhun jeē steén yá tiempo quiji. <sup>6</sup> Te Cristo chí sa cúu ya máá Séhe jeē ndácu jniñu nuū ñayuu vehe Tátá yá, te váha squícu ya jeē ní jéjnūhun ya nuū i. Te suni máá yó

cácuu ñayuu vehe ya, te núu na cuñi nihin yó jíin jñuhun cácañje yó ndé quiví sándihí, te núu cúsi ní yō jeē ñūhun ní yō táca jéé váha jeē coo.

*Jñuhun jeē ndetātu ñayuu Yaā Dios*

<sup>7</sup> Núu súcuan te na chūhun ní yō jeē cahán Espíritu Santo nuū tútu i:

Vijna te núu cuni sóho ró jéé cahán Yaā Dios,

<sup>8</sup> te ma cúnihni ní ró nájñuhun ní cacunihni ní ñayuu jenahán.

Chí tu ní cájendetū i nuū yá ná ní cajica i nuū ñūhun téhé.

<sup>9</sup> Chí yúcuan ní casáha jíí ró jniñu jeē ní quiñi ní rí, achí yá,

vésú ní cajito i táca jniñu ní sáha ri uū xico cuiyá.

<sup>10</sup> Jeē yúcuan ní quiñi ní rí jíin ñayuu tiempo un.

Te ní cahán rí jeé máni jeé castóo i ichi ndaā, chí tu cácuu i condiquín i jñuhun ri.

<sup>11</sup> Te jeé yúcuan ní quiñi ní rí, te ní cahán teyí rí

jeé ma quivícoo cuiñi i nuū ndetátú i sáha ri. Achí yá.

<sup>12</sup> Núu súcuan hermano, coto má conéé ánuá ní ñn ró jéé cáca yátá ró jeé tuá cácañje ró Yaā Dios, Yaā técu. <sup>13</sup> Chí sa suhva táca quiví na stūhví jñahan ní ró, níni gá iyó tiempo, návāha ma cúnihni ní ní ñn ró te stáhú róhó sáha ró cuéchi. <sup>14</sup> Te núu na cuñi nihin yó ndé quiví sándihí jíin jñuhun jeē ní quejéé yó jíin, yūcuán na te cuu yó jñahan Cristo.

<sup>15</sup> Chí cáhān tutu:

Vijna te núu cuni sóho ró jéé cahán Yaā Dios, te ma cúnihni ní ró nájñuhun ní cunihni ní ñayuu jenahán.

Achí. <sup>16</sup> ¿Te ndé-ni cúu ñayuu jeē ní jini jñuhun ya te ní cunihni ní? Suu ndihí ñayuu jeē ní scácu Moisés jeē ní quendacoo Egipto.

<sup>17</sup> ¿Te ndé-ni cúu ñayuu jeē ní quiñi ní yá nuū uū xico cuiyá? Suu ñayuu jeē ní casáha cuéchi, te ní cajihí i nuū ñūhun téhé. <sup>18</sup> ¿Te ndé-ni i cúu jeē ní cáhān teyí yá jeé ma quivícoo cuiñi i nuū ndetátú i sáha ya? Suu máá ñayuu jeé tu ní cájendetū nuū yá. <sup>19</sup> Núu súcuan te jíin yō jeé tu ní cúu quivícoo i nuū ndetátú i, siquí jeé tu ní cácañje i ya.

### 4

<sup>1</sup> Te níni iyó gá jñuhun jeē ní jéjnūhun ya jeé quivícoo ñayuu nuū ndetátú i sáha ya, te na cónso iyo yó jéé ma stíví yó, návāha tú coo jíin sava ró jéé ma nihín ró quiñi ró.

<sup>2</sup> Chí suni máá yó ní cajini sóho yó jñuhun jeé jnama ya yohó, nájñuhun ñayuu jenahán un. Te nuū máá i tu ní jéjnūñu jñuhun ní cajini i ún, siquí jeé tu ní cácañje i. <sup>3</sup> Te yohó jéé cácañje, máá yó cúu jeé quivícoo yó nuū ndetātu yó. Te siquí ñayuu tu cácañje ní cahán ya suhva:



Jeē yúcuan ní quiṭi ní rí, te ni cahān teyí rí jeē ma quívicoo cuiṭi i nuū ndetātú i sáha ri. Te súcuan ni cahān yā vēsú je iyó túhva nuū ndetātú i nde ná ni jecōo ñayiví. <sup>4</sup> Chi súcuan yósó jnúhun nuū tútu ñi siquí quiṭi uxá:

Ni sínu Yaā Dios táca jéē ni sáha ya, te ni ndetātu yá quiṭi uxá.

<sup>5</sup> Te suni nuū tútu un yósó tucu:

Ma quívicoo cuiṭi i nuū ndetātú i sáha ri. Achí yá. <sup>6</sup> Núu súcuan te sava ñayuu chi quívicoo nahín i nuū ndetātú i. Te ñayuu jenahán jéē ní cajini jnúhun jeē jnáma ya i, tu ní quívicoo i siquí jeē tu ní cájendetú i nuū yā. <sup>7</sup> Jeē yúcuan ní jeni tucu ya inga quiṭi jeē quívicoo ñayuu, te quiṭi un cúu vijna. Chi ná ni yáha cuehē tiempo jeē ni cahān yā jín ñayuu jenahán, te yósó núu tútu jeē ni sáha ya jeē suni ni cahān David suhva:

Vijna te núu cuni sóho ró jéē cahān yā, te ma cúnihni ní rō núu súcuan.

Achí tutu. <sup>8</sup> Te nde jenahán ní squívi Josué ñayuu Israel un ñuu nuū ndetātú i. Te tu ní cúu squívi de i nuū ndetātu ánuá i sáha ya. Chi núu súcuan te ma cahán gā Yaā Dios jín táca ñayuu jeē vijna cúu quiṭi jeē quívicoo i nuū ndetātú i. <sup>9</sup> Núu súcuan te iyó túhva nahín ñi nuū ndetātu ñayuu Yaā Dios, nájnūhun ni ndetātu máá yá. <sup>10</sup> Chi ñayuu jeē quívicoo nuū ndetātú i jín yá, chi ndetātú i jeē ní casájniñu i, nájnūhun ni ndetātu Yaā Dios nuū jniñu ni sáha máá yá. <sup>11</sup> Núu súcuan te na ndúcú ndéyí yó quiṭi yó núu ndetātu yó un, te ma sáha ni ñi yó cuéchi jeē ma cándije yó, nájnūhun ni casáha i nde saá.

<sup>12</sup> Chi jnúhun Yaā Dios ndító técu te iyó poder. Chi cúu nájnūhun ñi espada jeē xeén ndindúú lado, chi nástuu cáji ndese iyó jéē níjnūni yó jín ánuá yó, nájnūhun sáha espada jeē jénde te nástuu nuū ñujnáhan yíqui jín meque. Te jnúhun ya nástuu ndihi ndese jéni ní yó jín ndese cúni yó sáha yó. <sup>13</sup> Te tu iyó ní ñi jeē yisáhi jeē tu jini máá Yaā jeē náquihin cuenta, chi ndihi-ni jini váha ya, te ndihi-ni túu ndijin nuū yā.

*Jesus cúu sutú cujéhu ga*

<sup>14</sup> Te cánevāha yó ñi sutú cujéhu ga, te je ni ndaa ya ní ndivi ya nuū iyó Yaā Dios. Te Jesús Sēhe Yaā Dios cúu ya. Jeē yúcuan na cuiṭi ñiñi yó jín jnúhun jeē ní cándije yó. <sup>15</sup> Chi névāha yó ñi sutú cujéhu jeē jito ndáhu yóhó jeē tu fuerza yó squícu váha yó. Chi nájnūhun ndóho yó jéē jito ndee jexeén yohó, suni súcuan ni ndoho ya jeē ní jito ndee un yá, vēsú tú cuiṭi cuéchi ya. <sup>16</sup> Núu súcuan te ma yūhu yó, chi na quiṭi yó yuhu mesa yā, cúu jeē cacān tahú yó. Chi maní yā jín yó, te cundáhu ní yá yohó, te siquí jeē váha ní yá te chindéé ñahán yá yohó táca jínu jeē jini ñúhún yó.

**5**

<sup>1</sup> Chi táca sútú jeē ní cujéhu jenahán, ni nacáji Yaā Dios de méhñu ñayuu, te ni jeni ya de jeē cuiṭi de nuū yā jehē ñayuu, te socó de ndajniñu jín quiṭi nuū yā jeē siquí cuéchi i. <sup>2</sup> Te cuu cahān vítá de jín ñayuu tu jécūhun ni jín ñayuu castívi, chi máá de suni tú na fuerza ñi de squícu váha de. <sup>3</sup> Jeē yúcuan cúu jeē suni cánuú sócō de quiṭi nuū yā jeē siquí cuéchi máá de, nasūu máá-ni jeē siquí cuéchi ñayuu.

<sup>4</sup> Te ni ñi tēe tu cúu sájéhu de máá de jeē cuu de sutú cujéhu, chi sa máá Yaā Dios cúu jeē nacáji ya de, nájnūhun ni nacáji ya Aarón nde jenahán. <sup>5</sup> Te suni súcuan Cristo, tu ní sájéhu ya máá yá jeē cuu ya sutú cujéhu, chi sa Yaā Dios ni sáha, chi ni cahān yā jnúhun yáha:

Máá ró cúu Sēhe ri, te vijna te ni sájéhu ri rohó jéē cúu ri Tatá ró.

<sup>6</sup> Te suni cáhán tucu ya nuū tútu ñi:

Ñi cáni cúu ró sútú, nájnūhun sutú Melquisedec jenahán.

<sup>7</sup> Te Cristo, ná ni condee ya ñayiví, te ni jicān tahú yā, te nde ní ndahyú yā te ni ndahyú cohó yá. Te ni cahān ndahú yá jín Yaā Dios, Yaā jeē cúu jnama ya jeē ma cúu yā nuú. Te siquí jeē yíñúhún ní chiñúhún yá Yaā Dios, te ní chindéé ñajnáhan Yaā Dios jín yá nuū jnúndóho ún. <sup>8</sup> Chi vēsú Sēhe Yaā Dios cúu ya, te ni jendetú yá ni ndoho ya ñi ñayiví, te súcuan ni jini yā ndese cúu jnúhun jendetú. <sup>9</sup> Te ná ni cuu ní squícu ndihi ya jeē ní jendetú yá, te ni cucutú jnúhun jeē jnáma ya táca ñayuu jendetú nuū yā, te cotecu i ní cáni. <sup>10</sup> Chi ní jeni Yaā Dios yá jeē cúu ya sutú cujéhu nájnūhun sutú Melquisedec.

*Siquí jeē ma cáca yátá i*

<sup>11</sup> Te iyó cuéhé jnúhun jeē castúhun rí siquí táca jéē yáha. Te yí cúu jeē jécūhun ní ró sáha ri, siquí jeē tu cácuni ró chuhun ní ró. <sup>12</sup> Te je ní cunahán cácandije ró, te jini ñúhún jéē cúu ró téē stéén nuú. Te tuú chi sa cájini ñúhún tucu máá ró téē stéén nuú ró táca jnúhun Yaā Dios jeē tú yí cuiṭi. Chi sa ní canduu ró nájnūhun sūchi yíquin jéē jini ñúhún caxin i, chi ná tu ije i caji i jeē ndáva. Súcuan cácuu ró chi ná tu ije ró jín jnúhun yí gá. <sup>13</sup> Chi núu máni máá nájnūhun sūchi yíquin jéxin cácuu ró, núu súcuan te tu cúu jécūhun váha ní ró jnúhun ndaa. <sup>14</sup> Te ñayuu jeē jé ni ije, chi cáyeji i jeē ndáva, cúu jeē ní cutúhva váha i te je cúu nacáji i jeē váha jín jéē neé.

**6**

<sup>1</sup> Núu súcuan te na yáha yó núu táca jnúhun Cristo jeē tú-ni yí, te na quiṭiñ yó nuū jnúhun yí gá, návāha na ñe váha ní yó jín jnúhun ya. Te ma ndejéé tucu yó jín jnúhun jeē ní scuáha yó xilna gá, suu jnúhun jeē

nácani ni yō stóo yo cuéchi yó jéē cúu yō sáha, jíin jéē candíje yó Yaā Dios, <sup>2</sup> jíin síquī jeē jéndute, jíin síquī jeē soó ndaha xini ñáyuu, jíin síquī jeē nátecu ndiyi, jíin síquī jeē jnahnū ndetū ñayuu ní cáni. <sup>3</sup> Núu súcuān te na yáha yó núu táca jeē yáha te quívi yó núu jnūhun yí gá, te núu cáñha Yaā Dios jnūhun.

<sup>4</sup> Chi iyó ñáyuu jeē jé ni jecūhun ni i, te je ni jini i táca jéē jéhe Yaā Dios, te je ni quívi i nuū jnūhun stéén Espíritu Santo, <sup>5</sup> te suni je ni jini i jnūhun váha Yaā Dios jíin ndese coo poder yā tiempo quíji. <sup>6</sup> Te ñayuu un núu caca yátá i, te ma cúu ga ndejéé jeé i jeé nácani ni i. Chi jeé cáca yátá i cúu nájñūhun jeé nácani tucu i Sēhe Yaā Dios jíca cruz, te cájéhe i jnūhun canu yā cájito ñayuu. <sup>7</sup> Te ñayuu chi cácuu i nájñūhun ñūhun jeé cúun váha saū nuū te ndóyo váha. Te núu cánecoo jeé váha caji tēe casájnīnu, yūcuán na te cúsi ni Yaā Dios jíin. <sup>8</sup> Te núu máni iñu yóquin jíin yucū sajnēñu cánecoo nuū, núu súcuān te tu jéjnīñu cuiñi, te squéndōo ñi yā, te ñi quívi te cayū. Súcuān jnahnū ndetū ñayuu cájica yátá.

#### *Jeē ñūhun ni yō táca jéē váha jeē coo*

<sup>9</sup> Te máá ró jíjnáhan ró hermano, vésú cácahān rī súcuān jíin ró, te cácuáñnu ni rī jeé cácuu ró ñayuu cuiñi ñihin, chi ñayuu ni jnama ya cácuu ró. <sup>10</sup> Te Yaā ndaā cúu Yaā Dios, te tu náa ni yā jniñu casáha ró. Chi síquī jeé cáhiyo manī ró jíin yá te ni cacundáhú ni ró hermano ró cácañdije, te ni cachindéé ñáhán ró i, te súcuān casáha ró ndé vjna. <sup>11</sup> Te cácani rī jeé níni súcuān sáha ga ná ñi ná ñi ró ndé quívi sándihí, chi jeé sáha ró súcuān te ñihin ró ndihí jeé cáñūhun ni ró. <sup>12</sup> Te cácani rī jeé ma cúhuun ni ró, chi sa ndacu ró ñáyuu cácañdije jeé jíin paciencia cándetu i, te jeé yúcuān ñihin tahú i táca jéé ní jéjnūhun ya.

<sup>13</sup> Chi quívi jeé ní jéjnūhun Yaā Dios nuū Abraham, te ni ndacunehen ya maá yá jeé ní jéjnūhun téyí yá, chi tuá na inga ndacunehen ya jeé cujéñnu ga vésú maá yá jeé cuu testigo yá. <sup>14</sup> Te ni cahān yā: Jendaā ndije jeé váha ndasí sáha rī jíin ró, te sáha rī jeé nducuehē ndasí yúcuān ró, achí yá jíin Abraham. <sup>15</sup> Te jíin paciencia ni condetu de, te súcuān te ni ñihin de jeé ní jéjnūhun ya. <sup>16</sup> Te núu cáhān teyí ñáyuu, te ndacunehen i síhví ñi jeé cujéñnu ga vésú maá i. Te núu íyó ñi jnūhun jeé tu cácañdije jñāhan, te núu ñi tēe cáhān teyí de jíin síhví Yaā Dios, yúcuān na te jécuiñi jeé cátejñāhan. <sup>17</sup> Te suni súcuān Yaā Dios, chi ni jéjnūhun téyí yá nuū ñáyuu jeé cuáha ya tahú i. Chi ni cuni yá jeé cucáñnu váha ni i jeé ma nácani yátá ní yá síquī jeé ní jéjnūhun ya nuū i. <sup>18</sup> Chi ma nácani yátá cuiñi ní yá síquī jnūhun jeé ní cáhān yā uū jíinu, ñi jeé ní jéjnūhun ya, te inga jeé ní cáhān teyí tucu ya síquī suni jnūhun ún. Chi tu stáhú cuiñi yá. Te jeé yúcuān máá yó jeé ní tūhva

yó yá, chi yōhyo íyó ndeyí ni yō, te cáñūhun teyí ni yō jeé síquīcu ya jeé ní cáhān yā. <sup>19</sup> Te síquī jeé súcuān ñūhun ni yō, te suu sáha jeé quéndōo ñihin ánuá yō jíin jnūhun ya, te quéndōo ndaā ni yō, nájñūhun quéndōo ñihin barco jeé ñi gancho yuū. Te sáha jeé cúu quívi yó andiví núu íi gá, nájñūhun cuarto íi gá jeé ní íyo ichi yátá sahma ni ndita caa ñi vehe íi jenahán. <sup>20</sup> Te ñi yúcuān chi xihna gá Jesús ni quívi, návaha nune ya ichi quívicoo yó. Te jeé yúcuān ní cáni cúu ya sutū cujéñnu nájñūhun sutū Melquisedec.

#### *Jeé cúu Jesús sutū nájñūhun Melquisedec*

### 7

<sup>1</sup> Te máá Melquisedec ni cuu de rey ñuu Salem, te ni cuu de sutū nuū Yaā Dios, Yaā cujéñnu téyí. Te ni jéjnāhan de Abraham ná ni nandico Abraham jeé ní cundeyí de ní cajejnāhan de jíin táca rey. Te ni jícan tahú de jehē Abraham. <sup>2</sup> Te táca úxi ndajniñu jeé ní quende Abraham nuū táca rey un, ni jéhe de ñi ñi síquī un núu Melquisedec. Te síhví Melquisedec cuni cahān: rey jeé sáha jniñu ndaā. Te suni nání de rey Salem, te jnūhun Salem cuni cahān: jeé iyó ndeyí sí ñi. Te jeé yúcuān suni nání de: rey jeé sáha jeé iyó ndeyí sí ñi ñayuu. <sup>3</sup> Te tu cáhān tutu jnūhun tátá de ní náná de ní táca jíi de. Ni tu cáhān núu ni cacu de, ni núu ni jíhi de. Chi cúu de nájñūhun Jesús, Sēhe Yaā Dios, chi ní cáni cúu de sutū.

<sup>4</sup> Te condēhe jíjnāhan ró náa jéñnu ni cuu Melquisedec, chi jíi jéñnu yó Abraham ni jéhe de ñi ñi síquī táca jéé uxí nuū de síquī táca jéé ní quende de nuū rey un. <sup>5</sup> Te jíni yó jeé táca úxi ndajniñu ni canihñ ñayuu, ni cájéhe i ñi ñi síquī un ní caquihñ tēe cácuu sutū yúcuān Leví, nájñūhun cáhān ley Moisés. Te ni caquihñ de nuū ñáyuu cácuu jñāhan de, chi ñi-ñi yucūn Abraham cácuu de jíin i. <sup>6</sup> Te Melquisedec nasūu yúcuān Leví cúu de, te vésú súcuān te ni quihñ de ñi ñi síquī táca jéé uxí nuū Abraham. Te suni ní jícan tahú de jehē Abraham, vésú cúu Abraham tēe jeé ní jéjnūhun ya nuū. <sup>7</sup> Te jíni váha yó jéé tēe cújéñnu ga cúu jeé jícan tahú jehē tēe núu ga. <sup>8</sup> Te ñayívi yáha chi táca sutū cáquihñ de ñi ñi síquī táca jéé uxí nuū ñáyuu, vésú cácuu te tēe cájihí. Te Melquisedec suni ní quihñ de, te máá de chi cáhān tutu íi jeé tēcu de. <sup>9</sup> Te suni cuu cahān yó jeé Leví, tēe jeé ní quihñ ñi ñi síquī táca jéé uxí nuū ñáyuu, suni nájñūhun nuū maá de ní quihñ Melquisedec ñi ñi síquī táca jéé uxí. Chi jeé ní jéhe Abraham nuū Melquisedec, suu cúu nájñūhun jeé suni ní jéhe de jeé síquí Leví jíin ndihí ga yucūn de jeé quíji. <sup>10</sup> Chi yucūn Abraham cúu Leví, te vésú ná tu cacu de quívi jeé ní jéjnāhan Melquisedec Abraham,

te nájñūhun jeē ni jéhe máá de cúu jeē ni jéhe Abraham.

<sup>11</sup> Te yucūn Leví ni cane sutū Aarón jín táca gá sutū ní quijicoo. Te ni castéén de ley yá nuū ñáyuu Israel jenahán. Te núu ní cúu sáha de jeē quendōo ndaā ñayuu jín ley un núu, te tuá cánuú jeē núcuñí inga clase sutū lugar Aarón jín yucūn de. Te inga clase sutū cúu Cristo jeē cúu ya nájñūhun sutū Melquisedec. <sup>12</sup> Te núu nucuiñí inga clase sutū, te suni cánuú sáma ley siquī yucūn de. <sup>13</sup> Núu súcuan te ni sáma ley un, chi cáhán tutu íi jeē Jítoho yō Jesús cúu inga clase sutū ún, te ni cacu ya chíji inga yucūn. Te yucūn ní quiji ya ún, tú ni ñn ní cúu sutū. <sup>14</sup> Chi jíní váha yó jéé chíji yucūn Judá ni cacu Jítoho yō. Te yucūn ún chi tu ní cáhán cuiñí Moisés jeē cánecoo sutū.

<sup>15</sup> Te cájí cúu jeē ní nucuiñí Cristo jeē cúu ya inga clase sutū nájñūhun sutū Melquisedec. <sup>16</sup> Te tu cúu ya sutū jeē ní cacu chíji yucūn Leví nájñūhun cáhán ley jenahán. Chi cúu ya sutū siquī jeē ndiso ya poder cotecu yá ñí cáni te ma cúu cuiñí yá. <sup>17</sup> Chi súcuan ni cahān Yaā Dios jñūhun ya: Ñí cáni cúu ró sutū, nájñūhun sutū Melquisedec.

<sup>18</sup> Núu súcuan te jñíñu jeē ní ndacu ley jenahán siquī sutū, chi ni naa vijna, chi tu ní ñhín jñíñu quendōo ní cáni. <sup>19</sup> Chi ley Moisés tu ní sáha jeē quendōo ndaā ñayuu. Te ni ñhín yō ñn jñūhun váha ga jeē ñūhun ni yō jeē ndáha Cristo cuēchi yó, te súcuan ni cuyajni yó núu Yaā Dios.

<sup>20</sup> Te jín jéé ni cáhán teyí Yaā Dios te cúu Jesús sutū. <sup>21</sup> Chi táca gá tēe ún, nasūu jín jñūhun jeē ni cáhán teyí yá ní cúu de sutū. Te Jesús chi ni cahān teyí Yaā Dios jeē cuu ya sutū, chi súcuan cáhán tutu: Ni cahān teyí máá Jítoho yō Yaā Dios, te ma nácani yátá ni yá:

Ñí cáni cúu ró sutū, nájñūhun sutū Melquisedec.

Achí yá. <sup>22</sup> Núu súcuan te jín Jesús ni cucutú ñn contrato váha ga vēsú ley jenahán. <sup>23</sup> Te táca gá sutū ún, chi ní iyo cuehē de, chi siquī jeē cájhi de te tu ní cúu cuiñí de ñí cáni.

<sup>24</sup> Te Jesús chí cúu ya sutū jeē cuiñí ñí cáni, chí técu ya ñí cáni. <sup>25</sup> Jeē yucuan ndiso jñíñu ya jnama ya ñayuu quijicoo nuu Yaā Dios, cotecu i ñí cáni. Chi ñí cáni técu yá te cáhán yá jehé i jín Yaā Dios.

<sup>26</sup> Núu súcuan te váha ndasí sutū kujéñu cúu Jesús, jeē nájñūhun jini ñúhún yó. Chi sutū íi cúu ya, te tú na cuēchi ya, te íyó ndoo ya, te tu cúu ya jñáhan ñayuu casáha cuēchi, te kujéñu téyí yá nde nuū sucún gá andiví. <sup>27</sup> Te máá yá tu jini ñúhún sáha ya nájñūhun ni casáha sutū cácujeñu jenahán, jeē ndiquiví ni casocó de quiti siquī cuēchi máá de xíhna gā, te sáá te siquī cuēchi ñayuu. Chi ñn jínu-ni ní socó yá máá yá jehé yó, te

ni cuu-ni. <sup>28</sup> Chi ni jeni ley Moisés táca sutū kujéñu jeē tú na fuerza squicu váha. Yūcuán na te cuéé gá te ni cahān teyí Yaā Dios. Te jín jéé ni cáhán teyí yá, te ni jeni ya Sēhe ya jeē cúu ya sutū kujéñu, te sutū ndaā sutū váha cúu ya ní cáni.

*Jeē ndiso jñíñu Cristo siquī ñn contrato jeé*

## 8

<sup>1</sup> Núu súcuan te jñūhun cánuú gá jeé jé ni cahān rí cúu yáha: Névéha yó ñn sutū kujéñu nájñūhun ni cahān rí, te ndéé yá lado váha mesa nuū ndácu jñíñu máá Yaā kujéñu nde andiví. <sup>2</sup> Te vijna te cúu ya sutū nde andiví, jeé cúu ndije lugar íi jeé ní sáha máá Jítoho yō Yaā Dios, nasūu ñayuu. Chi tu cáa nájñūhun vehe íi jenahán jeé ní casáha ñayuu. <sup>3</sup> Te táca sutū kujéñu ni jeconaa de jeé socó de ndajñíñu jín quiti nuu Yaā Dios. Núu súcuan te Jesucristo suni ní jini ñúhún jeé socó yá jeé cúu ya sutū. <sup>4</sup> Te núu ní iyo ga yá ñni ñayiví, te ni ma quijnáhan jeé cúu ya sutū jín táca gá sutū, chí níni cásocó gá de quiti nájñūhun cáhán ley Moisés. <sup>5</sup> Te jñíñu casáha de, tu quijnáhan jín jéé iyó andiví. Chi cúu ñn muestra-ni jeé stéén siquī andiví. Te cúu nájñūhun jeé ní cahān Yaā Dios jín Moisés quiví ní quejéé de sáha de vehe íi jenahán: Coto váha ró jéé sáha ró táca ndajñíñu nájñūhun jito jeé ní stéén rí nuu ró nde xini yúcu, áchí Yaā Dios jín de. <sup>6</sup> Te vijna te sáha Cristo jñíñu jéñu ndasí gá vesú jeé casáha táca sutū ún, chí ndiso jñíñu ya siquī contrato jeé jéé yóhyo váha ga, chí ndiso jñūhun jéñu ga jeé ní jéñūhun Yaā Dios.

<sup>7</sup> Chi contrato ley xíhna ñúhún, núu jeé ni sáha jeé queé váha jñíñu núu, te tuá cánuú jéé cóo contrato uu. <sup>8</sup> Chi ñayuu jenahán un jéé tu ní cáquendōo ndaā, suhva ni cahān Yaā Dios jín í, áchí tutu:

Quiji quiví jeé nasáha rí ñn contrato jeé jín ñayuu Israel jín ñayuu Judá, áchí Jítoho yō Yaā Dios.

<sup>9</sup> Te ma cóo nájñūhun contrato jeé ni sáha rí jín jí i jenahán,

quiví jeé ní jñi rí ndaha de jijnáhan de, te ni quenehen rí de ñni nació Egipto. Chi tu ní cásequen váha de jín contrato ley rí. Jeé yúcuán tuá ní táñúhún rí de, áchí Yaā Dios.

<sup>10</sup> Núu súcuan te suhva coo contrato jeé nasáha rí jín ñayuu Israel, nde na quíji quiví yúcuán, áchí Jítoho yō Yaā Dios:

Sáha rí jeé jécūhun ley rí nuu jeé níjnūni í, te suni ñni anuá í tee rí jñūhun ley rí.

Te cuu rí Yaā Dios maá í, te máá í cuu ñayuu maá rí.

<sup>11</sup> Te tuá jini ñúhún stéén í nuu jñáhan í nuu ñáni í,

návaha cuni í ndese Yaā cúu Jítoho í.

Chi ndihí i cuni ndese Yaá cúu ri, nde ñayuu núu ga jíin ndé ñayuu cujéhuu ga. <sup>12</sup> Chi cone cáhnu ni rí nuú i jeé ní casáha i jniñu néé, te ni ma núcuhun ga ni rí cuéchi ni casáha i. Achí Yaá Dios. <sup>13</sup> Te jeé ní cáhán yá jeé cuáha ya ñin contrato jeé cúu jeé ní cachi yá jeé tuá cuajniñu contrato xihna ñúhún. Te ñin jeé ní cutúhú jéé tuá jejniñu, chí jíni yó jeé je yajni naa.

*Vehe ñi ñayivi yáha ní steén ndese cáa andívi*

## 9

<sup>1</sup> Te ndaá chí contrato xihna ñúhún ni ndacu jniñu ndese chíñúhún i ya, jíin ndese coo ñin vehe ñi ñi ñayivi yáha. <sup>2</sup> Te ní cuváha vehe ñi ún, te ní Iyo uú cuarto. Te cuarto xihna ñúhún jéé naní cuarto ñi, ní ñin candelero oro jíin mesa oro jíin pan ñi. <sup>3</sup> Te ní Iyo sahna jeé ndíta caa jeé ndihyu inga cuarto jeé naní cuarto ñi ndasí gá. <sup>4</sup> Te ñi un ní Iyo ñin altar oro nuú cayú sūje cutú, jíin yéjñú jeé ñúhun contrato ley, te máni oro cúu ní síquí yéjñú. Te ñi yéjñú un ñe ñin tijehén oro jeé ñúhun maná jeé ní cuun andívi. Te suni ñe vara Aarón jeé ní nane numa, jíin tabla yuú jeé yosó jñuhun contrato ley. <sup>5</sup> Te síquí yéjñú un ní cahíin ndindúú figura ndajéhé querubín jeé steén jeé ñe Yaá Dios. Te ní sáha cuandahú síquí tapa yéjñú nuú ní cóso yuyú ññi jeé ndáhva cuéchi. Te tu núne yó cáhán gá yó síquí táca yúcuán yáha.

<sup>6</sup> Te ná ní jinu táca un, te núne-ni núne-ni quívicoo sutú ñi cuarto xihna ñúhún jéé casáha de jniñu jeé cúu de sutú. <sup>7</sup> Te ñi cuarto uú, chí tu cúu quívicoo na-ni sutú jíin inga ñayuu, chí máñúhún-ni sutú cujéhuu ga cúu jeé quívi, te suni ñin-ni vuelta jeé cuyá. Te suni ma cúu quívi de núu tú ññi quiti jeé socó de nuú Yaá Dios jeé síquí cuéchi máa de jíin síquí cuéchi ñayuu. <sup>8</sup> Te jíin yúcuán steén Espíritu Santo nuú yó jeé ná ní Iyo ga cuarto ñi xihna ñúhún ñi ñayivi, te tu ní núne ichi jeé quívi ñayuu ñi lugar ñi ndasí jeé cúu andívi. <sup>9</sup> Chí táca yúcuán cúu jeé ní steén ndese cúu tiempo vijna. Chí jeé ní casocó i ndajniñu jíin quiti nuú Yaá Dios, chí tu ní cúu cuiti sáha jeé quéndóo ndoo ánuá ñayuu ní casocó ún. <sup>10</sup> Chí táca un ní steén máni síquí yiquí cúñu yó, ndese caji yó, ndese coho yó, ndese ndundoo yó. Te ní jejniñu máa-ni nde ní quiji Cristo jíin ñin modo váha ga.

<sup>11</sup> Chí vijna je ní quiji Cristo, te cúu ya sutú cujéhuu ga jeé ndíso jniñu ya síquí táca jéé váha jeé ní quiji vijna. Te cúu ya sutú ñi lugar ñi nde andívi jéé cujéhuu ga te váha ga vesú cuarto ñi jenahán. Te nasúu jéé ní casáha ñayuu cúu, chí nasúu cuenta ñayivi yáha cúu. <sup>12</sup> Te jeé ní quívi ya ñi lugar ñi ndasí gá nde andívi, te nasúu jíin ññi ndixúhú ní ññi becerro, chí jíin ññi maá yá

ni quívi ya, ní socó yá ñin jínu-ni jeé ní cáni. Te súcuán ní nama ya yohó jéé cótecu yó ní cáni. <sup>13</sup> Chí nde jenahán te ññi stíquí jíin ññi ndixúhú jíin yáa becerro jeé ní cayú nuú altar, ní cacosó yuyú de síquí ñayuu jeé tu íyó ndoo ánuá i, te súcuán ní ndundoo i nuú yá. <sup>14</sup> Te núu ní ñihín jniñu ññi táca quiti ún, te nagá ní cuu ññi maá Cristo. Chí Yaá ndoo cúu ya, te ní socó yá maá yá nuú Yaá Dios, ní sáha Espiritu jeé íyó ní cáni. Te ññi yá nácate ánuá yó nuú jniñu néé jéé cúu yó sáha. Te súcuán te cuu cuajniñu yó núu Yaá Dios, Yaá técu.

<sup>15</sup> Jeé yúcuán cúu jeé ndíso jniñu ya síquí ñin contrato jeé. Chí ní jíhi yá, te súcuán ní quende yá cuéchi ní casáha ñayuu ná ní Iyo i chíji contrato xihna ñúhún. Te ñayuu jeé cána Yaá Dios i quívicoo i ndaha ya, ñihín i tahú i jeé cóo ní cáni, náñúhun ní jejniñu ya. <sup>16</sup> Chí cúu náñúhun núu sáha ñin téé acta jeé cahán síquí tahú, te nde na cúu de te ñihín jniñu. <sup>17</sup> Chí núu técu gá téé ní sáha, te tu ñihín jniñu. Te nde núu ní jíhi de, te sáa te jéjniñu. <sup>18</sup> Te suni súcuán contrato xihna ñúhún, suni ní jini ñúhún cucutú jíin ññi quiti ní jíhi. Te contrato jeé chí ní cucutú jíin ññi Cristo jeé ní jíhi yá. <sup>19</sup> Chí ná ní cuu ní cachi Moisés táca jniñu ndácu contrato ley un núu ndivii ñayuu, te ní quihin de ññi becerro jíin ññi ndixúhú jíin ndute, te jíin íxi cácuéhé jíin yúcu hisopo ní cóso yuyú de síquí libro ley jíin síquí ndivii ñayuu. <sup>20</sup> Te ní cahán de: Váha cúu ññi jeé cucutú contrato ley jeé ní cána Yaá Dios jíin yó, achí de. <sup>21</sup> Te suni ññi un ní cóso yuyú de nde maá vehe ñi jíin táca ndajniñu ní cajéjniñu de jeé cáchiñúhún de ya. <sup>22</sup> Te je yajni ndihí ndajniñu, chí cahán ley un jeé jini ñúhún ndundoo jíin ññi. Te núu ma cáti ññi te ma cóne cáhnu ní yá nuú cuéchi núu.

*Jeé ní sóco Cristo maá yá jeé quende yá cuéchi*

<sup>23</sup> Núu súcuán te táca ndajniñu un jéé cácuu muestra táca jéé íyó andívi, ní jini ñúhún ndundoo jíin ññi quiti. Te táca máa jéé íyó andívi, chí ní jini ñúhún ndundoo jíin ññi Cristo jeé yóhyo váha ga. <sup>24</sup> Te Cristo chí tu ní quívi ya ñi lugar ñi jeé ní casáha ñayuu, chí ñin muestra-ni ní cuu un jéé steén ndese íyó lugar ñi ndije nde andívi. Chí máa andívi ní quívi ya, te vijna ñe ya nuú Yaá Dios jeé cahán yá jehé yó. <sup>25</sup> Te máa sítú cujéhuu ga quívi de táca cuyá ñi cuarto ñi gá jeé socó de ññi quiti. Te Cristo tu ní sóco yá maá yá cuéhé jínu, chí ñin jínu-ni. <sup>26</sup> Chí núu jeé súcuán te cánuu jéé cuéhé jínu ndoho ya nde ná ní jecóo ñayivi te nde vijna núu. Te tuú chí sa tiempo cuándihí yáhá ní quenda ndijin yá ñin jínu-ni jeé ní cáni, ní socó yá maá yá jeé ní quende yá cuéchi. <sup>27</sup> Te náñúhun ní cundaá jeé cúu táca ñayuu ñin jínu-ni, yúcuán na te

sándaã Yaã Dios jniñu i, <sup>28</sup> suni súcuan Cristo ni jihĩ yã ñin jĩnu-ni jeẽ ni sócõ yã maã yã jeẽ ni quende yã cuẽchi cuehẽ ñayuu. Yũcuán na te ndijji ya inga jĩnu, te nasũu jéẽ sócõ tucu ya maã yã jeẽ quẽnde yã cuẽchi, chi sa suhva jeẽ jnãma ya ñayuu jeẽ cãndetu i jeẽ ndĩji ya.

## 10

<sup>1</sup> Chi ley Moisés ni cuu ñin muestra-ni tãca jéẽ váha jeẽ ni quijji jĩn Cristo, ñin jeẽ steẽn-ni ndese coo máã jéẽ váha. Jeẽ yúcuan tu cúu cuiti sãha ley un jéẽ quẽndõ ndaã ñayuu jeẽ quijjicoo i nuũ Yaã Dios jeẽ cãsocõ i quiti nuũ cuiyã nuũ cuiyã. <sup>2</sup> Chi núu ní cúu sãha ley un jéẽ quẽndõ ndaã i, te jecuiñĩ jeẽ cãsocõ i quiti núu. Chi núu ní cúu, te ñin jĩnu-ni te je ni quẽndõ ndoo ánuã ñayuu cãsocõ ún, te ma yũhu gã anuã i jeẽ ní sãha i cuẽchi núu. <sup>3</sup> Te tuú chi jeẽ cãsocõ i quiti ún tãca cuiyã, sa sãha jeẽ núcũhun ni i cuẽchi i. <sup>4</sup> Chi niñĩ siquĩ jĩn niñĩ ndixuhú, ma cúu cuiti quende cuẽchi.

<sup>5</sup> Jeẽ yúcuan ná ni quiji Cristo ñin ñayivĩ, te ni cahãn yã jĩn Yaã Dios:

Jeẽ jéhi i quiti jĩn jéẽ jéhe i ofrenda nuũ ní, chi tu ní núnahan ni ní.

Te ni sãtũhva ní yiqui cũñu maã ná jeẽ sócõ na.

<sup>6</sup> Te tu ní cúsĩ ni ni jéẽ jéhu i quiti te sócõ i ti jeẽ ndũndoo cuẽchi i núu.

<sup>7</sup> Yũcuán na te ni cahãn ná: Yãha véji ná jéẽ squĩcu ná jniñu jeẽ núnahan ni ní, Tãtã Yaã Dios.

Chi súcuan je yósõ jnũhun na núu tútu.

Achĩ Jesús. <sup>8</sup> Xihna gã ni cahãn yã jeẽ tu ní núnahan ni Yaã Dios te tu ní cúsĩ ni yã jeẽ jéhi i quiti te jéhe i ofrenda, jĩn jéẽ jéhu i ti te sócõ i ti jeẽ ndũndoo cuẽchi i núu, nãjnũhun ndãcu ley jenhãn jniñu. <sup>9</sup> Te ni cahãn gã yã: Yãha véji ná jéẽ squĩcu ná jniñu jeẽ núnahan ni ní, Tãtã Yaã Dios. Te jeẽ ni cahãn yã súcuan, te ni sãha ya jeẽ jecuiñĩ jeẽ cãsocõ i quiti, chi ni sócõ yã maã yã. <sup>10</sup> Te ni sãha Yaã Dios jeẽ iyó ndoo iyó í yõ nuũ yã siquĩ jeẽ ni sãha Jesucristo jeẽ núnahan ni Yaã Dios, suu jeẽ ni sócõ yã yiqui cũñu yã ñin jĩnu-ni jeẽ ní cãni.

<sup>11</sup> Te tãca sũtũ ún ndiquivĩ ni cahĩin de ni cajejniñu de nuũ yã, te cuehẽ jĩnu cajehni de suu quiti jeẽ sócõ sócõ de. Te tãcã un chi ma cúu cuiti quende cuẽchi. <sup>12</sup> Te Cristo chí ñin jĩnu-ni jeẽ ní cãni ni sócõ yã maã yã jeẽ siquĩ cuẽchi yó. Te sãá te ni cucõo ya lado váha Yaã Dios nuũ cujéhu ya. <sup>13</sup> Te yúcuan ndetu ya vjna nde quiji quivĩ jeẽ quẽnde yã poder tãca jéẽ jíto uhũ nuũ yã. <sup>14</sup> Chi jeẽ ni sócõ yã maã yã ñin jĩnu-ni, te ni sãha ya jeẽ ní cãni quẽndõ ndaã ñayuu ni sãndoo ya. <sup>15</sup> Te máã Espĩritu Santo suni cáji cahãn yã siquĩ jnũhun yãha, chi xihna gã cahãn yã:

<sup>16</sup> Suhva coo contrato jeẽ nasãha ri jĩn i, nde na quiji quivĩ yúcuan, áchĩ Jítoho yõ Yaã Dios:

Sãha ri jeẽ jécũhun ley rĩ ñin anuã i, te suni nuũ jeẽ nĩjnũni i tee ri jnũhun ley rĩ. <sup>17</sup> Yũcuán na te cahãn gã yã:

Ma núcũhun cuiti gã ni rĩ tãca cuẽchi jĩn jniñu néẽ ni casãha i.

Achĩ yã. <sup>18</sup> Núu súcuan te núu je ni ine cáhnu ni yã nuũ cuẽchi yó, te tuã cãnuú jéẽ sócõ gã yõ jeẽ siquĩ cuẽchi yó.

*Jeẽ ní nune ichi quivĩ yó nuũ Yaã Dios*

<sup>19</sup> Jeẽ yúcuan hermano, ma ñin jeẽ cãni ni yó, chí cuu quivĩ yó lugar ñi ndasi nde nuũ iyó Yaã Dios, siquĩ jeẽ ní jeti niñĩ Jesucristo.

<sup>20</sup> Chi ni nune ya ñin ichi jéẽ jéẽ cótecu yõ ní cãni sãha ya. Chi ná ni jihĩ yã te ni tahndẽ sahna ndíta caa jeẽ ndihyũ lugar ñi ndasi gã ñi vehe ñi. Te súcuan ni steẽn Yaã Dios jeẽ núne quivĩ yó lugar ñi ndasi gã nuũ iyó yã. <sup>21</sup> Te Jesús cúu sũtũ cujéhu ndasi jeẽ ndito yóhõ ñayuu cãcuu sehe Yaã Dios. <sup>22</sup> Núu súcuan te na quivĩcoo yó nuũ Yaã Dios, te na cóo ndije ndaa anuã yó, te na cándje nĩhin yó jéẽ iyó ndaa ndihĩ jnũhun ya. Chi jĩn niñĩ Cristo ni ndundoo ánuã yó nuũ tãca cuẽchi ni casãha yó, nãjnũhun ni ndundoo yó nuũ yã jeẽ ní jendute yó jĩn ndute. <sup>23</sup> Te na cuffĩ nĩhin yó jĩn jnũhun jeẽ cácahãn yõ jeẽ ñũhun ni yõ jeẽ sãha ya jeẽ váha jĩn yó. Te ma cáca yátã yó, chí váha squĩcu máã Yaã Dios jeẽ ni jéjnũhun ya nuũ yó. <sup>24</sup> Te na nácani ni yõ ndese stĩhvĩ jnãhan ni yõ jeẽ cundáhũ gã ni yõ jnãhan yó, jĩn jéẽ sãha yó jniñu váha. <sup>25</sup> Te níni na ndútũtũ yó chiñũhũn yó yã, te ma cúhuun ni yõ nãjnũhun casãha sava i, chí sa vihã yã na stĩhvĩ jnãhan ni yõ, chí je cájini yõ jeẽ cuãcuyajini quivĩ ndĩji ya.

<sup>26</sup> Te núu je ni jécũhun ni yõ te ni jetáhũ yó jnũhun ndaa, te núu máni sãha sãha-ni yó cuẽchi, núu súcuan te tuã na inga iyó jéẽ cúu siquĩ cuẽchi yó. <sup>27</sup> Chi sa quẽndõ máni ga jnũhun xeẽn siquĩ yõ jeẽ quiji quivĩ juicio te quiji yãñuhũn xeẽn jeẽ cayũ ñayuu jeẽ cájito uhũ i ya. <sup>28</sup> Ñayuu squéhichĩ ley Moisés, te núu uũ chí únĩ ñayuu cahãn cuẽchi siquĩ i, te cuu nahĩn i, te tuã na jnũhun cundáhũ ni iyó. <sup>29</sup> Te nagã ni cuu jeẽ ma ndóho xeẽn gã ñayuu jeẽ squéhichĩ i máã Séhe Yaã Dios, chí nãjnũhun jeẽ jeñũ nĩnu i siquĩ yã. Te sãha i jeẽ tu ndé jéjĩnu niñĩ yã jeẽ ní jeti siquĩ contrato jeẽ ndũndoo i nuũ yã nuũ. Te súcuan sãha ndevãha i nuũ maã Espĩritu Yaã Dios jeẽ sãha jeẽ váha yóhõ. <sup>30</sup> Chí je jĩn yõ jeẽ ni cahãn maã yã: Máã rĩ sãha jeẽ ndutahũ i siquĩ cuẽchi i, máã rĩ cuãha castigo i, áchĩ Jítoho yõ. Te suni cahãn: Máã Jítoho yõ sãndaã yã siquĩ cuẽchi ñayuu ya. <sup>31</sup> Núu súcuan te xeẽn ndasi cúu jeẽ quivĩ ñayuu ñin ndaha Yaã Dios, Yaã tẽcu, jeẽ ndutahũ i siquĩ cuẽchi i.

<sup>32</sup> Te na núcũhun ni rõ ndese ni cuu ichi yátã, nde náã sã ní quejéẽ ró caca ró jĩn luz yã, te ni cajendeyĩ ni rõ ni candoho ró tijni

jnündóho xeēn. <sup>33</sup> Chi sava ró ní cacahān neé i nuū ró te ni castóho i róhó ní cajito ñayuu. Te sava ga rō ni cajēhe ró jnūhun cuiñi ró jín ñayuu ni candóho súcuan. <sup>34</sup> Chi ni cacundáhú ni rō ñayuu ní cahīn vecāa jeē siquí yā, te ni cacusiñi ní rō vēsú ni caquende ñayuu ndajniñu ró. Chi ni casáha ró cuenta jeē ndé andiví cánevāha ró in tahū jeē váha ndasí gá jeē coo ní cáni. <sup>35</sup> Núu súcuan te ma siaá rō jnūhun jeē ní candije ndije ró jéē váha ni yā, chi cuehē ndasí táhū nihīn rō siquí ún. <sup>36</sup> Chi cánuú jéē cuándeyí ní rō návāha sáha ró jéē núnahan ni Yaā Dios, te nihīn rō jeē ní jéjnūhun ya. <sup>37</sup> Chi cáhán tutu i: ñin núnúu-ni te ndee Yaā ndiji, te ma cucuéé yá.

<sup>38</sup> Te ñayuu jeē ní ndahva rī cuēchi i, cotecu i jeē candije i jeē sáha ri jehē i.

Te núu na cáca yátá i, te ma cusīñi ní rī jín i. Achí Yaā Dios. <sup>39</sup> Te yóhó tu cácuu yó jnāhan ñayuu cájica yátá jeē jnahnú ndetū i. Chi sa cácandije yó jéē nihín tahū yō cotecu anuá yō.

*Siquí jnūhun cándije*

## 11

<sup>1</sup> Te jeē candije yó, suu cúu jeē cúndaā ndije ni yō jeē nihín yō táca jéē ñūhun ni yō, jín jéē jín váha yó jéē iyó ndije táca jéē tu cájito yó núu vijna. <sup>2</sup> Te ñayuu jehāhān chi ní jejnūhún yá i siquí jeē súcuan ni cacandije nihín i.

<sup>3</sup> Siquí jeē candije yó cúu jeē jécūhun ni yō jeē ní sáha Yaā Dios ñayiví jín jnūhun ni cahān-ni ya. Te jín poder Yaā Dios jeē tu jito yó núu, ni jecōo táca jéē jito yó núu.

<sup>4</sup> Ni candije Abel jeē sáha ya jehē de, te jeē yúcuan ní socó de jeē váha ga nuū Yaā Dios vēsú Caín. Te jeē yúcuan ní jejnūhún yá jeē iyó ndáa de, chi ní jetáhú yá jeē ní sócō de quitu nuū yá. Te vēsú ní jihí de, te cáhán gā ejemplo de jín yó nde vijna, chi ní candije ndáa de.

<sup>5</sup> Ni candije Enoc jeē sáha ya jehē de, te jeē yúcuan ní naquihín ya de cuahān de andiví, te tu ní jihí de. Te tu ní cánanihín ñayuu de, chi ní ndoñúhún-ni de ní sáha ya. Te achí tutu jeē nde ná tu naquihín ya de te ní cusīñi ní yá jín táca jéē ní sáha de. <sup>6</sup> Te núu tu cándije yó jéē sáha ya jehē yō, te tú na modo cusīñi ní Yaā Dios jín yó. Chi ñayuu jeē cuní quivicoo ndaha ya, cánuú jéē candije ndaā i jeē iyó yá jín jéē cuáha ya tahū nuū ñayuu jeē nducú i candije i ya.

<sup>7</sup> Te Noé ní candije de jeē sáha Yaā Dios jehē de, ná ní castūhun yá nuū de jeē coo jnündóho jeē ná tu coto de jeē coo. Te jeē yúcuan ní jendetū de ní sáha de barco cáhnu jeē naní arca, návāha cácu de jín ní vehe de. Te jeē súcuan ní candije de, te ní cane cuēchi siquí ñayuu jeē tu ní cándije i ya. Te ní

ndahva yā cuēchi de siquí jeē ní candije de jeē sáha ya jehē de.

<sup>8</sup> Te Abraham ní candije de jeē sáha ya jehē de, te jeē yúcuan ní jetáhú de ná ní cahān yá jín de jeē quihín de in lugar nuū cuáha ya cuu tahū de. Te ní quenda de cuahān de, vēsú tu jín de ndé nuū quihín de. <sup>9</sup> Ni candije de jeē sáha ya jehē de, te jeē yúcuan ní condee tatú de nuū ñūhun jeē ní jéjnūhun ya jeē cuáha ya nuū de. Te ní condee de vehe ñi, te suni súcuan Isaac jín Jacob, chi sēhe de ún suni inuú nihín tahū i jín de jeē ní jéjnūhun ya. <sup>10</sup> Chi ní ñūhun ní de condee de máá ñuu andiví jéē iyó cutú cimientu, te máá Yaā Dios ní jequin yá ní sama ya ñuu ún.

<sup>11</sup> Te suni ní candije máá Sara jeē sáha ya jehē ña, te jeē yúcuan ní nihín ña fuerza jeē ní jecūhun sēhe ña. Chi nde ná ní yāha ndasí cuiyā ña, te ní cacu in sēhe yí ña, chi ní candije ña jeē squicu Yaā Dios jeē ní jéjnūhun ya. <sup>12</sup> Te súcuan ní cuu jeē ní táhū cuehē ñayuu ní sáha in-ni Abraham, vēsú je jéhnu ndasí de. Te yucūn de ní nducuehē ndasí, nájñūhun quimi andiví, jín ñiti yumar, jeē ma cúu cuiñi cahu yó.

<sup>13</sup> Te táca téee cándije un, ní cajihí de. Te vēsú tu ní cájito de jeē ní jéjnūhun ya, te ní cajini váha de jeē cóo, te ní casusiñi ní de jeē cóto de inga tiempo. Te súcuan ní cacahān de jeē ñayuu ñuu jicá ñayuu tatú cácuu de iní ñayiví yáha. <sup>14</sup> Te táca téee jeē cahān súcuan, chí stéen cají de jeē nducú de in ñuu jeē cúu andiví núu cúu ñuu máa de. <sup>15</sup> Chi núu jeē cáncani ní de siquí ñúu nuū ní quendacoo de, te iyó modo jeē nándicó cóo de te núu jeē cácani de núu. <sup>16</sup> Te túu chí ní cacuu ndasí ní de coyúcú de inga ñuu váha ga jeē cúu ñuu andiví. Jeē yúcuan tu cūcanu Yaā Dios jeē naní yá Yaā Dios de jijnāhan de, chí je ní sátūha ya in ñuu nuū cóyúcú de.

<sup>17</sup> Ni candije Abraham jeē sáha ya jehē de, te jeē yúcuan ní jehēn de jín Isaac jeē socó de i, ná ní jito ndee ya de. Te ní tyo tūhva de jeē socó de sēhe de un jéē mañúhún ní nuū de, vēsú ní nihín de jnūhun jeē ní jéjnūhun ya suhva siquí i: <sup>18</sup> Isaac cúu téee jeē squejéé rí yucūn ró quihín, achí jnūhun ní jejnūhun ya. <sup>19</sup> Te ní sáha de cuenta jeē cúu nastécu Yaā Dios i. Te nájñūhun súcuan ní cuu, chí cuu cahān yō jeē nájñūhun ní jihí i te ní natecu i nuū de, chí ní jesi-ni ya jeē ma cáhni de i.

<sup>20</sup> Ni candije Isaac jeē sáha ya jehē de, te jeē yúcuan ní cahān de jeē váha tahū nihín sēhe de Jacob jín Esaú tiempo quiji. <sup>21</sup> Te suni súcuan ní candije Jacob, te jeē yúcuan, náa je yajni cuu de te ní cahān de jeē váha tahū nihín ndinditú sēhe yí José. Te yítu de vara de, ní chiñúhún de Yaā Dios. <sup>22</sup> Te suni súcuan ní candije José, te jeē yúcuan, náa cuacuyajni cuu de, te ní cahān de jeē táca yucūn Israel, in quiví quendacoo i naciōn

Egipto. Te ni ndacu de jniñu jeē chindūji i yiqui de ñuu nuū quáivoo i.

<sup>23</sup> Te ná ni cacu Moisés, te tátá i náná i ni cacandije de jeē sáha ya jehē de, te jeē yúcuan ní cacondito sáhi de i uní yoō. Chi ni cajito de jeē lúu cáa i, te tu ní cáyuhú de siquī acta jeē ní sáha rey jeē na cúu táca súchi yá. <sup>24</sup> Te suni súcuan ní candije Moisés, te jeē yúcuan ná ní jehnu de te tuá ní jéhe de jñuhun cuu de sēhe ñahan cúu sēhe síhí rey Egipto. <sup>25</sup> Chi sa ni cuu ni de ndoho de jíin táca jñahan de ñayuu Yaā Dios, nasūu jéē cusī ní de jecu-ni tiempo jíin cuéchi. <sup>26</sup> Chi ní sáha de cuenta jeē núu cahān neē ñayuu siquī de jeē siquī Cristo, te yúcuan sáha jeē cucá ndasí gá de ndihí jeē ndíso jñuhun Yaā Dios, vésú jeē nihín de ndihí ndajniñu cúca iyó nación Egipto. Chi ní ñuhun ní de jeē cuáha ya tahú de. <sup>27</sup> Te jeē súcuan ní candije de, jeē yúcuan ní quenda de nación Egipto cuahān de. Te tu ní yúhú de jeē quití ní rey nuū de. Chi ní ñin nihin de siquī jniñu sáha de, chi ní sáha de cuenta jeē je jíto de nuū Yaā jeē tu cúu coto yó núu vijna.

<sup>28</sup> Te jeē súcuan ní candije de, te jeē yúcuan ní cahān de jeē na cáhni ñayuu londé pascua. Te ni ndacu de jniñu jeē na cóso yuyú i niñí tī yehyí i, návaha núu na quiji ndajéhé jeē cáhni yá táca sēhe nuū ñayuu Egipto, te ma cáhni yá sēhe nuū ñayuu Israel. <sup>29</sup> Te siquī jeē ní cacandije ñayuu Israel jeē sáha ya jehē i, te ni cayāha-ni i méhñu Mar Rojo, chi ní nune ya te ni natūu-ni ñuhun íchi. Te suni súcuan ní cacuni tēe Egipto yáha de núu, te ní nandihyū-ni ndute siquī de ní cajihí de.

<sup>30</sup> Ni cacandije soldado jeē sáha ya jehē de, te jeē yúcuan ní cotúu jeē ní condúu ndihyú ñuu Jericó, ná ní cajicó ndúu de uxá quáiví. <sup>31</sup> Te Rahab, vésú ñahan tñni ní ni cuu ña, te ní candije ña jeē sáha ya jehē ña. Te ní chindéé ñáhán ña tēe Israel jeē ní quijicoo ní condéhé yuhu ndese iyó ñuu ña. Te jeē yúcuan tu ní jíhí ña jíin ñayuu nihni ní ñuu ña ún.

<sup>32</sup> ¿Te ndé jñuhun ga cahān rí núu súcuan? Chi tuá na tiempo jeē nácani ga rí jñuhun Gedeón jíin Barac jíin Sansón jíin Jefeé jíin David jíin Samuel jíin táca tēe ní canacani jñuhun ya nde jenahán. <sup>33</sup> Ni cacandije de jeē sáha ya jehē de jíinñahan de, te jeē yúcuan ní cacundeyí de ní canajni de táca ñuu náhnu, te váha ní candacu de jniñu nuū, te ní chindéé ñáhán yá de nájñuhun ní jejnūhun ya. Te núu sava de ní jesi Yaā Dios yuhu ndícaha jeē tu ní cáyeji tī de. <sup>34</sup> Te sava de tu ní cáyú de sáha ñuhun jeē cayú xeēn. Te sava de ní cácu de jeē tu ní jíhí de jíin espada. Te sava de ní nanihín ní de náa tuá fuerza de núu, te ndacuí teyí ní Iyo de nuū guerra, te ní cacundeyí de siquī soldado táca ñuu jicá jéé jíto uhú ún de. <sup>35</sup> Te sava ñahan ní natecu sēhe ña jeē ní jíhí i.

Te sava ga ñayuu chi sa suhva ní candoho xeēn i nde ní cajihí i. Te tu ní cájēhe i jñuhun jeē siaá i jñuhun ya te cácu i, chi ní catee ní i jeē natecu i coyúcu váha ga i andiví. <sup>36</sup> Te sava ga i ní casacátá ñayuu nuū i, te ní cacani ñayuu i, te nde ní caconuhní cadena i ní cahñin i vecāa. <sup>37</sup> Te ní cajēhe yuū xiní i, te ní cajehnde i jíin sierra, te ní cajito ndee i jíin jñundóho, te ní cajehni i jíin espada. Ni cajica cuu i cháha chúcuan, te máá ñií lánchi máá ñií ndíxuhú ní cañuhun i. Ní candoho ndáhú i, ní cajito i jñundóho, ní castóho ñayuu i. <sup>38</sup> Váha ndasí ñayuu ní cacuu i jeē tú cuiti ñayuu ñayiví súcuan, te vésú súcuan te ní casáha ñayuu jeē ní cajica cuu i nuū ñuhun téhé jíin chúji yucu, ní cahñin i yaū cava jíin yáú ñuhun. <sup>39</sup> Te táca ñayuu yáha, vésú ní jejnūhún yá i jeē ní cacandije nihin i jeē sáha ya jehē i, te tu ní cajito i nuū jeē ní jejnūhun ya. <sup>40</sup> Chi ní sátúhva Yaā Dios ñin jniñu váha ga, te suu cúu jeē sáha Cristo jíin yó, návaha ñin cáhnu-ni nihin yó tahú yó jíin i, te jeē yúcuan cúu jeē ná tu nihín i ndihí tahú i.

*Jeē na cócunū yó nuū maá ñin-ni Jesús*

## 12

<sup>1</sup> Te iyó cuéhé ndasí ñayuu un jéé ní cacandije nihin i jeē sáha ya jehē i, te nájñuhun ní jicó ndúu i yóhó, cástéén gā i nuū yó nde vijna jeē suni súcuan na cándije yó. Núu súcuan te suni máá yó, na téjiyo yó táca jéé sajnéñu jíin cuéchi jeē ní cáan yó jíin. Te na cuándeýí ní yó cunu yó jíin carrera jeē ní jéhe ya jeē cunu yó. <sup>2</sup> Te na cócunū váha yó Jesús, Yaā jeē ní scándije yóhó te sáha ya jeē íje váha yó jíin jñuhun ya nde jñu íje yó. Chi máá yá ní jendeyí ní yá ní ndoho ya jicá cruz. Te vésú jñuhun canu cúu jeē súcuan cuu yá, te tu ní sáha ya cuenta. Chi ní ñuhun ní yá jeē sa cusī ndasí ní yá ná ní cuu ní ndoho ya. Yúcuán na te ní cucōo ya lado váha mesa nuū ndácu Yaā Dios jniñu.

<sup>3</sup> Te na nácani ní rō ndese ní jendeyí ní yá ní ndoho ya jeē ní sáha ndeváha ñayuu iyó cuéchi jíin yá. Te súcuan te ma cuíta ró ní ma ndínuu ní rō jíin jñundóho. <sup>4</sup> Chi ní ná tu ndoho ró jéé ndé cuu ró jeē cánducú ndéýí ró snáa ró cuéchi. <sup>5</sup> Te sanaa te je ní canaa ní rō jñuhun cáhán tutu íi, jeē stihví ní Yaā Dios rohó jéé cácu ró sēhe ya:

Séhē, ma quití ní rō jeē snahnú Jitoho yó rohó,

te ní ma ndínuu ní rō núu cáhán yá nuū rō.

<sup>6</sup> Chi Jitoho yó snahnú yá ñayuu jeē maní yá jíin,

te jéhe ya castigo táca jéé náquihin ya cuu sēhe ya.

Achí tutu. <sup>7</sup> Núu súcuan te na cuándeýí ní rō jeē snahnú Yaā Dios rohó, chí sáha ya jíin ró nájñuhun sáha tátá jíin sēhe. Chi tú na sēhe iyó jéé tu snahnú tátá i. <sup>8</sup> Te núu ma

sahnú yā rohó, nájñuhun ndóho tāca séhe, núu súcuan te nájñuhun séhe ndáhú cácuu ró, nasūu séhe ndije ya. <sup>9</sup> Te tátá yō ñayivi yáha, suni ni sahnú de yóhó, te ni iyo yíñuhún yó jíin de. Te nagá ni cuu jeé ma cuáñdetū yō nuū maá Tátá yō andiví jeé sahnú yā yohó, te cotecu yō ní cáni. <sup>10</sup> Te ndaā chi máa de ni casánhú de yóhó jecu-ni quiví, ndese ni cuu ni maá de. Te máa yá chi snáhnú yā yohó iin modo jeé quéndō vāha ga yō, návāha coo ndoo yó nájñuhun iyó ndoo máa yá. <sup>11</sup> Te ndaā chi tu cácusī ni yō maá hora jeé ndóho yó castigo, chi sa cúcuíhá ni yō. Te cúcuéé gá te cuni yō jeé ní quéndō ndaā yō te coo ndeyí sī ni yō jeé ni snáhnú yā yohó.

*Siquí ñayuu jeé casquéhichí i jñuhun cáhán Yaā Dios*

<sup>12</sup> Núu súcuan te ma cóo ró nájñuhun tēe ni cuíta lí ndaha te quisi i xiní yití, chi sa ndacui na sáha ró máa ró nuū jñúndóho. <sup>13</sup> Te sáha ró ichi ndóo caca ndaa ró, návāha nduvāha rohó jeé tu fuerza ini, jeé cácuu ró nájñuhun tēe chácuá jeé tu cúu caca vāha.

<sup>14</sup> Te na cóndihvī ni rō jeé condee maní rō jíin tāca ñayuu, jíin jeé cóo ndoo coo ī rō nuū yā. Chi ma cúu coto ni iin ñayuu nuū maá Jítoho yō te núu tu iyó ndoo i. <sup>15</sup> Te coto má cáca yátá ni iin ró te scuíta ró jñuhun jeé sáha Yaā Dios jeé vāha rohó, návāha tú cuu ró nájñuhun iin yucū uvuá jeé stívi te sáha dañó jíin cuéhē ñayuu. <sup>16</sup> Te ni iin ró ma cáca jnéni. Te ni ma cóo jéé ni rō nuū Yaā Dios, nájñuhun ni iyo Esaú. Chi máa iin cohó ndeyi ni jícan de nuū ñáni de, ni sama de jíin derecho de jeé cúu de sūchi núu, te súcuan ni xícó de derecho de. <sup>17</sup> Te cájini rō jeé cucuéeé gá te ni cuni de jeé na cáhán tátá de jeé vāha tahú nihín de, te tu ní cúu, chi tuá ni táñuhún Yaā Dios de. Chi tu ní nihín jñiñu jeé ní nacani ni de, vesú ni nducú ndeyí de te nde ndahyú de.

<sup>18</sup> Te rohó jíinánhan ró tu ní quíjicoo ró nuū iyó cúu, nájñuhun iyo ni cuu máa yucu nuū ni jéhe ya ley yā nuū ñayuu Israel. Chi ni cane yáñuhún yucu Sinaí, te nee lúchi jnúú jíto, te quée tachí xeén. <sup>19</sup> Te ni jecu trompeta, te ni cahán Yaā Dios. Te ñayuu jeé ní cajini sōho jeé cahán yā, ni cacahán ndahú i jeé ma cahán gā yā jíin i. <sup>20</sup> Chi tu ní cundeyí i jíin jñuhun jeé ní ndacu ya jñiñu nuū i, chí ni cahán yā: Vēsú iin quiti-ni núu quiví ti yucu yáha, jíni ñuhún cuu tī jíin yúu chí jíin lanza, achí yá. <sup>21</sup> Te siquí jeé iyo ndasí cúu jeé cájito i ún, te ni cahán Moisés: Quísi i ruhū jeé yuhú rí, achí de.

<sup>22</sup> Te vijna rohó jéé cácanđije, tu ní quíjicoo ró nuū yúcu yúcu. Chi sa suhva nuū maá yucu Sion jíin nuū maá ñuu Yaā Dios, Yaā técu, ni quívicoo ró. Te ñuu un cúu Jerusalén jeé iyó andiví, nuū cáhiyo tútú cuéhē ndasí mil ndajéhé cáchiñuhún Yaā Dios. <sup>23</sup> Te ni

quívicoo ró núu cáyūcu tútú ñayuu cácanđije jeé cácuu séhe Yaā Dios, jeé iyó lista i andiví. Te ni quívicoo ró núu Yaā Dios, Yaā sándaā jñiñu ndihi ñayuu, jíin núu cáhiyo ánuá ñayuu vāha jeé jé ni squéndō ndaā yā i. <sup>24</sup> Te suni nuū maá Jesús, Yaā ndiso jñiñu siquí contrato jeé ní quívicoo ró. Te yahu ndasí gá jñiñu sáha níñi yā jeé ní jéti jeé ndáhva cuéchi yó, nasūu níñi Abel jeé ní jíicān cuéchi.

<sup>25</sup> Núu súcuan te coto má squéhichí rō jñuhun jeé cahán ya jíin rō jíinánhan ró. Chi ñayuu jeé tu ní cájetáhú ná ni cahán yā jíin i ñayivi yáha, tu ní cácau i. Te xeén gá ndoho yóhó te núu ma cuatáhú yó nuū yā jeé cahán yā nde ichi ándiví núu súcuan. <sup>26</sup> Te nde saá ní quisi i ñayivi jéé ni cahán yā. Te vijna chí cáhán yā: ĩn na jínu quisi rí ñayivi, te nasūu máa-ni ñayivi, chí suni tāca jéé iin andiví, áchí yá. <sup>27</sup> Te jñuhun yáha jéé cahán, iin na jínu, chí cúní cahán jeé téjiyo ya tāca jéé tu iyó cutú, suu jeé ní cuvāha, návāha na quéndō jeé cóo cutú ní cáni. <sup>28</sup> Núu súcuan te cuāha Yaā Dios iin ñuu nuū yō jeé cóo cutú ní cáni. Te jeé yúcu. na nácuatáhú yó nuū yā, te na chíñuhún yó yā, te na cóo yíñuhún yó, návāha cusī ni yā jíin yó. <sup>29</sup> Chi Yaā Dios maá yó cúu nájñuhun iin ñuhún jeé snáé ndihi jeé neé.

*Ndese sáha yó te cusī ni Yaā Dios*

## 13

<sup>1</sup> Ma jécuiñī rō jíinánhan ró jéé cundáhú ni rō hermano rō cácanđije. <sup>2</sup> Conahán rō jeé cánuú cuāha núu ró vehe nuū ñayuu cájica. Chi iyó jínu jeé súcuan ni cajéhe núu ñayuu vehe, te ní cájini i jeé nuū maá ndajéhé andiví ni cajéhe núu i vehe.

<sup>3</sup> Te conahán rō chindéé ñáhan ró ñayuu cáhiin vecā, chí sáha ró cuenta jeé nájñuhun cáhiin cáhnu ró jíin i vecā. Te suni nacani ni rō jehē jñahan ró jéé cándoho i sáha ñayuu, chí núu súcuan coo jíin máa ró te suni ndoho ró.

<sup>4</sup> Coo yíñuhún ró siquí jñuhun quíjínhan ñayuu, te ma cosiquí ndéé jñahan ró. Chi máa Yaā Dios sándaā yā cuéchi ñayuu tijní ni jíin ñayuu casiquí ndéé jñahan.

<sup>5</sup> Te ma ndiyo ni rō xuhún, chí na cóo sī ni rō jíin jéé cánevāha ró. Chi máa yá ni cahán: Ma siaá cuíta rí rohó, ni ma stóo cuíta rí rohó, áchí yá. <sup>6</sup> Núu súcuan te ma ĩn jeé cáni ni yō, chí cuu cahán yó: Máa Jítoho rí chindéé ñáhan yá ruhú, te ma yūhu rí núu na vé cuni ñayuu sáha i jíin rí.

Achi yō.

<sup>7</sup> Te na núcuhun ni rō táca pastor rō, jeé ní castéén de jñuhun Yaā Dios nuū rō. Te sáha vāha ro cuenta ndese ni nihín jñiñu jeé ní casáha de, te na ndacu ró de jeé ní cacandije de jeé sáha ya jehé de.



<sup>8</sup> Te Jesucristo chi ñin-ni cáa ya ichi yátá jiín vjna jiín ní cáni. <sup>9</sup> Núu súcuan te ma cuáha ró jnúhun candije ró táca jnúhun jeē sñin cáhán jeē tu quíjnáhan jiín jnúhun máá yá. Chi iyó váha jeē na ñje ánuá yō sáha jnúhun jeē váha ni yá jiín yō. Te tu jiín ññúhún yó jnúhun jeē tajnúni siquí jeē yéji yō, chi tu níhín jniñu cuíti jiín ñayuu cáhín jiín.

<sup>10</sup> Te máá yó chi cáneváha yó ñin jeē ni sócō maá jéhē yō, cúu Cristo. Te táca sūtū jeē cásocō gā de modo jeē cahán ley jenahán, tú na vé níhín de nuū yā jeē ni sócō yā maá yá. <sup>11</sup> Te sūtū cujéhu ga, ná ni sócō de ññí táca quíti ini cuarto ñ gā jeē siquí cuéchi, te yiqui cúñu ñi ni cajehmu de ichi yátá ñuu. <sup>12</sup> Te suni súcuan ni ndoho máá Jesús ichi yátá ñuu, náváha jiín níñí maá yá te sándoo ya ñayuu. <sup>13</sup> Núu súcuan te ma cóo inuú gā ni yō jiín ñayuu tu cácandije, chi nájnūhun quíhín yō jiín yá ichi yátá ñuu, te na ndóho yó jiín yá jeē sácatā i. <sup>14</sup> Chi ñayiví yáha tu iyó ñuu nuū coo yó ní cáni, chí sa cánducú yó máá ñuu nuū cóyūcu yó quiví quíji. <sup>15</sup> Núu súcuan te jeē jiín Jesucristo te níni na cáhán yō jeē yóhoyó cujéhu Yaā Dios, chí suu cúu nájnūhun ñin jeē sócō yō nuū yā, suu jeē nácuatáhu yó nuū yā. <sup>16</sup> Te ma náā ni ró sáha váha ró nuū jnáhan ró, te cuáha ró jéé cúmaní nuū i. Chí nájnūhun ñin jeē cásocō ró nuū Yaā Dios cúu táca jéé yáha, te cúsiñi ni yá jiín.

<sup>17</sup> Te cuandije ró nuū tēe cácuu pastor ró, te cuandetū ró nuū de. Chí cándito de róhó jéé quéndōo váha ánuá ró, chí cájini de jeē cánuú nacuáha de cuenta nuū yā. Te condihví ni ró sáha váha ró, náváha cusñi ni de siquí ró te ma cucuíhyá ni de siquí ró. Chí núu tu súcuan te ma cóo jeē váha jiín ró.

<sup>18</sup> Te cacán tahú ró jehē rí jijnáhan rí. Chí váha iyó ni anuá rí jeē tú na cuéchi rí. Chí cácuñi rí caca yíññúhún rí jiín táca jniñu. <sup>19</sup> Te suni cáhán ndahú rí jiín ró jeē cacán tahú ndasí ró jehē maá rí, náváha cuáha ya jnúhun jeē yachí gā cuajeé tucu rí nuū ró.

#### *Bendición jiín saludo jeē sándihí*

<sup>20</sup> Te máá Yaā jeē jéhe jnúhun ndeyí sñi ni nuū yō, ni nastécu yā Jitoho yō Jesucristo mēhñu ndíyi. Te Jesús cúu pastor cujéhu jeē ndíto ñayuu cácuu nájnūhun lanchi ya. Chí jiín níñí yā ni sácutú yá contrato jeé yá jeé coo ní cáni. <sup>21</sup> Te ññúhun ni rí jeē Yaā Dios na sáha ya jeē ije ni ró jijnáhan ró, náváha cuu sáha ró táca jniñu váha ndese nújnahan ni yā. Te ññúhun ni rí jeē jiín fuerza Jesucristo jeē ndeé yá ini yō, na sáha Yaā Dios jeē cuu yó ñayuu cúsiñi ni yá jiín. Te na cáhán yō jeé yóhoyó luu cujéhu ya ní cáni. Amén.

<sup>22</sup> Hermano jijnáhan ró, cáhán ndahú rí jiín ró jeē cone cáhnu ni ró jeé stihví ni rí rohó jiín jecu-ni jnúhun ni tee rí nuū carta yáha. <sup>23</sup> Te cástūhun rí jeé hermano yō Timoteo, je ni quenda de vecáa. Te núu yachí quíji

de yáha, te cuajecoo ndíndúú rí nuū ró coto jnáhan yó.

<sup>24</sup> Te cahán ró jiín táca tēe cácuu pastor ró jiín táca hermano cácandije jeē sándeyí ni de, áchí rí. Te ñayuu Italia suni cácahán i jeé sándeyí ni ró.

<sup>25</sup> Te ññúhun ni rí jeē na sáha ga Yaā Dios jeé váha róhó jijnáhan ró. Súcuan na cóo. Amén.

## CARTA JEE NI TEE SANTIAGO NUU ÑAYUU CACANDIJE

1 Máá rí cúu Santiago, mozo Yaá Dios jíin Jítoho yō Jesucristo. Te tēe rí carta yáha cuájeé nuū rohó ñayuu cacandije jeé cácuu ró ndihúxí uū yucún Israel, te ni cajitē núu ró ní ñáyívi. Sándeyí ni ró jijnáhan ró.

*Yaá Dios sáha jeé jécūhun ni yō*

2 Ñānī mánī, na cúsi ndasí ni ró jijnáhan ró núu quíji tijni táca jnūndóho siquí ró. <sup>3</sup> Chi cájini ró jeé núu jíto ndee jnūndóho rohó núu cacandije váha ró, te yūcuan sáha jeé cútūhva ró cuándeyí ni ró. <sup>4</sup> Te na cuándeyí ni ró nde jie váha ró jíin, náváha cuu sáha ró ndihi jniñu váha, te ma cúmanī jeé squícu váha ró núu yá.

<sup>5</sup> Te núu ndé ñn ró cúmanī jecūhun ni ró caca ndichí ró jíin jnūhun Yaá Dios, na cácan ró nuū yá, te sáha ya jeé jécūhun ni ró. Chi sáha ya ndihi jeé cájicán ñayuu, te tu cúxeēn yá nuū i jeé jicán i. <sup>6</sup> Te jeé jicán ró, te cánuú candije ró jée sáha ya jeé jicán ró, te ma cáni siquí ni ró. Chi ñayuu jéni siquí ni, cúu i nájnūhun ndute mar jeé ndóna jisó cóyo cuahān cháha chúcuan sáha tachī. <sup>7</sup> Ñayuu ún ma cáni ni i jeé sáha Jítoho yō jeé jicán i. <sup>8</sup> Chi ñayuu jeé jéni ñn jéni uū ni, chi mánī násāma ni i jíin táca jniñu casáha i.

<sup>9</sup> Táca hermano ndahú, na cúsi ni de jeé sáha Yaá Dios jeé cūjēhnu de. <sup>10</sup> Te hermano cucá, na cúsi ni de núu ni ndundáhú de. Chi táca tēe cucá, yachī naa jeé cucá de, nájnūhun náa ita yucú. <sup>11</sup> Chi núu ni cane niāndii te cújinhí, te íchí-ni yucú, te cóyo-ni ita, te náa-ni jeé lúu cáa. Te suni sūcuan ndoho táca tēe cucá níni sá jícu de jíin jniñu de.

*Siquí jeé jíto ndee jnūndóho yóhó*

<sup>12</sup> Yōhoyō ndetú tēe jeé jéndeýí ni de núu jíto ndee jnūndóho de. Chi núu je ni cundeyí de jíin, te nihin de premio jeé cūjēhnu de cotecu de ní cáni. Chi sūcuan ni jecūhun Yaá Dios jeé cuáha ya nuū ñayuu jeé maní jíin yá. <sup>13</sup> Núu ñn ñayuu jicán ini i jeé sáha i cuēchi, te ma cáni ni i jeé nuū Yaá Dios vēji jeé jicán sáha i cuēchi. Chi ni ñn ma cúu cuiti sáha jeé quívi Yaá Dios cuēchi, te ni máá yá tu squívi ya ni ñn ñayuu nuū cuēchi. <sup>14</sup> Chi sa suhva jeé ndiyo néé ni maá i, suu sáha jeé jicán ini i sáha i cuēchi, te scānda ini i chí stáhú un i. <sup>15</sup> Te jeé ndiyo néé ni i, yūcuan quéjéé cuēchi. Te cuēchi ún, núu je ni cūnihin, te sáha jeé jnahnú ndetú ñayuu. <sup>16</sup> Núu sūcuan te ma stívi ró cani ni ró jijnáhan ró, ñānī mánī.

<sup>17</sup> Táca jée cūtahú yō jeé váha jeé lúu iyó, chí vēji nde andívi núu maá Yaá Dios, Yaá ni sáha táca jée ndíndēe íin andívi. Te máá yá tu

násāma cuiti ini yā nájnūhun násāma nduva jíin cuándahú. <sup>18</sup> Te ni sáha ya jeé cotecu yō ní cáni, chí ni candije yó jnūhun ndaá yá. Te ni nduu yó nájnūhun sēhe nuū yá nuū táca gá sēhe ya jeé quíji, chí sūcuan ni nujnahan ni yá sáha ya.

*Siquí ndese chiñúhún ndaá yō yá*

<sup>19</sup> Núu sūcuan te táca rohó ñānī mánī, ñama na chúsóhó ró jnūhun ya, te sa suhva ma cahán yachí ró, ni ma quívi yachí ni ró. <sup>20</sup> Chi ñayuu cáquiti ni, tu sáha i jniñu ndaá jeé cuní Yaá Dios. <sup>21</sup> Núu sūcuan te na siáá ró táca jniñu jnehén jíin jniñu néé jéé ni cáya jíin ró. Te na cóo vitá ni ró te cuatáhú ró jnūhun ya jeé ni quívi ini anuá ró. Chi jnūhun un ndiso poder jeé cácu ánuá ró.

<sup>22</sup> Te na squícu ró jée steén jnūhun ún, te nasūu máá jée cūni sōho ró sūcuan-ni, chí núu sūcuan te cástáhú ró maá ró, chí tu níhin jniñu núu tu squícu ró. <sup>23</sup> Chi tēe jeé jíni sōho de jnūhun ya sūcuan-ni, te tu squícu de, cúu de nájnūhun ñn tēe jeé jíto de nuū espejo ndese cá nuū de. <sup>24</sup> Te jíto váha de nuū de, te cuahān-ni de, te náa ni de ndese cá nuū de. <sup>25</sup> Te núu ñn tēe tu náa ni de jnūhun jíni sōho de, chí sa suhva chúhun váha ni de jeé cahán maá ley ndaá Jesús jeé ni sáha libre yohó, te núu cuiñi níhin de jíin, te squícu de jeé ndácu, yūcuán na te quéndōo ndetú de jíin jniñu váha jeé sáha de.

<sup>26</sup> Te núu ndé ñn ró jéni ni ró jeé chiñúhún váha ró Yaá Dios, te núu tu ndito ró yáá ró, núu sūcuan te stáhú ró maá ró, te tu ndé jéniñu jeé chiñúhún ró yá. <sup>27</sup> Ñayuu jeé chiñúhún ndoo chiñúhún ndaá i máá Tátá yō Yaá Dios, chí jniñu yáha sáha i: Chíndéé ñáhan i sūchi ní caquendōo ndáhú jíin ñahan ní caquendōo ndáhú, núu na-ni jnūndóho iyó. Te tu sájnēhén i ánuá i jíin jniñu néé iyó ñáyívi.

*Ma cúhichí ni yō coto yó ñayuu ndahú*

## 2

<sup>1</sup> Ñānī mánī, cacandije ró Jítoho yō Jesucristo jeé cūjēhnu luu ya. Núu sūcuan te ma sáha ró cuenta ndese cúu ñn ñayuu, chí inuú sáha ró jíin ndihi i. <sup>2</sup> Chi iyó jínu quívi ñn tēe ini vehe nuū cándutútú ró, te yíhi xehyuo oro ndaha de, te ñūhun de sahma váha. Te suni iyó jínu quívi ñn tēe ndáhú, te ñūhun de sahma tahndé. <sup>3</sup> Te tú váha núu sáha yíñúhún ró jíin tēe ñūhun sahma váha, te cahán ró jíin de: Cucóo ní lugar váha yáhá. Te cahán ró jíin tēe ndáhú: Yūcuán cuiñi ní, chí yáha cucóo ní nuū ñūhun, achi ró. <sup>4</sup> Chi núu casáha ró sūcuan, te tu jéni váha ni ró siquí jnahan ró, chí sán sáha ró jíin tēe cucá jíin tēe ndáhú.

<sup>5</sup> Ñānī mánī, chusóhó ró jnūhun cáhán rí: Yaá Dios ni nacáji ya ñayuu ndahú ini ñáyívi yáha jée cóo cucá i jíin jnūhun cacandije i ya,

te nihĩn i tahũ i ñuu nuũ ndácu ya jniñũ. Chi ni jejnũhun ya cuãha ya un nuũ ñayuu jeẽ manĩ jiĩn yá. <sup>6</sup> Te máá ró chi sa suhva cájehẽ ró jnũhun canu ñayuu ndahũ. ¿Te á násũu tée cúca cúu jeẽ castáhũ róhó siquĩ jeẽ nihĩn de xũhun ró, te yachi jéquin de cuẽchi siquĩ ró nuũ tohó? <sup>7</sup> Te suni cácahãn neé de siquĩ Cristo, te suu sihvĩ máá yá cúu jeẽ cánanĩ ró cristiano.

<sup>8</sup> Vãha cásaãha ró te núu cáscuicu ndije ró máá jnũhun jéhuu ga jeẽ cahãn ley, nãjnũhun yosó nuũ tútu iĩ: Cundáhũ ni ró jnãhan ró nãjnũhun cundáhũ ni ró máá ró, achí. <sup>9</sup> Te núu sãin sãha ró jiĩn ñayuu cúca jiĩn ñayuu ndahũ, núu súcuan te cuẽchi cásaãha ró, te jéconde cuẽchi siquĩ ró jeẽ stívi ró ley Yaa Dios. <sup>10</sup> Chi núu iin ñayuu stívi i iin-ni jniñũ ndácu ley, te vésũ na squicu i ndihi ga, te nãjnũhun ni stívi i ndihi ley, te ndihi un jéconde cuẽchi siquĩ i. <sup>11</sup> Chi Yaa jeẽ ni cáhãn jeẽ ma cósiquĩ ndéẽ jnãhan ró, suni ni cahãn yá jeẽ ma cáhni ró ndiyi. Te vésũ tu ní cásiquĩ ndéẽ jnãhan ró, te núu ni jehni ró ndiyi, núu súcuan te je ni stívi ndihĩ ró ley. <sup>12</sup> Te táca jéẽ cahãn ró jiĩn jéẽ sãha ró, chi sãha ró cuenta jeẽ sãndaã yá ndihi un jiĩn máá ley Jesũs jeẽ ni sãha libre rohó. <sup>13</sup> Chi quivĩ sãndaã yá jniñũ, te ñayuu jeẽ tu ní cundáhũ ni jnãhan, suni ma nihĩn i jnũhun cundáhũ ni. Te ñayuu ni cundáhũ ni jnãhan, cusũ ni i jeẽ ní ndahva yá cuẽchi i máá quívi sãndaã yá jniñũ.

#### *Tu jéjniñũ jeẽ candíje yó núu tu squícu yó*

<sup>14</sup> Ñãni máni, núu cáhãn iin tée jeẽ candíje de jeẽ sãha ya jehẽ de, te núu tu sãha de jniñũ váha, ¿te ndé jéjniñũ jeẽ candíje de ún? ¿A cuu cácu anúa de jiĩn jéẽ cahãn-ni de jeẽ candíje de, te núu tu sãha de jniñũ váha? <sup>15</sup> Te núu iin hermano yó chí hermana yó, cúmanĩ sahna i jiĩn jéẽ cáji i táca quívi, <sup>16</sup> te núu iin ró cáhãn jiĩn i: Cuandeyĩ ni ró, te cusúcun váha ró te caji váha ró, achí ró jiĩn i, te núu tu ní jehẽ ro jéẽ jini ñũhũn i cotecu i, ¿te ndé jéjniñũ jeẽ cahãn ró súcuan? <sup>17</sup> Te suni súcuan cúu jeẽ núu achí ró jeẽ candíje ró jeẽ sãha ya jehẽ ró, te núu tu sãha ró jniñũ váha, núu súcuan te tu ndé jéjniñũ cuiti jeẽ cahãn-ni ró jeẽ candíje ró.

<sup>18</sup> Te sanaa te cahãn iin ñayuu: Róhó chi candíje ró jéẽ sãha ya jehẽ ró, te ruhũ chi sãha ri jniñũ váha. ¿Na jiĩn stéẽn ró jeẽ candíje ró jeẽ sãha ya jehẽ ró, te núu tú na jniñũ váha sãha ró? Te ruhũ chi sãha ri jniñũ váha te súcuan stéẽn ri jeẽ candíje ri jeẽ sãha ya jehẽ ri. <sup>19</sup> Ndaã chi cándíje ró jeẽ iyó iin-ni Yaa Dios. Te va iyó váha núu súcuan. Te tachĩ chi suni súcuan cácaandíje, te cácuasi i jeẽ cáyũhũ, chi tu cásaãha jniñũ váha. <sup>20</sup> ¿Te naun tu jécũhun ni ró? ¿A tu jini ró jeẽ núu tu sãha ró jniñũ váha, te tu ndé jéjniñũ cuiti jeẽ cahãn ró jeẽ candíje ró? <sup>21</sup> Te jíi yó Abraham, ni ndahva yá cuẽchi de siquĩ jeẽ ni sãha de jniñũ

vãha. Chi ni jetáhũ de jeẽ ni cáhãn yá jeẽ cahni de sêhe de Isaac socó de i nuũ altar. <sup>22</sup> Te jécũhun ni ró jeẽ siquĩ jeẽ ní candíje de jeẽ sãha ya jeẽ ni jéjnũhun ya nuũ de, jeẽ yúcuan ni jetáhũ de jeẽ ni cáhãn yá jeẽ socó de sêhe de. Te jeẽ ní jetáhũ de, suu ni steén jeẽ candíje ndije de jeẽ sãha ya jeẽ ni jéjnũhun ya nuũ de. <sup>23</sup> Te súcuan ni cundaã jnũhun cáhãn tutu iĩ: Abraham ni candíje de jeẽ ni jéjnũhun ya nuũ de, te jeẽ yúcuan ní ndahva yá cuẽchi de, achí tutu. Te ni conani de amigo Yaa Dios.

<sup>24</sup> Núu súcuan te je ni cajini ró jeẽ ndahva Yaa Dios cuẽchi ñayuu jeẽ casãha i jniñũ váha siquĩ jeẽ cácaandíje i jeẽ sãha ya jehẽ i, te nasũu máá jéẽ cahãn-ni i jeẽ candíje i. <sup>25</sup> Te suni súcuan Rahab, vésũ ñahan tíjni ni ni cuu ña xĩhna gã, te ni ndahva yá cuẽchi ña siquĩ jeẽ ni sãha ña jniñũ váha. Chi ni jehẽ núu ña vehe nuũ táca mozo ni tajĩ Josué, te ni chuhichĩ ña de inga ichi, návãha cácu de nuũ tée cánducũ cahni de. Te jeẽ yúcuan ní ndahva Yaa Dios cuẽchi ña. <sup>26</sup> Te iin ñayuu núu tuá anúa i nuũ yiqui cúũu i, te ndiyi cúu i. Te suni súcuan núu cándíje yó jeẽ sãha ya jehẽ yó, te núu tu sãha yó jniñũ váha, te nãjnũhun ndiyi cúu yó.

#### *Jnũhun siquĩ yaa yó*

### 3

<sup>1</sup> Ñãni máni, ma cáni ni cuehẽ ró cuu ró maestro steén jnũhun ya. Chi cájini ró jeẽ yóhó jéẽ steén jnũhun, cuehẽ gã cuẽchi ndenehen ya siquĩ yó. <sup>2</sup> Chi ndihi yó stívi cuehẽ jniñũ. Te núu iin tée cuu condito de yáá de jeẽ ma stívi de jiĩn ni iin jeẽ cahãn de, núu súcuan te yóhyo váha tée cúu de, te suni cuu condito de níi gã de jeẽ ma stívi de. <sup>3</sup> Chi cúu nãjnũhun jeẽ chíhi yó freno yuhu caballo, te súcuan snáhnũ yó níi tí jeẽ quihĩn tĩ jiĩn yó ndé nuũ cuni yó. <sup>4</sup> Te suni súcuan táca barco, vésũ náhnũ ndasi, te vésũ nihĩn chũndahá táchi, te jiĩn iin timón lulí-ni te cuu scuicó tée scáca, te quihĩn de jiĩn ndé nuũ cuni de. <sup>5</sup> Te suni súcuan cúu yáá yó, chí vésũ lulí-ni, te cuehẽ teyĩ sãha yó jiĩn. Te suni jini yó jeẽ iin ñũhũn lulí cuu jniñũ jeẽ cayú iin yucu cáhnũ ndasi. <sup>6</sup> Te suni súcuan yáá yó, chí sãha nãjnũhun iin ñũhũn, chí scuíquĩn cuehẽ teyĩ jniñũ néé. Te yáá yó cúu iin parte lulí yiqui cúũu yó, te sãha jeẽ quívi níi yó cuẽchi. Te infierno cúu jeẽ scuíquĩn jnũhun néé jiĩn yáá yó, te yáá yó scuíquĩn cuehẽ jniñũ néé níi tiempo jeẽ iyó yó ini ñayivĩ. <sup>7</sup> Te ñayuu chi cuu snáhnũ i táca quiti jiĩn saa jiĩn cóo jiĩn quiti ñũhũn nuũ mar, te je ni snáhnũ i cuehẽ tĩ. <sup>8</sup> Te ni iin ñayuu ma cúu condito i yáá i. Chi iin jeẽ neé jéẽ ma cúu condito i cúu. Te nãjnũhun yuhu cóo jeẽ ñũhũn chitú veneno jeẽ jéhni, súcuan cúu yáá yó. <sup>9</sup> Jiĩn yáá yó chíñũhũn yó Tatá yó Yaa Dios, te suni jiĩn yáá yó cahãn ndevãha yo siquĩ ñayuu jeẽ ni

sáha ya ánuá i nájñuhun iyó máá yá. <sup>10</sup> ñn-ni yuhu cáne jñuhun chíñtúhún yó yá jñin jñuhun cáhán ndeváha yó. Nání máni, tu iyó váha cuítí jeé súcuan. <sup>11</sup> ¿A ñn-ni tesóco cáne ndute váha jñin ndute úvuá, chí naún? <sup>12</sup> Nání máni, ¿á cuu cuun ndehé oliva xiní yúnu higo, te á cuu cuun ndehé higo xiní yoyucú uva, chí naún? Te suni súcuan ñn tesóco ma cuu cane ndute úhvuá jñin ndute váha.

*Jñuhun ndíchí jeé véji nuú Yaá Dios*

<sup>13</sup> Te núu ndé ñn ró ndíchí te jécühun vāha ni, núu súcuan te jñin jeé jíca ndaa ró steén ró jeé súcuan cúu ró. Te na cóo suchí ni ró modo jeé jéhe jñuhun ndíchí yá. <sup>14</sup> Te núu cácuésún teyí ni ró te ndúcú ró jeé kujéñnu máá ró, núu súcuan te ma cuteyí ró cani ni ró jeé ndíchí ró. Chí suu cúu jeé stahú ró, te cúu ró contra siquí jñuhun ndaa. <sup>15</sup> Chí ñayuu cándaá súcuan, nasūu núu Yaá Dios véji jeé ndíchí i. Chí cuenta ñayiví, jñin cuenta anuá neé ñayuu, jñin cuenta máá jéxeén cúu. <sup>16</sup> Chí nuú iyó ñayuu cucuésún ni jñin ñayuu nducú jeé kujéñnu máá, suni yúcuan iyó jñuhun sáca núu jñin táca jñiñu neé. <sup>17</sup> Te jñuhun ndíchí jeé véji nuú Yaá Dios, núu ni sáha jeé ní ndundíchí ñayuu, yúcuán na te iyó ndoo ánuá i. Te suni yúcu maní i jñin jñahan i, te vítá ni i, te tú nihni ni i. Te cundáhu ni i jñahan i, te sáha i jñiñu váha. Te suni iyó ndaa i, te tu stáhú i. <sup>18</sup> Te ñayuu cáyücu máni jñin jñahan, jñin jñuhun maní casáha i táca jñiñu ndaa, te naniñin i jeé quéndoo ndaa i.

*Jeé ma cutóo ni yó jeé iyó ini ñayiví*

#### 4

<sup>1</sup> ¿Te ndese quejéé jeé cájeñáhan ró jñin jeé cáteñáhan ró? Quejéé siquí jeé cándiyo neé ni ró, te yóhio scánda ini anuá ró. <sup>2</sup> Chí cándiyo ni ró, te tu cáneváha ró, te suu sáha jeé cájeñni ró ndíyí. Cándiyo ni ró jeé neváha jñahan ró, te tu nihín ró, te suu sáha jeé cáteñáhan ró te cájeñáhan ró. Te tu cánihín ró jeé cuní ró, chí tu cájicán ró nuú Yaá Dios. <sup>3</sup> Te núu cájicán ró, te tu cánihín ró, chí tu cájicán váha ró, chí máni jeé cusí ni máá ró cúu jeé cájicán ró nuú yá. <sup>4</sup> Ñayuu castóo Yaá Dios cácuu ró. ¿A tu cájini ró jeé núu cutóo ni ró jeé iyó ini ñayiví, yúcuan cúu jeé cájito uhú ró Yaá Dios? Chí ñayuu jeé cutóo ni jeé iyó ñayiví, ndúu i ñayuu jíto uhú nuú Yaá Dios. <sup>5</sup> Te tu cáhán saá-ni jñuhun yáha jeé yosó núu tútu íi: Máá Espíritu jeé ní jéhe Yaá Dios jeé ndeé ini yó, cúcuíñí ni yá jeé súcuan casáha yó, chí maní yá jñin yó, achí. <sup>6</sup> Te jeé váha ni Yaá Dios, te jéhe ya fuerza ini yó jeé ma sáha yó súcuan. Chí cáhán tutu íi: Yaá Dios jési yá nuú ñayuu casáha téyí máá, te váha ni yá chindéé ñáhan yá ñayuu casáha suchí máá, achí. <sup>7</sup> Núu súcuan te cuandetu ró nuú Yaá Dios. Te cuiñi nihin ró jeé ma cuatáhú ró jexeén, te cunu coto róhó jñánhan ró. <sup>8</sup> Maní

gā coo ró jñin Yaá Dios, te víhyá gā steén yá jeé maní yá jñin ró. Róhó jéé casáha cuéchi, na sándoo ró máá ró, stóo ró cuéchi. Te róhó jeé cácuu ró coo maní ró jñin Yaá Dios níni jeé cácuu ró cutóo ni ró jeé iyó ini ñayiví, na sándoo ró ánuá ró jeé tuá coo ró súcuan. <sup>9</sup> Na jñahuhú ni ró, te cucuíhyá ni ró, te na ndáhyú ró siquí jeé iyó cuéchi ró. Te vesú ni cajecú ró, te vijna na ndáhyú cohó ró. Te vesú ni cacusiñi ró, te vijna na nducuíhyá ni ró. <sup>10</sup> Na sásuchí ró máá ró nuú Yaá Dios, te sájéñnu ya róhó.

*Ma cóndihví ni yó siquí cuéchi jñáhan yó*

<sup>11</sup> Hermano jñánhan ró, ma cáhán neé ró siquí jñáhan ró. Chí tée jeé cáhán neé siquí jñáhan, chí jeé ndihví ni siquí cuéchi jñáhan, nájñuhun jeé siquí ley yá cáhán neé de, chí tu squícu de ley jeé cundáhu ni yó jñáhan yó, te nájñuhun cáhán de jeé tu iyó ndaa ley yá. Te núu cáhán ró jeé tu iyó ndaa ley yá, núu súcuan te nasūu jeé squícu ró, chí sa jeé cáhán ró siquí. <sup>12</sup> Iyó ñn-ni Yaá jeé ní jéhe ley, te máá ni ya cúu jeé sándaá siquí cuéchi. Te jnama ya ñayuu cácandíje te snáhnú ndetu yá ñayuu tu cácandíje. Núu súcuan ¿te na jñiñu ndíso ró jeé sándaá ró siquí jñáhan ró?

*Tú váha jeé satéyí yó máá yó*

<sup>13</sup> Vijna te cáhán rí jñin róhó jéé cácahán: Vijna chí sájné te quihín yó ñuu yúcuan, te coyücu yó ñn cuiyá, te cuaan yó xíco yó, te nihín yó siquí, achí ró. <sup>14</sup> Te tu jini cuítí ró ndese coo sajné. ¿Chí na vé va víhí cúu vida ró? Cúu nájñuhun ñn vicó nühún jéé ñn núnúu-ni núcühun, te yúcuán na te ndechí-ni cuahán. <sup>15</sup> Chí sa váha ga na cáhán ró: Núu cuní máá jítoho yó te cotecu yó te sáha yó jeé yáha chí jeé yúcuan, achí ró. <sup>16</sup> Te sa suhva máni cácutéyí ni ró cácahán ró. Te tú váha jeé súcuan cácutéyí ni ró. <sup>17</sup> Te núu ñn ñayuu jini i sáha i jñiñu váha, te núu tu sáha i, te cuéchi cúu núu súcuan.

*Jñuhun cáhán nuú tée cúcá*

#### 5

<sup>1</sup> Te cáhán rí jñin táca róhó tée cúcá, jéé na ndáhyú ró te ndahyú cohó ró siquí jñundóho jeé quíji nuú ró. <sup>2</sup> Chí ndajniñu cúcá cáneváha ró, je téhyu. Te sahna váha ró, je tée tiquixín. <sup>3</sup> Te oro jñin plata cáneváha ró, chí je cáne xehyu. Te xehyu un steén jeé ní casáha ró jñiñu stáhú jñin xühun ró. Te yúcuan cúu jeé ndúñihin cuéchi siquí ró, nájñuhun ñn ñuhún jeé snaa yiqui cúñu ró. Chí ni cacaya cuehē ró ndajniñu váha quiví cuándihí yáha. <sup>4</sup> Te táca tée ni cajehnde trigo ró, tu ní cáchunaa váha ró yáhu de. Te vijna cácana jee de nuú Yaá Dios, Yaá cúu jítoho nuú táca ndajéhé andiví, jeé súcuan ni casáha ró. Te jini sóho ya jeé cácana jee tée ni cajehnde ún. <sup>5</sup> Cátecu váha ndasí ró ini ñayiví yáha, te casáha ró táca jeé cácusí ni máá ró.

Te cájito yúcuñ ró maá ró, te cúu ró nájnūhun quiti néñu jeē ndétu quiví cúu. <sup>6</sup> Te ni catee ró cuēchi siquī ñáyyu ndaā, te nde ni cajehni ró i. Te tu ní cúu casi i jeē casáha ró.

*Jeē na cóo paciencia ni yō te cacān tahu yō*

<sup>7</sup> Hermano, núu súcuan te coo paciencia ni rō condetu ró ndé quiví ndíji máá Jítoho yō. Tēe sájniñu ñuhun, cánuú coo paciencia ni de condetu de nde quiiji saū néhen jíin sáū néñu isa, te sáá te nihīn de nunī váha jeē jéhe itu. <sup>8</sup> Te suni súcuan coo paciencia ni rō, te ndeyí coo ni rō condetu ró, chí cuacuyajni ndee máá Jítoho yō. <sup>9</sup> Te ma cahán sōo ró siquī jeē sáha jnáhan ró, hermano, náváha ma jécondee cuēchi siquī rō. Chí máá Yaā jeē sándaā cuēchi, je yajni ndíji ya. <sup>10</sup> Nánī mánī, conahan ró jíjnáhan ró ndese ni casáha tēe ni canacani jnūhun máá Jítoho yō nde jenahán, chí ni cacuu de ñin ejemplo nuū yō. Chí vesú ni candoho de, te ni ñyo paciencia ni de. <sup>11</sup> Te cáhán yō jeē ñáyyu cájendeyí ni jíin jnūndóho, ndetū cúu i sáha Yaā Dios. Chí ni cajini ró jnūhun ndese ni jendeyí ni Job jíin jnūndóho, te suni cájini ró jeē yóhoyo váha ga ni quendō de ni sáha máá Jítoho yō ná ni yáha jnūndóho. Chí yóhoyo cúndáhú ni yā yohó, te váha ndasí ni yā jíin yó.

<sup>12</sup> Nánī mánī, jeē cánuú gá cúu jeē ma cahán cáha ró sihví Yaā Dios jíin jnūhun cácahān teyí ró. Ma cahán rō verdad de Dios, Yaā ndeé andiví, ni ma cahán rō verdad de Dios, Yaā chíi ñayiví, te ni ñin ga jnūhun súcuan ma cahán teyí ró. Chí núu cahān rō jeē cuu, te súcuan-ni cahān rō. Te núu cahān rō jeē tuú, te súcuan-ni cahān rō, ma scáa gā rō cahān rō, náváha ma ndénehen Yaā Dios cuēchi siquī rō.

<sup>13</sup> Te núu íyó ñin ró jéē ndóho jnūndóho, te na cacān tahu rō. Te núu íyó ñin ró jéē cúsi ni, te na cáta ró yaa jeē chíñúhún ró yá. <sup>14</sup> Te núu íyó ñin ró jéē cuhú, te na cána ró tēe jéhnu cándito ñayuu cácandíje. Te na cacān tahu de jehē ñayuu cuhú. Te jíin sihví máá Jítoho yō na chíhi de aceite i. <sup>15</sup> Te núu cácandíje de jeē sáha Jítoho yō jeē cájicān tahu de, yūcuán na te jnama ya ñayuu cuhú. Chí nasáváha ya i, te núu ni sáha i cuēchi, te cone cáhnu ni yā nuū i. <sup>16</sup> Núu súcuan te nacani ndaā rō cuēchi ró núu jnáhan ró, te cacān tahu rō jehē jnáhan ró náváha nduváha ró jíjnáhan ró. Chí núu ñin tēe ndaā ndíhví ni de jíicān tahu de, te yóhoyo váha níhín jniñu, chí sáha ya jeē jíicān de. <sup>17</sup> Chí Elías, tēe ni nacani jnūhun Yaā Dios jenahán, suni ñin tēe jeē nájnūhun íyó máá yó ni cuu de. Te ni jíicān tahu ndasí de jeē ma cúun saū, te tu ní cúun saū unī cuiyā ññu yō. <sup>18</sup> Yūcuán na te ni jíicān tahu tucu de, te ni cuun saū, te ni canecoo tucu táca jéē jéhe ñuhun.

<sup>19</sup> Nánī mánī, núu ñin ró ni stóo ichi ndaā, te núu inga rō nachuhichí ró jnáhan ró, <sup>20</sup> núu

súcuan te cuni rō jeē núu ni nachuhichí ró tēe ni quiví cuēchi, te je ni jnama ró de jeē jnahnú ndetū de núu, te súcuan íyó jnūhun cáhnu ni nuū cuēhē cuēchi de.

## CARTA HN JEE NI TEE SAN PEDRO APOSTOL NUU ÑAYUU CACANDIJE

<sup>1</sup> Máá rí cúu Pedro, apóstol jeē ní tají Jesucristo, te téé rí carta yáha cuájeē nuū rohó ñáyyuu ní cajitē nuu, te cáyūcu jíca ró ní Ponto, Galacia, Capadocia, Asia, jíin Bitinia. <sup>2</sup> Te máá Tátá yō Yaā Dios ní nacáji ya rohó, chí súcuán ní tee ní yā nde ná tu jecōo ñayívi. Te jíin Espíritu Santo ní sáha ya jeē iyó ndoo iyó í ró cajetáhú ró nuū yā, te ní nacate ya anuá ró jíin níñi Jesucristo. Te ñūhun ní rí jeē na cáya gā táca jéē váha jeē sáha ya rohó, jíin jéē coo ndeyí coo sí ní ró jíjnáhan ró.

*Jeē ñūhun ní yō táca jéē váha jeē cóo andívi*

<sup>3</sup> Na cáhán yō jeē yóhoyo cújéhu Yaā Dios, Yaā cúu Tátá máá Jítoho yō Jesucristo. Chí ní cundáhú ndasí ní yā yohó, te ní sáha ya jeē ní nacacu jeē yó, siquí jeē ní natecu Jesucristo mēhū ndíyi. Te jeē yúcuán níni cáñuhun ní yō táca jéē váha jeē coo. <sup>4</sup> Chí níhín ró tahú jeē ñáñūhun váha íni andívi jeē cúu ró jíjnáhan ró. Te tahú un má náa cuítí, ní ma tívi cuítí, ní ma ndíhi cuítí. <sup>5</sup> Chí cácandije ró jéē sáha Yaā Dios jehē ró, te jeē yúcuán ndíto ya rohó jíin poder yā, náváha jnama ya rohó quívi sándíhi, chí ní sándaá yā jeē súcuán coo.

<sup>6</sup> Jeē yúcuán cácusí ndasí ní ró, vésú cájito ró cuéhē ndinuū jñúndóho jecu-ni quívi. <sup>7</sup> Chí nájnūhun jeē stuhvá ñayuu oro jíin ñūhūn, jíto ndee í núu jeē váha cúu, suni súcuán cánuú coto ndee jñúndóho rohó núu cácandije níhin ró chí tuú. Chí jeē cácandije níhin ró, chí yahu ndasí gá cúu vésú oro, ndajníñu jeē náa. Te yúcuán cúu jeē cuajnúhún yá rohó, te sájéhu ya rohó, te squéndoo yíñúhún yá rohó quívi quenda ndíjin Jesucristo.

<sup>8</sup> Te vésú tu ní cájito ró núu yā, te cáhíyo maní ndasí ró jíin yā. Te cácandije níhin ró yá vésú tu cájito ró núu yá víjna. Te yóhoyo luu cácusí ndasí ní ró, chí nde tuá níhín cuítí yō jñūhun castūhun yó ndese cúsi ní yō. <sup>9</sup> Te níhín tahú ró jeē cácu ánuá ró, chí jeē yúcuán cúu jeē cácandije ró.

<sup>10</sup> Te téé ní canacani jñūhun Yaā Dios nde jenahán, ní cananducú yúcuán de ní caca-jñūhun váha de siquí jñūhun ndese jnama ya yohó. Te ní cacachí de ndese sáha Yaā Dios jeē váha rohó jíjnáhan ró. <sup>11</sup> Chí nde ná tu coo, te ní steén Espíritu Cristo nuū de jíjnáhan de ndese quíji jñúndóho siquí Cristo jíin ndese luu ndujéhu tucu ya jeē yáha jñúndóho ún. Te ní cananducú yúcuán de jeē na jécūhun ní de ndé quívi quíji Cristo te ndese coo táca jéē ní cáhán máá Espíritu jeē ndeé íni de. <sup>12</sup> Te ní steén Yaā Dios nuū de jeē násuu máá de coto jniñu jeē ní canacani

de ún, chí sa máá yó cúu jeē cóto. Te víjna je ní cajini sóho máá ró jñūhun ún, chí táca téé nácani jñūhun jnáma ya yohó, ní canacani de nuū ró, ní sáha poder Espíritu Santo jeē ní quíji íchi andívi. Te jñūhun ún chí nde máá ndajjéhe Yaā Dios cánanducú náváha na jécūhun ní.

*Cúni yā jeē coo ndoo ánuá yó*

<sup>13</sup> Jeē yúcuán ndito na cóo xini ró jíjnáhan ró, te cáji coo ní ró. Te cocuhun ndasí ní ró jeē níhín ró táca jéē váha jeē sáha Yaā Dios rohó quívi quenda ndíjin Jesucristo. <sup>14</sup> Te na cúu ró séhe jeē cajetáhú váha. Te ma sáha gá ró táca jniñu jeē ní cacusí ní ró sáha ró nde ná tu jecūhun ní ró jñūhun Yaā Dios. <sup>15</sup> Chí sa suhva na cóo ndoo ánuá ró jíin táca jniñu cása ha ró, chí Yaā ní cana rohó, Yaā iyó ndoo cúu ya. <sup>16</sup> Chí súcuán cáhán tutu íi: Na cóo ndoo ró jíjnáhan ró, chí ruhú iyó ndoo rí, achí yá.

<sup>17</sup> Te núu cácahán ró Tatá ró jíin Yaā Dios, núu súcuán te na cáca yíñúhún ró nuū yá táca quívi jéē cájica ró ñayívi yáha. Chí máá yá sándaá siquí ndese ní casáha íin íin yó, te tu sáha ya cuenta ndese cúu íin íin yó, chí inuú sáha ya jíin ndíhi yó. <sup>18</sup> Chí ní jnama ya rohó núu táca costumbre jeē ní cajequin jíi ró, jeē ní cajejniñu cáha ró núu. Te cájini váha ró jéē yahu cúu jeē ní jnama ya rohó. Chí tu ní chúnaa yā jíin ndajníñu jeē náa, nájnūhun oro jíin plata, <sup>19</sup> chí sa suhva jíin níñi Cristo jeē yáhu ndasí gá cúu. Chí ní socó yá máá yá nájnūhun íin londe, quítí iyó váha iyó ndoo. <sup>20</sup> Chí jeē yúcuán ní jeni Yaā Dios máá Cristo nde ná tu jecōo ñayívi, te ní cane ndíjin Cristo máá tiempo cuándíhi yáha, náváha quendōo váha ánuá ró jíjnáhan ró. <sup>21</sup> Te jeē jíin Cristo te cácandije ró Yaā Dios. Chí ní sáha Yaā Dios jeē ní natecu yá mēhū ndíyi jíin jéē ní ndujéhu ya. Te jeē yúcuán cácandije ró Yaā Dios, te cáñuhun ní ró coto ró yá.

<sup>22</sup> Te víjna chí je ní candundoo ánuá ró, chí ní cajetáhú ró jñūhun ndaá ní sáha Espíritu jíin ró, náváha cundáhú ndije ní ró hermano cácandije. Núu súcuán te na cundáhú ndasí ní ró jnáhan ró nde jíin íni jíin ánuá ró. <sup>23</sup> Chí je ní canacacu jeē ró, te nasúu chíji yucūn ñayuu jeē cúu. Chí sa jñūhun Yaā Dios jeē ndíto técu ní cáni ní sáha jeē ní nacacu ró. <sup>24</sup> Chí súcuán cáhán tutu íi:

Nájnūhun yucū túu ndíhi táca ñayuu, chí jecu-ni quívi técu í.

Te nájnūhun ita yucū cúu jeē cújéhu í.

Chí íchí-ni yucū, te ndáhvá-ni ita.

<sup>25</sup> Te jñūhun Jítoho yō Yaā Dios, sa quéndōo ní cáni.

Achí tutu. Te jñūhun un cúu máá jñūhun jnáma ya yohó jéē ní canacani rí nuū ró.

## 2

<sup>1</sup> Núu súcuan te na siáá ró táca jniñu néé, táca jée stahú, jée tú ndije, jee cucuésún ní, jín jée sajnúhún siquí jnahan. <sup>2</sup> Te nájnūhun sūchi yíquí n sá ní cacu jee jéxin te jéhu, súcuan na cóndihví ní ró scuáha ró jnúhun ndaa yá, náváha cuehnu ró jín te cácu ánuá ró. <sup>3</sup> Chi je cájini ró jee yóhoyo váha ní maá Jítoho yó.

*Cristo cúu nájnūhun yuū yítuu vehe*

<sup>4</sup> Núu súcuan te maní gá coo ró jínáhan ró jín Jítoho yó Cristo. Chi cácuu ró nájnūhun templo nuū ndeé Yaa Dios, chi ndeé yá ini anuá ró. Te Cristo cúu nájnūhun in yuū cánuú gá jee yítuu yíquí templo, te sáha ya jee cótecu ró ní cáni. Te ñayuu vesú ní casquéhichi i ya, te Yaa Dios chi je ní nacáji ya Cristo chi cánuú ndasí yá, nájnūhun nacáji yó in yuū váha jee quituu yíquí vehe. <sup>5</sup> Te máá ró chi cácuu ró nájnūhun in in yuū jee cúváha templo Yaa Dios, te cotecu ró ní cáni. Te na cuáha ró jnúhun jee sama ya rohó jínáhan ró jee cúváha templo yá, cúu jee ndeé Espiritu yá ini anuá ró nájnūhun in in templo. Te suni cúní Yaa Dios jee cuu ró sútú cáhiyo ndoo cájejniñu nuū yá. Chi siquí jee ní sáha Jesucristo jehé ró, te na sóc ró maá ró jee cuajniñu ró nuū yá sáha ró táca jniñu váha jee nújnahan ní Yaa Dios. <sup>6</sup> Chi súcuan cáhán tutu i:

Vijna te nde ñuu rí Sion jéquin rí in yuū jee cánuú gá jee quituu yíquí vehe, chi ní nacáji rí yá nájnūhun in yuū váha jee cánuú téyí.

Te ñayuu jee candíje i ya, jnama nahín yá i. Achí Yaa Dios, achí tutu. <sup>7</sup> Te máá ró jee cácandíje ró, chi yuū váha jee cánuú téyí cúu ya nuū ró. Te nuū ñayuu tu cácandíje chi tuú, chi sa cúndaá jee cahán tutu i:

Máá yúú jee ní casquéhichi tēe cásama vehe, suu cúu yuū cánuú gá yítuu yíquí vehe.

<sup>8</sup> Te suni cúndaá jnúhun jee cahán tutu siquí ñayuu tu cácandíje:

Cúu ya nájnūhun in yuū jee cácachihí i jehé i, nájnūhun toto jee cotúú i sáha.

Achí. Chi jee cácachihí i jehé i cúu jee casániñhi ní i nuū jnúhun ya. Te je ní cúndaá jee jnahnú ndetú i siquí jee cácaniñhi ní i.

*Jnúhun ñayuu maá Yaa Dios*

<sup>9</sup> Te máá ró cácuu ñayuu jee ní nacáji Yaa Dios. Te suni cácuu ró sútú cájejniñu nuū maá Yaa cúu Rey, te ñayuu cáhiyo ndoo, jín ñayuu maá yá cácuu ró. Súcuan ní sáha Yaa Dios rohó náváha nacani ró jnúhun ndese yóhoyo jéhu jniñu sáha ya, chi máá yá ní cana rohó ná ní coyúcu ró nájnūhun nuū néé. Te ní squívicoo ya rohó nuū luz yá jee yóhoyo váha stéén yá ini anuá ró. <sup>10</sup> Chi nde saá te nasūu ñayuu Yaa Dios cácuu ró, te vijna je ní nduu ró ñayuu maá yá. Te nde saá chi ná tu

cundáhú ní yá rohó, te vijna je cundáhú ní yá rohó jínáhan ró.

*Jee cuajniñu váha yó nuū Yaa Dios*

<sup>11</sup> Nani maní, ini ñayví yáha cácuu ró nájnūhun ñayuu ñuu jicá jee cájica cuu tátú. Núu súcuan te cáhán ndahú rí jín ró jee ma sáha ró táca jniñu jee ndíyo néé ní ró jín modo maá ró. Chi táca ní cájejniñan jín ró, ndúcú jee jnahnú ndetú anuá ró. <sup>12</sup> Te ndaa na cáca ró méhñu ñayuu tu jíní jnúhun Yaa Dios. Chi vesú cácahán i siquí ró, nájnūhun cácahán i siquí ñayuu casáha jniñu néé, te núu na cóto i jniñu váha casáha ró, te quiví sándaá Yaa Dios jniñu te cahán i jee yóhoyo cújéhu ya.

<sup>13</sup> Jee siquí maá Jítoho yó te cuatáhú ró nuū táca tóhó cándiso jniñu nuū ñayuu. Cuatáhú ró nuū maá rey, chi tēe cújéhu ga cúu de. <sup>14</sup> Te cuatáhú ró nuū táca gobernador jee ní jeni rey náváha stóho de ñayuu casáha jniñu néé te cuajnúhún de ñayuu casáha jniñu váha. <sup>15</sup> Chi cúní Yaa Dios jee sáha ró jniñu váha, te jee súcuan sáha ró te táca ñayuu canéé jee tu cájejúhun ní, casa i yuhu i.

<sup>16</sup> Te na cáca ndaa ró jee cácuu ró ñayuu ní nduu libre anuá, te nasúu jee ní nduu libre ró jee sáha ró jniñu néé. Chi sa cácuu ró mozo Yaa Dios, te cuajniñu váha ró nuū yá. <sup>17</sup> Coo respeto ró nuū táca ñayuu. Cundáhú ní ró hermano cácandíje. Conso iyo ró nuū Yaa Dios. Coo yíñhún ró nuū maá rey.

*Jee na ndóho yó jéhé jnahan yó nájnūhun ní ndóho Cristo*

<sup>18</sup> Rohó jee cácuu mozo, cuatáhú ró nuū patrón ró, te coo respeto ró nuū de. Te nasūu máa-ni nuū tēe váha ní jín tēe vitá ní, chi suni nuū tēe xeén ní. <sup>19</sup> Chi in jee váha cúu núu jéndeyí ní in tēe jee stóho cáha ñayuu de siquí jee squícu de nuū Yaa Dios. <sup>20</sup> Chi núu cástóho i rohó jee casáha ró cuéchi, te ní in ma cuajnúhún rohó nuú jéndeyí ní ró jín jee ndóho ró. Te núu cástóho i rohó jee casáha ró jniñu váha, te núu jéndeyí ní ró jín, váha cúu jee váha jee nújnahan ní Yaa Dios. <sup>21</sup> Chi jee yúcuan cúu jee ní cana ya rohó jínáhan ró. Chi suni máá Cristo ní ndóho ya jee siquí ró, te súcuan ní cuu ya in ejemplo nuū ró jee na ndóho ró jéhé jnahan ró, te súcuan condíquín ró ichi ya. <sup>22</sup> Te máá yá tú cuiti na cuéchi ní sáha ya, ní tú cuiti na jnúhun stáhú ní cáhán yá. <sup>23</sup> Ná ní cacahán neé i nuū yá, te tu ní nacahán neé yá. Te ná ní castóho i ya, te tu ní téjnahan ya jín i, chi sa ní chíhi ya maá yá ndaha Yaa Dios, Yaa sándaá váha siquí ndíhi ún. <sup>24</sup> Te ní condiso máá Cristo cuéchi yó jín yíqui cúñu yá ná ní jihí yá jicá cruz, náváha quenda yó chíji cuéchi te caca ndaa yó. Chi ní tují yá, te jee yúcuan ní canduváha ánuá ró. <sup>25</sup> Chi ní casana ró nájnūhun lanchi, te vijna je ní candicó ró ní ndívicoo ró nuū Cristo, Yaa cúu pastor ró te ndíto váha ya anuá ró.

*Ndese cánuú coyūcu váha yíi jín ñasihí*

### 3

<sup>1</sup> Suni súcuan róhó ñasihí jínáhan ró, cu-atáhú ró nuú yíi ró, návaha núu cúu de tē tu cándije jñuhun ya, te cuu scándije ró de, jeé tuá nini jín jeé cahán ró, chí máá jín jeé casáha váha ró. <sup>2</sup> Chi cuni de jeé cájica ndaa ró te cáhíyo respeto ró. <sup>3</sup> Te jeé casáha luu ró máá ró, chí nasūu máni máá ichi síquí ró sáha ró, jeé sáha luu ndasí ró xiní ró, chí jeé cúhun ró síquí oro chí sahma váha ga. <sup>4</sup> Chi sa nducú ró jeé quéndōo luu ánuá ró, te coo luu ró ñn modo jeé ma náa cuítí, suu jeé cóo vítá ní ró te coo nahín ní ró. Chí yáha cúu jeé yahu ndasí gá nuú Yaá Dios. <sup>5</sup> Chi ñahan ní cahíyo ndoo ánuá nde jenahán, suni súcuan ní casáha luu ña ánuá ña. Chí ní cañuhun ní ña Yaá Dios, te ní cajetáhú ña nuú yíi ña. <sup>6</sup> Te súcuan ní sáha Sara, chí ní jetáhú ña nuú yíi ña Abraham, te ní cahán yíñúhún ña jín de. Te róhó jínáhan ró, núu sáha váha ró te núu ma yūhu ró ní ñn, yūcuán na te coo ró nájñuhun ní iyo Sara.

<sup>7</sup> Te suni súcuan róhó yíi, na cóo vítá ní ró jín ñasihí ró. Te yíñúhún coo ró jín ña, síquí jeé núu ga fuerza ña vésú rohó, te suni síquí jeé inuú ní canihín tahú ró cotecu ró ní cáni síquí jeé váha ní Yaá Dios. Te súcuan sáha ró návaha tú casi nuú jñuhun jicán tahú ró.

*Jñuhun ñayuu cándoho síquí jeé cájica ndaa*

<sup>8</sup> Núu súcuan te inuú na cáni ní ró jínáhan ró, te cucuihyá ní ró jeé ndóho jñáhan ró, te cundáhú ní ró i nájñuhun ñani ró. Te na cóo maní ró te caní suchí ní ró. <sup>9</sup> Núu casáha neé ñayuu jín ró, te ma nasáha neé ró jín i. Te núu cácahān neé i nuú ró, te ma nácahān neé ró núu i. Chí sa suhva cacān tahú ró jeé na quéndōo váha i. Chí Yaá Dios ní cana ya rohó jé suni súcuan quéndōo váha ró. <sup>10</sup> Chí súcuan cáhān tutu íi:

Ñayuu cácuni cotecu váha te cusíi ní táca quíví,

na cóto i yuhu i jeé ma cáhān neé i,  
te na cóto i jeé ma cáhān i jñuhun stáhú.

<sup>11</sup> Na cújiyo i nuú jñiñu neé, te na sáha i jñiñu váha.

Na nducú i coyūcu mání i, te na cóndihví ní i jín.

<sup>12</sup> Chí máá Jítoho yó ndíto ya ñayuu ndaa,  
te jini nahín yá jeé cájicān tahú i.

Te ñayuu casáha jñiñu neé, chí tu jetáhú yá i. Achí tutu.

<sup>13</sup> Te ní ñn ma sáha neé jín ró te núu mání jñiñu váha cándihví ní ró sáha ró. <sup>14</sup> Te vésú núu ndóho ró síquí jeé cájica ndaa ró, te yóhō ndetú cácuu ró. Núu súcuan te ma yūhu ró coto ró i, ní ma cunee ní ró. <sup>15</sup> Chí sa jín ini jín ánuá ró chíñúhún ró máá Jítoho yó Cristo. Te níni coo túhva ró nastió cuiñí víta ró te cahán yíñúhún ró jín ñayuu jeé castíhí

rohó síquí táca jéé cáñuhun ní ró. <sup>16</sup> Te caca ndaa ró jeé tú na cuéchi condee anuá ró, návaha ñayuu cácahān neé síquí ró, cucanu i jeé ní stáu yáhu i róhó jéé cájica ndaa ró chí cácañdije ró Cristo. <sup>17</sup> Chí núu cúní Yaá Dios te váha ga jeé ndóho ró síquí jeé casáha ró jñiñu váha vésú síquí núu sáha ró jñiñu neé.

<sup>18</sup> Chí máá Cristo suni ní ndoho ya, te ñn jínu-ni ní jihí yá jeé síquí cuéchi ndihí yó. Yaá váha cúu ya, te ní ndoho ya jeé yohó ñayuu ní casáha jñiñu neé, návaha quivicoo yó núu Yaá Dios sáha ya. Chí ní jihí yiquí cúñu yá, te ánuá yá chí tēcu-ni ní cáni. <sup>19</sup> Te ná ní jihí yá te ní jehēn anuá yá ní nacani ya jñuhun nuú anuá ñayuu cáyindihyū. <sup>20</sup> Chí nde jenahán tu ní cájetáhú i, ná ní iyo paciencia ní Yaá Dios te ní condetu ya níni sáha Noé barco jeé naní arca. Te jín arca un ní cácu jecu-ni ñayuu, chí unā-ni i ní cácu nuú ndúte. <sup>21</sup> Te nájñuhun ní cacācu i nuú ndúte, súcuan cúu jeé jéndute yó vijna te cácu ánuá yó. Te jeé jéndute yó, nasūu jéé ndúndoo yiquí cúñu yó, chí sa jeé jicán yó nuú Yaá Dios jeé ndúndoo ánuá yó. Te súcuan te cácu yó, chí ní cundúú yó jín Jesucristo nuú jñuhun ní natecu yá. <sup>22</sup> Te ní ndaa ya cuanuhun yá andiví, te ndéé yá ichi ndávaha Yaá Dios nuú cujéñnu ya. Te táca ndajehé andiví, jín jeé cándacu jñiñu, jín jeé cájni poder, cájendetū nuú yá.

*Jeé na cuáñiñu yó jín táhū jeé ní jéhe ya nuú yó*

### 4

<sup>1</sup> Núu súcuan te nájñuhun ní ndoho Cristo jehé yó jín yiquí cúñu yá, suni súcuan na táva ní máá ró ndoho ró. Chí ñayuu jeé ní ndoho jín yiquí cúñu, tuá sáha i cuéchi. <sup>2</sup> Núu súcuan te ní tiempo jeé cuahán gā ró, na sáha ró jñiñu jeé cúní Yaá Dios, te ma sáha ga ró jñiñu jeé ndíyo neé ní ró jín modo máá ró. <sup>3</sup> Chí nde ní véji ró, te ní casáha ró cuéhé cuéchi jeé cánujñahan ní ró síquí jeé tu ní cájini ró jñuhun Yaá Dios. Te tiempo un máni máá jéé neé ní casáha ró, te ní candiyo ní ró táca jéé neé, ní canajini ró, ní casáha ró vico neé, ní cajihí ndasí ró nuú víco ró, te ní cachíñúhún ró ídolo jeé ní cáhān Yaá Dios jeé ma chíñúhún yó. <sup>4</sup> Te cácu neé ní i jeé tuá cájica ró jín i jeé sáha ró táca cuéchi xeēn jín i. Te jeé yúcuán cúu jeé cácahān neé i síquí ró. <sup>5</sup> Te máá i chí ñn quíví te nacuaña i cuenta nuú máa Yaá jeé iyó túhva ya sándaá yá jñiñu ñayuu técu jín ñayuu ní cajihí. <sup>6</sup> Chí jeé yúcuán suni ní quiñi jñuhun váha ya nuú táca ndíyo ná ní cotecu i. Te ní cundaá síquí cuéchi ní casáha i ñayiví yáha, nájñuhun cúndaá síquí ndihí ñayuu, návaha nacani ní i te cotecu anuá i ní cáni nájñuhun técu Yaá Dios.

<sup>7</sup> Te je cuacuyajni quíví jeé náá táca jéé iyó. Núu súcuan te ndito na cóo xiní ró jínáhan



ró, te condihví ni rō cacān tahú rō. <sup>8</sup> Te jeē cānuú gá cūu jeē cundáhú ndasí ni rō jnāhan rō. Chi núu cundáhú ni yō jnāhan yó, te iyó jnūhun cāhnu ni nuū cuehē cuēchi. <sup>9</sup> Sāha vāha rō jín ñayuu jeē jinú i vehe rō, te ma cuxí ni rō. <sup>10</sup> Tāca rō cuajniñu rō núu jnāhan rō, núu ndese iyó máa táhū rō jeē ni jēhe Yāa Dios jeē cuajniñu rō núu yā. Te squícu vāha rō jín táhū jeē sán sán ni jēhe ya nuū in in rō. <sup>11</sup> Núu tahú jeē nācani rō jnūhun cūu, te na cāhán rō nájñūhun jeē maá Yāa Dios cāhán. Te núu tahú jeē chindéé ñáhán rō jnāhan rō cūu, te na sāha rō jín fuerza jeē ni jēhe ya nuū rō, návāha jín ndihi jeē casáha rō te cāhán ñayuu jeē yóhoyo cújéhnu Yāa Dios siquí jeē ni sāha ya jín Jesucristo. Te na cāhán yō jeē luu cújéhnu Cristo te jnái ya poder ní cāni. Amén.

### *Jeē ndóho yó siquí jeē candíje yó Cristo*

<sup>12</sup> Ñāni mání, núu vēji jñūdóho xeēn jeē coto ndee rohó, te ma cunéé ni rō caní ni rō jeē maá rō ni nihín jñūdóho xeēn gā. <sup>13</sup> Chi sa cusí ni rō jeē cándoho rō jecu jñūdóho jeē ni ndoho Cristo, návāha suni cusí ndasí ni rō quiví quéndā ndijin yā jeē cújéhnu luu ya. <sup>14</sup> Te yóhoyo ndetū rō te núu cācāhán neé i nuū rō siquí jeē cācandíje rō Cristo. Chi máa Espíritu Yāa Dios jeē cújéhnu ndasí, ndéé yā ini rō. Máa i chi cācāhán neé i siquí yā, te máa rō chi cāchíñūhún rō yā. <sup>15</sup> Te núu ndoho rō, te na ndóho rō siquí jeē cācandíje rō Cristo. Te ma ndóho rō siquí táca cuéchi nájñūhun cándoho ñayuu jéhi ndiyí, ñayuu sacuíhná, ñayuu sāha jniñu neé, jín ñayuu quiví nduu nuú jniñu jnāhan jeē tu cānuú quiví nduu. <sup>16</sup> Te sa núu in rō ndóho siquí jeē candíje rō Cristo, te ma cūcanu rō, chí sa nacuatáhú rō nuú Yāa Dios siquí jeē cūu rō cristiano.

<sup>17</sup> Chi je ni jinú quiví jeē quejéé sándaā Yāa Dios cuéchi, te xíhna gā ñayuu cácuu sēhe ya sándaā yā cuéchi. Te núu xíhna gā cuéchi máa yó quejéé yā sándaā yā, núu súcuan te xeēn gā coo jeē ndénehen ya cuéchi siquí ñayuu jeē tu ní jétáhú jñūhun vāha ya. <sup>18</sup> Te núu yóhoyo yí cácu ñayuu vāha, núu súcuan ¿te ndese cácu ñayuu casáha jniñu neé jín táca cuéchi? <sup>19</sup> Núu súcuan te rohó jeē cándoho siquí jeē súcuan cúní Yāa Dios, ma jécuiñí rō sāha rō jniñu vāha, te na chíhi rō máa rō ndaha máa Yāa jeē ni sāha rohó, chí squícu ya jeē ni jéñūhun ya.

### *Jeē jēhe de consejo ñayuu cācandíje*

## 5

<sup>1</sup> Vijna te na cāhán rī jín táca rohó téé jéhnu cándito ñayuu cācandíje, chí suni téé jéhnu ndíto ñayuu cācandíje cūu máa rí. Te cūu rí testigo jeē ní jito rí ndese ni ndoho Cristo. Te suni ndujéhnu rí jín rō sāha Cristo quiví quéndā ndijin yā. <sup>2</sup> Na cóto yúcún rō

ñayuu jeē ndeé jniñu rō condito rō, jeē cácuu i nájñūhun lanchi Yāa Dios. Te na cusí ni rō condito rō i, chí súcuan cúní Yāa Dios. Te nasūu siquí jeē sáfuerza yā rohó, ni nasūu siquí jeē nihín rō xūhún, chí sa siquí jeē cúní rō cuajniñu rō. <sup>3</sup> Te nasūu jeē ndacu nihín rō jniñu nuú ñayuu cándito rō, chí sa nducú rō cuu rō in ejemplo nuú i jeē cácuu i lanchi ya. <sup>4</sup> Yūcuán na te quiví quéndā ndijin maá Yāa cūu Pastor cújéhnu nuú rohó téé cácuu pastor lanchi ya, te cuāha ya premio nuú rō jijnāhan rō jeē yóhoyo luu te ma máa cuiti.

<sup>5</sup> Te suni rohó táca téé suchí, na cuándetū rō nuú táca téé jéhnu jínā. Te ndihi rohó ñayuu cācandíje, cuándetū rō nuú jnāhan rō, te caní suchí ni rō. Chí suhva cāhán tutu: Yāa Dios jési yā nuú ñayuu casáha téyí máa, te vāha ni yā chindéé ñáhán yā ñayuu casáha suchí máa.

Achí. <sup>6</sup> Núu súcuan te na cāni suchí ni rō, chí cáyihí rō ndaha Yāa Dios jeē jnái poder. Te sájéhnu ya rohó, na jinú máa quí. <sup>7</sup> Tāca jéé cānacani ndasí ni rō siquí, chíhi rō ndaha máa yā te máa yā coto, chí ndíto ya rohó.

<sup>8</sup> Te cájí na cóo xiní rō te ndito coo ni rō. Chí jexeén jeē jito uhú rohó, jíca cuu nducú squiví rohó jijnāhan rō núu cuéchi. Te xeēn gā sāha vésú ndicaha jeē iyo ndáhyú. <sup>9</sup> Te cuiñí nihín rō jéé ma cúndeyí jexeén jín rō, te nihín candíje rō jñūhun cúndáhú ni yā rohó. Chí cājini rō jeē suni súcuan cándoho hermano rō jeē cáyūcu ní cāhnu ñayiví. <sup>10</sup> Te núu ni jinu jeē ndoho rō jecu-ni tiempo, te Yāa Dios chí sāha ya jeē ije vāha ni rō jín jñūhun ya, jín jéé cuiñí nihín rō, te cuāha ya fuerza ini rō, te quendōo cutú rō ní cāni. Chí máa yā cūu jeē sāha táca jéé vāha yóhó, te ni cana ya yohó jéé cújéhnu luu yó jín yā ní cāni, siquí jeē nduu yó jín Jesucristo. <sup>11</sup> Te na cāhán yō jeē yóhoyo luu cújéhnu ya te jnái ya poder ní cāni. Amén.

### *Saludo jeē sándihí*

<sup>12</sup> Jíní rí jeē Silvano cūu in hermano jeē squícu vāha. Te máa de cuajeé nuú rō jín carta yáha jéé ní tee rí jecu jñūhun. Te jín yáha stihví ni rí rohó, te cāhán rí jín rō jeē ndaá cūu jeē táca jéé vāha ni sāha Yāa Dios rohó, suu stéén nuú rō jeē cundáhú ndije ni yā rohó. Te na cuiñí nihín rō jín jñūhun yáha.

<sup>13</sup> Ñayuu cācandíje jeē cáyūcú ñuu Babilonia, jeē ní nacāji ya i nájñūhun ni nacāji ya rohó, cācāhán i jeé sándeyí ni rō. Te Marcos, téé cūu nájñūhun sēhe rí, suni súcuan cāhán de. <sup>14</sup> Te núu na cāhán rō jín jnāhan rō, te techūhu mání rō ndaha i.

Te na cóo ndeyí coo sī ni ndihi rō jéé cáyihí rō ndaha Jesucristo. Súcuan na cóo. Amén.

## CARTA UU JEE NI TEE SAN PEDRO APOSTOL NUU ÑAYUU CACANDIJE

<sup>1</sup> Máá rí cúu Simón Pedro, te cúu ri mozo Jesucristo, te cúu ri apóstol jeé ní taji yá. Te tée ri carta yáha cuájeé nuú rō jijnáhan rō, jeé ní sáha Yaá Dios jeé inuú-ni jín rí jijnáhan ri ni canihñ rō jñuhun luu váha jeé cácan dije yó yá. Chi Yaá ndaa cúu Yaá Dios, suu máá Jesucristo jeé jnáma yóhó. <sup>2</sup> Te ñuhun ni rí jeé na sáha ga yá jeé váha ndasí rōhó jín jeé yóhoo coo ndeyí coo sñ ni rō siquí jeé cájecuhun váha ni rō ndese Yaá cúu Yaá Dios jín Jítoho yō Jesús.

*Siquí ndese cánúu coo ñayuu cácan dije*

<sup>3</sup> Te Yaá Dios, jín poder yá ni jēhe ya nuú yō táca jēé sáha jeé cúu caca ndaa yō nuú yá jín jēé chiñúhún váha yó yá. Chi ni steén yá máá yá nuú yō, chí cúu ya Yaá jeé ní cana yóhó, siquí jeé yóhoo cujéhu ya jín táca jniñu jéhu sáha ya. <sup>4</sup> Jeé yóhoo ní jejnūhun ya táca jēé yóhoo jéhu yóhoo váha sáha ya yóhó, návāha jín táca ún te nduu rō nájñuhun iyó máá yá, te cácu rō núu jniñu jeé cándiyo néé ni ñayuu casáha i ini ñayivi yáha. <sup>5</sup> Núu súcuan te na ndúcu ndeyí rō jín jñuhun yáha. Te jeé cácan dije rō, te siquí ún na chísoó rō jeé caca ndaa rō. Te jeé cájica ndaa rō, te siquí ún chísoó rō jeé cóndihvñ ni rō jecuhun váha ni rō. <sup>6</sup> Te siquí ún chísoó rō jeé casi rō modo jeé cuní máá rō. Te siquí ún chísoó rō jñuhun cuandeyí ni rō, te siquí ún chísoó rō jeé chiñúhún váha rō Yaá Dios. <sup>7</sup> Te siquí ún chísoó rō jeé cóo maní rō jín jñahan rō, te siquí ún chísoó rō jeé cundáhú ni rō jñahan rō.

<sup>8</sup> Chi núu cayá táca jniñu yáha jín rō, te suu sáha jeé ma cótecu saá-ni rō, chí sa quee váha jniñu sáha rō, siquí jeé cájecuhun ni rō ndese Yaá cúu Jítoho yō Jesucristo. <sup>9</sup> Te ñayuu jeé tu casáha jniñu yáha, nájñuhun jeé cáhíyo cuáá i, chí tu jécuhun ni i jñuhun ya, te je ni naa ni i jeé ní sándoo ya i táca cuéchi ni casáha i ichi yátá. <sup>10</sup> Jeé yúcuana na ndúcu ndeyí rō hermano, návāha coo seguro jeé ní cana ya rohó jín jēé ní nacáji ya rohó. Chi núu sáha rō táca jniñu yáha, te ma cáca yátá cuiti rō. <sup>11</sup> Yúcuán na te nune váha ichi quivi rō ini ñuu máá Jítoho yō Jesucristo, Yaá jnáma yóhó, nuú ndácu ya jniñu ní cání.

<sup>12</sup> Jeé yúcuana ma jécuiñ rí sáha ri jeé núcuhun ni rō táca jñuhun yáha, vésú je cájini rō te cáhñin ñihñ rō jín jñuhun ndaa jeé cácan dije rō. <sup>13</sup> Chi jéni ni rí jeé iyó váha sthvi ni rí rohó vijna técu gā rí, návāha nucuhun ni rō. <sup>14</sup> Chi máá Jítoho yō Jesucristo ní castuhun yá nuú rí jeé tuá cotecu nahán rí ñayivi yáha. <sup>15</sup> Jeé yúcuana na ndúcu ndeyí gá

rí stihví ni rí rohó, návāha núu je ni jihí rí, te níni nucuhun ni rō táca jñuhun yáha.

*Jeé ní cajito de jeé cujéhu Cristo*

<sup>16</sup> Ná ni castéén rí jñuhun máá Jítoho yō Jesucristo nuú rō, ndese ndiji ya jín poder yá, te tu ní cácahñ rí in cuento-ni jeé ní catava ndichí ñayuu. Chi ná ni cahíyo ri jín yá xini yúcu, te ní cajito jín núu rí jeé tucu ni nduu ya jeé ní nduluu jéhu ya. <sup>17</sup> Chi ni cajini rí jeé Tatá yō Yaá Dios ni cahñ yñúhún yá jín Jesús, te ni sahéhu ya Jesús. Chi ichi ándiví ní quiji jñuhun luu, ni cahñ Yaá Dios: Yáha cúu Séhe ri jeé maní ndasí rí jín, te cúsñ ni rí jín, áchi yá. <sup>18</sup> Te ni cajini sóho ri jñuhun un jéé ní cahñ ichi ándiví, chí ni cahñ ri jín máá Jítoho yō xini yúcu ñ ún.

<sup>19</sup> Te súcuan cájini yō jeé iyó ndaa ndije táca jñuhun ni cateé téé ní canacani jñuhun ya nde jengahán. Te váha jeé na chúhun ni rō jñuhun un jijnáhan rō, chí suu cúu nájñuhun in luz jeé cayú nuú néé, nde na cundijin quivi ndiji ya, te steén yá ini anua rō nájñuhun jeé ndíndéé lucero. <sup>20</sup> Te xíhna gā na jécuhun ni rō jeé ní in jñuhun cáhán tutu ñ, nasúu jēé súcuan-ni ni cajeni ni téé cúu. <sup>21</sup> Chí táca téé ndoo jeé ní canacani jñuhun ya nde jengahán, tu ní cácahñ cuiti de jñuhun jeé cúu ni máá de. Chí sa suhva ni canacani de jñuhun Yaá Dios jeé ní steén Espíritu Santo nuú de.

*Siquí téé cástéén jñuhun stáhú  
(Judás 4-13)*

## 2

<sup>1</sup> Te méhñu ñayuu Israel ún suni ni cahíyo téé ni canacani jñuhun stáhú. Te suni súcuan coo téé steén jñuhun stáhú méhñu rō. Te squivi de jñuhun stáhú jēé tívi ñayuu sáha. Te ni ma cuajñuhún de Jítoho yō jeé jnáma ya de, te súcuan sáha de jeé jnahñu ndetú yachí de. <sup>2</sup> Te cuehē ñayuu condicuhñ i modo neé jēé castéén de. Te sáha de jeé cahñ neé ñayuu siquí jñuhun váha ya jeé cúu ichi ndaa. <sup>3</sup> Te siquí jeé cándiyo ní de xúhún, te quende de xúhun rō siquí jñuhun stáhú steén de nuú rō. Te tu quíñ jññndóho jnahñu ndetú de, chí nde jengahán je ndétu jñuhun ndonda ya siquí cuéchi de.

<sup>4</sup> Chí tu ní íne cáhnu ni Yaá Dios nuú táca ndajéhé yá jeé ní casáha cuéchi, chí sa ni jnaa yá infierno cáyñdihyú nuú néé, cánuhñi jín cadena. Te ni chindihyú yá nde quivi sándaá yá siquí. <sup>5</sup> Te suni tu ní íne cáhnu ni yá nuú ñayuu jengahán, chí sa ní scúun ya saú seén siquí ñayuu ni casáha néé un. Te máá-ni Noé, téé ní nacani jñuhun ndaa, ní scácu ya de jín úxā gā ñayuu. <sup>6</sup> Te suni ní ndonda ya siquí cuéchi ñayuu ñuu Sodoma jín ñuu Gomorra, te ni cayú ñuu i ni nduu máá yáa na. Te súcuan cúu i in ejemplo nuú táca gá ñayuu sáha néé jēé quíji ga. <sup>7</sup> Te ní scácu ya Lot, chí téé ndaa ní cuu de, te ní cucuíhyá

ndasí ni de ni jito de jniñu néé ní casáha ñayuu neé un. <sup>8</sup> Chi tēe váha un ní condee de mēhñu ñayuu ún, te ndiquiví ní nacani cuihyá ní de jeé ní jini sōho de ni jito de táca jniñu néé ní casáha i. <sup>9</sup> Núu súcuan te máá Jítoho yō chi jnāma ya ñayuu cáchiñhún núu yā, te núu vēji jñūndóho siquī i. Te chíndihyū yā ñayuu casáha néé, návaha ndoho i castigo quiví sándaā yā cuēchi i.

<sup>10</sup> Te vīhyá gā stóho ya tēe casáha jniñu jnehén jēe ndiyo néé ní de, te cácuu jēe ní de siquī jniñu ndácu máá Jítoho yō. Nihni ndasí ní de, te cáhundeyí ní de sáha de jeé cácuu máa de, te tu cáyūhú de cahān ndeváha de siquī táca jēe cácujeñu nuū sucún. <sup>11</sup> Te ní máá ndajehé jeé cáhiin nuū Jítoho yō, vēsú cácujeñu ga yā jíin fuerza jíin jniñu ndiyo ya, te tu cácahān ndeváha ya siquī táca jēe cácujeñu ún.

<sup>12</sup> Te tēe ún chi cácuu de nájñuhun quiti yúcu jēe ní jéconāā tī jíin modo sáha tī, te cátañ tī návaha nihñ ñayuu tī cahñ i tī. Chi cácahān neé de siquī táca jēe tu cájecūhun ní de. Te cuu de nájñuhun jíhi táca quiti ún. <sup>13</sup> Te jeé ní castóho de ñayuu, suni súcuan naniñin de ndoho de. Te cácusñ ní de jíin táca jēe cácajni ní de, te casáha de táca jniñu jeé cándiyo néé ní de. Te cácuu de tēe quini jeé casáha jniñu cúcanu ñayuu. Te jeé cándututú de jíin ró vico ró, te níni cácusñ ní de jíin jniñu néé jniñu stáhú.

<sup>14</sup> Te cándiyo ní de cájito de ñahan, te tu cájecuñi de sáha de cuēchi. Te cástáhú de ñayuu tahya ní. Chi ní cacāan de jíin jñuhun ndiyo ní de táca ndajniñu. Te tēe jñahnū ndetū cácuu de. <sup>15</sup> Te ní casana de, chi ní castó de jñuhun jeé cúu ichi ndaā. Te ní candiquñ de modo Balaam, tēe ní nacani jñuhun nde jenahán, séhe Beor. Chi tēe un ní cusñ ní de nihñ de xūhun siquī jñuhun néé jēe cahān de. <sup>16</sup> Te ñin burro ní cahān tī nájñuhun ñin ñayuu, vēsú quiti ñihñ cúu tī. Te ní cahān tī nuū tēe ún, te súcuan ní jesi tī jeé ma quihñ de cahān de táca jñuhun néé stívi.

<sup>17</sup> Te táca tēe súcuan chi cácuu de nájñuhun tesoco íchi, nájñuhun vicó jeé stehí táchi. Te jñahnū ndetū de quivicoo de nuū néé nuū lúchi jñúu coyúcú de ní cáni. <sup>18</sup> Chi yōhyo cáсандúxi de máa de jíin jñuhun cácahān saá-ni de. Te cánducú de squívi tucu de sava ñayuu nuū jniñu néé jniñu ndiyo ní. Te súcuan cástáhú de ñayuu jeé sa ní quenda i ní cácu i nuū ñayuu casáha jniñu néé. <sup>19</sup> Te cácahān de jeé cáhiyo libre i sáha i ndese-ni cúni máa i, te ní máa de tu cáhiyo libre de, chi cácuu de mozo nuū cuēchi, chi máni jniñu jnehén casáha de. Chi táca jniñu jeé cūndeyí jíin ñin tēe jeé sáha de, suu yúcanu ndúu de mozo nuū. <sup>20</sup> Chi núu je ní cajini de ndese Yāá cúu máá Jítoho yō Jesucristo, Yāá jnāma yóho, te núu súcuan ní quenda de ní cácu de nuū jniñu jnehén iyó ñin ñayiví, te yúcuán

na te núu ndivicoo tucu de nuū jniñu un jēe cūndeyí tucu jíin de, núu súcuan te néé gá quendóo de jeé sándihí vēsú jeé xihna ñuhún. <sup>21</sup> Chi váha ga núu jeé tu ní cájini de jñuhun ichi ndaā nuū, vēsú jeé ní cajini de, te stóo tucu de jniñu ndoo jeé ní ndacu ya nuū de. <sup>22</sup> Chi cūndaā jíin de nájñuhun cáhān ñin jñuhun jenahán: Ina ní nacaji tī jeé ní ndujen tī. Te quini ní ndundo, ní nacuchi tucu tī ndehyū, achí.

### Siquí jeé ndíji Jítoho yō

## 3

<sup>1</sup> Ñáni máni, yáha cúu carta uū jeé tēe ri nuū ró. Te jíin ndindúu carta yáha cúni rí jeé nacani ní ró siquí ndihí jeé váha ndaā jeé jeni ichi rí rohó. <sup>2</sup> Te na núcūhun ní ró táca jñuhun jeé ní canacani tēe ndoo Yāá Dios nde jenahán, jíin jniñu ní ndacu máá Jítoho yō, Yāá jnāma yóho. Te suu cúu jeé ní castéén tēe cácuu apóstol nuū ró.

<sup>3</sup> Te xihna gā jñuhun yáha na jécūhun ní ró: Jeé nuū cuándihí quiví te quijicoo tēe sácatá siquí jñuhun ndaā yā, chí sáha de táca jniñu néé jēe ndiyo ní máa de. <sup>4</sup> Te cahān de jíinahan de: ¿Najehé cúu jeé tu ndíji Cristo nájñuhun ní jejnūhun ya? Chi nde quiví ní cajihí jíi yō te nde vijna, tu ndé sáma cuiti ndihí jeé iyó ndé ná ní jecóo ñayiví, achí de. <sup>5</sup> Chi tu cácuu de jecūhun ní de jeé ndé jenahán ní cuváha andiví jíin jñuhun ní cahān Yāá Dios. Te ní ndacu ya jniñu jeé na cuváha ñayiví jíin ndute, te mēhñú ndute ní nane ñuhun íchi. <sup>6</sup> Te suni jíin ndute ní naa ñayiví jenahán, chí ní ndaa ndute jeé ní cuun saū xeén. <sup>7</sup> Te suni súcuan jíin jñuhun ní cahān Yāá Dios ní sátuhva ya jeé cayú andiví jíin ñayiví iyó vijna. Chi máa quiví juicio te cayú ndihí, te jñahnū ndetū ñayuu ní casáha néé.

<sup>8</sup> Te suni ma náá ní ró jñuhun yáha, ñáni máni: Jeé nuū máá Jítoho yō chí ñin quiví cúu nájñuhun mil cuiyá, te mil cuiyá cúu nájñuhun ñin quiví-ni. <sup>9</sup> Chi nasūu jēe cucuéé máá Jítoho yō siquí jñuhun ní jejnūhun ya, nájñuhun cájeni ní sava ñayuu. Chi sa suhva iyó paciencia ní ya nuū yó, chí tu cúni yā jeé jñahnū ndetū ní ñin yó, chí sa cúni yā jeé ndihí yó nacani ní yó stóo yó cuéchi yó.

<sup>10</sup> Te quiví ndíji máá Jítoho yō, ñin sanaa-ni te quee, nájñuhun ñin sanaa-ni te quee ñacuñhá jecuáá. Te quiví ún chí ñihñ ndasí andiví, te naa-ni. Te ndihí jeé iyó andiví chí naa sáha ñuhūn. Te ñayiví jíin táca jēe iyó ñin, ndihí cayú.

<sup>11</sup> Te núu súcuan naa táca un, te cánuú ndasí jēe coo ndoo ánuá ró te chíñuhūn váha ro yá jíinahan ró. <sup>12</sup> Te condetu ró te condihví ní ró jeé na quee yachí quiví ndíji Yāá Dios. Te quiví ún cayú andiví te naa-ni, te táca jēe iyó chí ndute sáha yáñuhūn. <sup>13</sup> Te

máá yó chi cándetu yó andiví jéé jíín ñáyiví jéé, chi súcuan ni jejnūhun Yaā Dios. Te yūcuán chi máni jniñu ndaā jíín jniñu váha coo.

<sup>14</sup> Nūu súcuan, ñánī mánī, níni jéé cándetu ró jéé squícu tācá jniñu yáha, te na ndúcú ndéyí ró návāha quiví ndíji ya te nihīn yā rohó jéé cáyūcu mánī rō, te coo ndoo ró jéé tú na cuēchi ró. <sup>15</sup> Te na jécūhun ni rō jeē siquí jeē iyó paciencia ni maá Jítoho yō, jeē yūcuan cácu yó. Chi hermano yō Pablo jeē maní yō jíín, suni súcuan ni tee de nuū rō, chi súcuan ni steén Yaā Dios jnūhun ndíchí yá nuū de. <sup>16</sup> Te cáhán de siquí jnūhun yáha nuū tāca carta jeē ní tee de. Te nuū carta de un iyó jecu jnūhun jeē yí jécūhun ni yō. Te ñayuu tu jécūhun ni jíín ñáyuu tu íje jíín jnūhun cándíje, cánasama i modo steén jnūhun yí un, nájnūhun násama i jeē cahán sava ga tutu íi. Te súcuan sáha i jeē jnahnú ndetū maá i.

<sup>17</sup> Te róhó ñánī mánī, vijna te je ni cajini rō ndese coo tācá jniñu yáha. Nūu súcuan te coto má condiquín rō jnūhun stáhú cástéén ñayuu casáha néé. Chi núu tuú te snáa rō jnūhun cáhīn nīhin ró jíín. <sup>18</sup> Chi sa na cóndihvī gā ni rō cuni rō ndese Yaā cúu máá Jítoho yō Jesucristo, Yaā jnáma yóhó. Te na íje ga ni rō jíín jnūhun cúndáhú ni yā rohó. Te na cáhán yō jeē yóhyo luu cújéhu ya nde vijna jíín ní cáni. Súcuan na cóo. Amén.

## CARTA HN JEE NI TEE SAN JUAN APOSTOL NUU ÑAYUU CACANDIJE

### *Jñuhun cotecu yō nñ cáni*

<sup>1</sup> Jñuhun cátee ri cuajeē nuū rō jijnáhan rō cúu jñuhun máa Yaā jeē je iyó ndé ná tu jecóo táca jée iyó. Te ni cajini sóho ri jeē ni cáhān yā, te ni cajito jñúu rī yā, chi ni cajito vāha ri nuū yā, te ni cajñi ri yā. Te máa yá cúu Jñuhun cotecu yō nñ cáni. <sup>2</sup> Chi Yaā yāha jée sáha ya jeē cótecu yō, ni quenda ndijin yā. Te cácahān ri jñuhun ya, chi ni cajito ri yā. Te cácastūhun rī nuū rō jijnáhan rō síquī Yaā cúu Jñuhun cotecu yō nñ cáni, Yaā ni condee jijn Tátá yō Yaā Dios, te ni quenda ndijin yā nuū ri jijnáhan rī. <sup>3</sup> Jeē ni cajito ri jijn jée ni cajini sóho ri, yūcuan cúu jeē cácastūhun rī nuū rō, návāha coo inuū ni rō jijn yō jijnáhan yó. Te jendaá chi cáhiyo inuū ni yō jijn máa Tátá yō Yaā Dios jijn Séhe ya Jesucristo. <sup>4</sup> Te jñuhun yāha cátee ri cuajeē nuū rō, návāha cusñi teyñi rī rō jijnáhan rō.

### *Yaā Dios cúu luz*

<sup>5</sup> Te yāha cúu jñuhun ni steén Jesucristo nuū rī, te vijna cácastūhun rī nuū rō: Yaā Dios cúu luz, chi yōhyo ndaa yā, te tú cuñi na jñiñu néé iyó jijn yá. <sup>6</sup> Núu cácahān yō jeē cáhiyo inuū ni yō jijn yá, te núu cájica yó nájñuhun nuū néé jeē sáha yó jñiñu néé, núu súcuan te cástáhú yó, te nasūu jñiñu ndaa casáha yó. <sup>7</sup> Te núu cájica yó jijn luz yā jeē casáha yó jñiñu ndaa, nájñuhun iyó máa yá jijn luz yā jeē sáha ya jñiñu ndaa, yūcuān na te cáhiyo inuū ni yō jijn táca jñáhan yó. Te niñi máa Séhe ya Jesucristo sándoo yóhó núu ndñi cuēchi yó.

<sup>8</sup> Núu cácahān yō jeē tú na cuēchi yó, te cástáhú yó máa yó jeē jéni ni yō súcuan, te tu ñuhun jñuhun ndaa ini yō. <sup>9</sup> Te núu nacani ndaa yō cuēchi yó nuū yā, te cone cáhnu ni yā nuū cuēchi yó, te sándoo ya yóhó ndñi jeē neé casáha yó. Chi jini yō jeē Yaā vāha Yaā ndaa cúu ya. <sup>10</sup> Te núu cácahān yō jeē tú na cuēchi yó, te nájñuhun sáha yó jée Yaā stahú cúu ya, te tu cándije ndije yó jñuhun ya.

### *Cristo cúu Yaā cahán jehē yō*

## 2

<sup>1</sup> Táca jñuhun yāha tée ri cuajeē nuū rohó jée cácuu rō nájñuhun séhe ri, návāha ma sáha rō cuēchi jijnáhan rō. Te núu ndé ññ rō ní sáha cuēchi, te iyó máa Yaā cahán jehē yō nuū máa Tátá yō Yaā Dios. Jesucristo Yaā ndaa cúu ya. <sup>2</sup> Te ni socó yā máa yá jeē ndahva yā cuēchi yó, te nasūu cuēchi máa-ni yó, chi suni cuēchi ñayuu nñ ñayiví.

<sup>3</sup> Núu squícu yó jñiñu ndácu Yaā Dios nuū yō, jijn yūcuan cúcáhnu ni yō jeē jini ndije yó ndese Yaā cúu ya. <sup>4</sup> Te núu cáhān ññ ñayuu: Ruhū chi jini rī ndese Yaā cúu ya, te núu tu squícu i jñiñu ndácu ya, núu súcuan te stáhú i, te tu cáhān i jñuhun ndaa. <sup>5</sup> Te sa ñayuu squícu jñuhun ya, je ni ije vāha ni i jeē maní i jijn yá. Súcuan te cuni yō núu nduú yó jijn yá chí tuú. <sup>6</sup> Núu cáhān ññ ñayuu jeē nduú i jijn yá, cánuú jée caca ndaa i nájñuhun ni jica Jesucristo.

### *Jñiñu jée ndácu ya nuū yō*

<sup>7</sup> Hermano, nasūu ññ jñiñu jée ndácu ri nuū rō jeē cahán rī jeē na cundáhú ni rō jñáhan rō. Chi jñiñu jeē je cájini rō nde ná ni quejée rō candije rō cúu. Te jñiñu yāha jeē ndácu ya, vēji nde jenahán, te suu cúu jñuhun ni cajini sóho rō ndé quiví ni quejée rō candije rō. <sup>8</sup> Te vēsú súcuan, te nini jñiñu jée cúu, te jñiñu ndaa cúu nuū Cristo jijn nuū máa rō jijnáhan rō. Chi je cuayāha jñiñu néé jée iyó nuū néé, te je steén máa luz ndaa ini anuá yō vijna.

<sup>9</sup> Núu ññ ñayuu cahán i jeē jica i jijn luz yā, te núu jito uhū i jñáhan i, ñayuu ún chi jica ga i nájñuhun nuū néé jijn cuēchi. <sup>10</sup> Te ñayuu jeē cundáhú ni jñáhan, chí jica i jijn luz yā, cúu jeē sáha i jñiñu vāha. Te ni ññ ma cúu sáha jeē quiví i cuēchi. <sup>11</sup> Te ñayuu jito uhū jñáhan, chí iyó i nuū néé, te jica i nuū néé. Te tu jini i ndé chi quíñi i, chí nuū néé un ní jesi jeē tu jécūhun ni i.

<sup>12</sup> Róhó jée cácuu séhe, tée ri jñuhun yāha cuajeē nuū rō, chí jeē síquī Jesucristo te ni ine cáhnu ni Yaā Dios nuū cuēchi rō. <sup>13</sup> Róhó tátá jijnáhan rō, suni tée ri nuū rō, chí cájini rō ndese Yaā cúu Yaā iyó ndé xihna ñuhún. Róhó tée suchí jijnáhan rō, suni tée ri nuū rō, chí ni cacundeyí rō jeē tu ní cúu squiví jexeén rohó cuēchi.

Róhó jée cácuu séhe, tée ri jñuhun yāha cuajeē nuū rō, chí cájini rō ndese Yaā cúu máa Tátá yō Yaā Dios. <sup>14</sup> Róhó tátá jijnáhan rō, suni tée ri nuū rō, chí cájini rō Yaā iyó ndé xihna ñuhún. Róhó tée suchí jijnáhan rō, suni tée ri nuū rō, chí cáhñi niñi rō, te cácañdije rō jñuhun Yaā Dios, te ni cacundeyí rō síquī jexeén.

<sup>15</sup> Ma cutóo ni rō síquī ñayiví, ni táca jée iyó ini ñayiví. Chi núu ndé ñayuu cutóo ni i síquī ñayiví, ñayuu ún tu iyó mání i jijn Tátá yō Yaā Dios. <sup>16</sup> Chi táca jée cúu cuenta ñayiví, nasūu ndé nuū Tátá yō Yaā Dios vēji, chí cuenta ñayiví cúu. Te yūcuan cúu táca jée cájini ni yō jeē cuni modo neé máa yó, jijn jée ndiyo ni yō jeē jito yó nuū, jijn jée sanduxí yó máa yó síquī ndajñiñu névāha yó. <sup>17</sup> Te cuandñi ñayiví jijn táca jée ndiyo néé ni yō. Te ñayuu casáha jeē cuni máa Yaā Dios, chí cotecu i nñ cáni.

### *Jñuhun ndaa jijn jñuhun stáhú*

<sup>18</sup> Róhó jéé cácuu nájñuhun sêhe ri, cáhán ri jíin ró jeé cuandíhi quiví. Te je ni cajini jñuhun ró jéé quíji máá téé cuu contra siquí Cristo. Te nde vijna je ni canecoo cuehē téé jeé cácuu contra siquí Cristo. Te jeé yúcuu jíní yō jeé cuandíhi quiví. <sup>19</sup> Mēhñu máá yō ni quendacoo de, te nasūu jñáhan yó cácuandíje cácuu de. Chi núu jeé jñáhan yó cácuu de, te quendōo de jíin yó nuú. Te ni quenda de cuango de, náváha cuni cají yó jéé násūu jñáhan yó cácuu ndíhi de.

<sup>20</sup> Te máá ró jijnáhan ró, chi Cristo ni jēhe ya Espíritu Santo, ndeé yá ini anuá ró, te jeé yúcuu cájini ró jñuhun ndaá. <sup>21</sup> Núu súcuan te téé ri yáha cuájeé nuú ró, siquí jeé cájini ró jñuhun ndaá, nasūu siquí jeé tu cájini ró. Te cájini ró jeé tú na jñuhun stáhú íyó nuú jñuhun ndaá.

<sup>22</sup> ¿Ndeé ñn cúu jeé cahán máni jñuhun stáhú? Suu tēe jeé cahán jeé Jesús, tu cúu ndije ya Cristo, Yaá ní tají Yaá Dios. Yúcuu cúu tēe jeé cúu contra siquí Cristo, chi tu jéjñuhún de máá Tátá yō Yaá Dios jíin Séhe ya. <sup>23</sup> Táca ñáyuu jeé tu jéjñuhún i Séhe ya, suni tu íyó máá Tátá jíin i. Te ñáyuu jeé jéjñuhún i Séhe ya, suni íyó máá Tátá jíin i.

<sup>24</sup> Núu súcuan te chuhun váha ni ró máá jñuhun ni cajini sóho ró ndé jeé xíhna ñúhún. Te núu ñúhun váha ni ró jñuhun ni cajini sóho ró ndé jeé xíhna ñúhún, yúcuán na te suni ndúú ró jíin máá Tátá yō jíin Séhe ya. <sup>25</sup> Te yáha cúu jñuhun jeé ni jéjñuhun Jesucristo nuú yō: jeé cōtecu yō ní cáni sáha ya.

<sup>26</sup> Jñuhun yáha ní tee ri nuú ró jeé cástuhun rí siquí ñáyuu cánducú stáhú róhó. <sup>27</sup> Te máá ró jijnáhan ró, chi ni jēhe Jesucristo Espíritu Santo, ndeé yá ini anuá ró. Te jeé yúcuu tu jíin ñúhún jéé steén ni ñn ñáyuu nuú ró ndé vé cúu jendaá, chi máá Espíritu cúu jeé steén ndíhi nuú ró, te steén yá jñuhun ndaá, chi tu stáhú cuítí yá. Núu súcuan te caca ndúú ró jíin Cristo, nájñuhun steén Espíritu nuú ró.

<sup>28</sup> Sēhé jijnáhan ró, vijna te na cáca ndúú ró jíin Cristo, náváha núu na quénda ndijin yá, te ma yúhu yó, ni ma cūcuan yō nuú yá quiví ndíji ya. <sup>29</sup> Chi je cájini ró jeé Yaá ndaá cúu Jesucristo, te suni na jécuhun ni ró jeé táca ñáyuu casáha jñiñu ndaá, sēhe Yaá Dios cácuu i.

*Jñuhun ñáyuu cácuu sēhe Yaá Dios*

### 3

<sup>1</sup> Nacá jeé yóhyo ni cundáhú ni Tátá yō Yaá Dios yohó, chi ní nihñn yō jñuhun cuu yó séhe ya, te suu cúu ndije yó. Jee yúcuu, ñáyuu ñáyiví tu cájini i jeé cúu yó séhe ya, chi tu jíin i ndese Yaá cúu máá yá. <sup>2</sup> Ñání máni, vijna te cúu yó séhe Yaá Dios, te ná tu cuni yō ndese coo yó ní cáni. Te je jíin yō jeé quiví quénda ndijin Jesucristo, te nduu yó nájñuhun íyó máá yá, chi coto yó núu yá ndese íyó yá. <sup>3</sup> Te

táca ñáyuu jeé súcuan ñúhun ni i, chí sándoo i ánuá i, nájñuhun íyó ndoo Jesucristo.

<sup>4</sup> Te ñáyuu casáha cuēchi, chí stíví i ley Yaá Dios. Chí núu sáha yó cuēchi, te stíví yó ley yá. <sup>5</sup> Te je cájini ró jeé ní quíji Jesucristo ini ñáyiví náváha quende yá cuēchi yó. Te máá yá tú na cuēchi ya. <sup>6</sup> Te táca ñáyuu jeé nduú i jíin yá, tu cájica i jíin cuēchi. Te táca ñáyuu cájica jíin cuēchi, tu jíin i ya, ni tu jécuhun ni i ndese Yaá cúu ya. <sup>7</sup> Sēhé jijnáhan ró, coto ró jéé ma stáhú ni ñn i róhó. Chi na jécuhun ni ró jeé ñáyuu casáha jñiñu ndaá, máá i cácuu ñáyuu ndaá, nájñuhun íyó ndáá máá yá. <sup>8</sup> Te ñáyuu casáha cuēchi, máá i cácuu sēhe jexeén. Chí jexeén cúu jeé sáha cuēchi vēji nde jeé xíhna ñúhún. Jee yúcuu ní quíji Sēhe Yaá Dios, jeé snáá yá táca jñiñu néé sáha jexeén.

<sup>9</sup> Ní ñn ñáyuu jeé cúu sēhe Yaá Dios, tu jíca i jíin cuēchi, chí ni sáha Yaá Dios jeé ní nduu i nájñuhun íyó máá yá. Te ma cúu ga caca i jíin cuēchi, chí sēhe Yaá Dios cácuu i. <sup>10</sup> Súcuan cuni yō ndé ñn cúu sēhe Yaá Dios jíin sēhe jexeén: Táca ñáyuu jeé tu sáha jñiñu ndaá, jíin jéé tu cundáhú ni jñáhan, nasūu sēhe Yaá Dios cúu i.

*Jee na cundáhú ni yō jñáhan yó*

<sup>11</sup> Yáha cúu jñuhun jeé ní cajini sóho ró ndé jeé xíhna ñúhún: jeé na cundáhú ni yō jñáhan yó. <sup>12</sup> Te ma sáha yó nájñuhun ni sáha Caín, jeé ní cuu de sēhe jexeén, te ni jehni de ñani de. ¿Te najehé ni jehni de ñani de? Siquí jeé ñani de ni sáha jñiñu ndaá, te máni jñiñu néé ní sáha máá de.

<sup>13</sup> Hermano jijnáhan ró, ma cunéé ni ró te núu ñáyuu ñáyiví cáquití ni i nuú ró. <sup>14</sup> Te máá yó chí siquí jeé cundáhú ni yō jñáhan yó, súcuan jíin yō jeé jé ni cácu yó jéé cōtecu yō ní cáni. Te ñáyuu jeé tu cundáhú ni jñáhan, íyó i jíin jñuhun jñahnú ndetú i. <sup>15</sup> Chí táca ñáyuu quítí ni nuú jñáhan, nájñuhun ñáyuu jéjñi ndíyí cúu i. Te cájini ró jeé ñáyuu jéjñi ndíyí, ma nihñn tahú i cōtecu i ní cáni. <sup>16</sup> Jee ni jíin Cristo jehé yō, yúcuu cúu jeé steén cají ndese cúu jñuhun cundáhú ni. Te máá yó, chí suni súcuan jíin ñúhún cundáhú ni yō jñáhan yó vésú na cúu yó jehé i. <sup>17</sup> Te núu névaha yó jéé cōtecu yō ñáyiví, te núu jíin yó jeé cūmani nuú jñáhan yó, te núu tú cundáhú ni yō i cuáha yó jéé jíin ñúhún i, núu súcuan ¿te á íyó máni yō jíin Yaá Dios, chí naún? <sup>18</sup> Sēhé jijnáhan ró, ma cundáhú ni yō jíin máá jñuhun cáhán-ni yó, chí sa suhva na cundáhú ndije ni yō nde jíin jñiñu sáha yó.

*Ndese cucáñu ni yō jeé váha sáha yó núu Yaá Dios*

<sup>19</sup> Te súcuan cundaá ni yō jeé squícu yó jñuhun ndaá, te cucáñu ni yō jeé váha sáha yó núu yá. <sup>20</sup> Chí núu ánuá yō tú váha sáha siquí jeé íyó cuēchi yó, te Yaá Dios chí cújehnu ga yá vésú anuá yó, te jíin ndíhi ya táca un. <sup>21</sup> Núu súcuan ñání máni, núu váha

sáha ánuá yō siquí jeē tú na cuēchi yō, yūcuán na te cúcáhu ni yō jeē váha sáha yō núu Yaā Dios. <sup>22</sup> Te táca jeē cacán yō nuū yā, te sáha ya jeē cahán yō, chí squícu yō jniñu ndácu ya te sáha yō jniñu jeē cúsiñ ni yā. <sup>23</sup> Te yáha cúu jniñu ndácu ya: jeē na cándije yō jeē ni sáha Sēhe ya Jesucristo jehē yō, jiín jeē na cundáhú ni yō jnáhan yō, nájnūhun ni ndacu ya jniñu nuū yō. <sup>24</sup> Te táca ñayuu squícu jniñu ndácu Yaā Dios, ndúú i jíin yá, te ndéé yá ini anuá i. Te jíin máá Espiritu jeē ni jéhe ya jeē ndeé ini anuá yō, jíin yúcuán te jíni yō jeē ndeé Yaā Dios ini yō.

*Jñūhun jeē véji nuū Espiritu jíin jñūhun cáhán contra Cristo*

#### 4

<sup>1</sup> Nānī mánī, ma candíje ró táca tée jeē cácahán de jeē jíin Espiritu Yaā Dios cácanani de jñūhun. Chí sa suhva coto ndee ró de, núu nde nuū Yaā Dios véji jñūhun cácahán de, chí tuú. Chí ini ñayiví je ni canecoo cuehē tée cácanani jñūhun stáhú, te cácahán de jeē ndé nuū Yaā Dios véji. <sup>2</sup> Te súcuán nacuni ró ndé-ni i cúu jeē jíin Espiritu Yaā Dios cahán: táca ñayuu jeē cácahán ndaā jeē ni quiji Jesucristo, ni nduu ya tēe, máá i cúu jeē jíin Espiritu Yaā Dios cácahán. <sup>3</sup> Te táca ñayuu jeē tu cájejnūhún jeē súcuán ni nduu ya tēe, máá i chí nasūu jíin Espiritu Yaā Dios cácahán i. Chí sa suhva cácuu i contra siquí Cristo. Te je ni cajini jñūhun ró jeē quíjicoo ñayuu súcuán, te vijná je cáhiyo i ini ñayiví.

<sup>4</sup> Séhē jijnáhan ró, máá ró cácuu sēhe Yaā Dios, te je ni cacundeyí ró siquí tée castáhú un. Chí jéhnú ga cúu poder máá Yaā jeē ndeé ini ró, vésú poder máá jeē ndeé jíin ñayuu ñayiví jeē castáhú. <sup>5</sup> Máá i cácuu cuenta ñayiví, te jeé yúcuán cácahán i jñūhun cuenta ñayiví. Te ñayuu cácuu cuenta ñayiví, cájini nahín i jñūhun ún. <sup>6</sup> Te máá yó chí sēhe Yaā Dios cácuu yó. Te ñayuu jeē cáhán i ndese Yaā cúu Yaā Dios, máá i cájini nahín i jñūhun cácahán yō. Te ñayuu jeē násūu sēhe Yaā Dios cácuu, máá i tu cájini nahín i jñūhun cácahán yō. Te súcuán nacuni yō ndé-ni cúu jeē cahán jñūhun ndaā jíin ndé-ni cúu jeē cahán jñūhun stáhú.

*Máni jñūhun cundáhú ni iyó jíin Yaā Dios*

<sup>7</sup> Nānī mánī, na cundáhú ni yō jnáhan yó, chí jñūhun cundáhú ni, nde nuū Yaā Dios véji. Te táca ñayuu cundáhú ni jnáhan, chí sēhe Yaā Dios cúu i, te jíini i ndese Yaā cúu Yaā Dios. <sup>8</sup> Te ñayuu jeē tu cundáhú ni jnáhan, tu jíini i ndese Yaā cúu Yaā Dios, chí mánī jñūhun cundáhú ni iyó jíin Yaā Dios. <sup>9</sup> Súcuán ni steén Yaā Dios ndese cundáhú ni yá yohó, chí ni tají yá Sēhe ya ni quiji ini ñayiví yáha, vésú mañūhún-ni ya iyó, náváha cotecu yō ni cáni sáha ya. <sup>10</sup> Te yáha cúu jñūhun cundáhú ni: nasūu jeē xihna máá yó ni iyó maní yō jíin

Yaā Dios, chí sa suhva máá yá cúu jeē ní cundáhú ni yá yohó. Te ni tají yá Sēhe ya ni quiji, náváha socó yá máá yá jeē quende yá cuēchi yó.

<sup>11</sup> Nānī mánī, núu súcuán ni cundáhú ni Yaā Dios yohó, te suni súcuán cánuú jeē cundáhú ni yō jnáhan yó. <sup>12</sup> Ni iin ñayuu tu ní jito cuiti nuū Yaā Dios. Te núu cundáhú ni yō jnáhan yó, te ndeé Yaā Dios ini anuá yō, te je ni ije váha ni yō jíin jñūhun cundáhú ni. <sup>13</sup> Te máá Espiritu Santo jeē ni jéhe ya jeē ndeé ini yō, máá yá steén jeē nduú yó jíin Yaā Dios, te ndeé Yaā Dios ini yō. <sup>14</sup> Te ni cajito ri te cácastūhun rí jeē máá Tátá yō ni tají yá Sēhe ya ni quiji náváha jnama ya ñayuu ñayiví. <sup>15</sup> Te núu ndé ñayuu jejnūhún i jeē Sēhe Yaā Dios cúu Jesus, te ndúú i jíin Yaā Dios, te Yaā Dios ndeé yá ini i.

<sup>16</sup> Te máá yó, je ni jini yó te ni candíje yó jeé cundáhú ni Yaā Dios yohó. Chí mánī jñūhun cundáhú ni iyó jíin Yaā Dios. Te ñayuu cundáhú ni jnáhan, ndúú i jíin Yaā Dios, te ndeé yá ini anuá i. <sup>17</sup> Te súcuán cúu jeē ije váha ni yō jíin jñūhun cundáhú ni, náváha ma yūhu yó quiví sándaā yá jniñu yó. Chí nájnūhun cundáhú ni Cristo, suni súcuán cándaā máá yó ini ñayiví yáha. <sup>18</sup> Te núu maní yó jíin yá, te tu yúhú yó nuū yá. Chí núu ni ije yó jíin jñūhun maní yó jíin yá, te tú na siquí yuhú yó nuū yá. Chí jñūhun yúhú un cúu jeé yuhú yó ndoho yó castigo. Jeé yúcuán ñayuu cáyūhú chí ná tu ije váha i jíin jñūhun maní i jíin yá.

<sup>19</sup> Te yohó chí maní ndasí yó jíin Yaā Dios, chí xihna gá máá yá ni cundáhú ni yá yohó. <sup>20</sup> Te núu iin ñayuu cahán i jeé maní i jíin Yaā Dios, te núu quiñi ni i nuú jnáhan i, núu súcuán te ñayuu stahú-ni cúu i. Chí núu iin ñayuu tu iyó mánī i jíin jnáhan i jeé jito i nuú, te ni ma cúu coo maní i jíin Yaā Dios jeé tu jito i nuú yá. <sup>21</sup> Chí je ni ndacu ya jniñu yáha nuū yó: Ñayuu jeé maní i jíin Yaā Dios, suni na cóo maní i jíin jnáhan i.

*Jeé cundeyí yó siquí jeneé iyó ini ñayiví*

#### 5

<sup>1</sup> Táca ñayuu jeé cácañíje i jeé Jesús cúu Cristo, Yaā ní tají Yaā Dios, máá i cácuu sēhe Yaā Dios. Te ñayuu maní jíin Yaā cúu Tátá, suni cácañíje ni i ñayuu cácuu sēhe ya. <sup>2</sup> Súcuán jíni yó jeé cundáhú ni yō ñayuu cácuu sēhe ya, núu maní yó jíin yá te squícu yó jniñu ndácu ya. <sup>3</sup> Chí jeé squícu yó jniñu ndácu Yaā Dios cúu jeé maní yó jíin yá. Te jniñu ndácu ya chí tú véyi. <sup>4</sup> Chí táca ñayuu cúu sēhe Yaā Dios, cundeyí i siquí jeneé iyó ini ñayiví. Te jeé candíje yó jeé cundáhú ni yá yohó, yúcuán cúu fuerza jeé sáha jeé cundeyí yó. <sup>5</sup> Máá-ni ñayuu jeé candíje jeé Jesús cúu Sēhe Yaā Dios, máá i cúu jeé cundeyí siquí jeneé iyó ini ñayiví.

*Jnūhun cáhān ndaā siquī Séhe Yaā Dios*

<sup>6</sup> Te jeē ní quiji Jesucristo ini ñayiví, chí ni jendute ya jíin ndute, te ni jeti niñí yā jeē ní jíhi yā jehē yō. Te nasūu máá ñn-ni jeē ní jendute ya jíin ndute, chí suni ni jeti niñí yā. Te máá Espíritu Yaā Dios cáhān ndaā siquī yā, chí nuū máá Espíritu vēji jnūhun ndaā.

<sup>7</sup> Chí ini andiví iyó úní jeē cáhān ndaā siquī jnūhun yáha: máá Yaā cúu Tátá, jíin Yaā cúu Jnūhun, jíin Espíritu Santo. Te ndinúni yá, chí ñn-ni cúu ya. <sup>8</sup> Te ini ñayiví suni iyó úní jeē steén ndaā: máá Espíritu, jíin jéé ní jendute Jesús, jíin jéé ní jeti niñí yā. Te ndinúni yáha, chí inuū-ni steén siquī yā. <sup>9</sup> Te cájetáhú yó jnūhun cáhān ndaā tēe, te jéhu ga cúu jnūhun cáhān máá Yaā Dios. Te jnūhun ni cáhān yā cúu jnūhun siquī Séhe ya. <sup>10</sup> Ñayuu cácandíje jeē Séhe Yaā Dios cúu Jesús, je ni cacundaā ni i jnūhun yáha jeē ní cáhān Yaā Dios. Te ñayuu jeē tu cácandíje jeē ní cáhān Yaā Dios, nájnūhun cásáha i jeē Yaā stahú cúu ya, chí tu cácandíje i jnūhun ni cáhān ndaā yā siquī Séhe ya. <sup>11</sup> Te jnūhun ndaā un cúu jeē ní sáha ya jeē cótecu yō ní cáni, te Séhe ya ndiso jnūhun cotecu yō. <sup>12</sup> Ñayuu jeē iyó Séhe ya jíin i, je ni nihín tahú i cotecu i. Te ñayuu jeē tu iyó Séhe ya jíin i, ma nihín tahú i cotecu i.

*Jnūhun consejo jeē sándihí*

<sup>13</sup> Jnūhun yáha tēe ri nuū rohó ñayuu cácandíje Séhe Yaā Dios, návāha cucáhu ni rō jeē ní nihín tahú rō cotecu rō ní cáni.

<sup>14</sup> Te cucáhu ni yō Yaā Dios, chí jíni yō jeē núu na vé jíicán yō nuū yā jeē suni cúni máá yá, te jíni nahín yá jeē jíicán yō. <sup>15</sup> Te núu jíni yō jeē jíni nahín yá jeē jíicán yō, núu súcuan te suni jíni yō jeē sáha ya jeē jíicán yō.

<sup>16</sup> Núu ñn ñayuu jíni i jeē sáha jnáhan i cuēchi jeē násūu cuēchi jeē jnahnú ndetū i cúu, te na cácan tahú i nuū Yaā Dios, te cuāha ya jnūhun cotecu jnáhan i, te núu nasūu cuēchi jeē sáha jeē jnahnú ndetū i cúu. Iyó cuēchi jeē jnahnú ndetū i sáha, te tu cáhān rí jeē cacán tahú rō jehē ñayuu sáha cuēchi súcuan. <sup>17</sup> Tācá jniñu néé cúu cuēchi, te iyó cuēchi jeē násūu jéé jnahnú ndetū i cúu.

<sup>18</sup> Te jíni yō jeē tāca ñayuu cácuu séhe Yaā Dios, tu jíca i jíin cuēchi. Chí Yaā cúu Séhe Yaā Dios, ndíto vāha ya i. Te tú na vé cúu sáha jexeén jíin i.

<sup>19</sup> Te jíni yō jeē séhe Yaā Dios cácuu yó. Te ñayuu ní ñayiví yíhi i ndaha jexeén.

<sup>20</sup> Te suni jíni yō jeē ní quiji Séhe Yaā Dios, te ni sáha ya jeē jécūhun ni yō, návāha cuni yō ndese Yaā cúu máá Yaā ndaā. Te ndúú yó jíin Yaā ndaā, suu jíin máá Séhe ya Jesucristo. Máá yá cúu ndíje Yaā ndaā, te máá yá sáha jeē cótecu yō ní cáni. <sup>21</sup> Séhé jijnáhan ró, na cújiyo ró núu tāca jéé násūu Yaā ndaā cúu. Súcuan na cóo. Amén.



## CARTA UU JEE NI TEE SAN JUAN APOSTOL

*Jnūhun ndaa jín jnūhun cúndáhú ní*

<sup>1</sup> Máá ná cúu tēe jéhnū ndíso jniñu, te tēe ná carta yáha cuájeē nuū ní jēē cúu ní hermana ní nacāji Yaā Dios, jín núū séhe ní jijnáhan i. Te maní na jín ní jijnáhan ní sáha jnūhun ndaa yā, te nasūu máá-ni ná, chí suni táca ñáyuu jini jnūhun ndaa. <sup>2</sup> Te maní na jín ní jijnáhan ní síquī jeē cácan díje yó jnūhun ndaa yā jeē iyó ini anuá yō, te coo jín yó ní cāni. <sup>3</sup> Te ñūhun ní na jēē Tatá yō Yaā Dios jín Séhe ya Jitoho yō Jesucristo, na sáha ga yā jeē váha nihín, te cundáhú ní yā nihín, te sáha ya jeē coo ndeyí coo sī ní ní, jín jnūhun ndaa jín jnūhun cundáhú ní.

<sup>4</sup> Yōhyo ní cusī ní ná, chí ní jini na jēē sava séhe ní cájica i jín jnūhun ndaa, nájnūhun ní ndacu máá Tatá yō Yaā Dios jniñu nuū yō. <sup>5</sup> Hermana, cáhán ndahú ná jín ní jeē na cundáhú ní yō jnáhan yó. Te jnūhun tēe ná yáha cuájeē nuū ní, nasūú ñin jniñu jēē sá ndacu ya cúu, chí jniñu ní ndacu ya nuū yō nde ná ní quejéé yó candíje yó cúu. <sup>6</sup> Te jeē cundáhú ní yō jnáhan yó cúu jeē caca yó nájnūhun ní ndacu ya jniñu nuū yō. Te jniñu ní ndacu ya cúu jeē caca ní jín jnūhun cundáhú ní, nájnūhun ní cajini sōho ní ndé ná ní quejéé ní candíje ní.

*Siquī tēe cástáhú*

<sup>7</sup> Chí cuehē tēe cástáhú ní canecoo de ní ñáyivi, te tu cájejnūhún de jeē ní quiji Jesucristo ní nduu ya tēe. Te tēe tu cájejnūhún súcuan, cácuu de tēe stáhú, te cácuu de contra síquī Cristo. <sup>8</sup> Coto ní jēē ma snáa ní táhū síquī jniñu váha ní casáha ní, chí sa suhva jeē na nihín ní ndíhi tahú ní.

<sup>9</sup> Núu ndé ñáyuu jniñu inga jnūhun, te tu quéndōo i jín jnūhun ní steén Cristo, núu súcuan te tu íyó Yaā Dios jín i. Te ñáyuu quéndōo jín jnūhun ní steén Cristo, chí íyó Tatá yō jín i, te suni íyó Séhe ya jín i. <sup>10</sup> Te núu jín ñin ñáyuu vehe ní, te núu tu quijnáhan jnūhun stéén i jín jnūhun yáha, te ma cuáha ní jnūhun condee i vehe ní, ní ma cahán ní jnūhun ndeyí ní jín i. <sup>11</sup> Chí ñáyuu cahán jnūhun ndeyí ní jín i, chéndéé ñájnáhan jín i síquī jniñu néé casáha i.

*Jnūhun sandíhi*

<sup>12</sup> Iyó cuehē gā jnūhun cahán na jín ní jijnáhan ní, te tu cúni na tee ná núu tútu jín tinta. Chí ñūhun ní na cuájeē ná coto jnáhan yó, te ndajnūhun yó, návāha cusī ndasí ní yō.

<sup>13</sup> Táca séhe culū ní, ñahan jeē suni ní nacāji ya, cácahán i jeē sánde yí ní ní. Súcuan na cóo. Amén.

## CARTA UNI JEE NI TEE SAN JUAN APOSTOL

### *Jeē jejnūhún de tēe nání Gayo*

<sup>1</sup> Máá rí cúu tēe jéhu ndíso jniñu, te tēe ri carta yáha cuájeē nuū rō, amigo Gayo, chí manī rī jín ró sáha jnūhun ndaā.

<sup>2</sup> Nánī mánī, jícán tahu rī jeē vāha na quihín táca jniñu sáha ró, jín jéē na cóo vāha ró, nájñūhun iyó vāha ánuá rō jín jnūhun ya. <sup>3</sup> Yōhyo ni cusī ni rī ná ni quecoo sava hermano te ni cacastūhún de nuū rī ndese vāha squícu ró táca jniñu ndaā, chí jíca ndaā rō. <sup>4</sup> Tuá na inga sáha jeē cúsī gā ni rī, chí mánī jeē nihín rī jnūhun jeē cájica ndaā ñayuu cácuu nájñūhun sēhe rī siquī jeē ni scándíje ri i.

<sup>5</sup> Nánī mánī, yōhyo vāha sáha ró jéē chindéē ñáhán ró táca hermano, te víhyá gā núu tēe ñuu jicá cácuu de. <sup>6</sup> Chí tēe un ní canacani de jnūhun nuū ñayuu cácadíje yáhá, ndese cundáhú ni rō de. Te jícán rī jeē chindéē ñáhán gá rō de, núu na vé jini ñūhún de jeē caca ga de ichi nuū quihín de, nájñūhun núnjahan ni Yaā Dios. <sup>7</sup> Chí tēe un ní quendacoo de cájica de siquī jniñu Jesucristo. Te tú na vé cáquihín de nuū ñayuu jeē tu jini jnūhun Yaā Dios. <sup>8</sup> Jeē yúcuan cánuú coto yó de, chindéē ñáhán yó de jeē cánacani de jnūhun ndaā.

### *Siquī jeē tú vāha sáha Diótrefes*

<sup>9</sup> Je ni tee ri ñin carta nuū ñayuu cácadíje jñā. Te Diótrefes, tu jétáhú de jnūhun cáhán rī, siquī jeē cuní de cujéhu máá de nuū i. <sup>10</sup> Jeē yúcuan, núu na jéé rī te cahán rī nuū de siquī jniñu sáha de, chí yōhyo sájnūhún de te cáhán de jnūhun stáhú siquī rī jijnáhan rī. Te nasūu máá yúcuan-ni sáha de, chí suni tu jétáhú de táca hermano jéngoo nuū de, te jési de jeē ma cuátáhú ñayuu nuū táca hermano un. Te ñayuu cájetáhú nuū hermano un, quénehen de i nuū cándutútú ñayuu cácadíje.

<sup>11</sup> Nánī mánī, ma ndácu ró ñayuu casáha jniñu néé, chí sa suhva ñayuu casáha jniñu vāha. Chí sēhe Yaā Dios cácuu ñayuu casáha jniñu vāha. Te ñayuu casáha jniñu néé, tu cájini i ndese Yaā cúu Yaā Dios.

### *Jeē cácahān i jeē vāha sáha Demetrio*

<sup>12</sup> Táca ñayuu chí cácahān i jeē vāha sáha Demetrio. Te jniñu ndaā jeē sáha de, stéén jeē tēe ndaā cúu de. Te suni sícuan cácahān máá rí, te cájini rō jeē iyó ndáā jnūhun cáhán rī.

### *Jnūhun sandihí*

<sup>13</sup> Iyó cuéhē gā jnūhun cahán rī jín ró, te tu cúní rī tee rī jín tinta jín pluma. <sup>14</sup> Chí ñūhún ni rī cuajeē yachī rī coto jnáhan yó, te ndajñūhun yó.

<sup>15</sup> Te ñūhún ni rī jeē na cóo ndeyí coo sī ni rō. Táca amigo yō vāha cácahān i jeē sándeýí ni rō. Te suni cahán rō jín ñin ñin amigo jñā jeē sándeýí ni i, áchí rí, te cocahán yō.

## CARTA JEE NI TEE SAN JUDAS APOSTOL NUU ÑAYUU CACANDIJE

<sup>1</sup> Máá rí cúu Judas ñani Jacobo, te mozo Jesucristo cúu rí. Te tée rí carta yáha cuájeé nuū rohó ñáyyuu jeé ní cana máá Tátá yō Yaā Dios, te ní sáha ya jeé iyó ndoo íyó í rō nuū yā jeé cácuu rō ñáyyuu manī yā jíin. Te Jesucristo ndító vāha ya rohó jée cāyihī rō ndaha ya. <sup>2</sup> Te ñūhun ní rī jeé na cūndáhú gá ní yā rohó, te sáha ya jeé coo ndeyí coo sī ní rō, te coo manī ndasí yá jíin rō, te na ndúcuehē gā tāca jée yáha nuū rō.

*Siquí tēe cástéén jñūhun stáhú  
(2 Pedro 2.1-17)*

<sup>3</sup> Ñānī mánī, yōhyo ní cuu ní rī tee rí nuū rō siquí jñūhun ní jnama ya rohó jíin rúhū jijnáhan yó. Te ní jini rī jeé cánuú gá tee rí carta jeé stihví ní rī rohó návāha nducú ndeyí rō jeé ma cási ñayuu nuū jñūhun cácandije yó. Te jñūhun ún chi je ní jēhe ya ñin jínu-ni nuū tāca ñáyyuu maá yá. <sup>4</sup> Chi sava tēe ní castáhú de rōhó ní quivicoo de mehñu rō. Te tēe ún chi nde jenahán je cáhán tutu ñi jeé jñahnú ndetú de siquí jñiñu cásaáha de. Cácuu de tēe ndevāha, chí cácahān de jeé vāha ní Yaā Dios, te jeé yūcuan vetū-ni sáha de jñiñu néé, cácahān de. Te tu cájejnūhún ndije de Jitoho yō Jesucristo jíin Yaā Dios, jeé mañūhún-ni ya cujēhnu nuū yō.

<sup>5</sup> Te vijna chí vesú je cájini vāha rō, te cúni rī jeé na núcūhun ní rō ndese ní sáha máá Jítoho yō. Chí ní jnama ya ñayuu Israel jenahán, ní chindéé ñájnāhan ya i jeé ní jinu i ñi ñuu tatú Egipto cuahān i. Te vesú sūcuan te cuéé gá te ní snāá yá sava i jeé tu ní cácandije i. <sup>6</sup> Te suni nucūhun ní rō siquí ndajéhé yā jeé ní castóo jñiñu ndiso, te ní castóo nuū ní ndeé andiví. Te Yaā Dios ní chindihyū yā jijnāhan, te cándetu nde quiji quiví cáhnu jeé sándaā yā jñiñu. Te cánuhñi jíin cadena, cáyūcu ní cáni nuū cunú nuū néé. <sup>7</sup> Te suni ní stóho ya ñayuu ñuu Sodoma jíin ñuu Gomorra jíin sava ga ñuu jeé ní Iyo yajni, chí suni ní casáha néé i nájñūhun ní casáha tācá ndajéhé un ndé jenahán gá. Te máá i ní cajica jnéni i te ní casáha i tāca cuéchi néé ndasí. Te ní canihñi i castigo ñūhūn jeé cayú ní cáni, te sūcuan cúu i ñin ejemplo nuū ndihí ñayuu.

<sup>8</sup> Te tēe cástáhú jeé ní quivicoo mehñu rō, vesú cájini de jeé sūcuan ní sáha ya, te cájeni cáhá ní de, te cásaáha jnéhén de yiqui cúñu de, te cásquéhichī ní de tēe cándacu jñiñu Jitoho yō, te cácahān ndevāha de siquí tāca jée cácujeñu nuū sucún. <sup>9</sup> Te nasūñu sūcuan ní sáha ndajéhé Miguel, vesú ndajéhé cujēhnu

ga cúu ya. Chí tu ní cáhán ndevāha ya ní tu ní ndácunehen ya cuéchi siquí jexeén ná ní casásáhán jñāhan ya jíin jéxeén un jeé siquí yiqui cúñu Moisés ná ní jihí de. Chí suhva-ni ní cahān yā: Máá Yaā Dios, Yaā cúu Jitoho, cuxeén yā nuū rō, ní achi Miguel. <sup>10</sup> Te tēe cástáhú yáha chí cácahān neé de siquí tāca jée tu cájecūhun ní de. Te tāca modo cánevāha de siquí jeé sá cáa de, nájñūhun quiti yúcu jée sá cáa tí, suu yūcuan sáha jeé jñahnú ndetú de.

<sup>11</sup> Nacā xeén ndoho de núu sūcuan, chí tu cájetáhú de Yaā Dios, nájñūhun jeé tu ní jétáhú Caín. Te siquí jeé cáculi de ñihñ de xūhūn te cástéén de jñūhun stáhú, nájñūhun ní sáha Balaam. Te jñahnú ndetú de nájñūhun Coré, tēe ní jihí siquí jeé ní cunihñi ní de. <sup>12</sup> Tēe yáha núu cándutútú de jíin rō jeé cáyeji manī rō, te cásaáha de jñiñu cúcanu rō. Chí cáyeji cájini sī ní de, te tu cásaáha de cuenta ndese caji inga ñayuu, chí máni máá de ndáhvi ní de caji vāha de. Te cácuu de nájñūhun vicó ichi jée stehí táchi. Te suni cácuu de nájñūhun yujnu jeé tu jēhe ndehē maá tiempo. Te cácuu de nájñūhun yujnu jeé ní quenda nde jíin yoho, te tú cuiti gá na modo nane numa. <sup>13</sup> Te nájñūhun jeé jisó cóyo ndute mar te cáne tiñū, sūcuan jícu de jíin jñiñu néé jée cúu jñūhun canu. Te cácuu de nájñūhun quimi jeé ní sana ichi. Te je iyó túhva nuū néé nuū lúchi jñúú coyúcu de ní cáni.

<sup>14</sup> Te jeé ní yáha iñu yucūn Adán, te ní cacu Enoc, te ní nacani de jñūhun jeé ní steén Yaā Dios nuū de siquí tāca tēe yáha, áchi de: Máá Jítoho yō ní steén yā nuū rī jeé ñin quiví te quiji ya jíin cuéhe mil ñayuu maá yá. <sup>15</sup> Te sándaā yā jñiñu tāca ñayuu, te snáhnú ndetú yā tāca ñayuu casáha néé. Chí máni jñiñu néé cásaáha i siquí jeé canéé máá i, te cácahān i cuéhe jñūhun ndevāha siquí yā. Ní achi Enoc. <sup>16</sup> Tāca tēe yáha máni cácahān sōo de, te cácahān de siquí ñayuu. Te máni jeé cúsi ní maá de cánductú de. Te cácahān de jeé tēe téyí cácuu de, te cácahān yñiñhún de jíin ñayuu návāha ñihñ de jecu nuū i.

*Jeé stihví ní Judas ñayuu cácandije*

<sup>17</sup> Te máá rō jijnāhan rō ñānī mánī, na núcūhun ní rō jñūhun jeé jí ní canacani tēe cácuu apóstol maá Jítoho yō Jesucristo. <sup>18</sup> Chí ní cacahān de: Nde nuū cuándihí quiví te quijicoo tēe sácatā siquí jñūhun ndaā yā, te sáha de tācá jñiñu néé jée ndíyo ní maá de. Sūcuan ní cacastūhún apóstol. <sup>19</sup> Tēe un cúu jeé casásñin ñayuu. Te máni cándihví ní de tāca jée cutíndí ní maá de, chí tu ndeé Espiritu yā jíin de.

<sup>20</sup> Te máá rō ñānī mánī, na íje vāha ní rō jíin jñūhun ndoo ndasí jée cácandije rō. Te cacān tahú rō jíin fuerza Espiritu Santo. <sup>21</sup> Te quendōo ñihñ rō jíin jñūhun jeé cundáhú ní Yaā Dios rohó. Te condetu rō quiví jeé cōtecu

rō nī cāni sāha máá Jítoho yō Jesucristo siquī  
jeē cundáhú ni yā rohó.

<sup>22</sup> Te sava ñayuu jeē cájeni siquī ni, nducú  
ró modo scandíje ró i. <sup>23</sup> Te sava ga i chi  
nducú ndéyí ró jeē cácu i nuū cuéchi i, jeē  
nájñuhun stáa ró i nuū ñuhún. Te cundáhú ni  
rō i jnama ró i, te coto ró máá ró, te cuquini  
ni rō coto ró nde sahma i jeē ní cujnéhén jíin  
jniñu néé cásáha i.

*Jñuhun cújéhnú Yaā Dios nī cāni*

<sup>24</sup> Te Yaā Dios chi máñuhún-ni máá yá cúu  
Yaā ndichí, Yaā jnáma yóhó. Te íyó poder yā  
jeē coto ya rohó jéé ma quiví ró cuéchi, jíin  
jéé sāha ya jeē cuíñi ró núu ndíndēe yá, te  
quiví ún coo ndoo ró núu yā, te cusī ndasí  
ni rō sāha ya. <sup>25</sup> Te na cáhán yō jeē yóhyo luu  
cújéhnú ya siquī jeē ni sāha ya jíin Jítoho yō  
Jesucristo. Te na cáhán yō jeē cujéhnú téyí  
yá, te ndácu ya jniñu jíin poder jeē ndiso ya  
nde jenahán ndasí jíin ndé vijna jíin ndé nī  
cāni. Súcuan na cóo. Amén.

# JNIÑU QUIJI JEE NI JITO NDIJIN SAN JUAN

*Jeē ni stéén Jesucristo tācá jniñu quiji*

<sup>1</sup>Jñuhun yáha cúu jeē ní cachi Yaā Dios nuū Jesucristo ndese coo tācá jniñu quiji, návāha nacastūhun yá nuū ñáyyuu cácanđije jeē cácuu i mozo yā. Te stéén yā nuū i tācá jniñu jeē yachī coo. Te ni tají yá ndajéhé yā ní quiji ya ni stéén ndijin yā jniñu un nuū ruhū Juan jeē cúu ri mozo yā. <sup>2</sup>Te máá rí cástūhun ndāā rí siquī tāca jéē ní jito ri ún, te nácani ndāā rí jñuhun Yaā Dios jíin jñuhun jeē ní cahán ndāā Jesucristo.

<sup>3</sup>Yōhyyo ndetū ñayuu cahu tutu yáha, te suni yōhyyo ndetū ñayuu cuni nahín jeē cáhu ñayuu tāca jñuhun yáha jeē ní cachi Yaā Dios, te chuhun ni i. Chi je cuacuyajni quivī coo tācá jniñu yósó nuū tútu yáha.

*Jeē téé Juan carta nuū ndihúxá grupo ñayuu cácanđije*

<sup>4</sup>Máá rí cúu Juan, te téé ri jñuhun yáha cuájeē nuū rohó, ndihúxá grupo ñayuu cácanđije jeē cáyūcu Asia. Te ñuhun ni rí jeē máá Yaā Dios na sáha ga yā jeē váha rohó jíjnáhan ró, te sáha ya jeē coo ndeyí coo sī ní ró. Chi máá yá cúu Yaā iyó vijna, te ni iyo ya ní cáni, te coo ya ní cáni. Te ñuhun ni rí jeē suni súcuan sáha ndihúxá Espírítu jeē cáhūin ya yuhu mesa nuū ndácu Yaā Dios jniñu. <sup>5</sup>Te ñuhun ni rí jeē suni súcuan sáha Jesucristo, Yaā cahán ndāā tāca jñuhun. Te xihna gā máá yá ní natecu méhñu ndíyi. Te cújéhu ya nuū tāca rey jeē iyó ñayiví. Te máá yá cúndáhú ní yā yohó, te ni nacate ya yohó nuū cuéchi yó jíin níñi yā. <sup>6</sup>Te ni sáha ya jeē ní nduu yó rey jíin sūtū cájejniñu nuū Tatá yā Yaā Dios. Te na cahán yō jeē yōhyyo luu cújéhu ya te jnái ya poder ní cáni. Amén.

<sup>7</sup>Cuni sōho jíjnáhan ró, chi ndiji Cristo jíin vícō. Te ndivii ñayuu coto i nuū yā, te nde jíin ñayuu jeē ní castújí i ya. Te tāca raza ñayuu níí cáhnu ñayiví ndahyū i jeē tu ní cácanđije i ya. Súcuan nahín coo.

<sup>8</sup>Suhva cahán máá Jítoho yō, Yaā jnái ndihi poder: Máá rí cúu nájñuhun letra A xihna ñuhún jíin letra Z jeē sándihí na, chi máá rí ní squejeé ndihi te máá rí sínu, áchi máá Yaā iyó vijna, te ni iyo ya ní cáni, te coo ya ní cáni.

*Jeē ní jito Juan jeē cújéhu luu Cristo*

<sup>9</sup>Máá rí cúu hermano rō Juan jíjnáhan ró. Te inuú-ni ndóho rí jñundóho jíin rō siquī jeē cácanđije yó Jesucristo, te inuú-ni ndácu Yaā Dios jniñu nuū yō, te inuú-ni jéndeyí ní yō sáha Jesucristo. Te siquī jeē ní nacani ri jñuhun Yaā Dios jíin jéē ní cachi ndāā rí jñuhun Jesucristo, jeē yúcuan ní cajni i ruhū cuenta preso, te ni cachune i ruhū isla jeē

naní Patmos. <sup>10</sup>Te iin domingo ni jito ndijin rí jeē ní stéén máá Espírítu Santo nuū rí. Te ni jini sōho ri iin jeē cána jee nihin ichi yátá rí nájñuhun jeē tívi trompeta. <sup>11</sup>Te ni cahán jíin rí:

Máá rí cúu nájñuhun letra A xihna ñuhún jíin letra Z jeē sándihí na, chi máá rí cúu Yaā iyó ndé xihna ñuhún te coo ri níí cáni. Te na téé ró nuū iin tutu tāca jéē cóto ró, te tají ró quihín nuū ndihúxá grupo ñayuu cácanđije jeē cáyūcú i níí cáhnu Asia, suu ini ñuu Efeso, jíin ñuu Esmirna, Pérgamo, Tiatira, Sardis, Filadelfia, jíin Laodicea. Achí.

<sup>12</sup>Yūcuán na te ní ndicó cóto ri jeē cóto ri ndé iin cúu jeē cahán jíin rí. Te ná ni ndicó cóto ri te ni jito ri uxā candelero oro. <sup>13</sup>Te méhñu ndihúxá candelero un índichi máá Yaā ní nduu tēe. Te ñuhun ya iin sahna cáni jeē jinú nde nuū jehé yā. Te núhni iin cinturón oro jicā yā. <sup>14</sup>Te ixí xíní yā chi yaa nájñuhun ixí lánchi, nájñuhun yuhvá volcán. Te tinū ya ndíndēe nájñuhun yáñuhūn. <sup>15</sup>Te jehé yā xíñú jíto nájñuhun cāa cuaán jéē ní ndúhvā nuū horno. Te níhin ndasí cáhan yā, nájñuhun níhin cuehé yūte náhnu. <sup>16</sup>Te ndaváha ya jnái ya uxā quāmi. Te yuhu ya quénda jeē cáa nájñuhun espada jeē xeén ndindúú lado, te suu cúu jñuhun ya jeē niní sándaā yā siquī cuéchi. Te nuū yā cáa nájñuhun niándii jeē nándii ndaxin.

<sup>17</sup>Te ná ni jito ri yā te ni cotúú rí nuū jehé yā nájñuhun jeē ní jíhi rí. Te ni soó yá ndaváha ya siquī rí, te ni cahán yā:

Ma yūhu ró. Máá rí cúu Yaā iyó ndé xihna ñuhún te coo ri níí cáni. <sup>18</sup>Te Yaā técu cúu ri. Chi ni jíhi rí te ni natecu rí, te vijna chi técu rí níí cáni. Te máá rí jnái poder siquī cuéhyí jéhi ñayuu jíin siquī lugar nuū cáyūcu ánuá ndíyi. <sup>19</sup>Núu súcuan te tee ró nuū tútu tāca jéē ní jito ró, jeē cúu vijna jíin jéē cóo ichi nuú. <sup>20</sup>Te yáha cúu jñuhun sáhi siquī ndihúxá quāmi ni jito ró jnái ndaváha rí, jíin siquī ndihúxá candelero oro. Ndhúxá quāmi ún cúu nájñuhun ndihúxá jeē cácujehu nuū ndihúxá grupo ñayuu cácanđije. Te ndihúxá candelero cúu nájñuhun ndihúxá grupo ñayuu cácanđije.

*Jñuhun cuahán nuū ndihúxá grupo ñayuu cacandije:*

*Jñuhun cuahán ñuu Efeso*

## 2

<sup>1</sup>Teé ró jñuhun yáha na quihín nuū jeē cújéhu nuū ñayuu cácanđije ñuu Efeso: Súcuan cáhan ruhū, Yaā jeē jnái ndihúxá quāmi jíin ndaváha rí, te jica cuu ri méhñu ndihúxá candelero oro. <sup>2</sup>Je jíni rí tācá jniñu váha casáha ró, jeē cándihví ní rō siquī jñuhun rí, jíin jéē cájendeyí ní ró. Te jíni rí jeē tu cájéhe ró jñuhun quivicoo ñayuu casáha néé méhñu rō. Te jíni rí jeē ní cajito ndee rō

tēe cástáhú jeē cácahān de jeē cúu de apóstol, te ni cajini rō jeē tēe stáhú cácuu de. <sup>3</sup> Te ni cajendeyi ni rō ni candoho rō jnūndóho, te tu ní ndínuu ni rō jeē cácuu ndasí rō jín jniñu ri. <sup>4</sup> Te vēsú sūcuan te iyó jecu jeē cahán ri nuū rō, chí tuá cáhiyo maní vāha rō jín rí nájñuhun ni iyo maní rō jín rí quiví jehé. <sup>5</sup> Núu sūcuan te nucūhun ni rō ndese ni castóo rō jñuhun jeē ni iyo maní rō jín rí, te nacani ni rō, te na sáha rō nájñuhun ni casáha rō ndé quiví ún. Te núu ma nácani ni rō, te yachí jeē rí te stáa ri candelero rō nuū iin, cúu jeē ma cuñi ga rō jín ñáyuu cácadnje. <sup>6</sup> Te vēsú sūcuan te iyó iin jeē vāha casáha rō, chí tu cánujnahan cuiti ni rō cájito rō jniñu neé casáha ñayuu cándiquin jñuhun jeē steén Nicolás. Te suni máa rí tu nujnahan cuiti ni rí jito ri. <sup>7</sup> Ñayuu iyó sóho na chúsohó i jeē cahán maá Espiritu Santo jín táca grupo ñayuu cácadnje. Táca ñayuu jeē cūndeyi síquí jeneé, cuāha ri jñuhun caji i ndehé jeē cúun xiní yújnu jeē sáha jeē cótecu i ní cáni. Te yujnu un iin nuū jardín Yaā Dios nde andiví, áchí yá.

#### *Jñuhun cuahān ñuu Esmirna*

<sup>8</sup> Te tee rō jñuhun yáha na quihín nuū jeē kujénu nuū ñayuu cácadnje ñuu Esmirna: Súcuan cáhan ruhū, Yaā jeē iyó ndé xihna ñuhūn te coo ri ní cáni, te ni jilhi rí te ni natecu rí. <sup>9</sup> Je jini rí táca jniñu vāha casáha rō, jín jnūndóho cándoho rō, jín jeē cándoho ndáhú rō. Te vēsú sūcuan te cucá rō ndihí jeē ndíso jñuhun ri. Te jini rí jeē cácahān neé ñayuu síquí rō jijnáhan rō. Ñayuu un cácahān i jeē ñayuu hebreo, ñayuu maá Yaā Dios cácuu i, te tuú chí cástáhú-ni i, chí sa ñayuu yhi ndaha Satanás cácuu i. <sup>10</sup> Te ma yūhú cuiti rō táca jéē ndoho rō. Chí jexeén je yajni sáha jeē quivicoo sava rō vecāa jeē cóto ndee rohó jijnáhan rō, te ndoho rō jnūndóho uxí quiví. Te na cuñi nihin rō ndé cuu rō, te cuāha ri premio jeē cótecu rō ní cáni. <sup>11</sup> Ñayuu iyó sóho na chúsohó i jeē cahán maá Espiritu Santo jín táca grupo ñayuu cácadnje. Táca ñayuu jeē cūndeyi síquí jeneé, ma nihín i jnūndóho jeē jnahnú ndetu i cuu i vuelta uū, achí yá.

#### *Jñuhun cuahān ñuu Pérgamo*

<sup>12</sup> Te tee rō jñuhun yáha na quihín nuū jeē kujénu nuū ñayuu cácadnje ñuu Pérgamo: Súcuan cáhan ruhū, Yaā jeē névāha espada jeē xeén ndindúú lado, te suu cúu jñuhun ri jeē sándaā rí síquí cuéchi. <sup>13</sup> Je jini rí táca jniñu vāha casáha rō, te jini rí jeē cáyūcu rō mēhñu ñayuu jeē ndácu Satanás jniñu nuū. Te vēsú sūcuan te cáhīn nihin rō jín jñuhun ri, te tu ní cánayūhu rō jeē cácadnje rō rúhū, ni quiví ni jilhi Antipas, tēe ni squicu vāha ni nacani ndaā jñuhun ri. Chí ñuu rō cáyūcu ñayuu cácejnīñu nuū Satanás, te ni cajehni

i Antipas. <sup>14</sup> Te vēsú sūcuan te iyó jecu jeē cahán ri nuū rō jijnáhan rō. Chí mēhñu rohó ñáyuu ñuu Pérgamo iyó sava ñayuu cándiquin jñuhun ni steén Balaam. Chí tēe un ní steén de nuū Balac ndese squiví de ñayuu Israel cuéchi jeē cáji i jeē ní sócō nuū ídolo jín jéē cosíquí ndéē jnāhan i. <sup>15</sup> Te suni iyó sava ñayuu mēhñu rō jeē cácadnje ga i jñuhun ni steén Nicolás, te jñuhun ún chí tu nujnahan cuiti ni rí. <sup>16</sup> Núu sūcuan te nacani ni rō síquí cuéchi rō. Chí núu tuú te yachí jeē rí jín espada jeē quénda yuhu ri, te suu cúu jñuhun ri jeē sándaā rí síquí cuéchi. Te jín yúcan te stóho ri ñayuu jeē cádnje ga jñuhun neé un. <sup>17</sup> Ñayuu iyó sóho na chúsohó i jñuhun jeē cahán maá Espiritu Santo jín táca grupo ñayuu cácadnje. Táca ñayuu jeē cūndeyi síquí jeneé, scáji rí i maná jeē yisáhi ichi ándiví. Te suni cuāha ri iin yuú cuijní nuū i, te nuū ún condee iin síhví jéé, te ni iin ñayuu ma cūni síhví un, chí máa-ni i jeē nihín. Achí yá.

#### *Jñuhun cuahān ñuu Tiatira*

<sup>18</sup> Te tee rō jñuhun yáha na quihín nuū jeē kujénu nuū ñayuu cácadnje ñuu Tiatira: Súcuan cáhan ruhū, maá Séhe Yaā Dios jeē ndíndēe tñūu rí nájñuhun yáñuhūn. Te jehé rí xihú jito nájñuhun cáa cuaán jéé ni ndúhvā. <sup>19</sup> Je jini rí táca jniñu vāha casáha rō, chí cácadnhú ni rō jnāhan rō, te cácadnje nihin rō rúhū, te cácejnīñu rō nuū rí, te cájendeyi ni rō. Te jini rí jeē vihýá gā casáha rō vijna vēsú nde quiví jehé. <sup>20</sup> Te vēsú sūcuan te iyó jecu jeē cahán ri nuū rō. Chí iyó iin ñahan mēhñu rō jéé naní Jezabel, te cájēhe rō jñuhun steén ña nuū rō. Te áchí ña jeē nácani ña jñuhun Yaā Dios. Te tuú chí jín jñuhun steén ña te stáhú ña ñayuu cácadnje jeē cácuu i mozo rí. Te sáha ña jeē casíquí ndéē jnāhan i, jín jéé cáyeji i jeē ní sócō nuū ídolo. <sup>21</sup> Te ni jēhe ri tiempo jeē na nacani ni ña, te tu cūni ña nacani ni ña stóo ña jeē casíquí ndéē ña. <sup>22</sup> Núu sūcuan te na sáha ri jeē jécāva ña jín cuéhyí. Te táca ñayuu casíquí ndéē jín ña, suni cuāha ri jnūndóho xeén nuū i, te núu ma nacani ni i stóo i jniñu neé nájñuhun sáha ña. <sup>23</sup> Te sáha ri jeē cúu ñayuu jeē ní scádnje ña. Te sūcuan cuni táca grupo ñayuu cácadnje jeē maá rí cúu Yaā jini ndihí ndese cáa jeē níjnūni jín ánuá ñayuu. Te cuāha ri yāhu iin iin rō nuū ndese ni casáha rō. <sup>24</sup> Te sava ga rō jeē cáyūcú ñuu Tiatira, jeé tu ní cájetáhú jñuhun steén ñahan ún, ni tu ní cájniñu rō jñuhun jeē cácahān i jeē jñuhun sáhi gá Satanás cúu, jín máa rō cahán ri jeē ma tée ga rí inga jniñu síquí rō. <sup>25</sup> Chí máa-ni jeē na quéndōo nihin rō jín jñuhun ndaā cácadnje rō, te quéndōo nihin rō jín ndé quiví ndiji ri. <sup>26</sup> Táca ñayuu jeē cūndeyi síquí jeneé, jín jéé squicu vāha jniñu cūni rí nde vijna te nde quiví sándihí, sáha ri jeē kujénu i ndacu i jniñu nuū táca nación, <sup>27</sup> nájñuhun ní sáha Tátá rí jeē kujénu ri

ndácu ri jniñu. Te ndacu nihin i jniñu nuñ táca nación. Te nájnñhun cúun yúú i quísi tahu, súcuan squéhichí i ñayuu tu cájendetú nuñ rí. <sup>28</sup> Te sáha ri jeé coto i ruhú jeé luu kujéhu ri quenda ndijin rí, nájnñhun jíto i lucero jeé cáne cúndijin. <sup>29</sup> Ñayuu iyó sóho na chúsóhó i jññhun jeé cahán maá Espiritu Santo jíin táca grupo ñayuu cácandíje. Achí yá.

*Jññhun cuahán ñuu Sardis*

**3**

<sup>1</sup> Te tee ró jññhun yáha na quíhín nuñ jeé kujéhu nuñ ñayuu cácandíje ñuu Sardis: Súcuan cáhán ruhú, maá Yaá jeé névaha ndihúxá Espiritu Yaá Dios jíin ndihúxá quími. Je jíni rí táca jniñu cásáha ró, te cácahán ñayuu jeé cátecu ró, te nuñ rí chí nájnñhun ndíyi cácuu ró. <sup>2</sup> Na nátañ ni ró, te ndejéé nihin ró jíin jniñu jeé jecu na iyó te ndúcú naa. Chí je jíni rí jeé tu squícu váha váha ró núu Yaá Dios. <sup>3</sup> Te na núcñhun ni ró táca jññhun jeé ní castéén nuñ ró. Te cuatáhú ró jññhun ún te nacani ní ró siquí cuéchi ró. Chí núu tú natahú ni ró, te cuajeé rí nuñ ró ñin sanaa-ni nájnñhun jeé ñin sanaa-ni te quíji ñaculhá, te ma cúní ró na hora jinu rí nuñ ró. <sup>4</sup> Te vésú súcuan te iyó nahín jecu ró ñuu Sardis jeé tu ní cásáha ró cuéchi, jeé cúu nájnñhun jeé tu ní sájnñhén ró sahma ró. Jee yúcuán cujíin yaa coo sahma ró caca ró jíin rí, chí ñayuu váha cácuu ró. <sup>5</sup> Chí táca ñayuu jeé cúndeyí síquí jeneé, cuáha ri sahma cujíin yaa cahun i. Te ma ndáhva rí síhví i nuñ libro jeé yosó síhví ñayuu cotecu ní cáni. Te cuajñhún rí i nuñ Tatá rí jíin núu táca ndajéhé yá. <sup>6</sup> Ñayuu iyó sóho na chúsóhó i jññhun jeé cahán maá Espiritu Santo jíin táca grupo ñayuu cácandíje. Achí yá.

*Jññhun cuahán ñuu Filadelfia*

<sup>7</sup> Te tee ró jññhun yáha na quíhín nuñ jeé kujéhu nuñ ñayuu cácandíje ñuu Filadelfia: Súcuan cáhán ruhú, Yaá ndoo Yaá ndaa, te névaha ri ndacáa rey David. Te máá rí núne jeé quívi ñayuu nuñ ndácu ri jniñu, te ni ñin ma cúu casi, te máá rí jési, te ni ñin ma cúu nune. <sup>8</sup> Je jíni rí táca jniñu váha cásáha ró. Te ni nune rí nájnñhun ñin yéhyí quívicoo ró, te ni ñin ma cúu casi. Chí vésú jecu-ni fuerza ró iyó, te ni cacandíje ró jññhun ri, te tu cájesi ró yuhu ró jéé cácandíje ró rúhú. <sup>9</sup> Te iyó sava ñayuu yíhi ndaha Satanás, te cácahán i jeé ñayuu hebreo, jíin ñayuu maá Yaá Dios cácuu i, te tuú chí cástáhú-ni i. Núu súcuan te sáha ri jeé jécóo i nuñ ró te jecuñi yití i nuñ ró, te cuni i jeé maní rí jíin ró. <sup>10</sup> Te váha ni casquícu ró jññhun ní cahán ri jeé cúndeyí ní ró. Te jeé yúcuán jnama ri rohó quíví jeé quíji ñin jññndóho xeén siquí ñayuu ní cáhnu ñayví, jéé coto ndee ún i jíjnáhan i. <sup>11</sup> Te yachí ndiji rí. Núu súcuan te quéndoó nihin ró jíin

jññhun cácandíje ró, návaha ni ñin ma quénde premio ró. <sup>12</sup> Táca ñayuu jeé cúndeyí síquí jeneé, sáha ri jeé cuu i nájnñhun síhín yuú luu ñin templo Yaá Dios maá rí. Te ma cújijo i nuñ ndeé yá un. Te tee ri síhví Yaá Dios maá rí jneé i, jíin síhví jéé máá rí, jíin síhví ñuu Yaá Dios maá rí. Te ñuu un cúu Jerusalén jeé, te cuun quíji ichi ándiví ndé nuñ Yaá Dios maá rí. <sup>13</sup> Ñayuu iyó sóho na chúsóhó i jññhun jeé cahán maá Espiritu Santo jíin táca grupo ñayuu cácandíje. Achí yá.

*Jññhun cuahán ñuu Laodicea*

<sup>14</sup> Te tee ró jññhun yáha na quíhín nuñ jeé kujéhu nuñ ñayuu cácandíje ñuu Laodicea: Súcuan cáhán ruhú, maá Yaá cúu jññhun ndaa, Yaá cúu testigo váha jeé cahán ndaa. Te máá rí ni sáha ndíhi jeé ní cáhán Yaá Dios jeé na jécóo. <sup>15</sup> Je jíni rí táca jniñu cásáha ró. Te cácuu ró nájnñhun jeé tu mjíin ni tú jíhni, cúu jeé jecu-ni cácandíje ró jññhun rí, te ni tu cájito uhú ró ni tu cándíhví ni ró siquí. Te nacá jeé váha núu jeé mjíin ró chí jéé jíhni ró nuú. <sup>16</sup> Te tuú chí máá yáxixi-ni ró, chí ni tu cájito uhú ró ni tu cándíhví ni ró siquí. Te jeé yúcuán squéhichí rí rohó nájnñhun ñin jeé tésihi rí jeé séyúhu rí jeé tu nújnahan ni rí. <sup>17</sup> Te cácahán ró jeé cucá ró, te quéndoó váha ró, te tu cumaní ni ñin nuñ ró. Te tu cásáha ró cuenta jeé cuécá íi cándoho ró, te ndáhú ndasi ró, te cácuáá ró, te máá ñii líi ró. Te táca jéé yáha cúní cahán jeé tu cácandíje váha ró. <sup>18</sup> Núu súcuan te cáhán rí jíin ró jeé nuñ rí cuaan ró oro jeé ni ndúhvá nuñ ñuhún te ni nduu máá nene, te suu cúu jeé sáha ri jeé coo cucá ndíje ró ndíhi jeé ndíso jññhun rí. Te nuñ rí cuaan ró sahma cujíin cahun ró, návaha tú cucanu ró jeé máá ñii líi ró, cúu jeé quéndoó ndaa ró sáha ri. Te cuaan ró tájná nuñ rí, quívi tinúu ró, návaha ndundijin tinúu ró, cúu jeé jecuhún ni ró jññhun rí. <sup>19</sup> Táca ñayuu jeé cundáhú ni rí, chí cahán rí nuñ i te stóho rí i, návaha na chúhun ni i. Núu súcuan te na cándíhví ni ró jíjnáhan ró, te nacani ni ró jeé stóo ró cuéchi ró. <sup>20</sup> Cuni sóho, chí íin ri yehyí ánuá ró te cáhán rí. Te núu ndé-ni rohó cuni sóho te nune ró yehyí ánuá ró, te quívi rí caji rí staa jíin ró, te suni caji máá ró jíin rí. Te suu cúu jeé cóndee rí ánuá ró. <sup>21</sup> Táca ñayuu jeé cúndeyí síquí jeneé, cuáha ri jññhun conene i jíin rí nuñ mesa nuñ ndácu ri jniñu. Chí máá rí suni ni snáá rí poder jeneé, te ni cucóo rí jíin Tatá rí nuñ mesa nuñ ndácu ya jniñu. <sup>22</sup> Ñayuu iyó sóho na chúsóhó i jññhun jeé cahán maá Espiritu Santo jíin táca grupo ñayuu cácandíje. Achí yá.

*Táca jéé cáyucú andiví cáchiñhún núu yá*

**4**

<sup>1</sup> Yúcuán na te ni ndacoto ri, te ni jito ri jeé núne ñin yéhyí andiví, te máá Yaá jeé ní cáhán

jiin rí jeē xíhna ñúhún, ní cahān tucu jiin rí nájñuhun jeē tíví trompeta. Te ní cahān:

Caa quiji ró yáha, te na stéén rí nuū rō tācá jñiñu jeē cóo ichi núú gā, achí yá.

<sup>2</sup> Te máá Espiritu Santo ní scóto-ni ya ruhú. Te ní jito rí jeē andiví íin ñin mesa nuū ndácu jñiñu, te néne máá yá nuū mesa un.

<sup>3</sup> Te máá yá jeē néne yūcuan cáa ya nájñuhun ndíndéé ñin yuū quiyi ndíí chí ñin yuū cuehé ndíí. Te ñin ticō vēhnde ní jicó ndúú yuhu mesa yá, te ndíndéé nájñuhun ñin yuū cuíí ndíí. <sup>4</sup> Te xiin mesa yá ní jito rí jeē ní jicó ndúú ocō cuññ gā mesa nuū ndácu jñiñu. Te nuū mesa un néne ocō cuññ tēe jéñhu cándiso jñiñu. Te cáñuhun de sahma cuijñi yaa, te xiní de cáñuhun corona oro. <sup>5</sup> Te nde nuū mesa nuū ndácu ya jñiñu ndíndéé taja te ñihñ te cáhán taja. Te ichi nuū mesa yá ñin ndihúxá Espiritu Yaa Dios, jeē cáa nájñuhun uxá yiti náñnu jeē cayú ñuhún. <sup>6</sup> Te ichi núú mesa yá ún suni íyó nájñuhun ñin mar jeē jito quiyi nájñuhun vídrio.

Te xiin mesa yá un ní jicó ndúú cuññ jeē técu. Te íyó cuehé tinúu ní cáñnu ichi núú jiin ichi yátá un. <sup>7</sup> Te ñin jeē técu un cáa nájñuhun ndicaha. Te inga cáa nájñuhun stiquí. Te jeē uní chí néne nuū tēe. Te jeē cuññ chí cáa nájñuhun yaha chócó jéé jicó núú tachí. <sup>8</sup> Te ndicúún jeē técu un íyó íñu ndijēn jeē ñin ñin. Te máni máá tññu cúu ní cáñnu nde jiin ní chíji ndijēn. Te nduú ñuú tu jécucññ cuiti jeē cahán:

Yaa ñi Yaa ndoo ndasí

cúu máá Jítoho yō Yaa Dios, Yaa jññ ndihí poder,

Yaa íyó vijna, te ní iyo yá ní cáni, te coo ya ní cáni.

Achí.

<sup>9</sup> Chi máni jeē cácahān ndicúún un jéé cujéñnu ndasí máá Yaa jeē néne nuū mesa, Yaa jeē técu ní cáni cuiti. Te yíññuhún cácahān un jiin yá, te nácuatáhú núú yá. <sup>10</sup> Te táca jínu jeē casáha súcuan, te ndihócó cuññ tēe jéñhu cándiso jñiñu, cájecucññ yiti de nuū Yaa jeē técu ní cáni cuiti, cáchiññuhún de ya. Te cástáa de corona de, cájequin de ichi núú jehé mesa yá. Te cácahān de:

<sup>11</sup> Jítoho ná te Yaa Dios na cúu ní.

Te vāha ndasí Yaa cúu ní jéé cácahān i jeē luu cújéñnu ní,

te cáhiyo yíññuhún i nuū ní, te jññ ní ndihí poder.

Chi máá ní ní sáha ndihí jeē íyó, te siquí jeē súcuan ni cuu ni máá ní te ni jecōo ndihí.

Achí de jíjñáhan de.

*Jeē ní nune Londe Yaa Dios tutu*

## 5

<sup>1</sup> Yūcuán na te ní jito rí jeē Yaa néne mesa jeē ndácu jñiñu, ndaváha ya jññ ya ñin tutu

cáni jeē ní tuu. Te yósó jññuhun ndíndúú lado tutu ún, te ndihyú jiin úxá sello. <sup>2</sup> Te ní jito rí ñin ndajéhé yá jeē ndíso poder, te ní cahān jee:

¿Nde ñin cúu tēe vāha ndasí jeē cóndiso jñiñu cahnde sello te nune tutu yáha? achí ndajéhé yá.

<sup>3</sup> Te ní andiví ní ñayiví ní jeē íyó chíji ñayiví, tu ní iyo ní ñin jeē cóndiso jñiñu nune tutu ún, ní jeē cóto nuū. <sup>4</sup> Te ní ndahyú ndasí rí, chí tu ní iyo ní ñin jeē cóndiso jñiñu nune te cahu tutu ún, ní jeē cóto nuū. <sup>5</sup> Yūcuán na te ní cahān ñin tēe jéñnu un jiin rí.

Ma ndahyú rō, chí íyó ñin Yaa ndíso jñiñu jeē cahnde yá ndihúxá sello ndihyú tutu, te nune ya. Te máá yá chí íyó cuehé poder yá, nájñuhun jeē íyó cuehé fuerza ñin ndicaha. Te ní cacu ya chíji yucún Judá, jeē cúu yucún rey David. Te ní snáa yá poder táca jéneé.

<sup>6</sup> Yūcuán na te ní jito rí Yaa jeē cúu Londe Yaa Dios jeē ní cajehni i te ní natecu. Te Londe un ñin ya nuū ñin mesa Yaa Dios, mēññu ndicúún jeē técu, jiin tēe jéñhu cándiso jñiñu. Te íyó úxá ndiqui jiin úxá tinúú Londe ún. Te tinúú un cúu ndihúxá Espiritu Yaa Dios jeē ní tají yá ní jengoo níí cáñnu ñayiví.

<sup>7</sup> Te Londe un ní jequñin ya tutu jeē jññ ndaváha Yaa jeē néne nuū mesa. <sup>8</sup> Te ná ní quñin ya tutu ún, te ndicúún jeē técu jiin ndihócó cuññ tēe jéñhu cándiso jñiñu, ní cájecucññ yiti núú yá. Te ná ñin ná ñin tēe jéñnu un cándaha yaa jeē naní arpa, jiin cóhō cúu oro jeē ñuhun chitú sje cutú. Te sje cutú un cúu máá táca jññuhun jeē cájicān tahú ñayuu yñi ndaha Yaa Dios. <sup>9</sup> Te ní cajita de ñin yaa jeé, te suhva cáhán:

Vāha ndasí Yaa cúu ní jéé quñin ní tutu te cahnde ní sello jeē ndihyú.

Chi ní cajehni i níhñ, te jiin náññ ní ní nacuaan ní ñayuu

mēññu táca raza, táca yuhu, táca ñnu, táca nación, návāha cuu i ñayuu Yaa Dios.

<sup>10</sup> Te ní sáha ní jéé cuu i rey jiin sūtū nuū Yaa Dios,

te ndacu i jñiñu ini ñayiví.

Achí de cájita de.

<sup>11</sup> Te ní jito ga rí, te ní jini sōho rí jeē cácahān cuehé ndajéhé yá jeē ní cájicó ndúú xiin mesa yá, jiin xiin ndicúún jeē técu, jiin xiin tēe jéñnu cándiso jñiñu. Te íyó cuehé ndasí millón ndajéhé un. <sup>12</sup> Te suhva ní cacahān jee ya:

Vāha ndasí Yaa cúu Londe jeē ní cajehni i.

Te jeé yūcuan jññ ya poder, te yōho cúcá yá, te yōho ndíchí yá, te ndíso ya cuehé fuerza, te cáhiyo yíññuhún ndihí nuū yá, te luu cújéñnu ya,

te cácahān i jeé vāha ndasí Yaa cúu ya.

Achí.

<sup>13</sup> Te suni ní jini sōho rí jeē cácahān ndihí jeē ní sáha Yaa Dios jeé íyó ini andiví jiin ini



ñayiví jíin chíji ñayiví jíin ini mar. Te ndivii un ní cacahán:

Cúsñ ní yó cahán yó jeé yóhoyo vāha Yaā cúu máá Yaā néne mesa nuū ndácu ya jniñu,

jíin Yaā cúu Londe Yaā Dios.

Te na cóo yíñúhún yó núu yā, chí cújéhu luu ya,

te jñá ya poder níí cáni cuíti.

Achí.

<sup>14</sup> Te ni cacahán ndicúún jeé técu:

Súcuan na cóo, áchí.

Te ndihóco cuñ tēe jéhu cándiso jniñu ní cajecuiñ yiti de, te ní cachíñúhún de nuū Yaā jeé técu níí cáni cuíti.

*Siquí ndihúxá sello*

## 6

<sup>1</sup> Yūcuán na te ni jito ri jeé Yaā cúu Londe Yaā Dios, ni jehnde yā ñin jeé uxá sello un. Te ni jini sóho ri jeé cahán ñin jnāhan ndicúún jeé técu ún, nájnūhun cáhán taja:

Nehen te cuni rō.

<sup>2</sup> Te ni ndacoto ri, te ni jito ri ñin caballo cuijín. Te jeé yosó síquī tī un ndáhá ñin arco jeé stáva nduva. Te ni jecūhun ñin corona xinī. Te ni quenda ni jejnāhan, te ni cundeyi síquī ndihi.

<sup>3</sup> Yūcuán na te Londe un ní jehnde yā sello uū. Te ni jini sóho ri jeé cahán inga jnāhan ndicúún jeé técu:

Nehen te cuni rō.

<sup>4</sup> Te ni quenda ñin caballo cuehé, te jeé yosó síquī tī ndáso jniñu jeé snāá jnūhun cáyūcu máni ñayuu ñayiví, te quejéé i cahni jnāhan i. Te ni nihīn ún ñin espada cáhnu.

<sup>5</sup> Yūcuán na te Londe un ní jehnde yā sello unī. Te ni jini sóho ri jeé cahán inga jnāhan ndicúún jeé técu:

Nehen te cuni rō.

Te ni ndacoto ri, te ni jito ri ñin caballo jnuú. Te jeé yosó síquī tī ndáhá ñin balanza jeé chícuāha, chí coo jnamā xeēn. <sup>6</sup> Te mēhñú ndicúún jeé técu un ní jini sóho ri ñin jeé cahán:

Máá ñin kilo-ni trigo nihīn i jíin yáhu i jeé sájniñu i ñin quiví. Te núu cebada, te unī-ni kilo nihīn i jíin yáhu i jeé sájniñu i ñin quiví. Te aceite jíin vino chí ma sáha ró jéé cúmanī. Achí.

<sup>7</sup> Yūcuán na te Londe un ní jehnde yā sello cuñ. Te ni jini sóho ri jeé cahán tucu inga jnāhan ndicúún jeé técu:

Nehen te cuni rō.

<sup>8</sup> Te ni ndacoto ri, te ni jito ri ñin caballo cuaán yaa, te jeé yosó síquī tī cúu máá cuéhyī jémi ñayuu. Te ichi yátá un ndiquín máá jnūhun jeé quiví ñayuu lugar nuū cáyūcu ánuá ndiyi. Te ndindúú un cándiso jniñu jeé ndónda síquī ñin jeé ndicúún parte ñayiví, te cuu sáha jeé cúu ñayuu jíin guerra, jíin jnamā,

jíin cuéhyī xeēn, jíin táca quití xeēn jeé iyó ñayiví.

<sup>9</sup> Yūcuán na te Londe un ní jehnde yā sello uhūn. Te chíji altar cáhnu ní jito ri anuá ñayuu jeé ní cacandíje jnūhun Yaā Dios te ni canacani ndaá i jnūhun ya, te síquī yūcuan ní cajehni ñayuu i. <sup>10</sup> Te ni cacana jee ánuá un:

Jitoho ná Yaā Dios, máá ní cúu Yaā ndoo te vāha squícu ní jéé ní jéjnūhun ní. ¿Te nasaa ga tiempo coo te sándaá ní jéhē ná, te nacuaña ní jéé ndútahū ñayuu ñayiví jéé ní cajehni sáñá? áchí.

<sup>11</sup> Yūcuán na te ni jéhe ya sahna cuijín cuhun i jijnāhan i, te ni cahán yā jíin i jeé na ndetátú i jecu gá tiempo. Chí iyó gá hermano i jeé cájejniñu nuū yā, jeé suni jini ñúhún cuu i návāha jinu número i, áchí yā.

<sup>12</sup> Yūcuán na te Londe un ní jehnde yā sello iñū. Te ni jito ri jeé ní jnāa ndasí. Te ni cujnúú níandii nájnūhun ñin sahna jnuú. Te níí yóo ní nduu nájnūhun níñi.

<sup>13</sup> Te quími andiví ní ningoyo nuū ñúhun nájnūhun níngoyo ndehé yihí yujnu higo sáha tachī níhin. <sup>14</sup> Te andiví ní cujiyo cuahán nájnūhun jeé nátuu ñin tutu cáhnu. Te táca yucu jíin táca isla ní cujiyo cuango inga lado. <sup>15</sup> Te táca rey ñayiví, jíin jéé cácujeñu, jíin jéé cucá, jíin táca capitán, jíin jéé cándiso poder, jíin mozo jee ní cajeen ñayuu, jíin tēe cásjniñu cuenta máá, ní cachisáhi máá ini yaū cava jíin méhñu cava chíji yucu. <sup>16</sup> Te ni cacahán i jíin yucu jíin cava:

Ndicó cava síquī ri, na quísáhi rí návāha tú coto máá Yaā néne mesa ndácu jniñu, jíin Yaā cúu Londe jeé cuáha ya castigo xeēn ruhū.

<sup>17</sup> Chí ni quee máá quiví cáhnu jeé cuáha ya castigo, ¿te ndé ñin canda condichi nuū yā? achí i jijnāhan i.

*Ñayuu táca yúcūn Israel jeé ní jécondee sello jneē*

## 7

<sup>1</sup> Te ná ni cuu jniñu yáha, te ni jito ri cuñ ndajéhé yā jeé cáhiñ ndicúún lado ñayiví. Te cájesi yā nuū ndicúún tachí, návāha ma quee nuū ñúhun ní nuū mar ní nuū ní ñin yujnu. <sup>2</sup> Te suni ní jito ri inga ndajéhé yā, vēji ichi núu cáne níandii. Te ndáhá yā sello Yaā Dios, Yaā técu. Te ni cahán jee ya jíin ndicúún ndajéhé un jéé ndáso jniñu jeé sáha dañu nuū ñúhun ichi jíin núu mar:

<sup>3</sup> Ma sáha ró dañu nuū ñúhun ní nuū táca yujnu ní nuū mar, chí nde na tēe yó sello jneē táca ñayuu cájejniñu nuū Yaā Dios yó.

<sup>4</sup> Te ni jini sóho ri jeé achí jéé iyó ciento uū xico cuñ mil ñayuu jeé ní jécondee sello jneē. Te ñayuu un cácuu táca yúcūn ñayuu Israel. <sup>5</sup> Te iyó úxī uū mil ñayuu cácuu yucūn Judá jeé ní jécondee sello, jíin úxī uū mil yucūn Rubén, jíin úxī uū mil yucūn Gad, <sup>6</sup> jíin úxī uū mil yucūn Aser, jíin úxī uū mil yucūn Neftalí,

jiin úxí uū mil yucūn Manasés, 7 jiin úxí uū mil yucūn Simeón, jiin úxí uū mil yucūn Leví, jiin úxí uū mil yucūn Isacar, 8 jiin úxí uū mil yucūn Zabulón, jiin úxí uū mil yucūn José, jiin úxí uū mil yucūn Benjamín. Ndihi yucūn yáha cúu jeē ní jécondee sello.

*Nāyuu cuehē jeē cáñuhun sahma cuijín*

9 Te ná ní cuu jniñu yáha te ní ndacoto ri, te ní jito ri cuehē ndasí ñāyuu. Te cúu i ñāyuu táca nación jiin táca raza jiin táca yuhu jiin táca ñuu. Te cáhīn i nuū mesa nuū ndácu Yaā Dios jniñu jiin núu maá Yaā Londe. Te siquī jeē cuehē ndasí i, te ní ñn ma cúu cahu nasaa i cúu. Te cáñuhun i sahma cuijín, te cándahá i ñuū. 10 Te ní cacana jee i:

Yaā Dios maá yó cúu jeē ní jnama yóhó, Yaā jeē néne nuū mesa jeē ndácu jniñu, jiin Yaā cúu Londe Yaā Dios.

Achí i jijnáhan i. 11 Te ndihí ndajéhé ní cajicó ndúu yā cáhīn ya xiin mesa Yaā Dios, jiin xiin tēe jéhnu cándiso jniñu, jiin xiin ndicúun jeē técu. Te ní cajecuñi yiti yá ní cachíñuhún yá Yaā Dios ichi núu mesa yā. 12 Te ní cacahān yā:

Amén. Cúsī ní yō cahán yō jeē yóhoyo vāha Yaā cúu Yaā Dios maá yó.

Te luu cújéhnu ya te ndíchi yá.

Te na nácuatáhu yó nuū yā, te na cóo yíñuhún yó núu yā.

Chi jniñi ya poder, te ndíso ya cuehē fuerza jeē ní cáni cuiñi. Amén.

Achí táca ndajéhé yā.

13 Yūcuán na te ní cahān ñn tēe jéhnu un jíin rí:

¿Nde ñāyuu cúu yáha jeē cáñuhun sahma cuijín, te ndé chí véjicoo i?

14 Te ní cahān rí jíin de:

Máá ní cúu jeē jini, Tátá.

Te ní cahān de jíin rí:

Yáha cácuu ñayuu jeē ní cayāha i jeē ní cajito i jnūndóho xeēn. Te ní canacate i sahma i jíin níñi maá Londe, te ní nduyaa vāha, cúu jeē ní ndundoó ánuá i ní sáha ya. 15 Jeē yūcuán cúu jeē cáhīn i nuū mesa nuū ndácu Yaā Dios jniñu, te cájejniñu i ini templo yā nduú ñuú. Te Yaā jeē néne nuū mesa, coto ya i jeē quéndōo vāha i nuū yā. 16 Te ma cúu gā i sóco, te ma jíchi gā i ndute. Te ma cayú gā i nuū niāndii, ní ma ndóho ga i jeē jihni. 17 Chí máá Yaā cúu Londe jeē néne nuū mesa jeē ndácu jniñu, coto ya i nájnūhun jeē cúu i lanchi ya. Te condeca ya i quihñ yā jíin i nuū cáne ndute jeē cótecu i sáha. Te Yaā Dios nacuaa yā ndute núu i jijnáhan i, te ma ndahyú gā i. Achí tēe jéhnu ún.

*Siquī sello uxá jíin cohō cúu oro*

**8**

1 Te Londe un ní jehnde yā sello uxá jeē ndihyú tutu ún, te nayúú-ni ní ñyo ini andiví nájnūhun sava hora. 2 Te ní jito ri ndihúxá

ndajéhé jeē cáhīn nuū Yaā Dios. Te ní cajéhe uxá trompeta nuū ndajéhé un. 3 Yūcuán na te ní quee inga ndajéhé, ndáhá yá ñn cohō cúu oro, te ní jecuiñi yā nuū altar. Te ní jéhe cuehē sūje cutú núu yā, návāha socō yā jíin jnūhun cájicān tahú ndihí ñayuu cácandije Yaā Dios. Te ní socō yā nuū altar oro jeē índichi ichi núu mesa nuū ndácu Yaā Dios jniñu. 4 Te nuū cohō cúu jniñi ndajéhé un ní cane ñuhmā sūje cutú, ní caa nuū Yaā Dios nde jíin jnūhun cájicān tahú ñayuu cácandije Yaā Dios. 5 Yūcuán na te ní quihñ ndajéhé un cohō cúu un. Te ní scutú yá tícu ñuhñun jeē cayú nuū altar. Te ní jete yā nde ini ñayiví. Te ní sáha jeē ní cáhān taja, te ní níñin, te ní ndindéé taja, te ní jnāa.

*Jnūhun siquī trompeta*

6 Yūcuán na te ndihúxá ndajéhé jeē cándahá ndihúxá trompeta, ní casatūhva ya jeē tiví yā.

7 Te ndajéhé ñn ní tiví yā trompeta. Te ní cuun níñi ini ñayiví jíin ñuhñun jeē ní sácā núu jíin níñi. Te ní cayú ñn jeē uní parte ñayiví, jíin ñn jeē uní parte yujnu, jíin ñn jeē uní parte ite cuiñi.

8 Te ndajéhé uū ní tiví yā trompeta. Te ñn nájnūhun ñn yucu cáhnu jeē cayú ñuhñun ní ningava cuahān nuū mar. Te ñn jeē uní parte mar ní nduu níñi. 9 Te ní jihí ñn jeē uní parte quiti ñuhñun nuū mar. Te ní naa cuehē barco, chí ñn ñn jeē táca úní ní naa.

10 Te ndajéhé uní ní tiví yā trompeta. Te ní ningava ñn quimi cáhnu ichi ándiví, te cayú nájnūhun cayú ñn yiti cáhnu. Te ní ningava siquī ñn ñn jeē táca úní yūte jíin núu cáne ndute. 11 Te quimi un nání quimi uvuā. Te ñn jeē uní parte ndute ní cuu uvuā. Te ní cajihí cuehē ñayuu ní sáha jeē ní cuu uvuā ndute ún.

12 Te ndajéhé cuñn ní tiví yā trompeta. Te ñn jeē uní parte niāndii jíin yóo jíin quimi ní tiví. Te ní ndunee ñn jeē uní parte i, te tuá ní cundijin ñn jeē uní parte nduú jíin ñuú.

13 Te ní ndacoto ri, te ní jini sóho rí jeē cána jee ñn ndajéhé yā jeē ndáva cuahān sava andiví:

Nacā xeēn gā ndoho ñayuu cáyucú ini ñayiví, chí je yajni cuecu uní gā trompeta jeē tiví uní gā ndajéhé, achí yā.

**9**

1 Te ndajéhé uhñn ní tiví yā trompeta. Te ní jito rí jeē ichi ándiví ní ningava ñn quimi nde ini ñayiví. Te nuū quimi un ní jéhe ndacáa jeē nūne túhñchi cúnú ndasí. 2 Yūcuán na te ní nune un túhñchi, te ní cane ñuhmā ní caa nájnūhun ñuhmā ñn iññú cáhnu. Te ñuhmā un ní sáha jeē ní cunee niāndii jíin ní núu tachí. 3 Te nuū ñuhmā un ní canecoo tíca ndicuéhyí, ní jité núu tí ní cáhnu ñayiví. Te ní jéhe ya jnūhun jeē sáha tí nájnūhun

cásaha tisuhma xeēn jeē iyó ini ñayiví. <sup>4</sup> Te ni ndacu ya jniñu nuū tī jeē ma sáha ti dañó ite jíin yúcu cuíi jíin yujnu, chi máni ñayuu jeē tu ndeé sello Yaā Dios jneē i cúu jeē tuu tī. <sup>5</sup> Te tu ní jéhe ya jnūhun jeē cáhni tī ñayuu, chi máni jeē stóho tī i uhūn yoō. Te sáha tī jeē jetú i nájnūhun jeē jetú ñayuu jeē túu tisuhma i. <sup>6</sup> Te quiví ún nducú ndasí ñáyuu modo cuu i, te ma nihín i modo. Te vesú cuní i cuu i, te tú na modo cuu i.

<sup>7</sup> Te tíca ndicuéhyí un cáa tī nájnūhun caballo jeē cáhiyo túhva quingoo nuū cuájñahan. Te xiní tī ñūhun nájnūhun corona oro. Te née tī nuū tée. <sup>8</sup> Te iyó ixi tī jeē cáa nájnūhun ixi xíní ñahan. Te jnūhun tī cáa nájnūhun jnūhun ndicaha. <sup>9</sup> Te ní tī ndihyú nájnūhun sahma cáa. Te ñihin ndijēn tī nájnūhun ñihin jeē cuángoo cuehē caballo nuū guerra cáñuhun tī carreta. <sup>10</sup> Te suhmā tī ndiso iñu nájnūhun tisuhma. Te jíin súhmā tī cuu stóho tī ñayuu uhūn yoō. <sup>11</sup> Te iyó ñin jeē cujéhu nuū tī, te suu cúu ndajéhe jexeēn jeē ndító túhñchi cúnú ndasí un. Te ndajéhe un yuhu hebreo naní Abadón, te yuhu griego naní Apolión, jeē cuní cahān maá jéē snāā.

<sup>12</sup> Je ní yāha ñin jnūndóho, te iyó úu gā jnūndóho jeē quiji.

<sup>13</sup> Te ndajéhe iñu ní tiví yā trompeta. Te ni jini sōho rī ñin jnūhun jeē ní cahān nde mēhñú ndicúun yiquí altar oro jeē ñin nuū Yaā Dios. <sup>14</sup> Te ní cahān un jíin ndajéhe iñu jeē ndahá trompeta:

Nandají ró ndicúun ndajéhe jeē nuhni yuhu yúte cáhnu jeē naní Eufrates, achí.

<sup>15</sup> Te ní nandají ndicúun ndajéhe un, návāha cahni ñin jeē uní parte ñayuu ñayiví. Chi je cáhiyo túhva ndajéhe un jeē siquí maá hora jíin quiví jíin yoō jíin cuiyā jeē cóo stucuan. <sup>16</sup> Te ní jini sōho rī jeē achí jéē iyó úu ciento millón soldado jeē cáyoso caballo.

<sup>17</sup> Te ní steén gā yā nuū rī, te ní jito ndijin rī táca caballo. Te tée cáyoso siquí tī cáñuhun de camisa cáa jeē cuehē, jeē ndeé, jíin jéē cuaán. Te xiní caballo un cándāa nájnūhun xiní ndicaha. Te yuhu tī quénda ñuhūn jíin ñūhmā jíin azufre. <sup>18</sup> Te jíin úná jeē quénda yuhu caballo un, te ní jihí ñin jeē uní parte ñayuu, suu jíin ñūhūn jíin ñūhmā jíin azufre. <sup>19</sup> Chi yuhu tī jíin súhmā tī iyó fuerza jeē cáhni tī ñayuu. Chi suhmā tī cándāa nájnūhun coō, te iyó xíní, te jíin yúcuca stóho tī ñayuu.

<sup>20</sup> Te sava ga ñayuu jeē tu ní jíhí jíin táca jnūndóho yāha, tu ní nacani ní i stóo i ídolo jeē ní casáha i. Te tu ní stóo i jeē cáchiñūhūn i táca táchi jíin ídolo jeē ní cuvāha jíin oro jíin plata jíin cáa cuaán jíin yúu jíin yujnu. Te táca un chi tu cúu coto, ní tu cúu cuní sōho, ní tu cúu caca. <sup>21</sup> Te ní tu ní cácanani ní i stóo i jeē jéhni i ndiyi, jíin jéē satásí i, jíin jéē jíca jnéni i, jíin jéē sacuíhná i.

*Ndajéhe jeē ndahá libro lulí*

## 10

<sup>1</sup> Te ní jito rī inga ndajéhe yā jeē ndiso poder, ní cuun ya ichi ándiví. Te ñúsúcún yá vicó, te xiní yā ñūhun ticó vėhndé. Te nuū yā ndíndēe nájnūhun nāndii, te sihin ya cáa nájnūhun uū sihin jeē cáa ná cáa ñuhūn. <sup>2</sup> Te ndáhá yá ñin libro lulí jéē núne. Te ní jeni ya jehē váha ya nuū mar, te jehē jecó yá nuū ñūhun íchi. <sup>3</sup> Te ní cana jee téyí yá, nájnūhun jeē ndahyú ndicaha. Te ná ní cana jee ya, te ní cacahān uxā taja. <sup>4</sup> Te ná ní cacahān uxā taja, te je iyó túhva rī jeē tée rī jnūhun un nuū. Te ní jini sōho rī ñin jnūhun ichi ándiví jeē ní cahān jíin rī:

Chuvāha ró táca jnūhun jeē ní cacahān uxā taja ún, te ma steén ró, ní ma tée ró, achí.

<sup>5</sup> Yūcuán na te ndajéhe jeē ní jito rī jeē ñin nuū mar jíin nuū ñūhun, ní ndonehen ya ndaha váha ya ichi ándiví. <sup>6</sup> Te ní ndacunehen ya sihví máá Yaā jeē técu ní cáni, Yaā ní sáha ándiví jíin ñayiví jíin mar jíin táca ndihí jeē iyó ñi. Te jíin sihví yá un ní cahān teyí ndajéhe:

Ma cucuéé gá jeē jinu ñayiví. <sup>7</sup> Chi núu na quéjéé ndajéhe uxā tiví yā trompeta, yūcuán na te squícu-ni Yaā Dios jnūhun sáho yá, nájnūhun ní castūhun yá nuū táca modo yā, tée ní canacani jnūhun ya nde jenahán, achí ndajéhe.

<sup>8</sup> Yūcuán na te máá jéē ní jini sōho rī jeē ní cahān ichi ándiví, ní cahān tucu jíin rī:

Cuáhán te quihin ró libro lulí jéē núne jeē ndahá ndajéhe jeē ñin nuū mar jíin nuū ñūhun, achí.

<sup>9</sup> Te ní jehēn rī nuū ndajéhe un, te ní jicān rī jeē na cuáha ya libro lulí un nuū rī. Te ní cahān yā:

Quihin te caji ró. Chi vixí sáha ini yuhu ró nájnūhun ndúxi, te chíji ró chí cuhiyá sáha, achí yá.

<sup>10</sup> Yūcuán na te ní quihin rī libro lulí jeē ndahá ndajéhe yā, te ní yeji rī. Te vixí ní sáha ini yuhu rī nájnūhun ndúxi. Te ná ní cuu ní yeji rī, te ní jité iyá ní rī. <sup>11</sup> Te ní cacahān jíin rī:

Cánuú jéē nacani tucu ró jnūhun Yaā Dios, ndese coo siquí ñayuu cuehē ñuu jíin cuehē nación jeē sñn sñn yuhu, jíin siquí cuehē rey cándacu jniñu, achí jíin rī.

*Siquí uū testigo yā*

## 11

<sup>1</sup> Yūcuán na te ní cajéhe ñin yujnu nuū rī, jeē cúu ñin cuvāha jeē chícuāha. Te ní cacahān jíin rī:

Ndocuñí te chícuāha ró templo cáhnu Yaā Dios jíin altar, te cahu ró nasaa ñayuu cúu jeē cáchiñūhūn nuū yā yūcuán. <sup>2</sup> Te ma chícuāha ró patio yatā templo. Chi je ní jéhe ya nuū ñayuu táca ñuu jíca. Te coyúcu i ini ñuu ñi yáhá, te uū xico uū yoō cueñú i siquí ñuu. <sup>3</sup> Te

tají rí uū testigo rí jeē nácani jnūhun ri mil uū ciento uní xico quiví. Te cuhun de sahna ndáyí jeē cácuquíhá ní de siquí cuéchi ñayuu, achí yá.

<sup>4</sup> Te ndindúú testigo un cúu nájnūhun ndindúú yujnu olivo jíin ndindúú candelero jeē ín nuū Yaā Dios, Yaā chíí ñayíví. <sup>5</sup> Te na-ní ñayuu núu nducú sáha ndeváha jíin ndindúú testigo un, te quenda ñuhūn yuhu ndindúú de, te cayū ndihí ñayuu cájito uhū i de. Te súcuan cuu táca ñayuu jeē nducú sáha ndeváha jíin de. <sup>6</sup> Te iyó poder ndindúú testigo un jeē cási de jeē ma cúun saū níí tiempo jeē nácani de jnūhun ya. Te suni iyó poder de sáha de jeē nduu nííí táca ndute. Te cuu stívi de ñayívi jíin ndinuū jnūndóho, núu nasaa jínu cácu ni de. <sup>7</sup> Te ná ní jínu ní canacani de jnūhun ya, yūcuán na te quenda quití xéén jeē néne tūhnci ún. Te cuajnáhan jíin ndindúú de, te cundeyí jíin de, te cahni de. <sup>8</sup> Te ndíyí ún cava nuū yáhu ñuu cáhnu nuū ní cajehni i máá Jítoho yō jicā cruz. Te ñuu un cácahān yatá i jeē ñuu Sodoma jíin Egipto cúu, siquí jeē xeēn cuéchi iyó ñuu ún. <sup>9</sup> Te ñayuu táca ñuu, táca yúcūn, táca yuhu, táca nación, chí coto i jeē cáva ndindúú ndíyí un úní quiví yosáva, te ma cuáha i jnūhun jeē quindúji. <sup>10</sup> Te ñayuu níí cáhnu ñayíví cusí ndasí ni i jeē ní cajihí de, te sáha i vico, te cuáha i regalo nuū jnáhan i. Chí ndindúú téé ní canacani jnūhun ya ún, ní casáha de jeē ní candoho ndasí ñayuu ñayíví. <sup>11</sup> Te jeé yáha uní quiví yosáva ún, te Yaā Dios sáha ya jeē nastáa tachí de, te ndonda-ni de. Te yūhú ndasí ñayuu coto i jeē ní canatecu de. <sup>12</sup> Yūcuán na te cuni sōho de jeē cána jee ichi ándiví:

Caa ró quijicoo ró ndé yáhá, áchí.

Te ndaa de mēhñu vícō quingoo de ándiví, cuni ñayuu cájito uhū i de. <sup>13</sup> Te máá hora un jnáa ndasí, te ndicó cáva naa ñn jeē uxí parte ñuu ún. Te jíin ñujnáa ún cuu uxā mil ñayuu. Te táca gá ñayuu jeē ndóo, yūhú ndasí i, te cahān i jeē cujéhnu Yaā Dios jeē ndeé ándiví.

<sup>14</sup> Súcuan yáha jnūndóho uū, te yachí coo jnūndóho uní.

*Siquí trompeta uxā*

<sup>15</sup> Te ndajéhé uxā ní tiví yā trompeta. Te ni jíni sōho ri ní cacahān jee ichi ándiví. Te súcuan ní cacahān:

Táca nación ñayíví je ni nuquihí ndaha máá Jítoho yō Yaā Dios jíin Cristo jeé ní tají yá.

Te ndacu ya jniñu níí cáni cuití.

Achí.

<sup>16</sup> Yūcuán na te ndihóco cuūn téé jéhnu cándiso jniñu jeé cánene de mesa de ichi núú Yaā Dios, ni cajecuiñí yití de, ni cachíñúhún de ya. <sup>17</sup> Te ní cacahān de:

Na cútahú na núu ní, Tátá Yaā Dios, chí máá ní jniñí ndihí poder,

te cúu ní Yaā iyó vijna, te ní Iyo ní níí cáni, te coo ní níí cáni.

Te ni najniñí ní ndívii jeé iyó, te jíin poder ni ní quejéé ní ndácu ní jniñu nuū.

<sup>18</sup> Ñayuu táca nación ní caquití ní i siquí ní.

Te vijna chí ní quee quiví jeé cuáha ní castigo i,

jíin jeé sándaā ní jniñu táca ndíyí.

Te cuáha ní táhū nuū táca mozo ní jeé ní canacani jnūhun ní,

jíin núu táca ñayuu cájejniñu nuū ní, jíin ñayuu cáchiñúhún núu ní,

cúu ñayuu cácujeñnu jíin jeé tuú.

Te vijna te snáhnú ndetū ní ñayuu castívi ñayíví.

Achí de jíinán de.

<sup>19</sup> Yūcuán na te ni nune templo Yaā Dios jeé iyó ándiví. Te ní cajito ñayuu jeé yúcuan íne yejnú jeé ñūhun contrato yā. Te ni ndindéé taja, te níhin, te cáhán taja, te ní jnáa, te ni cuun xeēn nííí.

*Jnūhun ñahan jíin cóo cáhnu*

## 12

<sup>1</sup> Yūcuán na te ini ándiví ní cane ñn jeé nahán náa ní yō jito yó: ñn ñahan jeé ñūhun ña niándii nájnūhun sahna, te íin jehē ña siquí yoó, te ñūhun ñn corona xiní ña jeé ndeé uxí uū quími. <sup>2</sup> Te ñūhun sēhe ña. Te ni ndahyū cohó ña jeé ndóho ña jéhnde chíjii ña jeé scácu ña i. <sup>3</sup> Yūcuán na te ini ándiví ní cane tucu inga jeé náa ní yō jito yó: ñn cóo cuehé cáhnu ndasí. Te iyó úxā xiní tí jíin úxí ndiquí tí. Te ndihúxá xiní tí ñūhun corona. <sup>4</sup> Te jíin súhmā tí ní stáa tí ñn jeé uní parte quími jeé iyó ándiví, te ní síngoo tí ini ñayíví. Te ni íne tí nuū ñahan jeé scácu sēhe ún, ndétu tí cocó tí sēhe ña jeé jé yajni cacu i. <sup>5</sup> Te ní scácu ña ñn sēhe yíí, te sūchi un ní jeconaā jeé ndácu níhin i jniñu nuū ndívii nación. Yūcuán na te ní ndoñúhún sēhe yíí ña ún, ní ndaa i cuahān i nde nuū íin mesa Yaā Dios nuū ndácu ya jniñu. <sup>6</sup> Te ñahan un ní jinu ña cuahān ña nde nuū ñūhun téhé núu iyó ñn lugar jeé ní sátúhva Yaā Dios. Te yūcuán condee ña níhin ña jeé cáji ña mil uū ciento uní xico quiví.

<sup>7</sup> Yūcuán na te ni cajejnáhan ini ándiví. Chí ndajéhé jéhnu ga jeé naní Miguel jíin táca ndajéhé jeé cácu mozo nuū yā, ní cajejnáhan jíin cóo cáhnu. Te coó un jíin táca ndajéhé maá, ní cajejnáhan jíin yá. <sup>8</sup> Te tu ní cácu ndeyí tí, te tuá ní cúu coyūcu tí ándiví. <sup>9</sup> Súcuan ní cuu jeé ní quenehen ya coó cáhnu un jeé iyó ndé jenahán ndasí. Te nání tí jexeén jíin Satanás, te máá tí cúu jeé stahú ndihí ñayuu ñayíví. Te ní scáne ya tí nde ini ñayíví jíin táca ndajéhé tí.

<sup>10</sup> Yūcuán na te ní jíni sōho ri ñn jnūhun jeé cahán jee ichi ándiví:

Je ni quee quiví jeē jínu njama ya yohó, jín jeē steén ndijín yā jeē jnū ya poder, jín jeē ndácu ya jniñu, jín jeē ndáso jniñu máá Cristo jeē ní tají yá. Chi je ni quenehen ya maá jeē cahán cuēchi siquī tācá hermano yó. Chi nduú ñuú ní cahán cuēchi siquī i nuú Yaa Dios maá yó. <sup>11</sup> Te ni cacundeyí i siquī Satanás un, ní sáha jñuhun jeē ní jíhi Yaa cúu Londe, jín jeē ní cacahán ndaá i jñuhun Yaa Dios, jín jeē tu ní cundáhú ní i máá i, chí ni jēhe i jñuhun candíje i vésú núu cuu i jeē siquī yá. <sup>12</sup> Núu súcuan te na cúsi ndasí ní tāca róhó jeē cáyúcu andiví. Te nacá xeén ndoho tāca róhó jeē cáyúcu iní ñayiví jín nuú mar. Chí ni cuun jexeén ní jinū nuú rō jijnáhan ró. Te quítí xeén ní, chí jíní jeē tuá coo cuehē gá tiempo jeē stahú ñayuu. Achí.

<sup>13</sup> Te ní jini coó cáhnu ún jeē ní scáne ya maá cuáhán iní ñayiví, te ní jinu tí jín ñahan ní scácu sēhe yí, jeē xeén sáha tí jín ña núú. <sup>14</sup> Te ní cajēhe uū ndijén yaha chóco cáhnu nuú ñahan ún, návaha ndava ña quihín ña lugar ña nuú ñuhun téhé, te cácu ña nuú coó ún. Te yūcuán condee ña uní cuiyá yosáva, te nihín ña jeē cáji ña. <sup>15</sup> Te yuhu coó un ní cane ndute nájnūhun ún yūte cáhnu, cuahán yatá ña návaha jneni ña. <sup>16</sup> Te máá ñuhun chí ní chindéé ñahán ñahan ún, chí ní nune-ni, te ní nungoo yūte jeē ní cane yuhu coó ún. <sup>17</sup> Yūcuán na te xeén ní quití ní coó cáhnu ní jito tí ña. Te cuahán tí cuajnáhan tí jín táca gá sēhe ña, suu ñayuu casquícú jniñu ndácu Yaa Dios te cácandíje vāha i jñuhun Jesucristo.

*Jñuhun siquī uū quiti xéén*

**13**

<sup>1</sup> Te ni indichi rí yumár. Te ní jito ri jeé ní cane ñn quiti xéén iní mar. Te iyó úxā xini tí jín úxā ndiquí tí. Te ndihúxí ndiquí tí ñuhun corona. Te ndihúxā xini tí ndeé ñn síhví néé jeé quiti ní Yaa Dios sáha. <sup>2</sup> Te quiti xéén jeé ní jito ri ún, cáa tí nájnūhun cuiñí, te ndaha tí cáa nájnūhun ndaha oso, te yuhu tí cáa nájnūhun yuhu ndícaha. Te nuú quiti un ní jēhe coó cáhnu poder maá jín mesa nuú ndácu máá jniñu. Te ní sáha jeé cujéhnu ndasí quiti ún. <sup>3</sup> Te ní jito ri jeé ní tújī ñn xini tí, jeé jé yajni cuu tí nuú. Te ní nduváha tí jeé ní tújī tí. Te nahán ní naa ní ñayuu ní cáhnu ñayiví ní jito i, te ní cajetáhú i nuú tí. <sup>4</sup> Te ní cachiñúhún i coó cáhnu siquī jeé ní sáha tí jeé cujéhnu ndasí quiti xéén un, te suni ní cachiñúhún i quiti xéén un. Te ní cacahán i:

Tú ní ñn jeé cujéhnu nájnūhun quiti yáha, te tú ní ñn cundeyí cuajnáhan jín tí, áhí i jijnáhan i.

<sup>5</sup> Te tu ní jési ya jeé cahán tí jeé quiti téyí cúu tí, jín jeé cahán ndeváha tí siquī yá. Te ní nihín jniñu tí jeé ndácu tí jniñu uū xico uū yoó. <sup>6</sup> Te ní quejéé tí ní cahán ndeváha tí siquī Yaa Dios, jín siquī síhví yá, jín siquī

nuú ndeé yá, jín siquī tāca jeé iyó andiví. <sup>7</sup> Te tu ní jési ya jeé cuajnáhan tí jín ñayuu maá Yaa Dios, te cundeyí tí jín i. Te suni ní nihín jniñu tí jeé ndácu tí jniñu nuú ñayuu tāca yúcūn, tācá ñuu, tācá yuhu, tācá nación. <sup>8</sup> Te ñayuu ní cáhnu ñayiví jeé tu yósó síhví i nuú tútu, ní cachiñúhún i quiti xéén un. Te Yaa cúu Londe jeé ní cajehni i, máá yá névaha tutu un jeé yósó síhví ñayuu cotecu ní cáni, te je yósó síhví i nde quiví ní jécóo ñayiví.

<sup>9</sup> Ñayuu iyó sóho na chúsohó vāha i jñuhun cahán ri yāhá. <sup>10</sup> Tāca ñayuu jeé sáha jeé quiví njáhan vecāa, suni vecāa cone máá i. Te tāca ñayuu jeé jéhi njáhan jín espada, suni jín espada cuu maá i. Núu súcuan te ñayuu maá Yaa Dios chí jini ñuhún cuandeyí ní i jín jnúndóho te ma jécuiñí i candíje i jñuhun cundáhú ní yá i.

<sup>11</sup> Yūcuán na te ní jito ri inga quiti xéén jeé ní cane chíhi ñuhun. Te iyó uū ndiquí tí jeé cáa nájnūhun ndiquí lánchi. Te nájnūhun tachí coó cáhnu, súcuan tachí cahán tí. <sup>12</sup> Te nájnūhun ndácu quiti xéén xíhna ñuhún jniñu, suni súcuan ndácu quiti uū ún jniñu, ín tí nuú quiti xíhna ñuhún. Te quiti uū sáha tí jeé chíñúhún táca ñayuu ní cáhnu ñayiví nuú quiti xíhna ñuhún, quiti ní tújī jeé jé yajni cuu tí te ní nduváha tí. <sup>13</sup> Te quiti uū suni sáha táca jniñu jéhu jeé nahán náa ní yó jito yó. Chí ní scúun tí ñuhún ichi ándiví ní quijí iní ñayiví, ní cajito ñayuu. <sup>14</sup> Te ní stahú tí ñayuu ñayiví jín táca jniñu jéhu jeé ní nihín tí poder jeé sáha tí, jito jínúú quiti xíhna ñuhún. Te ní ndacu tí jniñu jeé na sáha ñayuu imagen quiti xíhna ñuhún, quiti ní tújī jín espada, jeé jé yajni cuu tí te ní nduváha tí. <sup>15</sup> Te quiti uū ní nihín tí poder jeé chutáchí tí xijni imagen quiti xíhna ñuhún, návaha cuu cahán, te cahni táca ñayuu jeé tu cajetáhú i chíñúhún i máá. <sup>16</sup> Te táca ñayuu cujéhnu jín ñayuu tu cújéhnu, táca ñayuu cucá jín ñayuu ndahú, táca ñayuu sájnñu cuenta maá jín mozo jeé ní cajeen ñayuu, ní sáha tí jeé ní jécondee ñn jnuni ndaváha i chí jnéé i. <sup>17</sup> Te ní ñn ñayuu ma cúu cuan i xícó i te núu tu ndáso i jnuni jeé cúu síhví tí chí jnúni número jeé cúu síhví tí. <sup>18</sup> Jñuhun ndíchí cúu jeé cahán rí yāhá: Tāca ñayuu jécūhun vāha ní cuu tava i cuenta número quiti xéén un, chí número un cúu síhví ñn tēe. Te número un cúu inū ciento uní xico inū.

*Yaa jeé cájita 144,000 ñayuu*

**14**

<sup>1</sup> Yūcuán na te ní ndacoto ri, te ní jito ri jeé ñn máá Yaa cúu Londe xini yucu Sión. Te cáhñin ciento uū xico cuñ mil ñayuu jín yá. Te jnéé i ndeé síhví máá yá jín síhví Tátá yá Yaa Dios. <sup>2</sup> Te ní jini sóho ri jeé nihín ndasí ichi ándiví, nájnūhun jeé jica cuehē yūte chí

jeē cahān nīhin taja. Te jeē nīhin un sāha nájñuhun jeē cátee cuehē ñayuu yaa jeē naní arpa. <sup>3</sup> Te cáhīn i ichi núu mesa nuū ndácu Yaā Dios jñiñu, jín nuū ndicúun jeē técu, jín nuū ndihóco cuñ tēe jéhu cándiso jñiñu. Te ni cajita i ñn yaa jeē. Te ni ñn ñayuu tu cúu cutūhva i yaa ún, chi máni máa ciento uū xico cuñ mil ñayuu jeē ní jnama ya i ini ñayívi. <sup>4</sup> Te táca tēe yáha cácuu jeē tu ní casáha cuéchi jín ñahan casáha néé, chi tēe ndoo ánuá cácuu de. Te cándiquín de Londe ndé-ni cúu-ni nuū cuahān yā. Chi ni jnama ya de ini ñayívi, te máa de cácuu tēe jeē xihna gā ni cacandije nuū Yaā Dios jín nuū Yaā cúu Londe. <sup>5</sup> Te tú cuiti na jñuhun stáhú cácahān de, chi tēe ndoo ánuá cácuu de, cáhīn de nuū mesa Yaā Dios.

*Jñuhun jeē ní cacahān ndinúni ndajéhe yā*  
<sup>6</sup> Yūcuán na te ni jito ri inga ndajéhe yā jeē ndáva cuahān sava andiví. Te ndiso ya jñuhun jeē jnama Yaā Dios ñayuu cotecu i ní cáni. Te ni nacani ya jñuhun un núu táca ñayuu ní cáhu ñayívi, nuū ñayuu táca naciún, táca yúcun, táca yuhu, táca ñuu. <sup>7</sup> Te ni cahān jee ya:

Conso iyo ró nuū Yaā Dios, te na cáhān ró jeē yóhoyo cújéhu ya, chi je ni quee quiví jeē sandā yā siquí ró ndese ni casáha ró. Te na chíñúhún ró yā, chi máa yā ní sāha andiví jín ñayívi jín mar jín táca núu cáne ndute, áchi ndajéhe yā.

<sup>8</sup> Yūcuán na te ndíquín inga ndajéhe yā vēji, te ni cahān yā:

Je ni naa í ñuu teyí Babilonia. Chi ni sāha jeē ñayuu táca naciún casíquín ndé i Yaā Dios jeē ní castóo i ya te cándiquín i ídolo jín táca jñiñu néé, áchi ndajéhe uū.

<sup>9</sup> Yūcuán na te ndíquín inga ndajéhe uní vēji, te ni cahān jee ya:

Xeēn coo siquí ñayuu cáchiñúhún quiti xéén jín imagen tí, te jéhe i jñuhun condee jñuní tí jneé i chí ndaha i. <sup>10</sup> Chi nihīn i castigo xeēn siquí cuéchi ní casáha i, chi quiti ní Yaā Dios nuū i, te tuá cone cáhu ní yā. Te ndoho i nuū cayú ñuhún jín azufre, coto táca ndajéhe Yaā Dios jín Yaā cúu Londe. <sup>11</sup> Te ñuhmā nuū cándoho i cánda ní cáni cuiti. Te nduú ñuu tu ndétátú ñayuu cándoho ún jeē ní cachíñúhún quiti xéén jín imagen tí, jín jéé ní jécondee jñuní síhví tí. <sup>12</sup> Jeé yúcuan ñayuu maá Yaā Dios jeé casquicu i jñiñu ndácu ya te cándije vāha i Jesús, cánuú jéé cuánde yí ní i. Achi ndajéhe uní.

<sup>13</sup> Yūcuán na te ni jini sōho ri ñn jñuhun ichi ándiví jéé ní cahān jín ri:

Teé ró jñuhun jeē cahān rí jín ró yāhá: Nacá jeé ndetú táca ñayuu cándije jito ho yō jeé cájihí vjna jín ndé ní cuahān yō. Jendaá chí ndetátú i jeé ní casáha i jñiñu vāha, te jñiñu i un má náa chí sāha jeé quendō vāha i ní cáni, áchi Espiritu.

*Jeē ní nastútú yá ñayuu ñayívi*

<sup>14</sup> Yūcuán na te ni ndacoto ri, te ni jito ri ñn vicó cuijín. Te nuū vicó un néne Yaā ní nduu tēe. Te xini yā ñuhun corona oro, te ndáhá yā ñn hoz xeēn. <sup>15</sup> Te ni quenda inga ndajéhe yā ini templo, te ni cana jee, te cáhān jín Yaā néne nuū vicó un:

Cahnde ní jín hoz ní, te nastútú ní ñayuu ñayívi. Chi je ni quee quiví jeé nastútú ní i nájñuhun táhndé trigo jeé jé ní cuaan, áchi.

<sup>16</sup> Yūcuán na te Yaā néne nuū vicó ni nastútú yá ñayuu váha ini ñayívi, nájñuhun táhndé trigo jín hoz.

<sup>17</sup> Yūcuán na te ni quenda inga ndajéhe yā ini templo jeé iyó andiví, te suni ndáhá yā ñn hoz xeēn. <sup>18</sup> Te nde nuū altar ní quenda tucu inga ndajéhe, te ndiso jñiñu ya siquí ñuhún altar. Te ni cana jee ya, te cáhān yā jín ndajéhe jeé ndahá hó xeēn:

Cahnde ró jín hoz xeēn ró, te nastútú ró ñayuu casáha néé ini ñayívi, nájñuhun jeé cájehnde i chutú ndehē uva jeé jé ní jichi, áchi.

<sup>19</sup> Te ndajéhe un ní jehnde yā jín hoz yā, te ni nastútú yá ñayuu casáha néé ini ñayívi, nájñuhun ndútútú ndéhé uva. Te ni jnaa ya i nuū nihīn i castigo xeēn Yaā Dios, nájñuhun jnáa i ndehē uva nuū taxín. <sup>20</sup> Te ní jéhe ya castigo i yatā ñuu, te ni jica níñi i nájñuhun ndúxi uva. Te ni ndaa ní jinú cūhva jeé sucún yuhu caballo, te ni jica cuahān nde uní ciento kilómetro.

*Ndihúxá ndajéhe jín ndihúxá jñundóho jee sandíhí*

**15**

<sup>1</sup> Te ni jito ri inga jñiñu jéhu ichi ándiví jeé náa ní yō jito yó. Chi cáhīn uxā ndajéhe yā jeé cuāha ndihúxá jñundóho sandíhí na. Te jeé jínu ndihúxá jñundóho yāha, te jinu jeé cuāha Yaā Dios castigo xeēn siquí cuéchi.

<sup>2</sup> Te suni ní jito ri ñn jeé cáa nájñuhun mar, te cáa nájñuhun vidrio jeé ndíndee nájñuhun ñuhún. Te yumar un cáhīn ñayuu ní cacundeyí siquí quiti xéén jín imagen tí, jín jéé tu ní cáquihin i jñuní número jeé cúu síhví tí. Te cándāhá i yaa jeé naní arpa jeé ní jéhe Yaā Dios nuū i. <sup>3</sup> Te cájita i yaa jeé ní tava Moisés, tēe cúu mozo Yaā Dios, jín yaa maá Yaā cúu Londe. Te súcuán cáhān yaa ún:

Yóhoyo náa ní na cájito ná ndihi jñiñu jéhu teyí jéé sāha ní,

Tátá Yaā Dios, chí jñá ní ndihi poder:

Te máni jñiñu ndaá jñiñu váha sāha ní,

jeé cúu ní Rey nuū táca naciún.

<sup>4</sup> Tú ní ñn i iyó jéé ma cónso iyo i nuū ní, Tátá Yaā Dios.

Te ndihi i cahān nahín i jeé yóhoyo cújéhu ní. Chi máñúhún ní máa ní cúu Yaā ndoo Yaā í. Te quijicoo ñayuu táca naciún, chíñúhún i nihín,

chi je ni cajini i jeē ndaā vāha sāha ní táca jniñu.

Achí i cájita i.

<sup>5</sup> Yūcuán na te ni ndacoto ri, te ni jito ri jeē ini andiví nune cuarto i i ni templo nuū íne tabla yūi jeē yosó ley yā. <sup>6</sup> Te ini templo un ní quendacoo ndihúxá ndajéhé jeē cándiso jniñu siquí ndihúxá jñundóho. Te cáñuhun ya sahna fino iyó ndoo te xíñú. Te núhni cinturón oro jicā yā. <sup>7</sup> Te iin jnāhan ndicúún jeē técu ni jéhe iin iin cohō oro nuū ndihúxá ndajéhé un. Te ini cohō un ñuhun chitú castigo xeēn jeē ní jéhe Yaā Dios, Yaā técu ní cání. <sup>8</sup> Te ni chitú ndā ñuhmā ini templo, te suu ni steén jeē yóhoyo cújéhu Yaā Dios jíin poder jnā ya. Te ni iin tu ní cúu quiví ini templo, chí nde na ndíhi ndihúxá jñundóho jeē cuáha ndihúxá ndajéhé yā.

*Siquí ndihúxá cohō jeē ñuhun castigo*

## 16

<sup>1</sup> Yūcuán na te ini templo ni jini sōho ri iin jñuhun cáhān jee jíin ndihúxá ndajéhé yā:

Cuango te cati ró siquí ñayiví ndihúxá cohō jeē ñuhun castigo xeēn jeē ní jéhe Yaā Dios, achí.

<sup>2</sup> Te cuahān ndajéhé iin, te ni jeti ya cohō yā siquí ñayiví. Te táca ñayuu jeē ndeé jñuní quiti xéén un jíin jéē cáchiñuhún imagen tí, ní canecoo ndíhyi xeēn jeē jetú ndasí.

<sup>3</sup> Te ndajéhé uū ní jeti ya cohō yā nuū mar, te ndute mar ní nduu nájñuhun níñí ndiví. Te ní cajihí táca quiti jeē ñuhun ini mar.

<sup>4</sup> Te ndajéhé uní ní jeti ya cohō yā ini táca yúte jíin táca nuū cáne ndute, te ní nduu níñí.

<sup>5</sup> Te ní jini ri jeē cahān ndajéhé jeē ndíso jniñu siquí ndute:

Tátá Yaā Dios, maá ní cúu Yaā ndoo Yaā íi, Yaā iyó vijnā, te ní íyo ní ní cání. Te ndaa sāha ní jeē súcuan ní ndonda ní siquí cuéchi i. <sup>6</sup> Chí ní casáha i jeē ní jeti níñí ñayuu ndoo ní jíin ñayuu ní canacani jñuhun ní. Te vijnā chí ní sāha ní jéē cájihí i níñí, chí ñayuu casáha jniñu néé cácuu i, jeē cánuu ndoho i súcuan.

<sup>7</sup> Te ní jini sōho ri jeē cahān inga nde nuū altar:

Tátá Yaā Dios, maá ní cúu jeē jnā ndíhi poder. Te jniñu váha jniñu ndaa ní sāha ní jéē ní ndonda ní siquí cuéchi i. Achí.

<sup>8</sup> Te ndajéhé cuñ ní jeti ya cohō yā siquí níandí, te ní jéhe Yaā Dios jñuhun jeē ndujíhni ndasí níandí návāha cayú ñayuu. <sup>9</sup> Te xeēn ndasí ní cayú táca ñayuu. Te vésú súcuan te tu ní cánacani ní i stóo i cuéchi i, ní tu ní cácahān i jeē cújéhu Yaā Dios. Chí sa suhva ní cacahān ndevāha i siquí yā jeē ní jéhe ya táca castigo yāha nuū i.

<sup>10</sup> Te ndajéhé uhūn ní jeti ya cohō yā nuū mesa nuū ndácu quiti xéén jniñu. Te ní cuneé ní cáhnu nuū ndácu tí jniñu. Te cáncayihí ñayuu yuhu i jeē cájētū ndasí i.

<sup>11</sup> Te vésú súcuan te tu ní cánacani ní i stóo i jniñu néé casáha i. Chí sa ní cacahān ndevāha i siquí Yaā Dios andiví siquí jeē cájētū ndasí i jíin ndíhyi xeēn cándoho i.

<sup>12</sup> Te ndajéhé iñu ní jeti ya cohō yā siquí yúte cáhnu jeē naní Eufrates. Te ní ichi ndíhi ndute yúte ún, návāha nune iin ichi jee quíjicoo táca rey ichi nuū cáne níandí.

<sup>13</sup> Te ní jito ri jeē ini yuhu coō cáhnu jíin ini yuhu quiti xéén jíin ini yuhu maá téé nácani jñuhun stáhú ní canecoo uní tachí jeē cáca nájñuhun sáhvā. <sup>14</sup> Te tachí ún chí ndajéhé jexeén cácuu, te casáha jniñu jéhu jeē náa ní ñayuu cájito i. Te ní quendacoo tachí un jéē nastútú táca rey ní cáhnu ñayiví, jéē cuajñáhan de siquí Yaā Dios quiví jeē ndíji ya. Te maá yā cúu jeē jnā ndíhi poder. <sup>15</sup> Cuni sōho jíjñáhan ró, chí sanaa ní ró te ndíji ri, nájñuhun jeē iin sanaa ní te quíji ñacuñhá. Te nacā jeē ndetú ñayuu jeē ndito ní i, te ndito yúcun i sahna i, návāha ma cáca vichí lí i, cúu jeē tú na cuéchi coo siquí i jeē cucanu i nuū táca ñayuu, achí yā. <sup>16</sup> Te ní canastútú tachí un táca rey, ní candutútú iin lugar jeē yuhu hebreo naní Armagedón.

<sup>17</sup> Te ndajéhé uxā ní jeti ya cohō yā nuū tachí. Te ini templo andiví jíin nuū mesa nuū ndácu ya jniñu, ní cane iin jñuhun jeē ní cáhān jee:

Je ní jñu, achí.

<sup>18</sup> Yūcuán na te ní ndindéé taja, te níhin, te cáhān taja, te ní jnāa ndasí. Chí nde ní cání jeē iyó ñayuu ñayiví, tu ní jnāa níhin ndasí nájñuhun jeē ní jnāa ní jito ri. <sup>19</sup> Te maá ñuu cújéhu Jerusalén, ní cusán ní nduu uní parte, te ní cáhnu ñayiví ní naa táca ñuu. Te ñuu teyí Babilonia, chí ní sāha nahín yā jeē ní ndutahū i castigo xeēn, chí ní quiti ndasí ní yā siquí cuéchi i. <sup>20</sup> Te ní naa táca isla, te suni yucu tuá gā. <sup>21</sup> Te ichi andiví ní cuun níñí náhnu siquí ñayuu, jeē véyi nde uū xico kilo. Te ní cacahān ndevāha ñayuu siquí Yaā Dios jeē ní cuun ndasí níñí, chí iin jñundóho xeēn ní cuu.

*Jeē ndonda ya siquí ñuu neé Babilonia*

## 17

<sup>1</sup> Yūcuán na te ní quíji iin jñáhan ndihúxá ndajéhé jeē ní candāhá ndihúxá cohō ún, te ní cahān yā jíin rí:

Nehen, te na steén rí nuū rō ndese coo castigo siquí maá ñahan jnéni jeē cúu ñuu cújéhu íne nuū iyó cuéhé ndute. <sup>2</sup> Chí táca rey ñayiví nájñuhun ní casíquí ndeé de jíin ñahan ún, cúu jeē ní castóo de Yaā Dios te cándiquín de jñuhun néé ní steén ña. Te ní sāha ña jeē ñayuu ní cáhnu ñayiví, nájñuhun nájini i te casíquí ndeé i Yaā Dios cúu jeē ní castóo i ya te casáha ndasí i cuéchi. Achí ndajéhé yā.

<sup>3</sup> Te ni sáha ga Espíritu Santo jeē ní jito ndijin rí, te ndajéhé yā un cuáhān yā jín rí nde nuū ñuhun téhé. Te ni jito rí ñn ñahan, yósó ña ñn quití xéén cacuéhé. Te ní cáhnu tí ndeé jñuhun néé jéé quití ní Yaā Dios sáha. Te iyó úxā xiní tí jín úxī ndiquí tí. <sup>4</sup> Te ñahan un ñuhun ña sahma ndihí jín sahma cuehé, te suni ñuhun ña siquí oro jín yū luu jín perla jeē ndeé yahu. Te ndahá ña ñn cohō oro jeē ñuhun chitū jín jñuñ néé ndasí jín jñiñu jnehén jéé jíca jnéni ña. <sup>5</sup> Te jneē ña ndeé ñn shví jéé cúu ñn jñuhun sáhi, te suhva cáhān: Yāha cúu ñuu teyí Babilonia, jeē cúu nájñuhun náná táca jéé cájica jnéni jín jé casáha néé ndasí ini ñayívi, áchí. <sup>6</sup> Yūcuán na te ni jini rí jeē ñahan un nájini ña jeē nájñuhun ni jihí ña niñí ñayuu maá Yaā Dios jín níñi ñayuu ni cajihí siquí jeē ní canacani ndaā i jñuhun Jesús. Te nahán ní naa ni rí ni jito rí ña. <sup>7</sup> Yūcuán na te ni cahān ndajéhé un jín rí:

¿Naun náa ni rō jito ró? Na cástūhun rí nuū rō ndese cúni cahān jñuhun sáhi siquí ñahan un jín quití xéén yósó ña, jeē iyó úxā xiní tí jín úxī ndiquí tí. <sup>8</sup> Quití xéén jeē ní jito ró, chí ní cotecu tí, te vijna chí tuá tí. Te ndenda tucu tí ini túnhchi cúnú, te yūcuán na te quihín tí nuū jnahnú ndetū tí. Te ñayuu cáyūcu ní cáhnu ñayívi, naa ni i coto i nuū quití un jéé ní cotecu tí te ni jihí tí, te natecu tucu tí. Te cácuu i ñayuu jeē tu yósó shví i nuū tútu jeē yósó shví ñayuu cotecu ní cáni jeē ní jécósó shví i nde quívi ní jécóo ñayívi.

<sup>9</sup> "Tāca ñayuu jécūhun vāha ní, cuu tava i cuenta ndese cúu: Ndihúxā xiní tí cácuu nájñuhun uxā yucu nuū néne ñahan ún. <sup>10</sup> Te ndihúxā xiní tí suni cácuu nájñuhun uxā rey. Te uhún rey un je ni naa jeé ndácu de jñiñu, te ñn de ndácu jñiñu vijna, te inga de chí ná tu quiji de. Te núu na quiji de te jecu-ni tiempo coo de. <sup>11</sup> Te quití xéén jeē ní cotecu te tuá iyó tí vijna, maá tí cuu rey unā. Te ñn jñahan ndihúxā rey un cúu tí. Te suni quihín tí nuū jnahnú ndetū tí.

<sup>12</sup> "Te ndihúxí ndiquí jeē ní jito ró cúu nájñuhun uxí rey, te ná tu ndacu de jñiñu jijnáhan de. Te maá de jín quití xéén un, chí nihín jñiñu de cuu de rey jecu-ni tiempo. <sup>13</sup> Te ndihúxí rey un chí squijnáhan de jñuhun, te nacuaña de poder de jín jñiñu ndíso de nuū quití xéén un návāha ndacu tí jñiñu. <sup>14</sup> Te cuajnáhan de jín Yaā cúu Londe. Te Yaā cúu Londe quende yā poder de jijnáhan de. Chí maá yā cúu Jitoho nuū táca jítoto, te maá yā cúu Rey nuū táca rey. Te ñayuu cáhīn jín yā, chí ni nacāji Yaā Dios i te ni cana ya i, te cásquícu vāha i. Achí ndajéhé un.

<sup>15</sup> Te ni cahān gā yā:

Cuehé ndute jeē ní jito ró nuū néne ñahan jíca jnéni, suu cúu ñayuu cuehé táca ñuu, táca yuhu, táca nación. <sup>16</sup> Te ndihúxí ndiquí jeē

ní jito ró jéé névāha quití xéén un, suu cácuu rey jeē coto uhú de ñahan jíca jnéni un. Te sáha de jeē quendōo ndáhú ña te quendōo vichí lí ña. Te caji de cuñu ña te cahmu de ña nuū ñuhún. <sup>17</sup> Chí Yaā Dios scānda ya ini de jeē na sáha de jñiñu cúni yā. Te squijnáhan de jñuhun jeē nacuaña de jñiñu ndíso de nuū quití xéén un, ndacu tí jñiñu nde na squícu táca jñuhun ni cahān Yaā Dios. <sup>18</sup> Te ñahan jeē ní jito ró cúu maá ñuu teyí jéé cujéhu nuū táca rey ñayívi. Achí ndajéhé un.

*Siquí jeē naa ñuu Babilonia*

## 18

<sup>1</sup> Yūcuán na te ni jito rí jeē ní cuun inga ndajéhé yā ni quiji ichi ándivi. Te cújéhu ndasí yā. Te jeē ndíndee yā te ni ndíndee núu ñayívi. <sup>2</sup> Te ni cana jee ya:

Je ni naa ñn ñuu teyí Babilonia. Te ni nduu vehe táca táchi, nuū ñuhun ndinuū tachí neé, jín táca téji, quití quíni jeē tu núnahan ni yó. <sup>3</sup> Chí ñuu un cúu nájñuhun ñn ñahan ndevāha, te ni sáha ña jeē ñayuu táca nación, nájñuhun nájini i te casíquí ndeé i Yaā Dios, cúu jeē ní castóo i ya te casáha ndasí i cuéchi. Te táca rey ñayívi, nájñuhun ni casíquí ndeé de jín ñahan ún jeē ní cajetáhú de jñuhun néé ní steén ña. Te ñayuu ní ñayívi jéé cájeen cáxícó, ní cacucúca i jín cuehé jeneé jeé ní nevāha ña.

<sup>4</sup> Yūcuán na te ni jini sóho rí inga jñuhun jeē ni cahān ichi ándivi:

Maá rō jeé cácuu rō ñayuu maá rí, quendaco rō ini ñuu jñā, návāha ma quívi nduu rō jín táca cuéchi jeé sáha ña, te návāha ma ndóho rō jñúndóho xeén jeé ndoho ña. <sup>5</sup> Chí ni cayā cuehé ndasí cuéchi ña, nájñuhun ñn montón cáhnu ndasí jéé ní cusúcún ndé ándivi. Te vijna te nduxeén Yaā Dios siquí cuéchi ña. <sup>6</sup> Stóho rō ña nájñuhun ni sáha ña jeē ní ndoho sava ga ñayuu. Te nachunaa rō nuū ña doble jñúndóho jeē ní jéhe ña nuū inga ñayuu. Te sáha rō jeé nandicó coo doble siquí ña vesú jeē ní sáha ña siquí inga ñayuu. <sup>7</sup> Te yóho ni satéyí ña maá ña, te cúca ndasí ní cotecu ña. Te suni jín cúhva yúcuan nacuaña rō jéé ndóho xeén ndasí ña. Chí jéni ní ña: Yāha néne rí ndácu rí jñiñu, te tu cúu rí ñahan viuda, te ma quiji cuiti jñúndóho ndoho rí, achí ña. <sup>8</sup> Jeé yúcuan cúu jeē ñn quívi-ni te quiji cuehé jñúndóho siquí ña. Chí cuu ndíyi, te cucuíhá ndasí ní ña, te coo jnamā, te cayú ña nuū ñuhún. Chí yóho iyó poder maá Jítoto yó Yaā Dios, Yaā ní ndonda siquí cuéchi ña, áchí.

<sup>9</sup> Te táca rey ñayívi jéé ní casíquí ndeé de jín ña te ni cotecu cacá ndasí de jín ña, ndahyū de te ndahyū cohó de coto de jeé cánda ñuhmā cayú ña. <sup>10</sup> Te cuñi jíca de chí yuhú de coto de jeé súcuan ndoho ña castigo. Te cahān de jijnáhan de:



Nacā jeē xeēn ndóho ró, ñuu cujéhu Ba-bilonia, chí yá-ni ñuu teyí ní cuu ró núú. Te vijna chí ñn núnúu-ni te ni quee castigo jeē nāā rō, achi de jijnáhan de.

<sup>11</sup> Te tāca tēe ñayiví jēe cájeen cáxicō ñuu ún, ndahyū de te ndahyū cohó de jehē. Chí tuá ndé ñn cuaan ndajniñu cáxicō de. <sup>12</sup> Te ndajniñu cáxicō de un cúu oro, plata, yuū luu jín perla jeē ndeé yahu, jín sahma fino jín sahma seda jeē ndihí jín jēe cuehé. Te suni tāca yujnu jeē asīn jéen xicō, jín tāca ndajniñu luu jeē ní sáha jín marfil jín yujnu lúu jeē ndeé yahu jín cáa cuañ jín cáa hierro jín yúu cuijín luu. <sup>13</sup> Te suni cáxicō de canela jín tāca jíhyo asīn jín súje cutú jín súje uvuā jín tāca perfume jín vino jín aceite jín harina fina jín trigo. Te suni cáxicō de quiti ndiso jín lanchi jín caballo jín carreta, te nde ñayuu cáxicō de jeē sájniñu sáá-ni i. <sup>14</sup> Te cahān de jín ñuu ún:

Ni cujiyo ndihí ndajniñu cúca jeē ní nujnahan ndasí ní rō. Te tāca jēe lúu jeē váha jeē ní cotecu cucá ró, chí ni naa ndihí, te ma nánihin cuiti gā rō, achi de jijnáhan de.

<sup>15</sup> Te tāca tēe ní cajeen ní cacixō ní cacucúca jēe siquī ndajniñu ñuu ún, chí cuiñi jícá de jeē yūhú de coto de castigo coo ñuu ún. Te ndahyū de te ndahyū cohó de. <sup>16</sup> Te cahān de jijnáhan de:

Nacā jeē xeēn ndóho ñuu teyí yáha. Chí ni cuu nájnūhun ñn ñahan jeē ní ñūhun sahma fino, sahma ndihí jín jēe cuehé. Te ni ñūhun ña siquī oro jín yúu luu jín perla jeē ndeé yahu. <sup>17</sup> Te vijna te ñn núnúu-ni te ni naa ndihí tāca ndajniñu váha ún, achi de jijnáhan de.

Te cuiñi jícá táca tēe cáscaca barco, jín ñayuu cuángoo nuū barco, jín tēe cásjniñu ini barco, jín táca gá tēe cásjniñu nuū mar. <sup>18</sup> Chí coto de ñuhmā jeē cayú ñuu ún, te cana jeē de jijnáhan de:

¿Ndeé ine ga ñuu teyí jēe cujéhu nájnūhun ní iyo ñuu yáha? achi de.

<sup>19</sup> Te cosō de ticachā ñūhun xiní de jeē cácuicuhyá ní de. Te ndahyū de te ndahyū cohó de. Te cana jee de jijnáhan de:

Nacā jeē xeēn ndóho ñuu teyí yáha. Chí jín ndajniñu cúca jeē ní iyo ñuu un ní cacucúca táca ñayuu cánevāha barco cájica nuū mar. Te vijna te ñn núnúu-ni te ni naa ndihí-ni, achi de.

<sup>20</sup> Te na cúsiñ ní tāca róhó jēe cáyūcú andiví, siquī jeē ní naa ñuu ún. Te na cúsiñ ní rohó, táca tēe apóstol, jín tēe cáncani jnūhun Yaā Dios, jín ñayuu maá Yaā Dios. Chí ní sáha néé ñuu un siquī rō jijnáhan ró, te jeē yúcuan ní ndonda Yaā Dios siquī, achi de.

<sup>21</sup> Yúcuan na te ñn ndajéhé ndiso poder, ni quihñ ya ñn yuū cáhnu nájnūhun ñn yōso cáhnu, te ní scāne ya ini mar. Te ní cahān yā:

Nájnūhun ní naa yōso yáha, suni súcuan naa Babilonia, ñuu cujéhu teyí. Te ma núcoo

cuiti gā jeē cóto yó núú. <sup>22</sup> Te ní cahān yā jín ñuu ún: Ini calle rō ma cúni sōho cuiti gā ñayuu jeē scáta i yaa arpa jín flauta jín trompeta. Te suni ma cóo cuiti gā ñayuu casáha táca ndajniñu. Te suni ma cúni sōho ga i jeē ñihñ táca molino rō. <sup>23</sup> Te ní ñn lámpara ma sáha ga jeē cúndijin nuū rō. Te ní ma cúni sōho ga i vico jeē cácusí ní ñahan tēe nándāha mēhñu ró. Te ñayuu ní cajeen ní cacixō nuū rō, ní cacujéhu ndasí i ini ñayiví. Te ní stahú ró ñayuu táca nación jín jniñu tasi jín jniñu mágica. Achí ndajéhé un.

<sup>24</sup> Te ñuu un ní nihñ castigo xeēn, chí siquī ñuu un ndeé cuéchi jeē ní jeti niñí táca tēe ní canacani jnūhun Yaā Dios, jín táca ñayuu maá yá, jín táca gá ñayuu ní cajehni i ní cáhnu ñayiví.

## 19

<sup>1</sup> Te ná ní cuu tāca jēe yáha, te ní jini sōho ri jeē cahān jee cuehé ndasí ñayuu ini andiví: Yōhyo cújéhu Yaā Dios. Chí Yaā Dios maá yó cúu jeē ní jnama yóhó.

Te maá yá cujéhu ndasí, te maá yá jññ ndihí poder.

<sup>2</sup> Te ndaā te váha sándaā yā táca jniñu, chí ní ndonda ya siquī cuéchi ñuu néé cújéhu ún.

Chí ní stíví un ñayuu ní cáhnu ñayiví jín jnūhun cásiquí ndeé Yaā Dios.

Te ní sáha ya jeē ní ndutahú ñuu un siquī jeē ní jehni táca mozo yā.

Achí i jijnáhan i.

<sup>3</sup> Te ní cacahān tucu i:

Yōhyo cújéhu ya. Chí ní cáni canda ñuhmā ñuu un jēe cayú, achí.

<sup>4</sup> Te ndihócó cuñ tēe jéhu cándiso jniñu, jín ndicúñ jeē técu, ní cajecuiñí yití de, te ní cachiñúhñ de Yaā Dios, Yaā néne nuū mesa ndácu jniñu. Te ní cacahān:

Amén. Súcuan na cóo. Yōhyo cújéhu ya.

<sup>5</sup> Te nde nuū mesa nuū ndácu ya jniñu ní cahān ñn jnūhun:

Róhó jēe cájeñiñu nuū Yaā Dios,

jín róhó jēe cándiso iyo nuū yá,

jeē cácujeñu jín jēe tu cácujeñu,

na cáhán rō jeē yóhyo váha Yaā cúu ya.

Achí.

### *Vico jeē nándāha Yaā cúu Londe*

<sup>6</sup> Te ní jini sōho ri jeē cacahān ñayuu cuehé ndasí, te ñihñ nájnūhun ñihñ cuehé yūte, te nájnūhun jeē cahān ñihñ taja. Te ní cacahān: Yōhyo cújéhu ya. Chí Jitoho yō Yaā Dios, Yaā jññ ndihí poder,

vijna te ndácu ñihñ ya jniñu.

<sup>7</sup> Te na cúsiñ ní yō, te siñ ndasí na cóo ní yō,

te na cáhán yō jeē yóhyo cújéhu ya.

Chí ní quee quiví jeē nándāha maá Yaā cúu Londe.

Te je iyó túhva ñahan nándāha jín yá, te suu cúu ñayuu maá Yaā Dios.

<sup>8</sup> Te ni nihĩn ña jnũhun cuhun ña sahma fino jeẽ ndoo ndasi te xĩũ.

Achĩ i jĩjnahan i. Te sahma fino un cũu tãcã jniũu ndaã jeẽ casãha ñayuu maã Yaã Dios.

<sup>9</sup> Te ni cahãn ndajéhé yã jiĩn rĩ:

Teẽ ró jnũhun yãha: Nacã jeẽ ndetũ tãca ñãyuu jeẽ ni cana ya quingoo vico nãndãha Yaã cũu Londe.

Te ni cahãn gã ndajéhé un jiĩn rĩ:

Tãca jnũhun yãha cũu jnũhun ndaã ni cahãn Yaã Dios, achĩ yã.

<sup>10</sup> Te ni jecuiñĩ yitĩ rĩ nuũ jehe ndajéhé un jeẽ chĩũhũn rĩ yã nuũ. Te ni cahãn yã jiĩn rĩ:

Ma sãha ró sũcuan. Chi ruhũ suni mozo Yaã Dios cũu rĩ, nãjnũhun maã ró jiĩn tãca hermano ró jeẽ cácanđje vãha jnũhun Jesús. Sa suhva nuũ maã Yaã Dios chĩũhũn ró. Achĩ yã.

Chĩ jnũhun siquĩ Jesús cũu jeẽ cácahãn ndaã ñayuu cácanani jnũhun Yaã Dios.

#### *Yaã yosó siquĩ caballo cuijĩn*

<sup>11</sup> Yũcuãn na te ni jito ri jeẽ nũne andivĩ. Te ni cane iin caballo cuijĩn, te Yaã yosó siquĩ tĩ nanĩ yã Yaã ndaã, Yaã squicu, chi squicu ya jeẽ ni jẽjnũhun ya. Te ndaã sãndaã yã jniũu te ndaã ndõnda ya siquĩ tãca jéneé. <sup>12</sup> Te tinũu yã ndĩndee nãjnũhun yãñuhũn. Te xinĩ yã ñũhun cuehẽ corona. Te yosó iin sĩhvĩ yã jeẽ maã-ni ya cũu jeẽ jinĩ. <sup>13</sup> Te ñũhun ya iin sahma jeẽ ni ñũndaji nuũ niñĩ, te nãní yã Jnũhun Yaã Dios. <sup>14</sup> Te tãcã ndajéhé yã jeẽ iyó andivĩ, cáyosó caballo cuijĩn, cándiquĩn yatã yã. Te cáñuhun sahma fino cuijĩn iyó ndoo. <sup>15</sup> Te ini yuhu maã Yaã jeẽ yosó siquĩ caballo, quẽnda jeẽ cãa nãjnũhun iin espada xeẽn. Te espada un cũu jnũhun ya jeẽ stóho ya ñayuu tãcã naciõn. Te niñin ndacu ya jniũu nuũ i. Te sãndaã yã siquĩ cuẽchi i nãjnũhun jeẽ jeñũ siquĩ ndehẽ uva cájexĩn. Te cuãha ya castigo xeẽn ndoho i jeẽ quitĩ ni yã siquĩ cuẽchi i. Chi maã yã jnã ndihĩ poder. <sup>16</sup> Te sahma ya jiĩn sĩhin ya yosó jnũhun yãha: Rey nuũ tãca rey jiĩn Jitoho nuũ tãca jitoho, achĩ.

<sup>17</sup> Yũcuãn na te ni jito ri iin ndajéhé yã jeẽ ñn nuũ niãndii. Te ni cana jee ya xinĩ tãcã quitĩ ndãva nuũ tachĩ:

Ndututũ ró quijicoo ró cuxĩni ró iin vico cáhnu sãha Yaã Dios. <sup>18</sup> Te caji ró cũũu tãca rey jiĩn capitãn jiĩn tée téyĩ, jiĩn cũũu tãcã caballo jiĩn tée ni cayosó siquĩ tĩ. Te suni caji ró cũũu tãca gã ñayuu, cũu ñayuu casãjniũu cuenta maã jiĩn mozo jeẽ ní cajeen ñayuu, cũu ñayuu cácujeñnu jiĩn ñayuu tu cácujeñnu. Achĩ ndajéhé yã.

<sup>19</sup> Yũcuãn na te ni jito ri maã quitĩ xeẽn jiĩn tãca rey ñayivĩ jiĩn cuehẽ soldado de. Te ni candututũ de jeẽ cuajñãhan de jiĩn maã Yaã yosó caballo jiĩn tãca ndajéhé yã. <sup>20</sup> Te ni jniũ ya quitĩ xeẽn cuahãn tĩ preso jiĩn tée ni nacani jnũhun stáhũ jeẽ ní sãha tãcã jniũu jẽhnu jeẽ ní jito jinũũ quitĩ xeẽn. Chi jiĩn jniũu

jẽhnu un cũu jeẽ ní stáhũ de tãca ñãyuu jeẽ ní cajẽhe jnũhun condiso jnũni quitĩ xeẽn, jiĩn jeẽ ní cachiñũhũn imagen tĩ. Te quitĩ xeẽn un jiĩn tée ni nacani jnũhun stáhũ un, cátecu ndĩndũũ te ni scãne ya nuũ laguna ñuhũn jeẽ cayũ jiĩn azufre. <sup>21</sup> Te jiĩn espada jeẽ cãne yuhu Yaã yosó caballo ni cajihĩ tãcã soldado quitĩ xeẽn un. Te tãcã quitĩ ndãva nuũ tachĩ ni candutũ chĩji tĩ ni cayeji tĩ cũũu de jĩjnahan de.

#### *Siquĩ mil cuiyã*

## 20

<sup>1</sup> Te ni jito ri jeẽ ní cuun iin ndajéhé yã ichi andivĩ. Te ndãhá yã ndacãa jeẽ nũne tũhchi cũnũ ndasi. Te suni ndãhá yã iin cadena cáhnu. <sup>2</sup> Te ni jniũ ya maã cóo cáhnu jeẽ iyó ndé jenahãn ndasi, te nãní tĩ jexeẽn jiĩn Satanás. Te ni jihni yã jeẽ conuhni mil cuiyã. <sup>3</sup> Te ni scãne ya ini tũhchi cũnũ ndasi. Te ni jesi vãha ya, te ni sãcutũ yã yuyáũ, nãvãha ma stahũ gã un ñayuu tãcã naciõn, chi nde na jĩnu mil cuiyã. Te jeẽ yãha mil cuiyã ún, yũcuãn na te cánuũ jéẽ ndajĩ caca cuu jecu na tiempo.

<sup>4</sup> Te ni jito ri tãca mesa nuũ ndãcu jniũu, te yũcuan cáyũcu tãca ñayuu jeẽ ní canihĩn jniũu i sãndaã i jniũu. Te suni ni jito ri anuã tãca ñayuu jeẽ ní cajehnde xinĩ i siquĩ jeẽ ní canacani i jnũhun Jesús jiĩn jnũhun Yaã Dios. Te tu ní cachiñũhũn i quitĩ xeẽn jiĩn imagen tĩ, ni tu ní cajẽhe i jnũhun jeẽ cõndee jnũni tĩ jneẽ i chí ndaha i. Te ni jito ri jeẽ ní natecu i te ni candacu i jniũu jiĩn Cristo mil cuiyã. <sup>5</sup> Yãha cuu ndiyi jeẽ nátecu xĩhna gã. Te tãca gã ndiyi, tu ni cácatecu i, chi nde jeẽ jĩnu mil cuiyã. <sup>6</sup> Te nacã jeẽ ndetũ tãca ñayuu ndoo ánuã jeẽ nátecu xĩhna gã. Chi ma cũu cuiti i vuelta uũ. Te cuu i sutũ nuũ Yaã Dios jiĩn nuũ Cristo, te ndacu i jniũu jiĩn yã mil cuiyã.

<sup>7</sup> Te jeẽ jĩnu mil cuiyã ún, te ndajĩ Satanás te quenda nuũ yĩndihyũ. <sup>8</sup> Te stáhũ tucu ñayuu tãcã naciõn niĩ cáhnu ñayivĩ. Te stáhũ ñayuu ñuu Gog jiĩn Magog. Te sãha jeẽ ndututũ tãca soldado ñuu un jeẽ cuajñãhan de. Te coo cuehẽ ndasi de nãjnũhun ñĩtĩ yumar. <sup>9</sup> Te cuitẽ nũu de quingoo de ñĩ cáhnu ñayivĩ. Te cuiçó ndũũ de ñuu nuũ cáyũcu ñayuu maã Yaã Dios, ñuu jeẽ manĩ yã jiĩn. Te Yaã Dios chi scũun ya ñuhũn ichi andivĩ, te cayũ ndihĩ de. <sup>10</sup> Te jexeẽn jeẽ ní stáhũ tãca ñayuu ún, chi scãne ya quihĩn nuũ laguna ñuhũn jeẽ cayũ jiĩn azufre. Te yũcuãn chi xĩhna gã ni scãne ya quitĩ xeẽn jiĩn tée ni nacani jnũhun stáhũ. Te yũcuãn ndoho nduũ ñuu niĩ cáni cuiti.

#### *Jeẽ sãndaã yã jniũu nuũ mesa cuijĩn*

<sup>11</sup> Yũcuãn na te ni jito ri iin mesa cuijĩn cáhnu, te néne maã Yaã ndãcu jniũu. Te ñayivĩ jiĩn andivĩ ni ndoñũhũn cuahãn jeẽ ní jito ya nuũ, chi tuã ni cũu quẽndõ nuũ

yā. <sup>12</sup> Te ni jito ri tāca ndíyí, jeē ní cujéhnú jín jeē tu ní cujéhnú, cáhīn nuū Yaā Dios. Te ni sāha ya jeē nūne tāca libro, te suni ni nune inga libro jeē yosó síhví ñáyuú cotecu ní cáni. Te ni sándaā yā siquí tāca ndíyí ún, núu ndese jniñu ni casáha i jín ndese yosó núú tāca libro un. <sup>13</sup> Te tāca ndíyí jeē ní cajihí nuū mar, ni nanecoo. Te suni ni nanecoo tāca ndíyí jeē ní cajihí i, jeē ine i máá lugar nuū cáyūcu ánuá ndíyí. Te ni sándaā yā siquí, núu ndese ni casáha ñn ñn i. <sup>14</sup> Yūcuán na te cuehíyí jéhní ñayuu jín lugar nuū cáyūcu ánuá ndíyí, ni snáá yā ni scáne ya cuangoó nuū laguna ñuhūn. Te jeē ndóho ñayuu nuū laguna ñuhūn, yūcuan cúu jeē cúu i vuelta uū. <sup>15</sup> Te yūcuan ní scáne ya tāca ñáyuú ni casáha jniñu néé jeē tu yosó síhví i nuū libro jeē yosó síhví ñayuu cotecu ní cáni.

*Andiví jée jín ñáyiví jée*

**21**

<sup>1</sup> Yūcuán na te ni jito ri andiví jée jín ñáyiví jée. Chi andiví jín ñáyiví xihna ñuhūn ni naa. Te suni tuá mar. <sup>2</sup> Te ruhú Juan, ni jito ri ñuu ñi jeē cúu Jerusalén jeé. Te ñuu un ní cuun vēji ichi ándiví núu néne Yaā Dios. Te ñuu ún luu cáa nájnūhun ñn ñahan jeē ní sátūhva ña ni cucutú ña jeē nándaā ña jín yí ña. <sup>3</sup> Te ni jini sóho ri ñn jnūhun jeē ní cáhān jee ichi ándiví:

Condéhé, chi vijná te ndeé Yaā Dios mēhñu ñáyuú. Te condee yā jín i jínñahan i, te cuu i ñayuu máá yá. Te máá yá condee yā jín i jeē cúu ya Yaā Dios i. <sup>4</sup> Te nacuaa yā ndute tñnú i jínñahan i. Te ma cúu gā ñayuu, ni ma ndahyú gā i, ni ma cucuhýá gā ní i, ni ma jetú gā i. Chi je ni yāha tāca jnūndóho jeē ní íyo, áchí.

<sup>5</sup> Yūcuán na te ni cahān máá Yaā néne nuū mesa:

Condéhé, chi nasáha jeé rí tāca jée íyo, áchí yá.

Te suni ni cahān yā:

Teé ró jnūhun yáha. Chi tāca jnūhun yáha cúu jnūhun jeē jini ndije ró jée ndaa cúu.

<sup>6</sup> Te ni cahān gā yā:

Je ni jīnu. Máá rí cúu nájnūhun letra A xihna ñuhūn jín letra Z jeē sándihí na, chi máá rí ni squeejé ndihí te máá rí sínu. Te tāca ñáyuú cájichí, súcuan-ni cuāha ri coho i ndute cáne jeē cotecu i ní cáni. <sup>7</sup> Tāca ñáyuú jeē cūndeyí síquí jéneé, nihñi i ndihí jeē yáha cuu tahú i. Te cuu ri Yaā Dios i, te cuu i sēhe ri. <sup>8</sup> Te tāca ñáyuú jeē cáyūhú ndoho siquí jnūhun rí, jín ñáyuú tu cácadjé, jín ñáyuú casáha jniñu néé, jín ñáyuú cájehni ndíyí, jín ñáyuú cájica jnéni, jín ñáyuú casáha tásí, jín ñáyuú cáchiñūhūn ídolo, jín tāca ñáyuú castáhú, ñayuu ún chí quívicoo i laguna ñuhūn jeē cayú jín azufre. Te yūcuan cúu jeē cúu i vuelta uū.

*Jerusalén jeé*

<sup>9</sup> Yūcuán na te ni quiji ñn jñahan ndihúxá ndajéhé jeē ní candahá ndihúxá cohó jeē ni ñūhun chitú ndihúxá jnūndóho sandihí. Te ni cahān yā jín rí:

Nehen, te na steén rí nuū rō ñahan jeē nándaā ña cuu ña ñasihí Yaā cúu Londe, áchí yá.

<sup>10</sup> Te ni sāha ga Espíritu Santo jeē ní jito ndijin rí, te ndajéhé un ní jeca ya ruhú cuahān yā jín rí xiní ñn yucu cáhnu súcún. Te ni steén yā nuū rí máá ñuu ñi cujéhnú jeē cúu Jerusalén, te ni cuun vēji nde andiví núu néne Yaā Dios. <sup>11</sup> Te ndíndéé ndasí ñuu un nájnūhun ndíndéé Yaā Dios. Te xíñú nájnūhun xíñú ñn yuū luu jeē ndeé yahu ndasí, nájnūhun yuū cuijín jeē quiyí nájnūhun vidrio. <sup>12</sup> Te yuhu ñúu un ní jicó ndúú ñn jeē cáhnu súcún ndihyú ñuu ún. Te íyo úxí uū yehyí. Te tāca yéhyí un ñn ñn ndajéhé yā. Te tāca yéhyí un yosó síhví ndihúxí uū yucūn Israel. <sup>13</sup> Te lado nuū cáne niāndii íyo úní yehyí. Te lado norte suni íyo úní yehyí. Te lado sur suni íyo úní yehyí. Te lado nuū quée niāndii suni íyo úní yehyí. <sup>14</sup> Te íyo úxí uū yuū náhnu jeē cúu cimientoo máá jée ndihyú ñuu ún. Te tāca yúu un yosó síhví ndihúxí uū apóstol máá Yaā cúu Londe.

<sup>15</sup> Te ndajéhé jeē ní cahān jín rí, ndahá yá ñn yujnu oro jeé chícuāha yá ñuu un jín táca yéhyí jín máá jée ndihyú ñuu ún. <sup>16</sup> Te ñuu ún chí ñn cūhva-ni cúu ndicúún lado. Chi jeē cáni jín jée jité, inuú-ni cúu. Te ndajéhé un ní chícuāha yá ñuu un jín yujnu ún. Te néé uū mil uū ciento kilómetro jeē ñn ñn lado. Te inuú-ni cūhva jeē cáni, jeē sucún, jín jée jité. <sup>17</sup> Te suni ni chícuāha yá máá jée ndihyú ñuu ún, te néé uní xico cuū metro jeé sucún. Te yūcuan cúu cūhva jejniñu ñayuu, jeē suni jéjniñu ndajéhé un.

<sup>18</sup> Te máá jée ndihyú ñuu un ní cuvāha jín yúu cuijín quiyi. Te ñuu ún chí máá nene oro cúu, te cáa nájnūhun vidrio quiyi. <sup>19</sup> Te tāca yúu jeē cúu cimientoo máá jée ndihyú ñuu ún, ní cucutú jín ndinuú yuū luu jeē ndeé yahu. Yuū ñn cúu yuū cuijín quiyi. Te jeé uū cúu yuū ndeé ndí. Te jeé úní cúu yuū pinto. Te jeé cuún cúu yuū cuí ndí. <sup>20</sup> Te jeé uhún cúu yuū pinto jeē ñūhun raya. Te jeé ññú cúu yuū cuehé pinto. Te jeé uxá cúu yuū cuaán quiyi. Te jeé uná cúu yuū cuí ndeé. Te jeé ñn cúu yuū cuaán ndí. Te jeé uxí cúu yuū cuí cujín. Te jeé uxí ñn cúu yuū cuehé cuaán. Te jeé uxí uū cúu yuū ndihí ndí. <sup>21</sup> Te ndihúxí uū yehyí un cácuu uxí uū perla jeē ndeé yahu. Te ñn ñn yéhyí cúu ñn ñn perla. Te máá nene oro cúu calle cáhnu ñuu ún, te quiyí nájnūhun vidrio.

<sup>22</sup> Te tú na templo ni jito ri ini ñuu ún, chi ní cáhnu ñuu un ndeé máá Jítoho yó, Yaā jni ndihí poder, jín Yaā cúu Londe. <sup>23</sup> Te ñuu ún tu jini ñuhūn cundijin jín luz niāndii jín yóó.

Chi jeē ndíndēe máá Yaa Dios cúu jeē cúndijin ñuu ún. Te luz ñuu un cúu máá Yaa Dios Londe. <sup>24</sup> Te ñayuu táca nación ñayivi jeē ní jnama ya, caca i jeē cúndijin luz ñuu un núu i. Te táca rey ñayivi quijicoo de ñuu ún, quin-deca de táca ndajniñu jeē ndeé yahu jín jeē kujéhu de sáha. <sup>25</sup> Te táca yéhyí ñuu ún ma cóndiyū cuiti nduú, chí tú na jecuáa coo. <sup>26</sup> Te ini ñuu ún quijicoo ñayuu táca nación, quin-deca i táca ndajniñu jeē ndeé yahu jín jeē kujéhu i sáha. <sup>27</sup> Te ma quívicoo cuiti ni iin jeē jnehén. Ni ma quívicoo ñayuu casáha jniñu neé jín jeē castáhú. Chi quívicoo máni máá ñayuu jeē yosó síhví i nuú libro jeē yosó síhví ñayuu cotecu ní cání, jeē névaha Yaa cúu Londe.

## 22

<sup>1</sup> Yūcuán na te ndajéhe yā ni steén yā nuú rí iin yūte iyó ndoo. Te ndute un sáha jeē cótecu yō ní cání. Te xítū nájñuhun vidrio, te cáne nuú mesa nuú ndácu Yaa Dios jniñu jín Yaa cúu Londe. <sup>2</sup> Te jica yūte ún sava mēñu calle cáhu ñuu ún. Te ndíndúú lado yuyúte un yhi yujnu jeē cótecu yō ní cání sáha. Te yujnu un jéhe ndehē uxí uú jínu jeē iin cuiyā, chí táca yóó cúun ndehē. Te ndaha yúcu i cúu tajná jeē ndúvaha ñayuu táca nación. <sup>3</sup> Te táca-ni jeē ní cáhan yā jeē násū jeē váha cúu, ma cóo ini ñuu ún. Te ini ñuu ún cuiñi máá mesa nuú ndácu Yaa Dios jniñu jín Yaa cúu Londe. Te ñayuu cáncandje jeē cácuu i mozo yā, chíñuhún i ya. <sup>4</sup> Te coto i nuú yā, te condee síhví yā jneé i. <sup>5</sup> Te ma cóo ga jecuáa ñuu ún. Te ñayuu cáyūcu yūcuán tuá jini ñuhún i jeē cúndijin lámpara nuú i, ni jeē cúndijin niándii. Chí jeē ndíndēe máá Jitoho yō Yaa Dios cúu jeē cúndijin nuú i. Te ndacu i jniñu ní cání cuiti.

### *Jeē cuacuyajni ndiji Cristo*

<sup>6</sup> Yūcuán na te ni cáhan ndajéhe un jín rí: Táca jnúhun yáha cúu jnúhun jeē jini ndije ró jeē ndaá cúu. Te Jitoho yō Yaa Dios, máá yá sáha jín téé cánacani jnúhun ya jeē jín Espíritu yā cánacani de. Te suu máá yā ni tají yá ndajéhe yā návaha steén nuú ñayuu cácuu mozo yā táca jniñu jeē yachí coo.

<sup>7</sup> Ndiji yachí rí, achí yá.

Te nacá jeē ndetū ñayuu chusóhó jnúhun Yaa Dios jeē yosó núu tútu yáha.

<sup>8</sup> Te ruhū Juan, ni jini sóho rí táca jnúhun yáha, te ni jito rí táca jniñu yáha. Te ná ni jini sóho rí ni jito rí, yūcuán na te ni jecuiñí yití rí nuú jéhe máá ndajéhe jeē ní steén táca jniñu yáha núu rí, jeē chíñuhún rí yā nuú. <sup>9</sup> Te ni cáhan ndajéhe un jín rí:

Ma sáha ró súcuan. Chí ruhū suni mozo Yaa Dios cúu rí, nájñuhun máá ró jín táca hermano ró jeē cánacani jnúhun ya, jín ndihi

ñayuu cájetáhú jnúhun yósó nuú tútu yáha. Sa suhva nuú máá Yaa Dios chíñuhún ró. Achí yá.

<sup>10</sup> Te ni cáhan ró ndajéhe un jín rí:

Ma chísañi ró táca jnúhun Yaa Dios jeē yosó núu tútu yáha, chí je cuacuyajni tiempo jeē cúndaá ndihi. <sup>11</sup> Te ñayuu casáha jniñu neé, na sáha ga máá i jniñu neé. Te ñayuu jnehén ánuá, na quéndoo máá i súcuan. Te sa ñayuu casáha jniñu ndaá, na sáha ga i jniñu ndaá. Te ñayuu cáhyo ndoo ánuá, na cáca ndoo ga i súcuan. Achí ndajéhe un.

<sup>12</sup> Jendaá jeē ndiji yachí rí, achí Jesús. Te quiji rí jín táhú cuáha rí nuú iin iin ñayuu, núu ndese jniñu ni casáha i. <sup>13</sup> Máá rí cúu nájñuhun letra A xíhna ñuhún jín letra Z jeē sándihí na, chí iyó rí nde xíhna ñuhún te coo rí ní cání.

<sup>14</sup> Nacá jeē ndetū ñayuu jeē jéhe i jnúhun ndundoo ánuá i nájñuhun ndúndoo sahna. Chí cuu caji i ndehé yujnu jeē sáha jeē cótecu i ní cání, te cuu quívicoo i yéhyí ñuu i ún. <sup>15</sup> Te ichi fuera ñuu ún cuiñi ñayuu tu cáncandje, jín ñayuu casáha tási, jín ñayuu cájca jnéni, jín ñayuu cájehni ndíyí, jín ñayuu cáchíñuhún ídolo, jín ñayuu cácusí ni stahú jñahan.

<sup>16</sup> Máá ruhū Jesús, ni tají rí ndajéhe rí návaha castúhun yá táca jnúhun yáha nuú táca grupo ñayuu cáncandje. Te máá rí ni sáha jeē ni iyo rey David, te ni quiji rí nuú yucún David. Te cúu rí nájñuhun lucero ndíndēe cáne cúndijin. Achí yá.

<sup>17</sup> Te máá Espíritu Santo jín máá ñahan jeē nándaha jín Yaa cúu Londe, cácahan:

Nehen, quívicoo ró ndaha ya, achí.

Te táca ñayuu jeē jini sóho, suni na cáhan i: Nehen, quívicoo ró ndaha ya.

Te táca ñayuu cájichí jeē cácuu i coho i, na quívicoo i ndaha ya, te súcuan-ni na cóho i ndute jeē cótecu i ní cání sáha.

<sup>18</sup> Te táca ñayuu jini sóho jnúhun Yaa Dios jeē yosó núu tútu yáha, cáhan nihin rí jín i: Núu ndé ñayuu chísoó i nuú jnúhun cáhan tutu yáha, te Yaa Dios chísoó yá jnúndóho cáhan tutu yáha, ndoho i. <sup>19</sup> Te núu ndé ñayuu quende i jecu jnúhun cáhan tutu yáha, te Yaa Dios quende yá tahú i jeē yosó núu libro jeē yosó síhví ñayuu cotecu ní cání, te ma nihin i tahú i ini ñuu i ún. Te tutu yáha cúu jeē cáhan siquí táca un.

<sup>20</sup> Te Yaa jeē ní cáhan táca jnúhun yáha, suhva cáhan yá:

Jendaá jeē ndiji yachí rí, achí yá.

Amén. Súcuan na cóo. Jitoho ná Jesús, jícán tahú na jeē ndiji yachí ní.

<sup>21</sup> Te ñuhun ni rí jeē Jitoho yō Jesucristo na sáha ga yá jeē váha róhó jínahan ró. Amén.